


Paipel



The Holy Bible in the Chuukese language of the Federated
States of Micronesia

Paipel

The Holy Bible in the Chuukese language of the Federated States of Micronesia

copyright © 1984, 1989, 1991, 2001 Liebenzel Mission

Language: Chuukese

Translation by: Liebenzell Mission

Old Testament © 1989, 2001 Liebenzel Mission New Testament © 1984, 1991 Liebenzel Mission

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-02-11

PDF generated using Haiola and XeLaTeX on 11 Nov 2022 from source files dated 30 Nov 2021
c48fd7-5e91-508c-a792-018261cf838c

Contents

MATEUS	1
MARKUS	58
LUKAS	94
JOHANNES	154
FÖFÖR	194
ROM	247
1 KORINT	272
2 KORINT	296
KALATIA	311
EFISOS	320
FILIP	329
KOLOSE	336
1 TESALONIKA	342
2 TESALONIKA	348
1 TIMOTY	352
2 TIMOTY	359
TITUS	364
FILIMON	368
IPRU	370
JAMES	388
1 PETRUS	395
2 PETRUS	402
1 JOHANNES	406
2 JOHANNES	412
3 JOHANNES	414
JUTAS	416
PWÄRÄTÄ	419
KÖLFEL	446

Ewe Pworausen Manau makkeen Mateus

Kapas akom

I. Iten ei puk: Mateus, wewen ei it “Än Kot lifang”.

II. Chon makkei ei puk: Mateus, a pwal iteni Lefi, eman lein nöün Jesus kewe chon kaiö. (Mark 2.14)

III. Itelapemongen ei puk: Mine a mak lon ewe Testamentin Lom usun Kraist a pwönüetä.

IV. Kapas aüch^{ean} ei puk: Jesus seni Nasaret i Kraist, ewe kingen chon Juta.

V. Masouen ei puk: Ei puk a asile ngenikich ewe Pworaus Allim, pwe Jesus ewe Chon Amanau, Kot a pwon an epwe tinato. Lon Jesus, Kot a apwönüetä an kewe pwon a pwon ngeni nöün kewe aramas lon ewe Testamentin Lom. Ei Pworaus Allim esap chök fän iten ekewe chon Juta Jesus a uputiu leir o nonom rer, nge pwal fän iten chon fanü^{fan} meinisin.

Makken lon ewe puk Mateus a fokun kokotöch. A popuetä le apworauseni seni än Jesus uputiu, pworauseni an papatais me küna sosot me pworauseni an afalafalfeil o an aiti ngeni aramas kapasen Kot, pwal an apöchöküla aramas lon Kalilea. Mürin ei, ewe puk a apworauseni usun än Jesus sai seni Kalilea tori Jerusalem, pwal usun ekewe mettoch ra fis lon ewe wiken amüchülan manauen Jesus won fanüfan, fokun usun an iräpenges me an manausefäl.

Ei puk a pwäretä pwe Jesus, i ewe Sense mi lap, a wor an pwüüng an epwe awewei än Kot Allük o aiti ngeni aramas usun Mwün Kot. Chomong me lein an afalafal a kinikinitiu lon limu kinikin: (1) Ewe afalafal me won ewe Chuk. Iei masouan: Usun lapalapen ekewe aramas mi choni ewe Mwün Läng, pwal usun wiser, feiöchür me sopolan manauer (Sopun 5-7); (2) Än Jesus kapasen öüröür ngeni ekewe engol me ruoman chon kaiö fän iten ar angang (Sopun 10); (3) än Jesus kewe pworauseni awewe usun ewe Mwün Läng (Sopun 13); (4) an afalafal usun wisen eman chon tapwela mürin Jesus (Sopun 18); (5) an afalafal usun fansoun sopolan fanüfan me wareton ewe Mwün Läng (Sopun 24-25).

VI. Tettelin masouen ei puk:

Tettelin uruwon än Jesus Kraist kewe lewo me an uputiu 1.1–2.23

Än Johannes Soupapatais angang 3.1-12

Än Jesus papatais me an küna sosot 3.13–4.11

Än Jesus angang ngeni aramas lon Kalilea 4.12–18.35

Än Jesus sai seni Kalilea tori Jerusalem 19.1–20.34

Ewe amüchülan wiken än Jesus manau won fanüfan lupwen an nom lon Jerusalem me an nom lon ekewe leni mi arap. 21.1–27.66

Än Jesus manausefäl me an pwä ngeni aramas 28.1-20

Än Jesus Kraist kewe lewo

1.1-17

(Luk 3.23-38)

¹ Iei tettelin uruwon än Jesus Kraist kewe lewo, i eman mwirimwirin Tafit, nge Tafit eman mwirimwirin Apraham.

² Apraham semen Isaak, Isaak semen Jakop, nge Jakop semen Juta me pwiin kewe. ³ Juta semen Peres me Sera, iten iner Tamar, Peres semen Hesron, nge Hesron semen Ram. ⁴ Ram semen Aminatap, Aminatap semen Nason, nge Nason semen Salmon. ⁵ Salmon semen Poas, iten inan Rahap, Poas semen Opet, iten inan Rut, Opet semen Jesi, ⁶ nge Jesi semen Tafit ewe king.

Tafit semen Salomon, a nöüni me won pwülüen Uria we, ⁷ Salomon semen Rehopoam, Rehopoam semen Apia, nge Apia semen Asa. ⁸ Asa semen Jehosafat, Jehosafat semen Jehoram, nge Jehoram semen Usia. ⁹ Usia semen Jotam, Jotam semen Ahas, nge Ahas semen Hiskia. ¹⁰ Hiskia semen Manasa, Manasa semen Amon, nge Amon semen Josia. ¹¹ Josia semen Jehoiachin me pwiin kewe lon fansoun ar oola lon Papilon. ✱

¹² Mürin ar oola Papilon: Jehoiachin semen Sealtiel, nge Sealtiel semen Serupapel. ¹³ Serupapel semen Apiut, Apiut semen Eliakim, nge Eliakim semen Asor. ¹⁴ Asor semen Satok, Satok semen Akim, nge Akim semen Eliut. ¹⁵ Eliut semen Eleasar, Eleasar semen Matan, nge Matan semen Jakop. ¹⁶ Jakop semen Josef pwülüen Maria we, neminewe a nöünätü Jesus mi pwal iteni Kraist.

¹⁷ Iei usun a wor engol me rüanü tettelin aramas seni Apraham tori Tafit, pwal engol me rüanü tettelin aramas seni Tafit tori fansoun ar oola Papilon, pwal engol me rüanü tettelin aramas seni ar oola tori Kraist.

Än Jesus Kraist uputiu

1.18-25
(Luk 2.1-7)

¹⁸ Iwe, iei usun än Jesus Kraist uputiu. Maria inan a kofot ngeni Josef, nge me mwen ar resamwo pwüpwülü a pwä pwe neminewe a pwopwo ren manamanen Ngünmifel. ✱ ¹⁹ Nge Josef eman mwän mi fööri mine a pwüng, esap mochen asäwa Maria mwen mesen aramas, iei mine a ekiekin likitala, nge le monomon chök. ²⁰ Iwe, lupwen a chüen ekieki usun, eman nöün ewe Samol chon läng a pwä ngeni lon an tan o üreni, “Josef, mwirimwirin Tafit, kosap niuokus om kopwe pwülüeni Maria, pun mine a pwopwo ren a pop seni ewe Ngünmifel. ²¹ Epwe nöünöü eman ät, iwe, kopwe äita ngeni Jesus, pun i epwe amanaua aramasan seni ar tipis kana.” ✱ ²² Ekei mettoch meinisin ra fis pwe epwe pwönüetä met ewe Samol a kapas me ren ewe soufos:

²³ “Nengeni, eman föpwül epwe pwopwo o nöüni eman ät, repwe äita ngeni Imanuel, wewen ‘Kot a nonom rech.’” ✱ ²⁴ Iwe, lupwen Josef a pwätä seni an möür, a föri usun mine ewe chon läng a allük ngeni. A angei Maria pwe pwülüan. ²⁵ Nge Josef esap kon ren Maria tori a nöünätü nöün we ät. Iwe, Josef a äita ngeni ewe ät Jesus. ✱

2

Souürür seni fanüen ötiu ra äämwa Jesus

2.1-12

¹ Iwe, Jesus a uputiu lon Petleem lon ewe fanü Jutea lon mwün ewe king Herotes. Mürin ekis fansoun, ekoch mwän mi silelapei pekin kaiö ngeni fü seni fanüen ötiu ra feito Jerusalem. ² Ra ais, “Ia a uputiu ie än

chon Juta we king? Äm aia küna fүүn lupwen a tötä seni ötiu. Iwe, aia feito pwe aipwe asamolu.” ³ Lupwen ewe king Herotes a rong ei pworaus, a fokun osukosuk, pwal chon Jerusalem meinsin. ⁴ Mürin a körifengeni ekewe souasor mi lapu meinsin, pwal ekewe Sensen Allük o aisiniir, ia ewe Kraist epwe uputi ie. ⁵ Iwe, ra pölüeni, “Lon ewe telinimw Petleem lon ewe fanü Jutea. Pun iei usun mine ewe soufos a makkei:

⁶ ‘En Petleem lon ewe fanü Jutea,
kosap fokun kisikis me lein ekewe telinimwen Jutea,
pun eman samol epwe towu senuk, epwe emweni nei aramasen Israel.’ ”

✠

⁷ Iei mine Herotes a körato ekewe souürür ar repwe mwichfengen le monomon o küttafichi seniir fansoun pwään ewe fü. ⁸ Mürin a tiniirela Petleem o ngeniir ei kapasen öüröür, “Oupwe feila o küttafichi ewe mönükol. Nge lupwen oua küna, oupwe asile ngeniei, pwe pwal ngang üpwe feila o asamolu.” ⁹ Wesin än ewe king kapas ngeniir ra feila, lupwen ra fefetal, ewe fü ra fen küna me lon fanüen ötiu a akom mwer tori a üla me won ewe leni ia ewe mönükol a nom ie. ¹⁰ Lupwen ar küna ewe fü a fokun lapalap ar pwapwa. ¹¹ Iwe, ra tolong lon ewe imw o ra küna ewe mönükol me Maria inan we, iwe, ra chapetiu mwan o asamolu. Mürin ra wätü ar kewe lifang: kolt, apach mi pwokus me säfei mi aüchea o fang ngeni. ¹² Iwe, Kot a öüröüra ngeniir lon ar tan, pwe resap chüen liwiniti Herotes, iei mine ra liwinsefälti fanüer won pwal efoch al.

Ewe famili a süla Isip

2.13-15

¹³ Mürin än ekewe souürür feila, eman nöün ewe Samol chon läng a pwä ngeni Josef lon an tan o üreni, “Herotes epwe kütta ewe mönükol pwe epwe niela. Iei mine kopwe pwätä, kopwe angei ewe mönükol me inan we o süla Isip. Oupwe nonom ikenan tori inet üpwe ürenuk pwe oupwe liwin.” ¹⁴ Iwe, Josef a pwätä, a angei ewe mönükol me inan we o ra süla Isip lon ewe chök pwinin. ¹⁵ Ra nonom ikenan tori Herotes a mäla. Ei a fis pwe epwe pwönüetä mine ewe Samol a fen apasa me ren ewe soufos, “Üa körawu nei ät seni Isip.” ✠

Herotes a niela ekewe ätin Petleem

2.16-18

¹⁶ Lupwen Herotes a mefi, pwe ekewe souürür ra atupu, a fokun lingeringer. Iwe, a tinala nöün sounfiu pwe repwe niela ekewe ät meinsin lon Petleem me lükün Petleem mi ierini ruu are kis seni. A föri iei usun, pun a aükü ngeni ewe fansoun pwään ewe fü a silei seni ekewe souürür ngeni ei otun. ¹⁷ Ren ei a pwönüetä mine ewe soufos Jeremaia a fen apasa:

¹⁸ “Aramas ra rongorong akürangen ngüngüres me kechüengau lon Rama. Rahel a kechüeti nöün kana. Esap mochen chipila, pun nöün ra mäla.” ✠

Ewe famili a liwinsefäl seni Isip

2.19-23

¹⁹ Mürin än Herotes mäla, eman nöün ewe Samol chon läng a pwä ngeni Josef lon an tan me Isip ²⁰ o üreni, “Kopwe pwätä o angei ewe ät me inan we, iwe, kopwe liwinsefälti ewe fanü Israel, pun ätekewe mi ekiekin niela ewe ät ra mäla.” ²¹ Iei mine Josef a pwätä, a angei ewe ät me inan we o

ra liwinsefäliiti Israel. ²² Nge lupwen Josef a rong pwe Arkelaus a siwili saman Herotes lon wisan wisen king lon Jutea, a niuokus an epwe feila ikenan. Iwe, Kot a pwal ööröürasefäli, iei mine a feila lon ewe fanü Kalilea ²³ o chonlefanüla lon eu telinimw itan Nasaret. Iei usun a pwönüetä mine ekewe soufos ra fen apasa, “Epwe iteni re Nasaret.” ✧

3

Än Johannes Soupapatais afalafal

3.1-12

(Mark 1.1-8; Luk 3.1-18; Joh 1.19-28)

¹ Lon ewe fansoun Johannes Soupapatais a feila ngeni ewe fanüapön Jutea o popuetä le afalafal. ² Iwe, a apasa, “Oupwe aier seni ämi tipis, pun a arap Mwün Läng.” ✧ ³ Johannes ätewe ewe soufos Aisea a kapas usun lupwen a apasa,

“Eman a kökkö fän leüömong lon ewe fanüapö:

‘Oupwe amolätä alen ewe Samol.

Oupwe awenecharala ewe al epwe fetal won.’” ✧ ⁴ Johannes a üföüf üf mi för seni ülen kamel, ririn lukalapan a för seni silin man, nge anan mongö lifichimas me chönün chunen seni lein pötöwöl.

✧ ⁵ Iwe, aramas ra feito ren seni Jerusalem me unusen ewe fanü Jutea, pwal seni ekewe fanü meinisin ünükün ewe chanpupu Jortan. ⁶ Ra pwärätä ar tipis, nge Johannes a papataisiir lon ewe chanpupu Jortan. ⁷ Nge lupwen Johannes a küna chomongun ekewe Farisi me Satusi mi feito ren pwe repwe papatais, a üreniir, “Ämi serepenit! Iö a ürenikemi pwe oupwe sü seni än Kot song epwe awarato womi?” ✧ ⁸ Oupwe föri sokun föför epwe pwärätä pwe oua aier seni ämi tipis. ⁹ Ousap ekieki pwe oua tongeni sü seni än Kot song ren ämi apasa, ‘Äm mwirimwirin Apraham’. Pun ngang üpwe ürenikemi, pwe Kot a tongeni angei ekei fau o föri mwirimwirin Apraham seniir! ✧ ¹⁰ Ewe kouk a fen molotä pwe epwe pöküela ekewe irä tori warer. Irä meinisin resap uani ua mi mürina repwe pöküpök o koturulong lon ekkei. ✧ ¹¹ Ngang üa papataisikemi ren koluk pwe asisilen ämi aier. Nge ewe eman epwe war me müri epwe papataisikemi ren Ngünmifel me ekkei. I a lap seniei, pwe ngang üsap fich ngeni ai üpwe mwo nge uwou ipwan sus. ¹² A kamwöch an söfölon usun fook pwe epwe aimwüfeseni ekewe föün wiich seni pöön me won ewe lenien wichiwich umwun wiich. Iwe, epwe ionifengeni ekewe föün wiich o uwalong lon an lenien iseis, nge ekewe pöön epwe keniirela lon ekkei esap kunula.”

Jesus a papatais

3.13-17

(Mark 1.9-11; Luk 3.21-22)

¹³ Lon ena fansoun Jesus a feito seni Kalilea o a feila ren Johannes arun ewe chanpupu Jortan, pwe Johannes epwe papataisi. ¹⁴ Nge Johannes a sotuni pwe epwe siwili an we ekiiek. Iwe, a üreni, “Ürürün pwe üpwe fen papatais reöm, nge iei en ka feito rei?” ¹⁵ Iwe, Jesus a pölüeni, “Kopwe chök föri met wisom. Pun ren ei sipwe föri meinisin mine letipen Kot.” Iei

✧ 2:23: Mark 1.24; Luk 2.39; Joh 1.45 ✧ 3:2: Mat 4.17; Mark 1.15 ✧ 3:3: Ais 40.3 ✧ 3:4: 2.King 1.8 ✧ 3:7: Mat 12.34; 23.33 ✧ 3:9: Joh 8.33 ✧ 3:10: Mat 7.19

mine Johannes a tipeeu ngeni. ¹⁶ Iwe, lupwen Jesus a wes me papatais, a müttir ütä me lon ewe koluk. Nge nengeni, läng a sukula ngeni o a küna ewe Ngünün Kot a feitiu won usun lapalapen eman lisom. ¹⁷ Mürin eu möngüngü a möngüngüwu seni läng a apasa, “Tei i nei mi achengicheng, üa unusen pwapwa ren.” ✧

4

Satan a sotuni Jesus

4.1-11

(Mark 1.12-13; Luk 4.1-13)

¹ Iwe, mürin Ngünmifel a emwenala Jesus lon ewe fanüapö pwe epwe küna sosot me ren Tefil. ✧ ² Nge pokiten Jesus esap mongö och lon ükükün faik rän me faik pwin, a mefi echik. ³ Iwe, ewe Tefil a feito ren o üreni, “Are en Nöün Kot, kopwe üreni ekei fau pwe repwe wiliti mongö.” ⁴ Nge Jesus a pölüeni, “A mak lon ekewe Toropwe mi Pin, ‘Aramas resap manau ren mongö chök, pwe ra manau ren iteiten kapas Kot a apasa.’ ” ✧

⁵ Mürin ewe Tefil a panala Jesus Jerusalem, ewe telinimw mi pin o aütai won ungen ewe imwenfel. ⁶ Iwe, a üreni, “Are en Nöün Kot, kopwe aturuketiu me ikei, pun a mak lon ekewe Toropwe mi Pin, ‘Epwe allük ngeni nöün kewe chon läng, pwe repwe tümwünuk.

Repwe pwisuk le pöür kana pwe pecheöm esap chepeti eföü fau.’ ” ✧

⁷ Jesus a pölüeni, “A pwal mak lon ekewe Toropwe mi Pin, ‘Kosap sotuni ewe Samol om we Kot.’ ” ✧

⁸ Mürin ewe Tefil a pwal panatä Jesus won eu chuk mi fokun tekia o aküna ngeni mwün fanüfan meinisin me linger. ⁹ Iwe, a üreni, “Ekei mettoch meinisin üpwe ngonuk, are kopwe chapetiu mwei o fel ngeniei.”

¹⁰ Jesus a üreni, “Kopwe sü seniei Satan! Pun a mak lon ekewe Toropwe mi Pin, ‘Kopwe fel ngeni ewe Samol om Kot o angang ngeni i chök.’ ” ✧

¹¹ Mürin ewe Tefil a likitala Jesus, nge nengeni, ekewe chon läng ra feito ren o tümwünü.

Jesus a popuetä an angang lon Kalilea

4.12-17

(Mark 1.14-15; Luk 4.14-15)

¹² Iwe, lupwen Jesus a rong pwe Johannes a nom lon fötek, a feila Kalilea. ✧ ¹³ Nge esap nonometiu lon Nasaret, nge a feila o nonom lon Kapernaum, eu telinimw mi nom arun ewe nomun Kalilea lon fanüen Sepulon me Naftali. ✧ ¹⁴ Ei a fis pwe epwe pwönüetä mine ewe soufos Aisea a apasa,

¹⁵ “Ewe fanü Sepulon me ewe fanü Naftali won ewe al mi ale ngeni ewe matau,

pekilan ewe chanpupu Jortan me epek, Kalilea, fanüen ekewe chon lükün Israel!

¹⁶ Ekewe aramas mi nom lon rochopwak ra küna eu saram mi watte, nge fän iten chokewe mi nom lon kirochen fanüen mäla eu saram a tintetiu wor.” ✧ ¹⁷ Seni ena fansoun Jesus a popuetä le eäni ei afalafal, “Oupwe aier seni ämi tipis, pun a arap Mwün Läng!” ✧

✧ **3:17:** Ken 22.2; Kölf 2.7; Ais 42.1; Mat 12.18; 17.5; Mark 1.11; Luk 9.35 ✧ **4:1:** Ipr 2.18; 4.15
 ✧ **4:4:** Tut 8.3 ✧ **4:6:** Kölf 91.11-12 ✧ **4:7:** Tut 6.16 ✧ **4:10:** Tut 6.13 ✧ **4:12:** Mat 14.3; Mark 6.17; Luk 3.19-20 ✧ **4:13:** Joh 2.12 ✧ **4:16:** Ais 9.1-2 ✧ **4:17:** Mat 3.2

Jesus a köri föman chon attau

4.18-22

(Mark 1.16-20; Luk 5.1-11)

¹⁸ Iwe, lupwen Jesus a fetal arun ewe nomun Kalilea, a küna ruoman pwipwi, ir chon attau, Simon, a pwal iteni Petrus me pwiin we Andru, ra aturätü nör chew lon ewe noom. ¹⁹ Jesus a üreniir, “Oupwe tapweto müri pwe üpwe aiti ngenikemi usun ämi oupwe attaua aramas.” ²⁰ Lon ewe chök otun ra likitala nör kewe chew o tapwela mürin Jesus. ²¹ Jesus a pwal feila lon eu leni o a küna pwal ruoman pwipwi, James me Johannes nöün Sepeti kewe. Ra nom won waar we fiti semer we Sepeti le wonefi nör kewe chew. Jesus a köriir, ²² nge lon ewe chök otun ra likitala waar we me semer we o tapwela mürin.

Jesus a afalafal o apöchöküla aramas

4.23-25

(Luk 6.17-19)

²³ Iwe, Jesus a fetalfeil lon unusen Kalilea, a aiti ngeni aramas kapasen Kot me lon ekewe imwen felikis, a afalafala ewe Pworaus Allim usun ewe Mwün Kot, a pwal apöchöküla aramas mi eäni sokopaten samau me apwangapwang. ✧ ²⁴ Iwe, pworausen Jesus a chöfetal lon unusen ewe fanü Siria, pwe ekewe aramas ra uwato ren ekewe chon samau meinisin, chokewe mi üriir sokopaten samau o metek, aramas mi waan anü, mään kawakau me aramas mi mwök. Iwe, Jesus a apöchöküleretä meinisin. ²⁵ Eu mwichen aramas mi chomong ra tapwela mürin Jesus seni Kalilea me ewe fanü itan Engol Telinimw, seni Jerusalem me Jutea me ewe fanü ünükün ewe chanpupu Jortan me ewe epek.

5

Jesus a afalafal won Chuk

5.1–7.29

¹ Iwe, lupwen Jesus a küna ewe mwichen aramas mi chomong, a feitä won eu chuk o mottiu ikenan, nge nöün kewe chon kaiö ra feito ren. ² Iwe, Jesus a popuetä le afalafaleer:

Enletin Feiöch

5.3-12

(Luk 6.20-23)

³ “Ra feiöch chon silei pwe ra wöüngau lon pekin ngünür, pun ir repwe mwüni Mwün Läng. ⁴ Ra feiöch chon kechü leluker, pun Kot epwe echipeer. ✧ ⁵ Ra feiöch chon tipetekison, pun ir repwe fanüeni fanüfan. ✧ ⁶ Ra feiöch chon mochen föri mine a pwüing me mwen mesen Kot, pun Kot epwe amenemenöchür. ✧ ⁷ Ra feiöch chon eäni tong, pun Kot epwe pwal eäni tong ngeniir. ⁸ Ra feiöch chon limöch leluker, pun ir repwe küna Kot. ✧ ⁹ Ra feiöch chon afisätä kinamwe, pun ir repwe iteni nöün Kot. ¹⁰ Ra feiöch chon küna riaföü pokiten ar föri mine a pwüing me mwen mesen Kot, pun ir repwe mwüni Mwün Läng. ✧ ¹¹ Oua feiöch lupwen aramas ra aitungauakemi o ariaföüükemi o apasa sokopaten kapas chofona mi ngau usumi pokiten oua tapweto müri. ✧ ¹² Oupwe pwapwa o mwanek, pun liwinimi epwe watte lon läng. Iei usun ra pwal ariaföüü ekewe soufos mi akom mwemi. ✧

✧ 4:23: Mat 9.35; Mark 1.39 ✧ 5:4: Ais 61.2 ✧ 5:5: Kölf 37.11 ✧ 5:6: Ais 55.1-2 ✧ 5:8: Kölf 24.3-4 ✧ 5:10: 1.Pet 3.14 ✧ 5:11: 1.Pet 4.14 ✧ 5:12: 2.Kron 36.16; Föf 7.52

*Salt me Saram**5.13-16**(Mark 9.50; Luk 14.34-35)*

¹³ “Ämi oua usun chök salt fän iten aramas meinisin. Nge are ewe salt a nepatapatala, esap wor och mine sipwe enekeniken ngeni. Esap chüen lomot ngeni och, sipwe chök pöütala nge aramas repwe puri. ✧ ¹⁴ Ämi saramen fanüfan. Eu telinimw a nom won eu chuk esap tongeni monola. ✧ ¹⁵ Esap wor eman aramas a keni eu lamp o a anomu fän eu sepi, nge epwe isetä won lenian, pwe epwe asarama chon ewe imw meinisin. ✧ ¹⁶ Iei usun ämi saram epwe tittin mwen ekewe aramas, pwe repwe küna ämi föföör mürina o mwareiti Sememi lon läng. ✧

*Än Jesus afalafal usun ekewe Allük**5.17-20*

¹⁷ “Ousap ekieki pwe üa feito pwe üpwe amoola än Moses kewe Allük me än ekewe soufos kapasen kait. Ngang üsap feito pwe üpwe amor-erela, nge üa feito pwe üpwe unusen apwönüretä. ¹⁸ Enlet, ngang üpwe ürenikemi, pwe tori än läng me fanüfan repwe morola, esap wor och kükün mesen mak are och tik won eföü mesen mak epwe morola tori an epwe pwönüetä ekei mettoch meinisin. ✧ ¹⁹ Iwe, are eman a purätüu eu me lein ekei allük mi fokun kisikis o aiti ngeni aramas pwe repwe föri iei usun, ätewe epwe fokun kisikis lon Mwün Läng. Nge eman mi apwönüetä kapasen ekei Allük o aiti ngeni aramas pwe repwe föri iei usun, ätewe epwe tekia lon Mwün Läng. ²⁰ Pun üpwe ürenikemi, pwe ämi oupwe chök tongeni tolong lon Mwün Läng are ämi oua föri mine a pwüng me mwen mesen Kot lap seni ekewe Sensen Allük me ekewe Farisi.

*Än Jesus afalafal usun song**5.21-26*

²¹ “Oua fen rongorong usun än ekewe sensen lamalam aiti ngeni ach kewe lewo, ‘Kosap niela aramas. Iö a niela aramas epwe tolong lon kapwüng.’ ✧ ²² Nge ngang üpwe ürenikemi: Iö a songeiti pwiin epwe tolong lon kapwüng, o iö a kapasen turunufas ngeni pwiin epwe tolong lon kapwüng mi lap, nge iö a apasa ngeni pwiin, ‘En mi umwes,’ epwe fich ngeni an epwe tolong lon ewe ekkeiin hell. ²³ Iei mine are kopwe wätä om asor ngeni Kot won ewe rongen asor, o ikenan ka chechemeni pwe pwiim a chou ngonuk, ²⁴ kopwe likiti om we asor mwen ewe rongen asor o liwinla, pwe kopwe achä ngonuk pwiim. Mürin kopwe liwinto o wätä om we asor won ewe rongen asor. ²⁵ Are eman a mochen kapwüng ngonuk pwe a föri nöün toropwen kapwüng, kopwe müttir chächäri lupwen mi chüen wor fansoun, pwe ete aturuk ren soukapwüng, o i epwe atolongok lepöün polis, nge ir repwe aturukolong lon imwen fötek. ²⁶ Enlet, üpwe ürenuk, pwe kosap fokun towu me ikenan tori om kopwe mönätüu unusen liwinin om we tipis.

*Än Jesus afalafal usun lisowu**5.27-30*

²⁷ “Oua fen rongorong pwe ekewe sensen lamalam ra apasa, ‘Kosap lisowu.’ ✧ ²⁸ Nge ngang üpwe ürenikemi: Are eman mwän a nenengeni eman fefin o a mochenia ngeni, ätewe a fen tipis in lisowu ngeni ren

✧ **5:13:** Mark 9.50; Luk 14.34-35 ✧ **5:14:** Joh 8.12; 9.5 ✧ **5:15:** Mark 4.21; Luk 8.16; 11.33✧ **5:16:** 1.Pet 2.12 ✧ **5:18:** Luk 16.17 ✧ **5:21:** Eks 20.13; Tut 5.17 ✧ **5:27:** Eks 20.14; Tut

5.18

an ekieki neminewe lon lelukan. ²⁹ Iwe, are pelifichin mesom epwe emwenukolong lon tipis, kopwe alusawu o pöütala. Pun a fen öch ngonuk pwe eu kükün kifetin inisum epwe pöütüla, lap seni unusen inisum epwe koturulong lon hell. ✧ ³⁰ Nge are pöüifichum epwe emwenukolong lon tipis, kopwe pöküela o pöütala. Pun a fen öch ngonuk pwe eu kükün kifetin inisum epwe pöütüla, lap seni unusen inisum epwe koturulong lon hell.
✧

Än Jesus afalafal usun mwüfesen

5.31-32

(Mat 19.9; Mark 10.11-12; Luk 16.18)

³¹ “Oua fen pwal rong pwe ekewe sensen lamalam ra apasa, ‘Eman mwän mi pöütala pwülüan, epwe ngeni echö toropwen mwüfesen.’ ✧ ³² Nge ngang üpwe ürenikemi: Are eman mwän epwe pöütala pwülüan, nge neminewe esap kirikiringau ngeni, ätewe a föri pwe neminewe a tipisin lisowu are a pwüpwülüsefäl, nge pwal ewe mwän mi pwülüeni ei fefin a tipisin lisowu. ✧

Än Jesus afalafal usun pwon fän akapel

5.33-37

³³ “Oua fen pwal rong usun än ekewe sesen lamalam aiti ngeni ach kewe lewo, ‘Kosap atai om pwon ngeni ewe Samol, nge kopwe apwönüetä mine ka pwon ngeni fän akapel.’ ✧ ³⁴ Nge ngang üpwe ürenikemi: Kosap fokun akapel lupwen ka eäni eu pwon. Kosap öpölü läng, pun iei än Kot lenien mot, ✧ ³⁵ kosap öpölü fanüfan, pun iei än Kot lenien puun pechen, kosap pwal öpölü Jerusalem, pun iei telinimwen ewe king mi lapalap. ✧ ³⁶ Kosap pwal öpölü mökürom, pun kosap tongeni apwecha are acholu emet metan. ³⁷ Kopwe chök apasa, ‘Ewer, ewer,’ ika ‘Apw, apw,’ pun mine a som seni a pop seni ewe mi Ngau.

Än Jesus afalafal usun kütta liwinin föföer mi ngau

5.38-42

(Luk 6.29-30)

³⁸ “Oua fen rongorong pwe ekewe sensen lamalam ra apasa, ‘Are eman a afeiengaua mesen eman, mesan epwe pwal feiengau, nge are eman a tülü ngiin eman, ngiin epwe pwal tütül.’ ✧ ³⁹ Nge ngang üpwe ürenikemi: Ousap liwini än aramas ngau ngenikemi. Are eman epwe pösapei pelifichum, kopwe akulu ngeni pwal epek. ⁴⁰ Are eman a atolongok lon kapwüing, pwe epwe angei üfom söch, kopwe pwal likiti ngeni üfom sekit. ⁴¹ Are eman sounfiu epwe arianuk pwe kopwe uwei pisekin lon ükükün eu mail, kopwe fen etala ruu mail. ⁴² Are eman a tüngor och senuk, kopwe chök ngeni, nge are eman a mochen paro och pisekum, kopwe mwüt ngeni.

Än Jesus afalafal usun ach sipwe echeni chon oputach

5.43-48

(Luk 6.27-28,32-36)

⁴³ “Oua fen rongorong pwe ekewe sensen lamalam ra apasa, ‘Kopwe echeni chon arum, nge kopwe oput chon oputom.’ ✧ ⁴⁴ Nge ngang

✧ 5:29: Mat 18.9; Mark 9.47 ✧ 5:30: Mat 18.8; Mark 9.43 ✧ 5:31: Tut 24.1-4; Mat 19.7; Mark 10.4 ✧ 5:32: Mat 19.9; Mark 10.11-12; Luk 16.18; 1.Kor 7.10-11 ✧ 5:33: Lif 19.12; Num 30.2; Tut 23.21 ✧ 5:34: Jas 5.12; Ais 66.1; Mat 23.22 ✧ 5:35: Ais 66.1; Kölf 48.2 ✧ 5:38: Eks 21.24; Lif 24.20; Tut 19.21 ✧ 5:43: Lif 19.18

üpwe ürenikemi: Oupwe echeni chon oputakemi o iotek fän iten chokewe mi ariaföüükemi, ⁴⁵ pwe oupwe wiliti nöün Sememi mi nom läng. Pun i a atötai förian akkar won ekewe aramasangau me aramasöch, nge a apüngatiu üt won chon pwüng me chon pwüngingau. ⁴⁶ Are oua chök echeni chokewe mi echenikemi, esap wor och liwin oupwe angei. Pwal mwo nge ekewe chon ioni takises ra föri ei sokun. ⁴⁷ Are oua chök kapong ngeni chiechiemi kana, oua ekieki pwe oua föri och mi lap seni än pwal ekewe ekoch aramas föföör? Pwal mwo nge ekewe resap silei Kot ra föri ei sokun. ⁴⁸ Iei mine ämi oupwe unusöch usun Sememi mi nom läng a unusöch! ✧

6

Än Jesus afalafal usun angangen tong

6.1-4

¹ “Oupwe tümwünüfichi, pwe ousap föri ämi föföörün pwüng mwen mesen aramas pwe repwe küna mine oua föri. Pun are oupwe föri iei usun, ousap angei och liwin seni Sememi mi nom läng. ✧ ² Iei mine are oupwe fang ngeni ekewe chon wöüngau och mettoch, ousap asilefetalei mine oua föri, usun ekewe chon likatuputup ra föri lon ar kewe imwen felikis pwal won ekewe al, pwe aramas repwe ingeitiir. Enlet, üpwe ürenikemi, pwe ra fen wes le angei liwiniir. ³ Nge lupwen oupwe fang ngeni ekewe chon wöüngau, oupwe föri lon ei lapalap, pwe fen mwo nge chiechiemi kewe mi fokun kan ngenikemi resap silei usun. ⁴ Iei usun ämi fang ngeni chon wöüngau epwe fis le monomon. Mürin Sememi we a küna mine oua föri le monomon epwe liwini ngenikemi.

Än Jesus afalafal usun iotek

6.5-15

(Luk 11.2-4)

⁵ “Iwe, lupwen oupwe iotek, ousap föri usun ekewe chon likatuputup. Ra efich ar repwe ütã o iotek lon ar kewe imwen felikis pwal lepwokukun ekewe al, pwe aramas repwe küneer. Enlet, üpwe ürenikemi, pwe ra fen wes le angei liwiniir. ✧ ⁶ Nge lupwen ämi oupwe iotek, oupwe tolong lon rumwemi, oupwe apüngala asaman o iotek ngeni Sememi ousap küna. Iwe, Sememi mi küna mine oua föri le monomon epwe liwini ngenikemi. ⁷ Iwe, lupwen oupwe iotek, ousap kapaspat usun chokewe resap silei Kot, pun ra ekieki pwe Kot epwe aüselinger pokiten ar iotekitam. ⁸ Ousap apirüür, pun Sememi a fen silei met oua osupwang ren, mwen ousamwo tüngor ngeni. ⁹ Iwe, iei usun ämi oupwe iotek:

‘Semem lon läng.

Itom epwe pin,

¹⁰ Mwum epwe war, letipom epwe fis
won fanüfan usun chök lon läng.

¹¹ Kopwe ngenikem anem mongö ikenai.

¹² Kopwe amusala äm tipis,

usun pwal äm aia amusala chokana mi tipis ngenikem.

¹³ Iwe, kosap atolongakem lon sosot,

nge kopwe angasakem seni ewe mi ngau.

[Pun om chök mwü me manaman

me ling feilfeilachök. Amen'] ¹⁴ Pun are oupwe amusala än aramas tipis, Sememi mi nom läng epwe pwal amusala ämi tipis. ¹⁵ Nge are ousap amusala än ekewe aramas tipis, Sememi mi nom läng esap pwal amusala ämi tipis. ✧

Än Jesus afalafal usun echikefel

6.16-18

¹⁶ "Iwe, lupwen oupwe echikefel, ousap wowongau usun ekewe chon likatuputup ra föri. Ra awowongaeer, pwe aramas meinisin repwe küna pwe ra echikefel. Enlet, üpwe ürenikemi, pwe ra fen wes le angei liwiniir. ¹⁷ Nge lupwen ämi oupwe echikefel, oupwe epiti möküremi o oresi wonmesemi, ¹⁸ pwe ekewe aramas resap silei pwe oua echikefel. Nge Sememi we ousap küna, i epwe silei. Iwe, Sememi mi küna mine oua föri le monomon epwe liwini ngenikemi.

Än Jesus afalafal usun ach ioni wöüch lon läng

6.19-21

(Luk 12.33-34)

¹⁹ "Ousap iseis wöümi fän püsin itemi won fanüfan, ia ekewe pwötür me parang ra atarela, nge chon solä ra atai o soläni. ✧ ²⁰ Nge oupwe iseis wöümi lon läng ia ekewe pwötür me parang resap tongeni atarela, nge chon solä resap tongeni atai o soläni. ²¹ Pun ia wöümi a nom ie, ikenan lelukemi epwe pwal nom ie.

Än Jesus afalafal usun ewe saramen inis

6.22-23

(Luk 11.34-36)

²² "Mas saramen ewe inis, usun chök eu lamp. Are mesom a fat, unusen inisum a saram. ²³ Nge are mesom a fatangau, unusen inisum epwe rochopwak. Iei mine are ewe saram mi nom lomw a wiliti rochopwak, epwe ifan me watten rochokichin rochopwakum!

Än Jesus afalafal usun Kot me wöün fanüfan

6.24-34

(Luk 16.13; 12.22-31)

²⁴ "Esap wor eman a tongeni angang ngeni ruoman samol. Pun epwe oput eman, nge epwe echeni ewe eman, ika epwe tipeni eman, nge epwe turunufasei ewe eman. Ousap tongeni angangepök ngeni Kot me wöün fanüfan. ²⁵ Iei mine üpwe ürenikemi, pwe ousap öüreki manauemi usun mine oupwe äni are ünümi, ousap öüreki mine oupwe üföüf. Ifa usun, manau esap aüchea seni mongö, ika ewe inis esap aüchea seni üf? ²⁶ Oupwe nenengeni ekewe mansüsü: Resap fofot, resap pwal kinikin, esap wor ar lenien iseis, nge Sememi lon läng a fen amongöniir. Ifa usun, ämi ousap kon aüchea seniir? ²⁷ Ifa usun, iö leimi epwe tongeni atama manuan ren an öürek? ²⁸ Pwota oua öüreki üfemi? Oupwe nenengeni ekewe kiopun lemäl usun ra märitä: Resap angang, resap pwal föri üfer. ²⁹ Nge ngang üpwe ürenikemi, pwe fen mwo ewe king Salomon lon wöün meinisin esap üföüf üf mi ling usun lingen ekei pön kiop. ✧ ³⁰ Are iei usun än Kot aüfa ekewe fetilin lemäl, fetil mi wor ikenai, nge lesor epwe koturulong lon um, ifa usun, Kot esap fokun aüföüfakemi lap seniir? Ämi oua lükülük kisikis! ³¹ Iei mine ousap öürek o apasa, 'Meta sipwe

mongö? ika 'Meta sipwe ünümi?' ika 'Meta sipwe üföüf?' ³² Pun chokewe resap silei Kot ra chök ekieki usun ekei mettoch. Iwe, Sememi lon läng a silei pwe oua osupwang ren ekei mettoch. ³³ Nge oupwe chök ekieki lon letipemi ewe Mwün Kot me pwüngün, iwe, i epwe ngenikemi ekei mettoch meinisin. ³⁴ Iei mine ousap öürek usun ewe rän leson, pun leson epwe püsin anafa öürekin lon. Eu me eu rän epwe püsin wor osukosuken lon.

7

Usun apwüngü aramas

7.1-6

(Luk 6.37-38,41-42)

¹ "Ousap apwüngü aramas, pwe Kot esap apwüngükemi. ² Pun Kot epwe apwüngükemi won ewe chök lapalap oua apwüngü aramas won. Epwe eäni ngenikemi ewe chök aükük oua eäni ngeni aramas. ✱ ³ Pwota ka küna ewe kükün pipi mi nom lon mesen pwiüm, nge kosap mefi ewe irä lon püsin mesom? ⁴ Epwe ifa usun om kopwe tongeni üreni pwiüm, 'Kopwe mwüt ngeniei ai üpwe uwawu ewe kükün pipi mi nom lon mesom,' lupwen a wor ewe irä lon püsin mesom? ⁵ En eman chon likatuputup! Kopwe akomwen uwawu ewe irä seni lon mesom, iwe, mürin kopwapw tongeni künafichi om kopwe uwawu ewe kükün pipi seni lon mesen pwiüm.

⁶ Ousap ngeni ekewe kolak mine a pin, pun repwe chök kul o kükemi. Ousap mone ngeni ekewe pik ämi kewe föün pwei mi aüchea, pun repwe chök puriretiu fän pecher.

Tüngor, küt me fichifich

7.7-12

(Luk 11.9-13)

⁷ "Oupwe tütüngor o epwe wor lifangemi. Oupwe küküt o epwe wor künaemi. Oupwe fichifich o epwe wor asam mi suk ngenikemi. ⁸ Pun iö a tütüngor epwe angei och. Iö a küküt epwe künakün, nge iö a fichifich, epwe wor asam mi suk ngeni. ⁹ Iö leimi ämi kana sam nöün epwe tüngorei eföü pilawa, nge epwe ngeni eföü fau? ¹⁰ Nge are epwe tüngor eman ik, epwe ngeni eman serepenit? ¹¹ Iwe, are mwo ämi aramas mi ngau, nge oua silei ämi oupwe fang ngeni nöümi lifang mi mürina, epwe fen ifan me watten än Sememi lon läng fangala mettoch mi mürina ngeni chokewe mi tüngorei!

¹² Oupwe föri ngeni aramas usun mine oua mochen repwe föri ngenikemi. Pun iei masouen än Moses kewe allük me än ekewe soufos kapasen kait. ✱

Ewe asam mi pwangekükün

7.13-14

(Luk 13.24)

¹³ "Oupwe tolong lon ewe asam mi pwangekükün! Pun a pwangemong ewe asam o chömong ewe al mi ale ngeni feiengau esemüch, nge chokewe mi fetal won ra chomong. ¹⁴ Nge a pwangekükün ewe asam o chökükün ewe al mi ale ngeni manau esemuch. Mi wor ekoch chök aramas mi fetal won ei al ngeni manau.

Efoch irä me uan

7.15-20

(Luk 6.43-44)

¹⁵ “Oupwe afälikemi ren ekewe soufos chofona, ra feito remi lon lapalapen sip me lükün, nge me lon letiper a wewe ngeni tipen ekewe wolif mi mwacho. ¹⁶ Ämi oupwe silleniir ren mine ra föri. Ekewe iräföläfölä resap uani uän kurukur, nge ekewe lantana resap uani uän apel. ¹⁷ Efoch irä mi öch a uani ua mi mürina, nge efoch irä mi ngau a uani ua mi ngau. ¹⁸ Efoch irä mi öch esap tongeni uani ua mi ngau, nge efoch irä mi ngau esap tongeni uani ua mi mürina. ¹⁹ Iwe, ekewe irä resap uani ua mi mürina repwe pöküpök o koturulong lon ekkei. ✧ ²⁰ Iei usun ämi oupwe silleni ekewe soufos chofona ren mine ra föri. ✧

Üsap fokun silekemi

7.21-23

(Luk 13.25-27)

²¹ “Esap aramas meinisin mi aita ngeniei ‘Samol, Samol’ repwe tolong lon Mwün Läng, nge chokewe chök mi föri letipen Semei lon läng. ²² Chomong repwe apasa ngeniei lon ewe ränin kapwüng, ‘Samol, Samol, ifa usun, äm aisap afalafal fän itom? Aisap asüela anün rochopwak fän itom? Aisap pwal föri chomong manaman fän itom?’ ✧ ²³ Mürin ngang üpwe üreniir, ‘Ngang üsap fokun silekemi. Oupwe sü seniei, ämi chon föri föföri mi ngau!’

Ruoman chon kaü imw

7.24-27

(Luk 6.47-49)

²⁴ “Iei mine are eman a rongorong ai kei kapas o aleasochis ngeniir a wewe ngeni eman mwän mi tipachem, a aüetä imwan won achau. ²⁵ Iwe, a püng ütemong, chanpupu ra pwtö a pufetal o asepwäl a pöchökül le eniti ewe imw. Nge ewe imw esap turula, pun a kaütä won achau. ²⁶ Nge iö a rongorong ai kei kapas o aleasolap ngeniir a wewe ngeni eman mwän mi tiparoch, a aüetä imwan won pi. ²⁷ Mürin a püng ütemong, chanpupu ra pwtö a pufetal o asepwäl a pöchökül le eniti ewe imw. Iwe, a turula, nge ewe imw a unusen tatakis.”

Usun än Jesus manaman

7.28-29

²⁸ Iwe, lupwen Jesus a wes le kapas won ekei mettoch, ewe mwichen aramas a fokun weitifengeni usun an afalafal, ²⁹ pun a afalafal usun eman mi wor an manaman, nge esap afalafal usun nöür kewe Sensen Allük. ✧

8*Jesus a apöchöküla eman mi rupun pwötür*

8.1-4

(Mark 1.40-45; Luk 5.12-16)

¹ Iwe, lupwen Jesus a feitiu me won ewe chuk, eu mwichen aramas mi chomong a tapwela mürin. ² Iwe, eman mwän mi üri rupun pwötür a feito ren Jesus, a fotopwäsuk me mwan o üreni, “Ai samol, are ka mochen, ka tongeni alimöchüei.” ³ Jesus a aitiela pöün, a atapa ewe mwän o apasa, “Ngang üa mochen, kopwe limöch.” Lon ewe chök otun ewe rupun

✧ 7:19: Mat 3.10; Luk 3.9 ✧ 7:20: Mat 12.33 ✧ 7:22: Kölf 6.8 ✧ 7:29: Mark 1.22; Luk 4.32

pwötür won ewe mwän a wesila. ⁴ Mürin Jesus a üreni ewe mwän, “Kopwe pii, pwe kosap üreni eman usun mine a fis. Nge kopwe feila ren ewe souasor pwe epwe nenengenuk. Iwe, kopwe eäni ewe asor Moses a allük fän iten limelim, pwe epwe alletätä ngeni aramas pwe ka limöch.” ✧

Jesus a apöchöküla nöün eman meilapen sounfiu chon angang

*8.5-13
(Luk 7.1-10)*

⁵ Lupwen Jesus a tolong lon ewe telinimw Kapernaum, eman meilapen sounfiun Rom a churi o tüngormau ngeni pwe epwe alisi. ⁶ Iwe, a üreni, “Ai samol, nei chon angang a mwenilong leimw, esap tongeni mwökütüküt, a pwal fokun watte an metek.” ⁷ Jesus a üreni, “Üpwe feila o apöchöküla.” ⁸ Nge ewe meilapen sounfiu a üreni, “Ai samol, ngang üsap eman aramas mi aüchea ngeni om kopwe feito lon imwei. Nge kopwe chök apasa och kapas, iwe, nei we chon angang epwe pöchökületä. ⁹ Pun pwal ngang eman mi nom fän nemenien ekewe meilap seniei, nge mi pwal wor sounfiu ra nom fän nemeniei. Üa üreni eman, ‘Kopwe feila,’ iwe, a feila. Üa pwal üreni eman, ‘Kopwe feito,’ iwe, a feito. Üa üreni nei amanau, ‘Kopwe föri ien me ien,’ iwe, a föri.” ¹⁰ Iwe, lupwen Jesus a rongorong ekei kapas, a mairü ren o üreni ekewe aramas mi tapwela mürin, “Enlet, üa ürenikemi, üsap fokun küna eman lon Israel a eäni ei sokun lükülük. ¹¹ Üpwe ürenikemi, pwe chomong aramas repwe feito seni ötiu me lotou o mot arun chepel ren Apraham, Isaak me Jakop lon ewe kametip lon Mwün Läng. ✧ ¹² Nge chokewe itä ürürün repwe nom lon ewe Mwün Kot repwe koturuwu lon ewe lenien rochopwak ia repwe pupuchör o akarüngi ie.” ✧ ¹³ Mürin Jesus a üreni ewe meilapen sounfiu, “Kopwe liwinla le imwom, epwe fis ngonuk usun ka lükü.” Iwe, nöün ewe meilapen sounfiu we chon angang a pöchökületä lon ewe chök otun.

Jesus a apöchöküla chomong aramas

*8.14-17
(Mark 1.29-34; Luk 4.38-41)*

¹⁴ Iwe, Jesus a feila lon imwen Petrus. Ikenan a küna inen pwülün Petrus, a eäni eu samaun pwichikar. ¹⁵ Jesus a atapa pöün, iwe, ewe pwichikar a towu seni. Mürin neminewe a pwätä o angang ngeni. ¹⁶ Iwe, lekuniolun ewe rän, lupwen akkar a tuputiü, aramas ra uwato ren Jesus chomong aramas mi waan anü. Jesus a atowu ekewe ngününgau ren an kapas o apöchöküla chokewe meinisin mi samau. ¹⁷ A föri ei an epwe pwönüetä mine ewe soufos Aisea a apasa, “A uwei ach samau o mwärei ach cheuch.” ✧

Weiresin än eman epwe tapwela mürin Jesus

*8.18-22
(Luk 9.57-62)*

¹⁸ Lupwen Jesus a küna ewe mwichen aramas mi chomong a nom ünükün, a üreni nöün kewe chon kaiö, “Ousipwe feila epek ewe noom.” ¹⁹ Iwe, eman Sensen Allük a feito ren o üreni, “Sense, ngang üa molotä ai üpwe etuk ekis meinisin ia kopwe feila ie.” ²⁰ Jesus a üreni, “Ekewe foks a wor pwanger fän pwül, ekewe mansüsü a wor faser, nge Nöün Aramas esap wor lenian ia epwe konola ie.” ²¹ Nge pwal eman nöün kewe chon kaiö a üreni, “Ai samol, kopwe akomwen mwüt ngeniei ai üpwe liwinla

mwo o peiaseni semei.” ²² Jesus a pölüeni, “Kopwe tapweto müri. Kopwe likiti ngeni ekewe mi mäla repwe püsin peiaseni ar somä.”

Jesus a aükätüu eu mölümöl

8.23-27

(Mark 4.35-41; Luk 8.22-25)

²³ Iwe, lupwen Jesus a tötä won efoch wa, nöün kewe chon kaiö ra eti. ²⁴ A müttir fis eu mölümöl mi pöchökül lon ewe noom o ekewe no ra nulong leföön ewe wa, pwe a arapakan ngeni an epwe kokola. Nge Jesus a chök möür. ²⁵ Iwe, ekewe chon kaiö ra feila ren, ra föngünätä o üreni, “Äm Samol, kopwe amanauakich! Sia arapakan ngeni ach sipwe le mäla!” ²⁶ Jesus a üreniir, “Pwota oua niuokus? Pwota iei me lükükisikisimi.” Mürin a ütä o fos ngeni asepwäl me no pwe repwe üküti. Iwe, ewe asepwäl a söötüu o a fokun lüala won matau. ²⁷ Iwe, ir meinisin ra weitifengeniir o apasa, “Met sokun aramas ätei, pwe asepwäl me no ra mwo nge aleasochisi?”

Jesus a angasa ruoman mwän mi wor anün rochopwak wor

8.28-34

(Mark 5.1-20; Luk 8.26-39)

²⁸ Lupwen Jesus a tori ewe fanüen Katara mi nom epek ewe noom, ruoman mwän mi feito seni ewe lenien peias ra churi. Ekei mwän anün rochopwak ra wäniir, ra fokun rochongau pwe esap wor eman a tongeni fetal won ewe al. ²⁹ Lon ewe chök otun ra puchörütä, “En Nöün Kot, met ka mochen föri ngenikem? Ifa usun, ka feito pwe kopwe ariaföüükem mwen ewe fansoun apwüng?” ³⁰ A wor epwi pwiin pik mi chomong, ra mongöfeil ekis toauala seni ewe leni. ³¹ Iwe, ekewe anün rochopwak ra tüngormau ngeni Jesus, “Are kopwe asükeemila, kopwe tinikeemila, pwe aipwe tolong lon ekewe pik.” ³² Jesus a üreniir, “Oupwe feila!” Iei mine ekewe anün rochopwak ra towu seni ekewe mwän o tolong lon ekewe pik. Iwe, unusen ewe pwiin pik ra sätiü lepokun ewe achau o turulong lon ewe noom, iwe, ra mop meinisin. ³³ Mürin ekewe chon foleni ekewe pik ra süla o tolong lon ewe telinimw, iwe, ra apworausä unusen met a fis ngeni ekewe mwän ekewe anün rochopwak ra wäniir. ³⁴ Iei mine chon ewe telinimw meinisin ra feila pwe repwe churi Jesus. Iwe, lupwen ra küna, ra tüngormau ngeni an epwe feila seni fanüer we.

9

Jesus a apöchöküla eman mwän mi mwök

9.1-8

(Mark 2.1-12; Luk 5.17-26)

¹ Iwe, Jesus a tötä won efoch wa o liwinsefäliiti pekilan ewe noom ngeni püsin an telinimw. ² Ekokh aramas ra ekieto ren eman mwän mi mwök won an peet. Lupwen Jesus a küna ar lükülük, a üreni ewe mwän mi mwök, “Nei, kopwe apilükülük! Om tipis kana ra musala.” ³ Mürin ekoch ekewe Sensen Allük ra ekieki lon leluker, “Ei mwän a eäni kapasen turunufas!” ⁴ Nge Jesus a silei ar ekiek o üreniir, “Pwota oua ekieki ei sokun ekiek mi ngau lon lelukemi?” ⁵ Meta a mecheres, ai apasa, “Om tipis kana ra musala, are ai apasa, ‘Kopwe ütä o fetal?’” ⁶ Iwe, ngang üpwe alükülükü ngenikemi, pwe Nöün Aramas a wor an pwüüng won fanüfan an epwe amusala tipis.” Iei mine a üreni ewe mwän mi mwök, “Kopwe ütä, angei kiom o feila lon imwom.” ⁷ Mürin ewe mwän a ütä o feila lon

imwan. ⁸Iwe, lupwen ewe mwichen aramas a küna mine a fis, ra niuokus o mwareiti Kot ren an ngeni aramas ei sokun manaman.

Jesus a köri Mateus

9.9-13

(Mark 2.13-17; Luk 5.27-32)

⁹Iwe, lupwen Jesus a sowwela an sai seni ikenan, a küna eman chon ioni takises itan Mateus, a mot lon an ofes. Iwe, a üreni, “Kopwe tapweto müri.” Mateus a ütä o tapwela mürin Jesus. ¹⁰Iwe, a fis pwe Jesus a mot ngeni mongö lon imwen Mateus, nge chomong chon ioni takises me chon tipis ra feito o eti Jesus me nöün kewe chon kaiö le mongö. ¹¹Lupwen ekewe Farisi ra küna ei, ra üreni nöün kewe chon kaiö, “Pwota nöümi we sense a mongöfengen me ekewe chon ioni takises me chon tipis?” ¹²Jesus a rongorong ar kei kapas o üreniir, “Eman sousafei esap lomot ngeni aramas mi pöchökül, pwe a lomot ngeni chök ekewe chon samau. ¹³Oupwe feila o kütta wewen ei kapas lon ewe Toropwe mi Pin, ‘Üa mochen pwe aramas repwe eäni tong enlet, nge sap ar repwe asor man ngeniel.’ Ngang üsap feito pwe üpwe kökköri ekewe chon pwüing, pwe fen ekewe chon tipis.”

Kapas ais usun echikefel

9.14-17

(Mark 2.18-22; Luk 5.33-39)

¹⁴Mürin nöün Johannes Soupapatais kewe chon kaiö ra feito ren Jesus o aisini, “Pwota äm chök me ekewe Farisi aia echikefel fän chomong, nge noumw kewe chon kaiö resap fokun echikefel?” ¹⁵Jesus a pölüeniir, “Ifa usun, oua ekieki pwe ekewe chon kökkö ngeni fetallapen apwüpwülü ra letipeta lupwen ewe mwän apwüpwülü söfö a nom rer? Apw! Nge epwe war ewe rän lupwen aramas repwe angei seniir ewe mwän apwüpwülü söfö fän pöchökül, lon ena otun repwapw echikefel. ¹⁶Esap wor eman aramas epwe teiätä ekam mangaku mi fö won echö üf mi mes, pun ewe ekam mangaku mi fö epwe nürfengen o afisätä pwe kamwen ewe üf epwe wattela. ¹⁷Esap pwal wor eman a alölöülong wain mi fö lon pör mi mes seni silin man, pun ekewe pör repwe mökküla o ewe wain epwe nitu, nge ekewe pör repwe fokun tala. Pun a öch pwe wain mi fö epwe nom lon pör mi fö, pwe ir me ruu repwe nükünüköch.”

Jesus a amanauasefäli eman nengin o apöchöküla eman fefin

9.18-26

(Mark 5.21-43; Luk 8.40-56)

¹⁸Iwe, lupwen Jesus a chüen kapas ngeniir, eman nöüwis a feito ren, a fotopwäsuk mwan o üreni, “Nei we nengin a chök mäla iei, nge kopwe feito o iseis poumw won, pwe epwe manau.” ¹⁹Iwe, Jesus a ütä o etala, nge nöün kewe chon kaiö ra pwal eti.

²⁰Iwe, eman fefin mi riaföü ren an samaun fefin lon ükükün engol me ruu ier a feito me lükisökürün Jesus o atapa lepwülün üfan. ²¹Pun a ekieki lon lelukan, “Are üpwe chök atapa üfan nan, üpwe pöchökületä.” ²²Iwe, Jesus a kul, a küna neminewe o üreni, “Nei, kopwe apilükülük, om lükülük a apöchökülök.” Lon ewe chök otun ewe fefin a pöchökületä.

²³Mürin Jesus a feila lon imwen ewe nöüwis. Nge lupwen a küna ekewe chon ettiki pisekin ettik won ewe mi mäla, pwal ekewe aramas mi ngüngüres o kechü, ²⁴a üreniir, “Ämi meinisin oupwe towu me ikei! Ewe

nengin esap mäla, pwe a chök möür!” Mürin ir meinsin ra takiri. ²⁵ Nge lupwen ekewe aramas ra towu lükün, Jesus a tolong lon rumwen ewe nengin, a amwöchü pöün, iwe, ewe nengin a pwätä. ²⁶ Iwe, ei pworaus a chöfetal won unusen ewe fanü.

Jesus a aneloi mesen ruoman chon chun

9.27-31

²⁷ Lupwen Jesus a feila seni ewe leni, ruoman mwän mi mesechun ra tapwela mürin. Ra kökkö ngeni fän leüömong, “Nöün Tafit, kopwe tongekem!” ²⁸ Iwe, lupwen Jesus a tolong lon ewe imw, ekewe ruoman chon chun ra tolong ren. Jesus a aisiniir, “Oua lükü pwe ngang üa tongeni aneloi mesemi?” Ir ra pölüeni, “Ewer, äm samol.” ²⁹ Mürin Jesus a atapa meser o apasa, “Epwe fis ngenikemi mine oua lükü.” ³⁰ Iwe, a nenela meser. Nge Jesus a fokun pese ngeniir, pwe resap üreni eman mine a fis. ³¹ Nge ir ra feila o asilefeili ewe pworaus usun Jesus lon unusen ewe fanü.

Jesus a alisi eman mwän mi awemwöch

9.32-34

³² Iwe, lupwen ekewe ruoman mwän ra feila, ekoch aramas ra uwato ren Jesus eman mwän mi awemwöch, pokiten eman anün rochopwak a wäni. ³³ Lon ewe chök otun Jesus a atowu ewe anün rochopwak seni ewe mwän, ei mwän a popuetä le kapas. Iwe, ekewe aramas meinsin ra mairü o apasa, “Ousisamwo küna och usun ei lon Israel.” ³⁴ Nge ekewe Farisi ra apasa, “Ewe samolun anün rochopwak a ngeni ätei an manaman pwe epwe asüela ekewe anün rochopwak.” ✧

Än Jesus tongei aramas

9.35-38

³⁵ Iwe, Jesus a fetalfeil lon ekewe telinimw me sopw meinsin. A aiti ngeni aramas kapasen Kot lon ekewe imwen felikis, a afalafala ewe Pworaus Allim usun ewe Mwün Kot o apöchöküla aramas mi eäni sokopaten samau me apwangapwang. ✧ ³⁶ Nge lupwen a küna ewe mwichen aramas, a fokun tongeer, pun ra nom lon watten osukosuk me weires usun sip kana esap wor nöür chon mas. ✧ ³⁷ Mürin Jesus a üreni nöün kewe chon kaiö, “Ewe räs a fokun watte, nge ekewe chon angangen räs ra chökükün. ³⁸ Iei mine oupwe tungorei ewe Samolun räs pwe epwe tinala chon angang pwe repwe angang ngeni ewe räs.” ✧

10

Ekewe engol me ruoman Soukünü

10.1-4

(Mark 3.13-19; Luk 6.12-16)

¹ Iwe, Jesus a körifengeni nöün kewe engol me ruoman chon kaiö o ngeniir manaman pwe repwe asüela ekewe ngününgau o apöchöküla aramas mi eäni sokopaten samau me apwangapwang. ² Ikkei iten ekewe engol me ruoman soukünü: Aemanün Simon, a pwal iteni Petrus me pwiin we Andru, James me pwiin we Johannes, ir nöün Sepeti, ³ Filip, Partolomeus, Tomas me Mateus ewe chon ioni takises, James nöün Alfäus

✧ 9:34: Mat 10.25; 12.24; Mark 3.22; Luk 11.15 ✧ 9:35: Mat 4.23; Mark 1.39; Luk 4.44 ✧ 9:36: Num 27.17; 1.King 22.17; 2.Kron 18.16; Is 34.5; Mark 6.34 ✧ 9:38: Luk 10.2

me Tatäus, ⁴ Simon, i eman Selot * me Jutas Iskariot, ätewe mi afangamä Jesus.

Jesus a tinala ekewe engol me ruoman soukünö ngeni ar angang

10.5-15

(Mark 6.7-13; Luk 9.1-6)

⁵ Iwe, Jesus a tinala ekei engol me ruoman mwän o ngeniir ekei öüröür, “Ousap feila lon fanüen chon lükün Israel ika lon telinimwen ekewe chon Samaria, ⁶ nge oupwe chök feila ren ekewe aramasen Israel ra usun chök sip mi mwalechela. ⁷ Oupwe feila o afalafala ei kapas, ‘Ewe Mwün Läng a arapoto.’ ✧ ⁸ Oupwe apöchöküla ekewe chon samau, oupwe amanauasefäli ekewe mi mäla, oupwe amoola rupun chokewe mi üriir rupun pwötür o asüela ekewe anün rochopwak. Oua angafatei ewe manaman, oupwe pwal fangafat. ⁹ Ousap uwou lon ämi pwotou föün moni kolt, silifer ika kapa, ¹⁰ ousap pwal uwou pwotou lon ämi sai ika aruachön üfemi söch ika sus ika efoch wok. Pun eman chon angang a aüchea ngeni an epwe angei mine a osupwang ren. ✧ ¹¹ Lupwen oupwe tolong lon eu telinimw ika sopp, oupwe pii iön aramas mi pwapwaiti an epwe etiwakemi. Iwe, oupwe nonom lon imwan tori ämi oupwe feil seni ewe leni. ¹² Lupwen oupwe tolong lon eu imw, oupwe apasa ei kapong ngeni ekewe aramas, ‘Kinamwe epwe torikemi.’ ¹³ Are aramasen ewe imw ra etiwakemi, ämi kapongen kinamwe epwe nonom rer. Nge are resap etiwakemi, ämi kapongen kinamwe epwe liwinitikemi. ¹⁴ Iwe, are chon eu imw ika telinimw resap etiwakemi ika aüselingakemi, mürin oupwe towu seni ewe leni o wichikala pwülün fän pechemi. ✧ ¹⁵ Enlet üpwe ürenikemi, pwe än Kot apwüngü ekewe aramasen Sotom me Komora lon ewe ränin apwüng epwe kisikis seni an apwüngü aramasen ei telinimw. ✧

Ewe fansoun riaföü epwe wareto

10.16-25

(Mark 13.9-13; Luk 21.12-17)

¹⁶ “Nengeni, üpwe tinikemiila usun chök sip lein wolif kana. Iei mine oupwe eäni tipachem usun serepenit o oupwe tipepwetete usun tipepweteten ekewe lisom. ✧ ¹⁷ Oupwe mamasa, pun epwe wor aramas repwe fötekinikemi o emwenikemi lon kapwüng, repwe pwal wichikemi me lon ar kewe imwen felikis. ¹⁸ Repwe emwenikemiila mwen ekewe kepina me king pokiten itei, pwe oupwe apworaus a ewe Pworaus Allim ngeniir, pwal ngeni ekewe chon lükün Israel. ¹⁹ Iwe, lupwen repwe emwenikemiila ngeni kapwüng, ousap öüreki ämi kapas are mine oupwe apasa, pun ekewe kapas oupwe apasa repwe torikemi lupwen a tori ena otun. ²⁰ Pun sap ämi oupwe kapas, nge ewe Ngünün Sememi epwe ngenikemi mine oupwe apasa. ✧ ²¹ Iwe, pwipwi repwe afangamä pwiir ngeni mäla, eman sam epwe afangamä nöün. Nge ekewe nau repwe ü ngeni semer me iner o aturuur pwe repwe ninnila. ✧ ²² Aramas meinisin repwe oputakemi pokitei. Nge iö epwe likitü tori lesopolan epwe küna manau. ✧ ²³ Iwe, lupwen repwe ariaföüükemi lon eu telinimw, oupwe süla lon pwal eu. Üpwe fokun ürenikemi, pwe ousamwo wes le föri ämi

* **10:4:** wewen Selot: eman aramas mi ekimongei feiöchün fanüan ✧ **10:7:** Luk 10.4-12

✧ **10:10:** 1.Kor 9.14; 1.Tim 5.18 ✧ **10:14:** Föf 13.51 ✧ **10:15:** Mat 11.24; Ken 19.24-28

✧ **10:16:** Luk 10.3 ✧ **10:20:** Mark 13.9-11; Luk 12.11-12; 21.12-15 ✧ **10:21:** Mark 13.12;

Luk 21.16 ✧ **10:22:** Mat 24.9,13; Mark 13.13; Luk 21.17

angang lon ekewe telinimwen Israel meinisin mwen ewe Nöün Aramas epwe liwinsefal.

²⁴ Eman chon sukul esap lap seni nöün sense, nge eman chon angang esap lap seni an masta. ✧ ²⁵ Iei mine eman chon kaiö epwe menemenöch an epwe wewe ngeni nöün sense, nge eman chon angang epwe menemenöch an epwe wewe ngeni an masta. Are ra aita ngeni möküren ewe famili Peelsepul, epwe ifan me ngauen ewe it repwe aita ngeni chon an famili meinisin. ✧

Iö sipwe niuokusiti

10.26-31

(Luk 12.2-7)

²⁶ "Iwe, ousap niuokusiti aramas! Pun mettoch meinisin mi pwölüla epwe pwäla, nge mettoch meinisin mi monomonola aramas repwe silei. ✧ ²⁷ Met ngang üa ürenikemi lon kiroch, oupwe apasatä lon saram. Nge met üa möngününgünülong lon selingemi oupwe asilefeili me won ungen ekewe imw. ²⁸ Ousap niuokusiti ätekewe mi niela inis, nge resap tongeni niela ngün. Nge oupwe fokun niuokusiti Kot, ewe a tongeni niela inis me ngün lon hell. ²⁹ Ifa usun, aramas resap amömöla ruoman nichok ren eföü chök kapa? Sap mwo nge eman nichok epwe turutiu lepwül lükün tipen Sememi. ³⁰ Nge meten möküremi kewe mwo nge ra lea meinisin. ³¹ Iei mine ousap niuokus, ämi oua aüchea seni chomong nichok!

Ach pwärätä me ach amamäsini Kraist

10.32-33

(Luk 12.8-9)

³² "Iwe, iö a pwäriei mwen mesen aramas, pwal ngang üpwe pwäri mwen mesen Semei lon läng. ³³ Nge iö a amam ngang mwen mesen aramas, pwal ngang üpwe amam i mwen mesen Semei lon läng. ✧

Jesus esap uwato kinamwe pwe tipefesen

10.34-39

(Luk 12.51-53; 14.26-27)

³⁴ "Ousap ekiiki pwe üa feito pwe üpwe uwato kinamwe won fanüfan. Apwi, üsap feito pwe üpwe uwato kinamwe, pwe ketilas. ³⁵ Pun ngang üa feito ai üpwe atipefesen aramas: Ekewe alüal repwe ü ngeni semer kewe, ekewe föpwül repwe ü ngeni iner kewe, pwülüen nöür alüal repwe ü ngeni inen pwülüer kewe, ³⁶ nge ekewe chon oputok repwe seni püsin chon om famili. ✧ ³⁷ Iö a tongei saman are inan lap seniei, esap fich ngeni an epwe nei chon kaiö. Nge iö a tongei nöün ät are nengin lap seniei, esap fich ngeni an epwe nei chon kaiö. ³⁸ Iwe, iö esap mwärei an iräpenges o tapweto müri, esap fich ngeni an epwe nei chon kaiö. ✧ ³⁹ Iö a ekiikin püsin tümwünü manauan, epwe pöüt seni, nge iö a pölükü manauan fän itei, epwe amanaua manauan. ✧

Ewe Liwin

10.40-42

(Mark 9.41)

⁴⁰ "Iö a etiwakemi, a etiwaei, nge iö a etiwaei, a etywa ewe mi tiniei. ✧ ⁴¹ Iö a etywa eman nöün Kot chon künö pokiten i nöün Kot chon künö,

✧ **10:24:** Luk 6.40; Joh 13.16; 15.20 ✧ **10:25:** Mat 9.34; 12.24; Mark 3.22; Luk 11.15 ✧ **10:26:** Mark 4.22; Luk 8.17 ✧ **10:33:** 2.Tim 2.12 ✧ **10:36:** Mik 7.6 ✧ **10:38:** Mat 16.24; Mark 8.34; Luk 9.23 ✧ **10:39:** Mat 16.25; Mark 8.35; Luk 9.24; 17.33; Joh 12.25 ✧ **10:40:** Mark 9.37; Luk 9.48; 10.16; Joh 13.20

epwe angei liwinin eman chon künö. Nge iö a etiwa eman chon pwüing pokiten i eman chon pwüing, epwe pwal angei liwinin eman chon pwüing.⁴² Are eman a aünü ngeni eman ekei kükün eu mwo chök kapen koluk mi patapat pokiten an tapweto müri, enlet, üpwe ürenikemi, epwe fokun angei liwinin.”

11

Johannes Soupapatais a tinala chon künö ren Jesus

11.1-19

(Luk 7.18-35)

¹ Iwe, lupwen Jesus a wes le ööröura nöün kewe chon kaiö, a feila seni ikenan pwe epwe aiti ngeni aramas kapasen Kot o afalafaleer lon ekewe telinimw mi arap. ² Nge lupwen Johannes Soupapatais a rong me lon imwen fötek usun ekewe föföör Kraist a föriir, a tinala ekoch nöün kewe chon kaiö ren. ³ Iwe, ra aisini Jesus, “En ewe eman epwe wareto, are sipwe witiwiti pwal eman.” ⁴ Jesus a pölüeni, “Oupwe liwinla o asile ngeni Johannes mine oua rongorong o künä: ⁵ Ekewe mi mesechun ra künä mwer, ekewe mi pechemä ra fetal, ekewe mi üriir rupun pwötür ra chikarsefäl, ekewe mi selingepin ra rongorong, ekewe mi mäla ra manauatä, ekewe mi wöüngau ra rongorong afalafalen ewe Pworaus Allim. ✧ ⁶ Ra feiöch chokewe resap tipemwaramwar rei.”

⁷ Lupwen än nöün Johannes kewe chon kaiö feila, Jesus a popuetä le kapas ngeni ewe mwichen aramas usun Johannes, “Lupwen oua feila ren Johannes lon ewe fanüapö, met oua ekieki oupwe ngeni? Efoch äsät mi mwaroro ren asepwäl? ⁸ Met chök oua feila ren pwe oupwe ngeni? Eman mwän mi üföüf üf mi pwetete o mürina? Ekewe aramas mi üföüf ei sokun üf ra nom lon imwen king. ⁹ Oupwe üreniei, met chök oua feila ren pwe oupwe ngeni? Eman soufos? Ewer, üa ürenikemi, oua fen künä eman mi lap seni eman soufos. ¹⁰ Pun Johannes i ätewe ekewe Toropwe mi Pin ra kapas usun: ‘Ngeni, üpwe tinala nei chon künö, epwe akomwola mwomw, epwe amolätä efoch al fän itom.’ ✧ ¹¹ Enlet, üa ürenikemi, pwe Johannes Soupapatais a lap seni aramas meinisin mi uputiu won fanüfan. Nge iön mi kisikis lon Mwün Läng a fen lap seni Johannes. ¹² Seni ewe fansoun Johannes Soupapatais a popuetä an afalafal tori iei Mwün Läng a fokun riaföü, nge aramas mi ngau ra sotuni pwe repwe angei o nemeni. ¹³ Pun ekewe soufos meinisin me ekewe Allükün Moses ra kapas usun ewe Mwün Kot tori fansoun Johannes. ✧ ¹⁴ Nge are oua mochen lükü ar kapas, Johannes i ätewe ewe soufos a kapas usun, lupwen a apasa pwe Elias epwe war. ✧ ¹⁵ Iö a wor selingan epwe rongorong.

¹⁶ “Iwe, met üpwe tongeni awewe ngeni ei pilon aramasen ikenai? Ra wewe ngeni ekewe semirit mi mot lon ekewe lenien amömö. Eu mwich a kökkö ngeni pwal eu mwich: ¹⁷ ‘Äm aia ettiki aangün ngenikemi, nge ämi ousap pworuk! Äm aia köi kölün lolilen, nge ämi ousap kechü!’ ¹⁸ Lupwen Johannes a feito, a echikefel, esap pwal ün wain, nge aramas ra apasa, ‘A wor eman anün ro chopwak won!’ ¹⁹ Nge lupwen Nöün Aramas a feito, a mongö o ün, nge aramas ra apasa, ‘Ou ngeni ei mwän! I eman mi

✧ **11:5:** Ais 35.5-6; 61.1 ✧ **11:10:** Mal 3.1 ✧ **11:13:** Luk 16.16 ✧ **11:14:** Mal 4.5; Mat 17.10-13; Mark 9.11-13

mongömong me ünümong, eman mi chiechi ngeni ekewe chon ioni takises me chon tipis.' Än Kot tipachem a pwäla pwe a let ren an kewe föför.”

Feiengauen ekewe telinimw resap lükülük

11.20-24

(Luk 10.13-15)

²⁰ Iwe, aramasen ekewe telinimw ia Jesus a föri ie chomong an kewe manaman resap kul seni ar tipis. Iei mine Jesus a apwüngüür: ²¹ “Feiengauom Korasim! Feiengauom Petsaita! Are ekewe manaman mi fen fis me lomi repwe fen fis lon Tirus me Siton, ekewe aramas lon ekei telinimw repwe üföüf üf seni tuk me lomlom o amoratiu falang won möküerer, pwe asisilen ar kul seni tipis! ✧ ²² Iwe, ngang üpwe fokun ürenikemi, pwe lon ewe ränin apwüng epwe kisikis feiengauen Tirus me Siton seni ämi feiengau. ²³ Nge en Kapernaum! Ka ekieki om kopwe püsin atekiokotä tori läng? Apwi, kopwe turuti lon hell! Are ekewe manaman ra fen fis lomw, repwe fen fis lon Sotom, ei telinimw epwe chüen nonom tori ikenai. ✧ ²⁴ Iwe, ngang üpwe fokun ürenikemi, pwe lon ränin apwüng epwe kisikis feiengauen Sotom seni ämi feiengau.” ✧

Oupwe feito rei o asösö

11.25-30

(Luk 10.21-22)

²⁵ Iwe, lon ena fansoun Jesus a apasa, “Semei, en Samolun läng me fanüfan, üa kilisou ngonuk, pun ka amonomona ekei mettoch seni ekewe mi tipachem me silelap, nge ka pwärala ngeni ekewe tipate. ²⁶ Ewer, Semei, pun iei usun ka pwapwaiti an epwe fis.”

²⁷ “Semei a ngeniei mettoch meinisin. Esap wor eman a silei ewe Nau, pwe ewe Sam chök, esap pwal wor eman a silei ewe Sam, pwe ewe Nau chök me chokewe ewe Nau a afiliir an epwe pwäri i ngeniir. ✧

²⁸ Oupwe feito rei ämi meinisin mi weiresikis o uwochou, ngang üpwe asösökemi. ²⁹ Oupwe ämwäralong womi ai we waas o kaiö seniei, pun ngang üa lukpwetete o tipetekison, iwe, oupwe küna söön ngünümi. ✧ ³⁰ Pun ai we waas üpwe anomu womi a mecheres, nge wosemi we üpwe ngenikemi a pän.”

12

Kapas ais usun ewe ränin sapat

12.1-8

(Mark 2.23-28; Luk 6.1-5)

¹ Lon eu fansoun Jesus a fetalelong lon eu tanipin wiich lon ränin sapat. Iwe, nöün kewe chon kaiö ra echik, iei mine ra popuetä le fichi ekoch umwun wiich o mongö föün. ✧ ² Nge lupwen ekewe Farisi ra küna ei, ra üreni Jesus, “Nengeni, noumw kewe chon kaiö ra föri mine esap pwüng lon allükün ach lamalam lon ränin sapat!” ³ Jesus a pölüeniir, “Ousap aleani mwo mine Tafit a föri lon ewe fansoun, lupwen i me chienan kewe ra echik? ✧ ⁴ A tolong lon imwen Kot, nge i me chienan kewe ra mongö ekewe pilawa ra eäni asor ngeni Kot, inamwo ika a ü ngeni allükün lamalam ar repwe mongö, pwe ekewe chök souasor a mwümwü ngeniir ar repwe mongö ekei pilawa. ✧ ⁵ Ika ousap aleani mwo mine a

✧ 11:21: Ais 23.1-18; Is 26.1-28.26; Sow 3.4-8; Am 1.9-10; Sek 9.2-4 ✧ 11:23: Ais 14.13-15; Ken 19.24-28 ✧ 11:24: Mat 10.15; Luk 10.12 ✧ 11:27: Joh 3.35; 1.18; 10.15 ✧ 11:29: Jer 6.16

✧ 12:1: Tut 23.25 ✧ 12:3: 1.Sam 21.1-6 ✧ 12:4: Lif 24.9

mak lon än Moses kewe allük, pwe iteiten ränin sapat ekewe souasor lon ewe imwenfel ra atai ewe allükün sapat, nge resap tipis? * ⁶ Ngang üpwe ürenikemi, pwe och mi lap seni ewe imwenfel a nom ikei. ⁷ Lon ekewe Toropwe mi Pin a mak, ‘Üa mochen pwe aramas repwe eäni tong enlet, nge sap ar repwe eäni asor man ngeniei.’ Are ämi oua wesewesen silei wewen ei kapas, ousap atipisi ekewe aramas esap wor ar tipis. * ⁸ Pun ewe Nöün Aramas i Sounemenemen ewe ränin sapat.”

Jesus a apöchöküla eman mwän mi mä pöün

12.9-14

(Mark 3.1-6; Luk 6.6-11)

⁹ Iwe, Jesus a feila seni ewe leni o tolong lon eu imwen felikis. ¹⁰ Ikenan a wor eman mwän mi mä pöün. Ekoch aramas ra pwal nom ikenan, ra kütta och popun mine repwe aturu Jesus won. Iei mine ra aisini, “Ifa usun, a ngau ngeni allükün ach lamalam an eman epwe apöchöküla eman aramas lon ränin sapat?” ¹¹ Jesus a pölüeniir, “Epwe ifa ika eman leimi a wor eman nöün sip a turulong lon eu pwang mi alolol lon ränin sapat? Ifa usun, esap ekiikin angeawu o efietä me lon ewe pwang? * ¹² Iwe, eman aramas a kon aüchea seni eman sip! Iei mine allükün ach lamalam a mwütätä ngenikich ach sipwe alisi eman aramas lon ränin sapat.” ¹³ Mürin Jesus a üreni ewe mwän mi mä pöün, “Kopwe aitiwew poumw.” Iwe, a aitiwew pöün we o a pöchökülsefäl usun chök pwal ewe efoch. ¹⁴ Iwe, ekewe Farisi ra towu seni ewe imwen felikis o pwüngüpwüngfengen usun ar repwe niela Jesus.

Nöün Kot we chon angang i a filätä

12.15-21

¹⁵ Lupwen Jesus a rong usun ar ekiikin rawangauei, a feila seni ewe leni, nge eu mwichen aramas mi chomong a tapwela mürin. Iwe, a apöchöküla ekewe chon samau meinisin ¹⁶ o üreniir, pwe resap apworaus a ngeni aramas usun i. ¹⁷ A föri ei, pwe epwe pwönüetä mine Kot a apasa ren ewe soufos Aisea:

¹⁸ “Iei i nei we chon angang üa filätä,

ätewe üa echeni, üa unusen pwapwa ren.

Ngang üpwe anomu Ngüni won, nge i epwe asilefeili

pwüngün ai apwüng ngeni chon ekewe mwü meinisin.

¹⁹ Esap anini ika osomong le fos,

esap pwal leüömong le kapas won ekewe al.

²⁰ Esap kupiela efoch äsät mi puopu,

esap pwal kunuela efoch wiik mi kümochoch.

Epwe achocho tori an epwe pwärala pwe pwüng a win.

²¹ Iwe, chon ekewe mwü meinisin

repwe apilükülükü i.” *

Jesus me Pelsepul

12.22-32

(Mark 3.20-30; Luk 11.14-23)

²² Mürin ekoch aramas ra uwato ren Jesus eman mwän mi chun o awemwöch, pun eman anün rochopwak a wäni. Iwe, Jesus a apöchöküla ewe mwän, pwe a tongeni kapas o küna mwan. ²³ Iwe, ekewe aramas meinisin ra mairü ren mine Jesus a föri o ais, “Ifa usun, epwe ätei ewe

nöün Tafit?” ²⁴ Nge lupwen ekewe Farisi ra rong ekei kapas, ra apasa, “Ätei a chök asüela ekewe anün rochopwak pokiten ewe samolun anün rochopwak a ngeni an manaman.” ²⁵ Jesus a silei ar ekiek o üreniir, “Are eu mwü a kinikinfesen o fiufengen, ei mwü esap tongeni nonomola. Are chon eu telinimw ika eu famili repwe kinikinfesen o fiufengen lefiler, repwe parasfesen. ²⁶ Iei mine are mwün Satan a kinikinfesen o fiufengen, mwün epwe müttir tala! ²⁷ Ämi oua apasa, pwe üa asüela ekewe anün rochopwak ren manamanen Pelsepul. Iwe, ika epwe iei usun, iö chök a ngeni chiechiemi kewe ar manaman ar repwe asürela? Met chiechiemi kewe ra föri a alletätä pwe oua mwäl. ²⁸ Apwi, esap Pelsepul, nge Ngünün Kot a ngeniei ewe manaman ai üpwe asüela ekewe anün rochopwak. Ei a pwärätä pwe Mwün Kot a fen torikemi.

²⁹ Esap wor eman a tongeni atalong imwen eman mwän mi pöchökül o angeala pisekin, are esap akomwen föti ewe mwän mi pöchökül. Mürin a tongeni angeala pisekin lon imwan.

³⁰ Iwe, are eman esap etiei, i eman chon ü ngeniei, nge are eman esap alisie le ikioi, i eman chon kütifese. ³¹ Iei mine üpwe ürenikemi: Än aramas tipis meinsin repwe musala, pwal ar kewe kapasen turunufas ra apasa, nge are eman a eäni kapasen turunufas ngeni Ngünmifel esap fokun musala. ³² Iö a apasa och kapasen ü ngeni Nöün Aramas a tongeni musala. Nge iö a apasa och kapasen ü ngeni Ngünmifel esap fokun musala lon ei fansoun ikenai tori feilfeilachök.

Eföch irä me uan

12.33-37

(Luk 6.43-45)

³³ “Are a wor om irä mi mürina, uan ra pwal mürina, nge are a wor om irä mi ngau, uan ra pwal ngau. Eföch irä a sil ren uan. ✱ ³⁴ Ämi serepenit! Ifa usun, oua tongeni apasa mine a mürina ika ämi aramas mi ngau? Pun ekewe kapas ra towu seni awemi iei somwen lelukemi. ✱ ³⁵ Eman aramas mi mürina a atowu mettoch mi mürina seni lon an lenien iseis mi mürina, nge eman aramas mi ngau a atowu mettoch mi ngau seni an lenien iseis mi ngau. ³⁶ Nge üpwe ürenikemi, pwe lon ewe ränin apwüing aramas meinsin repwe küna apwüing ren iteiten kapas lomotongau ra apasatä. ³⁷ Pun ren om kewe kapas kopwe küna apwüing ren, repwe pwärätä ika en mi pwüing ika en mi tipis.”

Ra tüngor ngeni Jesus epwe föri eu manaman

12.38-42

(Mark 8.11-12; Luk 11.29-32)

³⁸ Mürin ekoch ekewe Sensen Allük me ekewe Farisi ra üreni Jesus, “Sense, äm aia mochen küna usun om kopwe föri eu manaman.” ✱ ³⁹ Nge Jesus a üreniir, “A ifan me ingauen me kirikiringauen ei täppin aramasen ikenai! Oua tüngor ngeniei pwe üpwe föri eu manaman, nge esap wor eu manaman epwe pwä ngenikemi, pwe ewe chök manaman mi fis ngeni ewe soufos Sona. ✱ ⁴⁰ Pun usun Sona a nom lon luken ewe ik mi watte lon ükükün ülüngat rän me ülüngat pwin, iei usun Nöün Aramas epwe nom leutun fanüfan lon ükükün ülüngat rän me ülüngat pwin. ✱ ⁴¹ Lon ewe ränin kapwüing ekewe chon Ninifa repwe ütä o atipisi ei täppin aramas,

✱ **12:33:** Mat 7.20; Luk 6.44 ✱ **12:34:** Mat 3.7; 23.33; 15.18; Luk 3.7; 6.45 ✱ **12:38:** Mat 16.1; Mark 8.11; Luk 11.16 ✱ **12:39:** Mat 16.4; Mark 8.12 ✱ **12:40:** Sona 1.17

pun ra aier ren än Sona afalafal. Nge üpwe ürenikemi, pwe eman mi lap seni Sona a nom ikei! ✧ ⁴² Lon ewe ränin kapwüng ewe kiwinen Sepa epwe ütā o atipisi ei täppin aramas. Pun neminei a saito seni fanüan mi toau, pwe epwe rongorong än ewe king Salomon kapasen tipachem. Iwe, üpwe ürenikemi, pwe eman mi lap seni Salomon a nom ikei! ✧

Liwinton eman ngününgau won eman aramas

12.43-45

(Luk 11.24-26)

⁴³ “Are eman ngününgau a towu seni eman aramas, a saifeil won fanü mi pwasapwas o kütta eu leni pwe epwe asösö lon. Are esap küna eu leni, ⁴⁴ epwe apasa, ‘Üpwe liwinsefäli imwei we üa towu seni.’ Iwe, lupwen a tori ewe imw, a küna pwe a pön, a limöch o kotöch. ⁴⁵ Mürin epwe feila o panato pwal fūman ngün mi ngau seni i. Iwe, repwe feito o nonom lon. Iwe, manauen ewe aramas epwe fokun ngau seni me mwan. Iei usun mine epwe fis ngeni ei täppin aramas mi ngau.”

Inen Jesus me pwiin kana

12.46-50

(Mark 3.31-35; Luk 8.19-21)

⁴⁶ Iwe, lupwen Jesus a chüen kapas ngeni ekewe aramas, inan me pwiin kana ra war. Ra ütā lükün ewe imw o tünkor pwe repwe kapas ngeni. ⁴⁷ Iei mine eman ekewe aramas a üreni Jesus, “Nengeni, inom me pwiüm kana ra ütā lükün o mochen kapas ngonuk.” ⁴⁸ Jesus a pölüeni, “Iö inei me iö kana pwii?” ⁴⁹ Mürin a itini nöün kewe chon kaiö o apasa, “Nengeni! Ikkei ir inei me pwii kana! ⁵⁰ Pun iö kana ra föri letipen Semei lon läng, ir pwii me fefinei me inei.”

13

Pworausen awewe usun ewe chon amworafeili pwükil

13.1-9

(Mark 4.1-9; Luk 8.4-8)

¹ Iwe, lon ewe chök ränin Jesus a towu seni ewe imw o feila ngeni arun ewe noom. Ikenan a mottiu pwe epwe aiti ngeni aramas kapasen Kot. ² Nge eu mwichen aramas mi chomong a mwicheto ren, iei mine a tötā won efoch wa o mot won. Nge ekewe aramas meinsin ra ütā lepi. ✧ ³ Iwe, Jesus a kapas ngeniir usun chomong mettoch lon pworausen awewe o apasa, “Eman aramas a feila pwe epwe amworafeili pwükil. ⁴ Nge lupwen a amworafeili ekewe pwükil, ekoch föün ra mworotiu lepekin al. Iwe, ekewe mansüsü ra feito o eniir. ⁵ Ekoch föün ra mworotiu won lenien föüföü ia esap watte pwül ie. Ekewe föün ra pwükükai, pun resap pwük lon pwül mi malül. ⁶ Iwe, lupwen akkar a tötā, pwichikaran a pwichiti ekewe kükün irä. Nge pokiten esap wor warer, ra müttir pwasala. ⁷ Pwal ekoch föün ra mworotiu lein iräfölüföl. Iwe, ekewe iräfölüföl ra mämäritā o amopu ekewe irä. ⁸ Nge pwal ekoch föün ra mworotiu lon pwül mi mürina. Iwe, ekewe irä ra märitā o ua, ekoch leir ra uani ipükü, ekoch wone, nge ekoch ilik.” ⁹ Mürin Jesus a sopwela le üreniir, “Iö a wor selingan epwe rongorong!”

an tanipi. ²⁵ Lon eu pwin, lupwen aramas meinisin ra möür, ewe chon oputan a war o amworafeili ekewe pwükil mi ngau lein ekewe pwükilin wiich, iwe, a feila. ²⁶ Lupwen ekewe irä ra märitä o ekewe umwun wiich ra popuetä le sikiwu, ekewe pötöwölingau ra pwal pwä. ²⁷ Mürin nöün ewe mwän kewe chon angang ra feito ren o üreni, ‘Äm samol, ka amworafeili pwükil mi mürina lon om tanipi. Nge ia chök ekewe pötöwölingau ra feito me ie?’ ²⁸ A pölüeniir, ‘Eman chon oputaei a föri ei.’ Iwe, ekewe chon angang ra aisini, ‘Ifa usun, ka mochen aipwe feila o üttätä ekewe pötöwölingau?’ ²⁹ Iwe, a üreniir, ‘Apwi, pun lupwen oupwe üttätä ekewe pötöwölingau a tongeni fis pwe ekewe wiich repwe pwal etiir le üttütä. ³⁰ Oupwe likitiir pwe repwe mämäritäfengen tori fansoun kinikin. Mürin ngang üpwe üreni ekewe chon angangen räs pwe repwe akomwen üttätä ekewe pötöwölingau, repwe pilüküfengeniir o keniirela. Mürin repwe achufengeni ekewe wiich o iseniir lon ai lenien iseis.’ ”

Pworausen awewe usun ewe föün pwükilin irä mi fokun kükün

13.31-32

(Mark 4.30-32; Luk 13.18-19)

³¹ Iwe, Jesus a apworaus a ngeniir pwal eu pworausen awewe: “Mwün Läng a wewe ngeni eföü pwükilin irä mi fokun kükün, eman aramas a angei o fotukätüu lon an tanipi. ³² Ei pwükilin irä a kükün seni pwükil meinisin, nge lupwen a märitä a watte seni ekewe irä kükün meinisin. A wiliti efoch irä watte, pwe ekewe mansüsü ra ässito o föri faser won palan kana.”

Pworausen awewe usun iis

13.33

(Luk 13.20-21)

³³ Iwe, Jesus a apworaus a ngeniir pwal eu pworausen awewe: “Mwün Läng a wewe ngeni iis eman fefin a angei o nofitfengeni me lime paun pilawa mi amas tori unusen ewe pilawa a pwotä.”

Popun än Jesus aea pworausen awewe

13.34-35

(Mark 4.33-34)

³⁴ Iwe, Jesus a aea pworausen awewe an epwe aiti ngeni ewe mwichen aramas ekei mettoch meinisin. Esap apasa och mettoch ngeniir lükün an epwe aea eu pworausen awewe. ³⁵ A föri ei an epwe pwönüetä mine ewe soufos a apasa,

“Ngang üpwe aea pworausen awewe lupwen üpwe kapas ngeniir.

Ngang üpwe aiti ngeniir ekewe mettoch mi monomon seni lepoputan fanüfan.” ☆

Jesus a awewei ewe pworausen awewe usun ekewe pötöwölingau

13.36-43

³⁶ Iwe, lupwen Jesus a feila seni ewe mwichen aramas o tolong lon eu imw, nöün kewe chon kaiö ra feito ren o üreni, “Kopwe awewe ngenikem met wewen ewe pworausen awewe usun ekewe pötöwölingau lon ewe tanipi.” ³⁷ Jesus a pölüeniir, “Ewe mwän mi amworafeili ekewe pwükil mi mürina, iei i ewe Nöün Aramas. ³⁸ Ewe tanipi, iei fanüfan, ekewe pwükil mi mürina, ekewe aramas ir chon ewe Mwün Kot, ekewe pötöwölingau, ir ekewe aramas nöün ewe mi Ngau, ³⁹ nge ewe chon oput mi amworafeili ewe pötöwölingau, iei i Tefil. Ewe fansoun kinikinin räs, iei ewe fansoun

lesopolan, nge ekewe chon angangen räs, ir ekewe chon läng. ⁴⁰ Usun ekewe pötöwölingau ra ioifengen o kekkila lon ekkei, iei usun mine epwe fis lesopolan fansoun fanüfan. ⁴¹ Ewe Nöün Aramas epwe tinala nöün kewe chon läng pwe repwe amwichafengeni seni lon Mwün chokewe meinisin mi emweni aramas ngeni tipis, pwal chokewe meinisin mi föri ekewe föföör mi ngau. ⁴² Repwe atururelong lon ewe lenien ekkei ia repwe pupuchör o akarüangi ie. ⁴³ Mürin ekewe chon pwüing repwe tittin usun akkar lon Mwün Semer. Iö a wor selingan epwe rongorong!

Pworausen awewe usun ewe pisek äüchea mi ireirela

13.44

⁴⁴ “Ewe Mwün Läng a pwal wewe ngeni eu pisek äüchea mi ireirela. A fis pwe eman aramas a küna o iresefäliela. Iwe, seni watten an pwapwa a feila o amömöla meinisin mine a eäni, mürin a liwinsefäliela o möni ewe leni.

Pworausen awewe usun ewe föün pwei

13.45-46

⁴⁵ “Mwün Läng a pwal wewe ngeni eman aramas mi kükütta föün pwei mi fokun äüchea pwe epwe möni. ⁴⁶ Lupwen a küna eföü mi fokun unusen mürina, a feila o amömöla meinisin mine a eäni o möni ewe föün pwei.

Pworausen awewe usun eu chew

13.47-50

⁴⁷ “Mwün Läng a pwal wewe ngeni eu chew ekewe chon attau ra aturätiau leset pwe repwe liapeni sokopaten ik. ⁴⁸ Lupwen ewe chew a ur ren ik, ra etekinätä lepi, mürin ra mottiu pwe repwe aimwüfeseni ekewe ik: Ekewe ik mi mürina ra uwalong lon säwä, nge ekewe ik mi ngau ra pötöwölingau. ⁴⁹ Iei usun mine epwe fis lesopolan fansoun fanüfan. Ekewe chon läng repwe feila o aimwüfeseni ekewe aramasangau seni ekewe aramas mi pwüing. ⁵⁰ Repwe aturalong ekewe aramasangau lon ewe lenien ekkei ia repwe pupuchör o akarüangi ie.”

Mettoch mi fö me mettoch mi mes

13.51-52

⁵¹ Iwe, Jesus a aisiniir, “Oua weweiti ekei mettoch?” Ra pölüeni, “Ewer.” ⁵² Mürin a üreniir, “Iei mine iteiten ekewe Sensen Allük meinisin mi fen kaiö usun Mwün Läng ra usun chök eman souimw a atowu seni an lenien iseis mettoch mi fö me mettoch mi mes.”

Chon Nasaret resap etiwa Jesus

13.53-58

(Mark 6.1-6; Luk 4.16-30)

⁵³ Iwe, lupwen Jesus a wes le apworausana ekei pworausen awewe, a feila seni ewe leni ⁵⁴ o liwinsefäliiti poputän telinimwan. A afalafal lon ewe imwen felikis, nge chokewe mi rongorong ngeni ra mairü ren. Ra ais, “Ia ätei a angei me ie an tipachem? Ia a angei me ie an kei tufich pwe epwe tongeni föri ekei manaman? ⁵⁵ Ifa usun, sap ätei nöün ewe chon kaü imw? Ifa usun, inan esap iteni Maria? Nge sap pwiin kewe James, Josef, Simon me Jutas? ⁵⁶ Ifa usun, fefinan kewe meinisin resap nom rech? Ia ätei a angei me ie ekei sokun tufich meinisin?” ⁵⁷ Iei mine resap etiwa. Iwe, Jesus a üreniir, “Eman soufos a wor meninin ekis meinisin, nge esap wor meninin lon poputän telinimwan pwal lon püsin an famili.”

✧ 58 Pokiten esap wor ar lükülük, Jesus esap föri chomong manaman ikenan.

14

Johannes Soupapatais a mäla

14.1-12

(Mark 6.14-29; Luk 9.7-9)

¹ Lon ena fansoun Herotes ewe samolun Kalilea a rong usun Jesus. ² Iwe, a üreni nöün kewe nöüwis, “Iei i wesewesen Johannes Soupapatais, a manauatä seni mäla. Iei popun a tongeni föri ekewe manaman.” ³ Pun me mwan Herotes a allük pwe repwe turufi Johannes o atolonga lon imwen fötek. Herotes a föri ei pokiten Herotias pwülüen pwiin we Filip. ✧ ⁴ Pun Johannes Soupapatais a fen üreni Herotes, “Ese pwüing ngonuk om kopwe pwülüeni Herotias.” ✧ ⁵ Herotes a ekiikin niela Johannes, nge a niuokusiti ekewe chon Juta, pun ra ekieki pwe Johannes eman soufos. ⁶ Nge lupwen a tori ränin uputiuen Herotes, nöün Herotias föpwül a pworuk me mwen ewe mwich mi eti an we kametip. Iwe, Herotes a fokun pwapwaiti, ⁷ pwe a pwon ngeni ewe föpwül, “Üa pwon fän akapel, pwe ngang üpwe ngonuk meinisin mine ka tüngor.” ⁸ Fän än ewe in kapasen öüröür ngeni nöün we föpwül, a tüngor ngeni Herotes, “Kopwe ngeniei iei chök möküren Johannes Soupapatais lon eu sepi!” ⁹ Iwe, ewe king a lolilen, nge pokiten ewe pwon fän akapel a föri mwen mesen nöün kewe chon kökköto meinisin mi eti le mongö, a allük pwe än ewe föpwül tüngor epwe pwönüetä. ¹⁰ Iei mine a tinala eman pwe epwe pöküela üen Johannes me lon imwen fötek. ¹¹ Iwe, ra uwato möküren Johannes we lon eu sepi o ngeni ewe föpwül, nge neminewe a uwala ren inan. ¹² Mürin nöün Johannes kewe chon kaiö ra feito o angei somän Johannes o peiaseni. Iwe, mürin ra feila o asile ngeni Jesus ewe pworaus.

Jesus a amongöü limengeröü mwän

14.13-21

(Mark 6.30-44; Luk 9.10-17; Joh 6.1-14)

¹³ Iwe, lupwen Jesus a rong ewe pworaus usun Johannes, a fiti efoch wa seni ikenan o feila ngeni eu leni ia esap wor aramas ie. Nge lupwen ekewe aramas ra rong usun, ra feila seni telinimwer kewe o tapwela mürin, nge ra chök fetal wilifanü. ¹⁴ Lupwen Jesus a tötiu me won ewe wa, a küna eu mwichen aramas mi chomong. A fokun tongeer o a apöchökülätä ekewe chon samau me leir. ¹⁵ Iwe, lupwen a tori lekuniol, nöün kewe chon kaiö ra feito ren o apasa, “Ei leni a toau seni lenien aramas, nge a fen tori lekuniol. Kopwe tinala ei mwichen aramas pwe repwe feila lon ekewe sopw o kamö püsin aner mongö.” ¹⁶ Nge Jesus a üreniir, “Ir resap feila, ämi oupwe ngeniir met repwe mongö!” ¹⁷ Nge ir ra pölüeni, “Mi wor rem limeföü pilawa chök me ruoman ik.” ¹⁸ Iwe, Jesus a üreniir, “Oupwe uwato rei ekewe mongö.” ¹⁹ Mürin a allük ngeni ekewe aramas pwe repwe mottiu won ewe fetil. Iwe, a angei ekewe limeföü pilawa me ruoman ik, a sachtä läng o iotekin kilisou ngeni Kot wor. A kinikisietiu ekewe pilawa o ngeni nöün kewe chon kaiö, nge ir ra inetiir ngeni ekewe aramas. ²⁰ Iwe, ir meinisin ra mongö o mötüla. Mürin ekewe chon kaiö ra amasoua engol me ruu chüük ren lusun ekewe

mongö. ²¹Iwe, iteiten ekewe mwän mi mongö ei mongö ina epwe ükükün limungeröü, nge esap alealong fefin me semirit.

Jesus a fetal won matau

14.22-33

(Mark 6.45-52; Joh 6.15-21)

²² Lon ewe chök otun Jesus a pesei nöün kewe chon kaiö pwe repwe tötä won ewe wa o akomwola mwan epek ewe noom, nge i epwe tinala ekewe aramas. ²³ Mürin an tinala ekewe aramas, Jesus a feitä won eu chuk, pwe epwe iotek. Lupwen a arapakan pwinila, Jesus a emanüla ikenan. ²⁴ Nge lon ena otun ewe wa a fokun toau seni fanü, a nuponup ren watten nono, pun ewe asepwäl a pöchökül le eniti. ²⁵ Ina epwe lefilen kulok ülüngat me kulok wonu lesosor Jesus a feito ren ekewe chon kaiö, nge a fetal won matau. ²⁶ Lupwen ra küna an fetal won ewe matau, ra fokun rükö o puchörütä ren ar niuokus. Ra apasa, “Eman anü!” ²⁷ Lon ewe chök otun Jesus a kapas ngeniir o üreniir, “Oupwe apilükülük! Ngang ei, ousap niuokus!” ²⁸ Mürin Petrus a apasa, “Ai Samol, ika pwe en wesewesen na, kopwe üreniei pwe üpwe asaila reöm won ei matau.” ²⁹ Jesus a pölüeni, “Kopwe feito!” Iei mine Petrus a tötü seni won ewe wa o popuetä asaila ren Jesus won ewe matau. ³⁰ Nge lupwen a nengeni pöchökülen ewe asepwäl, a niuokus o popuetä le kokotiu. Iwe, a puchörütä, “Ai Samol, kopwe amanauaei!” ³¹ Lon ewe chök otun Jesus a aitiela pöün, a amwöchü pöün Petrus o üreni, “Ka lükükisikis! Pwota ka tipemwaramwar?” ³² Iwe, lupwen ar tötä won ewe wa, ewe asepwäl a manasösötü. ³³ Mürin ekewe chon kaiö mi nom won ewe wa ra fel ngeni Jesus o apasa, “Enlet, en Nöün Kot!”

Jesus a apöchöküla ekewe mi samau lon Kenesaret

14.34-36

(Mark 6.53-56)

³⁴ Iwe, ra saila pekilan ewe noom o tori ewe fanü Kenesaret. ³⁵ Lupwen ekewe aramas lon ewe leni ra asilla Jesus, ra tinala pworaus ngeni unusen ekewe fanü mi nom ünükün, pwe Jesus a nom. Mürin aramas ra uwato ren Jesus ekewe chon samau meinisin. ³⁶ Ra tüngormau ngeni pwe epwe mwüt ngeni ekewe chon samau ar repwe chök atapa lepwülün üfan. Iwe, ir meinisin mi atapa ra pöchökületä seni ar samau.

15

Än ekewe chon Juta lewo kapasen kait

15.1-9

(Mark 7.1-13)

¹ Mürin ekoch Farisi me Sensen Allük ra feito ren Jesus seni Jerusalem. Iwe, ra aisini, ² “Pwota noumw kewe chon kaiö ra aleasolap ngeni ekewe kapasen kait seni ach kewe lewo? Pun resap talü pöür lon pwüngün allük mwen ar mongö.” ³ Jesus a pölüeniir, “Nge pwota ämi oua aleasolap ngeni än Kot kewe allük o aleasochis ngeni mine ämi kewe lewo ra aiti ngenikemi? ⁴ Pun Kot a apasa, ‘Kopwe asamolu semom me inom’, a pwal apasa, ‘Iö a otteki saman me inan epwe fokun ninnila.’ ✱ ⁵ Nge ämi oua aiti ngeni aramas, pwe are eman nau a wor ren och mettoch epwe tongeni alisi ngeni saman are inan, nge a üra, ‘Ei mettoch än Kot,’ ⁶ esap

✱ 15:4: Eks 20.12; 21.17; Tut 5.16; Lif 20.9

chüen wor lomoten än ewe nau epwe asamolu saman are inan ren ewe mettoch. Iei usun oua aücheangaei än Kot allük, pwe oupwe föri mine ämi kewe lewo ra aiti ngenikemi. ⁷ Ämi chon likatuputup! A fokun pwüng mine Aisea a fen osuni usumi!

⁸ 'Kot a apasa: Ekei aramas ra asamoluei ren ar kapas, nge leluker a wesewesen toau seniei.

⁹ A lomotmwäl ar fel ngeniei, pun ra aiti ngeni aramas förien aramas allük usun itä nge ai kewe allük! " ✧

Ekewe mettoch mi alimengaua eman aramas

15.10-20

(Mark 7.14-23)

¹⁰ Mürin Jesus a körato ewe mwichen aramas o üreniir, "Oupwe aüselingaei, pwe oupwe wewela! ¹¹ Esap wor och mine a tolong lon awen eman aramas a tongeni alimengaua, nge met mi towu seni lon awen eman aramas, ina mine a alimengaua." ¹² Mürin ekewe chon kaiö ra feito ren Jesus o üreni, "Ka silei pwe ekewe Farisi ra chou ren mine ka apasa?" ¹³ Jesus a pölüeniir, "Iteiten irä Semei lon läng esap fotuki epwe üttütä. ¹⁴ Ousap ekieki usur! Ir chon chun mi emweni ekewe chon chun. Nge lupwen eman chon chun a emweni eman chon chun, ir me ruoman repwe turulong lon pwang." ✧ ¹⁵ Petrus a üreni, "Kopwe awewe ngenikem wewen ei pworausen awewe." ¹⁶ Jesus a üreniir, "Ifa usun, oua chüen pwal wewemang usun ekewe lusun? ¹⁷ Ousap weweiti pwe meinisin mine a tolong lon awen eman aramas a tolong lon chükükanaan, mürin a towu seni lon inisin. ¹⁸ Nge ekewe mettoch mi towu seni lon awan ra pop seni lelukan, ina mine a alimengaua eman aramas. ✧ ¹⁹ Pun seni lon lelukan a towu ekiék mi ngau, ekiékin ninni, lisowu, mocheisou, solä, chofona me aiténgaua aramas. ²⁰ Ikkei ekewe mettoch ra alimengaua eman aramas. Nge än eman epwe mongö, nge esap mwo talü pöün, esap limengau ren."

Eman fefin mi lükülük

15.21-28

(Mark 7.24-30)

²¹ Mürin Jesus a feila seni ewe leni o feila lon eu fanü arap ngeni ekewe telinimw Tirus me Siton. ²² Iwe, eman fin Kanaan mi nom lon ena leni a feito ren o kökkö ngeni, "Ai samol, Nöün Tafit, kopwe tongeei. Nei nengin a fokun riaföü, pun eman anün ro chopwak a wäni." ²³ Nge Jesus esap pölüeni an kapas. Iei mine nöün kewe chon kaiö ra feito ren o tüngormau ngeni, "Kopwe tinala neminei, pun a chök kökköto me mürich." ²⁴ Mürin Jesus a pölüeniir, "Kot a chök tinieila ren ekewe sip mi mwalechela, ir ekewe aramasen Israel." ²⁵ Nge ewe fefin a feito, a fotopwäsuketiu o tüngorei, "Ai samol, kopwe alisie!" ²⁶ Jesus a pölüeni, "Esap pwüng pwe sipwe angei anen ekewe semirit mongö o monei ngeni ekewe kolak." ²⁷ Iwe, ewe fefin a pölüeni, "Ewer, ai samol, nge ekewe mwo kolak ra mongö ekewe mworomworen mongö mi mworotiu seni än ar masta chepel." ²⁸ Mürin Jesus a üreni neminewe, "En eman fefin mi watte om lükülük! Epwe fis ngonuk mine ka mochen." Iwe, lon ewe chök otun nöün we nengin a pöchökületä.

Jesus a apöchöküla chomong aramas

15.29-31

²⁹ Iwe, Jesus a feila seni ewe leni o a fetalela ünükün ewe nomun Kalilea. Mürin a feitä won eu chukuchukutä o mottiu ikenan. ³⁰ Eu mwichen aramas mi chomong a feito ren, ra uweato ekewe mi pechemä, ekewe mi chun, ekewe mi ter, ekewe mi awemwöch, pwal chomong sokun aramas mi samau o anomuur arun pechen Jesus. Iwe, a apöchöküleeretä meinisin. ³¹ Iwe, ekewe aramas ra fokun mairü lupwen ra küna pwe ekewe mi awemwöch ra fos, ekewe mi ter ra pöchökülela, ekewe mi pechemä ra fetal, pwal ekewe mi chun ra küna mwer. Iwe, ra mwareiti ewe Koten Israel.

Jesus a amongöü rüanüngeröü mwän

15.32-39

(Mark 8.1-10)

³² Mürin Jesus a körato nöün kewe chon kaiö o üreniir, “Ngang üa fokun tongei ekewe aramas, pun ra fen nonom rei lon ükükün ülüngat rän, nge iei esap wor och mine repwe äni. Ngang üsap mochen tiniirela lon ar echik, pun repwe tongeni mamasaroch lupwen repwe fetal ngeni lenier.” ³³ Ekewe chon kaiö ra aisini Jesus, “Ia sipwe tongeni künakün me ie mongö pwe epwe naf ngeni ach sipwe amongööni ei mwichen aramas mi chomong?” ³⁴ Jesus a aisiniir, “Fiteföü pilawa a wor remi?” Ra pölüeni, “Füföü me ekoch kükün ik.” ³⁵ Iei mine Jesus a allük ngeni ewe mwichen aramas pwe repwe mottiu lepwül. ³⁶ Mürin a angei ekewe fuföü pilawa me ekewe ik o iotekin kilisou ngeni Kot wor. A kiniretiu o ngeni ekewe chon kaiö, nge ekewe chon kaiö ra aineti ngeni ekewe aramas. ³⁷ Iwe, ir meinisin ra mongö o mötöla. Mürin ekewe chon kaiö ra amasoua fisu chüük ren lusun ekewe mongö. ³⁸ Iwe, iteiten ekewe mwän mi mongö ei mongö ükükün rüanüngeröü, nge esap alealong fefin me semirit. ³⁹ Mürin Jesus a tinala ekewe aramas, nge i a tötä won efoch wa o sai ngeni ewe fanü Makatan.

16

Aramas ra tüngor ngeni Jesus pwe epwe föri eu manaman

16.1-4

(Mark 8.11-13; Luk 12.54-56)

¹ Iwe, ekoch ekewe Farisi me Satusi ra feito ren Jesus, pun ra mochen särei i, iei mine ra tüngor ngeni pwe epwe föri eu manaman, pwe asisilan pwe Kot a tipeeu ngeni. ✧ ² Nge Jesus a pölüeniir, “Lupwen ewe akkar a tuputiu oua apasa, ‘Epwe ränöch lesor, pun a parapar fän läng.’ ³ Nge lesosorusich oua apasa, ‘Epwe räningau, pun a par o roch fän läng.’ Oua tongeni osuni usun ränöch me räningau ren ämi nenengeni fän läng, nge ousap tongeni awewei ekewe asisilen fansoun ikenai! ⁴ A ifan me ngauen me kirikiringauen ei täppin aramasen ikenai! Oua tüngor ngeniei, pwe üpwe föri eu manaman. Nge esap wor eu manaman epwe pwä ngenikemi me lükün ewe chök manaman mi fis ngeni Sona.” Mürin Jesus a likitiir o feila seniir. ✧

Jesus a üreni nöün chon kaiö pwe repwe afäliir ren ekewe Farisi me Satusi

16.5-12

(Mark 8.14-21)

⁵ Iwe, lupwen ekewe chon kaiö ra feila pekilan epek ewe noom, ra manlükala ar repwe uwou amötür pilawa. ⁶ Jesus a üreniir, “Oupwe tümwünüfichi o afälíkemi ren ewe iis än ekewe Farisi me Satusi.” ✱ ⁷ Iwe, ekewe chon kaiö ra popuetä le kapasfengen lefler, “A apasatä ei ititin fos, pun sisap uwou pilawa.” ⁸ Nge Jesus a silei met ra kapasfengen won lefler, iei mine a aisiniir, “Pwota oua kapasfengen usun an esap wor remi pilawa? Mwa met me kisikisin ämi lükülük! ⁹ Ifa usun, ousamwo wewela? Ousap chechemeni lupwen üa kinikisietiu ekewe limeföü pilawa fän iten ekewe limengeröü mwän? Fitu chüük oua amasoua ren ekewe lusun mongö? ✱ ¹⁰ Nge ifa usun, ekewe fuföü pilawa fän iten ekewe rüanüngeröü mwän? Fitu chüük oua amasoua ren ekewe lusun mongö? ✱ ¹¹ Pwota ousap wewela, pwe üsap kapas ngenikemi usun pilawa? Oupwe afälíkemi ren ewe iis än ekewe Farisi me Satusi!” ¹² Mürin ekewe chon kaiö ra weweiti, pwe Jesus esap üreniir pwe repwe afäliir ren ewe iis mi nom lon pilawa, nge repwe afäliir ren än ekewe Farisi me Satusi afalafal.

Petrus a pwärätä usun Jesus

16.13-20

(Mark 8.27-30; Luk 9.18-21)

¹³ Iwe, Jesus a feila ngeni ewe fanü arap ngeni ewe telinimw Seserea Filipi. Ikenan a aisini nöün kewe chon kaiö, “Met aramas ra apasa usun Nöün Aramas iö i?” ¹⁴ Ra pölüeni, “Ekoch aramas ra apasa pwe Johannes Soupapatais, pwal ekoch ra apasa pwe Elias, nge pwal ekoch ra apasa pwe Jeremaia ika eman ekewe soufos.” ✱ ¹⁵ Mürin Jesus a aisiniir, “Nge ämi, met oua apasa usi?” ¹⁶ Simon Petrus a pölüeni, “En Kraist ewe Nöün Kot mi manau.” ✱ ¹⁷ Jesus a pölüeni, “Ka feiöch, Simon nöün Sona. Pun ei kapas mi let esap aitian eman aramas ngonuk, nge Semei lon läng a amefi ngonuk. ¹⁸ Iei mine üpwe ürenuk Petrus: En eu achau. Iwe, ei achau iei ewe longolong üpwe üretä ai mwichefel won, nge mäla esap mwo nge tongeni akufu. ¹⁹ Ngang üpwe ngonuk ekewe kien Mwün Läng. Mine en kopwe pinei won fanüfan epwe pinepin lon läng, nge mine en kopwe mwütätä won fanüfan epwe pwal mwümwütä lon läng.” ✱ ²⁰ Mürin Jesus a allük ngeni ekewe chon kaiö pwe resap üreni eman pwe i ewe Kraist.

Jesus a kapas usun an riaföü me mäla

16.21-28

(Mark 8.31-9.1; Luk 9.22-27)

²¹ Seni lon ena fansoun Jesus a popuetä le pwäri ngeni nöün kewe chon kaiö, pwe i epwe fokun feila Jerusalem, iwe, epwe küna riaföü me ren ekewe souakom, ekewe souasor mi lap me ekewe Sensen Allük. Repwe niela, nge mürin ülüngat rän epwe manausefälitä. ²² Iwe, Petrus a emwenala Jesus ekis o popuetä le apwüngü, “Ai Samol, Kot epwe ümöümöch ngonuk! Ei esap fokun fis ngonuk!” ²³ Nge Jesus a kul ngeni Petrus o üreni, “Kopwe sü seniei Satan, en eu lenien chepetek ngeniei. Pun om ekiek esap pop seni Kot, nge a pop seni aramas.”

²⁴ Mürin Jesus a üreni nöün kewe chon kaiö, “Are eman a mochen etiei, epwe pölükü manauan, epwe mwärei an iräpenges o tapweto müri. ✱ ²⁵ Pun iö a mochen amanaua manauan, epwe pöüt seni. Nge iö a pölükü

✱ **16:6:** Luk 12.1 ✱ **16:9:** Mat 14.17-21 ✱ **16:10:** Mat 15.34-38 ✱ **16:14:** Mat 14.1-2; Mark 6.14-15; Luk 9.7-8 ✱ **16:16:** Joh 6.68-69 ✱ **16:19:** Mat 18.18; Joh 20.23 ✱ **16:24:** Mat 10.38; Luk 14.27

manauan fän itei, epwe küna manau. ✧ ²⁶ Epwe met lomoten än eman aramas epwe feiöchüni feiöchün unusen fanüfan, nge manauan epwe pöüt seni? Esap wor och eman aramas a tongeni fangala pwe epwe angeseñali manauan. ²⁷ Pun Nöün Aramas epwe war lon lingen Saman fiti nöün kewe chon läng. Mürin epwe liwini ngeni iteiten eman me eman aramas usun ar föfö. ✧ ²⁸ Enlet, üpwe ürenikemi pwe mi wor ekoch aramas ikei resap mäla, pwe repwe mwo küna Nöün Aramas epwe war lon wisan wisen king o nemenem.”

17

Jesus a wilila o lingela

17.1-13

(Mark 9.2-13; Luk 9.28-36)

¹ Iwe, mürin wonu rän, Jesus a emwenala Petrus me ekewe ruoman pwipwi James me Johannes, pwe repwe feitä won eu chuk mi tekia o imwüla ikenan. ✧ ² Lupwen ar nenengeni Jesus, a wilila inisin: won mesan a saramaram usun akkar, nge üfan kana ra fokun pwechela o molupolup. ³ Mürin ekewe ülüman chon kaiö ra küna Moses me Elias pwe ra kakapasfengen me Jesus. ⁴ Iwe, Petrus a üreni Jesus, “Ai Samol, a fokun öch ach sipwe nonom ikei. Are ka mochen üpwe aüetä ülüngat imw mangaku ikei, eu fän itom, eu fän iten Moses, pwal eu fän iten Elias.” ⁵ Lupwen Petrus a chüen kakapas, eu kuchu mi saramaram a anürürela o eu mangüngü seni lon ewe kuchu a apasa, “Iei i nei mi achengicheng üa fokun pwapwa ren, oupwe aüselinga!” ✧ ⁶ Lupwen ekewe chon kaiö ra rong ekei kapas, ra chapetiu won pwül fän ar rükö. ⁷ Nge Jesus a feito rer, a atapeer o üreniir, “Oupwe pwätä, ousap niuokus!” ⁸ Iwe, lupwen ar netä, resap chüen küna eman, pwe Jesus chök.

⁹ Lupwen ra feitiu me won ewe chuk, Jesus a allük ngeniir, “Ousap asile ngeni eman usun met oua küna, tori Nöün Aramas epwe manausefälitä seni mäla.” ¹⁰ Mürin ekewe chon kaiö ra aisini Jesus, “Pwota ekewe Sensen Allük ra apasa, pwe Elias epwe akomwen feito?” ✧ ¹¹ Jesus a pölüeniir, “Mi pwüing pwe Elias epwe akomwen feito, pwe epwe amolätä ekewe mettoch meinisin. ¹² Nge ngang üpwe ürenikemi, pwe Elias a fen feito, nge aramas resap asilla, pwe ra fen föri ngeni mine ra mochen. Iei usun repwe pwal ariaföü Nöün Aramas.” ✧ ¹³ Mürin ekewe chon kaiö ra weweiti pwe Jesus a fos ngeniir usun Johannes Soupapatais.

Jesus a apöchöküla eman ät a wor eman anün rochopwak won

17.14-21

(Mark 9.14-29; Luk 9.37-43)

¹⁴ Iwe, lupwen ra liwiniti ewe mwichen aramas, eman mwän a feito ren Jesus, a fotopwäsuk me mwan ¹⁵ o üreni, “Ai samol, kose mochen kopwe ümömöch ngeni nei ät! I a eäni mäan kawakau o a fokun riaföü ren, pun fan chomong a turulong lon ekkei ika lon koluk. ¹⁶ Üa uwato nei ät ren noumw kewe chon kaiö, nge ir resap tongeni apöchökülätä.” ¹⁷ Iwe, Jesus a pölüeni, “Ämi eu täppin aramas mi lükülüküman o tipesosor. Ifa langatamen fansoun ai üpwe nom remi. Ifa ükükün fansoun ai üpwe engila ngenikemi? Oupwe uwato ewe ät rei!” ¹⁸ Jesus

✧ **16:25:** Mat 10.39; Luk 17.33; Joh 12.25 ✧ **16:27:** Mat 25.31; Kölf 62.12; Rom 2.6 ✧ **17:1:** 2.Pet 1.17-18 ✧ **17:5:** Ken 22.2; Tut 18.15; Kölf 2.7; Ais 42.1; Mat 3.17; 12.18; Mark 1.11; Luk 3.22 ✧ **17:10:** Mal 4.5 ✧ **17:12:** Mat 11.14

a apwüngü ewe anün ro chopwak, iwe, a towu seni ewe ät. Lon ewe chök otun ewe ät a pöchökületä.

¹⁹ Mürin ekewe chon kaiö ra feito ren Jesus lupwen a alemanüla o aisini, “Pwota äm aisap tongeni atowu ewe anün ro chopwak seni ewe ät?” ²⁰ Jesus a pölüeni, “Pokiten a kisikis ämi lükülük. Enlet üpwe ürenikemi, are epwe wor ämi lükülük mi nönnö ngeni eföü pwükilin irä mi fokun kükün, oupwe tongeni üreni ei chuk, ‘Kopwe mwöküt seni ikei o mwökütüla ikenan,’ iwe, epwe mwöküt. Esap wor och mine ousap tufich ngeni.” * ²¹ [Nge esap wor och mettoch ei sokun ngününgau epwe tongeni süla ren, pwe ren iotek me echikefel chök.]

Jesus a kapasfäl usun an mäla

17.22-23

(Mark 9.30-32; Luk 9.43-45)

²² Lupwen ekewe chon kaiö meinisin ra chufengen lon Kalilea, Jesus a üreniir, “Nöün Aramas epwe tolong lepöün aramas. ²³ Ir repwe niela, nge mürin ülüngat rän epwe manausefälitä.” Iwe, ekewe chon kaiö ra fokun letipeta lupwen ar rong ekei kapas.

Jesus a kapas usun takises ngeni imwenfel

17.24-27

²⁴ Mürin än Jesus me nöün kewe chon kaiö tori Kapernaum, ekewe chon angei takisesin imwenfel ra feito ren Petrus o aisini, “Ifa usun, nöümi sense esap mönätiu takisesin ewe imwenfel?” * ²⁵ Petrus a pölüeni, “Ewer.” Lupwen Petrus a tolong lon ewe imw, Jesus a akomwen kapas ngeni o aisini, “Simon, met mefiom? Iö a mönätiu ekewe takisesin laisen are ekewe takises ngeni ekewe kingen fanüfan? Nöür aramas are ekewe chon ekis?” ²⁶ Petrus a pölüeni, “Ekewe chon ekis.” Mürin Jesus a üreni, “Are ina, wewen pwe nöür kewe aramas resap mönätiu ar takises. ²⁷ Nge sisap mochen ochou ekei aramas, iei mine kopwe feila efief lon ewe noom. Iwe, ewe aemanün ik kopwe liapeni, kopwe suki awan o angei ena föün moni mi naf fän iten ach takises ngeni ewe imwenfel. Kopwe ngeniir pwe takisesi me takisesum.”

18

Iö a lap seni meinisin?

18.1-5

(Mark 9.33-37; Luk 9.46-48)

¹ Lon ena fansoun ekewe chon kaiö ra feito ren Jesus o aisini, “Iö epwe lap seni meinisin lon Mwün Läng?” * ² Iwe, Jesus a körato eman semirit o aütai lefiler. ³ A apasa, “Enlet üpwe ürenikemi, are ousap kulsefäl o wewe ngeni eman semirit, ousap fokun tongeni tolong lon Mwün Läng. * ⁴ Iei mine iö a püsin atekisona pwe epwe wewe ngeni ei semirit, i ewe mi lap seni meinisin lon Mwün Läng. ⁵ Nge iö a etiwa ei sokun semirit fän itei, i a etiwaei.

Ekewe sosot ra aselipato ngeni aramas ar repwe tipis

18.6-9

(Mark 9.42-48; Luk 17.1-2)

⁶ “Are eman aramas epwe föri pwe eman lein ekei kükün mi lüküei epwe föri tipis, epwe fen och ngeni ewe aramas pwe epwe riritä fän üan

* 17:20: Mat 21.21; Mark 11.23; 1.Kor 13.2 * 17:24: Eks 30.13; 38.26 * 18:1: Luk 22.24

* 18:3: Mark 10.15; Luk 18.17

eföü fau mi föömong o kokotiu le alololun matau. ⁷ Feiengauen fanüfan pokiten ekewe mettoch ra aselipato ngeni aramas ar repwe tipis! Ekei sokun mettoch repwe fokun fis fansoun meinisin, nge feiengauen ewe aramas a afisätä ekei mettoch. ⁸ Are poumw ika pecheöm ra atopukelong lon tipis, kopwe pöküür o moneerela! Epwe fen öch ngonuk om kopwe tolong lon manau esemuch fän om pöüefoch me pecheefoch, lap seni om kopwe pöüruofoch ika pecheruofoch le koturelong lon ewe ekkei esekun. ✧ ⁹ Nge are mesom a atopukolong lon tipis, kopwe alusawu o monela! Epwe fen öch ngonuk om kopwe tolong lon manau esemuch fän om meseeföü, lap seni om kopwe meseruoföü le koturelong lon ewe ekkeiin hell. ✧

Pworausen awewe usun ewe sip mi mwalechela

18.10-14

(Luk 15.3-7)

¹⁰ “Oupwe tümwünüfichi pwe ousap aücheangaei eman ekei kükün. Pun üpwe ürenikemi, pwe nöür chon läng ra nom mwen Semei lon läng fansoun meinisin. ¹¹ [Pun Nöün Aramas a feito, pwe epwe amanaua mine a mwalechela.] ✧ ¹² Met oua ekieki? Are eman aramas a nöüni ipükü sip, nge eman leir a mwalechela, ifa usun, esap likiti ekewe tiwe me tiweman won ekewe chuk pwe epwe feila o kütta ewe eman mi mwalechela? ¹³ Nge are epwe küna ewe eman, enlet, üpwe ürenikemi, ätewe epwe fokun pwapwaäsini ewe eman sip mi mwalechela lap seni an pwapwaäsini ekewe tiwe me tiweman resap mwalechela. ¹⁴ Iei usun Semei lon läng esap mochen pwe eman lein ekei kükün epwe mwalechela.

Usun ach alisi eman pwüch mi tipis

18.15-17

¹⁵ “Are pwiüm a tipis ngonuk, kopwe feila ren o kapas ngeni usun an mwäl, nge lemonomon chök. Iwe, are epwe aüseling ngonuk, kopwe pwinisefäli. ✧ ¹⁶ Nge are esap aüseling ngonuk, kopwe nuki eman ika ruoman chienom pwe repwe etuk, pun ‘ren pwärien ruoman ika ülüman chon pwärätä a tongeni fat pwüngün och föföör’, usun a mak lon ekewe Toropwe mi Pin. ✧ ¹⁷ Iwe, are esap mochen aüseling ngeniir, kopwe asile ngeni chon mwichefel. Nge are esap mochen aüseling ngeni chon mwichefel, kopwe föri ngeni usun om kopwe föri ngeni eman esap lükü Kot ika eman chon ioni takises.

Usun ach pinei och me ach mwütätä och

18.18-20

¹⁸ “Enlet, üpwe ürenikemi: Mine oua pinei won fanüfan epwe pinepin lon läng, nge mine oua mwütätä won fanüfan epwe mwümwütä me lon läng. ✧ ¹⁹ Iwe, üpwe pwal ürenikemi och: Are ruoman leimi won fanüfan ra tipeefengen won och mine repwe iotek won, epwe torikemi me ren Semei lon läng. ²⁰ Pun ia ruoman ika ülüman ra chufengen ie fän itei, ngang üpwe nonom lefiler.”

Pworausen awewe usun ewe chon angang esap amusala tipisin chienan

18.21-35

²¹ Mürin Petrus a feito ren Jesus o aisini, “Ai Samol, are pwii a chök titipis ngeniei, fän fitu ngang üpwe amusala an tipis? A naf fän fisu?” ✧

✧ **18:8:** Mat 5.30 ✧ **18:9:** Mat 5.29 ✧ **18:11:** Luk 19.10 ✧ **18:15:** Luk 17.3 ✧ **18:16:** Tut 19.15 ✧ **18:18:** Mat 16.19; Joh 20.23 ✧ **18:21:** Luk 17.3-4

22 Nge Jesus a pölüeni, “Apwi, sap fän fisu chök, nge fän fik alea ngeni fisu. ✧ 23 Iei mine Mwün Läng a wewe ngeni eman king a ekiekin cheki än nöün kewe chon angang liwinimang ngeni. 24 Lupwen ekärän chök popueta le föri iei usun, ra emwenato ren eman chon angang mi liwinimang ngeni engol ngeröü talent. * 25 Iwe, ewe chon angang esap tongeni mönätü an liwinimang. Iei mine ewe king a allük pwe repwe amömöla i me pwülüan me nöün kana pwal meinisin mine a eäni, pwe epwe tongeni awesi an we liwinimang. 26 Ewe chon angang a fotopwäsuketiu me mwen ewe king o tüngormau ngeni, ‘Kose mochen kopwe mosonotam ngeniei, ngang üpwapw awesi ngonuk unusen ai we liwinimang.’ 27 Iwe, ewe king a fokun tongei ewe chon angang, iei mine a amusala an we liwinimang o a mwüt ngeni pwe epwe feila.

28 Mürin ewe chon angang a feila o a küna eman chiechian chon angang mi liwinimang ngeni fitu chök chala. Iwe, a turufi ätewe, a fiei chioran o üreni, ‘Kopwe mönisefäli om we liwinimang ngeniei.’ 29 Iwe, chiechian we chon angang a chapetiu o tüngormau ngeni, ‘Kose mochen kopwe mosonotam ngeniei, ngang üpwapw awesi ngonuk ai we liwinimang!’ 30 Nge ätewe esap fokun mochen. A allük pwe repwe aturalong lon imwen fötek tori an epwe awesi an we liwinimang. 31 Lupwen chiechian kewe chon angang ra küna met a fis, ra fokun weires ren. Ra feila ren ewe king o apworaus a ngeni meinisin. 32 Mürin ewe king a körato ewe chon angang o üreni, ‘En eman chon angang mi ngau! Ngang üa amusala unusen om liwinimang ngeniei pokiten ka tüngormau ngeniei. 33 Pwota kosap eäni ümömöch ngeni chiechiom we chon angang, usun chök ngang üa eäni ümömöch ngonuk?’ 34 Iwe, ewe king a fokun song, a tinala ewe chon angang lon imwen fötek pwe epwe riaföü, tori an epwe mönätü unusen an we liwinimang. 35 Iei usun mine Semei lon läng epwe föri ngeni eman me eman leimi, are ousap amusala tipisin pwimi seni lon letipemi.”

19

Jesus a afalafal usun mwüfesenin pwüpwülü

19.1-12

(Mark 10.1-12)

1 Iwe, lupwen Jesus a wes me pworaus usun ekei mettoch, a feila seni Kalilea o feila ngeni ewe fanü Jutea epekin ewe chanpupu Jortan me epek. 2 Eu mwichen aramas mi chomong a tapwela mürin, iwe, a apöchöküleer me lon ewe leni.

3 Iwe, ekoch Farisi ra feito ren o sotuni ar repwe särei ren ar ais ngeni, “Ifa usun, a pwüing ngeni allükün ach lamalam pwe eman mwän epwe mwü seni pwülüan fän iten ekoch popun esap liflilifl?” 4 Jesus a pölüeniir, “Ousap aleani mine a mak lon ekewe Toropwe mi Pin, pwe seni lepoputän ewe mi föri aramas a föri mwän me fefin? ✧ 5 Iwe, Kot a apasa, ‘Iei mine eman aramas epwe likitala saman me inan o pach ngeni pwülüan, iwe, ekewe ruoman repwe williti eu chök inis.’ ✧ 6 Iei mine resap chüen ruoman, pwe eman chök. Mine Kot a rifengeni esap wor eman aramas epwe mwütifeseni.” 7 Iwe, ekewe Farisi ra aisini, “Pwota chök Moses a föri ewe allük, pwe eman mwän a tongeni ngeni pwülüan

✧ 18:22: Ken 4.24

* 18:24: Ina epwe ükükün fisu million chala.

✧ 19:4: Ken 1.27; 5.2

✧ 19:5: Ken 2.24

echö toropwen mwüfesen o tinala?” ✨ 8 Jesus a pölüeni, “Moses a mwütätä pwe ämi mwän oupwe mwü seni pwülüemi pokiten ämi tipeförea. Nge esap ina usun seni lepoputan, lupwen Kot a föri fanüfan. 9 Nge ngang üpwe ürenikemi, ‘Are eman mwän a mwü seni pwülüan fän iten och popun, nge esap fän iten an kirikiringau neni, ätewe a lisowu are a pwülüenisefäli pwal eman fefin.’” ✨

10 Iwe, nöün kewe chon kaiö ra üreni, “Are epwe iei usun lefilen eman mwän me pwülüan, epwe fen öch ach sisap pwüpwülü.” 11 Jesus a üreniir, “Sap aramas meinisin ra tongeni etiwa ei sokun afalafal, pwe chokewe chök Kot a ngeniir tufichir. 12 Pun mi wor ekoch popun pwe mwän resap tongeni pwüpwülü: Ekoch pokiten ra ter seni leuputiuer, ekoch pokiten aramas ra föri ngeniir pwe resap tongeni pwüpwülü, nge pwal ekoch pokiten ra püsin pölükü pwüpwülü fän iten Mwün Läng. Iö a tongeni etiwa ei afalafal epwe etiwa.”

Jesus a afeiöchü semirit

19.13-15

(Mark 10.13-16; Luk 18.15-17)

13 Iwe, mürin ekoch aramas ra uwato semirit ren Jesus, pwe epwe iseis pöün wor o iotek fän iter, nge ekewe chon kaiö ra apwüngü ekewe aramas mi uweiireto. 14 Nge Jesus a üra, “Oupwe mwüt ngeni ekewe semirit pwe repwe feito rei, nge ousap epetiir, pun iö a wewe ngeni ekei semirit epwe mwüni Mwün Läng.” 15 Iwe, a iseis pöün won ekewe semirit o afeiöchüür, mürin a feila seniir.

Ewe alüal mi pisekisek

19.16-30

(Mark 10.17-31; Luk 18.18-30)

16 Iwe, lon eu rän eman mwän a feito ren Jesus o aisini, “Sense, met sokun föföör mürina üpwe föri pwe üpwe eäni ewe manau esemüch?” 17 Jesus a pölüeni, “Pwota ka aisiniei usun mine a mürina? A chök wor Eman mi mürina. Are ka mochen angei manau esemüch, kopwe apwönüetä ekewe allük.” 18 Ewe alüal a aisini, “Meni allük?” Jesus a pölüeni, “Kosap niela aramas, kosap lisowu, kosap solä, kosap atipisimwäli eman. ✨ 19 Kopwe asamolu semom me inom, kopwe echeni chon arum usun püsin om echenuk.” ✨ 20 Ewe alüal a üreni, “Ngang üa aleasochisi ekei allük meinisin. Mi chüen pwal wor met üsamwo föri?” 21 Jesus a pölüeni, “Are ka mochen unusen föfööröch, kopwe feila o amömöla meinisin mine ka eäni, nge ewe moni kopwe fang ngeni ekewe chon wöüngau pwe epwe wor woumw lon läng. Mürin kopwe feito o tapweto müri.” 22 Lupwen ewe alüal a rong ekei kapas, a feila fän letipeta, pun wöün a fokun chomong.

23 Mürin Jesus a üreni nöün kewe chon kaiö, “Enlet, üpwe ürenikemi: Epwe fokun weires ngeni aramas mi pisekisek ar repwe tolong lon Mwün Läng. 24 Üpwe apasasefäli, a men fokun weires ngeni eman aramas mi pisekisek an epwe tolong lon Mwün Kot lap seni än eman kamel epwe tolong lon pwangen efoch tikek.” 25 Iwe, lupwen ekewe chon kaiö ra rongorong ei pworaus, ra fokun mairü ren o ra aisini, “Iö chök epwe tongeni küna manau?” 26 Nge Jesus a newenewen ngeniir o üreniir, “Ei esap tufich ngeni aramas, nge mettoch meinisin ra tufich ngeni

✨ 19:7: Tut 24.1-4; Mat 5.31 ✨ 19:9: Mat 5.32; 1.Kor 7.10-11 ✨ 19:18: Eks 20.13-16; Tut 5.17-20 ✨ 19:19: Eks 20.12; Tut 5.16; Lif 19.18

Kot.”²⁷ Mürin Petrus a üra, “Nengeni, äm aia likitala meinisin o tapwela mürum. Iwe, met liwin aipwe angei?”²⁸ Jesus a üreniir, “Enlet, üpwe ürenikemi, pwe lupwen Nöün Aramas epwe mot lon an lenien motun king mi ling lon fansoun mettoch meinisin repwe försefäl, mürin ämi mi tapwela müri oupwe pwal mot won engol me ruu lenien motun king, pwe oupwe nemeni ekewe engol me ruu ainangen Israel. ✧²⁹ Iwe, iteiten eman me eman mi likitala imwan, ika pwiin, ika fefinan, ika saman, ika inan, ika nöün, ika fanüan fän itei epwe angei liwinin fän ipükü lap seni, epwe pwal angei manau esemüch.³⁰ Nge chomong mi akom repwe kükümwir, nge chomong mi kükümwir repwe akom.” ✧

20

Ekewe chon angang lon ewe tanipin wain

20.1-16

¹ “Iwe, iei usun ewe Mwün Läng a wewe ngeni: A wor eman mwän a ukkosorola an epwe kütta nöün chon angang pwe repwe angang lon an tanipin wain. ² A tipeeu ngeni pwe epwe möniir won ükükün eföü moni silifer, iei liwinin eman chon angang lon eu rän. Mürin a tiniirela pwe repwe angang lon an tanipin wain. ³ Iwe, kulok tiu a feilasefäl ngeni ewe lenien amömö o küna pwal ekoch mwän ra ütämwäl, nge esap wor met ra föri. ⁴ Iei mine a üreniir, ‘Oupwe pwal feila o angang lon ai tanipin wain. Iwe, ngang üpwe ngenikemi ükükün pwüngün liwinimi.’ ⁵ Iei mine ekewe chon angang ra feila. Iwe, kulok engol me ruu me kulok ülüngat a pwal föri usun chök mine a föri me mwan. ⁶ Iwe, ina epwe arapakan kulok limu lekuniol, lupwen a pwal feila lon ewe lenien amömö, a küna ekoch mwän ra chök ükütä ikenan. Iwe, a aisiniir, ‘Pwota oua chök asolapa unusen ei rän ren ämi ükütä chök ikei, nge ousap föri och?’ ⁷ Ra pölüeni, ‘Esap wor eman a mönikem.’ Iwe, a üreniir, ‘Oupwe pwal feila o angang lon ewe tanipin wain.’ ⁸ Nge lupwen a tori lekuniol, ewe mine an ewe tanipin wain a üreni nöün we chon souwan, ‘Kopwe köri ekewe chon angang o ngeniir liwinin ar angang. Kopwe popuetä ren ekewe amüchülan chon angang mi kükümwir le tolong tori chokewe mi akom le tolong.’ ✧ ⁹ Iwe, lupwen ekewe mwän mi kükümwir le popuetä ar angang kulok limu ra feito, ra angei eföü moni silifer pwe liwiniir. ¹⁰ Iei mine lupwen ekewe mwän mi akom le tolong lon ewe angang ra war pwe repwe angei liwiniir, ra ekieki pwe repwe angei lap seni. Nge pwal eman me eman leir a chök angei eföü moni silifer. ¹¹ Iwe, ra angei liwiniir kewe o popuetä le lal ngeni ewe mine an ewe tanipi. ¹² Ra apasa, ‘Ekei mwän mi tolong le sopolan ra chök angang lon ükükün eu awa, nge äm aia angang weires fän akkar lon unusen eu rän, nge ka chök anönnöü liwiniir me liwinim.’ ¹³ Iwe, ewe mine an ewe tanipin wain a üreni eman leir, ‘Pwii, kopwe rongorong. Ngang üsap föri och mi mwäl ngonuk. En ka tipeeu ngeniei pwe kopwe angang lon unusen eu rän fän iten eföü moni silifer. ¹⁴ Iei kopwe angei liwinum o feila le imwom. Ngang üa mochen ngeni ei mwän mi tolong lesopolan liwinin won ükükün met üa liwini ngonuk. ¹⁵ Ifa usun, esap wor ai pwüüng ai üpwe föri ngeni nei moni mine üa mochen? Ika ka lolowo pokiten üa kirikiröch?’ ” ¹⁶ Iwe, Jesus a

pwal apasa, “Iei mine chokewe mi kükümwir repwe akom, nge chokewe mi akom repwe kükümwir.” ✧

Aülüngatin än Jesus kapas usun an mäla

20.17-19

(Mark 10.32-34; Luk 18.31-34)

¹⁷ Iwe, lupwen Jesus a feitä Jerusalem, a emwenala ekewe engol me ruoman chon kaiö, pwe epwe kapas ngeniir lupwen ar fetal. ¹⁸ Iwe, a üreniir, “Oupwe rongorong. Ousipwe feitä Jerusalem. Nge ikenan Nöün Aramas epwe tolong lepöün ekewe souasor mi lap me ekewe Sensen Allük. Repwe apwüngü pwe epwe mäla, ¹⁹ mürin repwe atolonga lepöün ekewe chon lükün Israel. Ir repwe urumwotei, repwe wichi o iräpenges. Nge mürin ülüngat rän epwe manausefälitä.”

Än eman inelap tüngor

20.20-28

(Mark 10.35-45)

²⁰ Mürin pwülüen Sepeti a feito ren Jesus fiti nöün kewe ruoman alüal, a fotopwäsuk me mwan o uwei an tüngor ngeni. ²¹ Iwe, Jesus a aisini, “Met ka mochen?” Neminei a üra, “Kopwe pwon ngeniei, pwe nei kei ruoman alüal repwe mot ünükum, eman lepelifichum, nge eman lepelimöngum, lupwen ka nom lon wisom wisen king.” ²² Nge Jesus a üreni ekewe ruoman alüal, “Ämi ousap silei mine oua tüngor. Ifa usun, oupwe tongeni ün seni ewe kapen riaföü ngang üpwe ünümi?” Ra pölüeni, “Ewer, äm aia tongeni.” ²³ Jesus a üreniir, “Ewer, oupwe fokun ün seni ai we kap. Nge esap wor ai pwüüng ai üpwe flätä iö epwe mot lepelifichi me lepelimöngi. Ekei leni Semei a amolätä fän iten chokewe i a filiiretä.”

²⁴ Iwe, lupwen ekewe engol chon kaiö ra rongorong ei pworas, ra chou ngeni ekewe ruoman pwipwi. ²⁵ Iei mine Jesus a körifengeniir meinisin o üreniir, “Ämi oua silei, pwe ätekewe mi nemeni chon lükün Israel ra samoluniir fän pwora, nge ekewe nöüwis mi lap ra nemeniir fän pöchökül. ²⁶ Nge esap iei usun lefilemi. Pun iö a mochen lap leimi epwe chon angang ngenikemi. ✧ ²⁷ Nge iö a mochen epwe chon akom mwemi, epwe nöümi chon angang, ✧ ²⁸ usun chök Nöün Aramas esap feito pwe aramas repwe angang ngeni, nge a feito an epwe angang ngeniir o fangala manuan fänäsengessin chomong aramas pwe möön manauer.”

Jesus a aneloi mesen ruoman mwän mi chun

20.29-34

(Mark 10.46-52; Luk 18.35-43)

²⁹ Lupwen Jesus me nöün kewe chon kaiö ra towu seni Jeriko, eu mwichen aramas mi chomong a tapwela mürir. ³⁰ Iwe, ruoman mwän mi chun ra mot lepekin ewe al o rongorong pwe Jesus a fetal won ewe al. Iei mine ra popuetä le kökkö fän leüömöng, “Äm samol, nöün Tafit, kopwe tongekem!” ³¹ Nge chomong aramas ra song ngeniir o üreniir pwe repwe fanafanala. Nge ir ra chök alapala ar kökkö, “Äm samol, nöün Tafit, kopwe tongekem!” ³² Iwe, Jesus a üla o kökköriireto. A aisiniir, “Met oua mochen pwe üpwe föri ngenikemi?” ³³ Ra pölüeni, “Äm samol, äm aia mochen pwe aipwe küna mwem.” ³⁴ Jesus a fokun tongeer o atapa meser. Lon ewe chök otun ra tongeni küna mwer o tapwela mürin Jesus.

✧ 20:16: Mat 19.30; Mark 10.31; Luk 13.30 ✧ 20:26: Luk 22.25-26 ✧ 20:27: Mat 23.11; Mark 9.35; Luk 22.26

21

Jesus a tolong lon Jerusalem fän än aramas mweireir

21.1-11

(Mark 11.1-11; Luk 19.28-40; Joh 12.12-19)

¹ Lupwen Jesus me nöün kewe chon kaiö ra tori Petfake arun ewe Chukun Olif, arap ngeni Jerusalem, Jesus a tinala ruoman ekewe chon kaiö pwe repwe akomwola mwer. ² Iwe, a üreniir, “Oupwe feila lon ewe sopw mi nom mwemi. Lupwen oupwe tolong lon, oupwe müttir küna eman aas a riri ikenan, nge nöün a nom ren. Oupwe apichiir o emweniireto rei. ³ Nge are eman epwe apasa och ngenikemi, oupwe üreni, ‘Äm samol a mochen wawa.’ Mürin ätewe epwe mwütiritä lon ewe chök otun.” ⁴ Ei a fis, pwe epwe pwönüetä mine ewe soufos a apasa:

⁵ “Oupwe üreni chon ewe telinimw Sion:

Nengeni ämi king a feito remi!

A tipetekison o wawa eman aas,

me eman nienifön aas.” ✧

⁶ Iei mine ekewe chon kaiö ra feila o föri usun mine Jesus a üreniir. ⁷ Ra emwenato ewe aas me ewe nienifön aas, ra isetä üfer kewe wor, nge Jesus a mot wor. ⁸ Iwe, eu mwichen aramas mi chomong ra oletala üfer kewe won ewe al, nge ekoch ra pwal pöküetiu palen irä o enenala won al. ⁹ Iwe, ekewe chomongun aramas mi akom mwen Jesus, pwal chokewe mi tapweto mürin ra popuetä le kökkö, “Sipwe mwareiti Nöün Tafit! Kot epwe afeiöchü ätewe mi feito fän iten ewe Samol! Ousipwe mwareiti Kot!” ✧ ¹⁰ Iwe, lupwen Jesus a tolong lon Jerusalem, unusen chon ewe telinimw ra mwökütüküt ren. Ra ais, “Iö ätewe?” ¹¹ Ekewe aramas ra pölüeni, “Iei i ewe soufos Jesus seni Nasaret lon Kalilea.”

Jesus a tolong lon ewe imwenfel

21.12-17

(Mark 11.15-19; Luk 19.45-48; Joh 2.13-22)

¹² Iwe, Jesus a tolong lon ewe imwenfel o asüowu ätekewe meinisin mi kamö o amömöla pisek ikenan. A akulätä ekewe chepel än ekewe chon akasiwili moni me ekewe lenien mot än ekewe chon amömö lisom. ¹³ A üreniir, “A mak lon ekewe Toropwe mi Pin pwe Kot a apasa, ‘Ai imwenfel epwe iteni imwen iotek,’ nge ämi oua awili ngeni eu lenien open chon solä.’ ” ✧ ¹⁴ Iwe, chomong mi mesechun me chon pechemä ra feito ren Jesus lon ewe imwenfel, nge i a apöchöküleeretä meinisin. ¹⁵ Nge lupwen ekewe souasor mi lap me ekewe Sensen Allük ra küna ekewe manaman mi amwarar Jesus a föriir, ra pwal küna ekewe semirit mi kökkö lon ewe imwenfel, “Sipwe mwareiti Nöün Tafit,” ra song. ¹⁶ Iei mine ra aisini Jesus, “Ka rongorong mine ekei semirit ra apasa?” Jesus a pölüeniir, “Ewer, üa rongorong. Ousamwo aleani mine a mak lon ekewe Toropwe mi Pin? ‘En ka föri pwe än ekewe semirit me mönükol kölün mwareituk epwe unusöch.’ ” ✧ ¹⁷ Mürin Jesus a likitiirela, a towu seni ewe telinimw o feila Petania. Ikenan a pwinipwin ie.

Jesus a anüamamaua efoch irä fiik

21.18-22

(Mark 11.12-14,20-24)

¹⁸Iwe, lesosorusichin sorotän ewe rän, lupwen Jesus a liwinsefäliti ewe telinimw Jerusalem, a mefi an echik. ¹⁹Nge lupwen an fetal a küna efoch irä fiik lepekin ewe al. Iwe, a asai ngeni, nge esap küna uan, pwe chöön chök. Iei mine a fos ngeni ewe irä fiik, “Esap fokun chüen wor uomw!” Lon ewe chök otun ewe irä fiik a pwasala. ²⁰Lupwen ekewe chon kaiö ra küna pwe ewe irä a pwasala, ra weitifengeniir o üra, “Ifa usun än ei irä fiik pwasakaila?” ²¹Jesus a pölüeniir, “Enlet, üpwe ürenikemi, pwe are oua lükü, nge ousap fokun tipemwaramwar, oupwe tongeni föri met ngang üa föri ngeni ei irä fiik. Nge sap chök ei, nge oupwe fen mwo nge tongeni apasa ngeni ei chuk, ‘Kopwe mwöküt seni ei leni o turulong le matau,’ iwe, epwe fis. ✧ ²²Are oua lükülük, oupwe angei mettoch meinisin mine oua tüngor lon ämi iotek.”

Kapas ais usun än Jesus pwüüing

21.23-27

(Mark 11.27-33; Luk 20.1-8)

²³Iwe, Jesus a liwinsefälilong lon ewe imwenfel, nge lupwen a afalafal, ekewe souasor mi lap me ekewe souakomwen chon Juta ra feito ren o aisini, “Ka angei me ia om pwüüing pwe ka föri ekei mettoch? Iö a ngonuk om pwüüing?” ²⁴Jesus a pölüeniir, “Pwal ngang üpwe aisinikemi eu kapas ais. Are oupwe ngeniei pölüan, üpwe pwal ürenikemi ia üa angei me ie ai pwüüing pwe üpwe föri ekei mettoch. ²⁵Ia Johannes a angei me ie an pwüüing pwe epwe papatais? A feito seni Kot ika seni aramas?” Iwe, ra popuetä le kapasfengen lefiler, “Met sipwe apasa? Are sipwe üra, ‘A feito seni Kot,’ epwe aisinikich, ‘Pwota chök ousap lükü Johannes?’ ²⁶Nge are sipwe üra, ‘A feito seni aramas,’ sia niuokusiti ekewe aramas, pun ir meinisin ra lükü pwe Johannes eman soufos.” ²⁷Iei mine ra pölüeni Jesus, “Äm aisap silei.” Iwe, Jesus a üreniir, “Ika ina, ngang üsap pwal ürenikemi ia üa angei me ie ai pwüüing pwe üpwe föri ekei mettoch.”

Pworausen awewe usun ruoman nau

21.28-32

²⁸“Met oua ekieki? A wor eman mwän a nöüni ruoman alüal. A feila ren ewe mi watte o üreni, ‘Nei, kopwe feila o angang lon ewe tanipin wain ikenai.’ ²⁹Iwe, a pölüeni, ‘Ngang üsap feila.’ Nge me mürin a siwili an ekiek o feila. ³⁰Mürin ewe sam a feila ren ewe aruomanün nau o üreni usun met a üreni ewe mi watte. Ewe nau a pölüeni, ‘Ewer, ai samol, üpwe feila,’ nge esap feila. ³¹Iwe, iö lein ekewe ruoman nau a föri letipen saman?” Iwe, ra pölüeni, “Ewe mi watte.” Iei mine Jesus a üreniir, “Enlet, üpwe ürenikemi, pwe ekewe chon ioni takises me ekewe fin lisowu repwe tolong lon Mwün Kot mwemi. ³²Pun Johannes Soupapatais a feito remi o aiti ngenikemi ewe al mi pwüing oupwe fetal won, nge ämi ousap lükü an afalafal. Nge ekewe chon ioni takises me ekewe fin lisowu ra lükü an afalafal. Inamwo lupwen oua küna ar lükü, ämi ousap siwili ämi ekiek o lükü an afalafal.” ✧

Pworausen awewe usun ekewe chon mälämäl mi ngau

21.33-46

(Mark 12.1-12; Luk 20.9-19)

³³Iwe, Jesus a üra, “Oupwe rongorong ngeni pwal eu pworausen awewe: A wor eman soufanü mi fotuki eu tanipin wain, a föri eu tit ünükün, a tuw eu pwang fän iten ewe lenien üchüch föün wain o aüeta

eu imwen mamas mi tekia lon. Mürin a awisa ekoch chon mälämäl pwe repwe tümwünü an tanipin wain. Iwe, a saila lon eu fanü toau. ³⁴ Nge lupwen a tori fansoun kinikin, a tinala nöün kewe chon angang ren ekewe chon mälämäl, pwe repwe angei seniir wisan me lon ekewe föün wain. ³⁵ Iwe, ekewe chon mälämäl ra turufi nöün kewe chon angang. Ra wichi eman, ra niela pwal eman o monei fau ngeni pwal eman. ³⁶ Mürin ewe mwän a pwal tinala ekoch chon angang mi chomong seni ekewe me mwan. Iwe, ekewe chon mälämäl ra pwal föri ngeniir usun met ra föri ngeni ekewe mi akom. ³⁷ Amüchülan a tinala nöün we ren ekewe chon mälämäl, pun a üra, ‘Enlet, repwe meniniti nei we.’ ³⁸ Nge lupwen ekewe chon mälämäl ra küna ewe nau, ra kapasfengen lefiler, ‘Iei i alemürin ätewe mine an ei tanipi. Ou etto, ousipwe niela, pwe sipwe angei mine an me ren saman!’ ³⁹ Iei mine ra turufi ewe nau, ra aturawu lükün ewe tanipin wain o niela.” ⁴⁰ Mürin Jesus a aisiniir, “Lupwen mine an ewe tanipin wain epwe war, met epwe föri ngeni ekana chon mälämäl?” ⁴¹ Ra pölüeni, “Epwe fokun niela ekana mwän mi ngau o awisa ewe tanipin wain ngeni pwal ekoch chon mälämäl mi awora wisan föün wain lon fansoun kinikin.”

⁴² Iwe, Jesus a üreniir, “Ousamwo fen aleani lon ekewe Toropwe mi Pin? ‘Ewe fau ekewe chon kaü imw ra pöütala pun resap aücheani a wiliti ewe föün lepwokuku mi fokun aüchea.

Iei än ewe Samol föföör

a fokun amwarar mwen mesach!’ [☆]

⁴³ Iei mine üpwe ürenikemi, pwe Kot epwe angei senikemi Mwün we o ngeni eu mwichen aramas mi awora ua ren ar föri föföör mi pwüing. ⁴⁴ [Iö a turutiu won ei fau epwe tatakis, nge are ewe fau epwe turutiu won eman, epwe fokun pachach.]”

⁴⁵ Lupwen ekewe souasor mi lap me ekewe Farisi ra rong än Jesus kewe pworausen awewe, ra mefi pwe a kapas usur. ⁴⁶ Iei mine ra sotuni ar repwe turufi Jesus, nge ra niuokusiti ewe mwichen aramas, pun ra ekieki ngeni Jesus pwe i eman soufos.

22

Pworausen awewe usun ewe kametipen apwüpwülü

22.1-14

(Luk 14.15-24)

¹ Iwe, Jesus a pwal kapas ngeni ekewe aramas lon pworausen awewe o üreniir, ² “Mwün Läng a wewe ngeni eman king mi amolätä eu kametipen apwüpwülü fän iten nöün mwän. ³ A tinala nöün kewe chon angang ar repwe asile ngeni ekewe chon kökköto, pwe repwe feito fiti ewe kametip. Nge ir resap mochen feito. ⁴ Mürin a tinala pwal ekoch chon angang o üreniir, ‘Oupwe asile ngeni ekewe chon kökköto, pwe ngang üa amolätä ai we kametip. Nei kewe ätemwänin kow me ekewe nienifön kow mi aümanau ra fen wes me kuk o mettoch meinisin a molotä. Oupwe feito fiti ewe kametipen apwüpwülü.’ ⁵ Nge ekewe chon kökköto resap afäli, ra feila ngeni en me an angang: Eman a feila ngeni an tanipi, nge eman a feila ngeni an lenien amömö, ⁶ nge pwal ekoch ra turufi ekewe chon angang, ra wichiir o niirela. ⁷ Iwe, ewe king a fokun song. Iei mine a tinala nöün kewe sounfiu pwe repwe niela ekewe chon nimanau o

kenala ar kewe telinimw. ⁸ Mürin a körato nöün kewe chon angang o üreniir, ‘Ai kametipen apwüpwülü a fen molotä, nge chokewe mi kökköto resap fich ngeni. ⁹ Iei oupwe feila ren ekewe alelap o körato iö kana oua küna ngeni ewe kametip.’ ¹⁰ Iei mine ekewe chon angang ra feiliwu lon ekewe alelap o achufengeni ekewe aramas meinisin ra küneer, ekewe aramasöch me ekewe aramasangau. Iwe, ewe imwen kametip a urela ren ekewe aramas. ¹¹ Nge lupwen ewe king a tolong lon ewe imw pwe epwe nengeni ekewe aramas ra feito, a küna eman mwän esap üföüf üföüfen ewe apwüpwülü. ¹² Iwe, ewe king a aisini, ‘Pwii, ifa usun om tolong ikei, nge kosap üföüf üföüfen ewe apwüpwülü?’ Iwe, ewe mwän esap pölüeni och. ¹³ Mürin ewe king a üreni ekewe chon angang, ‘Oupwe föti pöün me pechen ei mwän o aturawu lon rochopwaken lükün. Ikenan epwe pupuchör o akarüngi.’” ✠ ¹⁴ Iwe, Jesus a sopwela lon an kapas, “Ekewe chon kö ra chomong, nge ekewe chon fil ra chokükün.”

Kapas ais usun takises

22.15-22

(Mark 12.13-17; Luk 20.20-26)

¹⁵ Mürin ekewe Farisi ra feila o pwüngüpwüngfengen usun ar repwe särei Jesus ren ar kapas ais. ¹⁶ Ra tinala ren Jesus ekoch nöür kewe chon kaiö me ekoch chiechien Herotes pwe repwe üreni, “Sense, äm aia silei pwe en ka kapas wenechar. Ka afalafala mine a let usun letipen Kot fän iten aramas, nge kosap ekieki mine aramas ra eäni ekiek, pun kosap nenengeni wisen eman. ¹⁷ Kopwe ürenikem met om ekiek. A pwüng ach sipwe mönätü ach takises ngeni Sisar ika ese pwüng?” ¹⁸ Nge Jesus a silei usun ar ekiek mi ngau, iei mine a üreniir, “Ämi chon likatuputup! Pwota oua sotunie? ¹⁹ Oupwe pwäri ngeniei ewe föün moni fän iten takises!” Iwe, ra uwato ren ewe föün moni. ²⁰ Nge Jesus a aisiniir, “Liosun iö me iten iö ei won ei moni?” ²¹ Ra pölüeni, “Liosun Sisar me itan.” Iei mine Jesus a üreniir, “Mi pwüng! Oupwe ngeni Sisar mine än Sisar, nge oupwe ngeni Kot mine än Kot.” ²² Lupwen ar rong ekei kapas, ra weitifengeniir. Mürin ra likitala i o feila.

Kapas ais usun manausefäl

22.23-33

(Mark 12.18-27; Luk 20.27-40)

²³ Lon ewe chök rän ekoch Satusi ra feito ren Jesus, ir ätekewe mi lükü pwe aramas resap manausefäl seni mäla. ✠ ²⁴ Iwe, ra apasa, “Sense, Moses a üra pwe are eman mwän a mäla, nge esap wor nöün me won pwülüan, pwiin ei mwän epwe fokun pwülüeni ei fefin, pwe epwe wor nöün fän iten mwirimwirin pwiin we mi mäla. ✠ ²⁵ A wor füman pwipwi mi nom lefilach. Ewe mwänichi a pwülüeni eman fefin, nge lupwen a mäla esap wor nöün. Iei usun a likiti pwülüan ngeni pwiin we. ²⁶ Iei usun chök a pwal fis ngeni ewe aruomanün me ewe aülümanün tori ewe afümanün. ²⁷ Nge lesopolan ewe fefin a pwal mäla. ²⁸ Iwe, lon ewe ränin, lupwen ekewe sotup repwe manausefälitä, iö me leir epwe pwülüeni ewe fefin, pun ir me füman ra pwüpwülü ngeni?” ²⁹ Nge Jesus a pölüeniir, “Ämi oua fokun mwäl, pun ousap silei makkeen ekewe Toropwe mi Pin me än Kot manaman. ³⁰ Pun lupwen ekewe sotup repwe manausefäl, repwe wewe ngeni ekewe chon läng resap pwüpwülü. ³¹ Nge usun manausefälin

sotup: Ousap mwo aleani mine Kot a fen ürenikemi? A apasa, ³² ‘Ngang än Apraham, Isaak me Jakob we Kot!’ Ei Kot än ekewe mi manau Kot, nge sap än ekewe mi mäla.” ✧ ³³ Iwe, lupwen ekewe aramas lon ewe mwich ra rong ekei kapas, ra weitifengeniir ren an afalafal.

Ewe allük mi lap

22.34-40

(Mark 12.28-34; Luk 10.25-28)

³⁴ Lupwen ekewe Farisi ra rongorong pwe ekewe Satusi ra pinela ren mine Jesus a eäni pölüen ngeniir, ra chufengen. ³⁵ Iwe, eman me leir, i eman Sensen Allük, a sotun le särei Jesus ren an kapas ais ngeni. ³⁶ A aisini, “Sense, meni allük a kon aüchea seni meinisin?” ³⁷ Jesus a pölüeni, “Kopwe echeni ewe Samol om Kot ren unusen lelukom, ren unusen ngünüm pwal ren unusen ekiekum. ³⁸ Iei ewe allük mi lap me aüchea seni meinisin. ³⁹ Nge ewe aruuen allük mi fokun aüchea a usun chök ewe aeuin: ‘Kopwe echeni chon arum usun chök püsin om echenuk.’ ⁴⁰ Unusen än Moses kewe allük me än ekewe soufos kapas ra longolong won ekei ruu allük.” ✧

Kapas ais usun Kraist

22.41-46

(Mark 12.35-37; Luk 20.41-44)

⁴¹ Iwe, lupwen ekoch Farisi ra chufengen, Jesus a aisiniir, ⁴² “Met oua ekieki usun ewe Kraist? I mwirimwirin iö?” Ra pölüeni, “I mwirimwirin Tafit.” ⁴³ Mürin Jesus a aisiniir, “Pwota chök ewe Ngünün Kot a amefi ngeni Tafit an epwe aita ngeni i ‘Samol’? Tafit a apasa, ⁴⁴ ‘Ewe Samol a kapas ngeni ai Samol:

Kopwe mot lepelifichi tori üpwe anomu chon oputom fän pecheöm.’

⁴⁵ Are a ina usun pwe Tafit a püsin aita ngeni i ‘Samol’, ifa usun än Kraist epwe tongeni eman mwirimwirin Tafit?” ⁴⁶ Esap wor eman a tongeni pölüeni än Jesus kapas. Seni ena rän esap chüen wor eman a tongeni aisini och kapas ais.

23

Jesus a kapas usun ar repwe afäliir ren ekewe Sensen Allük me ekewe Farisi

23.1-12

(Mark 12.38-39; Luk 11.43,46; 20.45-46)

¹ Mürin Jesus a kapas ngeni ewe mwichen aramas me nöün kewe chon kaiö, ² “Ekewe Sensen Allük me ekewe Farisi a wor ar pwüüng pwe repwe awewei än Moses kewe allük. ³ Iei mine oupwe aleasochis o föri meinisin mine ra ürenikemi, nge ousap apirü ar föföf, pun resap manaueni mine ra eäni afalafal. ⁴ Ra rifengeni mettoch mi fokun chou o isetä won afaren aramas, nge püsin ir resap pomwe ngeni mwo efoch äütür ar repwe alisiir le keki ekewe mettoch mi chou. ⁵ Ra föri mettoch meinisin pwe aramas repwe küneer. Oupwe nengeni watten ekewe pwor ra rietä won chamwer me pöür, ekewe wokisin seni ekewe Toropwe mi Pin ra nom lon! Nengeni, langatamen ekewe fout lepwülün üfer! ✧ ⁶ Ra sani ar repwe mot won ekewe leni fän iten aramas mi iteföüla lon lenien kametip, pwal won ekewe lenien mot mi keimwüela lon ekewe imwen felikis. ⁷ Ra pwal sani än aramas repwe kapong ngeniir me sufölitiiir lon ekewe lenien

amömö, pwal än aramas repwe kökköri ngeniir ‘Sense’. ⁸ Nge ämi ousap mwüt ngeni aramas pwe repwe kökköri ngenikemi ‘Sense’, pun a chök wor eman nöümi Sense, nge ämi meinisin oua pwipwi. ⁹ Ousap kökköri ngeni eman ikei won fanüfan ‘Sam’, pun a chök wor eman Sememi lon läng. ¹⁰ Ousap pwal kökköri ngeni eman ‘Souemwen’, pun a chök wor eman ämi souemwen, iei i ewe Kraist. ¹¹ Ewe mi lap leimi epwe nöümi chon angang. ✧ ¹² Pun iö a püsin atekiatä epwe tekisonotiu, nge iö a püsin atekisonatiu epwe tekiatä. ✧

Jesus a atipisi ekewe Sensen Allük me ekewe Farisi ren ar likatuputup
23.13-28

(Mark 12.40; Luk 11.39-42,44,52; 20.47)

¹³ “Feiengauemi, ämi Sensen Allük me Farisi! Ämi chon likatuputup! Oua öpüngala ewe asam ngeni Mwün Läng seni aramas. Nge püsin ämi ousap tolong lon, ousap pwal mwüt ngeni chokewe mi mochen tolong ar repwe tolong. ¹⁴ [Feiengauemi, ämi Sensen Allük me Farisi! Ämi chon likatuputup! Oua angemwäli imwen ekewe fefin mi mä pwülüer, mürin oua einga ngeni aramas ämi iotek mi langatam. Iei mine oupwe küna apwüng mi fokun chou.]

¹⁵ Feiengauemi, ämi Sensen Allük me Farisi! Ämi chon likatuputup! Ämi oua saifeil le matau pwal won fanü fän iten ämi oupwe liapeni eman aramas ngeni ämi lamalam. Nge lupwen eman a etiwa ämi lamalam, oua föri pwe ewe aramas epwe kon ngau senikemi le tolong lon hell.

¹⁶ Feiengauemi, ämi souakom mi mesechun! Oua apasa, ‘Are eman a akapelü ewe imwenfel, esap wisen föri pwüngün mine a ääni pwon. Nge are a akapelü ekewe mettoch seni kolt lon imwenfel, epwe fokun föri pwüngün.’ ¹⁷ Umwesimi me mesechunemi! Met a fokun aüchea, ekewe mettoch seni kolt ika ewe imwenfel ewe kolt a pin ren? ¹⁸ Ämi oua pwal apasa, ‘Are eman a akapelü ewe rongen asor esap wisen föri pwüngün mine a ääni pwon. Nge are a akapelü ewe asor mi nom won ewe rongen asor, epwe föri pwüngün.’ ¹⁹ Mesechunemi! Met a fokun aüchea, ewe asor ika ewe rongen asor ewe asor a pin ren? ²⁰ Iei mine lupwen eman a akapelü ewe rongen asor, a akapelü ewe rongen asor pwal ekewe asor meinisin mi nom won. ²¹ Nge lupwen eman a akapelü ewe imwenfel, a akapelü ewe imwenfel me Kot mi nom lon. ²² Nge iö a akapelü läng, a akapelü ewe lenien mot än Kot pwal ewe mi mot won. ✧

²³ Feiengauemi, ämi Sensen Allük me Farisi! Ämi chon likatuputup! Oua ngeni Kot eu leengolon seni ämi irän nofitin mongö mi annö iter mint, dill me kumin. Nge ousap aleasochis ngeni ekewe allük mi fokun aüchea usun pwüng, kirikiröch me allükülük. Ekei allük oupwe fokun apwönüretä, nge ousap pwal tümwününgau ngeni ekewe ekoch. ✧ ²⁴ Mesechunemi, ämi souakom! Oua churawu eman long seni lon ünümemi minen ün, nge oua oromala eman kamel!

²⁵ Feiengauemi, ämi Sensen Allük me Farisi! Ämi chon likatuputup! Oua limeti lükün ämi kap me sepi, nge lon a ur ren mine a torikemi ren angangen mwäneson me kirikiringau. ²⁶ Mesechunemi, ämi Farisi! Oupwe akomwen limeti lon ewe kap me ewe sepi, mürin epwe pwal limöchüla ewe lükün.

✧ **23:11:** Mat 20.26-27; Mark 9.35; 10.43-44; Luk 22.26 ✧ **23:12:** Luk 14.11; 18.4 ✧ **23:22:** Ais 66.1; Mat 5.34 ✧ **23:23:** Lif 27.30

²⁷ Feiengauemi, ämi Sensen Allük me Farisi! Ämi chon likatuputup! Oua usun chök ekewe peias mi peinitipwech ra lingöch me lükün, nge lon ra ur ren chün aramas me machen somä. ✧ ²⁸ Iei usun pwal ämi: Oua pwä ngeni aramas lon lapalapen aramas mi pwüing, nge lon letipemi oua ur ren likatuputup me tipis.

Jesus a kapas usun ar repwe küna liwinin ar tipis

23.29-36

(Luk 11.47-51)

²⁹ Feiengauemi, ämi Sensen Allük me Farisi! Ämi chon likatuputup! Oua föri peias mi fokun mürina fän iten ekewe soufos o alinga ekewe föün achem fän iten ekewe chon pwüing. ³⁰ Oua apasa, 'Are äm aia manau lon fansoun äm kewe lewo, äm aisap etiir le niela ekewe soufos.' ³¹ Ren ei oua püsin pwärätä pwe oua mwirimwirin chokewe mi niela ekewe soufos! ³² Oupwe chök sopwela le awesala mine ämi kewe lewo ra popuetä! ³³ Ämi serepenit me etelien serepenit! Ifa usun, ämi oupwe tongeni sü seni liwiningauen ämi tipis lon hell? ✧

³⁴ Iei mine üpwe tinala remi soufos me soutipachem me sense. Ämi oupwe niela ekoch leir, oupwe iräpengesi ekoch, oupwe pwal wichi ekoch me lon ämi imwen felikis o cheerela seni eu telinimw tori pwal eu telinimw. ³⁵ Iei mine epwe feitiu womi ewe apwüing fän iten ninnilan ekewe aramas mi pwüing meinisin, seni ninnilan ewe chon pwüing Epel tori ninnilan Sekaraia nöün Perekia, ätewe oua niela lefilen ewe imwenfel me ewe rongen asor. ✧ ³⁶ Enlet, üpwe ürenikemi: Ewe apwüing fän iten mälan ekei mi nimanau epwe tori ei pilon aramasen ikenai.

Jesus a tongei chon Jerusalem

23.37-39

(Luk 13.34-35)

³⁷ "Jerusalem, Jerusalem! Ka niela ekewe soufos o mone fau ngeni ekewe chon künö Kot a tinato reöm! A fän fite ai mochen achufengeni noumw kewe aramas usun eman inelapen chuko a amwichafengeni nöün kana fän pöükässin, nge ämi ousap mochen. ³⁸ Nengeni ämi we imwenfel epwe pöla, pun aramas repwe likitala. ✧ ³⁹ Pun üpwe ürenikemi, pwe seni lon ei fansoun ousap chüen künasefäliei tori oupwe apasa, 'A feiöch ätewe a feito fän iten ewe Samol.'" ✧

24

Jesus a kapas usun talan ewe imwenfel

24.1-2

(Mark 13.1-2; Luk 21.5-6)

¹ Mürin än Jesus feila seni ewe imwenfel, nöün kewe chon kaiö ra feito ren o aiti ngeni lingöchün ekewe imw lon ewe lenien fel. ² Nge Jesus a üreniir, "Ewer, oua nenengeni ekei mettoch meinisin. Enlet, üpwe ürenikemi: Esap fokun wor eföü fau epwe chüen nom lon lenian. Meinisin ekewe fau repwe toropasetiu."

Riaföü me ninni

24.3-14

(Mark 13.3-13; Luk 21.7-19)

✧ 23:27: Föf 23.3 ✧ 23:33: Mat 3.7; 12.34; Luk 3.7 ✧ 23:35: Ken 4.8; 2.Kron 24.20-21
✧ 23:38: Jer 22.5 ✧ 23:39: Kölf 118.26

³ Iwe, lupwen Jesus a mot won ewe Chukun Olif, ekewe chon kaiö ra feito ren, nge ir chök. Ra tüngor ngeni, “Kose mochen ürenikem inet epwe fis ekei mettoch meinisin? Kopwe pwäri ngenikem asisilen fansoun om wareto me ewe fansoun sopolan.” ⁴ Jesus a pölüeniir, “Oupwe mamas, pwe esap wor eman epwe atupukemi. ⁵ Pun chomong aramas repwe feito fän itei o apasa, ‘Ngang Kraist!’ Iwe, repwe atupala chomong aramas. ⁶ Oupwe rongorong akürangen maun me pworausen maun, nge ousap niuokus. Ekei mettoch repwe fokun fis, nge esap tori mwo fansoun sopolan. ⁷ Fanü me fanü repwe fiufengen o mwü me mwü repwe maunfengen. Epwe wor lengita me chechechin fanü ekis meinisin. ⁸ Ekei riaföü meinisin ra usun chök ekewe metek eman fefin a eäni me mwen an epwe nöünöüla. ⁹ Mürin repwe fötekinikemi, repwe atolongakemi lepöün chokewe mi ariaföüükemi o nikemiila. Aramas meinisin repwe oputakemi pokiten itei. ¹⁰ Iwe, chomong repwe fangatä ar lükülük lon ena fansoun, repwe afangamäfengeniir lefiler o oputafengeniir. ¹¹ Mürin chomong soufos chofona repwe feito o atupala chomong aramas. ¹² Pokiten a wattela föföringau, epwe patapatala ewe chen lefiler aramas. ¹³ Nge iö epwe likitü tori lesopolan epwe küna manau. ¹⁴ Iwe, aramas repwe afalafalafeili ewe Pworausen Manau usun ewe Mwün Kot won unusen fanüfan, pwe epwe eu minen pwärätä ngeni aramas meinisin. Mürin epwapw tori fansoun sopolan.

Ewe mettoch mi eniweniw

24.15-28

(Mark 13.14-23; Luk 21.20-24)

¹⁵ “Iwe, ämi oupwe küna ewe ‘Mettoch mi Eniweniw’, ewe soufos Taniel a kapas usun. Epwe nom lon ewe leni mi pin. (Ewe chon aleani epwe weweiti met wewen ei.) ¹⁶ Mürin chokewe mi nom Jutea repwe sütä won ekewe chuk. ¹⁷ Eman aramas mi nom won imwan esap wor an fansoun an epwe tötiu o tolong lon imwan pwe epwe angei och. ¹⁸ Nge eman mi nom lemäl esap liwiniti imwan an epwe angei üfan sekit. ¹⁹ Riaföün ekewe fefin mi pwopwo me ekewe inelap mi oupwu nöür lon ekana rän. ²⁰ Oupwe iotek ngeni Kot pwe ei sokun riaföü esap fis lon fansoun patapat ika lon ränin sapat! ²¹ Pun riaföün lon ekana rän epwe fen lap seni ekewe riaföü mi fen fis seni lepoputän fanüfan tori ei fansoun, esap pwal fissefäl ena sokun lon ekewe fansoun repwe feito. ²² Are Kot esap amochomochala ekewe rän, esap wor eman aramas epwe manau. Nge pokiten chokewe a filiiretä a amochomochala ekewe fansoun riaföü.

²³ Lon ena fansoun, are eman epwe apasa ngenikemi, ‘Nengeni, iei i Kraist!’ ika ‘Nengeni, a nom ikenan!’ ousap lükü ätewe. ²⁴ Pun kraist chofona me soufos chofona repwe war o föri asisil me manaman mi lapalap, pwe repwe mwo nge atupu ekewe chon fil are repwe tongeni. ²⁵ Oupwe rongorong! Ngang üpwe pwäri ngenikemi ekei mettoch mwen ar repwe fis. ²⁶ Iei mine are eman epwe ürenikemi, ‘Nengeni, a nom lon ewe fanüapö!’ ousap feila ikenan. Ika ra apasa, ‘Nengeni, a opola ikei!’ ousap lükü ekei kapas. ²⁷ Pun Nöün Aramas epwe feito usun fifi mi fila lon unusen läng seni ötiu tori lotou. ²⁸ Ia a wor ie eman somä, ikenan ekewe machang iter wolcher ra mwichfengen ie.

Liwinsefäilton Nöün Aramas

24.29-31

(Mark 13.24-27; Luk 21.25-28)

²⁹ “Lon ewe chök otun mürin ewe fansoun riaföü, akkar epwe rochola, maram esap chüen tittin, ekewe fü repwe turutiu me läng, nge ekewe manamanen läng repwe mwöküt seni lenier. ³⁰ Mürin asisilen Nöün Aramas epwe pwäla fän läng, nge aramas meinisin won fanüfan repwe kechü, lupwen repwe küna Nöün Aramas epwe feito won kuchu fän manaman me ling mi lapalap. ³¹ Iwe, epwe tinala nöün kewe chon läng fän tikin rappwa mi leüömong, pwe repwe amwichafengeni afilian kana seni lepelien fanüfan me rüanü, seni esopun läng tori esopun.

Ekewe kapasen kait seni ewe irä fiik

24.32-35

(Mark 13.28-31; Luk 21.29-33)

³² “Oupwe kaiö eu lessen seni ewe irä fiik. Lupwen palan kana ra anüen fetil o popuetä le pwüküwu chön, oua silei pwe a arap fansoun räs. ³³ Iei usun, lupwen oua küna pwe ekei mettoch ra fis, oupwe silei pwe i a arapoto, a molotä an epwe le war. ³⁴ Enlet, üpwe ürenikemi, pwe ei pilon aramas resap mäla tori epwe fisitä ekei mettoch meinisin. ³⁵ Läng me fanüfan repwe morola, nge ai kapas kana resap fokun morola.

Esap wor eman a silei ränin än Jesus epwe war

24.36-44

(Mark 13.32-37; Luk 17.26-30,34-36)

³⁶ “Esap wor eman a silei ewe rän are ewe kulok ekei mettoch repwe fis lon, sap mwo nge ekewe chon läng are ewe Nau, nge ewe Sam echök a silei. ³⁷ Ewe fansoun waren Nöün Aramas epwe usun chök met a fis lon fansoun Noa. ³⁸ Lon ekewe rän mwen ewe noter, ekewe aramas ra momongö o ükün, ra pwüpwülü o akapwüpwülüür tori ewe rän lupwen Noa a tolong lon ewe waimw. ³⁹ Resap silei mine epwe fis tori ewe noter a war o niirela meinisin. Ina usun mine epwe fis lupwen Nöün Aramas epwe war. ⁴⁰ Lon ena fansoun ruoman mwän repwe anganfengen lemäl, Nöün Aramas epwe angeala eman, nge ewe eman epwe likitätü. ⁴¹ Ruoman fefin repwe üsüs-fengen, epwe angeala eman, nge ewe eman epwe likitätü.

⁴² Iei mine oupwe mamasa, pun ousap silei lon meni rän ämi Samol epwe wareto. ⁴³ Are ewe souimw epwe silei inet ewe chon solä epwe war, oupwe fokun silei, pwe ätewe epwe nenela, nge esap mwüt ngeni ewe chon solä an epwe atalong imwan we. ⁴⁴ Iei mine pwal ämi, oupwe molotä fansoun meinisin, pun Nöün Aramas epwe war lon eu otun ousap ekiengi ngeni.

Ewe chon angang mi allükülük pwal ewe esap allükülük

24.45-51

(Luk 12.41-48)

⁴⁵ “Iwe, iö chök ewe chon angang mi allükülük o tipachem? Ätewe an masta epwe seikätä pwe epwe nemeni nöün kewe chon angang o ngeniir wiser mongö lon fansoun fich. ⁴⁶ Feiöchün ewe chon angang, are an we masta a küna pwe a föri iei usun lupwen a war. ⁴⁷ Enlet, üpwe ürenikemi, an we masta epwe seikätä, pwe epwe nemeni mettochun meinisin. ⁴⁸ Nge are ei chon angang a ngau, epwe ekieki lon lelukan, ‘Ai we masta epwe fokun mang an epwe liwinto’, ⁴⁹ epwe popuetä le wichi chiechian kewe chon angang, epwe pwal momongö me ükün fiti chon sakau. ⁵⁰ Mürin än ei chon angang we masta epwe liwinto lon eu rän ewe chon angang

esap ekieki ngeni, pwal lon eu fansoun esap silei. ⁵¹ Iwe, ewe masta epwe apwüngü ngeni mäla o alenia lon lenien ekewe chon likatuputup. Ikewe epwe kechü o akarüngi ie.

25

Pworausen awewe usun ekewe engol föpwül

25.1-13

¹ “Lon ewe fansoun Mwün Läng epwe wewe ngeni engol föpwül mi angei nöür kewe lamp o feila souni ewe mwän apwüpwülü söfö. ² Limman me leir ra tiparoch, nge limman ra tipachem. ³ Ekewe mi tiparoch ra uwei nöür lamp, nge resap uwei alölön nöür kewe lamp. ⁴ Nge ekewe mi tipachem ra uwei nöür kewe lamp, ra pwal uwei alölöör. ⁵ Iwe, ewe mwän apwüpwülü söfö a mang le feito, iei mine ir meinisín ra aiesum o möür. ⁶ Nge lelukenipwin a wor eu kökkö, ‘A war ewe mwän apwüpwülü söfö. Oupwe feila o souni!’ ⁷ Mürin ekewe föpwül meinisín ra pwätä o atinöchü nöür kewe lamp. ⁸ Iwe, ekewe mi tiparoch ra üreni ekewe mi tipachem, ‘Ouse mochen oupwe ngenikem ekis seni ämi kewe alölö, pun nöüm kei lamp repwe le kunula.’ ⁹ Nge ekewe mi tipachem ra pölüeniir, ‘Amusala, esap fokun naf ngenikemi me äm. Oupwe feila kamö ämi alölö lon sitowa.’ ¹⁰ Iei mine ekewe föpwül mi tiparoch ra feila pwe repwe kamö ar alölö. Nge lupwen ra feila, ewe mwän apwüpwülü söfö a war. Iwe, ekewe limman föpwül mi molotä ra eti le tolong lon ewe imwen kametipen apwüpwülü, mürin ewe asam a kapüngüla. ¹¹ Nge mürin ekewe limman föpwül ra war. Iwe, ra kökkö, ‘Samol, samol, kose mochen suki ngenikem asam.’ ¹² Ewe mwän apwüpwülü söfö a pölüeniir, ‘Enlet, üpwe ürenikemi, üsap fokun silekemi.’ ¹³ Iei mine oupwe mamasa, pun ousap silei lon meni rän ika kulok Nöün Aramas epwe war lon.

Pworausen awewe usun ekewe ülüman chon angang

25.14-30

(Luk 19.11-27)

¹⁴ “Lon ewe fansoun Mwün Läng epwe wewe ngeni eman mwän mi ekiekin sai ngeni eu fanü toau. A körifengeni nöün kewe chon angang o awisa ngeniir pwe repwe tümwünü pisekin meinisín. ¹⁵ A ngeni eman me eman ükükün mine a tufich ngeni: A ngeni eman limungeröü föün moni silifer, a ngeni pwal ewe eman ruungeröü, nge a pwal ngeni ewe eman engeröü. Mürin a sai. ¹⁶ Iwe, ewe chon angang mi angei limungeröü föün moni silifer a müttir feila o anganga ewe moni, pwe manauan a tori pwal limungeröü. ¹⁷ Ina chök usun ewe mi angei ruungeröü, a pwal anganga ewe moni, pwe manauan a tori pwal ruungeröü. ¹⁸ Nge ewe eman chon angang mi angei engeröü föün moni a feila, a tuw eu pwang lepwül o irela än an we masta we moni. ¹⁹ Mürin fansoun langatam än ekewe chon angang we masta a liwinsefäl o kütta pworausen nöün kewe moni ra anganga. ²⁰ Ewe chon angang mi angei limungeröü föün moni a feito o isetiu fengen me pwal limungeröü. A apasa, ‘Ai samol, en ka ngeniei limungeröü föün moni. Iei a pwal wor limungeröü föün moni üa apacha ngeni pwe manauan.’ ²¹ An we masta a üreni, ‘Om angang a fokun mürina. En eman chon angang mi mürina o allükülük. Ka fen allükülük won mine a chokükün, iei mine üpwe seikuketä won mine a chomong. Kopwe tolong o etiei lon ai pwapwa.’ ²² Mürin ewe chon angang mi angei ruungeröü föün moni a tolong o apasa, ‘Ai samol, en

ka ngeniei ruungeröü föün moni. Nge iei a pwal wor ruungeröü föün moni üa apacha ngeni pwe manauan.’ ²³ An we masta a üreni, ‘Om angang a fokun mürina. En eman chon angang mi mürina o allükülük. Ka fen allükülük won mine a chokükün, iei mine üpwe seikuketä won mine a chomong. Kopwe tolong o etiei lon ai pwapwa.’ ²⁴ Mürin ewe chon angang mi angei engeröü föün moni a tolong o apasa, ‘Ai samol, üa silei pwe en eman mwän mi tipepöchökül. Ka kinikin ia kosap fofot ie, ka ionifengeni uän irä ia kosap amworafeili pwükil ie. ²⁵ Üa niuokus, iei mine üa irela nouwm we moni fän pwül. Nengeni, iei noumw we moni.’ ²⁶ Iwe, an we masta a pölüeni, ‘En eman chon angang mi ngau o chipwang! Ka fen silei pwe ngang üa kinikin ia üsap fofot ie, üa pwal ionifengeni uän irä ia üsap amworafeili pwükil ie? ²⁷ Epwe fen öch om kopwe iseis nei we moni lon bank, pwe lupwen üpwe liwinsefäl üpwe angesefäl iei nei we moni fiti manauan. ²⁸ Iei oupwe angei nei we moni seni ätei o ngeni ätenan a eäni engol ngeröü föün moni. ²⁹ Pun iön a wor an, Kot epwe apacha och ngeni an we, pwe epwe somwola. Nge iön esap wor an, Kot epwe fen mwo nge angei seni ewe ekis a wor ren. ³⁰ Nge ren ei chon angang mi lomotongau, oupwe aturawu lükün lon ewe lenien rochopwak. Ikenan epwe pupuchör o akarüngi ie.’

Ewe kapwüngün lesopolan

25.31-46

³¹ “Iwe, lupwen Nöün Aramas epwe war lon lingan o chon läng meinisin repwe eti, epwe mot won an lenien motun king mi ling. ³² Iwe, chon ekewe mwü meinisin repwe mwichfengen me mwan. Mürin epwe aimwüfesenier lon ruu mwich, usun eman chon fol man a aimwüfesenie ekewe sip seni ekewe kuuch. ³³ Epwe anomu ekewe sip lepelifichin, nge ekewe kuuch epwe anomur lepelimöngun. ³⁴ Mürin ewe king epwe üreni ekewe aramas mi nom lepelifichin, ‘Oupwe feito ämi mi feiöch me ren Semei! Oupwe mwüni ewe mwü mi molotä fän itemi seni lepoputän fanüfan. ³⁵ Pun ngang üa echik, nge ämi oua amongöüei, üa kaka, nge ämi oua aünüei, üa wasöla, nge ämi oua etiwaei lon imwemi. ³⁶ Üa selela, nge ämi oua aüföüfaei, üa apwangapwang, nge ämi oua tümwünüei, üa nom lon fötek, nge ämi oua feito churiei.’ ³⁷ Mürin ekewe chon pwünp repwe pölüeni, ‘Äm Samol, inet aia küna pwe ka echik, nge aia amongöök, inet ka kaka, nge aia aünük? ³⁸ Inet aia küna pwe ka wasöla, nge aia etiwok lon imwem, are inet aia küna pwe ka selela, nge aia aüföüfok? ³⁹ Inet aia küna pwe ka apwangapwang are nom lon fötek, nge aia feila churuk?’ ⁴⁰ Iwe, ewe king epwe pölüeni, ‘Enlet, üpwe ürenikemi: Mine oua föri ngeni eman lein ekewe pwii mi fokun kisikis, iei oua föri ngeniei.’

⁴¹ Mürin epwe üreni chokewe mi nom lepelimöngun, ‘Oupwe feil seniei, ämi chon anümamau, oupwe feila lon ewe ekkei esekun a fen amol fän iten Tefil me nöün chon läng kana! ⁴² Pun üa echik, nge ämi ousap amongöüei, üa kaka, nge ämi ousap aünüei. ⁴³ Üa wasöla, nge ämi ousap etiwaei lon imwemi, üa selela, nge ämi ousap aüföüfaei, üa apwangapwang o nom lon fötek, nge ämi ousap tümwünüei.’ ⁴⁴ Mürin repwe pölüeni, ‘Äm Samol, inet äm aia küna pwe ka echik ika kaka, ika wasöla, ika selela, ika apwangapwang, ika nom lon fötek, nge aisap tümwünük?’ ⁴⁵ Mürin ewe king epwe pölüeni, ‘Enlet, üpwe ürenikemi: Mine ousap föri ngeni eman lein ekewe mi fokun kisikis, iei ousap pwal föri ngeniei.’ ⁴⁶ Iwe, chokei

repwe feila ngeni ewe apwüng esemüch, nge ekewe chon pwüng repwe feila ngeni manau esemüch.”

26

Ra rawei Jesus

26.1-5

(Mark 14.1-2; Luk 22.1-2; Joh 11.45-53)

¹ Lupwen Jesus a awes le kapas won ekei mettoch meinisin, a üreni nöün kewe chon kaiö, ² “Ämi oua silei pwe mürin ruu rän epwe fis ewe chulapen Pasofer. Iwe, Nöün Aramas epwe tolong lepöün aramas ar repwe iräpengesi.”

³ Iwe, ekewe souasor mi lap me ekewe souakom ra mwichfengen lon imwen ewe Souasor mi Lap Kaifas. ⁴ Ra pwüngüpüwüpfengen usun ar repwe turufi Jesus le monomon o niela. ⁵ Nge ra apasa, “Sisap föri ei ekiek lupwen fansoun ewe chulap, pun a tongeni fis pwe epwe wor fitikoko seni ekewe aramas.”

Jesus a kepit me lon Petania

26.6-13

(Mark 14.3-9; Joh 12.1-8)

⁶ Iwe, Jesus a nom lon Petania lon imwen Simon, eman mwän mi üri rupun pwötür me mwan. ⁷ Nge lupwen Jesus a mongö, eman fefin a feito ren fän eu lö pwokus mi fokun mömong, a nom lon eu rume mi för seni ewe fau itan alapaster. Neminei a ninätü ei lö won möküren Jesus. ⁸ Iwe, lupwen ekewe chon kaiö ra küna ei föfö, ra fokun song. Ra apasa, “Pwota a asolapa ei lö pwokus?” ⁹ Pun ei lö eman a tongeni amömöla ren watten moni. Mürin ei moni epwe la ngeni ekewe chon wöüngau!” ¹⁰ Nge Jesus a silei met ra apasa, iei mine a üreniir, “Pwota oua aweiresi neminei? Met a föri ngeniei a fokun mürina. ¹¹ Ekewe chon wöüngau repwe nonom remi fansoun meinisin, nge ngang üsap nonom remi fansoun meinisin. ¹² Lupwen a ninätü ei lö pwokus woi, a fen amolätä inisi ngeni peias. ¹³ Enlet, üpwe ürenikemi: Ekis meinisin won unusen fanüfan ia aramas repwe afalafala ei Pworausen Manau ie, ikenan aramas repwe pwal apworausä mine neminei a föri pwe achechemenien itan.”

Jutas a tipeeu ngeni an epwe afangamä Jesus

26.14-16

(Mark 14.10-11; Luk 22.3-6)

¹⁴ Mürin eman me lein ekewe engol me ruoman chon kaiö, itan Jutas Iskariot, a feila ren ekewe souasor mi lap ¹⁵ o aisiniir, “Met oupwe ngeniei are üpwe afangamä Jesus ngenikemi?” Iwe, ra ngeni ilik föün moni silifer. ¹⁶ Seni ena otun Jutas a kütta eu fansoun mi fich an epwe tongeni atolonga Jesus lepöür.

Jesus me nöün kewe chon kaiö ra mongö ewe mongön Pasofer

26.17-25

(Mark 14.12-21; Luk 22.7-13,21-23; Joh 13.21-30)

¹⁷ Iwe, lon aeuin ränin ewe chulapen mongö pilawa esap wor iis lon, ekewe chon kaiö ra feito ren Jesus o aisini, “Ia ka mochen sipwe amolätä ie ewe mongön Pasofer fän itom?” ¹⁸ Jesus a pölüeniir, “Oupwe feila lon ewe telinimw ren eman mwän o oupwe üreni, ‘Nöüm sense a üra: A tori ai fansoun. Ngang me nei kewe chon kaiö aipwe mongö ewe mongön

Pasofer lon imwom.’”¹⁹ Iwe, ekewe chon kaiö ra föri usun met Jesus a üreniir o amolätä ewe mongön Pasofer.

²⁰ Lupwen a lekuniol, Jesus me ekewe engol me ruoman chon kaiö ra mot ngeni chepel ar repwe mongö. ²¹ Iwe, lupwen ar mongö, Jesus a üreniir, “Enlet, üpwe ürenikemi, pwe eman me leimi epwe afangamäei.” ²² Nge ekewe chon kaiö ra lolilen ren ekei kapas o popuetä le kapas ais ngeni Jesus eman mürin eman, “Ifa usun, sap fen ngang ena?” ²³ Iwe, Jesus a pölüeniir, “Eman mi etiei le otukalong anan we pilawa lon ewe sepi ina i ätewe epwe afangamäei. ²⁴ Nöün Aramas epwe mäla usun a fen mak lon ekewe Toropwe mi Pin, nge feiengauen ätewe mi afangamä Nöün Aramas! Epwe fen öch ngeni ei mwän are esap fen mwo nge uputiu!” ²⁵ Iwe, Jutas ätewe mi afangamä Jesus a üra, “Sense, ifa usun, sap fen ngang ätewe?” Jesus a pölüeni, “Ewer, usun om apasa.”

Ewe mongön ach Samol

26.26-30

(Mark 14.22-26; Luk 22.14-20; 1.Kor 11.23-25)

²⁶ Iwe, lupwen ra mongöfengen, Jesus a angei ewe pilawa, a iotekin kilisou won, iwe, a kinikisietiu. A ineti ngeni nöün kewe chon kaiö o apasa, “Oupwe angei o mongö, iei inisi.” ²⁷ Mürin a angei eu kap, a iotekin kilisou won, iwe, a ngeniir o apasa, “Ämi meinisin oupwe ün seni. ²⁸ Pun iei chai a allükülükü än Kot we pwon mi fö ngenikemi, a ninnila fänäsengessin chomong aramas, pwe amusamusen ar tipis kana. ²⁹ Üpwe ürenikemi, pwe üsap chüen ün seni ei wain, tori ewe rän lupwen üpwe ünümi ewe wain mi fö me ämi lon Mwün Semei.” ³⁰ Mürin ra eäni echö kölün kilisou, ra towu seni ewe imw o feila won ewe Chukun Olif.

Jesus a osuni pwe Petrus epwe amam i

26.31-35

(Mark 14.27-31; Luk 22.31-34; Joh 13.36-38)

³¹ Mürin Jesus a üreni nöün kewe chon kaiö, “Lepwinei ämi meinisin oupwe sü seniei o likitieila, pun iei usun mine a mak lon ekewe Toropwe mi Pin, ‘Kot epwe niela ewe chon mas, nge ekewe sip repwe toropasfeil.’ ³² Nge mürin ai manausefälitä üpwe akomwola Kalilea mwemi.” ³³ Iwe, Petrus a üreni Jesus, “Ikamwo ir meinisin repwe likitukela, ngang üsap fokun likituk.” ³⁴ Jesus a üreni Petrus, “Enlet, üpwe ürenuk pwe lon ei chök pwinin mwen ewe chuko epwe kökkö, en kopwe amamäsiniei fän ülüngat.” ³⁵ Nge Petrus a pölüeni, “Are mwo üpwe fen etuk le mäla, üsap fokun amamäsinuk.” Pwal ekewe chon kaiö meinisin ra apasa ei ititin fos.

Jesus a iotek lon Ketsemane

26.36-46

(Mark 14.32-42; Luk 22.39-46)

³⁶ Mürin Jesus me nöün kewe chon kaiö ra feila lon eu leni itan Ketsemane. Iwe, a üreniir, “Oupwe nom ikei, nge ngang üpwe feila ikenan o iotek.” ³⁷ A pwal aweinala Petrus me nöün Sepeti kewe ruoman mwän. Mürin a popuetä le letipeta o riaföü. ³⁸ Iwe, a üreniir, “Riaföün letipei a fokun wattela, pwe üa arap ngeni ai üpwe mäla. Oupwe nom ikei o etiei le mamas.” ³⁹ Iwe, Jesus a feila ekis, a chapetiu lepwü o iotek, “Semei, are epwe tufich, kopwe angei seniei ei kapen riaföü, nge are ese tufich, letipom epwe fis, nge sap letipei.” ⁴⁰ Mürin a liwinsefälitä ekewe ülüman chon kaiö, nge a küneer pwe ra möür. Iwe, a üreni Petrus, “Ifa usun, pwota

ämi ousap tongeni mwo nge etiei le mamasa lon eu chök kulok? ⁴¹ Oupwe mamasa o iotek pwe ousap turutiu lon sosot. Ewe ngün a mochen pwora, nge ewe fituk a apwanggapwang.” ⁴² Jesus a pwal liwinsefälila o iotek, “Semei, are ei kapen riaföü esap tongeni feil seniei, üpwe fokun ünümi, pun letipom epwe chök fis.” ⁴³ Jesus a pwal liwinsefälila ren ekewe chon kaiö o küneer pwe ra möör, pun ra fokun chouchou. ⁴⁴ Iwe, Jesus a pwal feil seniir, a liwinla o iotek fän aülüngatin lon chök ekewe ititin kapas a eäni me mwan. ⁴⁵ Mürin a liwinsefäliti nöün kewe chon kaiö o üreniir, “Ifa usun, oua chüen annut o asösö? Nengeni, a war ewe fansoun pwe Nöün Aramas epwe oolong lepöün ekewe chon tipis. ⁴⁶ Oupwe pwätä, ousipwe feila. Nengeni iei i ewe mwän mi afangamäei!”

Ra fôtekini Jesus

26.47-56

(*Mark 14.43-50; Luk 22.47-53; Joh 18.3-12*)

⁴⁷ Iwe, lupwen Jesus a chüen kakapas, Jutas, eman me lein ekewe engol me ruoman chon kaiö, a war. Eu mwichen aramas mi chomong ra eti fän nöür ketilas me wokur wok, ir chokewe ekewe souasor mi lap me ekewe souakom ra akünöör. ⁴⁸ Ätewe mi afangamä a ngeniir eu asisil o üreniir, “Ätewe ngang üpwe mitiri, ina i ewe mwän, oupwe turufi!” ⁴⁹ Iwe, Jutas a fetal wenewen ngeni Jesus o üreni, “Sense, kinamwe epwe nonom reöm.” Mürin a mitiri. ⁵⁰ Jesus a pölüeni, “Pwii, kopwe chök föri mine ka ekiekin föri.” Mürin ra sä ngeni, ra turufi Jesus o amwöchü. ⁵¹ Nge eman me lein chokewe mi nom ren Jesus a üttawu nöün ketilas o pöküela selingen nöün ewe Souasor mi Lap we chon angang. ⁵² Iwe, Jesus a üreni, “Kopwe aliwinalong noumw ketilas lon sittan. Pun chokana mi nöünöü ketilas repwe mäla ren ketilas. ⁵³ Ousap silei, pwe ngang üa tongeni tüngor ngeni Semei pwe epwe alisie ren an epwe müttir tinato rei lap seni engol me ruu mwicheichen chon läng? ⁵⁴ Nge are epwe fis ei, epwe ifa usun an epwe pwönüetä makkeen ekewe Toropwe mi Pin mi apasa, pwe iei met epwe fokun fis?” ⁵⁵ Mürin Jesus a üreni ewe mwichen aramas, “Pwota oua feito fän ketilas me wok ämi oupwe turufiei usun itä oupwe turufi eman chon föföringau? Iteiten rän üa nom remi o afalafal lon imwenfel, nge ämi ousap turufiei. ⁵⁶ Nge ekei mettoch meinisin ra fis pwe epwe pwönüetä mine ekewe soufos ra makkei lon ekewe Toropwe mi Pin.” Mürin ekewe chon kaiö meinisin ra likitala Jesus o süla.

Jesus a ü me mwen ewe mwichen soupwüng

26.57-68

(*Mark 14.53-65; Luk 22.54-55,63-71; Joh 18.13-14,19-24*)

⁵⁷ Mürin chokewe mi turufi Jesus ra etekinala ren ewe Souasor mi Lap Kaifas ia ekewe Sensen Allük me ekewe souakom ra mwichfengen ie. ⁵⁸ Nge Petrus a tapwela mürin Jesus me toau tori ewe leni lükün imwen ewe Souasor mi Lap. A tolong lon ewe leni lükün o mottiu ren ekewe chon mas an epwe küna met epwe fis. ⁵⁹ Iwe, ekewe souasor mi lap me unusen ewe mwichen soupwüng ra kütta och popun mi mwäl ar repwe tip ngeni Jesus won pwe epwe mäla, ⁶⁰ nge resap küna och tipis ren. Pwal chomong aramas ra mwo nge ütä o pwärätä ar tipitipmwäl usun. Mürin ruoman ra ütä ⁶¹ o apasa, “Ei mwän a apasa, ‘Ngang üa tufichin ataetiu än Kot we imwenfel, nge lon ükükün ülüngat rän üpwe aüsefälietä.’ ” ⁶² Mürin ewe Souasor mi Lap a ütä o aisini Jesus, “Ifa usun, esap wor om kapasen

pöluen ngeni ekei kapasen atatur ekei mwän ra aturuk won?" ⁶³ Nge Jesus a chök fanafanala. Iwe, ewe Souasor mi Lap a pwal apasa ngeni Jesus, "Kopwe pwon fän akapel iten ewe Kot mi manau o ürenikem ika en ewe Kraist, Nöün Kot." ⁶⁴ Jesus a pölueni, "Ewer, usun om apasa. Nge üpwe ürenikemi meinisin: Seni ei fansoun oupwe küna Nöün Aramas a mot lepelifichin Ewe mi unusen Manaman, epwe war won kuchun läng." ⁶⁵ Mürin ewe Souasor mi Lap a kamwei üfan o apasa, "A eäni kapasen turunufas! Pwota sia chüen mochen angei kapasen atatur? Nengeni, iei oua püsin rongorong an kapasen turunufas. ⁶⁶ Met ämi ekiek usun i?" Ra pölueni, "A tipisin mäla." ⁶⁷ Mürin ra atufa mesan o wichi. Ekoch ra pösapei ⁶⁸ o apasa, "Kraist, kopwe pwäri ngenikem iö a wichiik."

Petrus a amamäsini Jesus

26.69-75

(Mark 14.66-72; Luk 22.56-62; Joh 18.15-18,25-27)

⁶⁹ Iwe, lupwen Petrus a nom lon ewe leni lükün imwen ewe Souasor mi Lap, eman föpwül nöün ewe Souasor mi Lap chon angang a feito ren o üreni, "En pwal eman mi eti Jesus seni Kalilea." ⁷⁰ Nge Petrus a amam me mwer meinisin o üreni, "Ngang üsap silei mine ka kapas usun." ⁷¹ Mürin a feiliwu lon ewe al ngeni ewe asamalap. Iwe, pwal eman chon angang fefin a küna Petrus o üreni ekewe mwän mi nom ikenan, "Ei mwän a eti Jesus seni Nasaret." ⁷² Iwe, Petrus a amamsefäl o apasa, "Üa akapel, üsap silei ena mwän!" ⁷³ Ekis chök fansoun mürin chokewe mi ü ikenan ra feito ren Petrus o üreni, "Enlet, en pwal eman lein ätekewe mi eti enan mwän, pun aia sillenuk ren ngingiimw le kapas." ⁷⁴ Mürin Petrus a üra, "Üa fokun akapel pwe üa pwärätä mine a let! Amwo Kot epwe apwüngüei are üsap apasa mine a let! Ngang üsap fokun silei ena mwän." Lon ewe chök otun ewe chuko a kökkö. ⁷⁵ Iwe, Petrus a chechemeni mine Jesus a üreni, "Me mwen ewe chuko epwe kökkö, en kopwe amamäsiniei fän ülüngat." Iwe, a towu lükün o fokun kechüengau.

27

Ra etekinala Jesus ren Pilatus

27.1-2

(Mark 15.1; Luk 23.1-2; Joh 18.28-32)

¹ Iwe, lupwen a ränila, ekewe souasor mi lap meinisin me ekewe souakom ra pwüngüpwüngfengen usun ar repwe niela Jesus. ² Ra föti ngeni sein o etekinala pwe repwe atolonga lepöün ewe kepina Pilatus.

Jutas a mäla

27.3-10

(Föf 1.18-19)

³ Lupwen Jutas ewe chon afangamä a silei pwe ra atowu pwüngün pwe Jesus epwe mäla, a liamam o a aliwinala ekewe ilik föün moni silifer ren ekewe souasor mi lap me ekewe souakom. ⁴ A apasa ngeniir, "Ngang üa tipis ren ai afangamä eman mwän esap wor an tipis ngeni mäla." Iwe, ra pölueni, "Met wewen ngenikem, kopwe püsin ekiekik." ⁵ Iwe, Jutas a moneelong ewe moni lon ewe imwenfel o feila. Mürin a feila o püsin forusi. ⁶ Nge ekewe souasor mi lap ra angei ekewe föün moni o apasa, "Ei moni liwinin cha, a ngau ngeni allükün ach lamalam pwe sipwe atolonga lon monien imwenfel." ⁷ Mürin ar tipeefengen usun, ra nöüni ewe moni le möni fanüen eman chon föri sepi seni pwül, pwe epwe eu lenien peias

fän iten chon ekis. ⁸ Iei mine ewe fanü a iteni “Fanüen Cha” tori ikenai. ✧ ⁹ Iei usun met ewe soufos Jeremaia a osuni a pwönüetä: “Ra angei ekewe ilik föün moni silifer, iei ükükün ewe moni ekewe chon Israel ra tipeefungen won pwe repwe isetiu fän itan, ¹⁰ o ra nöönöü ei moni le möni ngeni fanüen eman chon föri sepi seni pwül, usun ewe Samol a allük ngeniei.” ✧

Pilatus a kapas ais ngeni Jesus

27.11-14

(Mark 15.2-5; Luk 23.3-5; Joh 18.33-38)

¹¹ Iwe, lupwen Jesus a ütä me mwen ewe kepina Pilatus, Pilatus a aisini, “Ifa usun, en nöün chon Juta we king?” Jesus a pölüeni, “Ewer, usun om apasa.” ¹² Nge lupwen ekewe souasor mi lap me ekewe souakom ra aturu Jesus, i a chök fanafanala. ¹³ Iei mine Pilatus a üreni Jesus, “Kosap rongorong ngeni ekei kapasen atatur meinisin ra aturuk won?” ¹⁴ Nge Jesus esap fokun pölüeni och me lein ar kewe kapas, sap fen mwo nge eu ar kapasen atatur. Iei mine ewe kepina a fokun weitfengeni.

A pwüngüla pwe Jesus epwe mäla

27.15-26

(Mark 15.6-15; Luk 23.13-25; Joh 18.39–19.16)

¹⁵ Iteiten fansoun lupwen a tori ewe mongön Pasofer, ewe kepina a soun amusala eman chon fötek ekewe aramas ra tüngor. ¹⁶ Lon ena fansoun a wor eman chon fötek mi sil me ren aramas pokiten an föföringau, itan Parapas. ¹⁷ Iwe, lupwen än ekewe aramas chufungen, Pilatus a aisiniir, “Iö lein ekewe ruoman oua mochen ai üpwe amusa ngenikemi, Parapas ika Jesus mi iteni Kraist?” ¹⁸ Pilatus a fokun silei pwe ekewe nöüwisen chon Juta ra atolonga Jesus lepöün pokiten ar lolowo. ¹⁹ Iwe, lupwen Pilatus a mot won an lenien motun apwüng, pwülüan a tinala ren ei pworaus: “Kosap föri och ngeni ewe aramas mi pwüng, pun lon ai tan lepwinewe üa fokun riaföü fänäsengesin.” ²⁰ Iwe, ekewe souasor mi lap me ekewe souakom ra pese ngeni ewe mwichen aramas pwe repwe tüngor ngeni Pilatus pwe epwe amusala Parapas, nge epwe niela Jesus. ²¹ Nge Pilatus a aisini ewe mwichen aramas, “Iö me lein ekewe ruoman oua mochen ai üpwe amusa ngenikemi?” Iwe, ra pölüeni, “Parapas.” ²² Pilatus a aisiniir, “Nge met üpwe föri ngeni Jesus, ewe a iteni Kraist?” Ir meinisin ra köpökütä, “Kopwe iräpengesil!” ²³ Nge Pilatus a aisiniir, “Met sokun föföri mi ngau a föri?” Mürin ra köpökütä fän leüömong, “Kopwe iräpengesil!” ²⁴ Iwe, lupwen Pilatus a küna pwe esap wor lomoten an epwe sopwela le kapas ngeniir, a pwal mefi pwe eu fitikoko epwe popuetä, a angei koluk o talü pöün me mwen ewe mwichen aramas o apasa, “Esap nom woi tipisün än ei aramas epwe ninnila. Epwe püsin nonom womi.” ✧ ²⁵ Mürin ekewe aramas meinisin ra pölüeni, “Liwinin chaan epwe nonom wom me won nöüm kana!” ²⁶ Iwe, mürin Pilatus a amusawu Parapas ngeniir, nge a wichi Jesus o atolonga lepöün ekewe sounfiu pwe repwe iräpengesil.

Ekewe sounfiu ra turunufasei Jesus

27.27-31

(Mark 15.16-20; Joh 19.2-3)

27 Mürin nöün Pilatus kewe sounfiu ra angei Jesus o etekinalong lon imwen ewe kepina, nge unusen ewe mwichen sounfiu ra pweliela ünükün. 28 Ra pwiliti seni üfan o aüföüfa ngeni echö üf mi parachol. 29 Mürin ra fittiifengeni palen iräföläfölä o ämwärämwäratä won möküren Jesus pwe mwärin, ra pwal uwalong efoch wok lon pöüfichin. Mürin ra fotopwäsuketiu mwan o turunufasei. Ra apasa, “Ewe kingen chon Juta epwe manauatam.” 30 Ra atufa, ra angei ewe wok seni o wichi ngeni möküran. 31 Lupwen ra wes me turunufasei, ra pwiliti seni ewe üf o aüföüfa ngeni püsin üfan. Mürin ra etekinala pwe repwe iräpengesi.

Jesus a iräpenges

27.32-44

(Mark 15.21-32; Luk 23.26-43; Joh 19.17-27)

32 Iwe, lupwen ar towu seni ewe telinimw, ra churi eman mwän itan Simon seni Kirene. Ekewe sounfiu ra echimwa ngeni pwe epwe mwärei ngeni Jesus an we iräpenges. 33 Iwe, ra tori ewe leni itan Kolkota, wewen “Lenien Pösökün Mökür”. 34 Ikenan ra aünü ngeni Jesus wain mi nofitfengen me och mettoch mi maras. Nge mürin an neni, esap mochen ünümi. ✧ 35 Iwe, ra iräpengesi Jesus. Mürin ra üttüt won üfan kewe o ngeni eman me eman leir met üttian. ✧ 36 Mürin ra mottiu ikenan o mamasä Jesus. 37 Asen möküran ra apachatä e Koch mak mi pwäratä mine ra tip ngeni, “Iei i Jesus, ewe kingen chon Juta.” 38 Mürin ra pwal iräpengesi ruoman chon solä fiti Jesus, eman a nom lepelifichin, nge eman lepelimöngun. 39 Iwe, ekewe aramas mi pwere seni Jesus ra turunufasei, ra elifechifechi mökürer ✧ 40 o apasa, “En ewe ka ekiekin ataetiu ewe imwenfel o aüsefälietä lon ükükün ülungat rän, kopwe püsin amanauok! Are en Nöün Kot, kopwe tötiu seni ewe iräpenges!” ✧ 41 Pwal ina chök usun ekewe souasor mi lap, ekewe Sensen Allük me ekewe souakom ra takirin ämängauä Jesus o üra, 42 “A amanaua e Koch, nge esap tongeni püsin amanaua! Sap i ewe kingen Israel? Are epwe tötiu seni ewe iräpenges iei, iwe, sipwe lükü i. 43 A lükü Kot o püsin aita ngeni pwe i Nöün Kot. Iwe, sipwe pii are Kot a mochen amanaua i lon ei otun!” ✧ 44 Pwal mwo nge ekewe chon solä mi eti Jesus le iräpenges ra turunufasei i ren ekewe chök ititin kapas.

Jesus a mäla

27.45-56

(Mark 15.33-41; Luk 23.44-49; Joh 19.28-30)

45 Lupwen a tori leoloasen ewe rän, unusen ewe fanü a ro chopwak lon ükükün ülungat awa. 46 Ina epwe kulok ülungat Jesus a kökkö fän leüömong, “Eli, Eli, lama sapaktani? wewen: Ai Kot, ai Kot, pwota ka likitieila?” ✧ 47 Iwe, e Koch aramas mi ü ikenan ra rongorong an kökkö o üra, “A köri Elias!” 48 Eman me leir a müttir säto ren, a angei eu farawa o otukalong lon ewe wain mi mwäl, a pachetä lesopun efoch iich o sotuni an epwe aünü ngeni Jesus. ✧ 49 Nge ekewe e Koch aramas ra üra, “Witi mwo ekis, sipwe pii ika Elias epwe feito o amanaua.” 50 Jesus a kökkösefäl fän leüömong, iwe, a mäla. 51 Lon ewe chök otun ewe chechen mangaku lon imwenfel a kam seni won tori fan, pwe a wor ruu kinikin. A fis chechen fanü, ekewe achau ra sangfesen ✧ 52 o ekewe peias ra sukula

✧ 27:34: Kölf 69.21 ✧ 27:35: Kölf 22.18 ✧ 27:39: Kölf 22.7; 109.25 ✧ 27:40: Mat 26.61; Joh 2.19 ✧ 27:43: Kölf 22.8 ✧ 27:46: Kölf 22.1 ✧ 27:48: Kölf 69.21 ✧ 27:51: Eks 26.31-33

o chomong chon pin mi mäla ra manausefäl. ⁵³ Ra towu seni ekewe peias mürin än Jesus manausefäl seni mäla o feila lon ewe Telinimw mi Pin ia chomong aramas ra küneer me ie. ⁵⁴ Iwe, lupwen ewe meilapen sounfiu me ekewe sounfiu mi mamasa Jesus ra küna ewe chechen fanü me meinisin mine a fis, ra fokun rükö o apasa, “Enlet, ätei wesewesen Nöün Kot!” ⁵⁵ A pwal wor chomong fefin ikenan mi aköürü me ekis toau, ir chokewe mi tapwela mürin Jesus seni Kalilea pwe repwe tümwünü ngeni mine a eäni osupwang. ⁵⁶ Me lein ekei fefin Maria Maktalene, Maria inen James me Josef, pwal pwülüen Sepeti. ✧

Jesus a peias

27.57-61

(Mark 15.42-47; Luk 23.50-56; Joh 19.38-42)

⁵⁷ Iwe, lupwen a tori lekuniol, eman mwän mi pisekisek seni Arimatea itan Josef a war, ätei pwal eman nöün Jesus kewe chon kaiö. ⁵⁸ A feila ren Pilatus o tüngor somän Jesus. Iwe, Pilatus a allük pwe repwe ngeni Josef somän Jesus. ⁵⁹ Iei mine Josef a angei ewe somä, a finiti ngeni echö mangaku mi fö o pwechepwech, ⁶⁰ o a isenalong lon püsin peiasan mi kärän chök wes me tu lon achau. Mürin a asokopanato eföü fau mi watte o pwölü ngeni mesen ewe peias, iwe, a feila. ⁶¹ Iwe, Maria Maktalene me pwal ewe eman Maria ra mot ikenan awenewenen ewe peias.

Ekewe chon mamasa ewe peias

27.62-66

⁶² Iwe, sorotän ewe rän, iei ewe ränin sapat, ekewe souasor mi lap me ekewe Farisi ra churi Pilatus ⁶³ o üreni, “Äm samol, äm aia chechemeni pwe enan chon chofona a apasa lupwen a chüen manau, ‘Üpwe manausefäl mürin ülüngat rän.’ ✧ ⁶⁴ Iei mine kopwe allük pwe sounfiu repwe mamasafichi peiasan tori ewe aülüngatin rän, pwe nöün kewe chon kaiö resap tongeni feila ren ewe peias o soläni somän o üreni ekewe aramas, ‘A manausefäl seni mäla.’ Ei kapas chofona lesopolan epwe ngau seni ewe kapas chofona lepoputan.” ⁶⁵ Pilatus a pölüeni, “Oupwe angei ekoch sounfiu, oupwe feila o mamasaöchü ewe peias ükükün ämi tufich ngeni.” ⁶⁶ Iei mine ra feila o pwauni won ewe fau, ra pwal likitätü ekewe sounfiu pwe repwe mamasa.

28

Jesus a manausefäl

28.1-10

(Mark 16.1-10; Luk 24.1-12; Joh 20.1-10)

¹ Iwe, mürin ewe ränin sapat lesosorusichin ewe aeuin ränin wiik, Maria Maktalene me pwal ewe eman Maria ra feila pwe repwe nengeneni ewe peias. ² Nge lon eu chök otun a fis och chechekin fanü mi watte, pun eman nöün ewe Samol chon läng a feitiu seni läng, a püntüela ewe fau seni mesen ewe peias o mottiu won. ³ Lapalapan a usun chök fifi, nge üfan a pwechepwech usun sno. ⁴ Iwe, ekewe chon mas ra fokun niuokus, pwe ra chechek o ra wewe ngeni aramas mi mäla. ⁵ Nge ewe chon läng a üreni ekewe fefin, “Ousap niuokus. Üa silei pwe oua kütta Jesus ewe mi iräpenges. ⁶ Esap nom ikei, a manausefälitä usun a fen apasa. Oupwe feito ikei o nenengeni ewe leni ia a kon ie. ⁷ Mürin oupwe

✧ 27:56: Luk 8.2-3 ✧ 27:63: Mat 16.21; 17.23; 20.19; Mark 8.31; 9.31; 10.33-34; Luk 9.22; 18.31-33

müttir feila o asile ngeni nöün kewe chon kaiö, pwe Jesus a manausefäl seni mäla. Iwe, epwe akomwola mwemi Kalilea, ikenan oupwe küna i. Oupwe chechemeni mine üa ürenikemi.”⁸ Iei mine ra feila seni ewe peias fän pacheu, ra niuokus, nge ra pwal fokun pwapwa. Ra säla pwe repwe asile ngeni nöün kewe chon kaiö ewe pworaus.⁹ Lon ewe chök otun Jesus a churiir o üreniir, “Kinamwe epwe torikemi.” Iwe, ra feila ren, ra amwöchü pechen o fel ngeni.¹⁰ Jesus a üreniir, “Ousap niuokus! Oupwe feila o üreni pwii kewe pwe repwe feila Kalilea, ikenan repwe künaei.”

Än ekewe chon mas pworaus

28.11-15

¹¹ Lupwen ekewe fefin ra feila, ekoch me lein ekewe sounfiu mi mamasa ewe peias ra liwinsefäliiti ewe telinimw o apworausa ngeni ekewe souasor mi lap meinisin mine a fis.¹² Iwe, ekewe souasor mi lap ra chufengen me ekewe souakom o pwüngüpüwüngfengen usun ar repwe föri eu ekiek. Mürin ra ngeni ekewe sounfiu chomong moni¹³ o üreniir, “Oupwe üreni ekewe aramas, pwe nöün kewe chon kaiö ra feito lepwin o soläni somän Jesus lupwen oua möür.¹⁴ Nge are ei pworaus epwe tori ewe kepina, äm aipwe afata ngeni pwe esap tipisimi, o ämi ousap tolong lon osukosuk.”¹⁵ Iei mine ekewe sounfiu ra angei ewe moni o föri mine ra öüröüra ngeniir. Iwe, ei pworaus a chöfetal lein ekewe chon Juta tori ikenai.

Jesus a pwä ngeni nöün kewe chon kaiö

28.16-20

(Mark 16.14-18; Luk 24.36-49; Joh 20.19-23; Föf 1.6-8)

¹⁶ Mürin ekewe engol me eman chon kaiö ra feila Kalilea won ewe chuk, ewe ia Jesus a üreniir pwe repwe feila ie. ☆ ¹⁷ Iwe, lupwen ar küna Jesus, ra fel ngeni, nge ekoch me leir ra tipemwaramwar.¹⁸ Nge Jesus a kan ngeniir o üreniir, “Nemenem meinisin won läng me fanüfan a toriei.¹⁹ Oupwe feila o asoulängala chon ekewe mwü meinisin, oupwe papataisiir ngeni iten ewe Sam, ewe Nau me ewe Ngünmifel. ☆ ²⁰ Oupwe afalafaleer pwe repwe aleasochisi meinisin mine üa allük ngenikemi. Nge ngang üpwe etikemi fansoun meinisin tori lesopolan fanüfan.”

Ewe Pworausen Manau makkeen Markus

Kapas akom

I. Iten ei puk: Markus, wewen ei it “tipepwetete”.

II. Chon makkei ei puk: Markus, nöün Maria seni Jerusalem. (Föf 12.12)

III. Itelapemongen ei puk: Kraist ewe chon angang ngeni Kot me aramas.

IV. Kapas aüchean ei puk: Än Markus apöchöküla än ekewe soulängin lükün Israel lükülük.

V. Masouen ei puk: Ei puk a popuetä ren ewe kapas “Ewe Pworausen Manau usun Jesus Kraist ewe Nöün Kot.” A aiti ngenikich pwe Jesus eman souangang me eman sounemenem. An nemenem a pwä lon an afalafal, lon an manaman won ekewe anün ro chopwak, pwal an amusala än aramas tipis. Jesus a püsin apasa pwe i nöün Kot mi feito pwe epwe fangala manauan, nge epwe pwal angasa aramas seni tipis.

Markus a apworausä ewe pworausen Jesus lon kapas wenewen me kapas mi manaman. A alongolong won met Jesus a föri lap seni an kewe kapas me afalafal. Mürin ekewe kapas akom mi mochomoch usun Johannes Soupapaptais, pwal usun än Jesus papatais me an küna sosot, Markus a müttir apworausä usun än Jesus angangen apöchöküla aramas me an afalafal. Feilfeil chokewe mi tapwela mürin Jesus a lapala ar weweiti usun i me an afalafal, nge ekewe chon ü ngeni Jesus a lapala ar oputa i. Ekewe sopun me lesopolan ewe puk ra apworausä usun met a fis lon ewe wiken amüchülan manauen Jesus won fanüfan, nge fokun usun an iräpenges me an manausefäl.

Chomong chon silelap lon Paipel ra ekieki pwe ekewe ruu kinikin mi nom lesopolan ewe sopun 16 makkeen eman, nge sap makkeen Markus.

VI. Tettelin masouen ei puk:

Lepopotän ewe Pworausen Manau 1.1-13

Än Jesus angang lon Kaliea 1.14–9.50

Än Jesus sai seni Kalilea tori Jerusalem 10.1-52

Ewe amüchülan wiken än Jesus manau won fanüfan lupwen an nom lon Jerusalem me an nom lon ekewe leni mi arap 11.1–15.47

Än Jesus manausefäl 16.1-8

Än ewe Samol pwä ngeni aramas me an feitä läng 16.9-20

Än Johannes Soupapatais Afalafal

1.1-8

(Mat 3.1-12; Luk 3.1-18; Joh 1.19-28)

¹ Iei poputän ewe Pworausen Manau usun Jesus Kraist ewe Nöün Kot.

² Usun ewe soufos Aisea a fen makkeetiu,

“Kot a apasa, ‘Üpwe tinala nei chon künö epwe akom mwomw, pwe epwe wäsi alom.’”^{*}

³ Eman a kökkö fän leüömong lon fanüapö,

‘Oupwe amolätä ewe al fän iten ewe Samol,

^{*} 1:2: Mal 3.1

oupwe awenechara ewe al epwe fetal won.’ ” ✱

⁴Johannes a nom lon ewe fanüapö, a papatais o afalafal. A üreni ekewe aramas, “Oupwe aier seni ämi tipis o papatais. Iwe, Kot epwe amusala ämi tipis.” ⁵Chomong aramas seni Jutea me ewe telinimw Jerusalem ra feila ren Johannes. Ra pwärätä ar tipis, nge Johannes a papataisir lon ewe chanpupu Jortan.

⁶Iwe, Johannes a üföüf üf seni ülen kamel, ririn lukalapan a för seni silin man, nge anan mongö lifichimas me chönün chunen seni lein pötöwöl. ✱ ⁷Iwe, a üreni ekewe aramas, “Ewe eman epwe war me müri a lap seniei, ngang üsap fich ngeni ai üpwe mwo nge pworotiu mwan o apichi ririn ipwan sus. ⁸Ngang üa papataisikemi ren koluk, nge i epwe papataisikemi ren Ngünmifel.”

Jesus a papatais o küna sosot

1.9-13

(Mat 3.13-4.11; Luk 3.21-22; 4.1-13)

⁹Iwe, ekis chök fansoun mürin Jesus a feito seni Nasaret lon Kalilea pwe epwe papatais ren Johannes lon ewe chanpupu Jortan. ¹⁰Iwe, lon ewe chök otun a tütä o ütä lon ewe koluk, a küna pwe läng a sukula, iwe, Ngünmifel a feitiu won usun lalalapan eman lisom. ¹¹Iwe, eu möngüngü a feitiu seni läng o a apasa, “En nei mi fokun achengicheng, üa unusen pwapwa reöm.” ✱

¹²Iwe, lon ewe chök otun Ngünmifel a tinala Jesus lon fanüapö. ¹³A nonom ikenan lon ükükün faik rän o a küna sosot ren Satan. Iwe, a nom ren ekewe manmwacho, nge chon läng ra feito o tümwünü.

Jesus a köri föman chon attau

1.14-20

(Mat 4.12-22; Luk 4.14-15; 5.1-11)

¹⁴Iwe, mürin an Johannes tolong lon imwen fötek, Jesus a feila Kalilea o arongafeili ewe Pworausen Manau seni Kot. ¹⁵A apasa, “A tori ewe fansoun, Mwün Kot a arapoto. Oupwe aier seni ämi tipis o lükü ewe Pworausen Manau.” ✱

¹⁶Iwe, lupwen Jesus a fetal arun ewe nomun Kalilea a küna ruoman pwipwi, Simon me Andru, ir chon attau, ra aturätü nöür chew lon ewe noom. ¹⁷Iwe, Jesus a üreniir, “Oupwe tapweto müri, iwe, üpwe aiti ngenikemi ifa usun ämi oupwe attau aramas.” ¹⁸Lon ewe chök otun ra likitala nöür kewe chew o tapwela mürin Jesus.

¹⁹Iwe, lupwen Jesus a pwal feila ekis, a küna pwal ruoman pwipwi James me Johannes nöün Sepeti kewe. Ra nom won war we o wonofi nöür kewe chew. ²⁰Nge lon ewe chök otun Jesus a küneer, a köriir. Ra likitala semer we Sepeti won waar we me nöün kewe chon angang o ra tapwela mürin Jesus.

Eman mwän a wor eman ngününgau won.

1.21-28

(Luk 4.31-37)

²¹Iwe, Jesus me nöün kewe chon kaiö ra tori ewe telinimw Kaper-naum. Nge lupwen a tori ewe ränin sapat, a tolong lon ewe imwen felikis o popuetä le afalafal. ²²Iwe, ekewe aramas mi rongorong ra mairü ren an afalafal, pun a afalafal usun eman mi wor an pwüüng, nge esap

✱ 1:3: Ais 40.3 ✱ 1:6: 2.King 1.8 ✱ 1:11: Ken 22.2; Kölf 2.7; Ais 42.1; Mat 3.17; 12.18; Mark 9.7; Luk 3.22 ✱ 1:15: Mat 3.2

usun nöür kewe Sensen Allük. ✧ 23 Lon ewe chök otun eman mwän a wor eman ngününgau won a tolong lon ewe imwen felikis o popuetä pupuchör, 24 “Met ka mochen föri ngenikem, Jesus seni Nasaret? Ka feito pwe kopwe afeiangauakem? Ngang üa silei pwe en Ewe mi Pin, Kot a tinato.” 25 Iwe, Jesus a allük ngeni ewe ngününgau, “Kopwe fanafanala o towu seni ei mwän.” 26 Iwe, ewe ngününgau a aturufeili ewe mwän o a towu seni.

27 Iwe, ekewe aramas meinisin ra mairü o ra popuetä kapasfengen lefiler, “Mwa met ei? Ifa usun, och minefön afalafal ei? Ei mwän a wor an pwüüng pwe lupwen a allük ngeni ekewe ngününgau ra aleasochis ngeni.” 28 Iwe, ewe pworaus usun Jesus a müttir chöfetal ekis meinisin lon unusen ewe fanü Kalilea.

Jesus a apöchöküla chomong aramas

1.29-34

(Mat 8.14-17; Luk 4.38-41)

29 Mürin, Jesus me James me Johannes pwal ekoch nöün kewe chon kaiö ra feila seni ewe imwen felikis o feila lon imwen Simon me Andru. 30 Iwe, inen pwülüen Simon we a eäni samaun pwichikar o a kon won an peet. Lon ewe chök otun ra asile ngeni Jesus usun neminewe. 31 Iwe, Jesus a tolong ren, a amwöchü pöün o apwätai. Iwe, ewe pwichikar a müttir wes, mürin neminei a angang ngeniir.

32 Lupwen akkar a tuputiü, aramas ra uwato ren Jesus ekewe chon samau meinisin, pwal chokewe mi wor anün rochopwak wor. 33 Iwe, aramas meinisin seni ewe telinimw ra chufengen mwen asamen ewe imw. 34 Iwe, Jesus a apöchöküla chomong chon samau seni sokopaten ar samau, a pwal asüela chomong anün rochopwak, nge esap mwüt ngeni ekewe anün rochopwak pwe repwe apasa och, pun ra silei iö i.

Jesus a afalafal lon Kalilea

1.35-39

(Luk 4.42-44)

35 Wünümweeränin sorotän ewe rän, lupwen akkar esamwo tötä, Jesus a pwätä o towu seni ewe imw. A feila lükün ewe telinimw lon eu leni ia esap wor aramas ie o a iotek. 36 Nge Simon me chiechian kewe ra towu seni ewe telinimw pwe repwe kütta. 37 Lupwen ar küna, ra üreni, “Aramas meinisin ra resin küttok.”

38 Nge Jesus a üreniir, “Ousipwe feila ngeni pwal ekoch sopw mi arap, pwe üpwe afalafaleer, pun iei popun ai feito.” 39 Iwe, a saifeil lon unusen Kalilea, a afalafal lon ar kewe imwen felikis o asüela ekewe anün rochopwak. ✧

Jesus a apöchöküla eman mi rupun pwötür

1.40-45

(Mat 8.1-4; Luk 5.12-16)

40 Iwe, a wor eman mwän mi rupun pwötür a feito ren Jesus, a fotopwäsuk o tüngormau ngeni pwe epwe alisi. A apasa, “Are ka mochen, ka tongeni alimöchüei.” 41 Iwe, Jesus a fokun tongei, a aitiela pöün o atapa. A üreni, “Üa mochen, kopwe limöch.” 42 Lon ewe chök otun ewe rupun pwötür a müttir wes seni ewe mwän, iwe, a limöchüla.

43 Mürin, Jesus a fokun fönöü ewe mwän o a müttir tinala 44 wesin an üreni, “Ngeni, kosap üreni eman och usun mine a fis ngonuk. Nge

kopwe feila ren ewe souasor o pwäri inisum ngeni. Mürin kopwe eäni ewe asor Moses a allük fan iten om ka limöch, pwe epwe alletä ngeni aramas pwe ka limöch.” ✱ ⁴⁵ Nge ewe mwän a feila o apworaSAFEILI ei pworaus ekis meinisin. Iei mine Jesus esap chüen tongeni feila lon ekewe telinimw le pwäpwäla. Nge a feila lon ekewe leni ia esap wor aramas ie. Iwe, ekewe aramas seni ekis meinisin ra feito ren.

2

Jesus a apöchöküla eman mwän mi mwök

2.1-12

(Mat 9.1-8; Luk 5.17-26)

¹ Ekoch rän mürin Jesus a liwinsefäliiti Kapernaum. Iwe, ewe pworaus a chöfetal pwe a nom le imw. ² Iwe, chomong aramas ra mwichfengen ren, pwe esap chüen wäwä leni, pwal mwo nge ewe leni mwen asamen ewe imw. Iwe, lupwen Jesus a afalafal ngeniir ewe Kapasen Kot ³ föman mwän ra war o mwäreeto eman mwän mi mwök ren. ⁴ Nge pokiten chomongun aramas resap tongeni mwäreeto ewe mwän ren Jesus. Iei mine ra tötä won osun ewe imw o säresi awenewenen ewe ia Jesus a nom ie. Iwe, wesin ar säresi ra aürätü ewe lenien kekki ewe mwän mi mwök a kon won. ⁵ Iwe, lupwen Jesus a küna ar lükülük, a üreni ewe mwän mi mwök, “Nei, om tipis kana ra musala.”

⁶ Nge mi wor ekoch Sensen Allük ra mot ikenan o ra ekieki lon leluker, ⁷ “Pwota ätei a iei usun an kapas? A eäni kapasen turunufas. Iö a tongeni amusala tipis, sap Kot echök?”

⁸ Lon ewe chök otun Jesus a silei mine ra ekieki lon leluker, iei mine a üreniir, “Pwota oua ekieki iei usun lon lelukemi? ⁹ Meta a mecheres, ai apasa ngeni ei mwän mi mwök, ‘Om tipis kana ra musala,’ are ai apasa, ‘Kopwe ütä, angei kiom o fetal?’ ¹⁰ Ngang üpwe alükülükü ngenikemi, pwe Nöün Aramas a wor an pwüüng won fanüfan an epwe amusala tipis.” Iei mine a üreni ewe mwän mi mwök, ¹¹ “Üa ürenuk, kopwe angei kiom o feila lon imwom.” ¹² Lupwen ir meinisin ra nengeni, ewe mwän a ütä, a angei kian o feila. Iwe, ir meinisin ra wesewesen mairü, ra mwareiti Kot o apasa, “Sisap küna mwo och mi wewe ngeni ei.”

Jesus a köri Lefi

2.13-17

(Mat 9.9-13; Luk 5.27-32)

¹³ Iwe, Jesus a liwinsefäliiti arun ewe nomun Kalilea. Mürin ekewe aramas meinisin ra mwicheto ren, iwe, a popuetä le afalafaleer. ¹⁴ Lupwen a feila ekis, a küna Lefi nöün Alfäus, eman chon ioni takises, a mot lon an ofes. Jesus a üreni, “Kopwe tapweto mürin.” Iwe, Lefi a ütä o tapwela mürin.

¹⁵ Mürin Jesus a eti eu mongö lon imwen Lefi. Chomong chon ioni takises me chon tipis ra eti Jesus me nöün kewe chon kaiö le mongö, pun a wor chomong mi tapwela mürin Jesus. ¹⁶ Iwe, ekoch Sensen Allük, ir Farisi, ra küna pwe Jesus me ekewe chon tipis me chon ioni takises ra mongöfengen. Iei mine ra aisini nöün kewe chon kaiö, “Pwota ätei a mongöfengen me ekei sokun aramas?” ¹⁷ Lupwen Jesus a rongorong ngeni ekei kapas a üreniir, “Esap lomot eman sousafei ngeni aramas mi

pöchökül, nge a lomot ngeni chök chon samau. Ngang üsap feito pwe üpwe köri ekewe chon pwüing, pwe ekewe chon tipis.”

Kapas ais usun echikefel

2.18-22

(*Mat 9.14-17; Luk 5.33-39*)

¹⁸ Lon eu fansoun nöün Johannes Soupapatais kewe chon kaiö me ekewe Farisi ra echikefel. Iwe, ekoch aramas ra feito ren Jesus o aisini, “Pwota nöün Johannes kewe chon kaiö me nöün ekewe Farisi chon kaiö ra echikefel, nge noumw kewe chon kaiö resap echikefel?” ¹⁹ Jesus a pölüeniir, “Oua ekieki pwe ekewe chon kökkö ngeni eu kametipen apwüpwülü ra echikefel lupwen ewe mwän apwüpwülü söfö a nom rer? Resap fokun echikefel lon fansoun an nonom rer. ²⁰ Nge epwe war ewe rän lupwen aramas repwe angei seniir ewe mwän apwüpwülü söfö fän pöchökül, seni ena rän repwapw echikefel.

²¹ Esap wor eman epwe teiätä ekam mangaku mi fö won echö üf mi mes, pun are epwe föri iei usun, ewe ekam mangaku mi fö epwe kamwei ewe üf mi mes, pwe ewe kam epwe wattela. ²² Esap pwal wor eman epwe alölöülong wain mi fö lon pör seni silin man mi mes, pun ewe wain mi fö epwe chök amökkü ewe pör, iwe, ewe wain epwe nitiu le pwül, nge ewe pör epwe mök. Pun wain mi fö sipwe chök alölöülong lon pör mi fö.”

Kapas ais usun ewe ränin sapat

2.23-28

(*Mat 12.1-8; Luk 6.1-5*)

²³ Iwe, a fis pwe Jesus me nöün kewe chon kaiö ra fetal lon tanipin wiich lon ewe ränin sapat. Iwe, nöün chon kaiö ra popuetä fichi umwun uän wiich. ✧ ²⁴ Iwe, ekewe Farisi ra üreni Jesus, “Pwota noumw kewe chon kaiö ra föri mine esap pwüing lon allükün ach lamalam lon ewe ränin sapat?” ²⁵ Jesus a pölüeniir, “Ousap mwo aleani mine Tafit me chienan kewe ra föri lupwen ra echik? ²⁶ Lon fansoun ewe Souasor mi Lap Apiatar, Tafit a tolong lon imwen Kot o mongö ewe pilawa mi pin, esap wor eman a tongeni mongö, chilon chök ekewe souasor. Iwe, a pwal ngeni chienan kewe pwe repwe mongö.” ✧ ²⁷ A pwal üreniir, “Ewe ränin sapat a fis fänäsengesi aramas, nge sap aramas fänäsengesi ewe ränin sapat. ²⁸ Iei mine Nöün Aramas fen i Sounemenemen ewe ränin sapat.”

3

Jesus a apöchöküla eman mwän mi mä pöün lon ränin sapat

3.1-6

(*Mat 12.9-14; Luk 6.6-11*)

¹ Mürin Jesus a liwinsefäliiti ewe imwen felikis. Ikenan a wor eman mwän mi mä efoch pöün. ² Iwe, ekoch aramas ra pwal nom ikenan, pun ra kütta och popun mine repwe aturu Jesus won. Iei mine ra mamasa Jesus are epwe apöchöküla ewe mwän lon ewe ränin sapat. ³ Iwe, Jesus a üreni ewe mwän mi mä efoch pöün, “Kopwe feito ikei mwen ekewe aramas.” ⁴ Mürin a aisini ekewe aramas, “Met allükün ach we lamalam a mwüt ngenikich sipwe tongeni föri lon ewe ränin sapat? Sipwe föri mine a öch ngeni aramas, are sipwe föri mine a ngau? Sipwe amanaueer, are sipwe amälaar?” Nge ir ra chök fanafanala. ⁵ Jesus a nenengeniir fän an song, nge a pwal letipeta, pun ra üleförea

lon letiper. Mürin a üreni ewe mwän, “Kopwe aitiewu poumw.” Iwe, a aitiewu pöün, iwe, a pöchökülsefäl. ⁶ Mürin ekewe Farisi ra towu o müttir popuetä le pwüngüpüwüngfengen me ekoch chiechien Herotes usun ar repwe rawangauei Jesus.

Ewe mwichen aramas mi chomong arun ewe noom

3.7-12

⁷ Iwe, Jesus me nöün kewe chon kaiö ra feila ngeni ewe nomun Kalilea, nge eu mwichen aramas mi chomong ra tapwela mürin. Ra feito seni Kalilea me Jutea, ⁸ pwal seni Jerusalem me Itumea, seni ewe fanü ötiuen ewe chanpupu Jortan me ekewe fanü arun ekewe telinimw Tirus me Siton. Ekei aramas meinisin ra feito ren Jesus, pun ra rongorong meinisin mine Jesus a föri. ⁹ Pokiten ewe mwichen aramas mi chomong, Jesus a üreni nöün kewe chon kaiö pwe repwe amolätä efoch wa fän itan, pwe ekewe aramas resap achachach ngeni. ¹⁰ Pun Jesus a fen apöchöküla chomong aramas, iei mine chokewe mi samau ra chök etietifengen pwe repwe tongeni atapa Jesus. ✧ ¹¹ Iteiten fansoun lupwen ekewe aramas mi wor ngününgau wor ra küna Jesus, ra chapetiü mwan o kökkö fän leüömong, “En Nöün Kot!” ¹² Nge Jesus a allük ngeniir, pwe resap pwäri ngeni eman usun i.

Jesus a filätä ekewe engol me ruoman chon künö

3.13-19

(Mat 10.1-4; Luk 6.12-16)

¹³ Iwe, Jesus a feita won eu chuk o a kökkörato ätekewe i a mochen pwe repwe feito ren. Iwe, ra feito ren. ¹⁴ Iwe, a filätä engol me ruoman pwe repwe eti, ir ätekewe a pwal aita ngeniir chon künö, pun i epwe tiniirela pwe repwe afalafal, ¹⁵ epwe pwal wor ar manaman, pwe repwe asüela ekewe anün ro chopwak. ¹⁶ Ikkei iten ekewe engol me ruoman a filiiretä: Simon, ätewe Jesus a aita ngeni Petrus, ¹⁷ James me Johannes pwiin we, ir nöün Sepeti, Jesus a aita ngeniir “Poanerkes” a wewe ngeni “Nöün Chopulap”, ¹⁸ Andru, Filip, Partolomeus, Mateus, Tomas, James nöün Alfäus, Tatäus, Simon seni Kana, ¹⁹ pwal Jutas Iskariot, ätewe mi afangamä Jesus.

Jesus me Pelsepul

3.20-30

(Mat 12.22-32; Luk 11.14-23; 12.10)

²⁰ Mürin Jesus a liwiniti imwan. Iwe, eu mwichen aramas mi chomong a pwal mwicheto ren, iei mine esap wor än Jesus me nöün kewe chon kaiö fansoun ar repwe mongö. ²¹ Iwe, lupwen aramasan kewe ra rong usun, ra feila pwe repwe turufi, pun ra apasa, “A umwes.” ²² Iwe, ekoch Sensen Allük mi feito seni Jerusalem ra apasa, “Ewe anü Pelsepul a wäni. I ewe samolun anün ro chopwak a ngeni enan mwän an manaman, pwe epwe asüela ekewe anün ro chopwak.” ✧ ²³ Iei mine Jesus a körato ekewe aramas o a kapas ngeniir lon pworausen awewe, “Ifa usun, Satan epwe tongeni asüela Satan? ²⁴ Are eu mwü a kinikinfesen o fiufengen, ei mwü epwe chök tala. ²⁵ Are eu famili a kinikinfesen o fiufengen, ei famili esap nonomola. ²⁶ Iei usun are mwün Satan a kinikinfesen, esap tongeni nonomola, nge epwe tala o wesila. ²⁷ Esap wor eman a tongeni töpöchökülelong lon imwen eman mwän mi pöchökül o angei

pisekin, are esap akom föti ewe mwän mi pöchökül. Mürin epwapw tongeni angei pisekin lon imwan. ²⁸ Enlet, üpwe ürenikemi, pwe än aramas tipis meinisin repwe musala, pwal ar kewe kapasen turunufas ra apasa, ²⁹ nge are eman a eäni kapasen turunufas usun Ngünmifel, esap fokun tongeni musala, pun a föri och tipis esap wor komusalan lon fansoun esemüch.” ✧ ³⁰ Jesus a apasa ei ititin kapas, pun ekoch aramas ra apasa, “Eman ngününgau a nom won.”

Inen Jesus me pwiin kana

3.31-35

(Mat 12.46-50; Luk 8.19-21)

³¹ Mürin inen Jesus me pwiin kewe ra war. Ra ütä lükün ewe imw o ra tinala pworaus ren, pwe epwe feito rer. ³² Iwe, chomong aramas ra mot ünükün Jesus o ra üreni, “Nengeni, inom we me pwiüm kewe me fefinom kewe ra nom lükün, ra mochen churuk.” ³³ Jesus a pölüeniir, “Iö inei me iö kana pwii?” ³⁴ Iwe, Jesus a nenengeni ekewe aramas mi mot ünükün o apasa, “Nengeni, ikkei ir inei me pwii kana. ³⁵ Pun iö kana ra föri letipen Kot, ir pwii me fefinei me inei.”

4

Ewe pworausen awewe usun eman chon amworafeili pwükil

4.1-9

(Mat 13.1-9; Luk 8.4-8)

¹ Iwe, Jesus a popuetaşefäli an afalafal arun ewe nomun Kalilea. Iwe, eu mwichen aramas mi chomong ra mwicheto ren, pwe i a tötä won efoch wa o mot won. Ewe wa a ekis kinewu lon ewe noom, nge ekewe aramas meinisin ra nom le pi. ✧ ² Iwe, a aiti ngeniir chomong mettoch lon pworausen awewe o üreniir, ³ “Oupwe rongorong! Eman aramas a feila pwe epwe amworafeili pwükil. ⁴ Iwe, lupwen a amworafeili ekewe pwükil, ekoch föün ra mworotiu lepekin al, nge ekewe machang ra feito o äniir. ⁵ Ekoch föün ra mworotiu won lenien föüföü ia esap watte pwül ie. Ra pwükükai, pun resap nom lon pwül mi malül. ⁶ Nge lupwen akkar a tötä, pwichikaran a apwichi ekewe kükün irä. Pokiten esap wor warer, ra müttir pwasala. ⁷ Pwal ekoch föün ra mworotiu lein iräföläfölä. Iwe, ekewe iräföläfölä ra mämäritä o amopu ekewe irä, pwe resap tongeni ua. ⁸ Iwe, nge pwal ekoch föün ra mworotiu lon pwül mi mürina. Ekewe irä ra pwukuta, ra märitä o ua. Ekoch leir ra uani ilik, ekoch wone, nge ekoch ipükü.” ⁹ Iwe, Jesus a apasa, “Iö a wor selingan epwe rongorong!”

Popun än Jesus afalafal lon pworausen awewe

4.10-12

(Mat 13.10-17; Luk 8.9-10)

¹⁰ Iwe, lupwen Jesus a emanüla, ekewe mi eti me ekewe engol me ruoman ra feito ren o tüngor ngeni, pwe epwe awewe ngeniir wewen ekewe pworausen awewe. ¹¹ Iwe, Jesus a üreniir, “Kot a fen ngenikemi ewe tufich ämi oupwe silei usun monomonen ewe Mwün Kot. Nge chokewe mi nom lükün repwe rong meinisin lon pworausen awewe.

¹² Tei usun repwe nenengeni me nenengeni,

nge resap küna och,
repwe rongorong me rongorong,
nge resap wewe ren.

Pun are repwe wewe ren, repwe kul ngeni Kot,
nge i epwe amuserela.’” ✧

*Jesus a awewei ewe pworausen awewe usun eman chon amworafeili
pwükil*

4.13-20

(Mat 13.18-23; Luk 8.11-15)

¹³ Mürin Jesus a aisiniir, “Ifa usun, ousap weweiti ei pworausen awewe? Ifa usun, ämi oupwe tongeni weweiti och pworausen awewe me mürin? ¹⁴ Ewe chon fofot a amworafeili kapasen Kot. ¹⁵ Ekoch aramas ra wewe ngeni ekewe pwükil ra mworotiu lepekin al. Lupwen ra rongorong kapasen Kot, Satan a müttir feito o angei seni lon leluker ewe kapas. ¹⁶ Ekoch aramas ra wewe ngeni ekewe pwükil ra mworotiu won lenien fööföü. Pun lupwen ra rongorong ewe kapasen Kot, ra müttir etiwa fan pwapwa. ¹⁷ Pokiten ewe kapas esap tongeni warar lor, esap tongeni nomotam. Pun lupwen a fis usukosuk me riaföü pokiten ewe kapasen Kot, ra müttir fangatä. ¹⁸ Pwal ekoch aramas ra wewe ngeni ekewe pwükil ra mworotiu lein ekewe iräföölüföf. Ir chokewe ra rongorong ewe kapasen Kot, ¹⁹ nge öürek usun manauen ikenai me atuputupun wöün fanüfan me mochenian ekewe sokopaten mettoch ra tolong lon leluker o amopu ewe kapasen Kot pwe esap tongeni ua. ²⁰ Nge ekoch aramas ra wewe ngeni ekewe pwükil ra mworotiu won pwül mi mürina. Iwe, ra rong ewe kapasen Kot, ra etiwa o ua. Ekoch ra uani ilik, ekoch wone, pwal ekoch ipükü.”

Eu lamp fän eu sepi

4.21-25

(Luk 8.16-18)

²¹ Iwe, Jesus a sopwela an afalafal, “Ifa usun, eman epwe uwato eu lamp mi tin o anomu fän eu sepi are fän eu peet? Ifa usun, esap anomu ewe lamp won lenian? ✧ ²² Mettoch meinisin mi opola epwe chök pwäpwäla, pwal mettoch meinisin mi pwölüla epwe chök pwäla lon saram. ✧ ²³ Iö a wor selingan epwe rongorong.”

²⁴ Jesus a pwal üreniir, “Oupwe aü selingemi ngeni mine oua rongorong! Ewe chök aükük oua aea le aükük, iei ewe aükük Kot epwe aea ngenikemi, nge epwe fen lap seni. ✧ ²⁵ Pun iö a wor an, Kot epwe achomongala, nge iö esap wor an, Kot epwe pwal mwo nge angei seni ewe ekis a wor ren.” ✧

Pworausen awewe usun ewe föün pwükil mi märitä

4.26-29

²⁶ Iwe, Jesus a sopwela le pworaus ngeniir, “Mwün Kot a wewe ngeni eman aramas a amworafeili pwükil won an tanipi. ²⁷ A möür lepwin o pwäta lerän. Ewe pwükil a kinopotä o mämäritä, nge püsin i esap weweiti ifa usun an mämäritä. ²⁸ Ewe pwül a püsin föri met ekewe irä repwe mämäritä o ua ren. Akomwan a kinopotä o mämäritä, mürin a fis etin, nge lesopolan a wor uan. ²⁹ Nge lupwen ekewe föün wiich ra mau, ewe aramas a kini, pun a tori fansoun kinikinin räs.” ✧

✧ 4:12: Ais 6.9-10 ✧ 4:21: Mat 5.15; Luk 11.33 ✧ 4:22: Mat 10.26; Luk 12.2 ✧ 4:24: Mat 7.2; Luk 6.38 ✧ 4:25: Mat 13.12; 25.29; Luk 19.26 ✧ 4:29: Sow 3.13

Pworausen awewe usun ewe föün pwükil mi fokun kükün

4.30-34

(Mat 13.31-32,34; Luk 13.18-19)

³⁰ Jesus a pwal apasa, “Met sipwe tongeni awewe ngeni ewe Mwün Kot? Are meni sokun pworausen awewe sipwe aea pwe sipwe tongeni awewe ngeni? ³¹ A wewe ngeni eföü pwükilin irä, ewe mi fokun kükün seni pwükilin irä meinisin. Eman aramas a angei ei sokun föün pwükil o fotukätü le pwül. ³² Mürin ekis chök fansoun a märitä o williti efoch irä mi watte seni irä meinisin lon an tanipi. A wor palan mi watte, pwe ekewe machang ra ässito wor o föri faser won ia a nür ie.”

³³ Iwe, Jesus a afalafala ewe kapasen Kot ngeni ekewe aramas o eäni chomong sokun pworausen awewe usun ekei. A pworaus ngeniir lon ükükün met ra tongeni weweiti. ³⁴ Esap tongeni pworaus ngeniir won och are esap eäni pworausen awewe. Nge lupwen a emanüla ren nöün kewe chon kaiö, a awewe ngeniir wewen ekewe pworaus.

Jesus a aükätü eu mölümöl

4.35-41

(Mat 8.23-27; Luk 8.22-25)

³⁵ Iwe, lekuniolun ewe chök rän Jesus a üreni nöün kewe chon kaiö, “Ousipwe feila epek ewe noom.” ³⁶ Iwe, ra feila seni ewe mwichen aramas mi chomong o tötä won efoch wa, Jesus a fen nom won. Iwe, ra uweela Jesus won ewe wa, a pwal wor ekoch wa ra fitiirela. ³⁷ Iwe, a müttir fis pwe eu asepwäl mi pöchökül a enito o ekewe no ra nulong lon waar we, pwe a arap ngeni an epwe kokola. ³⁸ Jesus a nom mürin ewe wa, a möür o ülüta won eu pilu. Iwe, ekewe chon kaiö ra föngünätä o aisini, “Sense, kosap lolilenäsini ach sipwe le feiengau?”

³⁹ Iwe, Jesus a ütä o kapas ngeni ewe asepwäl, “Kopwe manasösötü!” A pwal üreni ekewe no, “Oupwe lüala.” Iwe, ewe asepwäl a söötü, a pwal fokun lüala won matau. ⁴⁰ Mürin Jesus a üreni nöün kewe chon kaiö, “Pwota oua niuokus? Ifa usun, ousap lüküei?” ⁴¹ Iwe, ra fokun niuokus o kapasfengen lefiler, “Tö chök ätei pwe asepwäl me no ra mwo nge aleasochisi?”

5

Jesus a apöchöküla eman mwän mi wor chomong ngününgau won

5.1-20

(Mat 8.28-34; Luk 8.26-39)

¹ Iwe, Jesus me nöün kewe chon kaiö ra tori epek ewe nomun Kalilea lon ewe fanü Kerasa. ² Lon ewe otun Jesus a tötü me won ewe wa, eman mwän mi wor eman ngününgau won a feito seni ekewe lenien peias, pwe epwe churi. ³ Ei mwän a nonom lein ekewe peias, nge esap chüen wor eman a tongeni föti, sap pwal mwo nge ngeni sein. ⁴ Fan chomong pöün me pechen ra föfö ngeni selimächä, nge iteitän a chök mwütifeseni ekewe sein o kupi ewe selimächä won pechen. Ei mwän a fokun pöchökül, pwe esap wor eman a tongeni amwöchü. ⁵ Lerän me lepwin a fetalfeil lein ekewe peias pwal won ekewe chukutekison, a pupuchör o akinasa inisin ngeni fau.

⁶ Iwe, lupwen a küna Jesus me toau, a sä ngeni o fotopwasuketiu me mwan. ⁷ Iwe, a puchörütä o apasa, “Jesus, Nöün Kot ewe mi Unusen Tekia, met ka mochen föri ngeniei? Üa tüngor ngonuk mwen mesen Kot

pwe kosap ariaföüüei.”⁸ A nöünöü ei ititin fos, pun Jesus a fen kapas ngeni, “Kopwe towu seni ei mwän, en ngün mi ngau!”⁹ Iwe, Jesus a aisini, “Ifa itom?” Ewe mwän a pölüeni, “Itei mwichemong, pun äm aia chomong.”¹⁰ Iwe, a fokun tüngormau ngeni Jesus pwe esap asüela ekewe ngünungau seni ewe fanü.

¹¹ Iwe, a wor eu pwiin pik ra mongöfeil won ekewe chukutekison mi arap ngeni ewe leni. ¹² Iei mine ekewe ngünungau ra tüngor ngeni Jesus, “Kopwe tinikeemila ren ekewe pik o kopwe mwüt ngenikem pwe aipwe tolong lor.” ¹³ Iwe, Jesus a mwüt ngeniir. Ekewe ngünungau ra towu seni ewe mwän o tolong lon ekewe pik. Ekewe pik meinisin arapakan ruungeröü ra sätiu me won palen ewe chuk o turulong lon ewe noom. Iwe, ra mop meinisin. ¹⁴ Mürin ätekewe mi foleni ekewe pik ra süla o apworausafeili ewe pworaus lon ekewe telinimw me ekewe sopw. Iwe, ekewe aramas ra feila ngeni ewe leni, pwe repwe nengeni mine a fis. ¹⁵ Lupwen ra feito ren Jesus, ra küna ewe mwän a wor eu mwichemongun ngünungau won me mwan. A mot ikenan a üföüf o miritila. Iwe, ra niuokus. ¹⁶ Iwe, chokewe mi küna ei manaman ra apworausau ngeni ekewe aramas mine a fis ngeni ewe mwän mi wor ngünungau won, pwal mine a fis ngeni ekewe pik. ¹⁷ Iei mine chon ewe fanü ra tüngor ngeni Jesus epwe towu seni fanüer.

¹⁸ Iwe, lupwen Jesus a tötä won ewe wa, ewe mwän mi wor ngünungau won me lom, a fokun tüngor ngeni Jesus pwe epwe eti. ¹⁹ Nge Jesus esap mwüt ngeni, pwe a üreni, “Kopwe feila lon leniom ren om famili o apworausau ngeniir meinisin mine ewe Samol a föri ngonuk, pwal usun an eäni ümöümöch ngonuk.” ²⁰ Iei mine ewe mwän a feila seni, a tori ewe fanü itan Engol Telinimw o apworausafeili mine Jesus a föri fän itan. Iwe, ekewe aramas meinisin mi rongorong ei pworaus ra mairü ren.

Jesus a apöchöküla eman fefin o amanauasefäli eman nengin

5.21-43

(Mat 9.18-26; Luk 8.40-56)

²¹ Iwe, Jesus a liwinsefäli epek ewe noom. Ikenan eu mwichen aramas mi chomong ra mwicheto ren. ²² Mürin Jairus eman meilapen imwen felikis a feito. Iwe, lupwen a küna Jesus, a chapetiu arun pechen ²³ o a fokun tüngormau ngeni, “Nei nengin a arap ngeni mäla. Kose mochen kopwe feito o iseis poumw won, pwe epwe pöchökülela o chikarsefäl.” ²⁴ Mürin Jesus a etala Jairus. Nge chomong aramas ra tapwela mürin o etiepach ngeni.

²⁵ Iwe, a wor eman fefin a eäni samaun fefin mi fokun watte lon ükükün engol me ruu ier. ²⁶ A fokun riaföü ren chomong sousafei ra säfeeni. A pwal fangala meinisin mine a wor ren fän iten an epwe küna pöchökül, nge an samau a chök wattela. ²⁷ Lupwen ei fefin a rong usun pworausen Jesus, a feito me lükisökürün lein ewe mwichen aramas o atapa üfan, ²⁸ pun a ekieki lon lelukan, “Are üpwe chök atapa üfan, üpwe pöchökülfefäl.” ²⁹ Lon ewe chök otun a atapa üfen Jesus we, an we samau a köüla. Iwe, a mefi lon inisin pwe a chikar seni an we samau. ³⁰ Lon ewe chök otun Jesus a mefi pwe och manaman a towu seni, iei mine a sap ngeni ewe mwichen aramas o a aisiniir, “Iö we a atapa üfei?” ³¹ Nöün kewe chon kaiö ra pölüeni, “Ka fen küna ekewe aramas mi etiepach ngonuk, nge pwota ka ais, Iö we a atapaei?”

³² Iwe, Jesus a nenefeil pwe epwe küna iö we a föri ei. ³³ Nge ewe fefin a silei mine a fis ngeni. A feito o fotopwäsuk arun pechen Jesus fän chehech me niuokus. Iwe, a pwäri ngeni Jesus meinisni mine a fis ngeni. ³⁴ Iwe, Jesus a üreni, “Nei fefin, om lükülük a apöchökülokotä. Kopwe feila fän kinamwe pwe ka chikar seni om samau.”

³⁵ Nge lupwen Jesus a chüen kakapas, ekoch nöün Jairus chon künö ra war o üreni, “Noumw nengin a mäla. Pwota ka chüen aweiresi ewe sense?” ³⁶ Iwe, Jesus esap afäli mine ra apasa, nge a üreni Jairus, “Kosap niuokus, kopwe chök lükü.” ³⁷ Mürin Jesus esap chüen mwüt ngeni eman epwe fiti, pwe Petrus chök me James me pwiin we Johannes. ³⁸ Iwe, lupwen ra tori imwen Jairus, Jesus a küna ar akürang o rongorong ar kechü fan leüömong me ar ngüngüres. ³⁹ Iwe, a tolong lon ewe imw o a üreniir, “Pwota oua akürang o kechü? Ewe nengin esap mäla, pwe a chök möür.”

⁴⁰ Iwe, ra takiri,iei mine a atorowu me lon ewe imw. Nge a angei semen ewe nengin me inan pwal nöün ülüman chon kaiö o emweniirelong lon ewe ruum ia ewe nengin a kon ie. ⁴¹ Iwe, Jesus a amwöchü pöün ewe nengin o üreni, “Talita koum!” wewen “Kükün nengin, üa ürenuk, kopwe pwätä!” ⁴² Lon ewe chök otun ewe nengin a pwätä o fetal. Lon ei fansoun ei nengin a ierini engol me ruu. Lupwen a fis ei manaman ekewe aramas ra fokun mairü. ⁴³ Nge Jesus a allük ngeniir, pwe resap üreni eman mine a fis, a pwal üreniir pwe repwe amongöü.

6

Chon Nasaret resap etiwa Jesus

6.1-6

(*Mat 13.53-58; Luk 4.16-30*)

¹ Iwe, Jesus a feila seni ewe leni o liwinsefäliiti poputän telinimwan, nge nöün kewe chon kaiö ra etala. ² Iwe, lon ewe ränin sapat Jesus a popuetä le afalafal lon ewe imwen felikis. Chomong mi rongorong an afalafal ra mairü ren. Ra aisini, “Ia ei aramas a angei me ie ekei ekiek? Met sokun tipachem a tori? Ifa usun, ren met a tongeni föri ekei manaman? ³ Ifa usun, sap ätei ewe chon kaü imw nöün Maria, pwiin James, Josef, Jutas me Simeon? Ifa usun fefinan kewe resap nom rech?” Iei mine resap etiwa. ⁴ Iwe, Jesus a üreniir, “Eman soufos a wor meninin ekis meinisni, nge esap wor meninin lon poputän telinimwan, me ren aramasan me an famili.” ⁵ Iwe, Jesus esap tongeni föri manaman ikenan, pwe a chök iseis pöün won ekoch aramas mi samau o apöchöküleereta. ⁶ A fokun neneiruk pokiten ekewe aramas resap lükü.

Jesus a tinala nöün kewe engol me ruoman chon kaiö.

6.6-13

(*Mat 10.5-15; Luk 9.1-6*)

Mürin Jesus a feila ngeni ekewe sopw ünükün o a afalafala ekewe aramas. ⁷ A körifengeni nöün kewe engol me ruoman chon kaiö o tiniirela akaruoman. Iwe, a ngeniir manaman won ekewe ngününgau, ⁸ a pwal allük ngeniir, “Ousap uwei och lon ämi sai. Ousap uwou amötümi, ämi pwotou, ousap pwal uwou moni lon pokitemi, pwe oupwe chök uwei efotch wok. ⁹ Oupwe ipweipw sus, nge ousap uwou aruachön üfemi.” ¹⁰ A pwal üreniir, “Lon meni leni ra etiwakemi, oupwe nonom lon ewe imw tori ämi oupwe towu seni ewe telinimw. ¹¹ Nge are oupwe tori eu

telinimw, nge resap etiwakemi ika aüselingakemi, oupwe towu seni ei telinimw o wichikala pwülün fän pechemi, pwe epwe eu minen pwärätä ngeniir, pwe ra mwäl.” ✧

¹² Iwe, ra feila o afalafala ekewe aramas pwe repwe aier seni ar tipis. ¹³ Ra asüela chomong anün rochopwak, ra pwal epiti chomong chon samau ren lö seni föün olif o apöchöküleer. ✧

Johannes Soupapatais a mäla

6.14-29

(Mat 14.1-12; Luk 9.7-9)

¹⁴ Iwe, ewe king Herotes a rong usun pworausen Jesus, pwe itan a föüla ekis meinisin. Ekoch aramas ra apasa, “Johannes Soupapatais a manausefäl seni mäla. Iei popun a wor an tufich le föri ekewe manaman.” ¹⁵ Nge ekoch ra apasa, “Ätei Elias,” nge pwal ekoch ra apasa, “Ätei eman soufos usun eman ekewe soufosun lom.” ✧

¹⁶ Lupwen Herotes a rong ekei kapas a apasa, “Johannes, ätewe üa pöküela üan a manausefäl.” ¹⁷ Pun Herotes a allük, pwe repwe turufi Johannes, repwe föti o atolonga lon imwen fötek. Herotes a föri ei föför pokiten Herotias pwülüen pwiin we Filip, i a pwülüeni seni. ¹⁸ Pun Johannes Soupapatais a apasa, “Esap pwüing ngonuk om kopwe pwülüeni pwülüen pwiüm we.” ¹⁹ Iei mine Herotias a fokun song ngeni Johannes o a ekieki an epwe niela. Nge esap tongeni pokiten Herotes. ²⁰ Iwe, Herotes a meniniti Johannes, pun a silei pwe i eman mwän mi pwüing o pin, iei mine a tümwünü, pwe esap tori feiengau. Herotes a sani an epwe rongorong ngeni än Johannes afalafal, inamwo ika a tolong lon watten osukosuk, lupwen a rongorong ngeni.

²¹ Nge feilfeil a tori eu fansoun mi fich pwe än Herotias ekiek epwele pwönüetä. Ei a fis lon ränin uputiuen Herotes, lupwen a föri eu kametip fän iten nöün kewe nöüwis, nöün kewe meilapen sounfiu me ekewe aramas tekia lon Kalilea. ²² Iwe, nöün Herotias we föpwül a tolong lon ewe leni o a pworuk, pwe Herotes me chokewe mi eti le mongö ra pwapwaiti. Iei mine a üreni ewe föpwül, “Met ka mochen üpwe ngonuk? Ngang üpwe ngonuk meinisin.” ²³ A pwal allükülükü an pwon fän akapel, “Meinisin mine ka tüngor üpwe ngonuk, inamwo ika esopun mwüi.” ²⁴ Iei mine ewe föpwül a feila ren inan we o aisini, “Met ngang üpwe tüngor?” Nge inan we a pölüeni, “Kopwe tüngor möküren Johannes Soupapatais.” ²⁵ Iwe, ewe föpwül a müttir liwinla ren ewe king o tüngor ngeni, “Üa mochen pwe iei chök kopwe ngeniei möküren Johannes Soupapatais lon eu sepi.” ²⁶ Iwe, ewe king a fokun letipeta ren ei tüngor. Nge pokiten an pwon fän akapel pwal pokiten chokewe mi eti le mongö a tipeeu ngeni an we tüngor. ²⁷ Iei mine lon ewe chök otun Herotes a tinala eman sounfiu seni ewe mwichen chon tümwünü ewe king o a allük ngeni, pwe epwe uwato möküren Johannes. Iwe, ewe sounfiu a feila lon ewe imwen fötek o pöküela üen Johannes. ²⁸ Mürin a uwala ewe mökür lon eu sepi o ngeni ewe föpwül, nge i a ngeni inan we. ²⁹ Iwe, lupwen nöün Johannes kewe chon kaiö ra rong ei pworaus, ra feila o angei somän Johannes o peiaseni.

Jesus a amongöü limungeröü mwän

6.30-44

(Mat 14.13-21; Luk 9.10-17; Joh 6.1-14)

³⁰ Iwe, nöün Jesus kewe chon kaiö ra liwinto ren Jesus o apworausana ngeni meinisina mine ra föri, pwal mine ra eäni afalafal. ³¹ A fokun wor chomong aramas mi feito o feila, pwe Jesus me nöün kewe chon kaiö esap chüen mwo nge wor fansoun ar repwe mongö. Iei mine Jesus a üreniir, “Ousipwe feila oukich chök lon eu leni mi toau seni lenien aramas, pwe oupwe tongeni ekis asösö.” ³² Iei mine ra tötä won efoch wa o saila ngeni eu leni mi toau seni lenien aramas.

³³ Nge chomong aramas ra küneer lupwen ra saila o ra müttir silleniir. Iei mine ra feila seni ekewe telinimw meinisina o säla mwer, pwe ra tori ewe leni mwen Jesus me nöün kewe chon kaiö resamwo tori. ³⁴ Iwe, lupwen Jesus a tötü seni ewe wa, a küna eu mwichen aramas mi chomong. Iwe, a fokun tongeer, pun ra wewe ngeni sip esap wor nöür chon mas. Iei mine a popuetä le afalafala ngeniir chomong mettoch.

³⁵ Iwe, lupwen a lekuniol, nöün kewe chon kaiö ra feito ren o üreni, “A fen lekuniol, nge ei leni a toau seni lenien aramas. ³⁶ Kopwe tinala ekewe aramas, pwe repwe feila lon ekewe leni me sopw mi arap pwe repwe kamö aner mongö.” ³⁷ Nge Jesus a üreniir, “Ämi oupwe ngeniir met repwe mongö.” Iwe, ra aisini, “Ka mochen aipwe feila kamö pilawa won ükükün ruopükü föün moni silifer, pwe repwe mongö?” ³⁸ Iwe, Jesus a aisiniir, “Fiteföü pilawa mi wor remi? Oupwe feila o pii.” Nge lupwen ra küna, ra üreni Jesus, “A wor limeföü pilawa me ruoman ik.”

³⁹ Mürin Jesus allük ngeni nöün kewe chon kaiö, “Oupwe üreni ekewe aramas, pwe repwe mottiu lein ekewe fetil lon eu mwich me eu mwich.” ⁴⁰ Iei mine ekewe aramas ra mottiu lon en me an mwich, ipükü lon ekoch mwich, nge lime pwal lon ekoch mwich. ⁴¹ Mürin Jesus a angei ekewe limeföü pilawa me ekewe ruoman ik, a sachtä läng o iotekin kilisou ngeni Kot won. A kinikisiretiu o a ngeni nöün kewe chon kaiö, pwe repwe ineti ngeni ekewe aramas. A pwal ineti ekewe ruoman ik, pwe epwe tori ekewe aramas meinisina. ⁴² Iwe, ir meinisina ra mongö o ra mötüla. ⁴³ Mürin ekewe chon kaiö ra ionifengeni o amasoua engol me ruu chüük ren lusun ekewe pilawa me ekewe ik. ⁴⁴ Iwe, iteiten ekewe mwän mi mongö ükükün limungeröü.

Jesus a fetal won matau

6.45-52

(Mat 14.22-33; Joh 6.15-21)

⁴⁵ Iwe, lon ewe chök otun Jesus a apacheua nöün kewe chon kaiö, pwe repwe tötä won ewe wa o akomwola mwan Petsaita epek ewe noom. Nge i epwe üreni ekewe aramas pwe repwe liwinla ngeni lenier. ⁴⁶ Mürin an kapong ngeni ekewe aramas, Jesus a feita won eu chuk pwe epwe iotek. ⁴⁷ Lupwen a pwinila, ewe wa a tori lukalapen ewe noom, nge Jesus a emanüla winifanü. ⁴⁸ Iwe, a küna pwe nöün kewe chon kaiö ra pekus le fötül, pun ewe asepwäl a enito me mwer. Iwe, wünümweerän ina epwe lefilen kulok ülungat me kulok wonu, Jesus a feito rer, nge a fetal won matau. Jesus a fetaleto o sänger seniir. ⁴⁹ Nge lupwen ra küna pwe a fetal won ewe matau, ra ekieki pwe i eman anü. Iei mine ra puchörütä, ⁵⁰ pun ir meinisina ra küna i o ra fokun rükö ren. Lon ei chök otun Jesus a kapas ngeniir o üreniir, “Oupwe tipepwora! Ngang ei. Ousap niuokus.” ⁵¹ Mürin Jesus a tötä won waar we, nge ewe asepwäl a manasösötü. Iwe, ir meinisina ra fokun weitifengeniir, ⁵² pun resap mwo weweiti met wewen än Jesus ineti ekewe föün pilawa, resap fokun miritila ren.

Jesus a apöchöküla ekewe mi samau lon Kenesaret

6.53-56

(Mat 14.34-36)

⁵³ Iwe, ra saila pekilan ewe noom o tori ewe fanü lon Kenesaret. Ikenan ra emisini waar we. ⁵⁴ Nge lupwen ra tiwelong me won ewe wa, ekewe aramas ra müttir silleni Jesus. ⁵⁵ Iei mine ra säfeil lon unusen ewe fanü o uwato ekewe chon samau mi kon won kier lon ekewe leni ia ra rong pwe Jesus a nom ie. ⁵⁶ Iwe, ekis meinisin ia Jesus a feila ie lon ekewe sopw, telinimw me leni, ekewe aramas ra uwato ekewe chon samau lon ekewe lenien amömö o ra tüngor ngeni Jesus pwe epwe mwüt ngeni ekewe chon samau repwe atapa lepwülün üfan. Iwe, ir meinisin mi atapa ra pöchökületä seni ar samau.

7

Än ekewe chon Juta kewe lewo kapasen kait

7.1-13

(Mat 15.1-9)

¹ Iwe, ekoch Farisi me Sensen Allük mi feito seni Jerusalem ra mwicheto ren Jesus. ² Ra küna pwe ekoch me lein nöün Jesus kewe chon kaiö ra mongö aner won pöür mi limengau, wewen pwe resamwo talü pöür lon ewe lapalap ekewe Farisi ra aiti ngeniir.

³ (Pun ekewe Farisi me ekewe chon Juta meinisin ra apwönüetä mine ar kewe lewo ra eäni kait ngeniir. Resap tongeni mongö are resap mwo talü pöür lon ei sokun lapalap. ⁴ Lupwen ra feito seni ekewe lenien amömö, resap mongö och tori ra wes me tütü. Iwe, ra fokun apwönüetä chomong sokun allük ra angei seni ar kewe lewo, usun ar talü kap, nape me sepi seni piras.)

⁵ Iei mine ekewe Farisi me ekewe Sensen Allük ra aisini Jesus, “Pwota noumw kewe chon kaiö resap apwönüetä pwüngün ekewe allük seni ach kewe lewo, nge ra mongö aner won pöür mi limengau?” ⁶ Iwe, Jesus a pölüeniir, “A fokun pwüng mine Aisea a fen osuni usumi. Ämi oua chon likatuputup usun a fen mak:

‘Kot a apasa: Ekei aramas ra asamoluei ren kapas chök,
nge leluker a fokun toau seniei.

⁷ A lomotongau ar fel ngeniei,

pun ra aiti ngeni aramas förien aramas allük,

usun itä nge ai kewe allük.’ ✧ ⁸ Ämi oua likitala an Kot kewe allük, nge oua aleasochis ngeni aitian aramas.”

⁹ Iwe, Jesus a pwal üreniir, “Oua fokun tipachem le öüöngaua än Kot allük fän iten ämi oupwe öüöchü aitian ämi kewe lewo. ¹⁰ Pun Moses a allük, ‘Kopwe asamolu semom me inom,’ a pwal apasa, ‘Iö a oteki saman are inan epwe fokun ninnila.’ ✧ ¹¹ Nge ämi oua aiti ngeni aramas pwe are eman aramas a wor ren och mettoch epwe aea le alisi ngeni saman are inan, nge a apasa, ‘Iei Korpan,’ (wewen: Ei metoch an Kot) ¹² ei aramas esap chüen wisen alisi saman are inan. ¹³ Ren ei sokun kait oua aiti ngeni aramas oua aücheangau ei än Kot kapas. A pwal wor chomong mettoch oua föri usun ei.”

Ekewe mettoch mi alimengaua eman aramas

7.14-23

(Mat 15.10-20)

¹⁴ Mürin Jesus a körsefäli eu mwichen aramas o a üreniir, “Oupwe aüselingaei ämi meinisin, pwe oupwe wewela. ¹⁵ Esap wor och mine a tolong lon awen eman aramas seni me lükün a tongeni alimengaua. Nge met mi towu seni lon awen eman aramas, ina mine a alimengaua. ¹⁶ [Iö a wor selingan epwe rongorong.]”

¹⁷ Iwe, lupwen Jesus a feila seni ewe mwichen aramas, a tolong lon ewe imw, iwe, nöün kewe chon kaiö ra tüngor ngeni, pwe epwe awewe ngeniir wewen ewe pworausen awewe. ¹⁸ Iwe, Jesus a üreniir, “Ifa usun, oua pwal wewemang usun ekewe lusun? Ousap weweiti, pwe meinisin mine a tolong lon awen eman aramas seni lükün esap alimengaua, ¹⁹ pun esap tolong lon lelukan, pwe lon chükükanan, mürin a towu seni lon inisin.” (Ren ei pworausen awewe Jesus a pwärätä pwe mongö meinisin a öch an aramas repwe mongö.)

²⁰ Iwe, Jesus a pwal apasa, “Met a towu seni lon awen eman aramas, ina mine a alimengaua. ²¹ Pun seni me lon lelukan eman aramas a towu ekiem mi ngau: ekiem mocheisou, solä, ninni, lisowu, ²² maicha, föföringau, atuputup, mochenia, lolowo, kapasingau, lamalamtekia me miritingau. ²³ Ekei mettoch meinisin ra towu seni lon lelukan eman aramas o ra alimengaua i.”

Eman fefin mi lükülük

7.24-30

(Mat 15.21-28)

²⁴ Mürin Jesus a feila seni ikenan o feila lon eu fanü arap ngeni ewe telinimw Tirus. Iwe, a tolong lon eu imw, nge esap mochen an eman epwe silei pwe a nom lon. Nge esap tufich an epwe opola. ²⁵ Iwe, eman fefin a wor eman nöün nengin a wor eman ngününgau won, a rong usun pworausen Jesus. A müttir feito ren o fotopwäsuk arun pechen. ²⁶ Ei fefin eman fin lükün Israel, a uputiü lon ewe fanü Fonisia lon Siria. Neminei a tüngormau ngeni Jesus pwe epwe atowu ewe ngününgau seni nöün we nengin. ²⁷ Nge Jesus a pölüeni, “Sipwe akomwen amongöü ekewe semirit, pun esap pwüing ach sipwe angei anen ekewe semirit o mone ngeni ekewe kolak.” ²⁸ Nge ewe fefin a pölüeni, “Ewer, ai samol. Inamwo, nge ekewe kolak fän chepel ra pwal mongö ekewe mworomworen mongö mi mworotiu seni än ekewe semirit chepel.” ²⁹ Iwe, Jesus a üreni ewe fefin, “Pokiten ka pölüeni lon ei ititin fos, kopwe liwinla le imwom. Ikenan kopwe küna pwe ewe ngününgau a towu seni noumw we nengin.” ³⁰ Iwe, lupwen ewe fefin a tori imwan, a küna nöün we pwe a kon won peet, nge ewe ngününgau a towu seni.

Jesus a apöchöküla eman mi selingepüng o awemwöch

7.31-37

³¹ Mürin, Jesus a feila seni ewe fanü Tirus o feila ngeni Siton tori ewe nomun Kalilea, nge a pwerelong lon ewe fanü itan Engol Telinimw. ³² Iwe, ekoch aramas ra uwato ren Jesus eman mwän mi selingepüng o awemwöch. Ra tüngormau ngeni Jesus, pwe epwe iseis pöün won. ³³ Iei mine Jesus a emwenala ewe mwän seni ewe mwichen aramas, pwe epwe emanüla. A tikilong lon selingen ewe mwän, a atuf o atapa chönawan. ³⁴ Mürin Jesus a sachetä läng, a ngasalap o üreni ewe mwän, “Effata!”

wewen “Sukula!”³⁵ Iwe, lon ewe chök otun selingen ewe mwän a sukula, a newenewöchüla le kapas.³⁶ Mürin Jesus a allük ngeni ekewe aramas pwe resap apworaus ngeni eman mine a fis. Lon an allüküchou ngeniir, nge ra chök alapala ar apworausafeili ewe pworaus.³⁷ Iwe, aramas meinisin mi rongorong ei pworaus ra fokun ing o apasa, “A fokun mürina meinisin mine a föri. A mwo nge föri pwe chon selingepüng repwe tongeni rong, nge chon awemwöch repwe tongeni kapas.”

8

Jesus a amongöni rüanüngeröü aramas

8.1-10

(Mat 15.32-39)

¹ Mürin ekoch chök fansoun pwal eu mwichen aramas mi chomong ra chufengen. Lupwen a itela aner mongö, Jesus a körato nöün kewe chon kaiö o üreniir,² “Üa fokun tongei ekei aramas, pun ra nom rei lon ükükün ülungat rän, nge iei a itela aner mongö.³ Are üpwe tiniirela lon lenier, nge üsap akom amongöniir, repwe mesarochola o turula won al, pun ekoch me leir ra feito seni toau.”

⁴ Iwe, nöün kewe chon kaiö ra aisini, “Ia me lon ei leni mi pön sipwe tongeni künakün mongö me ie pwe epwe naf ach sipwe amongöni ekei aramas?”⁵ Jesus a aisiniir, “Fiteföü pilawa a wor remi?” Ra pölüeni, “Füföü.”⁶ Iwe, a allük ngeni ekewe aramas, pwe repwe mottiu le pwül. Mürin a angei ekewe füföü pilawa o iotekin kilisou ngeni Kot won. A kiniretiu o ngeni nöün kewe chon kaiö pwe repwe ineti ngeni ewe mwichen aramas. Iwe, ra föri usun mine Jesus a apasa.⁷ Mi pwal wor rer ekoch kükün ik. Jesus a iotekin kilisou wor, iwe, a üreni nöün kewe chon kaiö pwe repwe pwal ineti ngeni ekewe aramas.⁸ Iwe, ir meinisin ra mongö o mötüla. Mürin nöün kewe chon kaiö ra amasoua fisu chüük ren lusun ekewe mongö.⁹ Iwe, iteiten ekewe aramas mi nom lon ei otun ina epwe ükükün rüanüngeröü. Mürin, Jesus a tiniirela lon lenier.¹⁰ Lon ewe chök otun Jesus me nöün kewe chon kaiö ra tötä won efoch wa o ra sai ngeni ewe fanü Talmanuta.

Ekewe Farisi ra tüngor Jesus pwe epwe föri eu manaman

8.11-13

(Mat 16.1-4)

¹¹ Iwe, ekoch me lein ekewe Farisi ra feito ren Jesus o ra popuetä le anini ngeni. Ra mochen särei Jesus, iei mine ra tüngor ngeni pwe epwe föri eu manaman, pwe epwe pwä are Kot a tipeeu ngeni. ✧¹² Nge Jesus a ngasalap o apasa, “Pwota ei pilon aramasen ikenai ra tüngor eu manaman? Enlet, üpwe ürenikemi pwe esap wor eu manaman epwe pwä ngeni ei pilon aramas.” ✧¹³ Iwe, Jesus a likitiirela, a tötä won efoch wa o saila pekilan ewe noom me epek.

Jesus a üreni nöün kewe chon kaiö pwe repwe afäliir ren ekewe Farisi me Herotes

8.14-21

(Mat 16.5-12)

¹⁴ Iwe, nöün Jesus kewe chon kaiö ra manlükala ar repwe anafa woser pilawa, pun a chök wor rer eföü pilawa won ewe wa.¹⁵ Iwe, Jesus a üreniir, “Oupwe tümwünüfichi o afälikemi ren ewe iis än ekewe Farisi me

Herotes.” ✧ 16 Iwe, ekewe chon kaiö ra popuetä kapasfengen lefiler, “A apasa ei ititin fos, pun esap wor rech pilawa.” 17 Nge Jesus a silei mine ra kapasfengen lefiler, iei mine a aisiniir, “Pwota oua kapasfengen usun an esap wor remi pilawa? Ifa usun, ousap mwo silei are weweöch ren? Ifa usun, lelukemi a chüen üleförea? 18 A wor mesemi, pwota ousap küna och? A wor selingemi, pwota ousap rongorong? Ousap chechemeni ✧ 19 lupwen üa kinikisietiu ekewe limeföü pilawa fän iten ekewe limungeröü aramas? Fitu chüük oua amasoua ren ekewe lusun mongö?” Iwe, ra pölüeni, “Engol me ruu chüük.” 20 “Nge lupwen üa kinikisietiu ekewe fuföü pilawa fän iten ekewe rüanüngeröü aramas, fitu chüük oua amasoua ren ekewe lusun mongö?” Ra pölüeni, “Fisu chüük.” 21 Iwe, Jesus a aisiniir, “Ifa usun, oua chüen wewemang?”

Jesus a aneloi mesen eman mi chun lon Petsaita

8.22-26

22 Iwe, ra tori Petsaita. Ikenan ekoch aramas ra uwato ren Jesus eman mwän mi chun. Iwe, ra tüngormau ngeni pwe epwe atapa. 23 Iwe, Jesus a amwöchü pöün ewe mwän mi chun o emwenala lükün ewe sopw. A atufa mesen ewe mwän o iseis pöün won, mürin Jesus a aisini, “Ifa usun, ka tongeni künok?” 24 Iwe, ewe mwän a nenela o apasa, “Ewer, üa küna aramas, nge ra lapalapeni lapalapen irä mi fetalfeil.” 25 Mürin Jesus a isessefäl pöün won mesen ewe mwän. Iwe, mesan kana ra newenewenela o öchsefäl, pwe a tongeni künaöchu mettoch meinisin. 26 Mürin Jesus a tinala ewe mwän lon lenian o üreni, “Kosap chüen liwinsefäli long lon ei sopw.”

Petrus a pwärätä usun Jesus

8.27-30

(Mat 16.13-20; Luk 9.18-21)

27 Mürin Jesus me nöün kewe chon kaiö ra feila lon ekewe sopw arap ngeni Seserea Filipi. Iwe, lupwen ar fetal, Jesus a aisiniir, “Met aramas ra apasa usi?” 28 Iwe, ra üreni, “Ekocho aramas ra apasa, pwe en Johannes Soupapatais, ekoch ra apasa, pwe en Elias, nge pwal ekoch ra apasa, pwe en eman ekewe soufos.” ✧ 29 Mürin Jesus a aisiniir, “Nge ämi, met oua apasa usi?” Petrus a pölüeni, “En Kraist!” 30 Iwe, Jesus a allük ngeniir, “Ousap fokun üreni eman och usi!”

Jesus a kapas usun an riaföü me mäla

8.31-9.1

(Mat 16.21-28; Luk 9.22-27)

31 Mürin Jesus a afalafala nöün kewe chon kaiö, “Nöün Aramas epwe fokun tolong lon riaföü watte, epwe küna koput me ren ekewe souakom, ren ekewe souasor mi lap me ekewe Sensen Allük. Repwe niela, nge mürin ülüngat rän epwe manausefälitä.” 32 Iwe, Jesus a fokun afata ngeniir usun ei. Iei mine Petrus a emwenala ekis o a popuetä le apwüngü. 33 Nge Jesus a kul ngeni nöün kewe chon kaiö o a apwüngü Petrus me mwer. Iwe, a üreni, “Kopwe sü seniei, Satan! Pun om ekiek esap pop seni Kot, nge a pop seni aramas.”

34 Mürin Jesus a körato ewe mwichen aramas me nöün kewe chon kaiö, iwe, a üreniir, “Are eman a mochen etiei, epwe pölükü manuan, epwe mwärei an iräpenges o tapweto müri. ✧ 35 Pun iö a mochen amanaua

manuan epwe pöüt seni. Nge iö a pölükü manuan fän itei pwal fän iten ewe Pworausen Manau epwe amanaua manuan. ✱ ³⁶ Epwe met lomoten än eman aramas epwe feiöchüni feiöchün unusen fanüfan, nge manuan epwe pöüt seni? ³⁷ Esap wor och eman aramas a tongeni fangala pwe epwe angeseßali manuan. ³⁸ Are eman a säwäsinei me ai kewe kapas me lein ei täppin aramas mi kirikiringau me tipis ngeni Kot, Nöün Aramas epwe pwal säwäsini lupwen epwe war me ekewe chon läng mi pin lon lingen Saman.”

9

¹ Iwe, Jesus a pwal apasa, “Üpwe ürenikemi, pwe mi wor ekoch aramas ikkei resap mäla, pwe repwe mwo küna Mwün Kot epwe war fän manaman.”

Jesus a wilila o lingela

9.2-13

(Mat 17.1-13; Luk 9.28-36)

² Mürin wonu rän Jesus a emwenala Petrus, James me Johannes won eu chuk mi tekia, pwe repwe imwüla ikenan. Iwe, lupwen ar nengeni Jesus, a wilila won inisin. ³ Üfan kana ra molupolup o fokun pwechepwech, esap wor eman chon apwecha üf won fanüfan a tongeni apwecha üf an epwe iei usun. ⁴ Iwe, ekewe ülüman chon kaiö ra küna Elias me Moses lupwen ar kapasfengen me Jesus. ⁵ Iwe, Petrus a üreni Jesus, “Sense, a fokun öch ach sipwe nonom ikkei. Aipwe aüetä ülüngat imw mangaku, eu fän itom, eu fän iten Moses pwal eu fän iten Elias.” ⁶ Petrus me chienan kewe ra fokun niuokus, pwe Petrus esap chüen silei mine epwe apasa.

⁷ Mürin eu kuchu a feito o anürürela. Iwe, ra rong eu möngüngü a towu me lon ewe kuchu, “Iei i nei mi achengicheng, oupwe aüselinga.” ✱ ⁸ Iwe, ra müttir nenefeil, nge resap chüen küna eman a nom rer, pwe Jesus chök.

⁹ Iwe, lupwen ra feitiu me won ewe chuk, Jesus a allük ngeniir, “Ousap üreni eman met oua küna, tori Nöün Aramas epwe manausefäl seni mäla.” ¹⁰ Ekewe chon kaiö ra aleasochisi mine Jesus a allük ngeniir, nge püsin irfengen lefiler ra kapasfengen won ekei kapas o ais, “Met wewen manausefäl seni mäla?” ¹¹ Iwe, ra aisini Jesus, “Pwota ekewe Sensen Allük ra apasa, pwe Elias epwe akomwen feito?” ✱ ¹² Nge Jesus a pölüeniir, “Mi pwüing pwe Elias epwe akomwen feito, pwe epwe amolätä mettoch meinisin. Nge pwota chök a mak lon ekewe Toropwe mi Pin, pwe Nöün Aramas epwe tolong lon riaföü watte o küna koput? ¹³ Nge üpwe ürenikemi pwe Elias a fen feito, nge aramas ra föri ngeni mine ra mochen, usun a fen mak lon ekewe Toropwe mi Pin.”

Jesus a apöchöküla eman ät a wor eman ngünüingau won.

9.14-29

(Mat 17.14-21; Luk 9.37-43a)

¹⁴ Iwe, lupwen ar liwinto ren ekewe ekoch chon kaiö, ra küna eu mwichen aramas mi chomong ra pwelifeiliir, pwal ekoch Sensen Allük ra anini ngeniir. ¹⁵ Lon ewe chök otun, lupwen ewe mwichen aramas mi chomong ra küna Jesus, ra fokun mairü, ra säla ren o kapong ngeni. ¹⁶ Iwe, Jesus a aisini nöün kewe chon kaiö, “Met oua aninifengen won me ekewe Sensen Allük?”

✱ 8:35: Mat 10.39; Luk 17.33; Joh 12.25 ✱ 9:7: Mat 3.17; Mark 1.11; Luk 3.22; 2.Pet 1.17-18

✱ 9:11: Mal 4.5; Mat 11.14

¹⁷ Iwe, eman mwän me lon ewe mwich a pölüeni, “Sense, üa uwato nei ät reöm, pun a wor eman ngününgau won, pwe esap tongeni kapas. ¹⁸ Lupwen ewe ngün a pöchökül me won, a aturala le pwül, iwe, a puropurowu seni lon awan, a asürüngü ngiin o chewartarela unusen inisin. Üa tünigor ngeni noumw kewe chon kaiö pwe repwe atowu ewe ngün me won, nge resap tongeni.” ¹⁹ Iwe, Jesus a üreniir, “Ämi eu täppin aramas mi lükülükü mang. Ifa langatamen fansoun ai üpwe nom remi? Ifa langatamen fansoun ai üpwe engila ngenikemi? Oupwe uwato rei ewe ät.” ²⁰ Iwe, ra uwato ewe ät ren Jesus. Nge lupwen ewe ngününgau a küna Jesus, lon ewe chök otun a achecha ewe ät, iwe, a turula le pwül o asokopölafetalei, nge puropur a puropurowu seni lon awan. ²¹ Iwe, Jesus a aisini semen ewe ät, “Ifa langatamen fansoun än noumw ei samau?” Ewe sam a pölüeni, “A chök popuetä seni an kükün. ²² Fan chomong ewe ngününgau a sotuni an epwe niela ren an aturalong lon ekkei pwal lon koluk. Kose mochen kopwe tongekem o alisikem, are ka tongeni.” ²³ Nge Jesus a pölüeni, “Are en ka tongeni lükülük! Eman mi lükülük a tongeni mettoch meinisin.” ²⁴ Lon ewe chök otun semen ewe ät a kökkö fan leüömong, “Üa lükülük! Kopwe alisiei, pwe üsap chüen lükülükü mang.” ²⁵ Iwe, lupwen Jesus a küna, pwe chomong aramas ra säto rer, a apwüngü ewe ngününgau, “En ngün mi afisätä awemwöch me selingepüng üa allük ngonuk pwe kopwe towu seni ewe ät, nge kosap fokun liwinsefäli.” ²⁶ Iwe, ewe ngününgau a puchörütä, a achechecha ewe ät o a towu seni. Iwe, ewe ät a konola won pwül usun chök eman mi mäla. Iei mine chomong me lein ekewe aramas ra apasa, “A mäla.” ²⁷ Nge Jesus a amwöchü pöün ewe ät o a apwätai.

²⁸ Mürin än Jesus tolong lon ewe imw, nöün kewe chon kaiö ra aisini Jesus lupwen a emanüla, “Pwota äm aisap tongeni atowu ewe ngününgau?” ²⁹ Nge Jesus a pölüeniir, “Esap wor och mettoch ei sokun ngün epwe tongeni süla ren, pwe ren iotek chök.”

Jesus a kapasfäl usun an riaföü me mäla

9.30-32

(Mat 17.22-23; Luk 9.43b-45)

³⁰ Iwe, Jesus me nöün kewe chon kaiö ra feila seni ewe leni o ra pwerelong lon Kalilea. Nge Jesus esap mochen pwe aramas repwe silei ia a nom ie, ³¹ pun a afalafala nöün kewe chon kaiö o a üreniir, “Nöün Aramas epwe tolong le pöün aramas, iwe, repwe niela. Nge mürin ülüngat rän epwe manausefäl.” ³² Nge nöün kewe chon kaiö resap weweiti mine a eäni afalafal, nge ra pwal niuokus ar repwe kapas ais ngeni.

Iö a lap seni meinisin?

9.33-37

(Mat 18.1-5; Luk 9.46-48)

³³ Iwe, ra tori Kapernaum. Nge lupwen Jesus a nom le imw, a aisini nöün kewe chon kaiö, “Met oua aninifengen won lupwen sia fetal won al?” ³⁴ Nge ir ra chök fanafanala, pun ra aninifengen won al ika iö a lap seniir meinisin. ✱ ³⁵ Iwe, Jesus a mottiu, a körifengeni nöün kewe engol me ruoman chon kaiö o a üreniir, “Are eman a mochen pwe epwe akom seni meinisin, i epwe kükümwir seniir meinisin, epwe pwal chon angang

ngeniir meinisin.” ✧ ³⁶ Mürin a angei eman semirit o a anomu me mwer, a romi o üreni nöün kewe chon kaiö, ³⁷ “Are eman a etiwa eman ekei semirit fän itei, wewen chök nge a pwal etiwaei, nge are eman a etiwaei, esap chök etiwaei, nge a pwal etiwa ewe mi tiniei.” ✧

Iö esap ü ngenikich, i a fitikich

9.38-41

(Luk 9.49-50)

³⁸ Iwe, Johannes a üreni Jesus, “Sense, äm aia küna eman mwän a atowu anün rochopwak fän itom, nge aia üreni pwe epwe ükütiu, pun esap chiechiach.” ³⁹ Nge Jesus a üreniir, “Ousap aükätü an angang. Pun eman mi föri eu manaman fän itei, esap tongeni kapasingau usi me mürin. ⁴⁰ Pun iö esap ü ngenikich, i a fitikich. ✧ ⁴¹ Enlet, üpwe ürenikemi, are eman epwe aünü ngenikemi eu kapen koluk, pokiten oua chon tapwela mürin Kraist, i epwe fokun angei liwinin.” ✧

Sosot ren tipis

9.42-50

(Mat 18.6-9; Luk 17.1-2)

⁴² “Are eman aramas epwe föri pwe eman ekewe kükün mi lüküei epwe föri tipis, epwe fen öch ngeni ewe aramas, pwe epwe riritä fän üan eföü fau mi föümong o epwe koturutü le matau. ⁴³ Are poumw a atupukelong lon tipis, kopwe pökü. Epwe fen öch ngonuk om kopwe pöüefoch le tolong lon manau esemüch, lap seni om kopwe pöüruofoch le tolong lon hell, ✧ ⁴⁴ [ia ekewe möttö mi äniir resap mäla, nge ewe ekkei mi keniiir esap kunula.] ⁴⁵ Are pecheöm a atupukelong lon tipis, kopwe pökü. Epwe fen öch ngonuk om kopwe pecheefoch le tolong lon manau esemüch, lap seni om kopwe pecheruofoch le tolong lon hell, ⁴⁶ [ia ekewe möttö mi äniir resap mäla, nge ewe ekkei mi keniiir esap kunula.] ⁴⁷ Are mesom a atupukelong lon tipis, kopwe alusawu. Epwe fen öch ngonuk om kopwe meseeföü le tolong lon manau esemüch, lap seni om kopwe meseruoföü le tolong lon hell, ✧ ⁴⁸ ia ekewe möttö mi äniir resap mäla, nge ewe ekkei mi keniiir esap kunula.

⁴⁹ Aramas meinisin repwe limelimöch ren ekkei, usun eu asoren mongö a limelimöch ren salt. ⁵⁰ Salt a mürina. Nge are salt a nepatapatala, met oupwe föri ngeni pwe epwe nekenikensefäl? Epwe wor ewe salten chiechifengen lefilemi, oupwe pwal afisätä kinamwe lefilemi.” ✧

10

Jesus a afalafal usun mwüfesenin pwüpwülü

10.1-12

(Mat 19.1-12; Luk 16.18)

¹ Mürin Jesus a feila seni ewe leni o a feila lon ewe fanü Jutea me pekilan ewe chanpupu Jortan. Iwe, chomong aramas ra mwicheto ren, nge i a afalafaleer usun a piin föri. ² Iwe, ekoch Farisi ra feito ren pwe ra mochen särei. Ra aisini, “Ifa usun, a pwüng me lon allükün ach lamalam pwe eman epwe tongeni mwü seni pwülüan?” ³ Jesus a pölüeniir, “Met sokun allük Moses a ngenikemi?” ⁴ Nge ir ra pölüeni, “Moses a mwüt ngeni eman mwän pwe epwe makkei echö toropwen mwüfesen, mürin

✧ **9:35:** Mat 20.26-27; Mark 10.43-44; Luk 22.26 ✧ **9:37:** Mat 10.40; Luk 10.16; Joh 3.20

✧ **9:40:** Mat 12.30; Luk 11.23 ✧ **9:41:** Mat 10.42 ✧ **9:43:** Mat 5.30 ✧ **9:47:** Mat 5.29 ✧ **9:50:** Mat 5.13; Luk 14.34-35

epwe tinala pwülüan.” ✱ ⁵ Nge Jesus a üreniir, “Moses a makkei ei allük pokiten ämi tipeförea. ⁶ Nge seni lepoputän, lupwen Kot a föri fanüfan, a föri mwän me fefin. ✱ ⁷ Iei mine eman aramas epwe likitala saman me inan o pache ngeni pwülüan. ⁸ Iwe, ekewe ruoman repwe wiliti eu chök inis. Iei mine resap chüen ruoman, pwe eman chök. ✱ ⁹ Iwe, mine Kot a rifengeni, esap wor eman aramas epwe mwütifeseni.”

¹⁰ Lupwen ra tosefälilong lon ewe imw, ekewe chon kaiö ra aisini Jesus usun ekei kapas. ¹¹ Iwe, a üreniir, “Eman mwän mi tinala pwülüan, nge a pwülüeni pwal eman fefin, ätewe a tipisin lisowu ngeni pwülüan we. ¹² Nge are eman fefin a tinala pwülüan o a pwülüeni pwal eman mwän, neminewe a tipisin lisowu.” ✱

Jesus a afeiöchü kükün semirit

10.13-16

(Mat 19.13-15; Luk 18.15-17)

¹³ Iwe, ekoch aramas ra uwato nöür semirit ren Jesus, pwe epwe iseis pöün wor, nge ekewe chon kaiö ra apwüngüür. ¹⁴ Nge lupwen Jesus a küna mine ra föri, a letipechou o a üreni nöün kewe chon kaiö, “Oupwe mwüt ngeni ekewe semirit pwe repwe feito rei, nge ousap epetiir, pun iö a wewe ngeni ekei semirit epwe mwüni mwün Kot. ¹⁵ Enlet, üpwe ürenikemi, ‘Are eman esap etiwa Mwün Kot usun eman semirit, esap tongeni tolong lon.’” ✱ ¹⁶ Mürin Jesus a romi ekewe semirit, a iseis pöün won eman me eman leir o a afeiöchüür.

Ewe mwän mi pisekisek

10.17-31

(Mat 19.16-30; Luk 18.18-30)

¹⁷ Iwe, lupwen a popuetasefäli an sai, eman mwän a säto ren, a fotopwäsuk mwan o tüngor ngeni, “Sense mi mürina, met ngang üpwe föri pwe üpwe manaueni manau esemüch?” ¹⁸ Jesus a üreni, “Pwota ka aita ngeniei mürina? Esap wor eman a mürina pwe Kot echök. ¹⁹ Ka silei ekewe allük: ‘Kosap niela aramas, kosap lisowu, kosap solä, kosap eäni kapas chofona usun eman, kosap eäni föförün atuputup, kopwe asamolu semom me inom.’” ✱ ²⁰ Iwe, ewe mwän a üreni Jesus, “Sense, ekei allük meinisin üa apwönüretä seni lealüali.” ²¹ Iwe, Jesus a newenewen ngeni pokiten an tongei o a üreni, “Eu chök ka mang ngeni. Kopwe feila o amömöla meinisin mine ka eäni. Nge ewe moni kopwe fang ngeni chon wöüngau, pwe epwe wor woumw lon läng. Mürin kopwe feito o tapweto müri.” ²² Lupwen ewe mwän a rongorong ekei kapas, a wowongau, iwe, a feila fän letipeta, pun wöün a fokun chomong.

²³ Iwe, Jesus a kulu ngeni nöün kewe chon kaiö o a üreniir, “A men fokun weires ngeni ekewe aramas mi pisekisek ar repwe tolong lon Mwün Kot.”

²⁴ Iwe, ekewe chon kaiö ra mairü ren ekei kapas. Nge Jesus a kapasfäl ngeniir, “Ämi nei kana, a men fokun weires an eman epwe tolong lon Mwün Kot. ²⁵ A men fokun weires ngeni eman aramas mi pisekisek an epwe tolong lon Mwün Kot, lap seni än eman kamel epwe tolong lon pwangen efoch tikek.” ²⁶ Iwe, ekewe chon kaiö ra fokun mairü ren ekei kapas o ra aisefengen lefiler, “Iö chök a tongeni küna manau?” ²⁷ Nge Jesus a newenewen ngeniir o a üreniir, “Ei sokun esap tufich ngeni aramas,

✱ **10:4:** Tut 24.1-4; Mat 5.31 ✱ **10:6:** Ken 1.27; 5.2 ✱ **10:8:** Ken 2.24 ✱ **10:12:** Mat 5.32; 1.Kor 7.10-11 ✱ **10:15:** Mat 18.3 ✱ **10:19:** Eks 20.12-16; Tut 5.16-20

nge sap ina usun me ren Kot. Pun mettoch meinisin ra tufich ngeni Kot.”²⁸ Mürin Petrus a üreni Jesus, “Nengeni, äm aia likitala meinisin o tapwela mürum.”²⁹ Nge Jesus a üreniir, “Enlet, üpwe ürenikemi, pwe iö a likitala imwan, ika pwiin, ika feffinan, ika inan, ika saman, ika nöün kana, ika fanüan fän itei pwal fän iten ewe Pworausen Manau,³⁰ ewe aramas epwe angei liwinin mi fokun watte lon ei fansoun. Epwe angei fan ipükü imwan, pwiin, feffinan, inan, nöün me fanüan, pwal riaföü pokiten ewe kapasen Kot. Iwe, lon ewe fansoun epwe feito epwe pwal angei ewe manau esemüch.³¹ Iwe, chomong mi akom repwe kükümwir, nge chomong mi kükümwir repwe akom.” ✧

Aülüngatin än Jesus kapas usun an mäla

10.32-34

(Mat 20.17-19; Luk 18.31-34)

³² Lon ei fansoun Jesus me nöün kewe chon kaiö ra fetal won ewe al ngeni Jerusalem. Iwe, Jesus a akomwola mwen ekewe chon kaiö, nge ir ra fokun rükö, nge ekewe aramas mi tapwela mürin ra niuokus. Mürin Jesus a aimwüela nöün kewe chon kaiö o a kapassefäl ngeniir usun mine epwe fis ngeni.³³ Iwe, a üreniir, “Oupwe rongorong. Sipwele feita Jerusalem. Ikenan Nöün Aramas epwe tolong le pöün ekewe sousasor mi lap me ekewe Sensen Allük. Repwe atipisi pwe epwe mäla, nge repwe atolonga lepöün ekewe chon lükün Israel.³⁴ Ir repwe urumwotei o atufa, repwe wichi o niela. Nge mürin ülüngat rän epwe manausefälitä.”

Än James me Johannes tüngor

10.35-45

(Mat 20.20-28)

³⁵ Mürin nöün Sepeti kewe James me Johannes ra feito ren Jesus o ra üreni, “Sense, mi wor och aia mochen kopwe föri fän item.”³⁶ Jesus a aisiniir, “Met oua mochen ai üpwe föri fän itemi?”³⁷ Iwe, ra pölüeni, “Lupwen kopwe mot lon om lenien motun king lon mwum mi ling, kopwe mwüt ngenikem pwe aipwe mot ünükum, eman lepelifichum, nge eman lepelimöngum.”³⁸ Nge Jesus a üreniir, “Ämi ousap silei mine oua tüngor. Ifa usun, oua tongeni ün seni ewe kapen riaföü ngang üpwe ünümi? Ifa usun, oua tongeni papatais ngeni ewe papatais ngang üpwe papatais ngeni?” ✧³⁹ Iwe, ra pölüeni, “Ewer, aia tongeni.” Nge Jesus a üreniir, “Mi pwüing, oupwe fokun ünümi seni ewe kap ngang üpwe ünümi, oupwe pwal fokun papatais ngeni ewe papatais ngang üpwe papatais ngeni.⁴⁰ Nge esap wor ai pwüing ai üpwe filätä iö epwe mot pelifichi ika pelimöngi. Nge Kot epwe ngeni chokewe a filiiretä, pwe repwe mot lon ekei leni.”⁴¹ Iwe, lupwen ekewe engol chon kaiö ra rong usun ei kapas, ra song ngeni James me Johannes.⁴² Iei mine Jesus a körifengeniir o üreniir, “Oua silei, pwe ätekewe ra nemeni chon lükün Israel ra nemeniir fän pwora, nge ekewe mi lap ra nemeniir fän pöchökül.⁴³ Nge esap iei usun lefilemi. Pun iö a mochen lap leimi, epwe chon angang ngenikemi, ✧⁴⁴ nge iö a mochen pwe epwe chon akom leimi, epwe nöümi amanau fän itemi meinisin. ✧⁴⁵ Pun ewe mwo nge Nöün Aramas esap feito pwe aramas repwe angang ngeni, nge a feito pwe epwe angang ngeniir o fangala manauan fänäsengesiir pwe möön manauer.”

✧ **10:31:** Mat 20.16; Luk 13.30 ✧ **10:38:** Luk 12.50 ✧ **10:43:** Luk 22.25-26 ✧ **10:44:** Mat 23.11; Mark 9.35; Luk 22.26

Jesus a aneloi mesen Partimeus

10.46-52

(Mat 20.29-34; Luk 18.35-43)

⁴⁶ Mürin Jesus me nöün kewe chon kaiö ra tori Jeriko. Nge lupwen ar towu seni fiti eu mwichen aramas mi chomong, Partimeus nöün Timäus, eman chon chun mi tütüngor lifangan, a momot lepekin al. ⁴⁷ Iwe, lupwen a rongorong pwe Jesus ewe re Nasaret a feito, a popuetä le kökkö, “Jesus, Nöün Tafit, kopwe tongeei!” ⁴⁸ Iwe, chomong aramas ra song ngeni o üreni pwe epwe fanafanala. Nge i a chök alapala an kökkö, “Nöün Tafit, kopwe tongeei!” ⁴⁹ Nge Jesus a üla o apasa, “Oupwe körato.” Iwe, ra köri ewe mwän mi chun o üreni, “Kopwe chipila, kopwe ütä, Jesus a köruk.” ⁵⁰ Iwe, Partimeus a pwilitatiu üfan sekit, a mwetetä o feila ren Jesus. ⁵¹ Iwe, Jesus a üreni, “Met ka mochen üpwe föri ngonuk?” Ewe mwän mi chun a pölüeni, “Sense, ngang üa mochen pwe üpwe küna mwei.” ⁵² Jesus a üreni, “Kopwe feila, om lükülük a alisuk.” Lon ewe chök otun ewe mwän a küna mwan o tapwela mürin Jesus won ewe al.

11*Jesus a tolong lon Jerusalem*

11.1-11

(Mat 21.1-11; Luk 19.28-40; Joh 12.12-19)

¹ Iwe, lupwen ar fetal ngeni Jerusalem o ra arap ngeni Petfake me Petania, ra tori ewe chukun Olif. Iwe, Jesus a tinala ruoman nöün kewe chon kaiö, pwe repwe akomwola mwer. ² A üreniir, “Oupwe feila lon ewe sopw mi nom mwemi. Nge lupwen oua tori, oupwe küna eman nienifön aas esap mwo wor eman a wawa. Oupwe apichi o emwenato. ³ Nge are eman epwe ürenikemi, ‘Pwota oua föri ei sokun?’ oupwe üreni, ‘Äm samol a mochen wawa, nge epwe müttir aliwinato ikei.’”

⁴ Iwe, ra feila o ra küna eman nienifön aas a riri ngeni üren penkasamen eu imw, nge a ütä won al. ⁵ Iwe, ekoch aramas mi ütä ikenan ra aisiniir, “Met oua föri? Pwota oua apichi ei nienifön aas?” ⁶ Nge ir ra pölüeni lon ewe chök ititin kapas Jesus a aiti ngeniir. Mürin ekewe mwän ra mwütätä ngeniir. ⁷ Iwe, ra emwenato ewe nienifön aas ren Jesus o isetä üfer kewe won. Mürin Jesus a mot won. ⁸ Nge chomong aramas ra ameresala üfer won al, nge pwal ekoch ra pöküetiu palen irä mi muresires o enenala won al. ⁹ Iwe, ekewe aramas mi akomwola mwan, pwal chokewe mi tapweto mürin ra kökkö, “Mwareiti Kot! Feiöchün ätewe a feito fän iten ewe Samol. ✧ ¹⁰ Kot epwe afeiöchü wareton mwün semelapach Tafit. Oupwe mwareiti Kot, ämi mi nom lon ekewe leni tekia lon läng.”

¹¹ Iwe, Jesus a tori Jerusalem o tolong lon ewe imwenfel. A nenengeni ekewe mettoch meinsin mi fis lon, nge pokiten a fen lekuniolula, a feila Petania me nöün kewe engol me ruoman chon kaiö.

Jesus a anüamamau efoch irä fiik

11.12-14

(Mat 21.18-19)

¹² Sorotän ewe rän, lupwen ra liwinsefäl seni Petania, Jesus a echik. ¹³ Iwe, a küna me toau efoch irä fiik mi kula ren chöön. Iei mine a feil ngeni ewe irä, pwe epwe nengeni are mi wor uan won. Nge lupwen a tori ewe irä fiik, a chök küna chöön, pun esamwo tori fansoun an epwe

wor uan. ¹⁴Mürin Jesus a fos ngeni ewe irä, “Esap fokun wor eman epwe mongösefäl uomw.” Iwe, nöün kewe chon kaiö ra rong ekei kapas.

Jesus a limeti ewe imwenfel

11.15-19

(Mat 21.12-17; Luk 19.45-48; Joh 2.13-22)

¹⁵ Iwe, lupwen ra tori Jerusalem, Jesus a tolong lon ewe imwenfel o a popuetä astüowu ätekewe mi kamö o amömöla. A akulätä ekewe chepel än ekewe chon akasiwili moni me ekewe lenien mot än ekewe chon amömö lisom. ¹⁶ Esap mwüt ngeni eman epwe kekifetal och lon ewe imwenfel. ¹⁷ Mürin a afalafala ekewe aramas o üreniir, “A mak lon ekewe Toropwe mi Pin pwe Kot a apasa, ‘Ai imwenfel epwe iteni imwen iotek fän iten chon ekewe mwü meinisin.’ Nge ämi oua awili ngeni eu lenien open chon solä.” ✱

¹⁸ Iwe, lupwen ekewe souasor mi lap me ekewe Sensen Allük ra rong ekei kapas, ra popuetä le kütta efoch alen ar repwe niela Jesus. Nge ra niuokusiti i, pokiten ewe mwichen aramas ra ingeiti an afalafal. ¹⁹ Iwe, lupwen a tori lekuniol, Jesus me nöün kewe chon kaiö ra towu seni ewe telinimw.

Ewe irä fiik a pwasala

11.20-26

(Mat 21.20-22)

²⁰ Lesosorun sorotän ewe rän, lupwen ar fetal won ewe al, ra küna ewe irä fiik, a pwasala meinisin tori waran. ²¹ Iwe, Petrus a chechemeni mine a fis, iei mine a üreni Jesus, “Sense, nengeni ewe irä fiik ka anüamamau a pwasala.” ²² Jesus a pölüeniir, “Oupwe lükü Kot. ²³ Enlet, üpwe ürenikemi, are eman epwe kapas ngeni eu chuk, ‘Kopwe mwöküt seni ei leni o turulong le matau,’ nge esap tipemwaramwar lelukan, pwe a lükü pwe mine a apasa epwe fokun pwönüetä, epwe fokun fis ngeni. ✱ ²⁴ Iei mine üpwe ürenikemi: Meinisin mine oua tungor lon ämi iotek, oupwe lükü pwe oupwe angei, iwe, epwe torikemi. ²⁵ Iwe, lupwen oua ütä le iotek, nge oua chou ngeni eman, oupwe amusala an tipis, pwe Sememi lon läng epwe pwal amusala ämi tipis. ²⁶ [Nge are ousap amusala an tipis, Sememi lon läng esap pwal amusala ämi kewe tipis.]” ✱

Kapas ais usun än Jesus pwüüing

11.27-33

(Mat 21.23-27; Luk 20.1-8)

²⁷ Iwe, ra pwal liwinsefäliiti Jerusalem. Nge lupwen Jesus a fetal lon ewe imwenfel, ekewe souasor mi lap, ekewe Sensen Allük me ekewe souakomwen re Juta ra feito ren ²⁸ o aisini, “Met om pwüüing pwe ka föri ekei mettoch? Iö a ngonuk om pwüüing?” ²⁹ Jesus a üreniir, “Ngang üpwe aisinikemi eu kapas ais. Are oupwe ngeniei pölüan, üpwe pwal ürenikemi fän meni pwüüing üa föri ekei mettoch. ³⁰ Oupwe üreniei ia Johannes a angei me ie an pwüüing pwe epwe papatais, a feito seni Kot ika seni aramas?” ³¹ Iwe, ra popuetä kapasfengen lefiler, “Met sipwe apasa? Are sipwe üra, ‘A feito seni Kot,’ epwe aisinikich, ‘Pwota chök ousap lükü i.’ ³² Nge are sipwe apasa, ‘A feito seni aramas...’ ” (Ra niuokusiti ekewe aramas, pun meinisin ra lükü pwe Johannes wesewesen eman soufos.)

³³ Iei mine ra põlüeni Jesus, “Äm aisap silei.” Iwe, Jesus a üreniir, “Ika ina, pwal ngang üsap ürenikemi fän meni pwüüng üa föri ekei mettoch.”

12

Pworausen awewe usun ekewe chon mälämäl mi ngau

12.1-12

(Mat 21.33-46; Luk 20.9-19)

¹ Mürin Jesus a kapas ngeniir lon pworausen awewe: “A wor eman mwän a fotuki eu tanipin wain. A föri eu tit ünükün, a tuw eu pwang fän iten ewe lenien üchüch föün wain o aüetä eu imwen mamas mi tekia lon. Mürin a awisa ekoch chon mälämäl, pwe repwe tümwünü an tanipin wain. Iwe, a saila toau. * ² Nge lupwen a tori fansoun kinikin, a tinala eman nöün chon angang ren ekewe chon mälämäl, pwe epwe ange seniir wisan me lon ekewe föün wain. ³ Iwe, ekewe chon mälämäl ra turufi ewe chon angang, ra wichi o tinala fän an asoulapö. ⁴ Mürin ewe mine an ewe tanipin wain a tinala pwal eman nöün chon angang. Iwe, ekewe chon mälämäl ra akinasa möküran o föri ngeni sokun föfö, pwe epwe säw ren. ⁵ Iwe, ewe mine an ewe tanipin wain a tinala pwal eman nöün chon angang, nge ir ra niela. Iei usun ra föri ngeni chomong chon angang, ekoch ra wichi, ekoch ra niela. ⁶ Iwe, a chüen wor eman lusun, iei püsin nöün we a fokun echeni. Amüchülan a tinala nöün we ren ekewe chon mälämäl, pun a üra, ‘Üa lükü, pwe repwe meniniti nei we mwän.’ ⁷ Nge ekewe chon mälämäl ra kapasfengen lefiler, ‘Iei i alemürin, ätei mine an ei tanipi. Oule feito, sipwe niela, pwe sipwe eäni mine an me ren saman.’ ⁸ Iei mine ra turufi nöün we mwän, ra niela o aturawu lükün ewe tanipin wain.”

⁹ Mürin Jesus a ais, “Met ewe mine an ewe tanipin wain epwe föri? Epwe feito o niela ekei chon mälämäl, nge epwe ngeni pwal ekoch chon mälämäl an we tanipin wain. ¹⁰ Oua fen aleani ekei kapas lon ewe Toropwe mi Pin,

‘Ewe fau ekewe chon kau imw ra pöütala, pun resap aücheani
a wiliti ewe föün lepwokuku mi fokun aüchea.

¹¹ Iei än ewe Samol we föfö,
a fokun amwarar me fän mesach.’ ” *

¹² Iwe, ekewe souemwenin Juta ra sotuni ar repwe fötekini Jesus, pun ra silei pwe a afalafala ei pworausen awewe usur. Nge ra niuokusiti ewe mwicheichen aramas, iei mine ra likitala o feila seni.

Kapas ais usun takises

12.13-17

(Mat 22.15-22; Luk 20.20-26)

¹³ Iwe, ra tinala ekoch Farisi me ekoch chiechien Herotes, pwe repwe rawei Jesus lon an kapas. ¹⁴ Iwe, ra feito ren Jesus o üreni, “Sense, äm aia silei pwe ka kapas wenechar, nge kosap ekiaki mine aramas ra eäni ekiak. Kosap nenengeni wisen eman, nge ka afalafala usun letipen Kot fän iten aramas. Kopwe ürenikem ika a pwüng ach sipwe mönätüü ach takises ngeni Sisar ika ese pwüng. ¹⁵ Ifa usun, sipwe takises ika sisap?” Nge Jesus a silei usun ar likatuputup. Iwe, a üreniir, “Pwota oua sotuni le säreei? Oupwe uwato rei eföü moni silifer, pwe üpwe katol.” ¹⁶ Iwe, ra uwato eföü moni ren. Mürin Jesus a aisiniir, “Liosun iö me iten iö ei won ei moni?” Ir ra põlüeni, “Liosun Sisar me itan.” ¹⁷ Mürin Jesus a üreniir,

“Mi pwüng! Oupwe ngeni Sisar mine än Sisar, nge oupwe ngeni Kot mine än Kot.” Iwe, ra fokun mwar ren mine a pölüeniir won.

Kapas ais usun manausefäl

12.18-27

(Mat 22.23-33; Luk 20.27-40)

¹⁸ Mürin ekoch Satusi ra feito ren Jesus, ir chokewe mi apasa pwe aramas resap manausefäl seni mäla. Iwe, ra üreni Jesus, ✱ ¹⁹ “Sense, Moses a makei ei allük fän itach: ‘Are eman mwän a mäla, nge esap wor nöün me won pwülüan, pwiin ei mwän epwe fokun pwülüeni ei fefin, pwe epwe wor nöün fänäsengesin mwirimwirin pwiin we mi mäla.’ ✱ ²⁰ Mi wor füman pwiin. Ewe mwänichi a pwülüeni eman fefin, nge lupwen a mäla, esap wor nöün. ²¹ Mürin ewe aruomanün a pwülüeni ewe fefin, o ätewe a pwal mäla, nge esap wor nöün. Iei usun a pwal fis ngeni ewe aülümanün, ²² pwal ngeni afömanün tori afümanün. Ekewe füman pwipwi ra pwülüeni ewe fefin, ir meinisin ra mäla, nge esap wor nöür. Lesopolan ewe fefin a pwal mäla. ²³ Iwe, lon ewe ränin, lupwen ekewe sotup meinisin repwe manausefäl, iö me leir epwe pwülüeni ewe fefin? Pun ir me füman ra pwülüeni.”

²⁴ Mürin Jesus a pölüeniir, “Ämi oua fokun mwäl! Oua silei pwota? Pun ousap silei makkeen ekewe Toropwe mi Pin ika än Kot manaman. ²⁵ Pun lupwen ekewe sotup repwe manausefäl, resap pwüpwülü, pun repwe wewe ngeni ekewe chon läng. ²⁶ Nge usun manausefälin sotup: Ousamwo aleani lon ewe puken Moses usun ewe iräföföfö mi pulopulen ekkei? Seni lon ewe irä Kot a kapas ngeni Moses, ‘Ngang än Apraham, Isaak me Jakob we Kot.’ ✱ ²⁷ Kot än ekewe mi manau Kot, nge sap än ekewe mi mäla. Ämi oua fokun mwäl.”

Ewe Allük mi lap

12.28-34

(Mat 22.34-40; Luk 10.25-28)

²⁸ Nge a wor eman Sensen Allük ikenan, a rongorong mine ra kapas-fengen won. A rongorong pwe Jesus a ngeni ekewe Satusi pölüenöchun ar kapas ais. Iwe, a feito ren Jesus o aisini, “Meni allük a kon aüchea seni meinisin?” ²⁹ Jesus a pölüeni, “Iei ewe allük a kon aüchea, ‘Kopwe aüseling Israel: Ewe Samol ach Kot i chök ewe Samol mi Lapalap. ³⁰ Kopwe echeni ewe Samol om Kot ren unusen lelukom, ren unusen ngünnum, ren unusen ekiekum pwal ren unusen tufichum.’ ✱ ³¹ Nge iei ewe aruuen allük mi pwal aüchea, ‘Kopwe echeni chon arum usun püsin om echenuk.’ Esap wor eu allük mi aüchea seni ekei ruu allük.” ✱

³² Iwe, ewe Sensen Allük a üreni Jesus, “Mi pwüng, sense, a let mine ka apasa. Ewe Samol, i chök Kot, esap wor eman kot lükün i. ✱ ³³ Iwe, eman aramas epwe echeni Kot ren unusen lelukan, ren unusen ekiekin me unusen tufichin, epwe pwal echeni chon arun usun chök püsin an echeni. A men fokun aüchea än eman epwe aleasochisi ekei ruu allük, lap seni än epwe eäni asor man me sokopaten asor ngeni Kot.” ✱ ³⁴ Iwe, lupwen Jesus a mefi usun an tipachem le pölüeni, a üreni, “Kosap toau seni ewe Mwün Kot.” Mürin chök ei esap chüen wor eman a tongeni ais ngeni Jesus och kapas ais. ✱

✱ 12:18: Föf 23.8 ✱ 12:19: Tut 25.5 ✱ 12:26: Eks 3.6 ✱ 12:30: Tut 6.3-5 ✱ 12:31: Lif 19.18 ✱ 12:32: Tut 4.35 ✱ 12:33: Os 6.6 ✱ 12:34: Luk 10.25-28

Kapas ais usun Kraist

12.35-37

(Mat 22.41-46; Luk 20.41-44)

³⁵ Lupwen Jesus a afalafal lon ewe imwenfel, a aisini ekewe aramas eu kapas ais, “Ifa usun än ekewe Sensen Allük apasa, pwe Kraist epwe eman mwirimwirin Tafit? ³⁶ Nge Ngünmifel a amefi ngeni Tafit pwe epwe apasa:

‘Ewe Samol a kapas ngeni ai Samol: Kopwe mot lepelifichi

tori üpwe anomu chon oputom fän pecheöm.’ ✧ ³⁷ Ika Tafit a püsin aita ngeni Samol, epwe ifa usun än Kraist epwe tongeni eman mwirimwirin Tafit?’ Iwe, ekewe aramas mi chomong ra efich an afalafal.

Jesus a kapas usun än ekewe chon kaiö repwe afäliir ren ekewe Sensen Allük

12.38-40

(Mat 23.1-36; Luk 20.45-47)

³⁸ Iwe, Jesus a afalafaleer o üreniir, “Oupwe afälikemi ren ekewe Sensen Allük ra sani ar fetalfeil fän üfer mi langatam, ra pwal sani än aramas repwe kapong ngeniir fän menin lon ekewe lenien amömö, ³⁹ ra aea ekewe lenien mot än ekewe meilap lon ekewe lenien felikis, pwal ekewe leni fän iten aramas mi iteföüla lon ekewe lenien kametip. ⁴⁰ Ra angemwäli imwen ekewe fefin mi mä pwülüer, mürin ra einga ngeni aramas ar iotek mi langatam. Ätekewe repwe küna apwüng mi fokun chou.”

Än ewe fefin mi mä pwülüan asor

12.41-44

(Luk 21.1-4)

⁴¹ Lupwen Jesus a mot arun ewe lenien asor me lon ewe imwenfel, a nenengeni ekewe aramas mi uwalong ar asor lon ewe lenien asor. Chomong aramas mi pisekisek ra uwalong chomong moni. ⁴² Mürin eman fefin mi wöüngau a mä pwülüan a feito o uwalong ruoföü kükün kapa, aüchean ina epwe ükükün senis eu. ⁴³ Iwe, Jesus a körifengeni nöün kewe chon kaiö o apasa, “Üpwe ürenikemi pwe ei fefin mi wöüngau a mä pwülüan a uwalong chomong asor lon ewe lenien asor lap seni ekewe aramas meinisin. ⁴⁴ Pun ir meinisin ra uwalong somwen wöür, nge neminei seni an wöüngau a uwalong meinisin mine a wor ren, a fangala meinisin mine a manau seni.”

13

Jesus a afalafal usun talan ewe imwenfel

13.1-2

(Mat 24.1-2; Luk 21.5-6)

¹ Iwe, lupwen Jesus a towu seni ewe imwenfel, eman lein nöün kewe chon kaiö a üreni, “Sense, nengeni lingöchün ekewe fau me ekewe imw!” ² Nge Jesus a üreni, “Ka küna ekewe imw mi watte? Esap fokun wor eföü fau epwe chüen nom lon lenian. Ekewe fau meinisin repwe toropasetiu.”

Riaföü me ninni

13.3-13

(Mat 24.3-14; Luk 21.7-19)

³ Lupwen Jesus a mot won ewe chukun Olif pekilan ewe imwenfel, Petrus, James, Johannes me Andru chök ra feila ren. ⁴ Ra kapas ngeni, “Kose mochen ürenikem inet ekei mettoch ka fos usun repwe fis. Kopwe pwäri ngenikem asisilen fisin ekei mettoch meinisin.”

⁵ Iwe, Jesus a üreniir, “Oupwe mamasa, pwe esap wor eman epwe atupukemi. ⁶ Chomong aramas repwe feito fän itei o apasa, ‘Ngang Kraist.’ Iwe, repwe atupu chomong aramas. ⁷ Nge lupwen oupwe rongorong akürangen maun me pworausen maun, ousap niuokus. Ekei mettoch repwe fokun fis, nge esap tori mwo fansoun sopolan. ⁸ Ekewe fanü repwe fiufengen o ekewe mwü repwe maunfengen. Epwe wor chechen fanü me lengita ekis meinisin. Ekei riaföü ra usun chök ekewe metek eman fefin a eäni mwen an epwe nöünöüla.

⁹ Oupwe püsin mamasakemi. Pun repwe fötekinikemi o emwenikemiilong lon kapwüng. Repwe wichikemi lon ar kewe imwen felikis. Oupwe ütä mwen ekewe kepina me king pokitei, pwe oupwe pwärätä ngeniir mine a let. ¹⁰ Nge ewe Pworausen Manau epwe akom tori aramasen fanüfan meinisin. ¹¹ Iwe, lupwen repwe fötekinikemi o emwenikemiilong lon kapwüng, ousap öüreki me mwan mine oupwe apasa. Lon ewe chök otun epwe torikemi mine oupwe apasa, pun sap ämi oupwe kapas, nge ewe Ngünmifel. ✱ ¹² Iwe, pwipwi repwe afangamä pwiir ngeni mäla, eman sam epwe afangamä nöün, nge ekewe nau repwe ü ngeni semer me iner o aturuur, pwe repwe ninnila. ¹³ Aramas meinisin repwe oputakemi pokitei. Nge iö epwe likitü tori lesopolan epwe küna manau. ✱

Ewe mettoch mi eniweniw

13.14-23

(Mat 24.15-28; Luk 21.20-24)

¹⁴ “Ämi oupwe küna ewe ‘Mettoch mi Eniweniw’ a nom lon ewe leni ia esap ürürün epwe nom ie. (Ewe chon aleani epwe fokun weweiti met wewen ei!) Mürin chokewe mi nom lon Jutea repwe sütä won ekewe chuk. ✱ ¹⁵ Eman aramas mi nom won inwan, esap wor an fansoun an epwe tötiu o tolong lon inwan pwe epwe angei och. ¹⁶ Nge eman mi nom lemäl, esap liwiniti inwan an epwe angei üfan sekit. ¹⁷ Riaföün ekewe fefin mi pwopwo me ekewe inelap mi oupwu nöür lon ekana rän. ¹⁸ Oupwe iotek pwe ei sokun riaföü esap fis lon fansoun patapat. ¹⁹ Pun riaföün lon ekana rän epwe fen lap seni ekewe riaföü mi fen fis seni lepoputän, lupwen Kot a föri fanüfan tori ikenai, esap pwal fissefäl ena sokun lon ekewe fansoun repwe feito. ✱ ²⁰ Nge are ach Samol esap amochomocha ekewe rän, esap wor eman aramas epwe manau. Nge pokiten chokewe a filiiretä a amochomochala ekewe fansoun riaföü.

²¹ Lon ena fansoun are eman epwe apasa ngenikemi, ‘Nengeni, iei i Kraist,’ ika ‘Nengeni, a nom ikenan,’ ousap lükü i. ²² Pun kraist chofona me soufos chofona repwe war o föri asisil me manaman, pwe repwe atupu ekewe chon fil are repwe tongeni. ²³ Iei mine oupwe mamasa. Ngang üa pwäri ngenikemi ekei mettoch meinisin mwen ar repwe fis.

Liwinsefäliton Nöün Aramas

13.24-27

(Mat 24.29-31; Luk 21.25-28)

✱ **13:11:** Mat 10.17-20; Luk 12.11-12 ✱ **13:13:** Mat 10.22 ✱ **13:14:** Tan 9.27; 11.31; 12.11

✱ **13:19:** Tan 12.1; Pwär 7.14

²⁴ “Lon ekanä rän, mürin ewe fansoun riaföü, akkar epwe rochola, maram esap chüen tittin, ✧ ²⁵ ekewe fü repwe turutiu me läng, nge ekewe manamanen läng repwe mwöküt seni lenier. ✧ ²⁶ Lon ena fansoun aramas repwe küna Nöün Aramas epwe feito won kuchu ren manaman me ling mi lapalap. ✧ ²⁷ Mürin epwe tinala ekewe chon läng lepelien fanüfan me rüanü, pwe repwe achufengeni nöün kewe chon fil seni lesopun fanüfan tori lesopun.

Kapasen kait seni ewe irä fiik

13.28-31

(Mat 24.32-35; Luk 21.29-33)

²⁸ Oupwe kaiö eu lessen seni ewe irä fiik. Lupwen palan kana ra anüen fetil o popuetä le pwüküwu chöön, oupwe silei pwe a arap fansoun räs. ²⁹ Iei usun lupwen oupwe küna pwe ekei mettoch repwe fis, oupwe silei pwe ewe fansoun a arapoto o molotä ngeni ar repwe pwönüetä. ³⁰ Enlet, üpwe ürenikemi, pwe ei pilon aramas resap mäla, tori an epwe fisitä ekei mettoch meinisin. ³¹ Läng me fanüfan repwe morola, nge ai kapas kana resap fokun morola.

Esap wor eman a silei ewe rän are ewe kulok

13.32-37

(Mat 24.36-44)

³² “Esap wor eman a silei ewe rän are ewe kulok ekei mettoch repwe fis lon, ekewe mwo chon läng, ika ewe Nöün Kot resap pwal silei, pwe ewe Sam chök. ✧ ³³ Oupwe mamasa o afälikemi, pun ousap silei inet ewe fansoun epwe war lon. ³⁴ Epwe usun chök eman mwän a saila toau, nge a likitala nöün chon angang pwe repwe tümwünü meinisin mine a eäni. A awisa ngeni eman me eman an angang o allük ngeni ewe chon mamasa ewe asamalap, pwe epwe mamas. ✧ ³⁵ Iei mine oupwe mamasa, pun ousap silei inet samolun ewe imw epwe war, are epwe war lekuniol, are lukenipwin, are wünümweerän, are lesosor. ³⁶ Are epwe müttir feito, esap öch an epwe künok lon om möür. ³⁷ Mine üa ürenikemi, üa üreni aramas meinisin: Oupwe mamasa.”

14

Ra rawei Jesus

14.1-2

(Mat 26.1-5; Luk 22.1-2; Joh 11.45-53)

¹ Iei a chök ruu rän mwen ewe ränin Pasofer me ewe chulapen mongö pilawa esap wor iis lon. Iwe, ekewe souasor mi lap me ekewe Sensen Allük ra ekieki usun eu alen ar repwe turufi Jesus le monomon, pwe repwe niela. ✧ ² Ra apasa, “Esap tufich ach sipwe föri ei raw fansoun ei chulap, pwe ekewe aramas resap afitikoko.”

Jesus a kepit me lon Petania

14.3-9

(Mat 26.6-13; Joh 12.1-8)

³ Iwe, Jesus a nom lon Petania lon imwen Simon, eman mwän mi üri rupun pwötür me mwan. Lupwen Jesus a mongö ren, eman fefin a tolong ren fän eu lö mi fokun pwokus o mömong mi för seni ewe irä nart, a

✧ **13:24:** Ais 13.10; Sow 2.10,31; 3.15; Pwär 6.12; Is 32.7 ✧ **13:25:** Ais 34.4; Pwär 6.13; Sow 2.10 ✧ **13:26:** Tan 7.13; Pwär 1.6 ✧ **13:32:** Mat 24.36 ✧ **13:34:** Luk 12.36-38 ✧ **14:1:** Eks 12.1-8

nom lon eu rume seni ewe fau itan alapaster. Neminei a amökkü ei rume o ninätü ewe lö won möküren Jesus. ✧ ⁴Iwe, ekoch me lein ekewe aramas mi nom rer ra wowongau o kapasfengen lefiler, “Pwota a asolapala ei lö? ⁵Pun eman a tongeni amömöla won lap seni ükükün ülüpükü föün moni sillifer o fangala ewe moni ngeni ekewe chon wöüngau.” Iwe, ra fokun apwüngü ei fefin. ⁶Nge Jesus a üreniir, “Oupwe likitala neminei. Pwota oua osukosuka? A föri ngeniei eu föföör mi fokun mürina. ⁷Pun ekewe chon wöüngau repwe nom remi fansoun meinisin, oua tongeni alisiir iteiten fansoun oua mochen. Nge ngang üsap nonomfochofoch remi. ✧ ⁸Neminei a föri ükükün met a tongeni. A ninätä ewe lö woi pwe epwe amolaei ngeni ai üpwe tolong lon peias. ⁹Enlet, üpwe ürenikemi: Ekis meinisin won unusen fanüfan ia aramas repwe afalafalafeil ie ewe Pworausen Manau, ikenan aramas repwe pwal apworaus mine neminei a föri pwe achechemen itan.”

Jutas a tipeeu ngeni an epwe afangamä Jesus

14.10-11

(Mat 26.14-16; Luk 22.3-6)

¹⁰Mürin Jutas Iskariot, eman me lein ekewe engol me ruoman chon kaiö, a feila ren ekewe souasor mi lap fän iten an epwe afangamä ngeniir Jesus. ¹¹Iwe, lupwen ar rongorong mine a üreniir, ra pwapwa o pwon ngeni pwe repwe ngeni moni. Iei mine Jutas a kütta eu fansoun mi fich pwe epwe tongeni atolonga Jesus lepöör.

Jesus me nöün kewe chon kaiö ra mongö ewe mongön Pasofer

14.12-21

(Mat 26.17-25; Luk 22.7-14,21-23; Joh 13.21-30)

¹²Iwe, lon aeuin ränin ewe chulapen mongö pilawa esap wor iis lon, ewe rän ra niela ekewe lam fän iten ewe mongön Pasofer, nöün Jesus kewe chon kaiö ra aisini, “Ia ka mochen sipwe feila ie o amolätä fän itom ewe mongön Pasofer?” ¹³Mürin Jesus a tinala ruoman me lein nöün kewe chon kaiö o ööröürer, “Oupwe feila lon ewe telinimw. Ikenan oupwe churi eman mwän mi mwärei eu rume a wor koluk lon. Oupwe tapwela mürin ¹⁴tori ewe imw a tolong lon. Iwe, oupwe üreni mine imwan ewe, ‘Nöüm sense a apasa: Ia a nom ie ewe ruum äm me nei kewe chon kaiö aipwe mongö ewe mongön Pasofer?’ ¹⁵Mürin epwe aiti ngenikemi eu ruum mi watte a nom asan, a molotä pisekin lon. Iwe, ikenan oupwe amolätä ewe mongö fän itach.”

¹⁶Iwe, ekewe chon kaiö ra feila, ra tolong lon ewe telinimw o küna meinisin usun mine Jesus a fen üreniir. Iwe, ra amolätä ewe mongön Pasofer. ¹⁷Iwe, lupwen a tori lekuniol, Jesus me nöün kewe engol me ruoman chon kaiö ra wareiti ewe leni. ¹⁸Lupwen ar mot ngeni chepel o mongö, Jesus a apasa, “Enlet, üpwe ürenikemi, eman me leimi epwe afangamäei, eman mi etiei le mongö.” ✧ ¹⁹Iwe, ekewe chon kaiö ra lolilen ren ekei kapas o popuetä le ais ngeni Jesus eman mürin eman, “Ifa usun, esap fen ngang ena.” ²⁰Jesus a pölüeni, “Epwe eman me leimi ekei engol me ruoman, äte we mi etiei le otukalong anen we pilawa lon ewe sepi. ²¹Nöün Aramas epwe mäla usun a fen mak lon ekewe Toropwe mi Pin. Nge feiengauen äte we mi afangamä Nöün Aramas. Epwe fen öch ngeni ei mwän are esap uputiü.”

Ewe mongön ach Samol

14.22-26

(Mat 26.26-30; Luk 22.14-20; 1.Kor 11.23-25)

²² Iwe, lupwen ar mongöfengen, Jesus a angei pilawa, a iotekin kilisou won o a kinikisietiu. A ineti ngeni nöün kewe chon kaiö o apasa, “Oupwe angei, iei inisi.” ²³ Mürin a angei eu kap, a iotekin kilisou ngeni Kot won o ngeni eman me eman leir. Iwe, ir meinisin ra ün seni. ²⁴ Jesus a apasa, “Tei chai mi ninnila fänäsengesi chomong aramas, ei cha a anükünükü än Kot pwon ngenikich. ✧ ²⁵ Enlet üpwe ürenikemi, pwe üsap chüen ünümi seni ei wain tori ewe rän lupwen üpwe ünümi ewe wain mi fö lon Mwün Kot.” ²⁶ Mürin ar eäni echö kölün kilisou ra towu seni ewe imw o feila ngeni ewe Chukun Olif.

Jesus a osuni pwe Petrus epwe amam i

14.27-31

(Mat 26.31-35; Luk 22.31-34; Joh 13.36-38)

²⁷ Iwe, Jesus a üreni nöün kewe chon kaiö, “Ämi meinisin oupwe sü seniei o likitieila, pun a mak lon ekewe Toropwe mi Pin, ‘Kot epwe niela ewe chon mas, nge ekewe sip repwe toropasfeil.’ ✧ ²⁸ Nge mürin ai manausefälitä, üpwe akomwola mwemi Kalilea.” ✧

²⁹ Iwe, Petrus a üreni Jesus, “Ikamwo ir meinisin repwe likitukela, ngang üsap fokun likituk.” ³⁰ Jesus a üreni Petrus, “Enlet, üpwe ürenuk, lepwin ei mwen ewe chuko epwe kö fan ruu, en kopwe amamäsiniei fän ülüngat.” ³¹ Nge Petrus a pölüeni fän pöchökül, “Are üpwe fen etuk le mäla, üsap fokun amamäsinuk.” Pwal ekewe chon kaiö meinisin ra apasa ei ititin fos.

Jesus a iotek lon Ketsemane

14.32-42

(Mat 26.36-46; Luk 22.39-46)

³² Iwe, ra feila ngeni ewe leni itan Ketsemane. Iwe, Jesus a üreni nöün kewe chon kaiö, “Oupwe nom ikei, nge ngang üpwe feila ekis o iotek.”

³³ Iwe, a aweinala Petrus, James me Johannes, pwe repwe fiti. Mürin a popuetä le letipeta o riaföü. ³⁴ Iwe, a üreniir, “Riaföün letipei a fokun wattela, pwe üa arap ngeni ai üpwe mäla. Oupwe nonom ikei o mamasa.”

³⁵ Mürin Jesus a feila ekis, a chapetiu le pwül o iotek, pwe ika epwe tufich ei fansoun riaföü epwe feil seni. ³⁶ Iwe, a iotek, “Semei, semei! Mettoch meinisin ra tufich ngonuk. Kose mochen kopwe angei seniei ei kapen riaföü. Nge esap letipei epwe fis, pwe letipom.”

³⁷ Mürin Jesus a liwiniti ekewe ülüman chon kaiö, nge a küneer, pwe ra möür. Iwe, a üreni Petrus, “Simon, ka annut. Kosap tongeni mamasa lon eu chök kulok? ³⁸ Oupwe mamasa o iotek, pwe ousap turutiu lon sosot. Ewe ngün a mochen pwora, nge ewe fituk a apwangapwang.”

³⁹ Iwe, Jesus a pwal liwinsefälila o iotek lon ewe chök ititin fos a eäni me mwan. ⁴⁰ Mürin a liwinsefäliti ekewe chon kaiö, nge a pwal küneer, pwe ra möür, pun ra fokun chouchou. Iwe, resap silei mine repwe üreni Jesus.

⁴¹ Iwe, lupwen Jesus a liwinsefälitiir fan aülüngatin, a üreniir, “Ifa usun, oua chüen annut o asösö? A naf! A tori ewe otun. Nengeni Nöün Aramas epwe oolong lepöün chon tipis. ⁴² Ou pwätä, ousipwe feila. Nengeni, iei i ewe mwän epwe afangamäei.”

Ra fötekini Jesus

14.43-52

(Mat 26.47-56; Luk 22.47-53; Joh 18.3-12)

⁴³ Iwe, lupwen Jesus a chüen kapas, Jutas, eman ekewe engol me ruoman chon kaiö, a war. Eu mwichen aramas mi chomong ra eti fän nöür ketilas me wokur wok. Ir ätekewe ekewe souasor mi lap, ekewe Sensen Allük me ekewe souakom ra ökünöör. ⁴⁴ Ätewe mi afangamä a ngeniir eu asisil o a üreniir, “Ätewe ngang üpwe mitiri, ina i ewe mwän. Oupwe turufi o etekinala, nge oupwe mamasaöchü.”

⁴⁵ Lupwen Jutas a war, a müttir feiliti Jesus o üreni, “Sense”, a pwal mitiri. ⁴⁶ Iei mine ekewe aramas ra turufi Jesus o fötekini. ⁴⁷ Nge eman me lein ätekewe mi ü arun a weitawu nöün ketilas o pöküela eu selingen nöün ewe Souasor mi Lap chon angang. ⁴⁸ Mürin Jesus a üreniir, “Ifa usun, ngang eman chon afitikoko, pwe oua feito fän nöümi ketilas me wokumi wok, pwe oupwe turufiei? ⁴⁹ Iteiten rän üa nom remi o afalafal lon imwenfel, nge ämi ousap fötekiniei. Nge iei kapasen ekewe Toropwe mi Pin epwe pwönüetä.” ✧ ⁵⁰ Iwe, ekewe chon kaiö meinisin ra likitala Jesus o süla.

⁵¹ Eman alüal a tapwela mürin Jesus, esap üföüf och, nge a chök finiti ngeni echö chenikam. Iwe, lupwen ar turufi, ⁵² a süla fan an selela, nge a likitala ngeniir chenikaman.

Jesus a ü me mwen ewe mwichen soupwüing

14.53-65

(Mat 26.57-68; Luk 22.54-55,63-71; Joh 18.13-14,19-24)

⁵³ Mürin ra etekinala Jesus lon imwen ewe Souasor mi Lap. Ikenan ekewe souasor mi lap meinisin, ekewe souakom me ekewe Sensen Allük ra mwichfengen ie. ⁵⁴ Iwe, Petrus a tapwela mürin Jesus me toau o tolong lon ewe leni lükün imwen ewe Souasor mi Lap. Ikenan a mot ren ekewe chon mas o apwichikara ren ewe ekkei. ⁵⁵ Iwe, ekewe souasor mi lap me unusen ewe mwichen soupwüing ra kütta mine repwe tip ngeni Jesus, pwe repwe atipisi ngeni mäla. Nge resap küna och tipis ren. ⁵⁶ Chomong chon pwärätä ra chofonatä mine ra tip ngeni, nge ar kapasen tipetipmwäl ngeni esap wewefengen. ⁵⁷ Ekoch ra ütä o apasätä ar kapasen tipitipmwäl ngeni, o ra apasa, ⁵⁸ “Äm aia rongorong an apasa, ‘Ngang üpwe atai ei imwenfel mi för ren pöün aramas, nge lon ükükün ülungat rän üpwe aüsefälietä pwal eu esap förien pöün aramas.’” ✧ ⁵⁹ Iei wo met ra apasa, nge ar kapasen pwärätä esap wewefengen.

⁶⁰ Mürin ewe Souasor mi Lap a ütä me mwer meinisin o aisini Jesus, “Ifa usun, esap wor om kapasen pölüeni ngeni ekei kapasen atatur ekei mwän ra aturuk won?” ⁶¹ Iwe, Jesus a chök fanafanala, nge esap pölüeni och. Ewe Souasor mi Lap a pwal aissefäl ngeni, “Ifa usun, en ewe Kraist, Nöün ewe Kot aramas ra mwareiti?” ⁶² Jesus a pölüeni, “Ewer, ngang ätewe. Ämi oupwe küna Nöün Aramas epwe mot lepelifichin ewe mi Unusen Manaman, epwe feito won ekewe kuchun läng.” ✧ ⁶³ Iwe, ewe Souasor mi Lap a kamwei üfan o apasa, “Pwota sipwe chüen mochen angei kapasen atatur? ⁶⁴ Oua püsin rongorong an kapasen turunufas. Met oua ekieki usun?” Iwe, ir meinisin ra apwüngala fän itan pwe a tipisin mäla. ✧ ⁶⁵ Mürin ekoch me leir ra popuetä le atufa, ra pwölüela

won mesan o öfönü. Iwe, ra üra, “Kopwe pwäri ngenikem iö a öfönuk.” Nge ekewe chon mas ra etekinala o wichi.

Petrus a amamasini Jesus

14.66-72

(*Mat 26.69-75; Luk 22.56-62; Joh 18.15-18,25-27*)

⁶⁶ Iwe, lupwen Petrus a nom lon ewe leni lükün imwen ewe Souasor mi Lap, eman föpwül, nöün ewe Souasor mi Lap chon angang, a feito ren. ⁶⁷ Iwe, a küna Petrus pwe a apwichikara inisin, iwe, a newenewen ngeni o apasa, “En pwal eman mi eti Jesus seni Nasaret.” ⁶⁸ Nge Petrus a amam o apasa, “Üsap silei are weweiti mine ka kapas usun.” Mürin a feiliwu lon ewe al ngeni ewe asamalap. ⁶⁹ Iwe, ewe föpwül a künasefäli Petrus me ikenan o apasasefäli ngeni chokewe mi ü arun, “Ei mwän eman nöün Jesus kewe chon kaiö.” ⁷⁰ Nge Petrus a amamsefäl. Ekis chök fansoun mürin, chokewe mi üfeil arun ra pwal üreni Petrus, “Enlet, en eman ekewe chon kaiö, pun en pwal eman re Kalilea.” ⁷¹ Nge Petrus a popuetä le püsin otteki inisin o akapel ngeniir, “Üsap silei ei mwän oua kapas usun.” ⁷² Lon ewe chök otun ewe chuko a kökkö fan aruan. Mürin Petrus a chechemeni ekewe kapas Jesus a apasa ngeni, “Mwen än ewe chuko epwe kökkö fan aruan, en kopwe amamasinie fan ülüngat.” Iwe, a ekilolilen o kechü.

15

Ra etekinala Jesus mwen Pilatus

15.1-5

(*Mat 27.1-2,11-14; Luk 23.1-5; Joh 18.28-38*)

¹ Iwe, lupwen a ränila, ekewe souasor mi lap ra mwichfengen me ekewe souakom, ekewe Sensen Allük me unusen ewe mwichen soupwüng, pwe repwe pwüngüpwüngfengen won met repwe föri. Ra föti Jesus o etekinala ren Pilatus, pwe epwe apwüngü. ² Iwe, Pilatus a aisini Jesus, “Ifa usun, en nöün chon Juta we king?” Jesus a pölüeni, “Ewer, usun om apasa.” ³ Iwe, ekewe souasor mi lap ra atipisi Jesus won chomong mettoch. ⁴ Iei mine Pilatus a pwal kapas ais ngeni Jesus, “Ifa usun, esap wor om kapasen pölüen? Nengeni, chomongun ekewe mettoch ra atipisuk won.” ⁵ Nge Jesus esap chüen pölüeni och. Iei mine Pilatus a mairü.

A pwüngüla pwe Jesus epwe mäla

15.6-15

(*Mat 27.15-26; Luk 23.13-25; Joh 18.39-19.16*)

⁶ Iteiten ier, lupwen a tori ewe mongön Pasofer, Pilatus a soun amusala eman chon fötek, iö ekewe aramas ra tüngor. ⁷ Iwe, a wor eman mwän lon imwen fötek itan Parapas, i eman me lein ekewe chon afitikoko mi niela aramas. ⁸ Iwe, lupwen ewe mwichen aramas ra chufengen, ra tüngor ngeni Pilatus pwe epwe föri usun mine a piin föföri fän iter. ⁹ Nge Pilatus a aisiniir, “Ifa usun, oua mochen pwe üpwe amusa ngenikemi ewe kingen chon Juta?” ¹⁰ Pun Pilatus a mefi, pwe ekewe souasor mi lap ra etekinala Jesus pwe epwe kapwüng pokiten ar lolowo.

¹¹ Nge ekewe souasor mi lap ra pese ngeni ewe mwichen aramas pwe repwe tüngor Pilatus, pwe epwe amusa ngeniir Parapas, nge sap Jesus. ¹² Iwe, Pilatus a aissefäl ngeniir, “Nge met üpwe föri ngeni ätewe oua aita ngeni kingen chon Juta?” ¹³ Ra kökkö fän leüömong, “Kopwe iräpengesi!” ¹⁴ Pilatus a pwal aisiniir, “Pwota? Met sokun föföri mi ngau a föri?” Nge

ir ra chök alapala ar kökkö, “Kopwe iräpengesi!” ¹⁵ Iei mine Pilatus a apwönüetä mochenin ewe mwichen aramas o amusa ngeniir Parapas. Iwe, a üreniir, pwe repwe wichi Jesus o etekinala, pwe epwe iräpenges.

Ekewe sounfiu ra turunufasei Jesus

15.16-20

(Mat 27.27-31; Joh 19.2-3)

¹⁶ Iwe, ekewe sounfiu ra etekinalong Jesus lon ewe leni lükün ewe imwen kepina o körifengeni unusen ar we mwichen sounfiu. ¹⁷ Ra aüfa ngeni echö üf mi parachol, mürin ra fittiifengeni palen iräföföföfö o isetä won möküren Jesus pwe mwärin. ¹⁸ Mürin ra popuetä le kapong ngeni, “Kopwe manauatam, en Kingen chon Juta!” ¹⁹ Ra wichi möküran ngeni efoch wok o atufa, ra fotopwäsuk mwan o pomwen fel ngeni. ²⁰ Lupwen ra wes le turunufasei, ra pwiliti seni ewe üf mi parachol o aüfa ngeni püsin üfan kewe. Mürin ra etekinala pwe epwe iräpenges.

Jesus a iräpenges

15.21-32

(Mat 27.32-44; Luk 23.26-43; Joh 19.17-27)

²¹ Iwe, lupwen ar feila won ewe al, ra churi eman mwän itan Simon seni Kirene, a feito seni lemäl pwe epwe tolong lon ewe telinimw. Ekewe sounfiu ra echimwa ngeni an epwe mwärei än Jesus iräpenges. Simon semen Aleksanter me Rufus. ✱ ²² Iwe, ra emwenala Jesus lon ewe leni itan Kolkota, wewen “Lenien Pösökün Mökür.” ²³ Ikenan ra sotuni le aünü ngeni Jesus wain mi noftfengen me och säfei itan mör, nge esap mochen ünümi. ²⁴ Mürin ra iräpengesi Jesus. Ra üttüt won üfan kewe o ngeni eman me eman leir met üttian. ✱

²⁵ Iwe, kulok tiu lesosor ra iräpengesi Jesus. ²⁶ Iwe, iei makkeen mine ra tip ngeni: “Ewe Kingen chon Juta.” ²⁷ Ra pwal iräpengesi ruoman chon solä arun Jesus, eman a nom lepelifichin, nge eman lepelimöngun. ²⁸ [Iwe, a pwönüetä mine a mak lon ekewe Toropwe mi Pin, “A alealong lein ekewe chon pupungau.”] ✱

²⁹ Iwe, ekewe aramas mi pwere seni ra turunufasei Jesus, ra alifechifech ngeni o apasa, “Aa! En ewe ka ekiekin atai ewe imwenfel o aüsefälietä lon ükükün ülüngat rän. ³⁰ Kopwe tötiu seni ewe iräpenges o püsin amanauok.”

³¹ Pwal ekewe souasor mi lap me ekewe Sensen Allük ra takirin ämängaua Jesus o kapasfengen lefiler, “A amanaua ekoç, nge esap tongeni püsin amanaua. ³² Iei i ewe a apasa pwe i Kraist, ewe Kingen Israel, epwe tötiu seni ewe iräpenges iei chök, pwe aipwe küna o lükü.” Pwal ätekewe mi eti Jesus le iräpenges ra eäni kapasen turunufas ngeni.

Jesus a mäla

15.33-41

(Mat 27.45-56; Luk 23.44-49; Joh 19.28-30)

³³ Lupwen a tori leoloasen ewe rän, unusen ewe fanü a rochopwak lon ükükün ülüngat kulok. ³⁴ Iwe, kulok ülüngat Jesus a kökkö fän mwelian mi leüömong, “Eloi, Eloi, lama sapaktani!” wewen “Ai Kot, ai Kot, pwota ka likitieila?” ✱ ³⁵ Lupwen ekoç kewe aramas mi ü arun ra rong ekei kapas, ra apasa, “Ou rongorong, a köri Elias.” ³⁶ Eman me leir a säto ren fän eu farawa, a otukalong lon wain mi mwäl o pachetä lesopun efoch

iich. Mürin a pöüetä ewe iich ngeni awen Jesus o üra, “Sipwe witiwit, sipwe pii ika Elias epwe feito o uwätü me won ewe iräpenges.” ✧ ³⁷ Iwe, Jesus a leüömong le puchör, mürin a mäla.

³⁸ Iwe, ewe chechen mangaku lon imwenfel a kam seni won tori fan, pwe a wor ruu kinikin. ✧ ³⁹ Lupwen ewe meilapen sounfiu mi ü mwen ewe iräpenges a rong o küna usun än Jesus mäla, a apasa, “Enlet, ei mwän wesewesen Nöün Kot.”

⁴⁰ Iwe, mi pwal wor fefin ikenan mi aköürü me toau, me lein ekei fefin Maria Maktalene, Maria inen James ewe kükün me Josef pwal Salome. ⁴¹ Ekei fefin ra tapwela mürin Jesus lupwen a nom lon Kalilea o ra tümwünü ngeni met a eäni osupwang. Pwal chomong fefin mi etätä Jesus Jerusalem ra nom ikenan.

Jesus a peias

15.42-47

(Mat 27.57-61; Luk 23.50-56; Joh 19.38-42)

⁴² Iei ewe räninamol, wewen, ewe rän mwen ewe ränin sapat. Iwe, lekuniolun ei rän ⁴³ Josef seni Arimatea, i eman me lein ewe mwichen soupwüng mi iteföüla, a pwal ösüküsükü waren ewe Mwün Kot, a feito ren Pilatus fän pöchökülen letipan o tüngor somän Jesus. ⁴⁴ Nge Pilatus a weitifengeni lupwen an rong pwe Jesus a fen mäla. A titi ewe meilapen sounfiu o aisini are Jesus a fen mäla. ⁴⁵ Iwe, lupwen a rong seni ewe meilapen sounfiu pwe Jesus a fen mäla, a mwütätä somän ngeni Josef. ⁴⁶ Iwe, Josef a fen möni echö mangaku mi pwechepwech o mürina. A angeatiu ewe somä seni won ewe iräpenges, a finiti ngeni ewe mangaku mi pwechepwech o peiaseni lon eu peias mi för lon achau. Mürin a asokopanato eföü fau mi watte o pine ngeni mesen ewe peias. ⁴⁷ Iwe, Maria Maktalene me Maria inen Josef ra küna ia ra peiaseni ie somän Jesus we.

16

Jesus a manausefäl

16.1-8

(Mat 28.1-8; Luk 24.1-12; Joh 20.1-10)

¹ Wesin ewe ränin sapat Maria Maktalene, Maria inen James me Salome ra kamö lö pwokus, pwe repwe feila o epiti somän Jesus we. ² Iwe, lesosorusichin ewe aeuin ränin wiik, lupwen akkar a tötä, ra feila ren ewe peias. ³ Iwe, ra kapasfengen lefiler, “Iö epwe pünüüw ngeni kich ewe fau seni mesen ewe peias?” ⁴ Nge lupwen ar neneloi ewe peias, ra küna pwe ewe fau mi fokun watte a fen mwöküt seni mesen ewe peias. ⁵ Iwe, lupwen ar tolong lon ewe peias, ra küna eman alüal mi üföüf echö üf mi pwechepwech, a mot lepelifichin ewe peias me epek. Iwe, ra fokun rükö. ⁶ Ewe alüal a üreniir, “Ousap rükö, üa silei pwe oua kütta Jesus ewe re Nasaret, ewe mi iräpenges. Esap nom ikei, pwe a manausefälitä. Oupwe katol ewe leni ia ra peiaseni ie. ⁷ Iei oupwele feila o üreni nöün kewe chon kaiö pwal Petrus, pwe epwe akomwola mwer Kalilea. Ikenan repwe küna i, usun a fen üreniir.” ✧

⁸ Iwe, ekewe fefin ra towu seni ewe peias o süla fän ar chechek me rükö. Nge resap apasa och ngeni eman, pun ra niuokus. *

✧ 15:36: Kölf 69.2 ✧ 15:38: Eks 26.31-33 ✧ 16:7: Mat 26.32; Mark 14.28 ✧ 16:8: Lon ekoch Toropwe mi Pin minen lomlom iei sopolan ewe Pworausen Manau makkeen Markus.

Jesus a pwä ngeni Maria Maktalene

16.9-11

(Mat 28.9-10; Joh 20.11-18)

⁹ †[Mürin än Jesus manausefäl, lesosorusichin aeuin ränin wiik, a akomwen pwä ngeni Maria Maktalene, i neminewe Jesus a atowu ekewe fūman anūn ro chopwak seni. ¹⁰ Iei mine a feila o asile ngeni chiechian kewe mi letipeta o kechū usun mine a kūna. ¹¹ Nge lupwen ar rongorong pwe Jesus a manau o neminewe a kūna, resap lükü i.

Jesus a pwä ngeni ruoman chon kaiö

16.12-13

(Luk 24.13-35)

¹² Mürin ei, Jesus a pwä lon pwal eu sokun lapalap ngeni ruoman me lein ekewe chon kaiö, lupwen ra fetal lemälen ewe fanü. ¹³ Ekei ruoman ra liwiniti ekewe ekoch chon kaiö o apworausa ngeniir usun mine ra kūna. Nge ir resap lüküür.

Jesus a pwä ngeni ekewe engol me eman chon kaiö

16.14-18

(Mat 28.16-20; Luk 24.36-49; Joh 20.19-23; Föf 1.6-8)

¹⁴ Mürilan meinsin Jesus a pwä ngeni ekewe engol me eman chon kaiö lupwen ra mongöfengen. Iwe, a fönöör pokiten esap wor ar lükülük, ra pwal tipeförea, pun resap lükü alon chokewe ra kūna pwe Jesus a manausefäl. ¹⁵ Iwe, a üreniir, “Oupwe feila lon unusen fanüfan o afalafala ewe Pworausen Manau ngeni aramas meinsin. ✱ ¹⁶ Iö a lükülük o papatais epwe kūna manau, nge iö esap lükülük epwe angei liwinin an tipis. ✱ ¹⁷ Iwe, chokewe mi lükülük repwe angei tufich pwe repwe föri ekei manaman: Repwe asüela anūn ro chopwak fän itei, repwe fos lon kapasen ekis. ¹⁸ Are repwe amwöchü serepenit ika ünümi poison, resap feiengau ren. Repwe pwal iseis pöün won chon samau, iwe, repwe pöchökületä.”

Jesus a feitä läng

16.19-20

(Luk 24.50-53; Föf 1.9-11)

¹⁹ Mürin än Jesus fos ngeni nöün kewe chon kaiö a feitä läng o mottiu lepelifichin Kot. ²⁰ Iwe, ekewe chon kaiö ra feila o afalafal ekis meinsin. Nge ewe Samol a etiir lon ar angang o anüküchara ar afalafal pwe a let ren ekewe manaman ra föri.]

† **16:9:** Pwal eu kapasen sopolan minen lomlom 9 [Iwe, ekewe fefin ra feila ren Petrus me chiechian kewe o apworausa ngeniir lon kapas mochomoch meinsin mine ewe alüal a fen kapas ngeniir usun. 10 Mürin ei, püsin Jesus a nöünöü nöün kewe chon kaiö pwe repwe arongafeili seni ötiu tori lotou fisilan ewe kapas mi pin, iei ewe Porausen Manau esemüch.] ✱ **16:15:** Föf 1.8
 ✱ **16:16:** Föf 1.9-11

Ewe Pworausen Manau makkeen Lukas

Kapas akom

I. Iten ei puk: Lukas, wewen ei it “Ewe eman mi saram”.

II. Chon makkei ei puk: Lukas, ewe sousafei.

III. Itelapemongen ei puk: Allükülükün pworausen manauen Jesus me ren ekewe chon eti.

IV. Kapas aüchean ei puk: Kot a ümöömöch ngeni aramas meinisin.

V. Masouen ei puk: Ei puk a afata pwe Jesus ewe Chon Amanau, Kot a pwon ngeni chon Israel, pwal i ewe Chon Amanau fän iten aramas meinisin. Lukas a pwärätä, pwe Jesus a kö ren Ngümmifel pwe epwe afalafala ewe Pworausen Manau ngeni ekewe chon wöüngau. Iei popun ei Pworausen Manau a pwärätä än Jesus tongei aramas mi nom lon sokopaten osupwang meinisin. Nge masouen ei puk a pwal pwärätä usun än aramas pwapwa, akaeuin lepoputän ei puk a apworaus usun än Jesus uputiu, pwal lesopolan lupwen Jesus a feitä läng. Ewe pworaus usun mämärilan me chöülan ewe mwichen chon lükülük me mürin än Jesus feitä läng Lukas a makkei lon ewe puken Föför.

A wor chomong pworaus lon ekewe kinikin 2 me 6 (usun a fen afat me fan) ra chök mak lon ei puk: Ewe pworaus usun än ekewe chon läng köl, usun än ekewe chon masen sip churi Jesus lupwen a uputiu, usun än Jesus nom lon ewe imwenfel leätin, pwal ekewe pworausen aweve usun ewe re Samaria me ewe Nau mi mwalechela. Lon unusen ei puk Lukas a tichikietiu usun aüchean iotek, ewe Ngümmifel, än ekewe fefin angang ngeni Jesus me än Kot amusala än aramas tipis.

VI Tettelin masouen ei puk:

Kapas akom 1.1-4

Än Johannes Soupapatais uputiu me än Jesus uputiu pwal lekükünüür
1.5–2.52

Än Johannes Soupapatais angang 3.1-20

Än Jesus papatais me an tolong lon sosot 3.21–4.13

Än Jesus angang lon Kalilea 4.14–9.50

Än Jesus sai seni Kalilea tori Jerusalem 9.51–19.27

Ewe amüchülan wiken än Jesus manau won fanüfan, lupwen an nom
lon Jerusalem me an nom lon ekewe leni mi arap 19.28–23.56

Än Jesus manausefäl, an pwä ngeni aramas me an feitä läng 24.1-53

Kapas akom

1.1-4

¹ Achengicheng en olowe Teofilus: Chomong aramas ra achocho le makkei pworausen ekewe mettoch mi fisitä lefilach. ² Ra makkeetiu usun met sia rongorong seni chokewe mi wesewesen küna ekei mettoch seni lepoputän o usun ar arongafeili ewe Pworausen Manau. ³ Pokiten ngang won inisi üa küttafichi mettoch meinisin seni lepoputän, iei mine a mürina ngeniei ai üpwe makkei pworauser lon kokotöchün fänäsengesum, en ämäfen Teofilus. ⁴ Üa föri ei, pwe kopwe silei allükülükün leten ekei mettoch ra fen aiti ngonuk.

*Ewe chon läng Kapriel a aronga än Johannes Soupapatais epwe uputiu
1.5-25*

⁵ Lon ewe fansoun, lupwen Herotes a king lon Jutea mi wor eman souasor itan Sakarias seni lon tettelin än Apia mwich. Iten pwülüan Elisapet, neminei eman mwirimwirin Aaron. ✧ ⁶ Ir me ruoman ra föri mine a pwüing mwen mesen Kot o aleasochisi än ewe Samol kewe allük me pwüüing meinisin. ⁷ Nge esap wor nöür, pun Elisapet a rit, nge ir me ruoman ra fen pwal chinlapala.

⁸ Lon eu rän, lupwen a tori än Sakarias mwich pwe epwe angang, Sakarias a föri an angangen souasor mwen mesen Kot. ⁹ Sakarias a fil lon pwüngün üttüt lon örünien pwüngün angangen ekewe souasor, pwe epwe keni apach mi pwokus won ewe rongen asoren ötüöt. Iei mine a tolong lon än ewe Samol imwenfel, ¹⁰ nge ewe mwichen aramas mi nom lükün ra iotek lupwen fansoun ewe apach mi pwokus a kek.

¹¹ Iwe, eman nöün ewe Samol chon läng a pwä ngeni Sakarias, a ütä lepelifichin ewe rongen asoren ötüöt. ¹² Lupwen Sakarias a küna ewe chon läng, a rükö o niuokus. ¹³ Nge ewe chon läng a üreni, “Kosap niuokus, Sakarias! Pun Kot a aüseling om iotek. Elisapet pwülüom we epwe pwopwo o nöüni eman ät, iwe, kopwe aita ngeni Johannes. ¹⁴ Iwe, kopwe pwapwa o mwanek ren, nge chomong repwe pwapwa lupwen epwe uputiu. ¹⁵ Epwe eman mwän mi lap mwen mesen ewe Samol. Esap tongeni ün wain are sakau, nge epwe ur ren Ngünmifel seni fansoun an uputiu. ✧ ¹⁶ Iwe, epwe aliwinisefäli chomong aramasen Israel ngeni ewe Samol ar we Kot. ¹⁷ I epwe akom mwen ewe Samol lon tufichin ewe Ngün me ewe manaman mi nom ren Elias. Epwe akulu leluken ekewe sam ngeni nöür o akulusefäli letipen ekewe aramas mi lükümach, pwe repwe eäni ekiekin ekewe chon pwüing. Pun epwe amolätä fän iten ewe Samol eu mwichen aramas mi amolöch.” ✧ ¹⁸ Iwe, Sakarias a aisini ewe chon läng, “Ifa usun ai üpwe silei pwe met ka apasa epwe fis? Pun ngang eman mwän mi chinlap, nge ierin pwülüei ra chomong.” ¹⁹ Iwe, ewe chon läng a pölüeni, “Ngang Kapriel, ewe mi ü mwen mesen Kot. Kot a tinieito pwe üpwe kapas ngonuk o asile ngonuk ei pworaus allim. ✧ ²⁰ Iei kopwe awemwöch, nge kosap chüen tongeni fos tori ewe rän ekei mettoch repwe fisitä, pun kosap lükü ai kewe kapas pwe repwe pwönüetä lon fansour.”

²¹ Iwe, ekewe aramas ra witiwiti än Sakarias epwe towu rer o ra weitifengeniir ren än Sakarias nomotam lon ewe imwenfel. ²² Lupwen Sakarias a towu ren ekewe aramas, esap chüen tongeni fos ngeniir. Iwe, ra mefi, pwe a wor künaan me lon ewe imwenfel, pun a chök pomwo ngeniir, nge esap chüen tongeni fos.

²³ Lupwen fansoun an angang lon ewe imwenfel a wes, a liwiniti lenian. ²⁴ E Koch fansoun mürin Elisapet pwülüan we a pwopwo. Nge lon ükükün limu maram a opolong lon imwan, pun a apasa, ²⁵ “Ewe Samol a föri ei ngeniei. Lon ekei rän a pwärala an ümöümöch ngeniei o ange seniei ai itengau lein aramas.”

*Ewe chon läng Kapriel a aronga uputiuen Jesus
1.26-38*

²⁶ Iwe, lon awonuen maramen än Elisapet pwopwo, Kot a tinala ewe chon läng Kapriel lon ewe telinimwen Kalilea itan Nasaret ²⁷ ren eman

föpwül mi kofot ngeni eman mwän itan Josef, eman mwirimwirin Tafit. Iwe, iten ei föpwül Maria. ✧ 28 Ewe chon läng a feito ren Maria o üreni, “Kinamwe epwe toruk! Ewe Samol a nom reöm, a pwal fokun afeiöchuk.” 29 Iwe, Maria a fokun rükö ren mine ewe chon läng a üreni o a ekieki lon lelukan usun wewen an kewe kapas. 30 Ewe chon läng a üreni, “Kosap niuokus, Maria, Kot a fokun ümömöch ngonuk. 31 Nengeni, kopwe pwopwo o nöüni eman ät, iwe, kopwe aita ngeni Jesus. ✧ 32 Ätei epwe lap, epwe iteni Nöün Kot ewe mi Unusen Tekia. Nge Kot, ewe Samol epwe amota won lenien motun king usun an we lewo Tafit. 33 I epwe nemeni ekewe mwirimwirin Jakop feilfeilachök, nge mwün esap fokun müchüla.” ✧ 34 Iwe, Maria a üreni ewe chon läng, “Ngang eman föpwül, esap wor pwülüei. Epwe ifa usun an epwe tongeni fis ei sokun ngeniei?” 35 Ewe chon läng a pölüeni, “Ngünmifel epwe feitiu womw, nge manamanen ewe mi Unusen Tekia epwe nom womw. Iei mine ewe mi pin epwe uputiu ngonuk, epwe iteni Nöün Kot. 36 Nengeni, märärum we Elisapet! Aramas ra apasa, pwe esap tongeni nöünöü, nge iei a tori awonuen maramen an pwopwo, nge inamwo ika a fokun chinlapala. 37 Pun esap wor och Kot esap tongeni.” ✧ 38 Maria a apasa, “Nengeni, ngang nöün ewe Samol chon angang. Epwe fis ngeniei usun om apasa.” Iwe, ewe chon läng a feila seni Maria.

Maria a äämwa Elisapet

1.39-45

39 Mürin eko ch rän Maria a anükünük o feila fän pacheu ngeni eu telin-imw won chukuchukutan ewe fanü Jutea. 40 Iwe, lupwen a tori ikenan, a tolong lon imwen Sakarias o a kapong ngeni Elisapet. 41 Nge lupwen Elisapet a rong ewe kapong seni Maria, ewe mönükol a mwökütüküt me lon lukan. Iwe, Elisapet a ur ren Ngünmifel 42 o a apasa fän leüömong, “Ka fokun feiöch me lein fefin meinisin, a pwal feiöch ewe mönükol kopwe nöünätü. 43 Pwota a fis ngeniei ei mettoch mi amwarar, pwe inen ai Samol a feito rei? 44 Pun lon ewe chök otun üa rong om we kapong, ewe mönükol lon lukei a mwetewet fän pwapwa. 45 Ka fokun feiöch, pun ka lükü pwe alon ewe Samol ngonuk epwe fis.”

Än Maria kölin mwareiti Kot

1.46-56

46 Iwe, Maria a apasa,
 “Letipei a mwareiti ewe Samol,
 47 Ngüni a pwapwa
 pokiten Kot ai Chon Amanau,
 48 pun a chechemeniei,
 ngang nöün chon angang mi tekisason.
 Seni ei fansoun aramas meinisin
 repwe aita ngeniei pwe ngang eman mi feiöch. ✧
 49 Pun Kot, ewe mi Unusen Manaman
 a föri ekewe mettoch mi amwarar fän itei, itan a pin.
 50 A pwäräla an ümömöch ngeni chokewe mi niuokusiti
 seni eu pilon aramas tori eu pilon.
 51 A aitiewu pöün mi manaman
 o atoropasa chokewe mi lamalamtekia lon ar ekiek kana.

✧ 1:27: Mat 1.18 ✧ 1:31: Mat 1.21 ✧ 1:33: 2.Sam 7.12,13,16; Ais 9.7 ✧ 1:37: Ken 18.14

✧ 1:48: 1.Sam 1.11

- 52 A asapwilatiu ekewe king mi wor maner
seni ar lenien motun king o atekiatiu ekewe chon tekison. ✱
- 53 A amenemenöchü chokewe mi echik ren chomong mettoch mi mürina,
o tinala ekewe chon pisekisek fän ar asöülapö.
- 54 A apwönüetä an pwon ngeni ach kewe lewo
o alisi nöün we chon angang Israel.
- 55 A chechemeni an epwe pwärala an ümöümöch ngeni Apraham,
pwal ngeni mwirimwirin kana meinisin tori feilfeilachök.” ✱
- 56 Iwe, Maria a nonom ren Elisapet lon ükükün ülüngat maram, mürin
a pwal liwiniti lenian.

Johannes Soupapatais a uputiu

1.57-66

- 57 A tori fansoun än Elisapet epwe nöünöü, iwe, a nöünätü eman ät.
- 58 Iwe, lupwen chon arun me aramasan kana ra rongorong pwe ewe
Samol a fokun pwärala an ümöümöch ngeni Elisapet, ir meinisin ra fiti
lon an pwapwa.
- 59 Nge lupwen a tori awaluen ränin ewe mönükol, ra feito pwe repwe eti
ewe angangen sirkomsais. Iwe, ra mochen aita ngeni ewe mönükol iten
saman we Sakarias. ✱ 60 Nge inan we a apasa, “Apw, esap ina, epwe iteni
Johannes.” 61 Iwe, ra üreni Elisapet, “Nge esap wor eman lein aramasom
a iteni ei it.” 62 Mürin ra pomwo ngeni Sakarias semen ewe ät o aisini
meni it i a mochen aita ngeni ewe ät. 63 Iwe, Sakarias a tüngor ngeniir
pwe repwe uwato eu lenien mak, pwe epwe makkei ewe it won. Iwe,
a makkei, “Epwe iteni Johannes.” Ir meinisin ra fokun mairü. 64 Lon
ewe chök otun Sakarias a tongeni kapasgefäl o a popuetä le mwareiti
Kot. 65 Iwe, chon arun kewe ra uren niuokus, nge pworausen ekei
mettoch a chöfetal lon unusen ewe fanü Jutea. 66 Iwe, aramas meinisin
mi rongorong ei pworaus ra ekieki usun o aifengen lefiler, “Met chök
epwe le fis ngeni ei mönükol me mürin?” Pun a pwä pwe än ewe Samol
manaman a nom won.

Än Sakarias kapasen osuni

1.67-80

- 67 Iwe, Sakarias semen Johannes a ur ren Ngünmifel o a apasatä an kei
kapasen osuni:
- 68 “Ousipwe mwareiti ewe Samol, ewe Koten Israel!
Pun a feito pwe epwe alisi nöün aramas o angaseer.
- 69 A awora fän itach eman Chon Amanau mi manaman,
i eman mwirimwirin nöün chon angang Tafit.
- 70 A fen pwon me lomlom
ren nöün kewe soufos mi pin
- 71 pwe epwe amanaua kich seni chon oputach,
seni pöchökülen chokewe meinisin mi oputa kich.
- 72 A apasa pwe epwe pwäri an ümöümöch ngeni ach kewe lewo
o chechemeni an we pwon mi pin.
- 73 A pwon fän akapel
ngeni semelapach Apraham
- 74 pwe epwe amanauakich seni chon oputach o mwüt ngenikich
pwe sipwe angang ngeni, nge sisap niuokus,

75 sipwe pwal angang ngeni

lon pin me pwüing me mwen mesan lon ränin manauach meinisin.

76 Nge en, nei, kopwe iteni nöün Kot ewe mi Unusen Tekia soufos.

Kopwe akom mwen ewe Samol, pwe kopwe amolätä alan, ✱

77 kopwe pwal asile ngeni nöün aramas pwe repwe küna manau ren ar küna amusamusen ar tipis kana.

78 Ach Kot a ümömöch o lukpwetete.

Epwe awora ngenikich ewe Saramen Manau seni läng,

79 pwe epwe tinteti won chokewe

mi nom lon rochopwak me nürün mäla,

epwe pwal emweni pechech

ngeni ewe alen kinamwe.”

80 Iwe, ewe semirit a mämäritä o miritila lon an ekiiek. A nonom lon fanüapö tori ewe rän a püsin pwärala ngeni ekewe aramasen Israel.

2

Jesus a uputiu

2.1-7

(Mat 1.18-25)

1 Iwe, lon ewe fansoun ewe Sisar Aukustus a atowu eu allük pwe epwe wor eu makken it lon ekewe fanü meinisin mi nom fän nemenien Rom.

2 Iei aeuin makken it lupwen Kirenius a kepinan Siria. 3 Iwe, aramas meinisin ra feila lon en me an telinimw pwe repwe makkei iter. 4 Iwe,

Josef a pwal feila seni ewe telinimw Nasaret lon Kalilea, nge a feitä

Jutea lon ewe telinimwen Tafit itan Petleem, pun i eman mwirimwirin

Tafit. 5 A feila ikenan pwe epwe mak itan fiti Maria kofotun we mi

pwopwo. 6 Nge lupwen ar nonom ikenan, a tori fansoun än neminewe

epwe nöünöü. 7 Iwe, a nöünätü nöün we mwänichi, a finitala lon roron

o akonala lon eu lenien amongöü man, pun esap wor eu leni fän iter lon

ewe imwen wasöla.

Ekewe chon mas sip me ekewe chon läng

2.8-20

8 Iwe, mi wor ekoch chon mas sip ra nonom lemälen ewe fanü, ra

tümwünü folenier pwiin sip lepwin. 9 Iwe, nöün ewe Samol we chon läng

a pwä ngeniir o lingen ewe Samol a tinteti wor, iwe, ra fokun niuokus.

10 Nge ewe chon läng a üreniir, “Ousap niuokus. Pun nengeni, üa arongato

remi ewe Pworaus Allim mi aworato pwapwa chapur, epwe tori aramas

meinisin. 11 Lon ei rän ikenai eman Chon Amanau a uputiu ngenikemi

lon ewe telinimwen Tafit, i Kraist ewe Samol. 12 Nge ei epwe eu asisil

ngeniikemi: Oupwe küna eman mönükol a finifinila lon roron o konola

lon eu lenien amongöü man.”

13 Lon ewe chök otun eu mwichen chomong chon läng ra nom ren ewe

chon läng, ra mwareiti Kot o apasa, 14 “Kot epwe ling lon läng, epwe wor

kinamwe won fanüfan ngeni aramas, chokewe Kot a pwapwa rer.” 15 Nge

lupwen ekewe chon läng ra feila seniir o feitä läng, ekewe chon mas ra

kapasfengen lefiler, “Ousipwe feila Petleem o nengeni ei mettoch a fisitä,

ewe Samol a asile ngenikich usun.” 16 Iei mine ra feila fän pacheu, nge ra

küna Maria me Josef, pwal ewe mönükol mi kon lon ewe lenien amongöü

man. 17 Wesin ar küna ewe mönükol, ra asilefeili ewe pworaus ra rong

✱ 1:76: Mal 3.1

usun ewe mönükol. ¹⁸Iwe, aramas meinisin mi rong ei pworaus ra mairü ren met ekewe chon mas ra üreniir. ¹⁹Nge Maria a amwöchü ekei mettoch meinisin o ekieki usur lon letipan. ²⁰Iwe, lupwen ekewe chon mas ra liwiniti lenier, ra alinga o mwareiti Kot fän iten ekewe mettoch ra rong o küna, pun a usun chök met ewe chon läng a asile ngeniir.

Ra aita ewe mönükol ngeni Jesus

2.21

²¹Lupwen a tori awaluen ränin ewe mönükol, wesin an sirkomsais, ra aita ngeni Jesus. Iei ewe it ewe chon läng a aita ngeni mwen Maria esamwo ppopwo. ☆

Ra uwala Jesus lon ewe imwenfel

2.22-38

²²Iwe, lupwen a tori ewe fansoun ar repwe föri ewe angangen alimelim fän iter usun met a fen mak lon Allükün Moses, Josef me Maria ra uwala ewe mönükol Jerusalem pwe repwe anomu mwen mesen ewe Samol. ²³Pun iei usun a fen mak lon än ewe Samol Allük, “Iteiten mwänichi meinisin repwe pin fän iten ewe Samol.” ☆ ²⁴Ra pwal uwato ar asor usun a mak lon än ewe Samol Allük: Ruoman lisom are ruoman apansüsün lisom. ☆

²⁵Lon ena fansoun mi wor eman mwän lon Jerusalem itan Simeon. Ätei a pwüing o aleasochisi än Kot kewe Allük meinisin, a pwal witiwiti ätewe epwe echipa Israel. Iwe, Ngünmifel a nonom won. ²⁶Ngünmifel a pwäri ngeni, pwe esap mäla mwen an epwe küna Kraist, ätewe Kot epwe tinato. ²⁷Simeon a feila lon ewe imwenfel fän emwenien Ngünmifel. Iwe, lupwen Josef me Maria ra uwala ewe mönükol Jesus lon ewe imwenfel pwe repwe föri fän itan met örünier lon pwüingün ekewe Allük, ²⁸Simeon a eketä ewe mönükol fän mwärin, a mwareiti Kot o apasa, ²⁹“Ai Samol, iei ka apwönüetä om pwon, iei mine kopwe mwüt ngeni noumw chon angang pwe epwe feila fän kinamwe. ³⁰Pun üa küna ren mesei om angangen amanau, ³¹ewe ka amolätä mwen mesen aramas meinisin. ³²Epwe eu saram mi pwäräla letipom ngeni chon lükün Israel, nge epwe awarato ling ngeni noumw aramasen Israel.” ☆

³³Iwe, semen me inen ewe mönükol ra weitifengeniir ren ekewe kapas Simeon a apasa usun ewe ät. ³⁴Mürin Simeon a afeiöchüür o üreni Maria, “Nengeni, ei mönükol a fil me ren Kot pwe epwe eu lenien pöütüla me eu lenien küna manau fän iten chomong lon Israel. Ätei epwe pwal eu asisil me ren Kot chomong aramas repwe ü ngeni lon ar kapas, ³⁵pwe ekiekin chomong aramas epwe pwäla ren. Iwe, lolilen watte epwe akinasa leluikom, usun efoch ketilas a akinasa aramas.”

³⁶Iwe, mi pwal wor eman soufos fefin itan Anna nöün Faniel seni ewe ainangen Aser. Ei fefin a fokun chinlap, ra manaufengen me pwülüan lon ükükün fisu ier chök mürin ar apwüpwlü. ³⁷Iwe, lupwen pwülüan a mäla, a lipichsefäl tori iei a ierini walik me rüanü. Neminei esap feila seni ewe imwenfel, pwe a chök fel ngeni Kot lerän me lepwin fän echikefel me ikiotek. ³⁸Lon ewe chök otun a wareitiir, a kilisou ngeni Kot o kapas usun ewe mönükol ngeni chokewe meinisin mi witiwiti än Kot epwe angasala Jerusalem.

☆ 2:21: Lif 12.3; Luk 1.31 ☆ 2:23: Eks 3.2,12 ☆ 2:24: Lif 12.6-8 ☆ 2:32: Ais 42.6; 49.6; 52.10

Ra liwiniti Nasaret

2.39-40

³⁹ Iwe, lupwen Josef me Maria ra wes le föri meinisin usun met mi mak lon än ewe Samol Allük, ra liwiniti Nasaret lon Kalilea, iei poputän telinimwer. ✧ ⁴⁰ Iwe, ewe ät a mämäritä o pöchökülela. A uren tipachem o än Kot feiöch a nonom won.

Ewe ät Jesus me lon ewe imwenfel

2.41-52

⁴¹ Iteiten ier semen me inen Jesus ra soun feila Jerusalem fän iten ewe chulapen Pasofer. ✧ ⁴² Iwe, lupwen Jesus a ierini engol me ruu, a etiir le feila fiti ewe chulap lon pwüngün örünier. ⁴³ Nge wesin ewe chulap ra liwiniti lenier, nge ewe ät Jesus a nomotiu Jerusalem. Iwe, saman me inan resap silei, ⁴⁴ pun ra ekieki pwe a fiti ekewe mwichen aramas ra akom mwer. Iei mine ra fetal lon unusen ewe rän, mürin ra popuetä le kütta lein aramaser me chiechier kewe. ⁴⁵ Nge lupwen resap küna, ra liwinsefäliiti Jerusalem o kütta Jesus ikenan. ⁴⁶ Mürin ülüngat rän ra küna me lon ewe imwenfel, pwe a mot lein ekewe sense, a aüseling ngeniir o kapas ais ngeniir. ⁴⁷ Iwe, ir meinisin mi rongorong ngeni ewe ät ra mwar ren an weweöch me an silelap le pölüeni ekewe kapas ais. ⁴⁸ Lupwen saman me inan ra küna, ra weitifengeniiir. Iwe, inan we a üreni, “Nei, pwota ka föri iei usun ngenikem? Nengeni, semom me ngang aia lolilen me weires le kütto.” ⁴⁹ Iwe, Jesus a pölüeni, “Pwota oua küttaei? Ousap silei pwe ngang üpwe fokun nonom lon imwen Semei?” ⁵⁰ Nge ir resap weweiti mine a eäni kapas ngeniir. ⁵¹ Mürin Jesus a etiir le liwinsefäliiti Nasaret, iwe, a aleasochis ngeniir. Nge inan a iseis ekei mettoch meinisin lon lelukan. ⁵² Iwe, Jesus a mämäritä lon an tipachem, lon inisin pwal lon an küna chenin me ren Kot o pwal me ren aramas kana. ✧

3*Än Johannes Soupapatais Afalafal*

3.1-20

(Mat 3.1-12; Mark 1.1-8; Joh 1.19-28)

¹ Iwe, lon engol me limuen ierin mwün Sisar Tiperius, lupwen Pontius Pilatus a kepinan Juta, Herotes a samolun Kalilea, pwiin we Filip a samolun Iturea me Trakonitis me Lisantias a samolun Apilene, ² nge Anas me Kaifas ir ekewe Souasor mi Lap lon ena fansoun, alon Kot a tori Johannes nöün Sakarias we mwän me lon fanüapö. ³ Iei mine Johannes a feila lemenen unusen ewe fanü ünükün ewe chanpupu Jortan o afalafal, “Oupwe kul seni ämi tipis o papatais, iwe, Kot epwe amusala ämi tipis.” ⁴ Pun iei usun mine a mak lon ewe puk makkeen ewe soufos Aisea, “Eman a kökkö fän leüömong lon fanüapö: ‘Oupwe amolätä efoch al fän iten ewe Samol, oupwe awenecharala ewe al epwe fetal won.

⁵ Lemolun chuk meinisin repwe irela,
ekewe chuk meinisin repwe tekisonola.
Ekewe al mi pwor repwe awenewen,
ekewe al mi pukopuk repwe sonosonöchüla.

⁶ Iwe, aramas meinisin repwe küna

än Kot angangen amanau.’” ✧

⁷ Iwe, eu mwichen aramas mi chomong ra feila pwe repwe papatais ren Johannes. Nge a üreniir, “Ämi nöün serepenit. Iö a ürenikemi pwe oupwe sü seni än Kot we song epwe awarato womi?” ✧ ⁸ Oupwe föri sokun föföör epwe pwärätä pwe oua aier seni ämi tipis, nge ousap popuetä le apasa leflelemi, ‘Äm mwirimwirin Apraham.’ Pun ngang üpwe ürenikemi, pwe Kot a tongeni angei ekei fau o föri seniir pwe repwe mwirimwirin Apraham. ✧ ⁹ Ewe kouk a fen molotä pwe epwe pöküela ekewe irä seni warer. Iteiten irä esap uani ua mi öch epwe pöküpök o koturolong lon ekkei.” ✧

¹⁰ Iwe, ekewe aramas ra aisini Johannes, “Nge äm, met äm aipwe föri?” ¹¹ Johannes a pölüeniir, “Iö a eäni ruu söch epwe angei echö o ngeni ewe eman esap wor an, nge eman mi wor anan mongö epwe pwal föri iei usun.” ¹² Iwe, ekoch chon ioni takises ra feito pwe repwe papatais. Ra aisini, “Sense, met äm aipwe föri?” ✧ ¹³ Johannes a pölüeniir, “Oupwe chök ioni takises lon ükükün met mi afat lon allük.” ¹⁴ Ekoch sounfiu ra pwal aisini, “Nge äm, met äm aipwe föri?” Johannes a pölüeniir, “Ousap achomau lon ämi angei moni seni aramas, ousap atipisimwäli eman, nge oupwe menemenöch ren liwinin ämi angang.”

¹⁵ Iwe, ekewe aramas ra witiwit fän apilükülüköch o ra popuetä le ekieki lon leluker pwe Johannes eli epwe fen ewe Kraist. ¹⁶ Iei mine Johannes a üreniir, “Ngang üa papataisikemi ren koluk, nge eman mi lap seniei epwe feito, ngang üsap fich ngeni ai üpwe mwo nge apichi ririn ipwan sus, ätewe epwe papataisikemi ren Ngünmifel me ekkei. ¹⁷ A kamwöch an söfööl mi keang pwe epwe aea le aimwüfeseni ekewe föün wiich seni pöön me won an lenien wichiwich umwun wiich. Iwe, epwe ionifengeni ekewe föün wiich o uwalong lon an lenien iseis, nge ekewe pöön epwe keniirela lon ekkei esap kunula.”

¹⁸ Iwe, lon chomong sokopaten kapas Johannes a aea le afalafala ewe Pworaus Allim ngeni ekewe aramas o fönöör, pwe repwe siwili manauer. ¹⁹ Nge Johannes a apwüngü ewe samol Herotes pokiten an pwülüeni Herotias pwülüen pwiin we, pwal pokiten an kewe föföör mi ngau meininis a föri. ²⁰ Mürin Herotes a föri och föföör mi fokun ngau ren an aturalong Johannes lon imwen fötek. ✧

Jesus a papatais

3.21-22

(Mat 3.13-17; Mark 1.9-11)

²¹ Iwe, lupwen ekewe aramas meininis ra papatais, Jesus a pwal papatais. Nge lupwen Jesus a iotek, läng a sukula ²² o ewe Ngünmifel a feitiu won usun lapalapen eman lisom. Iwe, eu möngüngü a feitiu seni läng a apasa, “En nei mi fokun achengicheng, üa unusen pwapwa reöm.” ✧

Än Jesus kewe lewo

3.23-38

(Mat 1.1-17)

²³ Iwe, lupwen Jesus a popuetä an angang a ierini ina epwe ilik ier. Iei usun än aramas ekiiek pwe Jesus nöün Josef, nge Josef nöün Eli, ²⁴ Eli nöün

✧ 3:6: Ais 40.3-5 ✧ 3:7: Mat 12.34; 23.33 ✧ 3:8: Joh 8.33 ✧ 3:9: Mat 7.19 ✧ 3:12: Luk 7.29 ✧ 3:20: Mat 14.3-4; Mark 6.17-18 ✧ 3:22: Ken 22.2; Kölf 2.7; Ais 42.1; Mat 3.17; Mark 1.11; Luk 9.35

Matat, Matat nöün Lefi, Lefi nöün Melki, Melki nöün Jannai, nge Jannai nöün Josef, ²⁵ Josef nöün Matitia, Matitia nöün Amos, Amos nöün Nahum, Nahum nöün Esli, nge Esli nöün Nakkai, ²⁶ Nakkai nöün Mahat, Mahat nöün Matatias, Matatias nöün Simej, Simej nöün Josek, nge Josek nöün Jota, ²⁷ Jota nöün Johanan, Johanan nöün Resa, Resa nöün Serupapel, Serupapel nöün Sealtiel, nge Sealtiel nöün Neri, ²⁸ Neri nöün Melki, Melki nöün Atti, Atti nöün Kosam, Kosam nöün Elmatam, nge Elmatam nöün Er, ²⁹ Er nöün Josua, Josua nöün Elieser, Elieser nöün Jorim, Jorim nöün Matat, nge Matat nöün Lefi, ³⁰ Lefi nöün Simeon, Simeon nöün Juta, Juta nöün Josef, Josef nöün Jonam, nge Jonam nöün Eliakim, ³¹ Eliakim nöün Melea, Melea nöün Menna, Menna nöün Matata, Matata nöün Natan, nge Natan nöün Tafit, ³² Tafit nöün Jesi, Jesi nöün Opet, Opet nöün Poas, Poas nöün Salmon, nge Salmon nöün Nason, ³³ Nason nöün Aminatap, Aminatap nöün Atmin, Atmin nöün Arni, Arni nöün Hesron, Hesron nöün Peres, nge Peres nöün Juta, ³⁴ Juta nöün Isaak, Isaak nöün Apraham, Apraham nöün Tara, nge Tara nöün Nahor, ³⁵ Nahor nöün Seruk, Seruk nöün Reu, Reu nöün Pelek, Pelek nöün Eper, nge Eper nöün Shela, ³⁶ Shela nöün Kainan, Kainan nöün Arpaksat, Arpaksat nöün Sâm, Sâm nöün Noa, nge Noa nöün Lamek, ³⁷ Lamek nöün Metusala, Metusala nöün Enok, Enok nöün Jaret, Jaret nöün Mahalalel, nge Mahalalel nöün Kenan, ³⁸ Kenan nöün Enos, Enos nöün Set, Set nöün Atam, nge Atam nöün Kot.

4

Satan a sotuni Jesus

4.1-13

(Mat 4.1-11; Mark 1.12-13)

¹ Iwe, Jesus a ur ren Ngünmifel lupwen a liwinsefäl seni ewe chanpupu Jortan, iwe, Ngünmifel a emwenala lon fanüapö. ² Ikenan Satan a sotuni lon ükükün faik rän. Lon ekana rän esap mongö och. Nge wesilan ekei rän a echik. ³ Iwe, Tefil a üreni, “Are en Nöün Kot, kopwe üreni ei fau pwe epwe wiliti pilawa.” ⁴ Nge Jesus a pölüeni, “A mak lon ekewe Toropwe mi Pin, ‘Aramas resap manau ren mongö chök.’” ✧

⁵ Mürin Tefil a emwenatä Jesus won eu leni mi tekia o aküna ngeni mwün fanüfan meinisin lon ekis chök mochomochen fansoun. ⁶ Iwe, a üreni, “Ngang üpwe ngonuk ar kewe nemenem meinisin pwal wöür kewe, pun ra nom fän nemeniei, nge ngang üa tongeni ngeni iö üa mochen ngeni. ⁷ Iei mine are kopwe fel ngeniei, üpwe mwüt ngonuk pwe kopwe eäniir meinisin.” ⁸ Jesus a pölüeni, “A mak lon ekewe Toropwe mi Pin, ‘Kopwe fel ngeni ewe Samol om Kot o angang ngeni i chök.’” ✧

⁹ Mürin Tefil a emwenala Jesus Jerusalem o aütai won ungen ewe imwenfel. Iwe, a üreni, “Are en Nöün Kot, kopwe aturuketiu me ikei. ¹⁰ Pun a mak lon ekewe Toropwe mi Pin, ‘Epwe allük ngeni nöün kewe chon läng pwe repwe tümwünuk.’ ¹¹ A pwal mak, ‘Repwe pwisuk lepöür, pwe pecheöm esap chepeti fau.’” ✧ ¹² Iwe, Jesus a pölüeni, “A mak lon ekewe Toropwe mi Pin, ‘Kosap sotuni ewe Samol om Kot.’” ✧ ¹³ Iwe, lupwen Tefil a wes me sotuni Jesus ren ekewe sosot meinisin a feila seni lon ekis chök fansoun.

Jesus a popuetä an angang lon Kalilea

4.14-15

(Mat 4.12-17; Mark 1.14-15)

¹⁴ Mürin Jesus a liwinsefäliiti Kalilea, nge manamanen Ngünmifel a nom ren. Iwe, pworausan a chöfetal lon unusen ewe fanü meinsin. ¹⁵ A afalafal lon ekewe imwen felikis o aramas meinsin ra mwareiti i.

Chon Nasaret resap etiwa Jesus

4.16-30

(Mat 13.53-58; Mark 6.1-6)

¹⁶ Mürin Jesus a feila Nasaret, ewe ia a mämäritä me ie. Iwe, lon ewe ränin sapat Jesus a feila lon ewe imwen felikis usun an örüni. Iwe, a ütä pwe epwe aleani ekewe Toropwe mi Pin, ¹⁷ nge ra ngeni puken ewe soufos Aisea. Iwe, a sukala ewe puk o a küna ewe ia a mak ie ekei kapas, ¹⁸ “Ngünün ewe Samol a nonom woi, pun a afliesi pwe üpwe afalafala ewe Pworausen Manau ngeni ekewe chon mwelele.

A tiniei, pwe üpwe aronga ngeni ekewe chon fötek pwe repwe ngasala,
ekewe chon chun pwe repwe küna mwer,
üpwe pwal angasala chokewe aramas ra ariaföüür.

¹⁹ Üpwe pwal arongafeili pwe a war ewe fansoun,

lupwen ewe Samol epwe amanaua nöün aramas.” ✧

²⁰ Mürin Jesus a öppüngala ewe puk, a aliwini ngeni ewe chon angang o mottiu. Iwe, ekewe aramas meinsin mi nom lon ewe imwen felikis ra afota meser won. ²¹ Iwe, a popuetä le kapas ngeniir, “Ikenai ekei kapas oua rongorong me lon ei Toropwe mi Pin ra fen pwönüetä.”

²² Aramas meinsin ra kapas öch usun o mwar ren an kapas mi manaman a apasatä. Ra ais, “Ifa usun, sap i nöün Josef?” ²³ Nge a üreniir, “Ewer, üa silei pwe oupwe apasa ngeniei ei mwiitun, ‘Sousafei, kopwe püsin apöchökülok!’ Kopwe föri ikei lon püsin telinimwomw met aia rongorong pwe ka föri me lon Kapernaum.” ²⁴ Iwe, a sopwela le kapas ngeniir, “Enlet eman soufos esap wor meninin me lon poputän telinimwan. ✧ ²⁵ Oupwe aüselingaei: A wor chomong fefin mi mä pwülüer lon Israel lon fansoun Elias, lupwen a wor mailengita lon unusen ewe fanü pokiten esap püng üt lon ükükün ülüngat esop ier. ✧ ²⁶ Iwe, Kot esap tinala Elias ren eman lein ekewe fefin mi mä pwülüer lon Israel, nge a tinala ren eman fefin mi mä pwülüan lon Sarapat lon ewe fanü Siton. ✧ ²⁷ A pwal wor chomong aramas mi samaun rupun pwötür lon Israel lon fansoun ewe soufos Elisa. Nge esamwo wor eman a limöch seni rupun pwe Naeman chök ewe re Siria.” ✧

²⁸ Iwe, lupwen ekewe aramas meinsin lon ewe imwen felikis ra rongorong ekei kapas, ra fokun song. ²⁹ Ra ütä o etekinawu Jesus lükün ewe telinimw, ra etekinatä won ewe chukuchukutä ia ar telinimw a köütä ie, pwe repwe aturätü me lepokun ewe achau. ³⁰ Nge Jesus a fetalelong lein ewe mwichen aramas o feila seniir.

Eman mwän a wor eman ngününgau won

4.31-37

(Mark 1.21-28)

✧ 4:19: Ais 61.1-2 ✧ 4:24: Joh 4.44 ✧ 4:25: 1.King 17.1 ✧ 4:26: 1.King 17.8-16 ✧ 4:27: 2.King 5.1-14

³¹ Mürin Jesus a feila Kapernaum, eu telinimw lon Kalilea. Ikenan a afalafala ekewe aramas lon ewe ränin sapat. ³² Iwe, ekewe aramas ra mairü ren an afalafal, pun a afalafal usun eman mi wor an manaman. ✱ ³³ Iwe, me lon ewe imwen felikis a wor eman mwän a wor eman ngününgau won. A leüömong le puchör, ³⁴ “Aha! Met ka mochen föri ngenikem, Jesus seni Nasaret? Ka feito pwe kopwe afeiengauakem? Ngang üa silei en, en Nöün Kot we mi Pin.” ³⁵ Iwe, Jesus a allük ngeni ewe ngününgau, “Kopwe fanafanala o towu seni ei mwän.” Iwe, ewe ngününgau a aturätü ewe mwän me mwen ekewe aramas, a towu seni, nge esap afeiengaua. ³⁶ Iwe, ekewe aramas meinisin ra mairü o kapasfengen lefiler, “Met sokun kapas kei a eäni? Ren manaman me pöchökül ei mwän a allük ngeni ekewe ngününgau, iwe, ra towu.” ³⁷ Iwe, ewe pworaus usun Jesus a chöfetal lon unusen ewe fanü.

Jesus a apöchöküla chomong aramas

4.38-41

(Mat 8.14-17; Mark 1.29-34)

³⁸ Mürin Jesus a towu seni ewe imwen felikis o feila lon imwen Simon. Iwe, inen pwülüen Simon a eäni eu samaun pwichikar, iei mine ra tüngor ngeni Jesus pwe epwe apöchöküla. ³⁹ Iwe, Jesus a feila ren, a ütä arun än neminewe we peet o üreni ewe pwichikar pwe epwe towu seni. Iwe, ewe pwichikar a towu seni. Lon ewe chök otun neminewe a pwätä o a tümwünüür. ⁴⁰ Iwe, lupwen akkar a tuputiu, aramas ra uwato ren Jesus aramas meinisin mi eäni sokopaten samau. Jesus a iseis pöün wor o apöchöküleer meinisin. ⁴¹ Pwal anün rochopwak ra towu seni chomong aramas, ra puchörütä, “En Nöün Kot!” Nge Jesus a apwüngüür o esap mwüt ngeniir pwe repwe kapas, pun ra silei pwe i ewe Kraist.

Jesus a afalafal lon ekewe imwen felikis

4.42-44

(Mark 1.35-39)

⁴² Iwe, lupwen a ränila, Jesus a feila lükün ewe telinimw lon eu leni ia esap wor aramas ie. Ekewe aramas ra küttafeili, nge lupwen ra küna, ra sotuni ar repwe amwöchü, pwe esap feila seniir. ⁴³ Nge Jesus a üreniir, “Üpwe fokun afalafala ewe Pworausen Manau usun Mwün Kot lon pwal ekoch telinimw, pun iei popun Kot a tinieito.” ⁴⁴ Iwe, Jesus a sopwela le afalafal lon ekewe imwen felikis lon Jutea.

5

Jesus a köri ekoch chon kaiö

5.1-11

(Mat 4.18-22; Mark 1.16-20)

¹ Lon eu rän, lupwen Jesus a ütä arun ewe nomun Kalilea, ekewe aramas ra mwicheto o etieti ngeni, pwe repwe rongorong än Kot kapas. ² Iwe, a küna ruofoch wa ra ürütä le pi, nge ekewe chon attau ra tötiu me won ekewe wa o talü nöür kewe chew. ³ Iwe, Jesus a tötä won efoch kewe wa, wään Simon o tüngor ngeni pwe epwe ekis sikawu seni le pi. Nge Jesus a mottiu won o afalafala ewe mwichen aramas. ✱ ⁴ Lupwen Jesus a wes le afalafal, a üreni Simon, “Kopwe fötünewu ewe ia a alolol ie, en me chiechiom kewe, oupwe aturätü nöümi kewe chew, pwe oupwe liap.”

⁵ Simon a pölüeni, “Ai samol, äm aia weires le attau lon unusen ewe pwin, nge aisap liap. Nge fän alom üpwe aturätü ekewe chew.” ✧ ⁶ Iwe, lupwen ra aturätü nör kewe chew, ra liapeni chomong, chomong ik, pwe nör kewe chew ra popuetä le kam. ✧ ⁷ Iei mine ra äkänipöü chiechier kewe mi nom won pwal ewe efoch wa, pwe repwe feito o alisiir. Iwe, ra feito o amasoua waar kewe rufoch tori ra ur o arapakan ngeni ar repwe kokola. ⁸ Lupwen Simon Petrus a küna mine a fis, a fotopwäsuketiu mwen Jesus o üreni, “Kopwe feila seniei ai Samol, pun ngang eman chon tipis.” ✧ ⁹ Pun i me chokewe mi eti ra mairü ren chomongun liaper ik ra liapeni. ¹⁰ Pwal ina chök usun mine a fis ngeni chiechien Petrus kewe James me Johannes nöün Sepeti kewe. Mürin Jesus a üreni Simon, “Kosap niuokus, seni ikenai kopwe eman chon attaua aramas.” ¹¹ Iwe, ra ürätä waar kewe le pi, ra likitala meinisin o tapwela mürin Jesus.

Jesus a apöchöküla eman mi rupun pwötür

5.12-16

(Mat 8.1-4; Mark 1.40-45)

¹² Iwe, lupwen Jesus a nom lon eu kewe telinimw, a feito eman mwän mi kula inisin ren rupun pwötür. Lupwen a küna Jesus, a chapetiu le pwül o tüngormau ngeni, “Ai Samol, are ka mochen ka tongeni limetiei.” ¹³ Iwe, Jesus a aitiela pöün, a atapa inisin ewe mwän o apasa, “Ngang üa mochen, kopwe limöch.” Lon ewe chök otun ewe rupun pwötür a mola me won inisin ewe mwän. ¹⁴ Mürin Jesus a allük ngeni ewe mwän, “Kosap apworaus a ngeni eman mine a fis ngonuk. Nge kopwe feila ren ewe souasor pwe epwe nenengenuk. Mürin kopwe eäni ewe asor Moses a allük fän iten om limelim, pwe epwe alletätä ngeni aramas pwe ka limöch.” ✧ ¹⁵ Iei mwo ei, nge ewe pworaus usun Jesus a chök chöfetal ekis meinisin. Iwe, eu mwichen aramas mi chomong ra feito pwe repwe rongorong an afalafal, repwe pwal küna pöchökül seni ar samau. ¹⁶ Nge Jesus a feila seniir, a emanüla lon eu leni ia esap wor aramas ie o iotek. ✧

Jesus a apöchöküla eman mwän mi mwök

5.17-26

(Mat 9.1-8; Mark 2.1-12)

¹⁷ Lon eu rän, lupwen Jesus a afalafal, ekoch ekewe Farisi me Sensen Allük ra mot ren, ra feito seni ekewe telinimwen Kalilea me Jutea meinisin, pwal seni Jerusalem. Iwe, manamanen ewe Samol a nom ren Jesus, pwe a tufichin apöchöküla ekewe chon samau. ¹⁸ Iwe, ekoch mwän ra ekieto eman mwän mi mwök won eu peet. Ra sotuni ar repwe ekielong lon ewe imw o anomu mwen Jesus, ¹⁹ nge resap tongeni pokiten ewe mwichen aramas mi chomong. Iei mine ra tötä won osun ewe imw o säresi awenewenen ewe ia Jesus a nom ie. Iwe, wesin ar säresi ra aürätü ewe mwän me mwen Jesus lein ewe mwichen aramas. ²⁰ Lupwen Jesus a küna ar lükülük, a üreni ewe mwän, “Pwii, om tipis kana ra musola.”

²¹ Iwe, ekewe Sensen Allük me ekewe Farisi ra popuetä le ekieki lon leluker, “Tö ei mwän a apasa ekei kapasen turunufas? Iö a tongeni amusala tipis, sap Kot echök?” ✧ ²² Iwe, Jesus a silei ar ekieki o üreniir, “Pwota oua ekieki ei sokun? ²³ Meta a mecheres ai üpwe apasa, ‘Om tipis kana ra musola,’ are ai apasa, ‘Kopwe ütä o fetal?’ ²⁴ Ngang üpwe allükülükü ngenikemi, pwe Nöün Aramas a wor an pwüung won fanüfan

✧ 5:5: Joh 21.3 ✧ 5:6: Joh 21.6 ✧ 5:8: Luk 18.13 ✧ 5:14: Lif 14.1-32 ✧ 5:16: Mark 1.35 ✧ 5:21: Luk 7.49; Kölf 130.4; Ais 43.25

pwe epwe amusala tipis.” Iei mine a üreni ewe mwän mi mwök, “Üpwe ürenuk: Kopwe ütä, angei kiom o feila lon imwom.” ✧

²⁵ Lon ewe chök otun ewe mwän a ütä me mwer meinisin, a angei kian o liwinla lon lenian fän an mwareiti Kot. ²⁶ Iwe, ir meinisin ra fokun mairü, ra uren niuokus, ra mwareiti Kot o apasa, “Mwa met, amwararen ekei mettoch sa küna ikenai!”

Jesus a köri Lefi

5.27-32

(*Mat 9.9-13; Mark 2.13-17*)

²⁷ Mürin ekei mettoch, Jesus a towu seni ewe telinimw o küna eman chon ioni takises itan Lefi, a mot lon an ofes. Iwe, Jesus a üreni, “Kopwe tapweto müri.” ²⁸ Iwe, Lefi a ütä, a likitala meinisin o tapwela mürin. ²⁹ Mürin Lefi a föri eu watten kametip lon imwan fän iten Jesus. Iwe, chomong chon ioni takises me pwal ekoch aramas ra nom lein ekewe chon kökköto. ³⁰ Iwe, ekoch ekewe Farisi me ekoch Sensen Allük mi choni ar kewe mwich, ra ngününgün ngeni nöün Jesus kewe chon kaiö o aisiniir, “Pwota oua mongö o ün me ekewe chon ioni takises me ekewe chon tipis?” ✧ ³¹ Jesus a pölüeniir, “Aramas mi pöchökül esap lomot ngeniir eman sousafei, nge a lomot ngeni ekewe chon samau. ³² Ngang üsap feito, pwe üpwe köri ekewe chon pwüng ar repwe ekieksefäl, pwe ekewe chon tipis.”

Kapas ais usun echikefel

5.33-39

(*Mat 9.14-17; Mark 2.18-22*)

³³ Iwe, ekoch aramas ra üreni Jesus, “Nöün Johannes kewe chon kaiö ra echikefel fän chomong o iotek, pwal usun chök nöün ekewe Farisi kewe chon kaiö. Nge noumw kewe chon kaiö ra chök momongö o ükün.” ³⁴ Jesus a pölüeniir, “Ifa usun, oua ekieki pwe ekewe chon kökkö ngeni fetallapen apwüpwülü ra echik lupwen ewe mwän apwüpwülü söfö a nom rer? Resap fokun echik lupwen fansoun a nom rer. ³⁵ Nge epwe war ewe rän lupwen aramas repwe angei seniir ewe mwän apwüpwülü söfö fän pöchökül, iwe, lon ekana rän repwapw echik.”

³⁶ Iwe, Jesus a pwal apworausausa ngeniir eu pworausausen awewe: “Esap wor eman a angei ekam mangaku seni echö üf mi fö o teiätä won echö üf mi mes. Pun are epwe föri iei usun, a föri met ewe üf mi fö epwe kam ren, nge ewe ekam mangaku mi fö esap pwal öch ngeni echö üf mi mes. ³⁷ Esap pwal wor eman epwe alölöülong wain mi fö lon eu pör seni silin man mi mes, pun ewe wain mi fö epwe amökkü ewe pör, iwe, ewe wain epwe nitu le pwül, nge ewe pör epwe mökküla. ³⁸ Nge wain mi fö sipwe alölöülong lon pör mi fö. ³⁹ Esap wor eman epwe mochen ünümi wain mi fö mürin an ünümi ewe wain mi mes, pun a apasa, ‘Ewe wain mi mes a annö seni ewe wain mi fö.’”

6

Kapas ais usun ewe ränin sapat

6.1-5

(*Mat 12.1-8; Mark 2.23-28*)

¹ Iwe, a fis, pwe Jesus a fetal lon eu tanipin wiich lon eu ränin sapat. Iwe, nöün kewe chon kaiö ra popuetä fichi umwun uän wiich, ra märätula

lon pöür o mongö. ✧ ² E Koch Farisi ra aisini, “Pwota oua föri mine esap pwüing lon allükün ach lamalam lon ränin sapat?”

³ Iwe, Jesus a pölüeniir, “Ousap mwo aleani mine Tafit a föri lupwen i me chiechian kewe ra echik? ⁴ A tolong lon imwen Kot o angei ewe pilawa ra eäni asor ngeni Kot, a mongö, a pwal ngeni chiechian kewe. Nge ei a ü ngeni allükün lamalam, pun esap wor eman a tongeni mongö ekei pilawa pwe ekewe chök souasor.” ✧ ⁵ Jesus a pwal apasa, “Nöün Aramas i Sounemenemen ewe ränin sapat.”

Jesus a apöchöküla eman mwän mi mä pöün lon ränin sapat

6.6-11

(Mat 12.9-14; Mark 3.1-6)

⁶ Lon pwal eu ränin sapat Jesus a feila lon eu imwen felikis o afalafal. Ikenan a wor eman mwän mi mä pöüifichin. ⁷ Iwe, e Koch Sensen Allük me Farisi ra kütta eu popun pwe repwe tongeni atipisi Jesus, iei mine ra mamasafichi are epwe apöchöküla ewe mwän lon ewe ränin sapat. ⁸ Nge Jesus a silei ar ekiäk o üreni ewe mwän, “Kopwe ütä o feito ikei mwen ekewe aramas.” Iwe, ewe mwän a ütä mwer meinisin. ⁹ Mürin Jesus a üreniir, “Ngang üpwe aisinikemi: Met allükün ach we lamalam a mwüt ngenikich sipwe tongeni föri lon ewe ränin sapat? Sipwe föri mine a öch ngeni aramas, are sipwe föri mine a ngau? Sipwe amanaueer, are sipwe amälaar?” ¹⁰ Iwe, Jesus a nenengeniir meinisin, mürin a üreni ewe mwän, “Kopwe aitiewu poumw!” Iwe, a aitiewu pöün, iwe, a pöchökülsefäl. ¹¹ Nge ekewe Farisi me Sensen Allük ra fokun song o ra popuetä le pwüingüpwüingfengen lefler usun mine repwe föri ngeni Jesus.

Jesus a filätä ekewe engol me ruoman chon künö

6.12-16

(Mat 10.1-4; Mark 3.13-19)

¹² Lon ena fansoun Jesus a feitä won eu chuk pwe epwe iotek. Iwe, a nonom ikenan o iotek ngeni Kot lon unusen ewe pwin. ¹³ Lupwen a ränila, a körato nöün kewe chon kaiö o a filätä engol me ruoman me leir, ätekewe a pwal aita ngeniir soukünü: ¹⁴ Simon (ätewe Jesus a aita ngeni Petrus) me Andru pwiin we, James me Johannes, Filip me Partolomeus, ¹⁵ Mateus me Tomas, James nöün Alfäus me Simon i eman Selot, ¹⁶ Jut nöün James me Jut Iskariot, ätewe mi afangamä Jesus. ✧

Jesus a afalafal o apöchöküla aramas

6.17-19

(Mat 4.23-25)

¹⁷ Lupwen Jesus a feitiu seni won ewe chuk me nöün kewe chon kaiö, a ütä lon eu leni mi sosenöch. Iwe, chomong nöün kewe chon kaiö ra mwicheto ren, pwal eu mwichen aramas mi chomong seni unusen ewe fanü Jutea, seni Jerusalem pwal seni ekewe telinimw Tirus me Siton mi nom aroset. ¹⁸ Ra feito pwe repwe rong ngeni än Jesus afalafal, epwe pwal apöchöküleretä seni ar kewe samau. Pwal chokewe mi riaföü ren ngününgau ra feito ren o künä pöchökül. ¹⁹ Ekewe aramas meinisin ra sotuni ar repwe atapa Jesus, pun och manaman a towu seni o apöchöküleer meinisin.

*Pwapwa me lolilen*6.20-26
(Mat 5.1-12)

²⁰ Iwe, Jesus a nenengeni nöün kewe chon kaiö o apasa,
 “Oua feiöch ämi mi wöüngau,
 pun oupwe mwüni ewe Mwün Kot.

²¹ Oua feiöch ämi mi echik lon ei fansoun,
 pun oupwe mötüla.

Oua feiöch ämi mi kechü lon ei fansoun,
 pun oupwe fokun pwapwa.

²² “Oua feiöch are aramas ra oputakemi o likitikemi, are ra ait-engauakemi o kapasingau usumi pokiten oua lükü Nöün Aramas.

☆ ²³ Oupwe pwapwa are a fis ei sokun lapalap ngenikemi, oupwe mwetemwet fän pwapwa, pun liwinimi mi watte epwe iseis lon läng fän itemi. Pun ar kewe lewo ra fen föri ekei sokun föföör ngeni ekewe soufos.

☆ ²⁴ Nge feiengauemi ämi mi pisekisek lon ei fansoun,
 pun oua fen nom lon manau mi mecheres.

²⁵ Feiengauemi ämi mi mötüla lon ei fansoun,
 pun oupwe echik.

Feiengauemi ämi mi pwapwa lon ei fansoun,
 pun oupwe letipeta o kechü.

²⁶ Feiengauemi are aramas meinsin ra kapasöch usumi, pun ar kewe lewo ra fen eäni ei sokun kapas ren ekewe soufos chofona.

*Oupwe echeni chon oputakemi*6.27-36
(Mat 5.38-48; 7.12a)

²⁷ “Nge üpwe ürenikemi ämi mi aüselingaei: Oupwe echeni chon pölüenikemi, oupwe föfööröch ngeni chokewe mi oputakemi. ²⁸ Oupwe afeiöchü chokewe mi ottekikemi o iotek fän iten chokewe mi föfööringau ngenikemi. ²⁹ Are eman a pösapek, kopwe pwal akulu ngeni ewe epek. Are eman a angei üfom sekit, kopwe pwal mwüt ngeni üfom söch. ³⁰ Are eman a tüngorek och mettoch, kopwe chök ngeni, nge are eman a angei och pisekum, kosap aissefäl fan pöchökül. ³¹ Oupwe föri ngeni aramas usun chök mine oua mochen repwe föri ngenikemi. ☆

³² Are oua chök tongei ekewe aramas mi tongekemi, met popun ämi oupwe angei och feiöch? Ekewe mwo chon tipis ra pwal tongei chokewe mi tongeer.

³³ Nge are oua chök föfööröch ngeni chokewe mi föfööröch ngenikemi, met popun ämi oupwe angei och feiöch? Ekewe mwo chon tipis ra föri iei usun.

³⁴ Are oua chök mwütätä pisekimi ngeni chokewe oua apilükülükü pwe repwe aliwinisefäli ngenikemi, met popun ämi oupwe angei och feiöch? Ekewe mwo chon tipis ra mwütätä pisekir ngeni chon tipis pwe repwe angesefäli won ükükün met ra fangala.

³⁵ Nge ämi oupwe echeni chon oputakemi o föfööröch ngeniir. Oupwe mwütätä pisekimi ngeniir, nge ousap ekiekin angesefäli. Mürin oupwe angei liwinimi mi watte o wiliti Nöün Kot ewe mi Unusen Tekia. Pun Kot a kirikiröch ngeni chokewe resap sile kilisou, pwal ngeni ekewe aramasangau.

³⁶ Oupwe eäni ümöümöch usun chök Sememi a eäni ümöümöch.

Apwüngü Aramas

6.37-42

(Mat 7.1-5)

³⁷ “Ousap apwüngü aramas, pwe Kot esap apwüngükemi. Ousap atipisi aramas, pwe Kot esap atipisikemi. Oupwe amusala än eman aramas tipis, pun Kot epwe pwal amusala ämi tipis. ³⁸ Oupwe fangafangöch ngeni aramas, pun Kot epwe fangafangöch ngenikemi. Ewer, oupwe angei eu aükük mi unusöch, mi itelong o chachelong o säsewu, epwe urourela me le pöümi. Pun ewe chök aükük oua aea le aükük ngeni aramas, Kot epwe pwal aea ngenikemi.”

³⁹ Iwe, Jesus a pwal apworausa ngeniir eu pworausen awewe: “Epwe tufich än eman chon chun epwe emweni eman mi chun? Ifa usun, resap turulong me ruoman lon eu pwan? ✧ ⁴⁰ Eman chon sukul esap lap seni nöün sense, nge eman mi awesöchüela an sukul epwe wewe ngeni nöün sense. ✧

⁴¹ Pwota ka küna ewe kükün pipi mi nom lon mesen pwiüm, nge kosap püsin mefi ewe irä lon mesom? ⁴² Epwe ifa usun om kopwe tongeni üreni pwiüm, ‘Pwii kopwe mwüt ngeniei ai üpwe uwawu ewe kükün pipi lon mesom’, nge püsin en kosap küna ewe irä mi nom lon mesom? En eman chon likatuputup! Kopwe akomwen uwawu ewe irä mi nom lon mesom, iwe, mürin kopwe tongeni künafichi om kopwe uwawu ewe kükün pipi seni lon mesen pwiüm.

Eföch irä me uan

6.43-45

(Mat 7.16-20; 12.33-35)

⁴³ “Eföch irä mi mürina esap uani ua mi ngau, nge eföch irä mi ngau esap uani ua mi mürina. ⁴⁴ Pun irä meinisin ra sil ren uar. Kosap tongeni kini föün apel seni ewe irä lantana, kosap pwal kini föün kurukur seni ewe irä acharong. ✧ ⁴⁵ Eman aramas mürina epwe chök atowu mettoch mi mürina seni letipan, nge eman aramasangau epwe chök atowu mettoch mi ngau. Pun eman aramas epwe chök apasawu met mi nom lon letipan. ✧

Ekewe ruoman chon kaü imw

6.46-49

(Mat 7.24-27)

⁴⁶ “Pwota oua aita ngeniei, ‘Samol, samol,’ nge ousap föri mine üa apasa ngenikemi? ✧ ⁴⁷ Ika eman epwe feito rei o rorongong ai kewe kapas o apwönüretä, üpwe pwäri ngenikemi met i a wewe ngeni: ⁴⁸ A wewe ngeni eman mwän a aüetä imwan, a tuw alololetiu o föri ewe longolong won achau. Iwe, lupwen ewe chanpupu a puwu o puiti ewe imw, ewe imw esap tongeni mächüngüchüng, pun a pöchökül. ⁴⁹ Iwe, ika eman epwe rorongong ai kewe kapas nge esap apwönüretä, a wewe ngeni eman mwän mi aüetä imwan won pwül, nge esap wor longolongun. Iwe, lupwen ewe chanpupu a puiti ewe imw, a müttir turula, nge talan ewe imw a fokun watte.”

✧ 6:39: Mat 15.14 ✧ 6:40: Mat 10.24; Joh 13.16; 15.20 ✧ 6:44: Mat 12.33 ✧ 6:45: Mat 12.34 ✧ 6:46: Mal 1.6; Mat 7.21

7

Jesus a apöchöküla nöün eman meilapen sounfiu chon angang

7.1-10

(Mat 8.5-13)

¹ Iwe, lupwen Jesus a wes le kapas ngeni ekewe aramas usun ekei mettoch meinisin, a feila Kapernaum. ² Mi wor eman meilapen sounfiu ikenan, a wor eman nöün chon angang a fokun aücheani. Ei chon angang a samau o arapakan ngeni an epwe mäla. ³ Lupwen ewe meilapen sounfiu a rong usun Jesus, a tinala ekoch souakomwen ekewe chon Juta, pwe repwe tüngor ngeni Jesus pwe epwe feito o apöchökülätä nöün we chon angang. ⁴ Iwe, lupwen ra feito ren Jesus, ra tüngormau ngeni o üreni, “A fokun fich ngeni ei mwän om kopwe alisi. ⁵ Ei mwän a tongei aramasach o aüetä ngeni kich ach imwen felikis.”

⁶ Iei mine Jesus a etiirela. Nge lupwen a arap ngeni ewe imw, ewe meilapen sounfiu a tinala chienan kewe ren Jesus pwe repwe üreni, “Ai samol, kosap osukosukok. Pun ngang üsap eman aramas mi aüchea ngeni om kopwe feito lon imwei, ⁷ ina mine ngang üse fen mwo ekiekin püsin feila reöm. Nge kopwe chök apasa och kapas, iwe, nei chon angang epwe pöchökületä. ⁸ Pun ngang eman mi pwal nom fan nemenien ekewe meilap seniei, nge mi pwal wor sounfiu ra nom fän nemeniei. Üa üreni eman, ‘Kopwe feila,’ iwe, a feila. Üa pwal üreni eman, ‘Kopwe feito,’ iwe, a feito. Üa üreni nei amanau, ‘Kopwe föri ien me ien,’ iwe, a föri.”

⁹ Iwe, lupwen Jesus a rongorong ekei kapas, a mairü ren. A sap ngeni ewe mwichen aramas mi tapweto mürin o üreniir, “Üa ürenikemi, üsamwo fen küna ei sokun lükülük lon Israel.” ¹⁰ Iwe, lupwen ekewe chon künö ra liwinsefälila lon imwen ewe meilapen sounfiu, ra küna pwe ewe chon angang a fen pöchökületä.

Jesus a amanauatä eman alüal nöün eman fefin mi mä pwülülan

7.11-17

¹¹ Iwe, ekis fansoun mürin, Jesus a feila lon eu telinimw itan Nain, nge nöün kewe chon kaiö me eu mwichen aramas mi chomong ra pwal eti. ¹² Lon ewe chök otun, lupwen a tori asamen tittin ewe telinimw, aramas ra ekiewu eman somä, ina i chök nöün eman fefin mi fen mä pwülülan. Iwe, eu mwichen aramas mi chomong ra eti. ¹³ Lupwen ewe Samol a küna ewe fefin, a fokun tongei. Iwe, a üreni, “Kosap kechü.” ¹⁴ Iwe, Jesus a feiliti ewe pwor ewe somä a nom lon o atapa, nge ekewe aramas mi eki ewe pwor ra köüla. Iwe, Jesus a apasa, “Nei alüal, üa ürenuk, kopwe pwätä.” ¹⁵ Iwe, ewe mi mäla a pwätä o popuetä le kapas. Mürin Jesus a ngenisefäli inan.

¹⁶ Iwe, aramas meinisin ra uren niuokus, ra mwareiti Kot o apasa, “Eman soufos mi lap a pwä leflach. Kot a feito pwe epwe amanaua nöün aramas.” ¹⁷ Ei pworaus usun Jesus a chöfetal lon unusen ewe fanü Jutea me ekewe fanü mi nom ünükün.

Johannes Soupapatais a tinala chon künö ren Jesus

7.18-35

(Mat 11.2-19)

¹⁸ Iwe, lupwen nöün Johannes kewe chon kaiö ra apworausa ngeni usun ekei mettoch meinisin, a köri ruoman me leir ¹⁹ o tiniirela ren ewe Samol, pwe repwe aisini, “En ewe eman epwe wareto, are sipwe

witiwiti pwal eman?”²⁰ Iwe, lupwen ar tori Jesus, ra üreni, “Johannes Soupapatais a tinikeemito reöm, pwe aipwe aisinuk ika en ätewe a kapas usun pwe epwe wareto, ika sipwe witiwiti pwal eman?”

²¹ Lon ena otun Jesus a apöchökülätä chomong aramas seni sokopaten ar samau me apwangapwang o alisi chokewe mi wor ngününgau wor, a pwal aneloi mesen chomong mi mesechun. ²² Iwe, Jesus a pölüeni nöün Johannes kewe chon kaiö, “Oupwe liwinsefälila o üreni Johannes mine oua küna o rongorong: Ekewe mi mesechun ra küna mwer, ekewe mi pechemä ra fetal, ekewe mi üriir rupun pwötür ra chikarsefäl, ekewe mi selingepüng ra rongorong, ekewe mi mäla ra manauetä, nge ekewe mi wöüngau ra rongorong afalafalen ewe Pworausen Manau. ✧ ²³ Ra feiöch chokewe resap tipemwaramwar rei.”

²⁴ Mürin än nöün Johannes chon kaiö feila, Jesus a popuetä le kapas ngeni ewe mwichen aramas usun Johannes, “Lupwen oua feila ren Johannes lon ewe fanüapö, met oua ekieki oupwe ngeni? Efoch äsät mi mwaroro ren asepwäl? ²⁵ Met chök oua feila ren pwe oupwe ngeni? Eman mwän mi üföüf üf mi pwetete o mürina? Ekewe aramas mi üföüf ei sokun üf o manau fän mecheres ra nonom lon imwen king. ²⁶ Oupwe üreniei, met echök oua feila ren pwe oupwe ngeni? Eman soufos? Ewer, nge oua fen küna eman mi lap seni eman soufos. ²⁷ Pun Johannes ätewe ekewe Toropwe mi Pin ra kapas usun: ‘Ngeni, üpwe tinala nei chon künö epwe akomwola mwomw, epwe amolätä efoch al fän itom.’ ✧ ²⁸ Üpwe ürenikemi, Johannes a lap seni aramas meinisin mi uputiu won fanüfan. Nge iön mi kisikis seni meinisin lon Mwün Kot a fen lap seni Johannes.”

²⁹ Iwe, ekewe aramas meinisin, pwal mwo nge ekewe chon ioni takises ra rongorong än Jesus kapas, ra aleasochisi än Kot kewe allük, pun ra papatais ren Johannes. ³⁰ Nge ekewe Farisi me ekewe Sensen Allük resap etiwa än Kot akot fän iter, pun resap mochen ar repwe papatais ren Johannes. ✧

³¹ Iwe, Jesus a pwal apasa, “Met üpwe tongeni awewe ngeni ei pilon aramasen ikenai? Met repwe wewe ngeni? ³² Ra wewe ngeni ekewe semirit mi mot lon ekewe lenien amömö. Eu mwich a kökkö ngeni pwal eu mwich, ‘Äm aia ettiki aangün ngenikemi, nge ämi ousap pworuk. Äm aia köl kölün lolilen, nge ämi ousap kechü!’ ³³ Johannes Soupapatais a feito, a echikefel, esap pwal ün wain, nge ämi oua apasa, ‘Mi wor eman anün rochopwak won.’ ³⁴ Nöün Aramas a feito, a mongö o ün, nge ämi oua apasa, ‘Ou ngeni ei mwän! I eman mi mongömong o ünümong, eman mi chiechi ngeni ekewe chon ioni takises me chon tipis.’ ³⁵ Än Kot tipachem a pwäla pwe a let ren chokewe mi etiwa.”

Jesus a nom lon imwen Simon ewe Farisi

7.36-50

³⁶ Iwe, eman lein ekewe Farisi a tüngor ngeni Jesus pwe epwe eti le mongö. Iwe, Jesus a feila lon imwan o a mottiu pwe epwe mongö. ³⁷ Lon ei telinimw a wor eman fefin mi tipis, a rong pwe Jesus a mongö lon imwen ewe Farisi. Neminei a uwei eu lö lon eu rume seni ewe fau itan alapaster. ³⁸ Iwe, a feito lükisökürün Jesus o fotopwäsuketiu arun pechen, a kechü o asupwätü chönün mesan won pechen Jesus. Mürin a talüpwasei

pechen Jesus ren meten möküran, a mitiri pechen o ninätü ewe lö won. ✧ ³⁹ Lupwen ewe Farisi mi köri Jesus pwe epwe mongö ren a küna ei, a ekieki lon lelukan, “Are ei mwän wesewesen eman soufos, epwe silei iön ewe fefin a atapa. Epwe silei pwe i eman fefin mi tipis.” ⁴⁰ Iwe, Jesus a üra, “Simon, üa mochen kapas ngonuk won och mettoch.” Simon a pölüeni, “Ewer sense, kopwe üreniei.”

⁴¹ Iwe, Jesus a popuetä le kapas, “Mi wor ruoman mwän mi liwinimang moni seni eman mwän mi wor nöün monien paro. Eman a liwinimang limepükü föün moni silifer, nge pwal ewe eman a liwinimang lime. ⁴² Ir me ruoman resap tongeni mönätü ar kewe liwinimang, iei mine ätewe a chök amusala ar kewe liwinimang. Iö leir epwe kon echeni ätewe?” ⁴³ Simon a pölüeni, “Üa ekieki pwe ewe eman a kon watte an liwinimang a musola.” Iwe, Jesus a üreni, “Mi pwüing mine ka apasa.” ⁴⁴ Mürin Jesus a kulu ngeni ewe fefin o üreni Simon, “Ka küna ei fefin? Ngang üa tolong lon imwom, nge kosap ngeniei koluk pwe tötölün pechei. Nge neminei a talü pechei ngeni chönün mesan o talüpwasei ngeni meten möküran. ⁴⁵ Iwe, en kosap etiwaei ren eu mitimit, nge neminei esap üküti le mitiri pechei seni chök otun ai tolong lon imwom tori iei. ⁴⁶ En kosap epiti mökürei ngeni löpwokus, nge neminei a epiti pechei ngeni löpwokus. ⁴⁷ Iei mine üa ürenuk, pokiten an kewe tipis mi chomong ra musola, iei popun an echeniei a fokun watte. Nge are än eman amusamusen tipis a kisikis, an eäni chen a pwal kisikis.” ⁴⁸ Mürin Jesus a üreni ewe fefin, “Om tipis kana ra musola.” ⁴⁹ Iwe, ätekewe mi eti Jesus le mot ngeni chepel ra kapasfengen lefiler, “Iö ätei pwe a mwo nge amusala tipis?” ⁵⁰ Nge Jesus a üreni ewe fefin, “Om lükülük a amanauok. Kopwe feila fän kinamwe.”

8

Ekewe fefin mi eti Jesus

8.1-3

¹ Eu fansoun mürin Jesus a saifeil lon ekewe telinimw me sopw o afalafala ewe Pworausen Manau usun Mwün Kot. Iwe, ekewe engol me ruoman chon kaiö ra eti, ² pwal ekoch fefin mi ngasala seni ekewe ngününgau mi nom wor o ra pöchökül seni ar kewe samau. Ikkei iter: Maria mi pwal iteni Maktalene, iei i neminewe füman ngününgau ra towu seni, ³ Joanna pwülüen Kusa, i eman mi wisen tümwünü imwen Herotes me Susana, pwal chomong fefin mi alisi Jesus me nöün kewe chon kaiö ren mine a wor rer. ✧

Pworausen awewe usun eman chon amworafeili pwükil

8.4-8

(Mat 13.1-9; Mark 4.1-9)

⁴ Iwe, chomong aramas ra feito seni eu me eu kewe telinimw, nge lupwen eu mwichen aramas mi chomong ra mwichfengen, Jesus a apworausana ngeniir ei pworausen awewe: ⁵ “Eman mwän a feila pwe epwe amworafeili fotan pwükil. Iwe, lupwen a amworafeili ekewe pwükil, ekoch föün ra mworotiu lepekin al, ia aramas ra puriretiu ie, nge ekewe machang ra äni. ⁶ Ekoch föün ra mworotiu lon lenien föüföü. Iwe, lupwen ekewe irä ra pwükütä, ra pwasala, pun ewe pwül ese nüküchöchön. ⁷ Pwal ekoch kewe föün ra mworotiu lein iräföföföf. Iwe,

ekewe iräföölüfööl ra märipökütä me ekewe irä o ra amopu ekewe irä. ⁸ Nge ekoch föün ra mworotiu lon pwül mi mürina. Ekewe irä ra märitä o fokun ua, efoch me efoch a uani ipükü.” Mürin Jesus a sopwela le apasa, “Iö a wor selingan epwe rongorong.”

Popun än Jesus afalafal lon pworausen awewe

8.9-10

(*Mat 13.10-17; Mark 4.10-12*)

⁹ Iwe, nöün Jesus kewe chon kaiö ra aisini Jesus met wewen ei pworausen awewe. ¹⁰ Jesus a pölüeni, “Kot a fen mwüt ngenikemi pwe oupwe silei ewe pworaus usun ekewe monomonen Mwün Kot, nge ren ekewe ekoch aramas a toriir lon pworausen awewe, pun repwe nenengeni, nge resap küna och, repwe pwal rongorong, nge resap wewe ren. ☆

Jesus a awewei ewe pworausen awewe usun eman chon amworafeili pwükil

8.11-15

(*Mat 13.18-23; Mark 4.13-20*)

¹¹ “Iei wewen ewe pworausen awewe: Ewe pwükil ina ewe kapasen Kot. ¹² Ekewe pwükil mi mworotiu lepekin al ra wewe ngeni chokewe mi rong kapasen Kot, nge Satan a feito o angei ewe kapas seni lon leluker, pwe resap lükü o eäni manau. ¹³ Ekewe pwükil mi mworotiu lon lenien föüföü ra wewe ngeni chokewe mi rongorong kapasen Kot o etiwa fän pwapwa. Nge pokiten ewe kapas esap tongeni warar lor, ra chök lükü lon fansoun mochomoch. Nge lupwen fansoun sosot a toriir, ra müttir kuf. ¹⁴ Ekewe pwükil mi mworotiu lein ekewe iräföölüfööl ra wewe ngeni chokewe mi rong kapasen Kot, nge öürek me wöün fanüfan, pwal pwapwan ei manau ra tolong lon leluker o amopu ewe kapas, pwe uar esap tongeni mau. ¹⁵ Nge ekewe pwükil mi mworotiu lon pwül mi mürina ra wewe ngeni chokewe mi rongorong kapasen Kot o amwöchü lon eu leluk mi mürina o aleasochis, ra likitü tori ra ua.

Eu lamp fän eu sepi

8.16-18

(*Mark 4.21-25*)

¹⁶ “Esap wor eman a keni eu lamp o anomu fän eu sepi are fän eu peet. Nge epwe isetä won lenian, pwe aramas repwe küna ewe saram lupwen repwe tolong leimw. ☆ ¹⁷ Mettoch meinisin mi opola epwe chök pwäpwäla, nge mettoch meinisin mi pwölüla epwe fatala o tolong lon saram. ☆ ¹⁸ Iei mine oupwe föröchü usun ämi aüseling. Pun iö a wor an, Kot epwe achomongala, nge iö esap wor an, Kot epwe mwo nge angei seni ewe ekis a ekieki a nom ren.” ☆

Inen Jesus me pwiin kana

8.19-21

(*Mat 12.46-50; Mark 3.31-35*)

¹⁹ Iwe, inen Jesus me pwiin kewe ra feito ren Jesus, nge resap tongeni tolong ren pokiten chomongun ekewe aramas. ²⁰ Eman a üreni Jesus, “Inom me pwiüm kewe ra nom lükün o mochen churuk.” ²¹ Nge Jesus a üreniir, “Inei me pwii ir chokewe mi rongorong kapasen Kot o aleasochis ngeni.”

☆ **8:10:** Ais 6.9-10 ☆ **8:16:** Mat 5.15; Luk 11.33 ☆ **8:17:** Mat 10.26; Luk 12.2 ☆ **8:18:** Mat 25.29; Luk 19.26

Jesus a aükätiu eu mölümöl

8.22-25

(Mat 8.23-27; Mark 4.35-41)

²² Lon eu rän Jesus me nöün kewe chon kaiö ra tötä won efoch wa. Iwe, a üreniir, “Ousipwe saila epek ewe noom.” Iei mine ra sai. ²³ Lupwen ra seres lon ewe noom, Jesus a möürüla. Eu asepwäl mi pöchökül a müttir eniti lon ewe noom o ekewe no ra nulong leföön ewe wa pwe a arapakan ngeni an epwe kokola. ²⁴ Iwe, ra feila ren Jesus, ra föngünätä o üreni, “Sounemenem, sounemenem, arapakan chök sipwele mäla.” Iwe, Jesus a pwätä o a allük ngeni asepwäl me no, iwe, ewe asepwäl a sötiu, a pwal lüala won matau. ²⁵ Mürin Jesus a üreni ekewe chon kaiö, “Ifan ämi lükülük?” Iwe, ra niuokus o weitifengeniir o kapasfengen lefiler, “Iö chök ätei? A chök allük ngeni ewe asepwäl me ekewe no, iwe, ra aleasochisi.”

Jesus a angasa eman mwän mi wor anün rochopwak won

8.26-39

(Mat 8.28-34; Mark 5.1-20)

²⁶ Iwe, Jesus me nöün kewe chon kaiö ra seresila tori ewe fanü Kerasa mi nom epek ewe nomun Kalilea. ²⁷ Lupwen Jesus a tiwelong wilifanü, eman mwän seni ewe telinimw mi wor anün rochopwak won a churi. Fansoun langatam ei mwän esap üföüf och, esap pwal nonom lon imw, nge a chök nonom lein ekewe peias. ²⁸ Iwe, lupwen a küna Jesus, a puchörütä, a aturala le pwül arun pechen Jesus o a leüömong le apasa, “Jesus Nöün Kot, ewe mi Unusen Tekia, met ka mochen föri ngeniei? Üa tüngor ngonuk, pwe kosap ariaföüüei.” ²⁹ A nöünöü ei ititin fos, pun Jesus a fen allük ngeni ewe anün rochopwak, pwe epwe towu seni. Fan chomong ewe anün rochopwak a tötä won. Inamwo ika ra kalapusei o föti pöün me pechen ngeni selimächä, nge a chök mwütifeseni ewe selimächä. Iwe, ewe anün rochopwak a cheela lon ewe fanüapö. ³⁰ Jesus a aisini, “Ifa itom?” Ewe mwän a pölüeni, “Itei mwichemong,” pun chomong anün rochopwak ra nom won. ³¹ Iwe, ekewe anün rochopwak ra tüngor ngeni Jesus, pwe esap asürela lon ewe leni mi fokun alolol. ³² Iwe, a wor epwi pwiin pik ra mongöfeil won ekewe chukutekison mi arap ngeni ewe leni. Iei mine ekewe anün rochopwak ra tüngor ngeni Jesus pwe epwe mwüt ngeniir pwe repwe tolong lon ekewe pik. Iwe, Jesus a mwüt ngeniir. ³³ Mürin ekewe anün rochopwak ra towu seni ewe mwän o tolong lon ekewe pik. Iwe, ekewe pwiin pik ra sätiu lepokun ewe achau o turulong lon ewe noom, pwe ra mop meinisin.

³⁴ Iwe, lupwen ekewe chon foleni ekewe pik ra küna met a fis, ra säfeil o apworaus a ewe pworaus lon ekewe telinimw me ekewe sopw. ³⁵ Mürin ekewe aramas ra feila, pwe repwe küna mine a fis. Nge lupwen ar feito ren Jesus, ra küna ewe mwän ekewe anün rochopwak ra towu seni, a mot arun pechen Jesus, a üföüf o miritila. Iwe, ir meinisin ra niuokus. ³⁶ Iwe, chokewe mi küna ei manaman ra apworaus a ngeni ekewe aramas usun än Jesus angasa ewe mwän. ³⁷ Mürin aramasen ewe fanü meinisin ra tüngor ngeni Jesus pwe epwe feila seniir, pun ra fokun niuokus. Iei mine Jesus a tötä won ewe wa o feila. ³⁸ Iwe, ewe mwän ekewe anün rochopwak ra towu seni a tüngor ngeni Jesus, “Kose mochen üpwe etuk.” Nge Jesus a tinala o üreni, ³⁹ “Kopwe liwinla lon imwom o apworaus a met Kot a föri ngonuk.” Iwe, ewe mwän a feila lon ewe telinimw o apworaus a met Jesus a föri ngeni.

Jesus a apöchöküla eman fefin o amanauasefäli eman nengin

8.40-56

(Mat 9.18-26; Mark 5.21-43)

⁴⁰ Iwe, lupwen Jesus a liwinsefäli epek ewe noom, ekewe aramas ra etiwa i, pun ra fen witiwiti an epwe feito. ⁴¹ Mürin eman mwän itan Jairus a feito, ätei i eman nöüwis lon imwen felikis lon ewe leni. A chapetiu arun pechen Jesus o tüngormau ngeni an epwe eti le feila lon imwan, ⁴² pun nöün we eman chök nengin engol me ruu ierin a arap ngeni mäla.

Lupwen Jesus a etala Jairus, chomong aramas ra chök etiepach ngeni. ⁴³ Iwe, a wor eman fefin a nom leir, a fokun riaföü ren an samaun fefin lon ükükün engol me ruu ier. Neminei a fangala meinisin mine a wor ren ngeni ekewe sousafei, nge esap wor eman a tongeni apöchöküla. ⁴⁴ Ei fefin a tap mürin Jesus lein ewe mwichen aramas, a atapa lepwülün üfan, iwe, an we samau a müttir köüla. ⁴⁵ Jesus a ais, “Tö a atapai?” Ir meinisin ra apasa pwe sap ir. Iwe, Petrus a üra, “Sounemenem, ekewe aramas meinisin ra nom ünükum o etiepach ngonuk.” ⁴⁶ Nge Jesus a üra, “Eman a atapai, pun üa mefi pwe och manaman a towu seniei.” ⁴⁷ Iwe, lupwen ewe fefin a mefi pwe esap tongeni opola, a feito fän chechek o chapetiu arun pechen Jesus. Lon ewe leni me mwen ekewe aramas meinisin neminei a apworaus a ngeni Jesus pwota a atapa i, pwal usun an pöchökületa lon ewe chök otun. ⁴⁸ Iwe, Jesus a üreni neminei, “Nei, om lükülük a apöchökülokotä. Kopwe feila fan kinamwe.”

⁴⁹ Lupwen Jesus a chüen kakapas, eman chon künö a feito seni imwen Jairus o üreni Jairus, “Noumw nengin a fen mäla. Kosap chüen aweiresi ewe sense.” ⁵⁰ Nge lupwen Jesus a rong ekei kapas, a üreni Jairus, “Kosap niuokus. Kopwe chök lükülük, noumw we nengin epwe manau.”

⁵¹ Lupwen Jesus a tori ewe imw, esap mwüt ngeni eman epwe eti le tolong, pwe Petrus chök me Johannes me James, pwal semen me inen ewe nengin. ⁵² Aramas meinisin mi nom lon ewe imw ra kechü o ngüngüres won ewe nengin, nge Jesus a üra, “Ousap kechü. Ewe nengin esap mäla, pwe a chök möür.” ⁵³ Iwe, ir meinisin ra takiri, pun ra silei pwe ewe nengin a mäla. ⁵⁴ Nge Jesus a amwöchü pöün ewe nengin o apasa fan leüömong, “Nengin, kopwe pwätä!” ⁵⁵ Iwe, a manauatä o pwätä lon ewe chök otun, nge Jesus a üreniir pwe repwe amongöni ewe nengin. ⁵⁶ Iwe, semen me inen ewe nengin ra mairü, nge Jesus a allük ngeniir, pwe resap üreni eman mine a fis.

9

Jesus a tinala nöün kewe engol me ruoman chon kaiö

9.1-6

(Mat 10.5-15; Mark 6.7-13)

¹ Iwe, Jesus a körifengeni nöün kewe engol me ruoman chon kaiö o ngeniir tufich me manaman, pwe repwe asüela anün rochopwak o apöchökülatä ekewe mi samau. ² Mürin a tiniirela pwe repwe afalafala usun ewe Mwün Kot o apöchökülatä ekewe mi samau. ³ Iwe, a üreniir, “Ousap uwei och lon ämi sai. Ousap uwou wok, pwotou, mongö, moni ika pwal aruachön üfemi. ⁴ Lon meni imw ra etiwakemi lon, oupwe nonom lon ewe imw tori oupwe towu seni ewe telinimw. ⁵ Nge lon meni telinimw resap etiwakemi lon, oupwe towu seni o wichikala pwülün fän pechemi, pwe epwe eu minen pwärätä ngeniir pwe ra mwäl.” ✧

⁶ Iwe, ekewe chon kaiö ra feila o saifeil lon ekewe sopw, ra afalafala ewe Pworausen Manau o apöchökülätä ekewe chon samau lon ekewe leni meinisin.

Herotes a osukosuk

9.7-9

(Mat 14.1-12; Mark 6.14-29)

⁷ Iwe, lupwen Herotes ewe samolun Kalilea a rong usun ekewe mettoch meinisin mi fisitä, a fokun osukosuk, pun ekoch aramas ra apasa pwe Johannes Soupapatais a manausefälitä. ⁸ Nge ekoch ra apasa pwe Elias a pwä, nge pwal ekoch ra apasa pwe eman me lein ekewe soufosun lom a manauatä. ✱ ⁹ Nge Herotes a ais, “Ngang üa pöküela üen Johannes, nge iö ei mwän üa rongorong usun an föri ekei mettoch?” Iwe, Herotes a sotuni an epwe küna Jesus.

Jesus a amongöü limungeröü mwän

9.10-17

(Mat 14.13-21; Mark 6.30-44; Joh 6.1-14)

¹⁰ Iwe, ekewe soukünö ra liwinsefäl o apworaus a ngeni Jesus meinisin mine ra föri. Iwe, Jesus a emweniirela ngeni ewe telinimw Petsaita. ¹¹ Lupwen ewe mwichen aramas ra rong usun, ra tapwela mürin. Iwe, Jesus a etiwere o afalafaleer usun Mwün Kot, a pwal apöchöküla chokewe mi samau. ¹² Nge lupwen a arapakan tuputiuen akkar, ekewe engol me ruoman chon kaiö ra feito ren Jesus o üreni, “Kopwe tinala ekewe aramas, pwe repwe feila lon ekewe sopw me leni mi arap, pwe repwe küt aner mongö me ar lenien möür, pun ei leni a toau seni lenien aramas.” ¹³ Nge Jesus a üreniir, “Ämi oupwe ngeniir met repwe mongö!” Iwe, ra pölüeni, “Iei chök ükükün mine a wor rem, limeföü pilawa me ruoman ik. Ka mochen aipwe feila o kamö mongö fän iten ei mwichen aramas?” ¹⁴ (A wor ina epwe ükükün limungeröü mwän mi nom ikenan.) Iwe, Jesus a üreni nöün kewe chon kaiö, “Oupwe üreni ekewe aramas pwe repwe mottiu akalime lon eu me eu mwich.” ¹⁵ Iwe, mürin än ekewe chon kaiö föri iei usun, ¹⁶ Jesus a angei ekewe limeföü pilawa me ekewe ruoman ik, a sachtetä läng o iotekin kilisou ngeni Kot wor. A kinikisiretiu o ngeni ekewe chon kaiö, pwe repwe ineti ngeni ekewe aramas. ¹⁷ Iwe, ir meinisin ra mongö o mötüla. Mürin ekewe chon kaiö ra amasoua engol me ruu chüük ren lusun ekewe mongö.

Petrus a pwärätä usun Jesus

9.18-20

(Mat 16.13-19; Mark 8.27-29)

¹⁸ Lon eu rän, lupwen Jesus a chök emanüla le iotek, nöün kewe chon kaiö ra feito ren. Iwe, Jesus a aisiniir, “Met ewe mwichen aramas ra apasa usi?” ¹⁹ Ra pölüeni, “Ekocho ra apasa pwe en Johannes Soupapatais, ekoch ra apasa pwe en Elias, nge pwal ekoch ra apasa pwe en eman lein ekewe soufosun lom a manauatä.” ✱ ²⁰ Iwe, Jesus a aisiniir, “Nge ämi, iö oua üra pwe ngang?” Petrus a pölüeni, “En Kraist nöün Kot.” ✱

Jesus a kapas usun an riaföü me mäla

9.21-27

(Mat 16.20-28; Mark 8.30-9.1)

✱ 9:8: Mat 16.14; Mark 8.28; Luk 9.19 ✱ 9:19: Mat 14.1-2; Mark 6.14-15; Luk 9.7-8 ✱ 9:20: Joh 6.68

²¹ Mürin Jesus a fokun allük ngeni nöün kewe chon kaiö, pwe resap fokun üreni eman ei pworaus. ²² A pwal üreniir, “Nöün Aramas epwe fokun tolong lon riaföü watte, epwe küna koput me ren ekewe souakom, ekewe souasor mi lap me ekewe Sensen Allük. Repwe niela, nge mürin ülüngat rän epwe manusefälitä.”

²³ Mürin a üreni ekewe aramas meinisin, “Are eman a mochen etiei, epwe pölükü manauan, epwe mwärei an iräpenges rän me rän o tapweto müri. ✱ ²⁴ Pun iö a mochen amanaua püsin manauan epwe pöüt seni, nge iö a likitala manauan fän itei epwe amanaua manauan. ✱ ²⁵ Epwe met lomoten än eman aramas epwe feiöchüni feiöchün unusen fanüfan, nge püsin manauan epwe pöüt seni, epwe pwal angei liwinin an tipis. ²⁶ Are eman a säwäsinié me ai kewe kapas, Nöün Aramas epwe pwal säwäsini lupwen epwe war lon an ling me än Saman ling me än ekewe chon läng mi pin ling. ²⁷ Üpwe allükülükü ngenikemi, pwe mi wor ekoch aramas mi nom ikkei resap mäla tori repwe küna ewe Mwün Kot.”

Jesus a wilila o lingela

9.28-36

(Mat 17.1-8; Mark 9.2-8)

²⁸ Eu wiik mürin än Jesus apasa ekei mettoch, a emwenala Petrus, Johannes me James o emweniiretä won eu chuk pwe epwe iotek. ✱ ²⁹ Iwe, lupwen a iotek, wowoon won mesan a wilila, üfan kana ra molupolup o pwechela. ³⁰ Lon ewe chök otun ruoman mwän ra nom ren Jesus o kapas ngeni, ir Moses me Elias. ³¹ Ätekei ra pwä lon ling seni läng o kapas ngeni Jesus usun an epwe apwönüetä än Kot we akot ren an mäla lon Jerusalem. ³² Petrus me chianan kewe ra fokun möür, nge ra nenela o küna än Jesus ling me ekewe ruoman mwän mi nom ren. ³³ Lupwen ekewe ruoman mwän ra feil seni Jesus, Petrus a üreni, “Sounemenem, a fokun öch ach nonom ikei. Aipwe aüetä ülüngat imw mangaku, eu fän itom, eu fän iten Moses nge pwal eu fän iten Elias.” (Petrus esap wesewesen weweiti met i a kapas usun.) ³⁴ Lupwen a chüen kakapas, eu kuchu a pwä o nürün a pwölürela. Iwe, ekewe chon kaiö ra niuokus, lupwen ewe kuchu a feitiu wor. ³⁵ Iwe, eu möngüngü a möngüngüwu me lon ewe kuchu, “Iei i nei üa filätä, oupwe aüselinga.” ✱ ³⁶ Iwe, lupwen ewe möngüngü a köüla, ra küna pwe Jesus chök a nom. Nge ekewe chon kaiö ra amwöchü ekei mettoch, nge resap üreni eman met ra küna lon ena rän.

Jesus a apöchöküla eman ät a wor eman ngününgau won

9.37-43a

(Mat 17.14-18; Mark 9.14-27)

³⁷ Iwe, sorotän ewe rän, lupwen Jesus me ekewe ülüman chon kaiö ra feitiu seni won ewe chuk, eu mwichen aramas mi chomong ra soundi. ³⁸ Iwe, eman mwän me lon ewe mwich a kötä, “Sense, üa tüngor ngonuk, kose mochen kopwe alisi nei we ät, pun ina i chök nei. ³⁹ Eman ngün a tötä won, pwe a müttir puchörütä, a achecha tori a puropurowu me lon awan. A chök akafeiengaua, nge esap mochen likitala. ⁴⁰ Üa tüngor ngeni noumw kewe chon kaiö pwe repwe asüela, nge resap tongeni.”

⁴¹ Iwe, Jesus a pölüeni, “Ämi eu täppin aramas mi lükümang o tipesosor. Ifa langatamen fansoun ai üpwe nonom remi o engila ngenikemi?” Mürin

✱ 9:23: Mat 10.38; Luk 14.27 ✱ 9:24: Mat 10.39; Luk 17.33; Joh 12.25 ✱ 9:28: 2.Pet 1.17-18

✱ 9:35: Ais 42.1; Mat 3.17; 12.18; Mark 1.11; Luk 3.22

a üreni ewe mwän, “Kopwe uwato noumw we ikei.” ⁴² Lupwen ewe ät a feito, ewe ngünungau a aturätü lepwül o achecha. Nge Jesus a allük ngeni ewe ngünungau pwe epwe towu seni. Iwe, ewe ät a pöchökületä. Mürin Jesus a aliwini ewe ät ngeni saman. ⁴³ Iwe, ekewe aramas meinisin ra mairü ren än Kot manaman mi pöchökül.

Jesus a kapassefäl usun an riaföü me mäla.

9.43b-45

(Mat 17.22-23; Mark 9.30-32)

Iwe, lupwen ekewe aramas ra chüen mwar ren ekewe mettoch meinisin Jesus a föri, a üreni nöün kewe chon kaiö, ⁴⁴ “Ousap manlükala met ei üpwe le ürenikemi. Nöün Aramas epwe tolong lepöün aramas.” ⁴⁵ Nge ekewe chon kaiö resap weweiti ekei kapas. A monomon seniir, pwe resap tongeni weweiti, nge ra niuokus ar repwe kapas ais ngeni usun.

Iö a lap seni meinisin?

9.46-48

(Mat 18.1-5; Mark 9.33-37)

⁴⁶ Iwe, a fis eu aninifengen lefilen ekewe chon kaiö won iö epwe lap me leir meinisin. ⁴⁷ Nge Jesus a silei met ra eäni ekiek, iei mine a angei eman semirit o aütai lepekin. ⁴⁸ Iwe, a üreniir, “Iö a etiwa ei semirit fän itei, a etiwaei. Nge iö a etiwaei a pwal etiwa ewe eman a tiniei. Pun iö a kis me leimi meinisin, ina i ätewe a lap mwemi meinisin.” ^{*}

Iö esap ü ngenikich, i chon fitikich

9.49-50

(Mark 9.38-40)

⁴⁹ Iwe, Johannes a üreni Jesus, “Sounemenem, äm aia küna eman mwän a asüela anün rochopwak fän itom, nge äm aia üreni pwe epwe ükütiü, pun i esap chiechiach.” ⁵⁰ Iwe, Jesus a üreni Johannes me nöün kewe chon kaiö, “Ousap pinei an angang. Pun eman esap ü ngenikemi, a fitikemi.”

Chon eu sopw lon Samaria resap etiwa Jesus

9.51-56

⁵¹ Iwe, lupwen a arap ewe fansoun än Jesus epwe le feitä läng, a nom lon letipan an epwe feila Jerusalem. ⁵² Iwe, a tinala chon kaiö pwe repwe akomwola mwan. Ra feila o tolong lon eu sopw lon Samaria, pwe repwe amolätä mettoch meinisin fän itan. ⁵³ Nge ekewe aramas lon ewe leni resap mochen etiwa, pun ra silei pwe a nom won an sai ngeni Jerusalem. ⁵⁴ Iwe, lupwen ekewe chon kaiö James me Johannes ra küna ei, ra üra, “Ka mochen pwe äm aipwe köratü ekkei seni läng, pwe epwe kenala ekei aramas?” ^{*} ⁵⁵ Nge Jesus a sap ngeniir o apwüngüür. ⁵⁶ Mürin Jesus me nöün kewe chon kaiö ra feila lon pwal eu sopw.

Weiresin än eman epwe tapwela mürin Jesus

9.57-62

(Mat 8.19-22)

⁵⁷ Iwe, lupwen ra fefetal won al, eman a üreni Jesus, “Ngang üpwe etuk ekis meinisin ia kopwe feila ie.” ⁵⁸ Jesus a üreni, “Ekewe foks a wor pwanger, ekewe machang a wor faser, nge Nöün Aramas esap wor eu leni ia epwe konola ie o asösö.” ⁵⁹ Iwe, Jesus a üreni pwal eman mwän, “Kopwe etiei.” Ewe mwän a üreni, “Ai samol, kose mochen kopwe akom mwüt ngeniei ai üpwe feila lon leniei o peiaseni semei.” ⁶⁰ Nge Jesus a

pölueni, “Kopwe likiti ngeni ekewe mi mäla repwe püsin peiaseni ar kewe somä. Nge en kopwe feila o arongafeili ewe Mwün Kot.”⁶¹ Pwal eman mwän a üra, “Ai samol, üpwe etuk. Nge kopwe akom mwüt ngeniei pwe üpwe feila o kapongen amwirimwir ngeni chon ai famili.”⁶² Jesus a pölueni, “Eman mi popuetä le tuw pwül nge a nenesefäl, esap fich ngeni ewe angangen Mwün Kot.”

10

Jesus a tinala ekewe Fik me Ruoman

10.1-12

¹ Mürin ekei pworaus, ewe Samol a pwal filätä fik me ruoman mwän o a tiniirela akaruoman pwe repwe akomwola mwan lon ekewe telinimw me leni meinisin püsin i epwe feila ie me mürin. ² Iwe, a üreniir, “Ewe räs a fokun watte, nge ekewe chon angang lon ra chökükün. Iei mine oupwe tüngor ngeni samolun ewe räs, pwe epwe tinala chon angang lon ewe räs. ✱ ³ Oupwe feila! Üpwe tinikemiila usun chök nienifön sip lein wolif. ✱ ⁴ Ousap uwou lenien iseis moni are pwotou are eu pean sus. Ousap üla pwe oupwe kapong me won al. ⁵ Lupwen oupwe tolong lon eu imw, oupwe akomwen apasa, ‘Kinamwe epwe tori chon ei imw.’ ⁶ Iwe, are eman aramas mi efich kinamwe a nom ikenan, ämi kinamwe epwe nonom won. Nge are eman esap efich kinamwe, ämi tüngorun kinamwe epwe liwinsefälitikemi. ⁷ Oupwe chök nonom lon ewe imw, oupwe mongö o ün mine ra etiwa ngenikemi, pun eman chon angang epwe angei liwinin. Ousap feila seni ewe imw oua nom lon o feila ngeni pwal eu. ✱ ⁸ Are oua tolong lon eu telinimw o ra etiwakemi, oupwe chök mongö mine ra ngenikemi. ⁹ Oupwe apöchöküla ekewe chon samau lon ena telinimw o üreni ekewe aramas mi nom lon, ‘Mwün Kot a arapoto remi.’ ¹⁰ Nge are oupwe tolong lon eu telinimw, nge resap etiwakemi, oupwe feila won ekewe al o apasa, ¹¹ ‘Ewe mwo pwülün lon ämi telinimw mi pachetä fän pechem aipwe wichiki ngenikemi, pwe eu minen pwärätä ngenikemi. Nge oupwe silei pwe Mwün Kot a arapoto remi.’ ✱ ¹² Üpwe ürenikemi, pwe lon ewe ränin kapwüng epwe kisikis feiengauen Sotom seni feiengauen ei telinimw. ✱

Feiengauen ekewe telinimw resap lükülük

10.13-16

(Mat 11.20-24)

¹³ “Feiengauom Korasim, feiengauom Petsaita! Pun are ekewe man-aman mi fen fis lomi ra fis lon Tirus me Siton, ekewe aramas lon ekei telinimw repwe mottiu me lomlom fän üfer seni tuk o amworatiu falang won mökürer pwe asisilen ar aier seni tipis. ✱ ¹⁴ Lon ewe ränin kapwüng epwe kisikis feiengauen Tirus me Siton seni ämi feiengau. ¹⁵ Nge en Kapernaum, ka ekieki pwe kopwe püsin atekiokotä tori läng? Apwi, sap ina, kopwe turuti lon hell!” ✱ ¹⁶ Iwe, Jesus a üreni nöün kewe chon kaiö, “Iö a aüselingakemi a aüselingaei, nge iö a aliwinikemi, a aliwiniei, nge iö a aliwiniei a aliwini ewe mi tiniei.” ✱

✱ **9:61:** 1.King 19.20 ✱ **10:2:** Mat 9.37-38 ✱ **10:3:** Mat 10.16 ✱ **10:7:** 1.Kor 9.14; 1.Tim 5.18 ✱ **10:11:** Mat 10.7-14; Mark 6.8-11; Luk 9.3-5; Föf 13.51 ✱ **10:12:** Ken 19.24-28; Mat 11.24; 10.15 ✱ **10:13:** Ais 23.1-18; Is 26.1-28.26; Sow 3.4-8; Am 1.9-10; Sek 9.2-4 ✱ **10:15:** Ais 14.13-15 ✱ **10:16:** Mat 10.40; Mark 9.37; Luk 9.48; Joh 13.20

Ekewe Fik me Ruoman ra liwinto

10.17-20

¹⁷ Iwe, ekewe fik me ruoman ra liwinto fän pwapwa chapur. Ra üreni Jesus, “Äm Samol, ekewe anün rochopwak mwo nge ra aleasochisikem, lupwen aia allük ngeniir fän itom.” ¹⁸ Nge Jesus a pölüeniir, “Üa küna Satan pwe a turutiu seni läng usun chök fifi. ¹⁹ Oupwe rongorong! Ngang üa ngenikemi manaman, pwe oua tongeni puri ekewe serepenit me mönükam, oupwe pwal pworaiti manamanen ewe Chon Oput. Iwe, esap wor och epwe tongeni afeiangauakemi. ✧ ²⁰ Nge ousap pwapwa pwe ekewe ngününgau ra aleasochisikemi, nge oupwe pwapwa pwe itemi a mak lon läng.”

Jesus a pwapwa

10.21-24

(Mat 11.25-27; 13.16-17)

²¹ Iwe, lon ewe fansoun Jesus a uren pwapwa ren Ngünmifel o a apasa, “Semei, en Samolon läng me fanüfan, üa kilisou ngonuk, pun ka anomomona ekei mettoch seni ekewe mi tipachem me silelap, nge ka pwärala ngeni ekewe tipate. Ewer, Semei, pun iei usun letipom.”

²² “Semei a anomu mettoch meinisin fän nemeniei. Esap wor eman a silei ewe Nau, pwe ewe Sam chök, esap pwal wor eman a silei ewe Sam, pwe ewe Nau chök me chokewe ewe Nau a filiiretä pwe epwe pwäri i ngeniir.” ✧

²³ Mürin Jesus a kul ngeni nöün kewe chon kaiö o üreniir lupwen ra imwüela, “Feiöchün chokewe mi küna mine ämi oua küna. ²⁴ Pun üpwe ürenikemi, pwe chomong soufos me king ra mochen küna met ämi oua küna, nge resap tongeni. Ra pwal mochen rongorong met ämi oua rongorong, nge resap tongeni.”

Ewe pworausen awewe usun ewe re Samaria

10.25-37

²⁵ Iwe, eman Sensen Allük a feito ren Jesus pwe epwe sotuni. A aisini, “Sense, met ngang üpwe föri pwe üpwe manaueni manau esemuch?”

²⁶ Jesus a pölüeni, “Met a mak lon ewe Allük? Met ka aleani?” ²⁷ Iwe, ewe mwän a pölüeni, “Kopwe echeni ewe Samol om Kot ren unusen lelukom, ren unusen ngünüm, ren unusen tufichum me unusen ekiekum. Kopwe pwal echeni chon arum usun püsin om echenuk.” ✧ ²⁸ Iwe, Jesus a pölüeni, “Mi pwüng mine ka apasa. Iei usun mine kopwe föri, iwe, kopwe manau.” ✧ ²⁹ Nge ewe Sensen Allük a mochen pwärala pwe i mi pwüng, iei mine a üreni Jesus, “Tö chon ori?”

³⁰ Iwe, Jesus a pölüeni, “A wor eman mwän a feil seni Jerusalem pwe epwe feitiu Jeriko. Lupwen a fetal won al, ekoch chon solä ra säwu o turufi, ra angei pisekin meinisin, ra awata o likitala pwe a arap ngeni mäla. ³¹ Iwe, a fis pwe eman souasor a fetaleto won ewe al. Nge lupwen a küna ewe mwän mi feiangau, a rik seni o fetal won ewe al me epek. ³² Pwal ina chök usun eman mwän seni ewe ainangen Lefi. Lupwen an pwerela ewe iwe, a pwal küna ewe mwän, nge a rik seni o fetal won ewe al me epek. ³³ Nge eman chon Samaria a pwal fetal won ewe al o a tori ewe leni ia ewe mwän mi feiangau a kon ie. Iwe, lupwen a küna, a fokun tongei. ³⁴ Iwe, a feito ren, a epiti kinasan kewe ngeni lö me wain o finiti

✧ **10:19:** Kölf 91.13 ✧ **10:22:** Joh 3.35; 10.15 ✧ **10:27:** Lif 19.18; Tut 6.5 ✧ **10:28:** Lif 18.5; Mat 22.35-40; Mark 12.28-34

ngeni wotai. Mürin a ekietä ewe mwän won nöün we man, a uwala ngeni eu imwen wasöla o a tümwünü. ✧ ³⁵ Sorotän ewe rän a angei ruoföü föün moni silifer o ngeni mine än ewe imwen wasöla. Iwe, a üreni, ‘Kopwe tümwünü ätei, nge lupwen üpwe liwinsefäliiti ikei, üpwe mönätiü meinisin mine esap naf won liwinin.’” ³⁶ Mürin Jesus a aisini ewe Sensen Allük, “Met ka ekieki, iö lein ekei ülüman mwän a föri föföörün eman chon arun ngeni ätewe mi feiengau ren chon solä?” ³⁷ Iwe, ewe Sensen Allük a pölüeni, “Ewe eman mi eäni kirikiröch ngeni.” Jesus a üreni, “Kopwe feila o föri usun chök met i a föri.”

Jesus a wasöla ren Marta me Maria

10.38-42

³⁸ Iwe, lupwen Jesus me nöün kewe chon kaiö ra sopwela ar sai, a tori eu sopw ia eman fefin itan Marta a etiwa i lon imwan ie. ³⁹ Marta a wor eman pwiin itan Maria, neminei a mottiu arun pechen Jesus o aüseling an afalafal. ✧ ⁴⁰ Nge Marta a fokun osukosuk ren chomong angang a föri. Iei mine a feito ren Jesus o üreni, “Ai Samol, kosap ekieki pwe pwii a atamepichiei ren an likiti ngeniei ekei angang meinisin. Kopwe üreni, pwe epwe alisie.” ⁴¹ Nge ewe Samol a pölüeni, “Marta, Marta, ka öürek o osukosuk ren chomong mettoch, ⁴² nge eu chök a lomot. Maria a filätä ewe mettoch mi aüchea, esap wor eman epwe angei seni.”

11

Jesus a afalafal usun iotek

11.1-13

(Mat 6.9-13; 7.7-11)

¹ Lon eu rän Jesus a iotek lon eu leni. Lupwen a wes le iotek, eman lein nöün kewe chon kaiö a üreni, “Äm Samol, kopwe aiti ngenikem iotek usun Johannes a aiti ngeni nöün kewe chon kaiö.” ² Iwe, Jesus a üreniir, “Lupwen oupwe iotek, iei usun mine oupwe apasa,

‘Semem, itom epwe pin,

Mwum epwe war.

³ Kopwe ngenikem anem mongö iteiten rän,

⁴ Kopwe amusala äm kewe tipis
pun äm aia amusala chokewe

meinisin mi tipis ngenikem.

Kosap atolongakem lon sosot.’”

⁵ Iwe, Jesus a üreni nöün kewe chon kaiö, “Epwe ifa are eman leimi epwe feila lon imwen chiechian lukenipwin o üreni, ‘Pwii, kose mochen üpwe liwinimang reöm ülüföü föün pilawa. ⁶ Eman chienei e war me sai ekärän chök tori imwei, nge esap wor anei mongö üpwe etiwa ngeni.’

⁷ Iwe, epwe ifa ika chienom we a pölüenawu me lon ewe imw, ‘Kosap osukosukaei. Asamen imwei a fen kapüng, nge ngang me nei kei aia möür. Ngang üsap tongeni pwätä pwe üpwe ngonuk och.’ ⁸ Iwe, üpwe ürenikemi, pwe ikamwo ätewe esap pwätä pwe epwe ngonuk ewe pilawa pokiten en chiechian, nge epwe fen pwätä o ngonuk meinisin mine ka osupwang ren, pun kosap säw le tütüngormau ngeni.

⁹ “Iei mine üpwe ürenikemi: Oupwe tütüngor, iwe, oupwe angei, oupwe küküt, iwe, oupwe künakün, oupwe fichifich, iwe, epwe wor asam mi suk ngenikemi. ¹⁰ Pun iö a tütüngor epwe angei och, iö a küküt epwe wor

künaan, nge iö a fichifich epwe wor asam mi suk ngeni. ¹¹ Iö leimi kana sam nöün epwe tüngorei eman ik, nge epwe ngeni eman serepenit? ¹² Nge are epwe tüngor eföü sokul, epwe ngeni eman mönükam? ¹³ Iwe, are mwö ämi aramas mi ngau oua silei ämi oupwe fang ngeni nöümi lifang mi mürina, epwe fen ifa me watten än Sememi lon läng fangela Ngünmifel ngeni chokewe mi tüngorei!”

Jesus me Pelsepul

11.14-23

(Mat 12.22-30; Mark 3.20-27)

¹⁴ Iwe, Jesus a asüela eman anün ro chopwak mi nom won eman mwän esap tongeni kapas pokiten ewe anü. Lupwen ewe anün ro chopwak a towu seni, ewe mwän a tongeni kapas. Iwe, ekewe aramas ra mwar ren. ¹⁵ Nge ekoch me leir ra apasa, “Ewe anü Pelsepul, ewe samolon anün ro chopwak a ngeni ewe manaman pwe epwe asüela ekewe anün ro chopwak.” ✧

¹⁶ Pwal ekoch ra ekiëkin ar repwe sotuni Jesus, iei mine ra tüngor ngeni pwe epwe föri eu manaman, pwe epwe pwä pwe Kot a tipeeu ngeni. ✧ ¹⁷ Nge Jesus a silei monomonen ar ekiëk, iei mine a üreniir, “Are eu mwü a kinikinfesen o fiufengen, ei mwü esap tongeni nonomola. Are eu famili a kinikinfesen o fiufengen, ei famili epwe parasfesen. ¹⁸ Nge are mwün Satan a kinikinfesen o fiufengen, ifa usun, mwün epwe tongeni nonomola? Pun ämi oua apasa, pwe üa asüela ekewe anün ro chopwak ren Pelsepul. ¹⁹ Iwe, are iei usun pwe üa asüela ekewe anün ro chopwak ren Pelsepul, met chiechiemi kewe ra asürela ren? Iei mine ir repwe alletätä pwe oua mwäl. ²⁰ Nge are üa asüela ekewe anün ro chopwak ren än Kot manaman, mürin Mwün Kot a fen torikemi.

²¹ “Iwe, are eman mwän mi pöchökül a mamasa püsin imwan fän an pisekin fiu, pisekin meinisin repwe tümwünöch. ²² Nge are eman mi pöchökül seni epwe fiu ngeni o akufu, epwe angei seni an kewe pisekin fiu meinisin a anomu an apilükülük won, epwe pwal ineti mine a soläni. ²³ Iwe, are eman esap etiei, i eman chon ü ngeniei, nge are eman esap alisie le ikioi, i eman chon kütifeseni. ✧

Liwinton eman ngününgau won eman aramas

11.24-26

(Mat 12.43-45)

²⁴ “Are eman ngününgau a towu seni eman aramas, a saifetal won fanü mi pwasapwas o kütta eu leni pwe epwe asösö lon. Are esap küna eu leni, epwe apasa, ‘Üpwe liwinsefäliiti imwei we üa towu seni.’ ²⁵ Iwe, lupwen epwe tori ewe imw, epwe küna pwe a limöch o kotöch. ²⁶ Mürin epwe feila o panato pwal füman ngün mi ngau seni i. Iwe, repwe feito o nonom lon. Iwe, manauen ewe aramas epwe fokun ngau seni me mwan.”

Feiöch enlet

11.27-28

²⁷ Iwe, lupwen Jesus a apasa ekei kapas, eman fefin me lon ewe mwich a kötä o üreni, “Feiöchün ewe fefin mi nöünüuk o oupwuk!” ²⁸ Nge Jesus a pölüeni, “Ewer, nge ra feiöch chokewe mi rong kapasen Kot o aleasochis ngeni.”

Aramas ra mochen küna eu asisil

11.29-32

(Mat 12.38-42)

²⁹ Lupwen ekewe aramas ra mwichfengen ren Jesus, a sowwela le kapas ngeniir, “A ifa me ngauen ei täppin aramas ikenai. Ra tünigor eu asisil, nge esor asisil epwe toriir, pwe ewe chök asisil mi fis ngeni Sona. ✧ ³⁰ Pun usun Sona a eu asisil ngeni ekewe aramasen Ninifa, iei usun Nöün Aramas epwe pwal eu asisil ngeni ei täppin aramas. ✧ ³¹ Lon ewe ränin kapwüing ewe kiwinen Sepa epwe ütä o atipisi ei täppin aramas. Pun neminei a saito seni fanüan mi toau, pwe epwe rongorong än king Salomon kapasen tipachem. Iwe, üpwe ürenikemi, pwe eman mi lap seni Salomon a nom ikei. ✧ ³² Lon ewe ränin kapwüing ekewe chon Ninifa repwe ütä o atipisi ei täppin aramas, pun ra aier ren än Sona afalafal. Nge üpwe ürenikemi, pwe eman mi lap seni Sona a nom ikei. ✧

Saramen inisich

11.33-36

(Mat 5.15; 6.22-23)

³³ “Iwe, esap wor eman a keni eu lamp, nge mürin a aopala ika anomu fän eu sepi. Nge epwe fen isetä ewe lamp won lenian, pwe aramas mi tolong lon ewe imw repwe küna ewe saram. ✧ ³⁴ Mesom ra usun chök eu lamp fän iten inisum. Are mesom ra fat, unusen inisum a saram. Nge are mesom a fatangau, unusen inisum epwe rochopwak. ³⁵ Iei mine kopwe tümwünüöchuk, pwe ewe saram mi nom lomw esap rochopwak. ³⁶ Are unusen inisum a saram, nge esap wor eu kinikin a rochopwak, unusen inisum epwe saram usun chök eu lamp mi tinöch a asaramok.”

Jesus a atipisi ekewe Farisi me ekewe Sensen Allük

11.37-54

(Mat 23.1-36; Mark 12.38-40)

³⁷ Iwe, lupwen Jesus a wes le kapas, eman Farisi a köri pwe epwe mongö ren. Iei mine Jesus a feila lon imwan o a mot ngeni mongö. ³⁸ Iwe, ewe Farisi a weitifengeni lupwen a küna, pwe Jesus esap talü pöün mwen an epwe mongö. ³⁹ Iei mine ewe Samol a kapas ngeni, “Ämi kana Farisi, oua limeti lükün ämi kewe kap me sepi, nge lon letipemi a uren mochenia me föföringau. ⁴⁰ Ämi mi umwes! Ifa usun, Kot ewe mi föri lükün esap pwal föri lon? ⁴¹ Nge oupwe fang ngeni ekewe mi wöüingau mine a nom lon ämi kewe kap me sepi, mürin mettoch meinisin repwe limöch me remi.

⁴² “Feiengauemi, ämi Farisi! Oua ngeni Kot leengolun ämi nofitin mongö usun chök mint me warung me sokopaten chön irä, nge oua tümwünüingau ngeni pwüingüöch me ämi echeni Kot. Oupwe föri ekewe, nge oupwe pwal tümwünüöchü ekei. ✧ ⁴³ Feiengauemi, ämi Farisi! Pun oua sani le mot won ekewe lenien mot än ekewe mi lap lon ekewe imwen felikis, pwal än ekewe aramas kapong ngenikemi fän suföl me lon ekewe lenien amömö. ⁴⁴ Feiengauemi! Pun oua usun chök ekewe peias esap wor eman a küna, aramas ra fetal won, nge resap silei.”

⁴⁵ Iwe, eman lein ekewe Sensen Allük a üreni Jesus, “Sense, lupwen ka kapas usun ekei mettoch, ka pwal aitengauakem.” ⁴⁶ Jesus a pölüeni, “Feiengauemi, pwal ämi kewe Sensen Allük! Pun oua isetä mettoch

✧ 11:29: Mat 16.4; Mark 8.12 ✧ 11:30: Sona 3.4 ✧ 11:31: 1.King 10.1-10; 2.Kron 9.1-12

✧ 11:32: Joh 3.5 ✧ 11:33: Mat 5.15; Mark 4.21; Luk 8.16 ✧ 11:42: Lif 27.30

mi chou won ekewe aramas, a fokun weires ar repwe mwärei, nge ämi ousap mwo nge pwisi ngeni efoch ätumi ekewe mettoch mi chou. ⁴⁷ Feiengauemi! Ämi oua alinga peiasen ekewe soufos ämi kewe lewo ra niela. ⁴⁸ Ren ei oua pwärätä pwe oua tipeeu ngeni mine ämi kewe lewo ra föri. Ir ra niela ekewe soufos, nge ämi oua alinga peiaser kewe. ⁴⁹ Iei popun Tipachemen Kot a apasa, 'Üpwe tinala rer soufos me soukünö. Repwe niela ekoch me leir, nge ekoch repwe ariaföüür.' ⁵⁰ Iei mine ei täppin aramas repwe küna kapwüing fän iten ninnilan ekewe soufos meinisin seni lepopun fanüfan tori iei, ⁵¹ seni ewe fansoun ninnilan Epel tori ninnilan Sekaraia mi mäla lefilen ewe rongen asor me ewe Imw mi Pin. Ewer, üpwe ürenikemi, ei täppin aramas repwe küna kapwüing fänäsengesiir meinisin. ✧ ⁵² Feiengauemi, ämi Sensen Allük! Pun oua amwöchü kien asamen silei (mettochun mwün läng). Püsin ämi ousap tolong lon, nge oua epeti chokewe mi mochen tolong lon." ⁵³ Iwe, lupwen Jesus a towu seni ewe imw, ekewe Sensen Allük me ekewe Farisi ra popuetä le fokun esita o ais ngeni chomong kapas ais usun chomong mettoch. ⁵⁴ Ra ooperi, pun ra mochen aöi ika epwe apasa och kapas mi mwäl.

12

Eu Kapasen afäli ren likatuputup

12.1-3

(Mat 10.26-27)

¹ Lon ena fansoun, lupwen chomong ngeröün aramas ra chufengen pwe ra chök ipwerifengeniir, Jesus a akomwen kapas ngeni nöün kewe chon kaiö, "Oupwe afälíkemi ren ewe iis än ekewe Farisi, wewen ar likatuputup. ✧ ² Mettoch meinisin mi pwölüla epwe pwäla, pwal mettoch meinisin mi monomonola aramas repwe silei. ✧ ³ Iei mine meinisin mine oua apasa le roch, aramas repwe rong lon saramen rän. Pwal meinisin mine oua möngününgün ngeni eman lon eu ruum mi kesip, aramas repwe leüömong le apasatä me won osun ekewe imw.

Iö sipwe niuokusiti

12.4-7

(Mat 10.28-31)

⁴ "Chiechiei kana, üpwe ürenikemi, ousap niuokusiti chokewe mi niela inis, nge mürin resap chüen tongeni föri och. ⁵ Nge üpwe aiti ngenikemi iö oupwe niuokusiti: Oupwe niuokusiti Kot, i ewe eman a wor an pwüüing pwe epwe tongeni aturalong eman lon hell mürin an niela. Ewer, üpwe ürenikemi pwe iei i ewe oupwe niuokusiti.

⁶ "Ifa usun, aramas resap amömöla limman nichok ren ruoföü kapa? Iei mwo nge sap eman ekewe nichok Kot a manlükala. ⁷ Nge meten möküremi kewe mwo nge ra lea meinisin. Iei mine ousap niuokus, oua aüchea seni chomong nichok.

Ach pwärätä me ach amamäsini Kraist

12.8-12

(Mat 10.32-33; 12.32; 10.19-20)

⁸ "Iwe, üpwe ürenikemi, pwe iö a pwäriei mwen mesen aramas, Nöün Aramas epwe pwal pwäri mwen mesen nöün Kot kewe chon läng. ⁹ Nge

✧ 11:51: Ken 4.8; 2.Kron 24.20-21 ✧ 12:1: Mat 16.6; Mark 8.15 ✧ 12:2: Mark 4.22; Luk 8.17

iö a amam ngang mwen mesen aramas, Nöün Aramas epwe pwal amam i mwen mesen nöün Kot kewe chon läng. ¹⁰ Iwe, eman mi apasa eu kapasen ü ngeni Nöün Aramas epwe musola. Nge iö a apasa kapasen turunufas ngeni Ngünmifel esap musola. ✧ ¹¹ Lupwen repwe etekinikemiila pwe oupwe kapwüing lon ekewe imwen felikis, ika mwen ekewe kepina me samol, ousap öüreki mine oupwe pwärätä fän itemi are mine oupwe apasa. ¹² Pun Ngünmifel epwe aiti ngenikemi lon ewe chök otun mine oupwe apasa.” ✧

Pworausen awewe usun ewe chon pisekisek mi umwes

12.13-21

¹³ Iwe, a wor eman mwän me lon ewe mwichen aramas a üreni Jesus, “Sense, kose mochen kopwe üreni pwii pwe epwe ineti mettochum me won semem.” ¹⁴ Jesus a pölüeni, “Ätenan, iö a ngeniei ewe pwüing pwe üpwe apwüngükemi are ineti mettochumi?” ¹⁵ Mürin a sopwela le kapas ngeniir meinisin, “Oupwe mamasa o tümwünüöchükemi seni sokopaten mochenia meinisin. Pun manauen eman aramas esap longolong won met mi nom ren, inamwo are a fokun pisekisek.”

¹⁶ Mürin Jesus a üreni ei pworausen awewe: “A wor eman mwän mi pisekisek, fanüan a fokun ukua. ¹⁷ Iwe, a ekieki lon lelukan, ‘Met üpwe tongeni föri? Esap wor eu leni ia üpwe tongeni iseis ie uän fanüei meinisin.’ ¹⁸ Mürin a apasa, ‘Iei mine üpwe föri. Üpwe atomwala ai kewe lenien iseis o aüetä ekocho mi watte seni. Ikenan üpwe iseis ai kewe föün wiich me piseki meinisin. ¹⁹ Mürin üpwe üreni ngüni: Ngüni, a wor chomong mettochumw, a naf ngonuk lon chomong ier. Kopwe manau fän kinamwe. Kopwe momongö o ükün o pwapwa.’ ²⁰ Nge Kot a üreni, ‘Umwesum, lon chök ei pwinin kopwe le mäla. Iwe, iö epwe eäni ekei mettoch meinisin ka amolätä fän itom?’ ²¹ Iei usun mine epwe fis ngeni chokewe ra iseis mettochur fän püsin iter, nge resap wöü me ren Kot.”

Lükü Kot

12.22-31

(Mat 6.25-34)

²² Mürin Jesus a üreni nöün kewe chon kaiö, “Iei mine üpwe ürenikemi, pwe ousap öüreki anemi mine oupwe manau ren, ousap pwal öüreki mine oupwe üföüf. ²³ Pun manau a aüchea seni mongö, nge ewe inis a aüchea seni üf. ²⁴ Oupwe nenengeni ekewe ängä: Resap fofot, resap pwal kinikin, esap wor ar imwen iseis, nge Kot a fen amongöniir. Ämi oua kon aüchea seni ekewe machang. ²⁵ Ifa usun, iö leimi epwe tongeni atama manauan ren an öürek? ²⁶ Are ousap tongeni föri ei sokun mettoch mi kisikis, pwota chök oupwe öüreki ekewe ekocho mettoch? ²⁷ Oupwe nenengeni ekewe kiopun lemäl usun ar märitä: Resap angang are föri üfer. Nge üpwe ürenikemi, pwe ewe mwo king Salomon lon wöün meinisin esap üföüf üf mi ling usun lingen ekei pön kiop. ✧ ²⁸ Are iei usun än Kot aüfa ekewe fetilin lemäl, fetil mi wor ikenai, nge lesor a koturulong lon um, ifa usun esap fokun achocho le aüföüfakemi lap seniir? Ämi oua lükülökkisikis! ²⁹ Iei mine ousap chök ekieki lon letipemi mine oupwe mongö pwal mine oupwe ün, ousap öürek usun. ³⁰ Pun chon ekewe mwü won fanüfan ra chök öüreki ekei mettoch meinisin. Sememi we a silei pwe

✧ **12:10:** Mat 12.32; Mark 3.29 ✧ **12:12:** Mat 10.19-20; Mark 13.11; Luk 21.14-15 ✧ **12:27:** 1.King 10.4-7; 2.Kron 9.3-6

oua osupwangen ekei mettoch. ³¹ Nge oupwe chök ekieki lon letipemi ewe Mwün Kot, iwe, i epwe ngenikemi ekei mettoch meinisin.

Ewe wöü lon Läng

12.32-34

(Mat 6.19-21)

³² “Ousap niuokus, ämi mwich mi kisikis, pun Sememi a pwapwaren an epwe ngenikemi ewe mwü. ³³ Oupwe amömöla pisekimi, nge liwinin oupwe ngeni ekewe chon wöüngau. Oupwe awora ämi kewe sokun pwotou resap tongeni tala, oupwe iseis wöümi lon läng, ewe ia esap tongeni kisikisila me ie, pun chon solä resap tongeni angeer, nge pwötür resap tongeni atarela. ³⁴ Pun ia wöümi a nom ie, ikenan lelukemi epwe pwal nom ie.

Ewe chon angang mi mamasaoch

12.35-40

³⁵ “Oupwe anükü üfemi o molotä ngeni mine epwe fis, oupwe atina nöümi lamp pwe epwe tin, * ³⁶ pwe oupwe usun chök ekewe chon angang mi witiwiti nöür we masta an epwe liwinto seni eu fetalapen apwüpwürü. Lupwen epwe war o fichifich, repwe müttir suki ngeni asam. * ³⁷ A ifa me feiöchün ekewe chon angang nöür we masta a küneer pwe ra nennela o molotä lupwen a liwinsefäl. Enlet, üpwe ürenikemi, pwe ewe masta epwe üföüfolong üfen chon angang, epwe amoteer ngeni chepel o ngeniir aner mongö. ³⁸ Epwe ifa me feiöchün ekewe chon angang are nöür we masta a küna pwe ra molotä, inamwo ika epwe war lukenipwin ika wilingäch! ³⁹ Nge oupwe chök silei, pwe are mine imwan we epwe silei otun än ewe chon solä epwe war, esap mwüt ngeni ewe chon solä pwe epwe atalong imwan. ⁴⁰ Ina usun pwal ämi oupwe molotä, pun Nöün Aramas epwe war lon eu otun ousap ekieki ngeni.” *

Ewe chon angang mi allükülük pwal ewe esap allükülük

12.41-48

(Mat 24.45-51)

⁴¹ Iwe, Petrus a aisini, “Ai Samol, ei pworausen awewe ka apworausafän item ika fän iten aramas meinisin?” ⁴² Iwe, ewe Samol a pölüeni, “Tö chök ewe chon angang mi allükülük o tipachem? Ätewe nöün masta epwe seikätä pwe epwe nemeni nöün kewe chon angang o ngeniir wiser mongö lon fansoun fich. ⁴³ Feiöchün ewe chon angang ika nöün we masta a küna pwe a föri iei usun lupwen a war. ⁴⁴ Enlet, üpwe ürenikemi, nöün we masta epwe seikätä, pwe epwe nemeni mettochun meinisin. ⁴⁵ Nge are ei chon angang a ekieki lon lelukan, ‘Nei we masta epwe fokun mang an liwinto,’ are epwe popuetä le wichi chienan kewe chon angang mwän me fefin o popuetä le momongö o ükün pwe a puchola, ⁴⁶ mürin ewe masta epwe liwinsefäl lon eu rän ewe chon angang esap molotä lon, pwal lon eu fansoun esap silei. Iwe, ewe masta epwe apwüngü ngeni mäla o atolonga lon lenien chokewe resap allükülük. ⁴⁷ Ewe chon angang mi silei letipen nöün we masta, nge esap molotä ika föri mine a mochen, epwe angei wichiwich mi chomong. ⁴⁸ Nge ewe chon angang esap silei letipen nöün we masta, nge a föri sokun föföör epwe küna apwüng ren, epwe angei wichiwich mi chökükün. Eman aramas mi angei chomong,

repwe pwal mochen angei chomong me ren, nge are aramas ra lükü ngeni eman chomong, repwe pwal mochen angei met mi lap seni.

Jesus popun an fis aimwüfesen

12.49-53

(Mat 10.34-36)

⁴⁹ “Ngang üa feito pwe üpwe soni ekkei won fanüfan o üa äneän pwe epwe fen nget. ⁵⁰ Mi wor eu papatais üpwe papatais ngeni, nge üa chök fokun riaföü tori epwe wesila. ✧ ⁵¹ Oua ekieki pwe üa feito pwe üpwe uwato kinamwe won fanüfan? Apwi, üsap uwato kinamwe pwe aimwüfesen. ⁵² Seni ei fansoun, eu famili a wor limman lon repwe aimwüfesen, ülüman repwe ü ngeni ruoman, nge ruoman repwe ü ngeni ülüman. ⁵³ Samasam repwe ü ngeni nöür mwän, nge ekewe mwän repwe ü ngeni semer. Inein repwe ü ngeni nöür fefin, nge ekewe fefin repwe ü ngeni iner. Iwe, inen pwülüen ekewe fefin repwe ü ngeni pwülüen nöür kewe mwän, nge ekewe fefin repwe ü ngeni inen pwülüer kewe.” ✧

Weweiti lapalapen fansoun

12.54-56

(Mat 16.2-3)

⁵⁴ Iwe, Jesus a pwal üreni ekewe aramas, “Lupwen oua küna ietän eu kuchu me lotou, oua müttir apasa pwe epwe püng üt, iwe, a püng üt. ⁵⁵ Nge lupwen oua mefi enienin asepwälin ör, oua apasa pwe epwe pwichikar, iwe, a pwichikar. ⁵⁶ Ämi chon atuputup! Oua tongeni osuni usun ränöch me räningau ren ämi nengeni lapalapen fanüfan me läng, nge pwota ousap silei usun ämi awewe lapalapen fansoun ikenai?

Kinamwe ngeni chon ü ngeni kich

12.57-59

(Mat 5.25-26)

⁵⁷ “Pwota ousap püsin apwüngükemi won mine a pwüng? ⁵⁸ Lupwen oua feilapök me ewe chon atipisuk ngeni imwen kapwüng, kopwe fokun achocho le akinamwela lefilom me ätewe, me mwen ämi oupwe tori ewe imwen kapwüng. Ika kosap föri iei usun, ewe chon atipisuk epwe etekinukela mwen ewe soukapwüng, nge ewe soukapwüng epwe atolongok le pöün polis, iwe, kopwe tolong lon imwen fötek. ⁵⁹ Üpwe ürenuk, kopwe nonom ikenan tori om kopwe wes le mönätü unusen om we liwinimang.”

13

Oupwe aier seni ämi tipis pwe ousap pöütmwäila

13.1-5

¹ Lon ena fansoun ekoch aramas ra nom ikenan, ra apworaus a ngeni Jesus usun ekewe chon Kalilea Pilatus a niirela, pwe chaar a nofit ngeni chaan ar kewe mönün asor ra eäni asor ngeni Kot. ² Iwe, Jesus a aisiniir, “Oua ekieki, pwe ekei chon Kalilea ra kon tipis lap seni ekewe ekoch chon Kalilea, pokiten ra ninnila lon ei sokun lapalap? ³ Apwi, sap ina! Üpwe ürenikemi, pwe are ämi ousap aier seni ämi tipis, oupwe pwal mäla ämi meinsin usun chök ir. ⁴ Are ifa usun, ekewe engol me waluman aramas mi mäla, lupwen ewe imw tekia lon Siloam a turutiu wor? Oua ekieki, pwe ir ra kon tipis lap seni ekewe aramas meinsin mi nom lon

Jerusalem? ⁵ Apwi, sap ina! Nge üpwe ürenikemi, pwe are ämi ousap aier seni ämi tipis, oupwe pwal mäla ämi meinisin usun chök ir.”

Pworausen awewe usun ewe irä fiik esap wor uan
13.6-9

⁶ Mürin Jesus a üreniir ei pworausen awewe: “A wor eman mwän mi wor efoch an irä fiik, a märitä lon an tanipin wain. Iwe, a feila pwe epwe nengeni are a ua, nge esap küna och. ⁷ Iwe, a üreni ewe chon tümwünü an we tanipi, ‘Nengeni, lon ükükün ülüngat ier üa feito ikei, pwe üpwe nengeni ika ei irä fiik a wor uan, nge üsap fokun küna och. Kopwe üküfala! Pwota epwe angemwäli feiöchün ei pwül?’ ⁸ Nge ewe chon tümwünü ewe tanipi a pölüeni, ‘Ai samol, kose möchen kopwe mwo likiti pwal eu ier, pwe üpwe tuw ünükün o koiasini. ⁹ Iwe, are ewe irä a ua mürin eu ier, epwe öch, nge are esap ua, kopwe tongeni üküfala.’”

Jesus a apöchöküla eman fefin lon ränin sapat
13.10-17

¹⁰ Iwe, lon ränin sapat Jesus a afalafal lon eu imwen felikis. ¹¹ A wor eman fefin ikenan a wor eman ngününgau won, pwe a sasamau lon ükükün engol me walu ier. Neminei a pworofengen inisin, pwe esap tongeni wenecharatä. ¹² Iwe, lupwen Jesus a küna neminewe, a kökköri o apasa, “Nemin, kopwe ngas seni om samau!” ¹³ Iwe, Jesus a iseis pöün won, lon ewe chök otun ewe fefin a wenecharatä o mwareiti Kot.

¹⁴ Nge ewe nöüwisen ewe imwen felikis a chou, pwe Jesus a apöchökülätä ewe fefin lon ewe ränin sapat. Iei mine a üreni ekewe aramas, “A wor wonu ränin ach sipwe föri ach angang lon. Oupwe feito lon ekei rän pwe oupwe küna pöchökül, nge sap lon ränin sapat.” ✱

¹⁵ Mürin ewe Samol a üreni, “Ämi chon likatuputup! Ifa usun ousap apichi ririn nöümi kow ika aas seni ewe ia a riri ie o etekinala, pwe oupwe aünü ngeni koluk lon ewe ränin sapat? ¹⁶ Nge ikei a nom eman fefin, i mwirimwirin Apraham, Satan a föti lon ükükün engol me walu ier. Ifa usun, esap pwüng ngeni an epwe küna ngas lon ränin sapat?” ¹⁷ Iwe, lupwen Jesus a apasatä ekei kapas, ekewe chon ü ngeni meinisin ra säw. Nge ekewe aramas ra fokun pwapwa ren ekewe mettoch mi amwarar Jesus a föri.

Pworausen awewe usun ewe föün pwükil mi fokun kükün
13.18-19
(Mat 13.31-32; Mark 4.30-32)

¹⁸ Mürin Jesus a ais, “Met ewe Mwün Kot a wewe ngeni? Met üpwe tongeni awewe ngeni? ¹⁹ A wewe ngeni eföü föün pwükilin irä mi fokun kükün, eman aramas a angei o fotukätü lon an tanipi. Iwe, ewe föün irä a märitä o wiliti efoch irä, nge machang ra föri faser won palan kana.”

Pworausen awewe usun iis
13.20-21
(Mat 13.33)

²⁰ Iwe, Jesus a pwal ais, “Met üpwe tongeni awewe ngeni ewe Mwün Kot? ²¹ A wewe ngeni iis eman fefin a angei o nofitifengeni me eu watten sepien pilawa mi amas tori unusen ewe pilawa a pwotä.”

Ewe asam mi pwangekükün

13.22-30

(Mat 7.13-14,21-23)

²² Iwe, Jesus a feilfetal lon ekewe telinimw me sopw o afalafala ekewe aramas, nge a fefetal ngeni Jerusalem. ²³ Iwe, eman a aisini, “Ai Samol, ifa usun, repwe chokükün chök ir mi küna manau?” Jesus a pölüeniir, ²⁴ “Oupwe achocho ämi oupwe tolong lon ewe asam mi pwangekükün. Pun chomong aramas ra sotuni ar repwe tolong lon, nge resap tongeni. ²⁵ Iwe, are samolun ewe imw epwe pwätä o öppüngala ewe asam, mürin oupwe ütä lükün o popuetä le fichifich ngeni ewe asam o apasa, ‘Äm samol, kose mochen suki ngenikem ewe asam.’ Nge i epwe pölüenikemi, ‘Ngang üsap silekemi ia oua feito me ie.’ ²⁶ Mürin oupwe pölüeni, ‘Äm aia etuk le mongö o ün, nge en ka afalafal lon ach telinimw.’ ²⁷ Nge i epwe ürenisefälükemi, ‘Üsap silekemi ia oua feito me ie. Oupwe feil seniei ämi chon föföringaul’ ✧ ²⁸ Iwe, oupwe fokun puchör o akarüangi ikenan, lupwen oupwe küna Apraham me Isaak me Jakop me ekewe soufos meinisin lon Mwün Kot, nge püsin ämi oupwe kösüla lükün. ✧ ²⁹ Aramas repwe feito seni ötiu me lotou, pwal seni efeng me ör o mot ngeni ewe kametip lon Mwün Kot. ✧ ³⁰ Ewer, chokewe mi kükümwir lon ei fansoun repwe akom, nge chokewe mi akom lon ei fansoun repwe kükümwir.” ✧

Jesus a tongei Jerusalem

13.31-35

(Mat 23.37-39)

³¹ Iwe, lon ewe chök fansoun ekoch ekewe Farisi ra feito ren Jesus o üreni, “Kopwe sü seni ikei o feila ekis, pun Herotes a ekiekin niikela.” ³² Jesus a pölüeniir, “Oupwe feila o üreni ena foks, ‘Ngang üa asüela anün rochopwak o apöchöküla aramas ikenai me lesor, nge lon ewe aülüngatin rän üpwe awesala ai we angang.’ ³³ Inamwo ei, nge üpwe chök sopwela ai sai ikenai, lesor pwal sorotän lesor. Pun esap pwüing ngeni eman soufos an epwe ninnila ekis, pwe lon Jerusalem chök. ³⁴ “Ämi chon Jerusalem, ämi chon Jerusalem, oua niela ekewe soufos o monei fau ngeni ekewe chon künö Kot a tiniireto remi. Fän chomong üa mochen achufengeni nöümi aramas, usun eman chuko a achufengeni nöün fan pöükässin, nge ämi ousap mochen. ³⁵ Nengeni, ämi we imwenfel epwe pönüla. Nge ngang üpwe ürenikemi, pwe ousap chüen künaei, tori oupwe apasa, ‘A feiöch ätewe a feito fäniten ewe Samol.’ ” ✧

14*Jesus a apöchöküla eman mwän mi samau*

14.1-6

¹ Iwe, lon eu ränin sapat Jesus a feila pwe epwe mongö lon imwen eman souemwenin ekewe Farisi. Iwe, ekewe aramas ra chök opoperi. ² Ikenan a wor eman mwän a feito ren Jesus mi pwo unusen inisin. ³ Iwe, Jesus a aisini ekewe Sensen Allük me ekewe Farisi, “Ifa usun, allükün ach lamalam a mwütätä ach sipwe apöchöküla aramas lon ränin sapat ika sisap?” ⁴ Nge ir resap apasa och. Iei mine Jesus a amwochatä ewe mwän, a apöchöküla o tinala. ⁵ Mürin Jesus a üreniir, “Are eman leimi a wor eman nöün ät ika eman nöün kow, a fis ngeni pwe a turulong lon eu

✧ 13:27: Kölf 6.8 ✧ 13:28: Mat 22.13; 25.30 ✧ 13:29: Mat 8.11-12 ✧ 13:30: Mat 19.30; 20.16; Mark 10.31 ✧ 13:35: Kölf 118.26; Jer 22.5

chönüttu lon eu ränin sapat, ifa usun, ousap müttir le efietä seni lon ewe chönüttu, inamwo ika a sereni ewe ränin sapat?” * 6 Nge ir resap tongeni pölüeni och usun kei kapas.

Tipetekison me etiwetiwöch

14.7-14

⁷ Iwe, Jesus a küna pwe ekoch wasöla mi fiti ewe mongö ra chök fili ekewe lenien mot än ekewe aramas tekia, iei mine a üreniir meinisin ei pworausen awewe: ⁸ “Lupwen eman a köruk om kopwe fiti eu kametipen apwüpwülü, kosap mottiu won ewe lenien mot än ekewe aramas tekia. Pun a tongeni fis, pwe eman aramas mi tekia senuk a pwal kö ngeni ewe kametip. ⁹ Iwe, mürin ewe mi kökkörükemi me ruoman epwe feito o apasa ngonuk, ‘Kopwe tötiu seni ei lenien mot, pwe ätei epwe mot won.’ Mürin kopwe säw o mottiu won eu leni mi tekison. ¹⁰ Ina mine, lupwen om kopwe kö, kopwe feila o mottiu won eu lenien mot mi tekison, pwe ewe mi köruk epwe feito o ürenuk, ‘Pwii, kopwe tötä won eu kei lenien mot mi tekia.’ Ren ei epwe wor iteüöchum fän mesen ekewe chon kökköto meinisin. * ¹¹ Pun eman aramas mi püsin atekiatä, epwe tekisonotiu, nge eman mi püsin atekisonatiu, epwe tekiatä.” *

¹² Mürin Jesus a üreni ewe mwän mi köri, “Lupwen ka föri eu mongön leoloas are lekuniol, kosap köri chiechiom kewe ika pwiüm kewe ika aramasom kewe ika chon arum kewe mi pisekisek, pun mürin repwe pwal kökkörük o aliwini ngonuk mine ka fen föri ngeniir. ¹³ Nge lupwen ka föri eu kametip, kopwe köri ekewe chon mwelele, ekewe chon ter, ekewe chon pechemä me ekewe chon chun. ¹⁴ Iwe, ren ei kopwe feiöch, pun resap tongeni aliwini ngonuk mine ka föri ngeniir. Kot epwe liwini ngonuk lon ewe ränin manausefälin ekewe chon pwüng.”

Pworausen awewe usun ewe kametip mi watte

14.15-24

(Mat 22.1-10)

¹⁵ Iwe, lupwen eman lein ekewe mwän mi mot ngeni chepel a rong ekei kapas, a üreni Jesus, “Ra feiöch chokewe mi mot ngeni ewe kametip lon Mwün Kot!” ¹⁶ Nge Jesus a üreni, “A wor eman mwän a föri eu kametip mi watte o köri chomong aramas pwe repwe eti. ¹⁷ Lupwen a tori fansoun ewe kametip, a tinala nöün kewe chon angang pwe repwe asile ngeni ekewe chon kökköto, ‘Oupwe etto, a molotä meinisin.’ ¹⁸ Nge ir meinisin ra popuetä le künetipingen, eman mürin eman. Ewe aemanün a üreni ewe chon angang, ‘Üa fen möni eu fanü, nge iei üpwe feila o nenengeni. Kose mochen kopwe amusaaila.’ ¹⁹ Pwal eman a apasa, ‘Üa fen möni engol kow, nge iei üpwe feila o sotuniir. Kose mochen kopwe amusaaila.’ ²⁰ Nge pwal eman a apasa, ‘Üa kärän angei eman pwülüei, iei mine üsap tongeni feila.’

²¹ “Iwe, ewe chon angang a liwinsefäliiti an we masta o apworausana ngeni meinisin mine a fis. Mürin ewe masta a fokun lingeringer o üreni nöün we chon angang, ‘Kopwe müttir le feila ngeni ekewe alelap me ekewe alekis lon ewe telinimw o emwenato ekewe chon mwelele, ekewe chon ter, ekewe chon chun me ekewe chon pechemä.’ ²² Mürin ewe chon angang a üreni, ‘Ai samol, mine ka allük ngeniei a pwönüetä. Nge a chüen wor leni.’ ²³ Iei mine ewe masta a üreni ewe chon angang, ‘Kopwe feila

lükün ewe telinimw won ekewe al me ünükün ekewe tit o pese ngeni ekewe aramas pwe repwe feito, pwe imwei epwe ur. ²⁴ Pun üa ürenikemi, pwe esap eman ätekewe mi kö repwe neni mongön ai kametip.’ ”

Usun manauen eman nöün Jesus chon kaiö

14.25-33

(Mat 10.37-38)

²⁵ Lon eu rän, lupwen eu mwichen aramas mi chomong ra eti Jesus le fetal, a sap ngeniir o üreniir, ²⁶ “Iö a feito rei esap tongeni nei chon kaiö, are esap echeniei lap seni an echeni saman me inan, pwülüan me nöün kana, pwiin me fefinan kana, pwal mwo nge püsin manauan. ✧ ²⁷ Iö esap mwärei püsin an iräpenges o tapweto müri, esap tongeni nei chon kaiö. ✧

²⁸ “Are eman leimi a ekieki an epwe aüetä eu imw tekia, epwe akomwen mottiu o kütta fite ükükün liwinin pisekin, pwe epwe silei are a naf nöün moni an epwe tongeni awesala ewe angang. ²⁹ Are esap föri iei usun, esap tongeni awesala ewe imw tekia mürin an föri longolongun. Iwe, aramas meinisin mi küna met a fis repwe popuetä le takiri ewe aramas ³⁰ o apasa, ‘Ei mwän a popuetä le aüetä eu imw tekia, nge esap tongeni awesala.’

³¹ “Are eman king me engol ngeröü nöün sounfiu ra feila pwe repwe maun ngeni pwal eman king me rüwe ngeröü nöün sounfiu, ewe king epwe akomwen mottiu o ekieki are epwe naf an pöchökül an epwe tongeni maun ngeni pwal ewe eman king. ³² Nge are a mefi pwe esap tongeni maun ngeni, epwe tinala nöün chon künö ren pwal ewe eman king o tüngor ngeni won met epwe wor ren kinamwe lefler me mwen an epwe feito. ³³ Ina chök usun, esap wor eman a tongeni nei chon kaiö are esap pölükü meinisin mine a eäni.

Salt mi nepatapat

14.34-35

(Mat 5.13; Mark 9.50)

³⁴ “Salt a mürina. Nge are salt a nepatapatata, esap wor och mine sipwe anekenikensefäli ngeni. ³⁵ Esap wor lomotan ngeni ewe pwül ika ngeni an epwe koiasi, epwe chök koturula. Iö a wor selingan epwe rongorong.”

15

Ewe sip mi mwalechela

15.1-7

(Mat 18.12-14)

¹ Lon eu rän, lupwen chomong chon ioni takises me chon tipis ra mwicheto ren Jesus pwe repwe rongorong an afalafal, ² ekewe Farisi me Sensen Allük ra popuetä le ngününgünü o üra, “Ei mwän a etiwa chon tipis, a pwal mwo nge etiir le mongö.” ✧ ³ Iei mine Jesus a üreniir ei pworausen awewe: ⁴ “Are eman leimi a nöüni ipükü sip, nge eman me leir a mwalechela, met ätei epwe föri? Epwe likiti ekewe tiwe me tiweman sip lon ewe leni mi amassawa, epwe feila o kütta ewe eman mi mwalechela tori an epwe küna. ⁵ Nge lupwen a küna, a fokun pwapwa. Iwe, a eketä won afaran ⁶ o uweesefäliela lon lenian. Mürin epwe körifengeni chiechian kana me chon arun kana o üreniir, ‘Ousipwe fokun pwapwa, pun üa küna nei we sip mi mwalechela.’ ⁷ Ngang üpwe ürenikemi,

ina chök usun epwe wor watten pwapwa lon läng fän iten eman chon tipis mi aier, lap seni ekewe tiwe me tiweman aramas mi pwüing, ra ekieki pwe esap wor lomoten ar repwe aier.

Ewe föün moni mi pöütüla

15.8-10

⁸“Ika a wor eman fefin mi eäni engol föün moni silifer, nge eföü a pöüt seni. Met neminei epwe föri? Epwe atina eu lamp, epwe pirumwei lon imwan o achocho ngeni le kütta tori epwe küna. ⁹Iwe, lupwen a küna, epwe körifengeni chiechian kana me chon arun kana o üreniir, ‘Ousipwe pwapwa, pun üa küna ewe eföü föün moni mi pöüt seniei.’ ¹⁰Ngang üpwe ürenikemi, ina chök usun nöün Kot kewe chon läng repwe fokun pwapwa fän iten eman chon tipis mi aier.”

Ewe Nau mi mwalechela

15.11-32

¹¹Iwe, Jesus a sopwela le üra, “A wor eman mwän a nöüni ruoman alüal. ¹²Iwe, ewe mi kükün a üreni saman we, ‘Semei, kopwe ngeniei wisei me lon woumw.’ Iei mine ewe sam a ineti mettochun ngeni nöün kewe ruoman alüal. ¹³Ekoch rän mürin ewe nau mi kükün a amömöla mettochun kewe o feila seni lenian fän ewe moni. Iwe, a feila lon eu fanü mi toau, nge ikenan a fangesoroula nöün we moni ren an föföringau. ¹⁴Iwe, lupwen a itela nöün we moni meinisin, a fis eu lengita mi watte won unusen ewe fanü. Mürin esap chüen wor mine ei alüal epwe manau seni. ¹⁵Iei mine a feila o küt an angang ren eman chon ewe fanü. Iwe, ätewe a tinala ewe alüal lon fanüan pwe epwe tümwünü nöün kewe pik. ¹⁶Iwe, tipen ewe alüal epwe mongö anen ekewe pik kewe mongö, nge esap wor eman a ngeni och. ¹⁷Mürin a nela lelukan. Iwe, a apasa, ‘Nöün semei kewe chon angang mi liwin meinisin a watte aner, lap seni ar tongeni mongö, nge iei üa nom ikei lon ai mään echik. ¹⁸Üpwe ütä o liwinla ren semei o üreni: Semei, üa tipis ngeni Kot pwal ngonuk. ¹⁹Üsap chüen fich ngeni ai üpwe eman noumw, kopwe chök anomuei lon tettelin eman chon angang.’ ²⁰Iwe, ewe alüal a ütä o liwinsefäliti saman. Nge lupwen a chüen toau seni lenian, seman we a küna o a fokun tongei. A sä ngeni, a romi o mitiri. ²¹Iwe, ewe alüal a apasa, ‘Semei, ngang üa tipis ngeni Kot pwal ngonuk. Üsap chüen fich ngeni ai üpwe iteni noumw.’ ²²Nge ewe sam a köri nöün kewe chon angang o üreniir, ‘Oupwe kaila, uwato echö üf mi fokun mürina o aüföüfa ngeni. Oupwe uwalong won aütün pöün efoch ring o aipweipwa sus. ²³Mürin oupwe feila o uwato ewe nienifön kow mi oumanau o niela. Ousipwe mongöfengen o pwapwa! ²⁴Pun nei ei alüal a mäla, nge iei a manausefäl, a mwalechela, nge iei a liwinsefälito.’ Iwe, ra popuetä ewe kametip.

²⁵“Nge lon ena fansoun ewe mwänichi a nom lemäl. Iwe, lupwen a liwiniti lenian o kan ngeni imwan we, a rong tikin pisekin ettik me pworuk. ²⁶Iwe, a köri eman ekewe chon angang o aisini, ‘Met ei a fis?’ ²⁷Ewe chon angang a pölüeni, ‘Pwiüm we a liwinsefälito, nge semom a niela ewe nienifön kow mi oumanau, pun nöün we a liwinsefälito ren lon an manau me pöchökül.’ ²⁸Iwe, ewe mwänichi a fokun song, pwe esap mochen tolong lon ewe imw. Iei mine saman we a towu ren o tüngormau ngeni pwe epwe tolong. ²⁹Nge ewe mwänichi a üreni saman we, ‘Nengeni, lon chomong ier, ngang üa angang ngonuk usun eman amanau. Üsap

fokun aleasolap ngeni met ka allük ngeniei. Nge en, esap wor met ka ngeniei, esap mwo nge eman nienifön kuuch pwe üpwe föri eu kametip ngeni chiechiei kewe. ³⁰ Nge lupwen noumw ei alüal mi olusmwäliela woumw ngeni fin lisowu a liwinto, en ka niela ewe nienifön kow mi oumanau fän itan.’ ³¹ Iwe, ewe sam a pölüeni, ‘Nei, en ka nom rei fansoun meinisin, nge mettoch meinisin mine üa eäni iei om. ³² A fokun öch ach sipwe kametip o pwapwa, pun pwüüm we a mäla, nge iei a manausefäl, a mwalechela, nge iei a liwinsefälito.’ ”

16

Ewe souwa mi tipachemsolä

16.1-13

¹ Iwe, Jesus a üreni nöün kewe chon kaiö, “A wor eman mwän mi pisekisek, mi wor eman nöün chon angang mi souwani mettochun meinisin. Ewe mwän mi pisekisek a rong pwe ewe chon souwa a asolapala mettochun. ² Iei mine a köri ewe chon souwa o üreni, ‘Met ei üa rongorong usumw? Kopwe pwäri ngeniei puken ekewe mettoch ka souwani, pun kosap chüen tongeni wiseni wisom we.’ ³ Iwe, ewe chon souwa a ekieki lon letipan, ‘Ai we masta epwe atowuei seni wisei we. Met üpwe föri? Esap naf ai pöchökül ai üpwe tuw warawar, üa pwal säw ai üpwe tüngrorfeil. ⁴ Iei üa silei met üpwe föri, pwe lupwen üpwe towu seni wisei we aramas repwe etiwaiei lon imwer.’ ⁵ Iei mine a körato ekewe aramas meinisin mi wor ar liwinimang ngeni an we masta. Iwe, a aisini ewe aemanün, ‘Fite ükükün om liwinimang ngeni ai we masta?’ ⁶ A pölüeni, ‘Walupükü kalon apüra seni föün olif.’ Iwe, ewe chon souwa a üreni, ‘Kopwe angei om we toropwen liwinimang, kopwe müttir mottiu o makkeetiu föpükü kalon.’ ⁷ Mürin a aisini ewe aruomanün, ‘Fite ükükün om liwinimang?’ Ätewe a pölüeni, ‘Engeröü tuk pilawa.’ Iwe, ewe chon souwa a üreni, ‘Kopwe angei om toropwen liwinimang o makkeetiu walupükü tuk.’ ⁸ Iei mine ewe samol a ingeiti ewe chon souwa mi atuputup, pun a eäni tipachem lon an föför. Pun aramasen ei fanüfan ra kon tipachem lon ar angang ngeni pilor kana, lap seni ekewe aramas mi nomom lon saram.”

⁹ Iwe, Jesus a soppwela le kapas, “Üpwe ürenikemi: Oupwe aea wöün fanüfan an epwe wor chiechiemi, pun lupwen epwe itela, repwe etiwakemi lon ewe leni ia aramas repwe nom ie tori feilfeilachök. ¹⁰ Eman mi allükülük le tümwünü mettoch mi kisikis, epwe pwal allükülük le tümwünü mettoch mi watte. Nge eman esap allükülük le tümwünü mettoch mi kisikis, esap pwal allükülük le tümwünü mettoch mi watte. ¹¹ Iei mine are ousap allükülük lon ämi angang ngeni wöün fanüfan, ifa usun än eman epwe lükü ngenikemi ewe wöü mi wesewesen aüchea? ¹² Iwe, are ousap allükülük le tümwünü mine än eman, iö epwe ngenikemi mine wesewesen wöümi?”

¹³ “Esap wor eman chon angang a tongeni angang ngeni ruoman samol. Pun epwe oput eman, nge epwe echeni pwal ewe eman, ika epwe tipeni eman, nge epwe turunufasei pwal ewe eman. Ousap tongeni angangepök ngeni Kot me wöün fanüfan.” ✧

Ekoch än Jesus Kapas

16.14-18

(Mat 11.12-13; 5.31-32; Mark 10.11-12)

¹⁴ Iwe, lupwen ekewe Farisi ra rongorong ekei kapas, ra esita Jesus, pun ir ra echeni moni. ¹⁵ Nge Jesus a üreniir, “Ämi oua alapalapöchükemi fän mesen aramas, nge Kot a silei lelukemi. Pun ekewe mettoch aramas ra ekieki pwe ra kon aüchea ra anioput me ren Kot.

¹⁶ “Än Moses kewe Allük me mine a mak lon ekewe puken soufos ra rongofeil tori fansoun Johannes Soupapatais. Seni ena fansoun ewe Pworausen Manau usun Mwün Kot a chöfeil, nge aramas meinisin ra pöchökülelong le tolong lon. ✧ ¹⁷ Nge epwe fen mecheres pwe läng me fanüfan repwe morola mwen eföü mesen makken ekewe allük epwe talüla. ✧

¹⁸ Are eman mwän a mwü seni pwülüan o pwülüeni pwal eman fefin, i a tipisn lisowu, nge eman mwän mi pwülüeni eman fefin mi mwü seni pwülüan a pwal tipisn lisowu. ✧

Ewe mwän mi pisekisek me Lasarus
16.19-31

¹⁹ “A wor eman mwän mi pisekisek, a üföüf üf mi parachol me pwechepwech mi fokun mömong o a chök kakametip iteiten rän. ²⁰ A pwal wor eman mwän mi wöüngau itan Lasarus, a kula inisin ren rup, aramas ra uweela lükün asamen imwen ewe mwän mi pisekisek. ²¹ Ätei a mochen an epwe mongö ekewe mworomworen mongö mi mworotiu seni än ewe mwän mi pisekisek chepel. Nge ekewe mwo kolak ra feito o chönawei rupun kewe. ²² Iwe, a fis pwe ewe mi wöüngau a mäla, nge ekewe chon läng ra uweatä o amota lewon pechen Apraham. Iwe, ewe mwän mi pisekisek a pwal mäla o peias. ²³ Lupwen a nom lon hell, a fokun riaföü watte, a anetai mesan o künä Apraham me toau, nge Lasarus a nom arun. ²⁴ Iwe, a kökkötä, ‘Semei Apraham, kopwe tongeei o tinala Lasarus pwe epwe tikilong aütün lon koluk o apatapata chönawei, pun üa fokun riaföü lon ei ekkei.’ ²⁵ Nge Apraham a üreni, ‘Nei, kopwe chechemeni pwe lon ränin manauom ka fen angei ekewe mettoch mi mürina meinisin, nge Lasarus a angei ekewe mettoch mi ngau. Nge iei a nom ikei lon an kinamwe, nge en ka nom ikenan lon om riaföü. ²⁶ Nge lükün ekei mettoch meinisin a wor eu pwang mi fokun lolol lefilach, pwe chokewe mi mochen feila reöm seni ikei resap tongeni, nge chokewe mi mochen feito rem seni ikenan resap pwal tongeni.’ ²⁷ Iwe, ewe mwän mi pisekisek a üreni, ‘Semei Apraham, üa tüngormau ngonuk, kose mochen kopwe tinala Lasarus lon imwen semei, ²⁸ ren pwii kewe limman. Epwe feila rer o fönöör, pwe resap pwal feito ikei lon ei lenien riaföü.’ ²⁹ Nge Apraham a üreni, ‘Mi wor rer ekewe puken Moses me ekewe puken soufos, repwe aüseling ngeniir.’ ³⁰ Ewe mwän mi pisekisek a pölüeni, ‘Apwi, semei Apraham, are eman epwe manausefäl seni mäla o feila rer, repwe fokun aier seni ar tipis kana.’ ³¹ Nge Apraham a üreni, ‘Are resap mochen rongorong ngeni ekewe puken Moses me soufos, resap pwal tongeni lükü, inamwo ika eman epwe manausefäl seni mäla.’ ”

17

Tipis

17.1-4

(Mat 18.6-7,21-22; Mark 9.42)

¹ Iwe, Jesus a üreni nöün kewe chon kaiö, “Sosot epwe fokun tori aramas pwe repwe tolong lon tipis, nge feiengauen ätewe mi afisätä ekewe sosot. ² Epwe fen öch ngeni ewe aramas pwe epwe riritä fän üan eföü fau mi föümong o epwe koturutiu le matau, lap seni an epwe afisätä sosot ngeni eman me lein ekewe kükün pwe epwe tipis. ³ Iei mine oupwe tümwünüöchü mine oupwe föri! Are pwiüm a tipis, kopwe apwüngü, nge are a ekiexefäl, kopwe amusala. ✧ ⁴ Are a tipis ngonuk fän fisu lon eu rän, nge iteiten fansoun a feito reöm o ürenuk, ‘Üa ekiexefäl,’ kopwe fokun amusala an tipis.”

Lükülük

17.5-6

⁵ Iwe, ekewe chon künö ra üreni ewe Samol, “Kopwe alisikem pwe äm lükü en epwe wattela.” ⁶ Ewe Samol a üreniir, “Are epwe wor ämi lükülük mi wewe ngeni eföü pwükilin irä mi fokun kükün, oupwe tongeni üreni ei irämong, ‘Kopwe üttuketä fiti warom o fotukuketiu le matau,’ iwe, epwe aleasochisikemi.

Wisem eman chon angang

17.7-10

⁷ “Are eman leimi mi wor eman nöün chon angang mi tuw pwül are tümwünü sip, ifa usun, lupwen epwe liwinto seni lemäl, epwe üreni pwe epwe kaito pwe epwe mongö? ⁸ Apwi! Nge epwe üreni, ‘Kopwe amolätä anei mongö, anükü ufom o angang ngeniei tori üpwe wes le mongö o ün. Mürin en kopwapw mongö o ün.’ ⁹ Ifa usun, ewe samol epwe kilisou ngeni nöün chon angang pokiten a aleasochisi mine a akünö ngeni? ¹⁰ Ina usun pwal ämi. Lupwen oua wes le föri wisemi meinisin, oupwe apasa, ‘Äm aia chon angang mi lomotongau, aia chök föri mine wisem.’ ”

Jesus a apöchöküla engol mwän mi ürtiir rupun pwötür

17.11-19

¹¹ Iwe, lupwen Jesus a fetal ngeni Jerusalem, a pwerela le kiänin Samaria me Kalilea. ¹² Nge lupwen Jesus a tori eu sopw, a churi engol mwän mi ürtiir rupun pwötür. Ra ütä me toau ¹³ o kökkö fän leüömong, “Jesus äm samol, kopwe tongeekem!” ¹⁴ Iwe, lupwen Jesus a küneer a üreniir, “Oupwe feila ren ekewe souasor, pwe repwe nenengenikemi.” Iwe, lupwen ra feila, ra limöchüla seni rupur kewe. ✧ ¹⁵ Iwe, lupwen eman me leir a küna pwe a pöchökülfefäl, a liwinsefäl o mwareiti Kot fän mwelian mi leüömong. ¹⁶ A chapela won pwül arun pechen Jesus o kilisou ngeni. Ätei eman re Samaria. ¹⁷ Mürin Jesus a apasa, “A wor engol mwän mi pöchökülfefäl. Ikafa ir ekewe tiweman? ¹⁸ Pwota ei chök eman re ekis a liwinsefälito o pwärätä an kilisou ngeni Kot?” ¹⁹ Iwe, Jesus a üreni, “Kopwe ütä o feila, om lükülük a apöchökülokotä.”

Wareton Mwün Kot

17.20-37

(Mat 24.23-28,37-41)

²⁰ Iwe, ekoch ekewe Farisi ra aisini Jesus ika inet ewe Mwün Kot epwe war. Jesus a pölüeniir, “Ewe Mwün Kot esap feito lon och sokun lapalap ach sipwe tongeni küna. ²¹ Esap wor eman epwe tongeni apasa, ‘Nengeni a nom ikei,’ are ‘Nengeni, a nom ikenan,’ pun ewe Mwün Kot a nom lon lelukemi.”

²² Mürin Jesus a üreni nöün kewe chon kaiö, “Epwe war ewe fansoun, lupwen oupwe fokun mochen küna eu ekewe ränin Nöün Aramas, nge ousap fokun küna. ²³ Iwe, repwe ürenikemi, ‘Nengeni, a nom ikenan!’ are ‘Nengeni, a nom ikei!’ Ousap feila rer, ousap pwal tapwela mürir. ²⁴ Pun usun fifi a fila seni läng o asarama fanüfan seni epek tori epek, iei usun Nöün Aramas lon ränin. ²⁵ Nge akomwan epwe tolong lon riaföü watte o küna koput me ren ei täppin aramasen ikenai. ²⁶ Usun mine a fis lon fansoun Noa, iei usun epwe pwal fis lon ränin Nöün Aramas. ✧ ²⁷ Ra momongö o ükün, ra pwüpwülü o akapwüpwülüür tori ewe rän lupwen Noa a tolong lon ewe waimw o ewe noter a war o niirela meinisin. ✧ ²⁸ Pwal inachök usun ewe fansoun Lot. Aramas ra momongö o ükün, ra kakamö o akamömö, ra fofot o aköüetä imw. ²⁹ Nge lon ewe rän lupwen Lot a towu seni Sotom, ekkei me primston a püngütü seni läng o niirela meinisin. ✧ ³⁰ Epwe chök pwal ina usun lon ewe rän Nöün Aramas epwe wareto lon.

³¹ “Lon ewe rän, eman aramas mi nom won imwan, esap wor an fansoun an epwe tolong lon imwan pwe epwe angei pisekin. Pwal ina chök usun ewe mi nom lemäl, esap wor an fansoun an epwe liwinsefäliiti imwan. ✧ ³² Oupwe chechemeni pwülüen Lot! ✧ ³³ Iö a mochen amanaua püsin manauan, epwe pöüt seni, nge iö a pölükü manauan, epwe amanaua manauan. ✧ ³⁴ Üpwe ürenikemi, lon ewe pwinin ruoman aramas repwe möür lon echö chök kieki. Repwe angeala eman, nge ewe eman repwe likitätü. ³⁵ Ruoman fefin repwe üsüsungen, repwe angeala eman, nge ewe eman repwe likitätü. ³⁶ [Ruoman mwän repwe nonomfengen lemäl, repwe angeala eman, nge ewe eman repwe likitätü.]” ³⁷ Iwe, ekewe chon kaiö ra aisini Jesus, “Äm Samol, ia epwe fis ie ei?” Jesus a pölüeniir, “Ia a wor ie eman somä, ikenan ekewe machang iter wolcher ra mwichfengen ie.”

18

Pworausen awewe usun eman fefin mi mä pwülüian me eman soukapwüing

18.1-8

¹ Mürin Jesus a apworausana ngeni nöün kewe chon kaiö eu pworausen awewe, pwe a mochen aiti ngeniir usun ar repwe iotek fansoun meinisin, nge resap achanü. ² Iwe, a apasa, “Lon eu telinimw a wor eman soukapwüing esap niuokusiti Kot ika ekieki aramas. ³ Mi pwal wor eman fefin mi mä pwülüian lon ewe telinimw, a chök soun feito ren ewe soukapwüing o tüngormau ngeni, ‘Kopwe pwärala ai pwüing o alisie ren ewe chon ü ngeniei.’ ⁴ Fansoun langatam ewe soukapwüing esap mochen alisi. Nge feilfeil a ekieki lon lelukan, ‘Inamwo ika üsap niuokusiti Kot ika ekieki aramas, ⁵ nge pokiten ei fefin mi mä pwülüian a chök osukosukaei,

✧ 17:26: Ken 6.5-8 ✧ 17:27: Ken 7.6-24 ✧ 17:29: Ken 18.20-19.25 ✧ 17:31: Mat 24.17-18; Mark 13.15-16 ✧ 17:32: Ken 19.26 ✧ 17:33: Mat 10.39; 16.25; Mark 8.35; Luk 9.24; Joh 12.25

iei üpwe le alisi, pwe epwe pwäla an pwüng. Are üsap alisi, epwe chök sopwela le feito rei tori üpwe osukosuk ren.’”

⁶ Iwe, ewe Samol a apasa, “Oupwe rongorong mine ewe soukapwüng mi ngau a üra. ⁷ Ifa usun, Kot esap fokun pwäräla än nöün kewe mi fil pwüng, ir chokewe mi kökköri le rân me le pwin? Ifa usun, epwe mang le alisiir? ⁸ Ngang üpwe ürenikemi, epwe müttir le pwäräla ar pwüng. Nge lupwen Nöün Aramas epwe war, ifa usun, epwe küna aramas mi lükülük won fanüfan?”

Pworausen awewe usun eman Farisi me eman chon ioni takises
18.9-14

⁹ Iwe, Jesus a pwal apworausä ei pworausen awewe ngeni ekewe aramas mi lükü püsin ar pwüng o aücheangau aramas. ¹⁰ “A wor ruoman mwän mi feitä lon ewe imwenfel pwe repwe iotek, eman, eman Farisi, nge ewe eman, eman chon ioni takises. ¹¹ Iwe, ewe Farisi a ütä, a iotek lon lelukan o üra, ‘Ai Kot, üa kilisou ngonuk, pwe üsap usun ekewe ekoch aramas, ir chon solä, chon pwüngingau, chon lisowu, ika fen pwal usun ei chon ioni takises. ¹² Ngang üa echikefel fän ruu lon eu wiik, üa pwal fangala leengolon meinisin mine üa eäni.’ ¹³ Nge ewe chon ioni takises a ütä me toau, esap fen mwo nge netä läng, nge a pisiri fän mwärin o apasa, ‘Ai Kot, kopwe ümömöch ngeniei, ngang eman chon tipis.’” ¹⁴ Jesus a apasa, “Üpwe ürenikemi, ei chon ioni takises a küna pwüng fän mesen Kot lupwen a liwinla lon imwan, nge sap ewe Farisi. Pun iö a püsin atekiatä epwe küna tekison, nge iö a püsin atekisonatiu epwe küna tekia.” ✱

Jesus a afeiöchü ekewe kükün semirit
18.15-17

(Mat 19.13-15; Mark 10.13-16)

¹⁵ Iwe, ekoch aramas ra uwato nöür kükün semirit ren Jesus, pwe epwe afeiöchüür. Nge lupwen ekewe chon kaiö ra küneer, ra apwüngü ekewe aramas. ¹⁶ Nge Jesus a körato ekewe semirit ren o a apasa, “Oupwe mwüt ngeni ekewe semirit pwe repwe feito rei, nge ousap epetiir, pun iö a wewe ngeni ekei semirit epwe mwüni Mwün Kot. ¹⁷ Enlet, üpwe ürenikemi, are eman esap etiwa Mwün Kot usun eman semirit, esap tongeni tolong lon.”

Ewe mwän mi pisekisek
18.18-30

(Mat 19.16-30; Mark 10.17-31)

¹⁸ Iwe, eman sounemenem a aisini Jesus, “Sense mi mürina, met ngang üpwe föri ai üpwe eäni manau esemüch?” ¹⁹ Jesus a üreni, “Pwota ka aita ngeniei mürina? Esap wor eman a mürina pwe Kot echök. ²⁰ Ka silei ekewe allük: ‘Kosap lisowu, kosap niela aramas, kosap solä, kosap eäni kapas chofona usun eman, kopwe asamolu semom me inom.’” ✱ ²¹ Iwe, ewe mwän a pölüeni, “Ekei allük meinisin üa fen apwönüretä seni leküküni.” ²² Lupwen Jesus a rong ekei kapas, a üreni, “Mi chüen wor eu mettoch ka mang ngeni. Kopwe amömöla meinisin mine ka eäni, nge ewe moni kopwe fangala ngeni ekewe chon wöüngau, pwe epwe wor woumw lon läng. Mürin kopwe feito o tapweto müri.” ²³ Nge lupwen ewe mwän a rong ekei kapas, a fokun letipeta, pun a fokun pisekisek. ²⁴ Iwe, lupwen Jesus a küna pwe a letipeta, a apasa, “A men fokun weires ngeni

ekewe aramas mi pisekisek ar repwe tolong lon Mwün Kot. ²⁵ Enlet, a mecheres än eman kamel epwe tolong lon pwangen efoch tikek, lap seni än eman chon pisekisek epwe tolong lon Mwün Kot.” ²⁶ Iwe, ekewe aramas mi rong ekei kapas ra aisini, “Nge iö chök epwe tongeni küna manau?” ²⁷ Jesus a pölüeni, “Mine esap tufich ngeni aramas a tufich ngeni Kot.”

²⁸ Mürin Petrus a üreni Jesus, “Nengeni, äm aia likitala meinisin mine aia eäni o tapwela mürum.” ²⁹ Jesus a pölüeniir, “Enlet, üpwe ürenikemi, are eman a likitala imwan are pwülüan, are pwiin, are saman me inan, are nöün kana fän iten ewe Mwün Kot, ³⁰ ewe aramas epwe angei liwinin mi fokun watte lon ei fansoun, epwe pwal angei manau esemuch lon ewe fansoun epwe feito.”

Aülüngatin än Jesus kapas usun an mäla

18.31-34

(Mat 20.17-19; Mark 10.32-34)

³¹ Mürin Jesus a aimwüela ekewe engol me ruoman chon kaiö o üreniir, “Oupwe rongorong! Oukich sipwe feitä Jerusalem. Ikenan mettoch meinisin mi makketiu me ren ekewe soufos usun Nöün Aramas epwe pwönüetä. ³² Epwe tolong lepöün ekewe chon lükün Israel, repwe urumwotei, repwe turunufasei o atufa. ³³ Repwe pwal wichi o niela, nge mürin ülüngat rän epwe manausefälitä.” ³⁴ Nge ekewe chon kaiö resap weweiti ekewe mettoch, pun ekewe kapas a monomon seniir, resap pwal silei wewen met Jesus a kapas usun.

Jesus a aneloi mesen eman chon chun mi tütüngor

18.35-43

(Mat 20.29-34; Mark 10.46-52)

³⁵ Iwe, lupwen Jesus a arap ngeni Jeriko, eman mwän mi chun a mot lepekin al o tütüngor lifangan. ³⁶ Lupwen a rongorong pwe chomong aramas ra fetalela won ewe al, a aisiniir, “Met a fis?” ³⁷ Iwe, ra üreni, “Jesus seni Nasaret a feito.” ³⁸ Mürin ewe mi mesechun a kökkö fän leüömong, “Jesus, Nöün Tafit, kopwe tongeei!” ³⁹ Iwe, ekewe aramas mi nom mwan ra apwüngü o üreni pwe epwe fanafanala. Nge i a chök alapata leüan o kökkö, “Nöün Tafit, kopwe tongeei.” ⁴⁰ Iei mine Jesus a üla o apasa pwe repwe emwenato ren ewe mi mesechun. Iwe, lupwen a kaneto, Jesus a aisini, ⁴¹ “Met ka mochen üpwe föri ngonuk?” A pölüeni, “Ai samol, üa mochen küna mwei.” ⁴² Iwe, Jesus a üreni, “Kopwe küna mwomw, om lükülük a apöchökülök.” ⁴³ Lon ewe chök otun ewe mwän a küna mwan, a tapwela mürin Jesus o kilisou ngeni Kot. Lupwen ewe mwichen aramas ra küna ei, ir meinisin ra mwareiti Kot.

19

Jesus me Sakios

19.1-10

¹ Iwe, Jesus a tolong lon Jeriko o fetalela epek. ² Ikenan a wor eman meilapen chon ioni takises itan Sakios, i eman mi pisekisek. ³ Iwe, ätewe a sotuni an epwe nengeni ika iö Jesus. Nge pokiten i eman mwän mi mochomoch, esap tongeni küna Jesus ren ewe mwichen aramas. ⁴ Iei mine a säla mwen ewe mwichen aramas o tötä won efoch irä sikamor pwe epwe tongeni nengeni Jesus, lupwen epwe pwerela won ewe al. ⁵ Iwe, lupwen Jesus a tori ewe leni, a nenetä o üreni Sakios, “Kopwe müttir

tötiu, pun ngang üpwe nonom lon imwom ikenai.”⁶ Sakios a müttir tötiu o etiwa Jesus fän pwapwa.⁷ Lupwen ekewe aramas meinisin ra küna mine a fis, ra ngününgünfengen lefiler, “Ei mwän a wasöla ren eman chon tipis.”⁸ Nge Sakios a ütä o üreni ewe Samol, “Ai Samol, nengeni, ngang üpwe ngeni ekewe chon wöüngau esopun ai kewe pisek. Nge are üa atupu eman won moni, üpwe aliwinisefäli ngeni fän rüanü.”⁹ Jesus a üreni Sakios, “Manau a tori ei imw ikenai, pun en pwal eman mwirimwirin Apraham.¹⁰ Pun nöün aramas a feito pwe epwe kütta o amanaua ekewe chon mwalechela.” ✱

Pworausen awewe usun ekewe föün moni kolt

19.11-27

(Mat 25.14-30)

¹¹ Iwe, lupwen ekewe aramas ra aüseling ngeni Jesus, i a sopwela le apworausaua ngeniir eu pworausen awewe. Jesus a arapakan ngeni Jerusalem, nge ekewe aramas ra ekieki pwe Mwün Kot epwe chök müttir pwäto.¹² Iei mine Jesus a üreniir, “A wor eman mwän mi uputekia, a feila won eu fanü mi toau, pwe epwe seikitä lon wisen king, mürin epwapw liwinisefäl.¹³ Mwen an epwe sai a körato engol me lein nöün kewe chon angang o ngeni eman me eman eföü moni kolt. Iwe, a üreniir, ‘Oupwe anganga ekewe föün moni kolt tori üpwe liwinisefälito.’¹⁴ Nge aramasen fanüan we ra oputa o tinala ekoch chon künö me mürin pwe repwe üreni, ‘Äm aisap mochen pwe ätei epwe nöüm king.’

¹⁵ Iwe, wesin än ewe mwän seikitä lon wisen king, a liwinisefäl. Mürin a titi nöün kewe chon angang pwe repwe feito mwan, pwe epwe pii ika ifa ükükün manauen ekewe moni ra anganga.¹⁶ Ewe aemanün a feito o apasa, ‘Ai samol, noumw we eföü moni ka ngeniei, üa anganga pwe manauan a tori engol.’¹⁷ Iwe, a üreni ewe chon angang, ‘A fokun mürina om angang. En eman chon angang mi mürina. Pokiten ka allükülük lon mettoch mi kisikis, ngang üpwe awisok pwe kopwe nemeni engol telinimw.’¹⁸ Ewe aruomanün a feito o apasa, ‘Ai samol, noumw we eföü moni ka ngeniei, üa anganga pwe manauan a tori limu.’¹⁹ Iwe, a üreni ei chon angang, ‘Kopwe nemeni limu telinimw.’

²⁰ Mürin pwal eman chon angang a feito o apasa, ‘Ai samol, iei noumw we eföü moni, üa tükümala lon ekam mangaku o iseis.²¹ Üa niuokusituk, pun en eman mwän mi tipepöchökül. Ka angei mine esap om o kini mine kosap fotuki.’²² Iwe, ewe samol a üreni, ‘En eman chon angang mi ngau! Üpwe apwünguk won mine ka püsin apasatä. Ka fen silei pwe ngang eman mwän mi tipepöchökül, üa angei mine esap ai o kini mine üsap fotuki.²³ Pwota chök kosap iseis nei we moni lon bank? Mürin, lupwen üpwe liwinisefäl, üpwe angei nei we moni fiti manauan?’

²⁴ Mürin a üreni chokewe mi ü arun, ‘Oupwe angei ewe eföü moni seni ätei o ngeni ätenan mi wor ren ekewe engol föün moni.’²⁵ Nge ir ra üreni, ‘Äm samol, a fen wor ren ätenan engol föün moni!’²⁶ A pölüeniir, ‘Üpwe ürenikemi, pwe iö a eäni an, Kot epwe achomongala, nge iö esap eäni an, Kot epwe fen mwo nge angei seni ewe ekis a wor ren. ✱²⁷ Nge chokewe mi oputaei resap mochen ai üpwe nöür king, oupwe emweniireto ikei o niirela me mwei.’ ✱

Jesus a tolong lon Jerusalem fän än aramas mweireir

19.28-40

(Mat 21.1-11; Mark 11.1-11; Joh 12.12-19)

²⁸ Iwe, mürin än Jesus apasatä ekei kapas, a akomwola mwer Jerusalem. ²⁹ Lupwen a arap ngeni Petfake me Petania ren ewe Chukun Olif, a tinala ruoman nöün chon kaiö ³⁰ o üreniir, “Oupwe feila lon ewe sopw a nom mwemi. Nge lupwen oupwe tori, oupwe küna eman nienifön aas mi föfö ikenan, esap mwo wor eman a wawa. Iwe, oupwe apichi o emwenato ikei. ³¹ Are eman epwe aisinikemi, ‘Pwota oua apichi ei aas?’ oupwe pölüeni, ‘Äm samol a mochen wawa.’” ³² Iwe, ekewe ruoman chon kaiö ra feila o ra küna ekewe mettoch meinisin Jesus a fen kapas ngeniir usun. ³³ Iwe, lupwen ar apichi ewe nienifön aas, ätekewe mine nöür ewe aas ra aisiniir, “Pwota oua apichi ei aas?” ³⁴ Ra pölüeni, “Äm samol a mochen wawa.” ³⁵ Iwe, ra emwenala ewe aas ren Jesus, ra oletala üfer won ewe aas o amota Jesus won. ³⁶ Lupwen Jesus a wawa ewe aas le feila, aramas ra ameresala üfer kewe won ewe al. ³⁷ Nge lupwen a arap ngeni ewe leni ia ewe al a feitiu seni ewe Chukun Olif, unusen ewe mwichen chon kaiö ra popuetä le mweireiren pwapwa o mwareiti Kot fän mwelier mi leüömong pokiten ekewe manaman meinisin ra fen küna. ³⁸ Iwe, ra apasa, “Feiöchün ewe king a feito fän iten ewe Samol! Kinamwe lon läng o Kot epwe ling.” ✧

³⁹ Mürin ekoch ekewe Farisi mi nom lein ewe mwichen aramas ra üreni Jesus, “Sense, kopwe allük ngeni noumw kewe chon kaiö pwe repwe fanafanala.” ⁴⁰ Nge Jesus a pölüeniir, “Üpwe ürenikemi, are ätekei repwe fanafanala, ekewe fau repwe popuetä le pupuchör.”

Jesus a kechüeiti Jerusalem

19.41-44

⁴¹ Iwe, Jesus a feila o arap ngeni ewe telinimw Jerusalem. Nge lupwen an küna, a kechüeiti. ⁴² A apasa, “Amwo kopwe chök silei ikenai mine kopwe kinamwe ren. Nge iei a monola senuk. ⁴³ Pun epwe war ewe fansoun pwe chon oputom repwe pwelifeiliik, repwe aüetä ar ororen maun ünükum o rongeekela. ⁴⁴ Repwe unusen ataakola o niela ekewe aramas mi nonom lon tittum kewe. Esap wor eföü fau epwe chüen nom lon lenian, pun kosap mefi ewe fansoun lupwen Kot a feito pwe epwe amanauok.”

Jesus a tolong lon ewe imwenfel

19.45-48

(Mat 21.12-17; Mark 11.15-19; Joh 2.13-22)

⁴⁵ Mürin Jesus a tolong lon ewe imwenfel o a popuetä le asüowu ekewe chon amömö pisek. ⁴⁶ A üreniir, “A mak lon ekewe Toropwe mi Pin pwe Kot a apasa, ‘Imwei imwenfel epwe iteni eu imwen iotek,’ nge ämi oua awili ngeni eu lenien open chon solä.” ✧ ⁴⁷ Iwe, Jesus a afalafal lon ewe imwenfel iteiten rän. Ekewe souasor mi lap, ekewe Sensen Allük me souemwenin ekewe aramas ra mochen pwe repwe niela Jesus, ⁴⁸ nge resap tongeni küna efoch alen ar repwe föri ar we ekiek, pun ekewe aramas ra chök akaüseling ngeni an afalafal, nge resap tümwününgau ngeni an kewe kapas meinisin.

20

Kapas ais usun än Jesus pwüüing

20.1-8

(Mat 21.23-27; Mark 11.27-33)

¹ Lon eu rän, lupwen Jesus a nom lon ewe imwenfel o afalafala ekewe aramas ewe Pworausen Manau, ekewe souasor mi lap, ekewe Sensen Allük me ekewe souakom ra feito ren ² o aisini, “Kopwe ürenikem ika fän meni pwüüing ka föri ekei mettoch? Iö a ngonuk om pwüüing?” ³ Jesus a pölüeniir, “Iei ngang üpwe aisinikemi eu kapas ais, nge oupwe pwal ngeniei pölüan. ⁴ Ifa usun än Johannes pwüüing pwe epwe papataisi aramas a pop seni Kot ika seni aramas?” ⁵ Iwe, ra popuetä kapasfengen lefiler, “Met sipwe apasa? Are sipwe üra, ‘A pop seni Kot,’ epwe aisinikich, ‘Pwota chök ousap lükü Johannes?’ ⁶ Nge are sipwe üra, ‘A pop seni aramas,’ unusen ei mwichen aramas repwe mone ngeni kich fau, pun ra lükü pwe Johannes eman soufos.” ⁷ Iei mine ra pölüeni Jesus, “Äm aisap silei ia a pop seni ie.” ⁸ Iwe, Jesus a üreniir, “Ika ina, üsap pwal ürenikemi fän meni pwüüing üa föri ekei mettoch.”

Pworausen awewe usun ekewe chon mälämäl mi ngau

20.9-18

(Mat 21.33-46; Mark 12.1-12)

⁹ Mürin Jesus a apworaus a ngeni ekewe aramas ei pworausen awewe, “A wor eman mwän a fotuki eu tanipin wain. Iwe, a awisa ekoch chon mälämäl pwe repwe tümwünü, mürin a saila lon eu fanü toau. ✱ ¹⁰ Lupwen a tori fansoun kinikin, a tinala eman nöün chon angang ren ekewe chon mälämäl, pwe epwe angei seniir wisan me lon ekewe föün wain. Nge ekewe chon mälämäl ra wichi ewe chon angang o tinala fän an asöülapö. ¹¹ Iei mine a tinala pwal eman nöün chon angang, nge ekewe chon mälämäl ra pwal wichi, ra föri ngeni sokun föföör pwe epwe säw ren o tinala fän an asöülapö. ¹² Mürin a tinala aülümanün nöün chon angang. Iwe, ekewe chon mälämäl ra akinasa o asüela. ¹³ Mürin ewe mine an ewe tanipin wain a apasa, ‘Met üpwe föri? Iei üpwe le tinala püsin nei we üa fokun echeni. Eli repwe meniniti i.’ ¹⁴ Nge lupwen ekewe chon mälämäl ra küna i, ra kapasfengen lefiler, ‘Iei i alemürin ätei mine an ei tanipi. Ousipwe niela, pwe sipwe eäni an ei tanipi me ren saman.’ ¹⁵ Iei mine ra etekinawu seni ewe tanipin wain o niela.” Iwe, Jesus a üra, “Met mine an ewe tanipin wain epwe föri ngeniir? ¹⁶ Epwe feito o niela ekei chon mälämäl, nge epwe ngeni pwal ekoch chon mälämäl an we tanipin wain.”

Lupwen ekewe aramas ra rongorong ei pworaus, ra apasa, “Apw, sap ina!” ¹⁷ Nge Jesus a nenengeniir o apasa, “Ifa chök wewen ekei kapas me lon ewe Toropwe mi Pin?

‘Ei fau ekewe chon kaü imw ra pöütala,
pun resap aücheani,

a wiliti ewe föün lepwokuku mi fokun aüchea.’ ✱ ¹⁸ Are eman epwe turutiu won ei fau, epwe tatakis, nge are ewe fau epwe turutiu won eman, epwe fokun pachach.”

Kapas ais usun takises

20.19-26

(Mat 22.15-22; Mark 12.13-17)

¹⁹ Iwe, ekewe Sensen Allük me ekewe souasor mi lap ra silei pwe a afalafala ei pworausen awewe usur, iei mine ra sotuni ar repwe fötekini Jesus lon ewe otun, nge ra niuokusiti ekewe aramas. ²⁰ Iei mine ra mamas Jesus o tinala chon operi i mi pomweni pomwen aramas mi öch, pwe repwe särei Jesus ren ar kapas ais, pun repwe tongeni atolonga fän nemenemen me pöchökülen ewe kepina. ²¹ Ekei chon op ra üreni Jesus, “Sense, äm aia silei pwe ka kapas o afalafal fän wenechar. Aia pwal silei pwe kosap nenengeni nonomun aramas, nge ka afalafala mine a let usun letipen Kot ngeni aramas. ²² Kopwe ürenikem ika a pwüng ach sipwe mönatiu ach takises ngeni Sisar ika ese pwüng?” ²³ Nge Jesus a silei usun ar likatuputup o üreniir, ²⁴ “Oupwe pwäri ngeniei eföü föün moni silifer. Liosun iö me iten iö ei won ei moni?” Ra pölüeni, “Liosun Sisar me itan.” ²⁵ Iei mine Jesus a üreniir, “Mi pwüng. Oupwe ngeni Sisar mine än Sisar, nge oupwe ngeni Kot mine än Kot.” ²⁶ Iwe, resap tongeni särei Jesus won met a apasa me mwen ekewe aramas, iei mine ra fanafanala, nge ra ing ren mine a pölüeniir won.

Kapas ais usun manausefäl

20.27-40

(Mat 22.23-33; Mark 12.18-27)

²⁷ Mürin, ekoch Satusi ra feito ren Jesus, ir chokewe mi apasa pwe aramas resap manausefäl seni mäla. Iwe, ra üreni Jesus, ✧ ²⁸ “Sense, Moses a makkei ei allük fän itach: ‘Are eman mwän a mäla, nge esap wor nöün me won pwülüan, pwiin ei mwän epwe fokun pwülüeni ei fefin, pwe epwe wor nöün fänäsengesin mwirimwirin pwiin we mi mäla.’ ✧ ²⁹ Mi wor füman pwipwi. Ewe mwänichi a pwülüeni eman fefin, nge lupwen a mäla, esap wor nöün. ³⁰ Mürin ewe aruomanün a pwülüeni ewe fefin, ³¹ pwal mürin ewe aülümanün. Pwal ina chök usun mine a fis ngeni ekewe lusun tori ewe afümanün. Ra mäla, nge esap wor nöür. ³² Lesopolan ewe fefin a mäla. ³³ Iwe, lon ewe ränin, lupwen ekewe sotup repwe manausefäl, iö me leir epwe pwülüeni ewe fefin? Pun ir me füman ra pwüpwülü ngeni.”

³⁴ Jesus a üreniir, “Lon ei fansoun mwän me fefin ra pwüpwülü, ³⁵ nge ekewe mwän me fefin mi fich ngeni ar repwe manausefäl seni mäla o manau lon ewe fansoun epwe feito resap pwüpwülü. ³⁶ Repwe wewe ngeni ekewe chon läng, nge resap chüen tongeni mäla. Ir nöün Kot, pun ra manausefäl seni mäla. ³⁷ Pwal mwo nge Moses a pwärätä lon ewe pworaus usun ewe iräföföföf mi pulopulen ekkei, pwe ekewe sotup repwe manausefäl. Pun ikenan a aita ngeni ewe Samol än Apraham Kot, än Isaak Kot me än Jakop Kot. ✧ ³⁸ Kot än ekewe mi manau Kot, nge sap än ekewe mi mäla, pun ren i aramas meinisin ra tongeni eäni manau.”

³⁹ Iwe, ekoch me lein ekewe Sensen Allük ra apasa, “Sense, a fokun mürina om kapasen pölüen.” ⁴⁰ Pun ra niuokus le sopwela ar repwe kapas ngeni won och.

Kapas ais usun Kraist

20.41-44

(Mat 22.41-46; Mark 12.35-37)

⁴¹ Iwe, Jesus a aisiniir, “Ifa usun, pwota repwe tongeni apasa, pwe ewe Kraist epwe eman mwirimwirin Tafit? ⁴² Pun Tafit a püsin apasa lon ewe puken Kölfel,

‘Ewe Samol a kapas ngeni ai Samol:

Kopwe mot lepelifichi,

⁴³ tori üpwe anomu

chon oputom fän pecheöm.’ ✨

⁴⁴ Tafit a püsin aita ngeni ‘Samol’, ifa usun chök än Kraist epwe tongeni pwal eman mwirimwirin Tafit?”

Jesus a kapas usun än ekewe chon kaiö repwe afäliir ren ekewe Sensen Allük

20.45-47

(Mat 23.1-36; Mark 12.38-40)

⁴⁵ Iwe, lupwen ekewe aramas meinisin ra aüseling ngeni Jesus, a üreni nöün kewe chon kaiö, ⁴⁶ “Oupwe afälikemi ren ekewe Sensen Allük, ra sani ar repwe fetalfeil fän üfer mi langatam, ra pwal sani än aramas repwe kapong ngeniir fän suföl lon ekewe lenien amömö. Ra aea ekewe lenien mot än ekewe meilap lon ekewe imwen felikis, pwal ekewe leni fän iten aramas mi iteföüla lon ekewe lenien kametip. ⁴⁷ Ra angemwäli imwen ekewe fefin mi mä pwülüer, mürin ra einga ngeni aramas ar iotek mi langatam. Ätekeke repwe küna apwüing mi fokun chou.”

21

Än ewe fefin mi mä pwülüan asor

21.1-4

(Mark 12.41-44)

¹ Iwe, Jesus a nenefeil o küna ekewe chon pisekisek ra püngülong ar asor lon ewe lenien asor me lon ewe imwenfel. ² A pwal küna eman fefin mi wöüngau a mä pwülüan, a püngülong ruoföü kükün moni seni kapa. ³ Iwe, Jesus a üra, “Üpwe ürenikemi pwe än ei fefin mi wöüngau a mä pwülüan asor a watte seni än ekewe aramas meinisin. ⁴ Pun ir meinisin ra püngülong somwen wöür, nge neminei, seni an wöüngau a püngülong meinisin mine a wor ren, a fangala meinisin mine a manau seni.”

Jesus a afalafal usun talan ewe imwenfel

21.5-6

(Mat 24.1-2; Mark 13.1-2)

⁵ Iwe, ekoch me lein ekewe chon kaiö ra kapas usun ewe imwenfel, usun lingöchün ren ekewe fau mi mürina, pwal ren ekewe lifang aramas ra eäni asor ngeni Kot. Nge Jesus a apasa, ⁶ “Tei oua küna ekei mettoch meinisin. Nge epwe war ewe fansoun, lupwen esap fokun wor eföü fau epwe chüen nom lon lenian. Meinisin ekei fau repwe toropasetiu.”

Riaföü me ninni

21.7-19

(Mat 24.3-14; Mark 13.3-13)

⁷ Iwe, ekewe chon kaiö ra aisini Jesus, “Sense, inet ekei mettoch ka fos usun repwe fis? Meni asisil epwe pwärätä pwe a tori ewe fansoun an epwe fis ekei mettoch?” ⁸ Jesus a üreniir, “Oupwe mamasa, pwe esap wor eman epwe atupukemi. Chomong aramas repwe feito fän itei o apasa, ‘Ngang ewe Kraist,’ pwal ‘Ewe fansoun an epwe war a arap.’

Ousap tapwela mürir. ⁹ Ousap fokun niuokus lupwen oupwe rongorong pworausen maun me fitokoko. Ekei mettoch repwe akomwen fis, nge esap tori mwo fansoun sopalan.”

¹⁰ Mürin a pwal üreniir, “Ekewe fanü repwe fiufengen, ekewe mwü repwe maunfengen. ¹¹ Epwe wor watten chechen fanü, pwal lengita me mätter ekis meinsin. Epwe pwal wor asisil mi watte o eniweniw seni fän läng. ¹² Nge me mwen ekewe mettoch meinsin repwe fisitä, repwe turufikemi o ariaföüükemi, repwe etekinikemiila pwe oupwe kapwüing lon ekewe imwen felikis o atolongakemi lon imwen fötek. Repwe pwal emwenikemiila mwen ekewe king me kepina pokiten itei. ¹³ Ei fansoun epwe eu fansoun mi fich ngenikemi ämi oupwe apworaus a ewe Pworaus Allim. ¹⁴ Iei mine oupwe anomu lon lelukemi pwe ousap öüreki me mwan mine oupwe apasa, ¹⁵ pun üpwe fang ngenikemi ekewe kapas me tipachem, pwe esap wor eman chon oputakemi epwe tongeni ü ngenikemi ika öpöläakemi. ✧ ¹⁶ Sememi mwo me inemi, pwimi, aramasemi me chiechiemi nge repwe afangamäkemi, nge ekoch leimi repwe ninnila. ¹⁷ Aramas meinsin repwe oputakemi pokitei. ¹⁸ Nge esap wor emet meten möküremi epwe turula. ¹⁹ Ren ämi likitü oupwe püsin amanauakemi.

Jesus a kapas usun talan Jerusalem

21.20-24

(Mat 24.15-21; Mark 13.14-19)

²⁰ “Iwe, lupwen oupwe küna pwe sounfiu ra pwelifeili Jerusalem, mürin oupwe silei pwe a arapoto fansoun an epwe tala. ²¹ Mürin chokewe mi nom lon Jutea repwe sütä won ekewe chuk. Chokewe mi nom lon ewe telinimw repwe towu seni, nge chokewe mi nom lemäl resap tolong lon ewe telinimw. ²² Pun iei ekewe ränin apwüing, nge epwe popuetä meinsin mine a mak lon ekewe Toropwe mi Pin. ✧ ²³ Riaföün ekewe fefin mi pwopwo me ekewe inelap mi oupwo nöür lon ekewe rän, pun epwe wor riaföü mi lapalap lon ei fanü o än Kot song epwe tori ekei aramas. ²⁴ Ekoch repwe ninnila ren ketilas, nge pwal ekoch repwe oola lon ekewe fanü meinsin. Iwe, ekewe chon lükün Israel repwe purätiau Jerusalem tori fansoun än chon lükün Israel nemenem a wes.

Liwinsefäliton Nöün Aramas

21.25-28

(Mat 24.29-31; Mark 13.24-27)

²⁵ “Iwe, epwe wor ekoch lapalap epwe fis ngeni akkar, maram me fü kana. Nge won fanüfan chomong fanü repwe nom lon watten riaföü, repwe niuokus ren ngüngün matau me püngüpüngün no. ✧ ²⁶ Aramas repwe masarochola ren ar niuokus, lupwen ra witiwiti mine epwe fis won fanüfan, pun ekewe manamanen läng repwe mwöküt seni lenier. ²⁷ Lon ena fansoun repwe küna Nöün Aramas, epwe feito won kuchu fän manaman me ling mi lapalap. ✧ ²⁸ Lupwen ekei mettoch repwe popuetä le fis, ämi oupwe ütä o awenatä möküremi, pun ämi küna manau a arapoto.”

Ekewe kapasen kait seni ewe irä fik

21.29-33

(Mat 24.32-35; Mark 13.28-31)

✧ 21:15: Luk 12.11-12 ✧ 21:22: Os 9.7 ✧ 21:25: Ais 13.10; Is 32.7; Sow 2.31; Pwär 6.12-13

✧ 21:27: Tan 7.13; Pwär 1.7

²⁹ Iwe, mürin Jesus a apworaus a ngeniir eu pworausen awewe: “Oupwe nenengeni ewe irä fik me ekewe irä meinsin. ³⁰ Lupwen oua kûna pwe chör ra pwüküwu, oua silei pwe a arap fansoun räs. ³¹ Iei usun, lupwen oupwe kûna pwe ekei mettoch repwe le fis, oupwe silei pwe Mwün Kot a arapoto. ³² Enlet, üpwe ürenikemi, pwe ei pilon aramas resap mäla tori an epwe fisitä ekei mettoch meinsin. ³³ Läng me fanüfan repwe morola, nge ai kapas kana resap fokun morola.

Oupwe mamasa

21.34-38

³⁴ “Oupwe afälikemi, pwe lelukemi esap chouchou ren mongömong me ünüpuch, pwal ren öürekin manauen ikenai, pwe ewe rän esap müttiritikemi usun eu sär. ³⁵ Pun ewe rän Nöün Aramas epwe war lon, epwe tori aramas meinsin won unusen fanüfan. ³⁶ Oupwe mamasa o iotek fansoun meinsin, pwe epwe wor ämi pöchökül pwe oupwe tongeni sü seni ekei mettoch meinsin lupwen repwe fisitä o oupwe tongeni ütä me mwen Nöün Aramas.”

³⁷ Iwe, iteiten rän Jesus a afalafal lon imwenfel, nge lupwen a pwinila, a feila lükün ewe telinimw o pwinipwin won ewe Chukun Olif. ✧ ³⁸ Iwe, lesorosich ekewe aramas meinsin ra feito lon imwenfel, pwe repwe aüseling ngeni an afalafal.

22

Ra rawangauei Jesus

22.1-2

(Mat 26.1-5; Mark 14.1-2; Joh 11.45-53)

¹ Iwe, a arapakan an epwe tori ewe chulapen mongö pilawa esap wor iis lon, a iteni Pasofer. ✧ ² Ekewe souasor mi lap me ekewe Sensen Allük ra niuokusiti ekewe aramas, iei mine ra sotuni ar repwe rawei Jesus pwe repwe niela le monomon.

Jutas a tipeeu ngeni an epwe afangamä Jesus

22.3-6

(Mat 26.14-16; Mark 14.10-11)

³ Mürin Satan a tolong lon Jutas a iteni Iskariot, i eman lein ekewe engol me ruoman chon kaiö. ⁴ Iei mine Jutas a feila o kapas ngeni ekewe souasor mi lap me ekewe meilapen chon tümwünü ewe imwenfel usun an epwe tongeni afangamä Jesus ngeniir. ⁵ Iwe, ir ra fokun pwapwa ren mine a apasa ngeniir o ra pwon ngeni pwe repwe ngeni moni. ⁶ Iwe, Jutas a tipeeu ngeni ewe ekiek, iei mine a popuetä le kütta eu fansoun fich pwe epwe afangamä ngeniir Jesus, lupwen ewe mwichen aramas resap nom.

Jesus a amolätä an epwe mongö ewe mongön Pasofer

22.7-13

(Mat 26.17-25; Mark 14.12-21; Joh 13.21-30)

⁷ Iwe, a tori ewe chulapen mongö pilawa esap wor iis lon, ewe rän lupwen ra niela ekewe nienifön sip fän iten ewe mongön Pasofer. ⁸ Jesus a üreni Petrus me Johannes, “Oupwe feila o amolätä ewe mongön Pasofer pwe sipwe mongöfengen.” ⁹ Iwe, ra aisini, “Ia ka mochen pwe aipwe amolätä ie?” ¹⁰ Jesus a pölüeniir, “Lupwen oupwe tolong lon ewe telinimw, eman mwän mi uwei eu rume a wor koluk lon epwe

churikemi. Oupwe chök tapwela mürin o tolong lon ewe imw i a tolong lon. ¹¹ Iwe, oupwe üreni mine imwan ewe, ‘Nöüm sense a apasa: Ia a nom ie ewe ruum äm me nei kewe chon kaiö aipwe mongö ewe mongön Pasofer?’ ¹² Iwe, epwe aiti ngenikemi eu ruum mi watte a nom asan, a fen wes le molotä pisekin lon. Ikenan oupwe amolätä meinisin.” ¹³ Nge lupwen ar feila ra küna meinisin usun mine Jesus a fen üreniir. Iwe, ra amolätä ewe mongön Pasofer lon ewe leni.

Ewe Mongön ach Samol

22.14-23

(Mat 26.26-30; Mark 14.22-26; 1.Kor 11.23-25)

¹⁴ Iwe, lupwen a tori ewe fansoun, Jesus me ekewe chon kaiö ra mot ngeni chepel. ¹⁵ Iwe, a üreniir, “Ngang üa fokun mochen ach sipwe mongöfengen ei mongön Pasofer mwen ai üpwe tolong lon riaföü. ¹⁶ Pun üpwe ürenikemi, pwe seni ikenai üsap chüen mongö ei mongö tori epwe unusen pwönüetä wewen lon Mwün Kot.” ¹⁷ Mürin Jesus a angei ewe kap, a iotekin kilisou ngeni Kot won o a apasa, “Oupwe angei ei kap o ünfengen ämi meinisin. ¹⁸ Üpwe ürenikemi, pwe seni ikenai üsap chüen ünümi seni ei wain tori wareton ewe Mwün Kot.” ¹⁹ Mürin a angei eföü pilawa o a iotekin kilisou ngeni Kot won, a kini o ineti ngeniir o apasa, “Iei inisi üa fangela fän itemi. Oupwe föri ei pwe oupwe chechemeniei.” ²⁰ Pwal ina chök usun, a ngeniir ewe kap mürin ar mongö o apasa, “Ei kap än Kot we pwon mi fö mi fis ren chai a ninnila fän itemi. ✱ ²¹ Nge nengeni, ätewe epwe afangamäei a nom rei arun ei chepel. ✱ ²² Pun Nöün Aramas epwe mäla usun Kot a fen apwüngala, nge feiengauen ätewe epwe afangamä i.” ²³ Mürin ra popuetä le aisfengen lefiler iö me leir epwe tongeni föri ei sokun föföör.

Ra aninifengen usun iö leir epwe lapalap

22.24-30

²⁴ Iwe, a fis eu aninifengen lefilen ekewe chon kaiö won iö leir aramas repwe ekiiki pwe a lap seniir meinisin. ✱ ²⁵ Jesus a üreniir, “Ekewe kingen chon lükün Israel a wor ar nemenem won aramas, nge chokewe mi wor maner won aramas ra püsin aita ngeniir ‘Chon Alisi Aramas.’ ✱ ²⁶ Nge esap iei usun lefilemi. Pun ewe mi lap leimi epwe usun chök ewe mi kis, nge ewe eman mi nemenem epwe usun chök eman chon angang. ✱ ²⁷ Iö a lap, ätewe mi mot ngeni chepel are ätewe mi angang ngeni mongö? Ifa usun, esap ätewe mi mot ngeni chepel a lap? Nge ngang üa usun eman chon angang leimi. ✱

²⁸ “Ämi oua etiei lon ai kewe riaföü meinisin. ²⁹ Usun Semei a ngeniei ai üpwe nemenem, iei usun üpwe pwal ngenikemi ewe nemenem. ³⁰ Oupwe mongö o ün won ai chepel lon mwüi, oupwe pwal mot won ekewe lenien motun king o nemeni ekewe engol me ruu ainangen Israel. ✱

Jesus a osuni pwe Petrus epwe amam i

22.31-34

(Mat 26.31-35; Mark 14.27-31; Joh 13.36-38)

³¹ “Simon, Simon, nengeni, Satan a angei an mwümwütä pwe epwe sotunikemi, epwe mworeikemi usun aramas ra mworei föün wiich, pwe pöör epwe inwü seni föün. ³² Nge ngang üa iotek fän itom Simon,

✱ 22:20: Jer 31.31-34 ✱ 22:21: Kölf 41.9 ✱ 22:24: Mat 18.1; Mark 9.34; Luk 9.46 ✱ 22:25: Mat 20.25-27; Mark 10.42-44 ✱ 22:26: Mat 23.11; Mark 9.35 ✱ 22:27: Joh 13.12-15 ✱ 22:30: Mat 19.28

pwe om lükülük esap ükütiu. Iwe, lupwen om kopwe liwinsefäl, kopwe apöchöküla pwiüm kewe.”³³ Petrus a pölüeni, “Ai Samol, üa molotä ai üpwe etukelong lon imwen fötek pwal lon mäla.”³⁴ Nge Jesus a pölüeni, “Petrus, ngang üpwe ürenuk, pwe lon chök ei pwin mwen ewe chuko epwe kökkö, en kopwe amamasinie fän ülüngat.”

Pwotou, chota me ketilas
22.35-38

³⁵ Mürin Jesus a aisini nöün kewe chon kaiö, “Lupwen üa tinikemiila, nge ousap uwou pwotou, chota me sus, ifa usun, oua osupwangen och mettoch?” Iwe, ra pölüeni, “Ap, aisap osupwangen och mettoch.”³⁶ Iwe, a üreniir, “Nge iei, are a wor an eman pwotou are chota, epwe fokun angei. Nge are esap wor nöün eman ketilas, epwe amömöla üfan sekit o möni eföch.”³⁷ Pun üpwe ürenikemi, pwe ekei kapas mi mak lon ekewe Toropwe mi Pin repwe pwönüetä fän itei, ‘I a alealong lein ekewe chon pupungau.’ Pun meinsin mine a mak fän itei epwe pwönüetä.”³⁸ Iwe, ekewe chon kaiö ra üreni, “Äm Samol, nengeni, a wor ruoföch ketilas ikei.” Nge Jesus a pölüeniir, “A naf.”

Jesus a iotek won ewe Chukun Olif
22.39-46
(Mat 26.36-46; Mark 14.32-42)

³⁹ Iwe, Jesus a towu seni ewe telinimw o feitä won ewe Chukun Olif usun a piin föföri, nge ekewe chon kaiö ra eti.⁴⁰ Iwe, lupwen a tori ewe leni, a üreniir, “Oupwe iotek, pwe ousap turulong lon sosot.”⁴¹ Mürin a feila seniir ina epwe ükükün toauen än eman monei eföü fau. Iwe, a fotopwäsuketiu o iotek.⁴² A apasa, “Semei, are ka mochen, kopwe angei seniei ei kapen riaföü, nge esap fis letipei pwe letipom.”⁴³ Iwe, eman chon läng a pwä ngeni o apöchöküla.⁴⁴ Lon an nom lon riaföü watte a achocho le iotek, nge mononan a usun chök supun cha a suputi le pwül.⁴⁵ Iwe, lupwen a ütä seni an iotek, a liwinsefäli ekewe chon kaiö o a küneer pwe ra möür, pun ra fokun chouchou ren ar lolilen.⁴⁶ Mürin a aisiniir, “Pwota oua chök mömöür, oupwe pwätä o iotek, pwe ousap turulong lon sosot.”

Ra fötekini Jesus
22.47-53
(Mat 26.47-56; Mark 14.43-50; Joh 18.3-11)

⁴⁷ Iwe, lupwen Jesus a chüen kakapas, a war eu mwichen aramas fän emwenien Jutas, eman lein ekewe engol me ruoman chon kaiö. Jutas a feiliti Jesus pwe epwe mitiri.⁴⁸ Nge Jesus a üreni, “Jutas, ifa usun, kopwe afangamä Nöün Aramas ren och mitimit?”⁴⁹ Iwe, lupwen ekewe chon kaiö mi eti Jesus ra küna mine a fis, ra ais, “Äm Samol, aipwe nöünöü nöüm ketilas?”⁵⁰ Eman me leir a pöküela pelifichin selingen nöün ewe Souasor mi Lap we chon angang.⁵¹ Nge Jesus a üra, “Oupwe ükütiu! Ousap chüen föri ei sokun.” Iwe, a atapa selingen ewe mwän o a öchusefäl.⁵² Mürin Jesus a üreni ekewe souasor mi lap, ekewe meilapen chon tümwünü ewe imwenfel me ekewe souakomwen lamalam mi feito pwe repwe turufi, “Oua feito fän ketilas me wok pwe oupwe turufiei, usun ämi oupwe turufi eman chon föföringau?”⁵³ Üa nonom remi iteiten

✧ 22:37: Ais 53.12

rän lon ewe imwenfel, nge ousap sotuni pwe oupwe turufiei. Nge iei a tori ämi fansoun, lupwen rochopwak a nemenem.” ✧

Petrus a amamäsini Jesus

22.54-62

(*Mat 26.57-58,69-75; Mark 14.53-54,66-72; Joh 18.12-18,25-27*)

⁵⁴ Iwe, ra turufi Jesus o etekinala lon imwen ewe Souasor mi Lap. Nge Petrus a tapwela mürin me toau. ⁵⁵ Lupwen ra akküw eu ekkei lukalapen ewe leni mwen imwen ewe Souasor mi Lap o motfengen ünükün, Petrus a pwal mot rer. ⁵⁶ Mürin eman chon angang fefin a küna Petrus pwe a momot ikenan ünükün ewe ekkei, a newenewen ngeni o üra, “Ei mwän a pwal eti Jesus.” ⁵⁷ Nge Petrus a amamäsini o üreni, “Fefin, ngang üsap silei ätewe.” ⁵⁸ Ekis chök fansoun mürin eman mwän a pwal esilla Petrus o üreni, “Pwal en eman leir.” Nge Petrus a pölüeni, “Mwän, ngang sap eman me leir.” ⁵⁹ Ina epwe eu awa mürin, eman mwän a pöchökül le üra, “Enlet, ei mwän a pwal eti Jesus, pun pwal i eman re Kalilea.” ⁶⁰ Nge Petrus a pölüeni, “Mwän, ngang üsap silei mine ka kapas usun!” Iwe, lon ewe chök otun, lupwen Petrus a chüen kakapas, eman chuko a kökkö. ⁶¹ Iwe, ewe Samol a kul o newenewen ngeni Petrus. Iwe, Petrus a chechemeni pwe ewe Samol a fen üreni, “Mwen än ewe chuko epwe kökkö lepwinei, en kopwe amamäsini fän ülüngat.” ⁶² Iwe, Petrus a feila lükün o a fokun kechü.

Ra turunufasei o wichi Jesus

22.63-65

(*Mat 26.67-68; Mark 14.65*)

⁶³ Iwe, ekewe mwän mi mamasa Jesus ra turunufasei o wichi. ⁶⁴ Ra finitala won mesan o aisini, “Tö a wichiik? Kopwe esilla.” ⁶⁵ Ra pwal apasa ngeni chomong kapasen turunufas.

Jesus a ü me mwen ewe mwichen souapwüing

22.66-71

(*Mat 26.59-66; Mark 14.55-64; Joh 18.19-24*)

⁶⁶ Iwe, lupwen a ränila, ekewe souakomwen lamalam, ekewe souasor mi lap me ekewe Sensen Allük ra mwichfengen. Mürin ra etekinala Jesus mwen ewe mwichen souapwüing. ⁶⁷ Iwe, ra aisini Jesus, “Kopwe ürenikem are en wesewesen ewe Kraist.” Jesus a pölüeniir, “Are üpwe ürenikemi, ousap lüküei. ⁶⁸ Nge are üpwe aisinikemi eu kapas ais, ousap mochen pölüeni. ⁶⁹ Nge seni iei Nöün Aramas epwe mot lepelifichin Kot ewe mi Manau.” ⁷⁰ Iwe, ir meinsin ra aisini, “Ifa usun, en ewe Nöün Kot?” Jesus a pölüeniir, “A pwüing mine oua apasa, pwe ngang nöün.” ⁷¹ Mürin ra üra, “Esap chüen wor lomoten ach sipwe kütta och kapasen pwärätä. Ousia püsin rongorong met a apasa.”

23

Ra etekinala Jesus mwen Pilatus

23.1-5

(*Mat 27.1-2,11-14; Mark 15.1-5; Joh 18.28-38*)

¹ Mürin unusen ewe mwichen aramas a ütä o ra etekinala Jesus mwen Pilatus. ² Ikenan ra popuetä le atipisi Jesus o üra, “Äm aia küna ei mwän pwe a emweningaua aramasen fanüach. A üreniir pwe resap takises

ngeni Sisar, a pwal apasa pwe püsin i Kraist ewe king.”³ Pilatus a aisini Jesus, “Ifa usun, en nöün chon Juta we king?” Jesus a pölüeni, “Ewer, usun om apasa.”⁴ Mürin Pilatus a üreni ekewe souasor mi lap me ewe mwicheichen aramas, “Üsap küna och tipis ren ei mwän.”⁵ Nge ir ra chök alapala ar kapasen tipitipmwäl ngeni, “A afitikokoi ekewe aramas ren an afalafal lon unusen Jutea, a popuetä seni lon Kalilea o otourato ikei.”

Jesus a ü mwen Herotes

23.6-12

⁶ Iwe, lupwen Pilatus a rong ekei kapas, a ais, “Ifa usun, ei mwän eman re Kalilea?”⁷ Nge lupwen a rongorong, pwe Jesus seni ewe fanü Herotes a nemeni, a tinala Jesus ren Herotes, pun Herotes a pwal nom lon Jerusalem lon ei fansoun.⁸ Iwe, lupwen Herotes a küna Jesus a fokun pwapwa, pun a fen mochen küna lon fansoun langatam. Pokiten mine a fen rong usun, a apilükülük ngeni an epwe küna och asisil Jesus epwe föri.⁹ Iei mine Herotes a aisini Jesus chomong kapas ais, nge Jesus esap pölüeni och.¹⁰ Iwe, ekewe souasor mi lap me ekewe Sensen Allük ra ü ikenan o ra fokun achocho le atipisi.¹¹ Nge Herotes me nöün kewe sounfiu ra urumwotei o turunufasei Jesus. Mürin ar aüföüfa ngeni echö üf mi fokun ling, Herotes a tinsefäliela ren Pilatus.¹² Lon chök ewe ränin Herotes me Pilatus ra pwipwifengen, nge me mwan ra oputafengeniir.

A pwüngüla pwe Jesus epwe mäla

23.13-25

(Mat 27.15-26; Mark 15.6-15; Joh 18.39-19.16)

¹³ Mürin Pilatus a körifengeni ekewe souasor mi lap, ekewe sounemenem me ekewe aramas¹⁴ o a üreniir, “Ämi oua apasa lupwen oua emwenato ei mwän rei pwe a emweningauei ekewe aramas. Iei üa atittina me mwemi, nge üsap küna och tipis ei mwän ren mine oua atipisi won.¹⁵ Pwal Herotes esap küna och tipis ren, iei mine a tinsefälieto rech. Me rei, esap wor och mine ei mwän a föri an epwe tipis mäla.¹⁶ Iei mine üpwe wichi o amusala.”¹⁷ [Iteiten ier, lupwen a tori ewe mongön Pasofer, Pilatus a soun amusa eman chon fötek.]¹⁸ Iwe, ewe mwichen aramas a köpökütä, “Kopwe amäloi ewe aramas, nge kopwe amusa ngenikem Parapas.”¹⁹ (Parapas a fen nom lon imwen fötek pokiten an afisätä eu fitikoko lon ewe telinimw, pwal fän iten an niela aramas.)²⁰ Pilatus a fokun mochen angasala Jesus, iei mine a kapassefäl ngeni ewe mwichen aramas.²¹ Nge ir ra chök kökkö ngeni, “Kopwe iräpengesi, kopwe iräpengesi!”²² Iwe, Pilatus a kapas ngeniir fän aülüngatin, “Pwota? Meni sokun tipis a föri? Üsap küna ren ei aramas och tipis an epwe ina popun pwe epwe mäla. Iei mine üpwe chök wichi o amusala.”²³ Nge ekewe aramas ra chök sowela le kökkö fän leüömong o tüngormau pwe epwe iräpenges. Feilfeil a pwönüetä mine ra eäni kökkö.²⁴ Iei mine Pilatus a apwüngala, pwe epwe fis ngeni Jesus mine ra tüngor.²⁵ A amusala ewe mwän mi nom lon imwen fötek pokiten an afisätä fitikoko me niela aramas, i ätewe ra tüngor an epwe musala. Nge a mwüt ngeniir Jesus pwe repwe föri ngeni mine ra mochen.

Jesus a iräpenges

23.26-43

(Mat 27.32-44; Mark 15.21-32; Joh 19.17-27)

²⁶ Iwe, lupwen än ekewe sounfiu etekinala Jesus won ewe al, ra churi eman mwän seni Kirene, itan Simon, a feito seni lemäl, pwe epwe tolong lon ewe telinimw. Ekewe sounfiu ra turufi Simon o ekieta ewe iräpenges won afaran pwe epwe mwärela mürin Jesus. ²⁷ Eu mwichen aramas mi chomong ra tapwela mürin. Iwe, a wor ekoch fefin me leir mi ngüngüres o kechüeiti Jesus. ²⁸ Nge Jesus a sap ngeniir o üreniir, “Ämi fin Jerusalem! Ousap kechüeitiei, nge oupwe püsin kechüeitikemi me nöümi kana. ²⁹ Pun repwe war ekewe rän, lupwen aramas repwe apasa, ‘Feiöchün ekewe fefin mi rit, ekewe fefin resap nöünöü, pwal ekewe resap oupwu semirit.’ ³⁰ Mürin repwe kapas ngeni ekewe chuk, ‘Oupwe turutiu wom,’ repwe pwal kapas ngeni ekewe chukutekison, ‘Oupwe pwölükeemila.’ ✧ ³¹ Pun are ekei sokun mettoch repwe fis lupwen ewe irä a manau, met epwe fis lupwen a pwasala?” ³² Ra pwal etekinala ruoman mwän mi föföringau pwe repwe ninnila fiti Jesus.

³³ Iwe, lupwen ar tori ewe leni a iteni Poisökün Mökür, ra iräpenges Jesus ikenan fiti ekewe ruoman chon föföringau, eman a nom lepelifichin, nge eman a nom lepelimöngun. ³⁴ Iwe, Jesus a apasa, “Semei, kopwe amuserela, pun resap silei mine ra föri.” Ra üttüt won üfan kana o ra ngeni eman me eman met üttian. ✧ ³⁵ Iwe, ekewe aramas ra ütä ikenan o kakatol, nge ekewe sounemenemen chon Juta ra turunufasei Jesus o apasa, “A amanaua ekoch, epwe püsin amanaua are i Kraist, ewe Kot a filätä.” ✧ ³⁶ Ekewe sounfiu ra pwal turunufasei Jesus. Ra feito ren o ekiekin aünü ngeni wain mi mwäl. ✧ ³⁷ Ra apasa, “Are en nöün ekewe chon Juta king, kopwe püsin amanauok!” ³⁸ Asen möküren Jesus a mak ekei kapas, “Tei i ewe kingen chon Juta.”

³⁹ Iwe, eman lein ekewe chon föföringau mi iräpenges ikenan a turunufasei Jesus o üreni, “Ifa usun, sap en Kraist? Kopwe püsin amanauok o pwal amanauakem!” ⁴⁰ Nge pwal ewe eman chon föföringau a apwüngü o üreni, “Ifa usun, kosap niuokusiti Kot? A pwüngüla om kopwe mäli ei sokun mäla usun chök i. ⁴¹ A fokun pwüng mine ra apwüngükich ren, pun kich sia angei liwinin ach kewe föfö. Nge ei mwän esap föri och föfö mi mwäl.” ⁴² Mürin a üra, “Jesus, kose mochen chechemeniei lupwen om kopwe tolong lon mwumw.” ⁴³ Iwe, Jesus a pölüeni, “Enlet, üpwe ürenuk, ikenai kopwe etiei lon Paratis.”

Jesus a mäla

23.44-49

(Mat 27.45-56; Mark 15.33-41; Joh 19.28-30)

⁴⁴ Ina epwe kulok engol me ruu akkar esap chüen tin nge a rochopwak unusen ewe fanü tori kulok ülüngat. ⁴⁵ Iwe, ewe chechen mangaku lon imwenfel a kam seni won tori fan pwe a wor ruu kinikin. ✧ ⁴⁶ Mürin Jesus a kökkö fan mwelian mi leüömong, “Semei, üa atolonga ngüni lepoumw.” Wesin an apasa ei a mäla. ✧

⁴⁷ Iwe, lupwen ewe meilapen sounfiu a küna mine a fis, a mwareiti Kot o apasa, “Enlet, ei mwän i eman mwän mi pwüng.” ⁴⁸ Lupwen ewe mwichen aramas mi chufengen ikenan pwe repwe katol mwökütükütün met a fis ra küna ei, ra pisiri fän mwäriir lon ar letipeta o liwiniti lenier.

✧ **23:30:** Os 10.8; Pwär 6.16 ✧ **23:34:** Kölf 22.18 ✧ **23:35:** Kölf 22.7 ✧ **23:36:** Kölf 69.21
✧ **23:45:** Eks 26.31-33 ✧ **23:46:** Kölf 31.5

49 Nge chokewe meinsin mi sisile Jesus me ekewe fefin mi tapwela mürin Jesus seni Kalilea ra ütä ekis toau ar repwe küna mine a fis. ✧

Jesus a peias

23.50-56

(Mat 27.57-61; Mark 15.42-47; Joh 19.38-42)

50 Iwe, a wor eman mwän itan Josef seni Arimatea eu telinimw lon Jutea. Ätei eman seni ewe mwichen souapwüng, eman mwän mi pwüng o wenechar. 51 Esap tipeeu ngeni mine ra pwüngüpüwüng won pwal ar föför. Iwe, a ösüküsükü ewe Mwün Kot. 52 Iwe, Josef a feila ren Pilatus o tüngror somän Jesus. 53 Mürin a angeatiu somän Jesus me won ewe iräpenges, a finiti ngeni eu mangaku mi pwechepwech o peiaseni lon eu peias mi tuw lon achau, esap wor mwo eman somä a nom lon me mwan. 54 Iwe, iei än ekewe chon Juta räninamol o a arapakan ngeni an epwe le popuetä ewe ränin sapat. 55 Iwe, ekewe fefin mi tapwela mürin Jesus seni Kalilea ra eti Josef le feila o nengeni ewe peias, ra pwal nengeni usun ar akona somän Jesus me lon. 56 Mürin ra liwiniti lenier o amolätä löpwokus fän iten ewe somä. Nge lon ewe ränin sapat ra asösö usun mine a mak lon ekewe allük.

24

Jesus a manusefäl

24.1-12

(Mat 28.1-10; Mark 16.1-8; Joh 20.1-10)

1 Iwe, lesosorusichin ewe aeuin ränin wiik ekewe fefin ra feila ren ewe peias, nge ra uwala ekewe löpwokus ra amolätä. 2 Iwe, ra küna pwe ewe fau a fen mwöküt seni mesen ewe peias. 3 Nge lupwen ar tolong lon, resap küna somän ar we Samol Jesus. 4 Nge lupwen ar chüen ükütä o osukosuk ren mine ra küna, ruoman mwän mi üföüf üf mi saramaram ra ütä ünükür. 5 Iwe, ekewe fefin ra fokun niuokus o chapetiu le pwül, nge ekewe mwän ra üreniir, “Pwota oua kütta ewe mi manau lein ekewe mi mäla? 6 Esap nom ikei, pwe a manusefälitä. Oupwe chechemeni met a ürenikemi, lupwen a chüen nom lon Kalilea: 7 ‘Nöün Aramas epwe tolong lepöün chon tipis, epwe iräpenges, nge mürin ülüngat rän epwe manusefäl.’ ” ✧ 8 Mürin ra chechemeni än Jesus kewe kapas. 9 Iwe, ra liwinsefäl seni ewe peias o apworaus a ngeni ekewe engol me eman chon kaiö, pwal ngeni ekewe ekoch aramas ekewe mettoch meinsin ra rong o küna. 10 Ikei iten ekewe fefin: Maria Maktalene, Joanna me Maria inen James. Ir me pwal ekoch fefin mi etiir ra apworaus a ekei mettoch ngeni ekewe soukünü. 11 Nge ekewe soukünü ra ekieki, pwe met ekewe fefin ra apworaus a ngeniir esap wor allükülükün, iei mine resap lüküür. 12 Nge Petrus a ütä o sä ngeni ewe peias. A pworotiu o nenelong lon ewe peias, nge a chök küna finifinin somän Jesus kewe. Mürin a weitifengen ren mine a fis o a liwinsefäliti imwan.

Jesus a pwä ngeni ruoman me won ewe al ngeni Emaus

24.13-35

(Mark 16.12-13)

13 Iwe, pwal lon ewe chök ränin ruoman me lein ekewe chon tapwela mürin Jesus ra feila ngeni eu sopw itan Emaus, ina epwe ükükün fisu mail toauan seni Jerusalem. 14 Ra kakapasfengen lefiler usun ekewe

✧ 23:49: Luk 8.2-3 ✧ 24:7: Mat 16.21; 17.22-23; 20.18-19; Mark 8.31; 9.31; 10.33-34; Luk 9.22; 18.31-33

mettoch meinisin ra fisitä. ¹⁵ Lupwen ra kakapas o ekielifengeni usun ekei mettoch, Jesus a kaneto rer o etiir le fetal. ¹⁶ Iwe, ra küna i, nge resap esilla. ¹⁷ Jesus a aisiniir, “Met ei oua ppopworausfengen usun, lupwen oua fefetal?” Iwe, ra üla o wololilen. ¹⁸ Mürin eman me leir itan Kleopas a pölüeni, “Ifa usun, en chök eman me lein ekewe wasöla lon Jerusalem kosap silei ekewe mettoch a fen fis lon ekewe rän?” ¹⁹ Jesus a aisiniir, “Ikafan ekewe mettoch?” Iwe, ra pölüeni, “Ekewe mettoch mi fis ngeni Jesus, ewe re Nasaret. Ei mwän eman soufos a wor manamanen an kapas me an föföör mwen mesen Kot me aramas meinisin. ²⁰ Nöüm kewe souasor mi lap me sounemenem ra atoow ngeni Pilatus an epwe apwüng ngeni mäla, nge mürin ra iräpengesi. ²¹ Nge äm aia apilükülükü, pwe i ewe eman Kot a tinato pwe epwe angasa Israel. Nge lükün ekei, iei ewe aülüngatin rän mürin a fis ekei mettoch. ²² Nge pwal ekoch fefin seni äm mwich ra amairükem. Ra feila ren ewe peias lesosorusich, ²³ nge resap küna somän Jesus we. Nge lupwen ra liwinto rem, ra apworausa pwe a wor künaer chon läng mi üreniir pwe a manau. ²⁴ Mürin ekoch me lon äm we mwich ra feila ren ewe peias o alletä pwe ekewe mettoch ekewe fefin ra kapas usun, ra pwüng. Nge resap küna Jesus.”

²⁵ Iwe, Jesus a üreniir, “Pwota iei me miritimangemi me mangen letipemi! Inet ämi oupwe lükü meinisin mine ekewe soufos ra apasa? ²⁶ Ifa usun, esap wisen Kraist pwe epwe küna ekei riaföü meinisin me mwen an epwe tolong lon an ling?” ²⁷ Mürin Jesus a awewe ngeniir met a mak lon ekewe Puk mi Pin usun püsin i. A popuetä seni ekewe puken Moses tori ekewe puken soufos meinisin.

²⁸ Nge lupwen ra arap ngeni ewe sopw ra mochen feila lon, Jesus a tipin föri usun itä nge epwe sopwela an sai. ²⁹ Nge ir ra fokun pesei o tüngor ngeni, “Kose mochen kopwe nonom rem, pun a lekuniolula, nge epwe le pwinituk.” Iei mine a tolong lon imwer pwe epwe nonom rer. ³⁰ Lupwen an mottiu ngeni chepel pwe epwe mongö rer, a angei ewe pilawa o iotekin afeiöchü. Mürin a kini o ineti ngeniir. ³¹ Mürin meser ra usun itä ra kärän nennela pwe ra esilla Jesus, nge i a mörukela seniir. ³² Iwe, ra kapasfengen lefiler, “Ifa usun, esap usun eu ekei mi ngetenget lon lelukach, lupwen a kapas ngenikich won al o afata ngenikich wewen ekewe Toropwe mi Pin?” ³³ Mürin ra müttir ütä o liwinsefäliiti Jerusalem o ra churi ekewe engol me eman chon kaiö, pwal ekewe ekoch ra mwichfengen. ³⁴ Iwe, ekewe chon kaiö ra üreni ekewe ruoman, “Enlet, ewe Samol a manausefäl pwe a pwä ngeni Simon!” ³⁵ Mürin ekewe ruoman ra apworausa ngeniir met a fis lupwen ar fetal won ewe al, pwal usun ar esilla ewe Samol lupwen a kinifeseni ewe pilawa.

Jesus a pwä ngeni nöün kewe chon kaiö

24.36-49

(Mat 28.16-20; Mark 16.14-18; Joh 20.19-23; Föf 1.6-8)

³⁶ Iwe, lupwen än ekewe ruoman ra apworausa ngeniir ei pworaus, Jesus a püsin ütä lefiler o üreniir, “Kinamwe epwe torikemi.” ³⁷ Nge ir ra fokun rükö o niuokus, pun ra ekieki pwe ra küna eman anü. ³⁸ Jesus a üreniir, “Pwota oua niuokus? Pwota oua tipemwaramwar lon letipemi? ³⁹ Oupwe nengeni pei me pechei, pwe oupwe silei pwe ngang ei. Oupwe atapaii o mefi, pun eman anü esap wor ren fituk me chü usun oua küna

pwe a wor rei.” ⁴⁰ Iwe, a apasa ekei kapas, lupwen a pwäri ngeniir pöün me pechen. ⁴¹ Pokiten ra fokun pwapwa o weitifengeniir, resap fen mwo lükü. Iei mine a aisiniir, “Ifa usun, esap wor och mongö ikei pwe üpwe mongö?” ⁴² Iwe, ra ngeni ekis fituken ik mi kapwich. ⁴³ Jesus a angei ewe ik o mongö me mwer. ⁴⁴ Mürin a üreniir, “Iei met üa fen ürenikemi pwe epwe fis, lupwen üa chüen nonom remi: Meinisin mine a mak usi lon än Moses we Allük, pwal lon ekewe puken soufos me Kölfel epwe fokun pwönüetä.” ⁴⁵ Mürin a suki letiper, pwe repwe tongeni weweiti masouen ekewe Toropwe mi Pin. ⁴⁶ Iwe, a üreniir, “Iei usun a fen mak, pwe Kraist epwe fokun riaföü o manausefäl seni mäla lon aülüngatin rän. ⁴⁷ Ren itan oupwe afalafala chon ekewe mwü meinisin, pwe repwe ekieksefäl, pwe Kot epwe amusala ar tipis, nge oupwe popuetä lon Jerusalem. ⁴⁸ Ämi oua chon pwärätä ekei mettoch. ⁴⁹ Nengeni, üpwe tinatiu womi mine Semei a fen eäni pwon. Nge ämi oupwe nonom lon ei telinimw tori ewe manaman seni läng epwe feitiu womi.”

Jesus a feitä läng

24.50-53

(Mark 16.19-20; Föf 1.9-11)

⁵⁰ Mürin Jesus a emweniirewu seni Jerusalem o feila arap ngeni Peta-
nia. Ikenan a aitiela pöün wor o afeiöchüür. ⁵¹ Lupwen an afeiöchüür a
feitä seniir o feitä läng. ⁵² Iwe, mürin ra fel ngeni o liwinsefäliiti Jerusalem
fän watten pwapwa, ⁵³ o ra chök nonom lon ewe imwenfel o mwareiti
Kot.

Ewe Pworausen Manau makkeen Johannes

Kapas akom

I. Iten ei puk: Johannes, wewen ei it “ewe Samol a kirikiröch”.

II. Chon makkei ei puk: Johannes, eman nöün Jesus kewe chon kaiö.

III. Itelapemongen ei puk: Aramas repwe lükü Jesus Kraist, pwe i nöün Kot.

IV. Kapas aüchean ei puk: Johannes a fokun alinga Jesus.

V. Masouen ei puk Johannes: Ei puk a pwäri ngenikich, pwe Jesus ewe Kapasen Kot mi nonom tori feilfeilachök, “a wiliti aramas o nonom lefilach.” Ei Pworausen Manau a mak, pwe ir mi aleani repwe lükü pwe Jesus ewe Chon Amanau, Kot a pwon pwe epwe tinato, ewe Nöün Kot, pwe chokewe mi lükü repwe küna manau. (20.31)

Lon ewe kapas akom a pwä, pwe ewe Kapasen Kot mi nonom tori feilfeilachök a wewefengen me Jesus. Pworausen ewe aeuin kinikinin ewe Pworausen Manau, pwe Jesus a föri sokopaten manaman mi pwärätä pwe i ewe Chon Amanau, Kot a fen pwon ngenikich, ewe Nöün Kot. Mürin ekei pworaus ra mak afalafal mi awewei met Jesus a mochen pwärätä ren ekewe manaman. Ei kinikin lon ei puk a aiti ngenikich usun ekoch aramas ra lükü Jesus o tapwela mürin, nge pwal ekoch ra ü ngeni, pun resap mochen lükü. Lon sopun 13-17 a mak pworausen än Jesus chiechifengen me nöün kewe chon kaiö lon ewe pwinin mwen an fötek, pwal an kewe kapas amol me apöchöküla letipen nöün kewe chon kaiö mwen an epwe iräpenges. Ekewe sopun mi nom lesopolan ra aiti ngenikich usun än Jesus fötek, an küna apwüng, an iräpenges, an manausefäl me an pwä ngeni nöün kewe chon kaiö mürin an manausefäl.

Ewe pworaus usun ewe fefin ra turufi lupwen an lisowu (8.1-11) a nom lefilen ei asisil pokiten chomong chon siwili ekewe toropwe me lom ra atowu. Nge pwal ekoch ra atolonga lon pwal ekoch leni.

Johannes a afatöchü aüchean ewe lifangen Manau esemüch me ren Kraist, eu lifang mi torikich iei, a tori chokewe mi lükü Jesus, pwe i ewe al, ewe let me ewe manau. Ewe Pworausen Manau me ren Johannes a nöünöü ekoch mettoch sia aea iteiten rän o aweweöchü ngeni ekewe mettoch mi let lon pekin ngün, usun ewe koluk, pilawa, saram, ewe chon mas me nöün sip, pwal ewe irän wain me uan kana.

VI. Tettelin masouen ei puk:

Kapas akom 1.1-18

Johannes Soupapatais me nöün Jesus kewe chon kaiö a akom le köriir
1.19-51

Än Jesus angang 2.1-12.50

Ekewe amüchülan ränin än Jesus manau won fanüfan, lupwen an nom
lon Jerusalem me an nom lon ekewe leni mi arap *13.1-19.42*

Än ewe Samol manausefäl me an pwä ngeni aramas 20.1-31

Kapas amüchülan. Pwal ekoch pworaus usun an pwä lon Kalilea 21.1-

*Ewe Kapasen Manau**1.1-18*

¹ Mwen än Kot föri fanüfan ewe Kapas a fen nom. Ewe Kapas a nom ren Kot, a pwal eäni sokun Kot. ² Ewe Kapas a nom ren Kot seni me lepoputän. ³ Kot a föri mettoch meinisin ren ewe Kapas, esap wor och lein förian kewe a för lükün i. ⁴ Ewe Kapas i ewe popun manau, nge ei manau a uwato saram ngeni aramas meinisin. ⁵ Ewe saram a tittin lon rochopwak, nge rochopwak esap tongeni akufu.

⁶ Kot a tinala nöün chon künö, eman mwän itan Johannes. ✱ ⁷ A feito pwe epwe asile ngeni aramas usun ewe saram, pwe meinisin repwe rong ewe pworaus o lükü. ⁸ Püsin i esap ewe saram, nge a feito pwe epwe asile ngeni aramas usun ewe saram. ⁹ Iei ewe saram mi let, a feito fanüfan o asarama aramas meinisin.

¹⁰ A nom lon fanüfan o fanüfan a för ren, nge fanüfan esap silei i. ¹¹ A tori fanüan, nge aramasan resap etiwa. ¹² Nge iö kana ra etiwa o lükü i a ngeniir manaman pwe repwe wiliti nöün Kot. ¹³ Resap wiliti nöün Kot usun än eman uputiu ngeni saman, pun resap uputiu won tipen fituk are tipen mwän, nge püsin Kot a föri pwe ir nöün.

¹⁴ Ewe Kapas a wiliti aramas o nonom lefilach. Sia nengeni an we ling, ewe ling Saman a ngeni, pun i Nöün Aleman, a uren ümöümöch me let. ¹⁵ Iwe, Johannes a kapas usun i, a kökkö fän leüömong o apasa, “Iei i ätewe üa kapas usun lupwen üa üra, ‘I epwe feito müri, nge a lap seniei, pun a nom mwen ai üsamwo uputiu.’” ¹⁶ Seni an ümöümöch mi somosomola sia angei feiöch esap ükütiu. ¹⁷ Kot a ngenikich ekewe allük ren Moses, nge ümöümöch me let a torikich ren Jesus Kraist. ¹⁸ Esap wor eman aramas a künä Kot fän eu. Nge Nöün Kot Aleman mi nom ren ewe Sam a fen pwäri ngeni aramas usun Kot.

*Än Johannes Soupapatais afalafal**1.19-28*

(*Mat 3.1-12; Mark 1.1-8; Luk 3.1-18*)

¹⁹ Iei usun mine Johannes a pwärätä lupwen ekewe nöüwisen chon Juta mi nom lon Jerusalem ra tinala ekoch souasor me ekoch chon ewe ainangen Lefi ren Johannes ar repwe aisini, “En iö?” ²⁰ A pwärätä fän wenechar, nge esap tukumala, “Ngang sap Kraist.” ²¹ Iwe, ir ra aisini, “Nge iö chök en? En Elias?” Johannes a pölüeni, “Apw, sap ngang Elias” Ra pwal aisini, “En ewe Soufos?” Johannes a pölüeni, “Apw.” ✱ ²² Mürin ra üreni, “Kopwe asile ngenikem ika en iö, pwe aipwe asile ngeni chokewe mi tinikeemito mine ka pölüeni ngenikem. Met ka apasa usun püsin en?” ²³ Iwe, Johannes a pölüeniir lon mine ewe soufos Aisea a apasa,

“Ngang möngüngün ewe eman

mi kökkö fän leüömong

lon ewe fanüapö:

Oupwe awenechara alen ewe Samol.” ✱

²⁴ Mürin ekewe chon künö ekewe Farisi ra tiniirela ²⁵ ra aisini Johannes, “Ika sap en Kraist ika Elias ika ewe Soufos, pwota chök ka föri angangen papatais?” ²⁶ Johannes a pölüeni, “Ngang üa papataisi aramas ren koluk, nge eman a nom leimi, ämi ousap silei. ²⁷ I ätewe mi feito müri, nge ngang üsap fen mwo nge fich ngeni ai üpwe apichi ririn ipwan sus.”

28 Ekei mettoch meinisin ra fis lon Petania ötiuen ewe chanpupu Jortan ia Johannes a föri ewe angangen papatais ie.

Ewe Lamén Kot

1.29-34

29 Iwe, sorotän ewe rän Johannes a küna pwe Jesus a feito ren, iwe, a apasa, “Iei i ewe Lamén Kot a uweela tipisin chon fanüfan. 30 Iei i ätewe üa fen kapas usun, lupwen üa apasa, ‘Eman mwän epwe feito müri, nge i a lap seniei, pun a nom mwen üsamwo uputiü.’ 31 Üsap mwo silei ika iö i, nge üa feito o papataisi aramas ren koluk pwe üpwe pwäri i ngeni chon Israel.”

32 Iwe, Johannes a pwärätä, “Ngang üa küna Ngünün Kot a feitiu seni läng lon lapalapen eman lisom o nonom won. 33 Püsin ngang üsap silei i, nge Kot ewe mi tiniei pwe üpwe papataisi aramas ren koluk, a üreniei, ‘Kopwe küna ewe Ngünün Kot epwe feito o nonom won eman mwän, i ätewe epwe papataisi aramas ren Ngünmifel.’ 34 Ngang üa küna ei, üa pwal pwärätä pwe ätei Nöün Kot.”

Nöün Jesus kewe akomwen chon kaiö

1.35-42

35 Sorotän ewe rän Johannes me ruoman nöün kewe chon kaiö ra pwal ütä ikenan. 36 Nge lupwen Johannnes a küna Jesus pwe a fetaleto, a apasa, “Iei i ewe Lamén Kot!” 37 Iwe, lupwen ekewe ruoman chon kaiö ra rongorong mine a apasa, ra tapwela mürin Jesus. 38 Nge Jesus a sapsefäl o küna pwe ra tapwela mürin, iwe, a aisiniir, “Met oua kütta?” Ra pölüeni, “Ia ka nom ie, Rabbi?” (Wewen ei kapas Rabbi ‘Sense’) 39 Jesus a pölüeniir, “Oupwe feito o püsin nenengeni.” (Lon ena otun ina epwe kulok rüanü leolopal.) Iwe, ra eti Jesus o küna ia a nonom ie o ra nonom ren lon ewe ränin. 40 Eman me lein ekewe ruoman Andru pwin Simon Petrus. 41 Andru a müttir küna pwiin we Simon o üreni, “Äm aia küna ewe Messaia.” (Wewen ei kapas Messaia ‘Kraist’.) 42 Mürin a emwenala Simon ren Jesus. Iwe, Jesus a newenewen ngeni o üreni, “Itom Simon nöün Sona, nge iei kopwe iteni Kefas.” (Ei it Kefas a wewe ngeni ewe it Petrus, wewen ‘Eu achau’.)

Jesus a köri Filip me Nataniel

1.43-51

43 Iwe, sorotän ewe rän Jesus a filätä pwe epwe feila Kalilea. A küna Filip o üreni, “Kopwe tapweto müri.” 44 (Filip i seni Petsaita ewe telinimw ia Andru me Petrus ra nom ie.) 45 Filip a küna Nataniel o üreni, “Äm aia küna ätewe Moses a mak usun lon ewe puken Allük, pwal ekewe soufos ra mak usun. I Jesus nöün Josef seni Nasaret.” 46 Nataniel a aisini, “Ifa usun, och mi mürina a tongeni feito seni Nasaret?” Filip a pölüeni, “Kopwe feito o nengeni.” 47 Lupwen Jesus a küna pwe Nataniel a feito ren, iwe, a apasa usun, “Iei i eman wesewesen re Israel, esap wor och mine a mwäl won.” 48 Nataniel a aisini, “Pwota ka tongeni sileei?” Jesus a pölüeni, “Ngang üa künok lupwen ka nom fän ewe irä fik, me mwen än Filip köruk.” 49 Iwe, Nataniel a üreni, “Sense, en Nöün Kot! En ewe kingen Israel!” 50 Jesus a üreni, “Ifa usun, ka lükü pokiten üa ürenuk pwe üa künok lupwen ka nom fän ewe irä fik? Kopwe küna chomong mettoch mi lap seni ei.” 51 Mürin a üreniir, “Enlet, üpwe wesewesen ürenikemi: Ämi oupwe küna pwe läng

epwe sukula o nöün Kot kewe chon läng repwe feitä me feitiu won Nöün Aramas.” ✨

2

Ewe apwüpwülü lon Kana

2.1-12

¹ Iwe, mürin ruu rän a fis eu apwüpwülü lon ewe telinimw Kana lon Kalilea. Inen Jesus we a nom ikenan. ² Pwal Jesus me nöün kewe chon kaiö ra kö pwe repwe eti ewe apwüpwülü. ³ Iwe, lupwen a it ünümer wain, inen Jesus a üreni, “Esap chüen wor ünümer wain.” ⁴ Nge Jesus a pölüeni, “Nemin, kosap üreniei mine üpwe föri. Esamwo tori ai fansoun.” ⁵ Mürin inen Jesus a üreni ekewe chon angang, “Oupwe chök föri mine a ürenikemi.” ⁶ Iwe, a wor än ekewe chon Juta allükün ar lamalam usun ar repwe limeti inisiir me mettochur lupwen repwe fel ngeni Kot. Iei mine a wor wonu lenien koluk lon ewe imw, masouen eu me eu ina epwe ükükün rüe ika ilik kalon. ⁷ Iwe, Jesus a üreni ekewe chon angang, “Oupwe alölöü ekei lenien koluk ren koluk.” Iwe, ra alölöör tori ra urela. ⁸ Mürin Jesus a üreniir, “Iei oupwe üfi och ena koluk o uweela ren ewe chon nemeni ewe kametip.” Iwe, lupwen ra uwala ren ewe koluk ⁹ mi wiliti wain, ätewe a neni. I esap silei ia ei wain a feito me ie. (Nge ekewe chon angang mi üfi ewe koluk ra silei.) Iei mine ewe chon nemeni ewe kametip a köri ewe mwän apwüpwülü söfö ¹⁰ o üreni, “Aramas meinisin ra akomwen uwawu ewe wain mi fokun mürina. Mürin än ekewe chon kökkoto ünümi chomong, epwe uwawu ewe wain mi mökükün. Nge en ka amwöchü ewe wain mi fokun mürina tori iei.” ¹¹ Iei aeuin manaman Jesus a föri lon Kana lon Kalilea, iwe, nöün kewe chon kaiö ra lükü i.

¹² Mürin ei, Jesus me inan we me pwiin kewe pwal nöün kewe chon kaiö ra feila Kapernaum. Ikenan ra nonom lon ekoch rän. ✨

Jesus a feila lon ewe imwenfel

2.13-22

(Mat 21.12-13; Mark 11.15-17; Luk 19.45-46)

¹³ Iwe, lupwen a arap fansoun än ekewe chon Juta chulapen Pasofer, Jesus a feila Jerusalem. ✨ ¹⁴ A tolong lon ewe imwenfel o a küna ekewe mwän mi amömö kow, sip me lisom, pwal ätekewe mi mot ngeni chepel o akasiwili moni. ¹⁵ Iei mine a piti efoch säl o aea le cheela ekewe sip me ekewe kow meinisin seni lon ewe imwenfel. A atoropasa ekewe föün moni o akulätä ekewe chepel än ekewe chon akasiwili moni. ¹⁶ Iwe, a kapas pöchökül ngeni ekewe mwän mi amömö ekewe lisom, “Oupwe uwawu ekei mettoch seni ikei. Oupwe ükütiu le föri pwe imwen Semei epwe eu imwen amömö.” ¹⁷ Iwe, nöün kewe chon kaiö ra chechemeni pwe a mak lon ekewe Toropwe mi Pin, “Ai Kot, ai ekipwichi imwom mi pin a küküri le üti usun eu ekkei.” ✨

¹⁸ Mürin ekewe nöüwisen chon Juta ra üreni, “Meni sokun manaman ka tongeni föri om kopwe pwäri ngenikem pwe mi wor om pwüüng pwe kopwe föri ekei föför?” ¹⁹ Jesus a pölüeniir, “Oupwe ataela ei imwenfel, nge ngang üpwe aüsefälietä lon ükükün ülüngat rän.” ✨ ²⁰ Iwe, ra aisini, “Ifa usun, en ka tongeni aüsefälietä ei imwenfel lon ükükün ülüngat rän? Nge ekewe chon aüetä ei imwenfel ra angang ngeni lon ükükün faik me

✨ **1:51:** Ken 28.12 ✨ **2:12:** Mat 4.13 ✨ **2:13:** Eks 12.1-27 ✨ **2:17:** Kölf 69.9 ✨ **2:19:** Mat 26.61; 27.40; Mark 14.58; 15.29

wonu ier!” ²¹ Nge ewe imwenfel Jesus a kapas usun, iei inisin. ²² Iei mine lupwen Jesus a manausefäl, nöün kewe chon kaiö ra chechemeni pwe a fen apasa ei. Ra lükü mine a mak lon ekewe Toropwe mi Pin, pwal mine Jesus a apasa.

Jesus a silei usun lapalapen aramas

2.23-25

²³ Iwe, lupwen Jesus a nom lon Jerusalem fansoun chulapen ewe Pasofer, chomong aramas ra lükü i, pun ra küna ekewe manaman a föri. ²⁴ Nge Jesus esap lükü ngeniir inisin, pun a silei ekiekin letiper. ²⁵ Esap wor lomoten än eman epwe pwäri ngeni usun eman, pun a püsin silei mine a nom lon leluker.

3

Jesus me Nikotemus

3.1-21

¹ Iwe, a wor eman mwän seni ewe mwichen Farisi itan Nikotemus, i eman me lein ekewe souemwenin ekewe chon Juta. ² Lon eu pwin ätei a feila ren Jesus o üreni, “Rabbi, äm aia silei pwe en eman sense Kot a tinato. Pun esap wor eman a tongeni föri ekei sokun manaman en ka föri are Kot esap eti.” ³ Jesus a üreni, “Enlet, üpwe wesewesen ürenuk: Esap wor eman a tongeni küna Mwün Kot are esap upsefäl.” ⁴ Nikotemus a aisini, “Epwe ifa usun än eman aramas epwe tongeni upsefäl lupwen a chinlap? Enlet, esap tongeni tolongsefäl lon upwen inan o uputiu fän aruuan.” ⁵ Iwe, Jesus a üreni, “Enlet, üpwe wesewesen ürenuk: Esap wor eman a tongeni tolong lon Mwün Kot are esap up ren koluk me Ngün. ⁶ Eman aramas a upu seni saman me inan, nge manauen ngün a up ren Ngünün Kot. ⁷ Kosap weitifengeniik ren mine üa ürenuk: Oupwe fokun upsefäl. ⁸ Asepwäl a enien ia a mochen enila ie. Ka fen rong ngüngün, nge kosap silei ia a enito me ie, ika ia a enila ie. Ina usun chök ren chokewe mi up seni Ngünmifel.” ⁹ Iwe, Nikotemus a aisini, “Epwe ifa usun an epwe tongeni fis ei?” ¹⁰ Jesus a pölüeni, “En eman sense mi lap lon Israel, nge kosap weweiti usun ei? ¹¹ Enlet, üpwe wesewesen ürenuk: Äm aia kapas usun mine aia silei o pwärätä mine aia küna, nge esap wor eman leimi a mochen etiwa mine aia eäni afalafal. ¹² Ämi ousap lüküei lupwen üa kapas ngenikemi usun mettochun ei fanüfan. Ifa usun ämi oupwe lüküei lupwen üa kapas ngenikemi usun mettochun läng? ¹³ Esap wor eman a feitä läng pwe Nöün Aramas chök, ewe mi feitü seni läng.

¹⁴ “Usun Moses a atekiatä ewe serepenit seni piras lon ewe fanüapö, iei usun Nöün Aramas epwe tekiatä, ✠ ¹⁵ pwe meinisin mi lükü i repwe eäni manau esemüch. ¹⁶ Pun iei usun Kot a echeni chon fanüfan, pwe a fangala Nöün Aleman, pwe meinisin mi lükü i resap pöütmwälila, pwe repwe eäni manau esemüch. ¹⁷ Pun Kot esap tinato Nöün won fanüfan pwe epwe apwüngü fanüfan, nge a tinato pwe epwe amanaua chon fanüfan. ¹⁸ Iö a lükü ewe Nau esap küna feiengauen apwüng, nge iö esap lükü i a fen küna feiengauen apwüng, pun esap lükü Nöün Kot Aleman. ¹⁹ Iei usun pwüngün ewe apwüng: Ewe saram a tolong lon fanüfan, nge aramas ra efich rochopwak lap seni saram, pun ar föfö a ngau. ²⁰ Iö a föri mine a ngau a oput saram, esap mochen tolong lon saram, pun a niuokus pwe an kewe föfö repwe pwäla. ²¹ Nge iö a föri mine a let a tolong lon saram,

pwe ewe saram epwe pwärätä pwe mine a föri a föri lon an aleasochisi Kot.”

Jesus me Johannes

3.22-30

²² Mürin ei pworaus, Jesus me nöün kewe chon kaiö ra feila lon ewe fanü Jutea. Ikenan a nonom rer eu fansoun o papataisi aramas. ²³ Nge Johannes a pwal papataisi aramas lon Änon arap ngeni Salim, pun a wor chomong koluk ikenan. Iwe, aramas ra feito ren o a papataisiir. ²⁴ (Ei a fis me mwen än Johannes tolong lon fötek.) ✧ ²⁵ Iwe, ekoch nöün Johannes kewe chon kaiö ra popuetä le anini ngeni eman re Juta usun ar limeti inisiir me mettochur lon pwüngün ar lamalam. ²⁶ Iwe, ra feila ren Johannes o üreni, “Sense, ka chechemeni ewe mwän a nom reöm ötiuen ewe chanpupu Jortan, ätewe ka kapas ngenikem usun? Iei a papataisi aramas o aramas meinisin ra feila ren.” ²⁷ Johannes a pölüeni, “Esap wor eman a tongeni angei och are Kot esap ngeni. ²⁸ Püsin ämi oua tongeni pwärätä pwe ngang üa apasa, ‘Sap ngang ewe Kraist, nge Kot a tinieito me mwan.’ ✧ ²⁹ Ewe mwän apwüpwülü söfö i pwülüen ewe fin apwüpwülü söfö. Nge chiechien ewe mwän apwüpwülü söfö mi ü ünükün o aüseling a pwapwa lupwen a rongorong mwelien ewe mwän apwüpwülü söfö. Iei usun ai pwapwa a unusöchüla. ³⁰ I epwe fokun tekiatä, nge ngang üpwe fefeitiu.”

Ätewe mi feito seni Läng

3.31-36

³¹ Iwe, ätewe mi feito seni läng, i a lap seni meinisin. Ätewe mi pop seni fanüfan, i chon fanüfan, a pwal kapas usun mettochun fanüfan. Nge ätewe mi feito seni läng a tekia seni meinisin. ³² Iwe, a pwärätä usun mine a fen küna o rongorong, nge esap wor eman a etiwa an kapas. ³³ Nge are eman epwe etiwa an kapas, a aletätä pwe Kot a let. ³⁴ Iwe, ewe eman Kot a tinato a apasatä än Kot kewe kapas, pun Kot a aunusa ngeni Ngünün. ³⁵ Ewe Sam a echeni Nöün o atolonga mettoch meinisin fän nemeneman. ✧ ³⁶ Iö a lükü ewe Nau a eäni manau esemüch. Iö a lükümach ngeni ewe Nau esap eäni ewe manau, pwe än Kot song a nonom won.

4

Jesus me ewe Fin Samaria

4.1-42

¹ Iwe, ekewe Farisi ra rongorong pwe Jesus a asoulängala o papataisi chomong aramas lap seni Johannes. ² (Jesus ese püsin papataisi aramas, nge nöün kewe chök chon kaiö.) ³ Iei mine lupwen a rongorong met ra apasa, a feila seni Jutea o liwinsefäliiti Kalilea. ⁴ Lon an we sai a fetalelong lon Samaria. ⁵ Iei usun a tori eu telinimw lon Samaria itan Sikar, a arap ngeni ewe fanü Jakop a ngeni nöün we mwän itan Josef. ✧ ⁶ Ikenan a wor eu chönüttu än Jakop, nge Jesus a mottiu ünükün ei chönüttu, pun a pekus ren an fetal. Ei otun ina epwe leoloas.

⁷ Iwe, eman fin Samaria a feito pwe epwe üfuf koluk. Nge Jesus a tüngor ngeni, “Kose kan mochen üpwe ünümi ekis koluk reöm.” ⁸ (Nöün kewe chon kaiö ra feila lon ewe telinimw pwe repwe kamö aner mongö.) ⁹ Ewe fefin a üreni, “En eman re Juta, nge ngang eman fin Samaria, ifa

✧ 3:24: Mat 14.3; Mark 6.17; Luk 3.19-20 ✧ 3:28: Joh 1.20 ✧ 3:35: Mat 11.27; Luk 10.22

✧ 4:5: Ken 33.19; Jos 24.32

usun om kopwe tongeni tūngor seniei ünūmom koluk?” (Ekewe chon Juta resap aeafengen kap me sepi me ekewe chon Samaria.) ✧¹⁰ Iwe, Jesus a pölüeni, “Are kopwe chök silei än Kot lifang, pwal ätewe mi tūngor ngonuk ünūman koluk, kopwe fen tūngor ngeni, nge i epwe ngonuk ewe kolukun manau.”¹¹ Ewe fefin a pölüeni, “Ai samol, esap wor om pokit pwe kopwe aea le üfuf, nge ei chönüttu a alolol. Ia kopwe angei me ie ewe kolukun manau?”¹² Äm we lewo Jakob a ngenikem ei chönüttu. I me nöün kewe me nöün kewe mwichen man meinisin ra ün seni. Ifa usun, en ka lap seni Jakob?”¹³ Jesus a pölüeni, “Iö a ün seni ei koluk epwe kakasefäl,¹⁴ nge iö a ün seni ewe koluk ngang üpwe ngeni, esap chüen kakasefäl. Ewe koluk üpwe ngeni epwe wiliti eu lenien puächen kolukun manau leutun mi atoto manau esemüch.”

¹⁵ Ewe fefin a üreni, “Ai samol, kose mochen kopwe ngeniei ei koluk! Mürin üsap chüen liwinto ikei pwe üpwe üfuf koluk.”¹⁶ Jesus a üreni ewe fefin, “Kopwe feila o köri pwülüom, iwe, epwe etuk lupwen kopwe liwinto.”¹⁷ Ewe fefin a pölüeni, “Esap wor pwülüei.” Nge Jesus a üreni, “Mi pwüing om apasa pwe esap wor pwülüom.”¹⁸ Ka fen pwülüeni limman mwän, nge ewe eman ka pwülüeni iei esap wesewesen pwülüom. Ka kapas wenechar ngeniei.”

¹⁹ Mürin ewe fefin a üreni, “Ai samol, iei üa silei pwe en eman soufos.²⁰ Äm kewe lewo ra fel ngeni Kot won ei chuk, nge ämi chon Juta oua apasa pwe Jerusalem ina chök ewe leni ia aramas repwe fel ngeni Kot ie.”²¹ Jesus a üreni, “Nemin, kopwe lüküei, epwe war ewe fansoun lupwen aramas resap chüen fel ngeni ewe Sam won ei chuk ika lon Jerusalem.²² Ämi chon Samaria oua fel ngeni iö ousap silei, nge äm chon Juta aia fel ngeni iö aia silei, pun manau a pop seni chon Juta.²³ Nge epwe war eu fansoun, nge iei a fen nom, lupwen aramas repwe fel ngeni ewe Sam lon manamanen ewe Ngünün Kot me ewe let, pun ewe Sam a kütta chokewe mi fel ngeni lon let.²⁴ Kot Ngün, nge ren manamanen Ngünün we aramas ra chök tongeni fel ngeni lon let.”

²⁵ Iwe, ewe fefin a üreni Jesus, “Üa silei pwe ewe Messaia epwe wareto, ewe mi iteni Kraist. Lupwen epwe war, epwe asile ngenikich mettoch meinisin.”²⁶ Jesus a pölüeni, “Ngang ätewe mi kapas ngonuk.”

²⁷ Lon ewe chök otun nöün Jesus kewe chon kaiö ra liwinto. Ra weitifengeni pwe Jesus a kapas ngeni eman fefin, nge esap wor eman leir a aisini ewe fefin, “Met ka mochen?” are aisini Jesus, “Pwota ka kapas ngeni ei fefin?”²⁸ Mürin ewe fefin a likitala an we lenien koluk, a liwiniti ewe telinimw o üreni ekewe aramas mi nom ikenan,²⁹ “Oupwe feito o nengeni ewe mwän mi pwäri ngeniei mettoch meinisin üa fen föri. Ifa usun, esap fen iei i ewe Kraist?”³⁰ Iei mine ra towu seni ewe telinimw o feito ren Jesus.

³¹ Lon chök ei fansoun ekewe chon kaiö ra tütūngor ngeni Jesus, “Sense, kopwele mongö.”³² Nge Jesus a pölüeniir, “Mi wor anei mongö ämi ousap silei usun.”³³ Iei mine ekewe chon kaiö ra popuetä le kapasfengen lefiler, “Ifa usun, mi wor eman a uwato ren anan mongö?”³⁴ Jesus a üreniir, “Anei mongö ai üpwe aleasochisi letipen ewe mi tiniei o awesala ewe angang a awisa ngeniei pwe üpwe föri.³⁵ Ämi oua apasa, ‘Mi chüen wor rüanü maram, mürin epwe tori fansoun kinikin.’ Nge üpwe ürenikemi,

‘Oupwe nenengeniöchü ekewe tanipi, pun üän irän lon ra nupula, pwe ra öchün ar repwe kinikin.’³⁶ Ewe aramas mi kini ewe räs epwe angei liwinin, epwe ionifengeni ekewe ua fän iten manau esemüch. Iei usun ewe aramas mi fofot pwal ewe mi kinikin repwe pwawafengen.³⁷ Pun a let ewe kapas, ‘Eman aramas a fofot, nge pwal ewe eman a kinikin.’³⁸ Ngang üa tinikemiila pwe oupwe kini üän eu tanipi ämi ousap angang ngeni. Pwal ekoch ra angang ikenan, nge ämi oua angei feiöchün ar angang.”

³⁹ Iwe, chomong me lein ekewe chon Samaria lon ewe telinimw ra lükü Jesus, pun ewe fefin a üra, “A pwäri ngeniei mettoch meinisin üa fen föri.”⁴⁰ Iei mine lupwen ekewe chon Samaria ra feito ren Jesus, ra fokun tüngor ngeni, pwe epwe nonom rer. Iwe, Jesus a nonom ikenan lon ükükün ruu rän.⁴¹ Pwal chomong chon Samaria ra lükü Jesus pokiten ar rongorong an afalafal.⁴² Iwe, ra üreni ewe fefin, “Iei aia lükülük, sap pokiten chök mine ka apasa, nge pokiten äm aia püsin rongorong an kapas. Iwe, äm aia silei pwe i wesewesen ewe Chon Amanauen chon fanüfan.”

Jesus a apöchöküla eman ät nöün eman nöüwis

4.43-54

⁴³ Mürin än Jesus nonom ikenan lon ükükün ruu rän, a towu seniir o feila Kalilea.⁴⁴ Pun püsin Jesus a apasa, “Eman soufos esap wor meninin me lon püsin fanüan.” ✧⁴⁵ Iwe, lupwen a tori Kalilea, ekewe aramas mi nom ikenan ra etiwa, pun ra fen feila ngeni ewe chulapen Pasofer lon Jerusalem o küna meinisin mine a föri lon ewe chulap. ✧

⁴⁶ Mürin Jesus a liwinsefäliiti Kana lon Kalilea, ia a awili ewe koluk ngeni wain me ie. Iwe, a wor eman nöüwisen mwü lon Kapernaum, nöün ät a samau. ✧⁴⁷ Lupwen a rong pwe Jesus a feito seni Jutea tori Kalilea, a feila ren o tüngormau ngeni pwe epwe feila Kapernaum o apöchöküla nöün we ät mi arap ngeni mäla.⁴⁸ Iwe, Jesus a üra, “Esap wor eman me leimi epwe lükü are esap küna asisil me manaman.”⁴⁹ Ewe nöüwis a pölüeni, “Ai samol, kose mochen etiei me mwen än nei we epwe mäla.”⁵⁰ Jesus a üreni, “Kopwe feila, noumw we ät epwe manau!” Iwe, ewe mwän a lükü mine Jesus a üreni o feila.⁵¹ Nge lupwen a chüen fetal ngeni lenian we, nöün kewe chon angang ra churi o apworaus a ngeni pwe nöün we ät a manau.⁵² Iwe, a aisiniir inet fansoun a pöchökületä. Ra pölüeni, “Kulok eu leoloasen nänew ewe pwichikar a towu seni.”⁵³ Mürin ewe sam a chechemeni pwe ina chök ewe otun Jesus a kapas ngeni lon, “Noumw we ät epwe manau.” Iei mine i me chon an famili meinisin ra lükü Jesus.⁵⁴ Iei ewe aruuen manaman Jesus a föri mürin an feito seni Jutea o tori Kalilea.

5

Jesus a apöchöküla eman mwän arun eu koluk

5.1-18

¹ Mürin ei pworaus, Jesus a feila Jerusalem pwe epwe fiti eu chulapen chon Juta.² Ünükün ewe Asamalapen Sip lon Jerusalem a wor eu koluk, a iteni Petesta lon kapasen Ipru. Ikenan a wor eu ut mi wor limu refirefin lon.³ A wor eu mwichen aramas mi chomong, ra samau o kon lon

✧ 4:44: Mat 13.57; Mark 6.4; Luk 4.24

✧ 4:45: Joh 2.23

✧ 4:46: Joh 2.1-11

ekewe ruum mi refiref: chon mesechun, chon pechemä me ekewe mi mwök. [Ra witiwiti ewe koluk an epwe nono. ⁴Pun fän ekoch eman chon läng nöün ewe Samol a feitiu o anonoi ewe koluk. Iwe, ewe aramas mi akomwolong lon ewe koluk mürin chök an nono a tongeni pöchökületä seni met sokun samau a eäni.] ⁵Eman mwän a nom ikenan, a sasamau lon ükükün ilik me walu ier. ⁶Lupwen Jesus a küna ätewe lon an kokon o a rong pwe a sasamau lon fansoun langatam, a aisini, “Ka mochen küna pöchökül?” ⁷Ewe chon samau a pölüeni, “Ai samol, esap wor rei eman aramas epwe uweieila lon ewe koluk lupwen a nono. Nge lupwen üa sotuni ai üpwe tolong lon, eman a fen akom mwei.” ⁸Iwe, Jesus a üreni ewe mwän, “Kopwe ütä, angei kiom o fetal.” ⁹Lon ewe chök otun ewe mwän a pöchökületä, a angei kian o a popuetä le fetal.

Ei a fis lon eu ränin sapat. ¹⁰Iei mine ekewe nöüwisen chon Juta ra üreni ewe mwän mi pöchökületä, “Ikenai ewe ränin sapat, esap pwüing ngeni allükün ach lamalam pwe kopwe uwei kiom.” ✧ ¹¹Iwe, a pölüeni, “Ewe mwän mi apöchöküleitä a üreniei pwe üpwe angei kiei o fetal.” ¹²Iwe, ra aisini, “Iö we a ürenuk pwe kopwe angei kiom o fetal?” ¹³Nge ewe mwän mi pöchökületä esap silei Jesus, pun a wor chomong aramas lon ewe leni o Jesus a chök anifila seniir.

¹⁴Mürin chök ekis fansoun Jesus a küna ewe mwän lon imwenfel o a üreni, “Kopwe rongorong, iei ka pöchökületä, kosap chüen föri tipis, pwe esap fis ngonuk och mi ngau seni ei.” ¹⁵Mürin ewe mwän a feila o üreni ekewe nöüwisen chon Juta pwe Jesus ewe a apöchökülätä. ¹⁶Iwe, pokiten Jesus a apöchöküla ewe mwän lon ewe ränin sapat, ekewe nöüwisen chon Juta ra popuetä le ariaföüü Jesus. ¹⁷Nge Jesus a pölüeniir, “Semei a chök akangang tori ikenai, pwal ina usun ngang üpwe chök akangang.” ¹⁸Ren ekei kapas ekewe nöüwisen chon Juta ra fokun alapala ar ekiekin mochen niela Jesus, pun esap chök atai allükün ewe ränin sapat, nge a pwal apasa pwe Kot Saman. Ren ei a püsin anönnöi ngeni Kot.

Än ewe Nau nemenem
5.19-29

¹⁹Iwe, Jesus a pölüeniir, “Enlet, üpwe wesewesen ürenikemi: Ewe Nau esap tongeni föri och ren püsin i, a chök föri met a küna pwe Saman a föri. Pun mine ewe Sam a föri, pwal ina chök mine ewe Nau a föri. ²⁰Pun ewe Sam a echeni ewe Nau o pwäri ngeni meinisin mine i a föri. Ewer, epwe fen mwo nge pwäri ngeni mettoch mi lap seni ekei, pwe oupwe mairü ren. ²¹Usun ewe Sam a amanaua ekewe mi mäla o ngeniir manau, ina usun ewe Nau a fang manau ngeni chokewe i a filiiretä. ²²Ewe Sam esap pwal apwüingü eman, nge a ngeni ewe Nau ewe wisen souapwüing, ²³pwe aramas meinisin repwe asamolu ewe Nau usun chök ar asamolu ewe Sam. Iö esap asamolu ewe Nau, esap pwal asamolu ewe Sam a tinato i. ²⁴Enlet, üpwe wesewesen ürenikemi: Iö a rongorong ai kewe kapas o lükü ewe mi tinieito a eäni manau esemüch. Esap tolong lon kapwüing, pwe a towu seni mäla o tolong lon manau. ²⁵Enlet üpwe wesewesen ürenikemi: Epwe war ewe fansoun, nge a fen war, lupwen ekewe mi mäla repwe rongorong mwelien Nöün Kot, nge chokewe mi rongorong repwe küna manau. ²⁶Usun chök ewe Sam i popun manau, iei usun a föri pwe Nöün we pwal i popun manau. ²⁷Iwe, a ngeni ewe Nau ewe wis pwe epwe souapwüing, pun i ewe Nöün Aramas. ²⁸Ousap weitifengenikemi ren ekei

✧ 5:10: Ne 13.19; Jer 17.21

kapas. Pun epwe war ewe fansoun lupwen ekewe sotup meinisin repwe rong mwelian²⁹ o towu seni peiaser: Chokewe mi föri föför mürina repwe manusefäl o küna manau, nge chokewe mi föri föför mi ngau repwe manusefäl o küna apwüng. ✧

Kapasen pwärätä usun Jesus

5.30-47

³⁰ “Iwe, üsap tongeni föri och ren püsin inisi. Üa apwüngü aramas won met Kot a üreniei. Iei mine ai apwüng a let, pun üsap föri letipei, pwe letipen ewe mi tiniei. ³¹ Are üpwe pwärätä usun püsin ngang, pwäriei esap let, esap pwal wor aüchean. ³² Nge mi wor pwal eman a pwärätä usi, nge üa silei pwe mine a pwärätä usi a let. ³³ Ämi oua tinala nöümi soukünü ren Johannes, iwe, mine i a pwärätä a let. ✧ ³⁴ Esap ren ai üpwe etiwa pwärien eman, nge üa chök apasa ei pwe oupwe küna manau. ³⁵ Johannes a usun chök eu lamp, a tin o saram, nge ämi oua chök mochen apwapwakemi lon saraman ekis chök fansoun. ³⁶ Nge a wor och ai minen pwärätä a lap seni än Johannes kapasen pwärätä: Ekewe föför ewe Sam a awisa ngeniei pwe üpwe föri ra pwärätä, pwe ewe Sam a tiniei. ³⁷ Iwe, ewe Sam mi tiniei a pwal pwärätä usi. Ämi ousap fokun rongorong mwelian ika küna won mesan, ✧ ³⁸ ousap pwal amwöchü an kewe kapas lon letipemi, pun ämi ousap lükü ätewe i a tinato. ³⁹ Ämi oua achocho le kaiö masouen ekewe Toropwe mi Pin, pun oua ekieki pwe oupwe küna manau esemüch lor. Ekei Toropwe mi Pin ra pwärätä usi. ⁴⁰ Nge ämi ousap mochen feito rei pwe oupwe eäni ewe manau. ⁴¹ Üsap mochen ai üpwe iteföüla me ren aramas. ⁴² Nge ngang üa silei usumi. Üa silei pwe ämi ousap echeni Kot lon lelukemi. ⁴³ Ngang üa feito fän iten Semei, nge ämi ousap etiwaei. Nge are pwal eman epwe feito fän püsin itan, ämi oupwe etiwa i. ⁴⁴ Ämi oua sani ämi oupwe iteföüla me ren eman me eman leimi, nge ousap kütta ämi iteföüla me ren Kot. Epwe ifa usun ämi oupwe tongeni lüküei? ⁴⁵ Ousap ekieki pwe üpwe atipisikemi me mwen Semei. Moses ätewe oua anomu ämi apilükülük won epwe atipisikemi. ⁴⁶ Are ämi oua wesewesen lükü Moses, ämi oupwe pwal lüküei, pun i a makkei usi. ⁴⁷ Nge pokiten ämi ousap lükü mine Moses a makkei, epwe ifa usun ämi oupwe tongeni lükü mine üa apasa?”

6

Jesus a amongöü limungeröü mwän

6.1-15

(Mat 14.13-21; Mark 6.30-44; Luk 9.10-17)

¹ Iwe, mürin ei pworaus Jesus a feila epek ewe nomun Kalilea. (Ei noom a pwal iteni nomun Tiperias.) ² Chomong aramas ra tapwela mürin, pun ra küna ekewe manaman Jesus a föriir lupwen a apöchökülätä ekewe chon samau. ³ Mürin Jesus me nöün kewe chon kaiö ra feitä won eu chuk o mottiu ikenan. ⁴ Ei otun a arap fansoun ewe chulapen Pasofer än chon Juta. ⁵ Iwe, Jesus a nenefetal o a küna pwe chomong aramas ra feito ren, iei mine a aisini Filip, “Ia sipwe tongeni kamö mongö me ie, pwe epwe naf ach sipwe amongöni ekei aramas meinisin?” ⁶ Jesus a eäni ei kapas ais an epwe sotuni Filip, pun i a fen silei met epwe föri. ⁷ Filip

a pölüeni, “Ruopükü föün moni silifer esap naf ach sipwe kamö pilawa, pwe ina epwe chök ekis met eman me eman ekei aramas epwe angei.”⁸ Pwal eman nöün chon kaiö itan Andru, pwiin Simon Petrus, a üra,⁹ “A wor eman ät ikei mi wor ren limeföü pilawa seni föün parli me ruoman ik. Nge ifa usun, epwe naf ngeni ekei aramas meinisin?”¹⁰ Jesus a üra, “Oupwe üreni ekewe aramas pwe repwe mottiu.” A wor chomong fetil lon ewe leni, iei mine ekewe aramas meinisin ra mottiu. A wor ina epwe ükükün limungeröü mwän.¹¹ Mürin Jesus a angei ekewe pilawa, a iotekin kilisou ngeni Kot wor o a ineti ngeni ekewe aramas mi mot ikenan. Pwal ina chök usun mine a föri ngeni ekewe ik. Ir meinisin ra angei ükükün mine ra mochen.¹² Iwe, lupwen ekewe aramas meinisin ra mötüla, Jesus a üreni nöün kewe chon kaiö, “Oupwe ionifengeni lusun ekewe mongö, pwe esap wor och epwe solapala.”¹³ Iei mine ra ionifengeni meinisin o amasoua engol me ruu chüük ren lusun ewe mongö seni ekewe limeföü pilawa seni föün parli ekewe aramas ra mongö.¹⁴ Iwe, lupwen ekewe aramas ra küna ewe manaman Jesus a föri, ra apasa, “Enlet, iei i ewe Soufos epwe feito won fanüfan.”¹⁵ Jesus a silei pwe ra ekiekin feito o seikätä fän pöchökül pwe epwe ar king, iei mine a sü seniir o liwinsefälitä won ewe chuk.

Jesus a fetal won matau

6.16-21

(Mat 14.22-33; Mark 6.45-52)

¹⁶ Iwe, lupwen a tori lekuniol, nöün Jesus kewe chon kaiö ra feitiu ren ewe noom,¹⁷ ra tötä won efoch wa o seresila epek ewe noom pwe repwe sai ngeni Kapernaum. Iwe, a pwinila, nge Jesus esanwo feito rer.¹⁸ Nge mürin eu asepwäl mi pöchökül a enito, pwe nonoon ewe noom a wattela.¹⁹ Lupwen ekewe chon kaiö ra fen fötülei waar we ina epwe ükükün ülüngat ika rüanü mail, ra küna Jesus a fetalela won ewe matau o fetaleto arap ngeni waar we. Iwe, ra fokun rükö.²⁰ Nge Jesus a üreniir, “Ousap niuokus! Ngang ei!”²¹ Iwe, ra pwapwa pwe ra uwei Jesus won ewe wa, nge lon ewe chök otun ewe wa a tori ewe leni ia ra mochen sai ngeni ie.

Aramas ra kütta Jesus

6.22-24

²² Sorotän ewe rän ewe mwichen aramas mi nometiu epek ewe noom ra küna pwe a chök wor efoch wa a nom ikenan. Ra silei pwe Jesus esap tötä won ewe wa fiti nöün kewe chon kaiö, pwe ir chök ra sai.²³ Nge mi wor ekoch wa seni Tiperias ra il arap ngeni ewe leni ia ra mongö ewe pilawa ie mürin än ewe Samol iotekin kilisou won.²⁴ Iwe, lupwen ewe mwichen aramas ra küna pwe Jesus me nöün kewe chon kaiö resap nom ikenan, ra tötä won ekewe wa o saila Kapernaum, pwe repwe kütta Jesus.

Jesus i ewe Mongön Manau

6.25-59

²⁵ Iwe, lupwen ekewe aramas ra küna Jesus me epek ewe noom, ra aisini, “Sense, inet ka feito ikei?”²⁶ Jesus a pölüeniir, “Enlet, üpwe wesewesen ürenikemi: Oua küttaei pokiten oua mongö ewe pilawa tori oua mötüla, nge ousap küttaei pokiten oua weweiti ai kewe manaman.²⁷ Ousap angang fän iten mongö mi tongeni ngauala, nge oupwe angang fän iten mongö mi nomomola tori manau esemüch. Iei ewe mongö Nöün Aramas epwe ngenikemi, pun Kot ewe Sam a fen anomu won asisilen an

tipeeu ngeni.”²⁸ Mürin ra aisini Jesus, “Met äm aipwe föri, pwe aipwe tongeni apwönüetä met Kot a mochen aipwe föri?”²⁹ Jesus a pölüeniir, “Kot a mochen pwe oupwe lükü ätewe i a tinato.”³⁰ Iei mine ra aisini, “Met sokun manaman kopwe föri pwe äm aipwe küna o lükük? Met sokun föföör kopwe föri?”³¹ Äm kewe lewo ra mongö ewe mana lon ewe fanüapö, usun a mak lon ekewe Toropwe mi Pin, ‘A ngeniir ewe mongö seni läng pwe repwe mongö.’” *³² Mürin Jesus a üreniir, “Enlet, üpwe wesewesen ürenikemi: Esap Moses ewe mi ngenikemi ewe mongö seni läng, nge Semei i ewe mi ngenikemi ewe enletin mongö seni läng.”³³ Pun ewe mongö Kot a ngenikemi ina i ätewe a feitiu seni läng o a fang manau ngeni chon fanüfan.”³⁴ Iwe, ra üreni, “Äm samol, kopwe ngenikem ei mongö fansoun meinisin.”³⁵ Mürin Jesus a üreniir, “Ngang ewe mongön manau. Iö a feito rei esap fokun chüen echik, nge iö a lüküei esap fokun chüen kaka.”³⁶ Nge ngang üa ürenikemi pwe oua fen künaei, nge ousap mochen lüküei.”³⁷ Chokewe meinisin Semei a ngeniei, repwe feito rei. Nge iö a feito rei, üsap fokun asüela.”³⁸ Pun üa feitiu seni läng pwe üpwe föri letipen ewe mi tiniei, nge sap püsin letipei.”³⁹ Iwe, iei letipen ewe mi tiniei, pwe esap pöüt seniei eman lein chokewe i a ngeniei, nge üpwe amanau eer lon ewe ränin sopolan.”⁴⁰ Pun iei letipen Semei, pwe meinisin mi nenengeni ewe Nau o lükü i repwe eäni manau esemüch. Ngang üpwe amanau eer lon ewe ränin sopolan.”

⁴¹ Pokiten ekei kapas ekewe chon Juta ra popuetä le ngününgünü Jesus, pun a apasa, “Ngang ewe mongön manau mi feitiu seni läng.”⁴² Iwe, ra apasa, “Ifa usun, sap ätei Jesus nöün Josef we mwän? Sia silei saman me inan. Pwota a tongeni apasa pwe i a feitiu seni läng?”⁴³ Jesus a pölüeni, “Oupwe ükütü le ngününgün lefilemi!”⁴⁴ Esap wor eman a tongeni feito rei are ewe Sam mi tinieito esap panato rei. Iwe, üpwe amanau lon ewe ränin sopolan.”⁴⁵ A fen mak lon puken ekewe soufos, ‘Aramas meinisin repwe kaiö me ren Kot.’ Chokewe meinisin mi aüseling ngeni alon ewe Sam o kaiö seni repwe feito rei. *⁴⁶ Üsap apasa pwe a wor eman a fen küna ewe Sam. Ätewe mi feito seni Kot, i chök ewe eman a küna ewe Sam.”⁴⁷ Enlet, üpwe wesewesen ürenikemi: Iö a lüküei a eäni manau esemüch.”⁴⁸ Ngang ewe mongön manau.”⁴⁹ Ämi kewe lewo ra mongö ewe mana lon ewe fanüapö, nge ra mäla.”⁵⁰ Nge iei ewe mongö mi feitiu seni läng, are eman a mongö seni esap mäla.”⁵¹ Ngang ewe mongön manau mi feitiu seni läng. Are eman a mongö ei mongö epwe manau tori feilfeilachök. Iwe, ei mongö iei fitukei ngang üpwe fangala, pwe chon fanüfan repwe manau ren.”

⁵² Mürin ekewe chon Juta ra popuetä le aninifengen lefiler. Ra ais, “Epwe ifa usun än ei mwän epwe amongöü ngenikich fitukan?”⁵³ Iei mine Jesus a üreniir, “Enlet, üpwe wesewesen ürenikemi: Are ousap mongö fituken Nöün Aramas o ünümi chaan, esap wor manau lomi.”⁵⁴ Iö a mongö fitukei o ünümi chai a eäni manau esemüch, nge ngang üpwe amanau asefäli lon ewe ränin sopolan.”⁵⁵ Pun fitukei iei wesewesen ewe mongö, nge chai iei wesewesen ewe minen ün.”⁵⁶ Iö a mongö fitukei o ünümi chai a nonom loi, nge ngang üa nonom lon.”⁵⁷ Ewe Sam mi manau a tinieito, o pokiten ewe Sam ngang üa pwal manau. Iei usun iö mi mongö fitukei epwe manau pokiten ngang.”⁵⁸ Iei ewe mongö mi feitiu

seni läng. Esap wewe ngeni ewe mongö ämi kewe lewo ra mongö, nge mürin ra mäla. Ätewe mi mongö ei mongö epwe manau tori feilfeilachök.”⁵⁹ Jesus a apasa ekei kapas lupwen a afalafal lon ewe imwen felikis lon Kapernaum.

Ekewe Kapasen Manau esemüch

6.60-71

⁶⁰ Iwe, chomong lein nöün kewe chon kaiö ra rongorong ekei kapas o ra üra, “Ei afalafal a kon pöchökül. Iö a tongeni aüselinga?” ⁶¹ Jesus esap rong seni eman mine ra kakapas won, nge a püsin silei pwe ra ngününgün usun an kewe kapas. Iei mine a üreniir, “Ifa usun, oua mochen likitala ämi lükülük ren ekei kapas? ⁶² Epwe ifa usun are oupwe küna Nöün Aramas lon an liwinsefälitä ngeni ewe leni ia a nom ie me mwan? ⁶³ Ngünün Kot a afisätä manau, nge pöchökülen aramas esap fokun wor aüchean. Ekewe kapas üa fen ürenikemi ra eäni Ngün me manau. ⁶⁴ Nge ekoch leimi resap lükü.” Pun Jesus a fen silei chök seni lepoputän iö kana resap lükü i, pwal ätewe epwe afangamä i. ⁶⁵ Iwe, Jesus a sopwela le apasa, “Iei mine üpwe ürenikemi, pwe esap wor eman a tongeni feito rei, are ewe Sam esap atufichi.”

⁶⁶ Iwe, seni ei fansoun chomong me lein nöün Jesus kewe chon kaiö ra kul seni o resap chüen mochen tapwela mürin. ⁶⁷ Iei mine Jesus a aisini ekewe engol me ruoman chon kaiö, “Ifa usun, ämi ousap pwal mochen feila?” ⁶⁸ Simon Petrus a üreni, “Äm Samol, iö aipwe feila ren? En ka eäni kapasen manau esemüch. ⁶⁹ Äm aia lükü o silei pwe en Ewe mi Pin ka feito seni Kot.” ☆ ⁷⁰ Iwe, Jesus a pölüeni, “Ifa usun, üsap filikemiitä engol me ruoman, nge fen eman leimi eman Tefil?” ⁷¹ Jesus a kapas usun Jutas nöün Simon Iskariot, pun i eman seni ekewe engol me ruoman epwe afangamä i.

7

Jesus me pwiin kewe

7.1-9

¹ Mürin ei pworaus, Jesus a chök saifetal lon Kalilea, pun esap mochen saifetal lon Jutea, pokiten ekewe nöüwisen chon Juta ra mochen niela i. ² Nge a arap fansoun ewe chulapen likachoch än ekewe chon Juta. ☆ ³ Iei mine pwiin Jesus kewe ra üreni, “Kopwe feila seni ikei o feila Jutea, pwe noumw kewe chon kaiö repwe küna ekewe mettoch ka föri. ⁴ Esap wor eman mi mochen epwe sil me lein aramas a föri an kewe föföör le monomon. Iwe, pokiten ka föri ekei föföör, kopwe pwärükela ngeni chon fanüfan meinisin, pwe repwe silei usumw.” ⁵ Pun püsin pwiin kewe mwo nge resap lükü i. ⁶ Jesus a pölüeniir, “Esamwo tori ewe fansoun mi fich ngeniei, nge ämi fansoun esap liflifil. ⁷ Chon fanüfan resap tongeni oputakemi, nge ra oputaei, pun üa pwäri ngeniir pwe ar föföör a ngau. ⁸ Ämi oupwe feila ngeni ewe chulap. Ngang üsap mwo feila, pun esamwo tori ewe fansoun mi fich fän itei.” ⁹ Jesus a apasatä ekei kapas o nomola lon Kalilea.

Jesus a nom lon ewe Chulapen Likachoch

7.10-24

¹⁰ Mürin än pwiin kewe feila ren ewe chulap, Jesus a pwal feila. Nge esap feila le pwäpwäla, pwe le monomon chök. ¹¹ Iwe, ekewe nöüwisen chon Juta ra kütta Jesus lon ewe chulap. Ra ais, “Ifa i ätewe?” ¹² Ekewe aramas lon ewe chulap ra möngününgünfengen usun i. Ekoch ra apasa, “I eman aramasöch,” nge pwal ekoch ra apasa, “Apw, a chök atupu ekewe aramas.” ¹³ Nge esap wor eman a kapas usun Jesus le pwäpwäla, pun ra niuokusiti ekewe nöüwisen chon Juta.

¹⁴ Lupwen a tori esopun ekewe ränin chulapen likachoch, Jesus a feitä lon ewe imwenfel o popuetä le afalafal. ¹⁵ Iwe, ekewe nöüwisen chon Juta ra mairü ren an kapas o ra apasa, “Pwota iei me silelapen ei mwän, nge esap fiti sukul?” ¹⁶ Mürin Jesus a pölüeniir, “Mine üa eäni afalafal esap püsin ai, nge a pop seni Kot ewe mi tinieito. ¹⁷ Iö a mochen föri letipen Kot epwe silei ika mine üa eäni afalafal a feito seni Kot, are üa chök kapas fän püsin itei. ¹⁸ Eman mi kapas fän püsin itan, a chök püsin kütta iteüöchün. Nge eman mi kütta iteüöchün ewe eman a tinato, i eman aramas mi let, nge esap wor och mine a mwäl won. ¹⁹ Ifa usun, Moses esap ngenikemi ekewe Allük? Nge esap wor eman leimi a aleasochisi ekewe Allük. Pwota oua ekiekin nieila?” ²⁰ Ekewe aramas ra pölüeni, “Eman anün rochopwak a wänuk. Iö a ekiekin niikela?” ²¹ Jesus a pölüeniir, “Üa föri eu chök manaman, nge ämi meinisin oua mairü ren. ²² Iwe, Moses a allük pwe oupwe sirkomsaisi nöümi ät. (Nge ei esap pop seni Moses, nge ämi kewe lewo ra popuetä.) Iei usun oua sirkomsaisi eman ät lon ewe ränin sapat. ✧ ²³ Are än Moses kewe Allük resap ta ren ämi sirkomsaisi eman ät lon ewe ränin sapat, pwota oua song ngeniei pokiten üa apöchökülätä unusen inisin eman mwän lon ewe ränin sapat? ✧ ²⁴ Ousap apwüngü eman ren mine oua küna me lükün, nge oupwe eäni apwüng fän pwüng.”

Ifa usun, epwe Jesus ewe Kraist?

7.25-31

²⁵ Iwe, lon ewe chök otun ekoch aramasen Jerusalem ra popuetä le ais, “Ifa usun, sap iei i ewe mwän ekewe nöüwis ra ekiekin ar repwe niela? ²⁶ Ngeneni, a kapas le pwäpwäla, nge esap wor eman a pölüeni! Ifa usun, ir mi silei pwe i Kraist? ²⁷ Nge lupwen Kraist epwe war, esap wor eman epwe silei ia a feito seni ie.” ²⁸ Iwe, lupwen Jesus a afalafal lon ewe imwenfel, a leüömong le apasa, “Ifa usun, oua wesewesen sileei? Oua silei ia üa feito me ie? Ngang üsap feito fän püsin itei, nge ewe mi tinieito a let. Ämi ousap silei i. ²⁹ Nge ngang üa silei i, pun ngang üa feito seni, i a tinieito.” ³⁰ Mürin ra sotuni ar repwe turufi, nge esap wor eman a atapa, pun esamwo tori an fansoun. ³¹ Nge chomong aramas lon ewe mwich ra lükü i o ra apasa, “Lupwen Kraist epwe war, ifa usun, epwe föri chomong manaman lap seni ekewe manaman ei mwän a föri?”

Ra tinala chon künö pwe repwe turufi Jesus

7.32-36

³² Iwe, ekewe Farisi ra rongorong än ekewe aramas möngününgün won ekei mettoch usun Jesus, iei mine ir me ekewe souasor mi lap ra tinala ekoch chon tümwünü imwenfel pwe repwe turufi Jesus. ³³ Mürin Jesus a apasa, “Ekis chök fansoun üpwe chüen nom remi, mürin üpwe feila ren ewe mi tinieito. ³⁴ Ämi oupwe küttaei, nge ousap künaei, pun ousap

tongeni feila ewe ia üpwe nom ie.” ³⁵ Iwe, ekewe nöüwisen chon Juta ra kapasfengen lefler, “Ia i epwe feila ie, pwe äm aisap tongeni küna? Ifa usun, epwe feila lon ekewe telinimwen chon Krik, ia nöüch aramas ra toropasfeil ie o afalafala ekewe chon Krik? ³⁶ Met wewen an apasa, ‘Oupwe küttaei, nge ousap künaei, ousap pwal tongeni feila ia üpwe nom ie?’”

Ewe chanpupun Kolukun Manau

7.37-39

³⁷ Lesopolan ränin ewe chulap, iei ewe rän mi fokun aüchea, Jesus a ütä o apasa fän leüömong, “Iö a kaka epwe feito rei o ün! ³⁸ Iö a lüküei usun ekewe Toropwe mi Pin ra apasa, chanpupun kolukun manau repwe puwu seni lelukan.” ³⁹ Jesus a kapas won ei usun ewe Ngünmifel, chokewe mi lükü i repwe angei. Lon ena fansoun Kot esamwo tinato Ngünmifel, pun Jesus esamwo tolong lon lingan.

Ekewe aramas ra tipefesen

7.40-44

⁴⁰ Iwe, ekoch ekewe aramas me lon ewe mwich ra rongorong än Jesus kapas o ra apasa, “Ei mwän i wesewesen ewe Soufos.” ⁴¹ Nge ekoch ra apasa, “I ewe Kraist.” Nge pwal ekoch ra apasa, “Kraist esap feito seni Kalilea. ⁴² Ekewe Toropwe mi Pin ra apasa, pwe Kraist epwe eman mwirimwirin Tafit, epwe uputiu lon Petleem ewe telinimwen Tafit.” ⁴³ Iei usun a fis tipefesen lon ewe mwich pokiten Jesus. ⁴⁴ Ekoch ra mochen turufi i, nge esap wor eman a atapa.

Ekewe nöüwisen chon Juta resap lükü

7.45-52

⁴⁵ Iwe, lupwen ekewe chon tümwünü imwenfel ra liwinsefäl, ekewe sousar mi lap me ekewe Farisi ra aisiniir, “Pwota ousap etekinato?” ⁴⁶ Ra pölüeni, “Esap wor eman aramas a afalafal usun än ei mwän afalafal.” ⁴⁷ Ekewe Farisi ra aisiniir, “Ifa usun, ei mwän a pwal atupukemi? ⁴⁸ Ifa usun, a wor eman lein ekewe nöüwis ika ekewe Farisi a lükü i? ⁴⁹ Ei mwichen aramas esap silei än Moses kewe Allük, iei mine ra nom fän än Kot anümamau.” ⁵⁰ Eman me lein ekewe Farisi Nikotemus, ätewe a fen feila churi Jesus me mwan, a üreni chiechian kewe, ⁵¹ “Lon pwüngün ach kewe Allük sisap tongeni apwüngü eman aramas me mwen ach sipwe rongorong ngeni an pworaus o küttaöchü met a föri.” ⁵² Ra pölüeni, “Ifa usun, pwal en eman re Kalilea? Kopwe kütta lon ekewe Toropwe mi Pin o küna, pwe esap wor eman soufos epwe feito seni Kalilea.”

8

Ra sereni eman fefin lupwen a lisowu

8.1-11

¹ [Mürin ekewe aramas ra feila lon en me lenian, nge Jesus a feitä won ewe Chukun Olif. ² Lesosorusichin sorotän ewe rän a liwinsefäli ewe imwenfel. Iwe, ekewe aramas meinisin ra mwicheto ren, nge Jesus a mottiu o popuetä le afalafaleer. ³ Iwe, ekewe Sensen Allük me ekewe Farisi ra etekinato eman fefin ra sereni lon an lisowu. Ra aütai ewe fefin me mwen meser meinisin ⁴ o üreni Jesus, “Äm aia sereni ei fefin lon an lisowu. ⁵ Lon Allükün ach lamalam, Moses a allük pwe ei sokun fefin aramas repwe mone ngeni fau tori an epwe mäla. Nge met en kopwe

apasa usun ei fefin?” ✧ ⁶ Ra apasa ei fän iten ar repwe särei Jesus, pwe epwe wor och mine repwe tongeni aturu won. Nge Jesus a pworotiu o makkei won ewe pwül ren aütün pöün. ⁷ Iwe, lupwen ra ükütä ikenan o kapas ais ngeni, Jesus a wenetä o üreniir, “Tön leimi esap wor an tipis epwe akom le monei ei fefin ngeni aeföün fau.” ⁸ Mürin a pworesefältiu o makkei won ewe pwül. ⁹ Iwe, lupwen ar rong ekei kapas, ra chök feila eman mürin eman, nge ekewe chinlap ra akom. Iwe, Jesus chök a nom ikenan, pwal ewe fefin mi ükütä ren. ¹⁰ Jesus a wenetä o üreni ewe fefin, “Ikafa ir ekewe mwän? Esap chüen wor eman a nom an epwe apwünguk ngeni mäla?” ¹¹ Ewe fefin a pölüeni, “Ai samol, esap chüen wor eman leir a nom.” Mürin Jesus a üra, “Üsap pwal fokun apwünguk. Kopwe feila, nge kosap chüen föri tipis.”]

Jesus ewe saramen fanüfan

8.12-20

¹² Iwe, Jesus a kapasgefäl ngeni ekewe aramas o üreniir, “Ngang ewe saramen fanüfan. Iö a tapweto mürin epwe eäni ewe saramen manau, nge esap fetal lon rochopwak.” ✧ ¹³ Iei mine ekewe Farisi ra üreni, “Ka eäni kapasen pwärätä usun püsin en, nge om pwärätä esap pwüng.” ✧ ¹⁴ Jesus a pölüeniir, “Inamwo are üa pwärätä usun püsin ngang, nge ai pwärätä a pwüng, pun üa silei ia üa feito me ie o ia üpwe feila ie. Nge ämi ousap silei ia üa feito me ie are ia üpwe feila ie. ¹⁵ Ämi oua eäni apwüng lon örünien aramas. Ngang üsap apwüngü eman. ¹⁶ Nge are üpwe apwüngü eman, ai apwüng epwe let, pun ngang üsap aleman chök lon, pwe ewe Sam mi tinieito a etiei. ¹⁷ A fen mak lon ämi kewe Allük, pwe are ruoman aramas a wewefengen pwärrier, mine ra pwärätä a pwüng. ¹⁸ Ngang üa pwärätä usun püsin ngang, nge ewe Sam mi tinieito a pwal pwärätä usi.” ¹⁹ Mürin ra aisini, “Ia semom a nom ie?” Jesus a pölüeniir, “Ämi ousap sileei are silei Semei. Are oupwe sileei, oupwe pwal silei Semei.” ²⁰ Ekei kapas Jesus a aea lupwen a afalafal lon ewe imwenfel, lon ewe leni ia ekewe lenien asor ra nom ie. Iwe, esap wor eman a turufi, pun esap tori mwo an fansoun.

Ousap tongeni feila ia ngang üpwe feila ie

8.21-30

²¹ Iwe, Jesus a kapasgefäl ngeniir, “Ngang üpwe feila. Ämi oupwe küttaei, nge oupwe mäla lon ämi tipis. Ousap tongeni feila ia üpwe feila ie.” ²² Iei mine ekewe nöüwisen chon Juta ra apasa, “A üra pwe sisap tongeni feila ia i epwe feila ie. Ifa usun, wewen ei pwe epwe püsin niela?” ²³ Jesus a pölüeniir, “Ämi oua pop seni ei fanüfan, nge ngang üa feito seni läng. Ämi oua seni ei fanüfan, nge ngang üsap seni ei fanüfan. ²⁴ Iei popun ai ürenikemi pwe oupwe mäla lon ämi tipis. Pun are ousap lüküei pwe ‘Ngang chök ewe Eman’, oupwe fokun mäla lon ämi tipis.” ²⁵ Iwe, ra aisini, “Iö en?” Jesus a pölüeniir, “Üa fen ürenikemi seni lepoputän iö Ngang. ²⁶ Mi wor chomong mettoch üpwe apasa usumi, pwal chomong kapasen atipisi fän itemi. Nge ätewe mi tinieito a wenechar. Iwe, ngang üa chök asile ngeni fanüfan mine üa rong seni i.” ²⁷ Iwe, resap weweiti pwe Jesus a kapas ngeniir usun Saman. ²⁸ Iei mine a üreniir, “Lupwen oupwe atekiatä ewe Nöün Aramas, mürin oupwe silei iö Ngang. Oupwe

pwal silei pwe üsap föri och ren püsin ngang, nge üa chök apasa mine Semei a aiti ngeniei. ²⁹ Iwe, ewe mi tinieito a etiei. Esap likitiei ai üpwe aleman, pun üa föri mine a pwapwa ren fansoun meinisin.” ³⁰ Chomong aramas mi rongorong än Jesus kapas usun ekei mettoch ra lükü i.

Aramas mi ngas me aramas mi fötek

8.31-47

³¹ Mürin Jesus a üreni ekewe chon Juta mi lükü i, “Are oupwe aleasochisi ai kewe kapas, oupwe wesewesen nei chon kaiö. ³² Oupwe silei ewe let, nge ewe let epwe angasakemi.” ³³ Iwe, ra pölüeni, “Äm aia mwirimwirin Apraham, esap fokun wor eman a nöünikem amanau. Met wewen om apasa, ‘Ämi oupwe ngasala?’” * ³⁴ Nge Jesus a üreniir, “Enlet, üpwe wesewesen ürenikemi: Aramas meinisin mi föri tipis ra nonom fän nemenien tipis usun eman amanau. ³⁵ Eman amanau esap chon ewe famili a angang ngeni fansoun meinisin, nge eman nau i chon ewe famili tori feilfeilachök. ³⁶ Iwe, are ewe Nau a angasakemi, oupwe wesewesen ngasala. ³⁷ Ngang mi silei pwe ämi mwirimwirin Apraham. Nge ämi oua sotuni ämi oupwe nieila, pun ousap mochen etywa ai kewe kapas. ³⁸ Üa kapas usun mine Semei a aiti ngeniei, nge ämi oua föri mine sememi a ürenikemi.” ³⁹ Iwe, ra üreni, “Apraham semelapem.” Jesus a pölüeniir, “Are ämi wesewesen nöün Apraham, oupwe pwal föri sokun föföör Apraham a föri. ⁴⁰ Met üa föri, üa chök mochen aiti ngenikemi ewe let üa rong me ren Kot, nge ämi oua sotuni ämi oupwe nieila. Apraham esap föri ei sokun föföör. ⁴¹ Ämi oua föri mine sememi a föri.” Iwe, ra pölüeni, “Äm aisap upun leroch, äm aia semeni eman chök Sam, iei i Kot.” ⁴² Jesus a üreniir, “Are Kot sememi, ämi oupwe echeniei. Pun ngang üa feito seni Kot, nge iei üa nom ikei. Ngang üsap feito fän püsin itei, nge i a tinieito. ⁴³ Pwota ousap weweiti mine üa ürenikemi? Ina popun ämi ousap mochen rongorong ai kewe kapas. ⁴⁴ Ämi nöün sememi, ewe Tefil, ämi oua chök mochen apwönüetä mochenin sememi. I eman chon niela aramas seni lepoputän, esap fokun nom won pekin let, pun esap wor let ren. Lupwen a kapas chofona, a chök fos lon örünian, pun i eman chon chofona me semen chon chofona. ⁴⁵ Nge pokiten üa eäni kapas mi let, iei popun ousap lüküei. ⁴⁶ Iö leimi a tongeni alletätä pwe ngang üa tipis? Are üa apasatä mine a let, pwota ousap lüküei? ⁴⁷ Eman mi feito seni Kot a aüseling ngeni kapasen Kot. Nge ämi ousap feito seni Kot, iei mine ousap mochen aüselingaei.”

Jesus me Apraham

8.48-59

⁴⁸ Iwe, ekewe chon Juta ra üreni Jesus, “Ifa usun, esap pwüing äm apasa pwe en eman re Samaria, nge eman anün rochopwak a wänuk?” ⁴⁹ Jesus a pölüeniir, “Esap wor eman anün rochopwak a wäniei. Ngang üa asamolu Semei, nge ämi ousap asamoluei. ⁵⁰ Ngang üsap püsin kütta ai ling. Nge mi wor eman a kütta ling fän itei, i pwal ewe souapwüing. ⁵¹ Enlet ngang üpwe wesewesen ürenikemi: Iö a aleasochisi ai kewe kapas esap fokun mäla.” ⁵² Iwe, ekewe chon Juta ra üreni, “Tei äm aia silei pwe eman anün rochopwak a wänuk. Apraham a mäla, pwal ekewe soufos ra mäla, nge en ka apasa pwe iö a aleasochisi om kewe kapas esap fokun mäla. ⁵³ Ifa usun, ka ekieki pwe ka lap seni semelapach Apraham? I a mäla, pwal

* 8:33: Mat 3.9; Luk 3.8

ekewe soufos ra mäla. Ka ekieki pwe en iö?” ⁵⁴ Iwe, Jesus a pölüeniir, “Are üa püsin kütta ai ling, ei ling esap wor lomotan. Ewe eman mi alingaei, i Semei, ewe eman oua apasa pwe i ämi we Kot. ⁵⁵ Ämi ousap fokun silei Kot, nge ngang üa silei i. Are üpwe apasa pwe üsap silei i, üpwe eman chon chofona usun chök ämi. Nge ngang üa silei i o aleasochisi an kapas. ⁵⁶ Apraham sememi we a fokun pwapwa pwe epwe le küna fansoun ai feito. A küna ewe fansoun o pwapwaäsini.” ⁵⁷ Ekewe chon Juta ra üreni, “En kosamwo ierini lime, nge ka fen küna Apraham?” ⁵⁸ Jesus a pölüeniir, “Enlet üpwe wesewesen ürenikemi: Me mwen än Apraham esamwo uputiü, ngang üa fen nom.” ⁵⁹ Lupwen ekewe aramas ra rong ekei kapas, ra angei fau pwe repwe mone ngeni. Nge Jesus a opola o towu seni ewe imwenfel.

9

Jesus a aneneloi mesen eman mi upuchun

9.1-12

¹ Iwe, lupwen Jesus a fetalela, a küna eman mwän mi upuchun. ² Nöün kewe chon kaiö ra aisini, “Sense, tipisin iö pwe ei mwän a upuchun? Püsin tipisin ika tipisin saman me inan?” ³ Jesus a pölüeniir, “Esap tipisin ei mwän, esap pwal tipisin saman me inan, nge ei a fis pwe manamanen Kot epwe pwä lon manauan. ⁴ Lupwen a chüen rän, üpwe fokun föri angangen ewe mi tinieito. Pwin epwe war lupwen esap wor eman a tongeni angang lon. ⁵ Lupwen üa nom won fanüfan, ngang saramen fanüfan.” ✧ ⁶ Mürin än Jesus apasa ei, a atufetiü lepwül, a ölölü ewe pwül ren atufan o tofätä ewe pwakak won mesen ewe mwän. ⁷ Iwe, a üreni, “Kopwe feila ores lon ewe koluk Siloam.” (Wewen Siloam ‘tinala’) Iei mine ewe mwän a feila o oresi mesan, iwe, a liwinto o küna mwan. ⁸ Mürin chon arun me chokewe mi küküna ei mwän me mwan lon an tütüngor lifangan, ra ais, “Ifa usun, sap iei i ewe mwän mi momot o tütüngor lifangan?” ⁹ Ekoch ra apasa, “Ewer, iei i,” nge pwal ekoch ra apasa, “Apwi, sap i, a chök wewe ngeni.” Iei mine ewe mwän a püsin üra, “Ngang ätewe.” ¹⁰ Iwe, ra aisini, “Met a fis pwe ka tongeni küna mwomw?” ¹¹ A pölüeniir, “Ewe mwän itan Jesus a ölölü och pwül, iwe, a tofätä ewe pwakak won mesei o üreniei pwe üpwe feila Siloam o oresi mesei ie. Iei mine üa feila, nge lon ewe chök otun üa ores, üa küna mwei.” ¹² Iwe, ra aisini, “Ia a nom ie ätewe?” Ewe mwän a pölüeni, “Üse silei.”

Ekewe Farisi ra chosani usun än Jesus achikaratä ewe mwän

9.13-34

¹³ Mürin ra emwenala ewe mi mesechun me mwan ren ekewe Farisi. ¹⁴ Lon ewe rän Jesus a ölölü och pwül o tofätä ewe pwakak won mesen ewe mwän pwe a nenela, iei eu ränin sapat. ¹⁵ Iwe, ekewe Farisi ra aisinisefäli ewe mwän usun an küna mwan. A üreniir, “A tofätä och pwakak won mesei, iwe, üa oresiei, nge iei üa tongeni küna mwei.” ¹⁶ Ekoch lein ekewe Farisi ra apasa, “Ewe mwän mi föri ei esap tongeni feito seni Kot, pun esap aleasochisi ewe allükün sapat.” Nge pwal ekoch ra apasa, “Epwe ifa usun än eman chon tipis epwe tongeni föri ei sokun manaman?” A wor kinikinfesen lefiler. ¹⁷ Iei mine ekewe Farisi ra aisinisefäli ewe mwän, “Met en ka apasa usun i, pun i a aneneloi mesom?” Iwe, ewe mwän a pölüeni, “I eman soufos.”

¹⁸ Nge ekewe nöüwisen chon Juta resap mochen lükü, pwe ewe mwän a chun me mwan o künasefäli, tori ra titi saman me inan. ¹⁹ Iwe, ra aisiniir, “Nöümi ei mwän oua apasa pwe a upuchun? Ifa usun an fis pwe a tongeni küna mwan iei?” ²⁰ Saman me inan ra pölüeni, “Äm aia silei pwe ätena nöüm, aia pwal silei pwe a upuchun. ²¹ Nge äm aisap silei ifa usun an a tongeni küna mwan, aisap pwal silei ika iö a aneloi mesan. Oupwe püsin aisini, a tongeni püsin pölüeni, pun a watte ierin.” ²² Saman me inan ra apasa ei ititin kapas, pun ra niuokusiti ekewe nöüwisen chon Juta. Pun ekewe nöüwis ra fen tipeefengen, pwe iö mi pwärätä pwe Jesus ewe Kraist epwe katowu seni ar we mwich lon ewe imwen felikis. ²³ Iei popun saman me inan ra apasa, “A watte ierin, oupwe püsin aisini.”

²⁴ Iwe, ra kökkörato ewe mwän mi mesechun me mwan fän aruan o üreni, “Kopwe pwon fän mesen Kot pwe kopwe pwärätä mine a let! Äm aia silei pwe ei mwän mi aneloi i eman chon tipis.” ²⁵ Ewe mwän a pölüeni, “Üsap silei ika i eman chon tipis ika esap. Nge eu chök üa silei, pwe üa mesechun, nge iei üa küna mwei.” ²⁶ Mürin ra aisini, “Met a föri ngonuk? Ifa usun an aneloi mesom?” ²⁷ Iwe, a pölüeniir, “Üa fen ürenikemi, nge ämi ousap aüselinga. Pwota oua mochen rongorongsefäl? Ifa usun, ämi oua pwal mochen nöün chon kaiö?” ²⁸ Iwe, ra eäni kapas turunufas ngeni o üreni, “En nöün enan mwän chon kaiö, nge äm nöün Moses chon kaiö. ²⁹ Äm aia silei pwe Kot a kapas ngeni Moses me lom, nge enan mwän äm aise fen mwo nge silei ia a feito me ie.” ³⁰ Ewe mwän a pölüeniir, “Mwa met me amairün ei mettoch! Ämi ousap silei ia a feito me ie, nge i a aneloi mesei. ³¹ Kich sia silei pwe Kot esap aüseling ngeni än ekewe chon tipis lüngor, nge a aüseling ngeni eman mi meniniti i o föri letipan. ³² Seni lepoputän fanüfan, esap wor eman a aneloi mesen eman aramas mi upuchun. ³³ Ika pwe ei mwän mi aneloi mesei esap feito seni Kot, esap tongeni föri och mettoch.” ³⁴ Iwe, ra üreni, “En ka uputiu lon tipis o märitä lon tipis, pwota ka ekiekin afalafalakem?” Iwe, ra atowu ewe mwän seni ewe imwen felikis.

Mesechun lon pekin Ngün

9.35-41

³⁵ Iwe, Jesus a rong pwe ra atowu ewe mwän seni ar we imwen felikis. Lupwen a küna i, a aisini, “Ifa usun, ka lükü ewe Nöün Kot?” ³⁶ Ewe mwän a pölüeni, “Ai samol, iö ätewe, kopwe aiti ngeniei, pwe ngang üpwe tongeni lükü i.” ³⁷ Jesus a üreni, “Ka fen küna i, ina i ätewe mi kapas ngonuk.” ³⁸ Mürin ewe mwän a apasa, “Ai Samol, üa lükü!” Iwe, a fotopwäsketiu mwan o fel ngeni. ³⁹ Iwe, Jesus a üreni, “Üa feito lon fanüfan pwe üpwe eäni apwüng, pwe chokewe mi chun repwe küna mwer, nge chokewe mi küna mwer repwe chun.” ⁴⁰ Iwe, ekoch Farisi mi nom ren ra rongorong met a apasa o ra aisini, “Met, äm aia pwal chun?” ⁴¹ Jesus a pölüeniir, “Are ämi oupwe chun, esap wor ämi tipis. Nge iei ämi oua apasa pwe oua tongeni küna mwemi, iei popun ämi tipis a chök nonom womi.”

10

Pworausen awewe usun ewe Chon Mas

10.1-6

¹ Iwe, Jesus a üra, “Enlet, üpwe wesewesen ürenikemi: Iö esap tolong lon asamen lenien sip, nge a tötä me ekis o tolong, i eman chon solä me

eman chon achomau. ² Nge iö mi tolong lon ewe asam, ina i ewe chon masen sip. ³ Ewe chon masen ewe asamen lenien sip epwe suki ngeni ewe asam. Ekewe sip repwe rong mwelian lupwen epwe köri iten eman me eman nöün kewe sip, iwe, epwe emweniirewu lükün. ⁴ Lupwen epwe emweniirewu lükün, epwe akom mwer. Iwe, ekewe sip repwe tapwela mürin, pun ra silei mwelian. ⁵ Resap tapwela mürin pwal eman me lükün, nge repwe sü seni, pun resap silleni mwelian.” ⁶ Jesus a apworausau ngeniir ei pworausen awewe, nge ir resap wewe ren.

Jesus ewe Chon Mas mi öch

10.7-21

⁷ Iei mine Jesus a apasasefäli, “Enlet üpwe wesewesen ürenikemi: Ngang ewe asam fän iten ekewe sip. ⁸ Chokewe meinisin ra akomwoto mwei ir chon solä me chon achomau, nge ekewe sip resap aüseling ngeniir. ⁹ Ngang ewe asam. Iö a tolong lon ei asam epwe küna manau. Epwe tolong o towu o küna anan. ¹⁰ Eman chon solä a chök feito pwe epwe sosolä me ninni me akkatai. Ngang üa feito pwe oupwe eäni manau, iei ewe manau mi somwola.

¹¹ “Ngang ewe chon mas mi öch. Ewe chon mas mi öch a fangala manauan fänäsengessin ekewe sip. ¹² Nge ewe aramas mi mö, i esap ewe chon mas mine nöün kewe sip, lupwen a küna pwe eman wolif a feito, a likitala ekewe sip o süla. Mürin ewe wolif a turufi ekewe sip o atoropaseer. ¹³ Ewe aramas a süla, pun i eman mi mö, esap ekieki manauen ekewe sip. ¹⁴ Ngang ewe chon mas mi öch. Ngang üa silei nei sip kana o ir ra sileei, ¹⁵ usun chök Semei a sileei o ngang üa silei Semei. Iwe, ngang üa fangala manau ei fänäsengessin ekewe sip. ✱ ¹⁶ A pwal wor ekoch nei sip resap nonom lon ei lenien sip. Ngang üpwe pwal fokun emweniireto. Repwe aüseling ngeni mweliei. Mürin epwe wor eu chök mwichen sip me eman chon mas.

¹⁷ “Iwe, Semei a echeniei, pun üa fangala manau ei pwe üpwe angeesefäli. ¹⁸ Esap wor eman epwe angei seniei manau ei, nge üa fangala seni püsin letipei. Mi wor ai pwüüng ai üpwe fangala, a pwal wor ai pwüüng ai üpwe angeesefäli. Iei usun mine Semei a allük ngeniei, pwe üpwe föri.”

¹⁹ Iwe, pokiten ekei kapas ekewe chon Juta ra pwal kinikinfesen lefiler. ²⁰ Chomong me leir ra apasa, “Eman anün rochopwak a wäni! A umwesila! Pwota oua aüseling ngeni?” ²¹ Nge pwal ekoch ra apasa, “Ekei kapas esap alon eman aramas eman anün rochopwak a wäni! Ifa usun, eman anün rochopwak epwe tongeni aneloi mesen chon chun?”

Jesus esap tiw me ren ekewe chon Juta

10.22-42

²² Iwe, a fis ewe chulapen Efinunen ewe imwenfel lon Jerusalem. ²³ Lon ena otun a tori fansoun patapat. Lupwen Jesus a fetal lon ewe Pwalangen Salomon me lon ewe lenien imwenfel, ²⁴ ekewe chon Juta ra rongeela o aisini, “Ifa langatamen fansoun om kopwe chök likitikem lon äm tipemwaramwar? Are en Kraist, kopwe afataöchü ngenikem.” ²⁵ Jesus a pölüeniir, “Üa fen ürenikemi, nge ousap lüküei. Ekewe föföer üa föri fän iten Semei ra pwärätä usi. ²⁶ Nge ämi ousap lükü, pun ousap nei kewe sip. ²⁷ Nei kewe sip ra aüselinga mweliei, üa pwal sileer, nge ir ra tapweto

✱ 10:15: Mat 11.27; Luk 10.22

müri. ²⁸ Üa fang ngeniir manau esemüch, nge ir resap fokun pöütmwälila. Esap wor eman a tongeni ettiir me lepei. ²⁹ Semei a ngeniei ekei sip, o i a lap seni meinsin, iwe, esap wor eman a tongeni ettiir seni lepöün Semei. ³⁰ Ngang me Semei eman chök.”

³¹ Mürin ekewe chon Juta ra pwal angei fau pwe repwe mone ngeni. ³² Jesus a üreniir, “Üa föri chomong föföör mi öch mwen mesemi, Semei a ngeniei pwe üpwe föriir. Meni lein ekewe föföör oua mochen mone ngeniei fau ren?” ³³ Iwe, ra pölüeni, “Äm aisap mochen mone ngonuk fau fän iten och föföör mi öch, nge pokiten om kapasen turunufas ka apasa. Pun en eman aramas chök, nge ka püsin ekieki pwe en Kot.” ✧ ³⁴ Jesus a pölüeniir, “A mak lon ämi puken Allük pwe Kot a apasa, ‘Ämi oua kot.’ ✧ ³⁵ Kich sia silei pwe kapasen ekewe Toropwe mi Pin ra let tori feilfeilachök. Iwe, Kot a aita ngeni ekei aramas kot, ir chokewe ra angei an Kot kapas. ³⁶ Nge me rei, Semei a apinie o tinieito won fanüfan. Epwe ifa usun ämi oupwe tongeni apasa pwe üa eäni kapasen turunufas, pokiten üa apasa pwe ngang Nöün Kot? ³⁷ Ousap lüküei are üsap föri ekewe föföör Semei a mochen ai üpwe föriir. ³⁸ Nge are üa fen föri ekewe föföör, inamwo are ousap lüküei, oupwe fokun lükü ai kewe föföör, pwe oupwe silei o weweiti pwe Semei a nom loi, nge ngang üa nom lon Semei.” ³⁹ Iwe, ra sotunisefälil ar repwe turufi Jesus, nge i a müttir sü seniir.

⁴⁰ Mürin Jesus a liwinsefälila pekilan ewe chanpupu Jortan lon ewe leni ia Johannes a fen papataisi aramas ie me mwan. Iwe, a nonom ikenan. ✧ ⁴¹ Chomong aramas ra feito ren. Iwe, ra apasa, “Johannes esap föri och manaman, nge meinsin mine a pwärätä usun ei mwän a let.” ⁴² Iwe, chomong aramas ra lükü Jesus me ikenan.

11

Lasarus a mäla

11.1-16

¹ A wor eman mwän a samau itan Lasarus seni Petania. Petania ewe telinimw ia Maria me pwiin we Marta ra nom ie. ✧ ² Ei fefin Maria fefinen Lasarus, ätewe mi samau. Iei i neminewe a epiti pechen Jesus ren löpwookus o talüpwasei ren meten möküran. ✧ ³ Iwe, ekewe ruoman pwipwi ra tinala pworaus ren Jesus, “Äm Samol, ätewe ka fokun echeni a samau.” ⁴ Lupwen Jesus a rong ei pworaus, a apasa, “Ei samau, esap sopolan mäla. Nge popun an fis ei samau, pwe Kot epwe küna ling ren, pwal Nöün Kot epwe küna ling ren.”

⁵ Iwe, Jesus a echeni Marta me pwiin we me Lasarus. ⁶ Nge lupwen a rongorong pwe Lasarus a samau, a chök nonometiu lon ewe leni ia a nom ie pwal lon ükükün ruu rän. ⁷ Mürin a üreni nöün kewe chon kaiö, “Ousipwe liwinsefäliti Jutea.” ⁸ Nge ekewe chon kaiö ra üreni, “Sense, pollon kewe chök ekewe aramas ikenan ra mochen mone ngonuk fau. Nge iei ka pwal mochen liwinsefäliti ikenan?” ⁹ Jesus a pölüeniir, “Ifa usun, esap wor engol me ruu awa lon eu rän? Eman aramas mi fetal lerän esap chepetek, pun a küna saramen ei fanüfan. ¹⁰ Nge eman mi fetal lepwin a chepetek, pun esap wor saram ren.”

¹¹ Mürin än Jesus apasatä ekei kapas, a pwal üreniir, “Chiechiach we Lasarus a möürüla, nge ngang üpwe feila pwe üpwe föngünätä.” ¹² Ekewe

✧ **10:33:** Lif 24.16 ✧ **10:34:** Kölf 82.6 ✧ **10:40:** Joh 1.28 ✧ **11:1:** Luk 10.38-39 ✧ **11:2:** Joh 12.3

chon kaiö ra pölüeni, “Äm Samol, are a möürüla, iwe, epwe pöchökületä.”¹³ Jesus a fen kapas usun än Lasarus mäla, nge ekewe chon kaiö ra ekieki pwe a chök kapas usun an möür.¹⁴ Iei mine Jesus a afata ngeniir, “Lasarus a mäla,¹⁵ nge fänäsengesimi üa pwapwa pwe üsap nom ren, pwe ämi oupwe kaiö ngeni ämi oupwe lüküei. Ousipwe feila ren.”¹⁶ Tomas, a pwal iteni Lippwe, a üreni chiechian kewe chon kaiö, “Ousipwe feila meinisin fiti ewe Sense, pwe sipwe eti i le mäla!”

Jesus ewe Manusefäl me ewe Manau

11.17-27

¹⁷ Iwe, lupwen Jesus a tori ewe leni, a rongorong pwe Lasarus a fen nom lon peias lon ükükün rüanü rän.¹⁸ Toauen lefilen Petania me Jerusalem ina epwe kis seni ruu mail,¹⁹ nge chomong chon Juta ra feila ren Marta me Maria pwe repwe aururur ren mongeer we a mäla.

²⁰ Lupwen Marta a rong pwe Jesus a feito, a feila lükün ewe sopw pwe epwe souni, nge Maria a chök nom leimw.²¹ Iwe, Marta a üreni Jesus, “Ai Samol, are en kopwe nom ikei, mongeei we esap mäla.²² Nge üa pwal silei pwe iei mwo nge Kot epwe ngonuk meinisin mine ka tüngor.”²³ Jesus a üreni neminewe, “Mongeei we epwe manusefälitä.”²⁴ Marta a pölüeni, “Ngang üa silei pwe epwe manusefälitä lon ewe ränin manusefäl lesopolan fanüfan.”²⁵ Iwe, Jesus a üreni, “Ngang ewe manusefäl me ewe manau. Iö a lüküei epwe manau inamwo are epwe fen mäla.²⁶ Nge iö a manau o lüküei esap fokun mäla feilfeilachök. Ifa usun, ka lükü ei?”²⁷ Marta a pölüeni, “Ewer, ai Samol, üa lükü pwe en ewe Kraist, Nöün Kot, ätewe Kot a pwon pwe epwe feito fanüfan.”

Jesus a kechü

11.28-37

²⁸ Mürin än Marta apasa ekei kapas, a liwinsefälila le imwan o köri Maria pwiin we o möngününgün ngeni, “Ewe Sense a war, nge a mochen churuk.”²⁹ Nge lupwen Maria a rongorong ekei kapas, a müttir ütä o feila ren Jesus.³⁰ Iwe, Jesus esamwo tolong lon ewe sopw, nge a chök nom lon ewe leni ia Marta a churi ie.³¹ Ekewe aramas mi nom lon ewe imw ren Maria ar repwe aururu ra küna, pwe a müttir ütä o towu lükün. Iwe, ra tapwela mürin, pun ra ekieki pwe Maria a feila ren ewe peias pwe epwe kechü ikenan.³² Maria a tori ewe leni ia Jesus a nom ie. Lon ewe chök otun a tori Jesus, a chapetiu arun pechen o üreni, “Ai Samol, are en kopwe nom ikei, mongeei we esap mäla.”³³ Iwe, Jesus a küna Maria pwe a kechü, pwal ekewe aramas mi tapwela mürin, letipan a fokun mwökütüküt o weires.³⁴ Iwe, a aisiniir, “Ia oua peiaseni Lasarus ie?” Ra pölüeni, “Äm Samol, kopwe feito o nenengeni.”³⁵ Iwe, Jesus a kechü.³⁶ Mürin ekewe aramas ra apasa, “Nengeni usun an tongei!”³⁷ Nge pwal ekoch ra apasa, “Esap ätei ätewe mi aneloi mesen ewe mwän mi chun? Pwota esap tongeni amwöchü manauen Lasarus pwe esap mäla?”

Lasarus a manusefälitä ll.

11.38-44

³⁸ Iwe, lupwen Jesus a feiliti ewe peias, a pwal mwökütükütsefäl letipan lon an weires. Ewe peias a nom lon eu achau, nge eföü fau mi watte a öpwönütü me won.³⁹ Jesus a üra, “Oupwe ekiela ewe fau seni won ewe peias!” Nge Marta, fefinen ewe mi mäla a üreni, “Ai Samol, ei otun ewe somä epwe le fen pomach, pun a fen nom lon peias lon ükükün rüanü

rän.” ⁴⁰ Mürin Jesus a pölüeni, “Ifa usun, üsap ürenuk pwe are kopwe lükü kopwe küna lingen Kot?” ⁴¹ Iei mine ra ekiela ewe fau seni won ewe peias. Iwe, Jesus a netä läng o apasa, “Semei, üa kilisou ngonuk pwe ka aüselingaei. ⁴² Ngang üa silei pwe ka aüselingaei fansoun meinisin. Nge iei üa apasa ei fänäsengessin ekewe aramas mi ü ikei, pwe repwe lükü pwe en ka tinieito.” ⁴³ Mürin an apasa ekei kapas, a kökkö fän mwelian mi leüömong, “Lasarus, kopwe towu!” ⁴⁴ Iwe, Lasarus a towu, nge pöün me pechen ra finifin ngeni mangaku, won mesan a pwal finifin ngeni echö mangaku. Iwe, Jesus a üreniir, “Oupwe apichala ekewe finifin pwe epwe tongeni fetal.”

Ra rawangauei Jesus

11.45-57

(Mat 26.1-5; Mark 14.1-2; Luk 22.1-2)

⁴⁵ Iwe, chomong aramas mi feito pwe repwe churi Maria, ra küna mine Jesus a föri, iwe, ra lükü i. ⁴⁶ Nge ekoch me leir ra feila ren ekewe Farisi o üreniir mine Jesus a föri. ⁴⁷ Iei mine ekewe souasor mi lap me ekewe Farisi ra chufengen me ewe mwichen souapwüing o ra üreniir, “Met sipwe föri. Nengeni ekei manaman meinisin ei mwän a föri!” ⁴⁸ Are sipwe mwüt ngeni an epwe sopwela lon ei sokun lapalap, aramas meinisin repwe lükü i. Mürin repwe feito o atai ach imwenfel o angeala aramasach.” ⁴⁹ Iwe, eman me leir itan Kaifas, i ewe Souasor mi Lap lon ena ier, a apasa, “Ämi ousap silei och. ⁵⁰ Ousap mefi pwe a mürina än eman aramas epwe mäla fänäsengessin ekewe aramas meinisin, lap seni unusen aramasen fanüach repwe rosola.” ⁵¹ Nge Kaifas esap apasa ei ititin kapas won püsin mefian, nge pokiten i ewe Souasor mi Lap lon ena ier, a osuni pwe Jesus epwe mäla fän iten chon Juta meinisin. ⁵² Nge sap fän iter chök, pwe pwal fän iten ekewe aramasen Kot mi toropasfeil ar repwe chufengen lon eu chök mwich. ⁵³ Seni ena ränin ekewe nöüwisen chon Juta ra rawei Jesus pwe repwe niela. ⁵⁴ Iei mine Jesus esap chüen saifetal lon Jutea le pwäpwäla lein ekewe chon Juta, nge a feila ngeni eu leni arap ngeni ewe fanüapö lon eu telinimw itan Efraim. A nonom ikenan fiti nöün kewe chon kaiö.

⁵⁵ Iwe, lupwen a arap fansoun än ekewe chon Juta we chulapen Pasofer, chomong aramas ra feitä Jerusalem seni ekewe fanü pwe repwe föri ewe angangen limelim me mwen ewe chulap. ⁵⁶ Iwe, ra küttafetalei Jesus, nge lupwen ar chufengen lon ewe imwenfel ra aisfengen lefiler, “Met oua ekieki? Epwe feito ngeni ach ei chulap, are esap feito?” ⁵⁷ Ekewe souasor mi lap me ekewe Farisi ra atowu eu allük ngeni aramas, pwe are eman epwe silei ia Jesus a nom ie, epwe asile ngeniir, pwe repwe turufi o fötekini.

12

Jesus a kepit me lon Petania

12.1-8

(Mat 26.6-13; Mark 14.3-9)

¹ Iwe, wonu rän me mwen ewe ränin Pasofer Jesus a tori Petania ia Lasarus, a nom ie, ätewe Jesus a amanauasefäli seni mäla. ✧ ² Iwe, ra amolätä eu mongön lekuniol fän itan Jesus ikenan, nge Marta a alilis le amolätä. Lasarus pwal eman me lein ätekewe mi mot ngeni chepel fiti

Jesus. ³ Mürin Maria a angei eu rume mi wor lö lon mi fokun pwokus o mömong mi för seni ewe irä nart, a ninätü won pechen Jesus o talüpwasei ngeni meten möküran. Iwe, pwokusun ewe lö a ponofeil lon unusen ewe imw. ⁴ Nge Jut Iskariot, eman me lein nöün Jesus kewe chon kaiö, ätewe epwe afangamä Jesus, a apasa, ⁵ “Pwota resap amömöla ei lö pwokus won ükükün ülüpükü föün moni silifer o fangala ewe moni ngeni ekewe chon wöüngau?” ⁶ Jut a apasa ei ititin kapas, sap pokiten an ekieki ekewe chon wöüngau, nge pokiten i eman chon solä. I a tümwünü ewe moni, nge fän ekoch a pwal angei och seni fän püsin itan. ⁷ Nge Jesus a apasa, “Ousap osukosuka neminei! Oupwe mwüt ngeni pwe epwe iseis met a wor ren fän iten ewe ränin ai üpwe peias. ⁸ Ekewe chon wöüngau repwe nonom remi fansoun meinisin, nge ngang üsap nonom remi fansoun meinisin.”
 ☆

Ra rawangauei Lasarus

12.9-11

⁹ Iwe, chomong aramas ra rong pwe Jesus a nom lon Petania. Iei mine ra feila ikenan, sap pokiten Jesus chök, nge pwal pokiten ar mochen küna Lasarus, ätewe Jesus a amanauasefäli seni mäla. ¹⁰ Iei mine ekewe souasor mi lap ra pwal ekiekin rawangauei Lasarus, ¹¹ pun i popun pwe chomong chon Juta ra sü seniir o lükü Jesus.

Jesus a tolong lon Jerusalem fän än aramas mweireir

12.12-19

(Mat 21.1-11; Mark 11.1-11; Luk 19.28-40)

¹² Iwe, sorotän ewe rän eu mwichen aramas mi chomong ra feito ngeni ewe chulap o ra rongorong pwe Jesus a nom won an sai ngeni Jerusalem. ¹³ Iei mine ra angei palen ewe irä palm o feila pwe repwe churi. Iwe, ra osomong le kökkö, “Mwareiti Kot! Feiöchün ätewe a feito fän iten ewe Samol! Feiöchün ewe kingen Israel.” ¹⁴ Iwe, Jesus a küna eman nienifön aas o a wawa, usun a fen mak lon ekewe Toropwe mi Pin, ¹⁵ “Ousap niuokus, ämi aramasen Sion.

Nengeni, ämi we king a feito, a wawa eman nienifön aas.” ☆

¹⁶ Lon ena fansoun nöün kewe chon kaiö resap weweiti ekei mettoch. Nge lupwen Jesus a tolong lon lingan, ra chechemeni pwe a fen mak lon ekewe Toropwe mi Pin usun i, pwal usun ar föri ekei mettoch ngeni. ¹⁷ Iwe, ekewe aramas mi nom ren Jesus lupwen a körawu Lasarus seni lon ewe peias o amanauasefäli seni mäla ra apworaus mine a fis. ¹⁸ Ina popun ewe mwichen aramas mi chomong ra churi, pokiten ra rong pwe a föri ei manaman. ¹⁹ Mürin ekewe Farisi ra kapasfengen lefiler, “Oua küna, sisap chüen tongeni föri och! Nengeni, unusen chon fanüfan ra tapwela mürin.” ☆

Ekoch chon Krik ra kütta Jesus

12.20-26

²⁰ Iwe, ekoch chon Krik ra nom lein chokewe mi feitä Jerusalem pwe repwe fel ngeni Kot lupwen ewe chulap. ²¹ Ra feila ren Filip, ätei i seni Petsaita lon Kalilea. Iwe, ra üreni, “Äm samol, äm aia mochen churi Jesus.” ☆ ²² Filip a feila o apworaus ngeni Andru ei pworaus. Mürin ir me ruoman ra feila o asile ngeni Jesus. ²³ Iwe, Jesus a üreniir, “Tei a

war ewe fansoun pwe Nöün Aramas epwe angei lingan. ²⁴ Enlet, üpwe wesewesen ürenikemi: Eföü föün wiich epwe chök nonom lon ususun are esap mworotiu lepwül o mäla. Nge are epwe mäla, mürin epwe awora chomong föün wiich. ✧ ²⁵ Iö a echeni püsin manauan epwe pöüt seni, nge iö a oput püsin manauan lon ei fanüfan, manauan epwe chök nonom ngeni manau esemüch. ✧ ²⁶ Iö a mochen angang ngeniei epwe tapweto müri, pun ia ngang üpwe nom ie, ikenan nei chon angang epwe pwal nom ie. Iwe, Semei epwe asamolu chokewe mi angang ngeniei. ✧

Jesus a kapas usun an mäla

12.27-36

²⁷ “Iei letipei a weires. Met ngang üpwe apasa? Ifa usun, üpwe apasa, ‘Semei, kosap mwüt ngeniei pwe üpwe tolong lon ei fansoun riaföü?’ Nge ina popun üa feito fanüfan, pwe üpwe tolong lon ei fansoun riaföü. ✧ ²⁸ Semei, kopwe alinga itom!” Mürin a wor eu möngüngü seni läng, “Üa fen alinga itei, nge üpwe pwal alingasefäli.” ²⁹ Iwe, ewe mwichen aramas mi ütä ikenan ra rong ewe möngüngü. Ekoch me leir ra apasa pwe och chopulap, nge pwal ekoch ra apasa, “Eman chon läng a kapas ngeni.” ³⁰ Nge Jesus a üreniir, “Ei möngüngü a fis esap fän itei, pwe fän itemi. ✧ ³¹ Iei ewe fansoun pwe fanüfan epwe küna kapwüng, iei ewe fansoun ewe samolun ei fanüfan epwe koturula. ✧ ³² Lupwen ngang üpwe tekiatä seni ei fanüfan, üpwe ofato aramas meinisin rei.” ✧ ³³ Jesus a apasatä ei sokun kapas pwe epwe pwärätä meni sokun mäla epwe mälan. ³⁴ Ewe mwichen aramas ra pölüeni, “Äm aia silei seni ekewe Allükün lamalam pwe ewe Kraist epwe manau tori feilfeilachök. Pwota ka apasa, pwe Nöün Aramas epwe tekiatä? Iön ei, ewe Nöün Aramas?” ✧ ³⁵ Mürin Jesus a pölüeniir, “Ewe saram epwe nonom remi ekis chök fansoun mochomoch. Oupwe fetal lon ewe saram me mwen ewe rochopwak epwe torikemi. Pun eman aramas mi fetal lon rochopwak esap silei ia epwe feila ie. ✧ ³⁶ Oupwe anomu ämi lükülük won ewe saram lupwen a nom remi, pwe oupwe wiliti aramas mi nom lon saram.” Lupwen Jesus a wes me apasa ekei kapas, a feila o op seniir. ✧

Än ekewe aramas lükülükü mang

12.37-43

³⁷ Iei mwo än Jesus föri ekewe manaman meinisin mwen mesen ekewe aramas, nge ir resap lükü i. ³⁸ Iei usun met a pwönüetä lon mine ewe soufos Aisea a kapas usun, “Äm Samol, iö a lükü ewe pworaus aia aronga? Iö ewe Samol a pwäri an manaman ngeni?” ✧ ³⁹ Iei popun pwe resap tongeni lükü, pun Aisea a pwal apasa, ⁴⁰ “Kot a achunala meser o aföüala letiper, pwe resap tongeni künakün ren meser ika wewe ren letiper, ika kul ngeniei, pwe üpwe apöchöküleretä.” ✧ ⁴¹ Aisea a apasa ekei kapas, pun a küna än Jesus ling o kapas usun i. ✧ ⁴² Iei mwo nge chomong ekewe nöüwisen chon Juta ra lükü Jesus. Nge pokiten ekewe Farisi, ir resap pwärätä ar lükülük, pun ra niuokus ar repwe katowu seni

✧ 12:24: Rom 14.9 ✧ 12:25: Mat 10.39; 26.25; Mark 8.35; Luk 9.24; 17.33 ✧ 12:26: Joh 14.3; 17.24 ✧ 12:27: Mat 26.38 ✧ 12:30: Joh 11.42 ✧ 12:31: Joh 14.30; 16.11; Luk 10.18 ✧ 12:32: Joh 8.28 ✧ 12:34: Kölf 110.4; Ais 9.7; Is 37.25; Tan 7.14 ✧ 12:35: Joh 8.12; 11.10 ✧ 12:36: Ef 5.9 ✧ 12:38: Ais 53.1; Rom 10.16 ✧ 12:40: Ais 6.10 ✧ 12:41: Ais 6.1

ar we mwich lon ewe imwen felikis. ✧ ⁴³ Pun ra aücheani än aramas repwe mwareitiir, lap seni än Kot epwe mwareitiir.

Än Jesus kapas repwe apwüngü aramas

12.44-50

⁴⁴ Iwe, Jesus a apasa fän leüömong, “Tö a lüküei, esap chök lüküei, nge a pwal lükü ewe mi tinieito. ⁴⁵ Iö a künaei, a pwal küna ewe mi tinieito. ⁴⁶ Ngang üa feito fanüfan pwe üpwe eu saram, pwe meinisin mi lüküei resap nom lon ro chopwak. ⁴⁷ Are eman a rongorong ai kewe kapas, nge esap aleasochis ngeni, ngang üsap apwüngü. Ngang üsap feito fanüfan pwe üpwe apwüngü chon fanüfan, nge üa feito pwe üpwe amanaueer. ⁴⁸ Iö a aliwiniei o esap etiwa ai kewe kapas, a wor met epwe kapwüng ren. Ewe kapas üa apasatä epwe apwüngü lon ewe sopolan rän. ⁴⁹ Pun ngang üsap kapas fän itei, nge Semei mi tinieito a allük ngeniei met üpwe apasatä, pwal met ititin fos üpwe nöünöü. ⁵⁰ Ngang üa silei pwe an allük a awarato manau esemüch. Iei mine met ngang üa apasa, iei chök met Semei a üreniei pwe üpwe apasatä.”

13

Jesus a talü pechen nöün kewe chon kaiö

13.1-20

¹ Iei ewe rän me mwen ewe chulapen Pasofer. Jesus a silei pwe a tori ewe fansoun an epwe towu seni ei fanüfan o feila ren Saman. A echeni nöün kewe mi nom won fanüfan fansoun meinisin, iwe, a echeniir tori sopolan manauan.

² Iwe, Jesus me nöün kewe chon kaiö ra mongön lekuniol. Ewe Tefil a fen atolonga ewe ekiëkin afangamä Jesus lon letipen Jutas nöün Simon Iskariot. ³ Jesus a silei pwe Saman a fen atolonga mettoch meinisin fän nemenian. A silei pwe a feito seni Kot, nge epwe pwal liwinsefäl ngeni Kot. ⁴ Iei mine a ütä seni ewe chepel, a pwilitawu üfan sekít o ri ngeni lukalapan echö taul. ⁵ Mürin a ninalong och koluk lon eu waspesen o a popuetä le talü pechen nöün kewe chon kaiö, a pwal talüpwasei pecher ngeni ewe taul a ri ngeni lukalapan. ⁶ Lupwen a tori Simon Petrus, Petrus a üreni, “Ai Samol, en kopwe talü pechei?” ⁷ Jesus a pölüeni, “En kosap weweiti mine ngang üa föri iei, nge kopwapw weweiti me mürin.” ⁸ Petrus a üreni, “Kosap fokun talü pechei!” Jesus a pölüeni, “Are üsap talü pecheöm, kosap chüen nei chon kaiö.” ⁹ Simon Petrus a üreni, “Ai Samol, kosap talü pechei chök, nge kopwe pwal talü pei me mökürei!” ¹⁰ Iwe, Jesus a üreni, “Eman aramas a wes me tütü a unusen limöch, esap pwal chüen tütüsefäl, nge pechen chök. Ämi meinisin oua limöch, nge eman chök leimi esap limöch.” ¹¹ Jesus a fen silei iö we epwe afangamä i. Iei popun a apasa, “Ämi meinisin oua limöch, eman chök esap limöch.”

¹² Lupwen Jesus a wes me talü pecher, a pwilitisefälielong üfan sekít o liwinsefäliti lenian arun ewe chepel. Iwe, a aisiniir, “Ifa usun, oua weweiti met ngang üa föri ngenikemi? ¹³ Ämi oua aita ngeniei Sense me Samol. A pwüng mine oua apasa usi, pun iei wisei. ¹⁴ Ngang ämi Samol me Sense üa talü pechemi, iei usun pwal ämi oupwe talü pechemi eman ngeni eman. ¹⁵ Ngang üa anomu eu lenien apirü fän itemi, pwe ämi oupwe föri usun chök met ngang üa föri ngenikemi. ✧ ¹⁶ Enlet, üa

wesewesen ürenikemi: Eman chon angang esap lap seni an masta, nge eman chon künö esap lap seni ätewe mi tini. ✱ ¹⁷ Iei oua silei ekei mettoch, oupwe feiöch are oupwe apwönüretä.

¹⁸ “Ngang üsap kapas usumi meinisin. Üa silei chokewe üa filiiretä, nge makken lon ekewe Toropwe mi Pin epwe pwönüetä, ‘Ätewe mi mongö rei a ü ngeniei.’ ✱ ¹⁹ Ngang üa ürenikemi ekei mettoch iei me mwen ar repwe fis, pwe lupwen repwe fis, oupwe lükü pwe Ngang ewe mi nonom tori feilfeilachök. ²⁰ Enlet, üpwe wesewesen ürenikemi: Iö a etiwa ewe ngang üa tinala, a etiwaei, nge iö a etiwaei a etiwa ewe mi tinieito.” ✱

Jesus a osuni usun ätewe epwe afangamä

13.21-30

(Mat 26.20-25; Mark 14.17-21; Luk 22.21-23)

²¹ Mürin än Jesus apasa ngeniir ekei kapas, a fokun weires lon letipan o a pwärätä ngeniir, “Enlet, üpwe wesewesen ürenikemi: Eman me leimi epwe afangamäei.” ²² Ekewe chon kaiö ra nenefengen lefiler, pun resap silei iö a kapas usun. ²³ Eman me lein ekewe chon kaiö, ätewe Jesus a echeni, a mot ünükün Jesus. ²⁴ Iwe, Simon Petrus a chimwe ngeni o üreni, “Kopwe aisini iö a fos usun.” ²⁵ Iei mine ewe chon kaiö a roongeni Jesus o aisini, “Ai Samol, iö we?” ²⁶ Jesus a pölüeni, “Ätewe ngang üpwe ngeni ewe ekis pilawa üa fen achöchönü, ina i ewe aramas.” Iei mine Jesus a angei ekis pilawa, a achöchönü o ngeni Jutas nöün Simon Iskariot. ²⁷ Lon ewe chök otun Jutas a angei ewe ekis pilawa, Satan a tolong lon lelukan. Iwe, Jesus a üreni Jutas, “Kopwe chök müttir föri mine ka mochen föri.” ²⁸ Nge esap wor eman mi mot ngeni chepel a weweiti pwota Jesus a fos lon ei ititin kapas ngeni Jutas. ²⁹ Pokiten Jutas a wisen tümwünü ewe moni, ekoch me lein ekewe chon kaiö ra ekieki pwe Jesus a üreni pwe epwe feila o kamö met ra osupwang ren fän iten ewe chulap, ika epwe fangala och ngeni ekewe chon wöüngau. ³⁰ Iwe, lon ewe chök otun Jutas a angei ewe ekis pilawa, a towu lükün, nge a pwin.

Ewe Allük mi fö

13.31-35

³¹ Mürin än Jutas feila, Jesus a üra, “Iei lingen Nöün Aramas a pwäla. Iei lingen Kot a pwäla ren i. ³² Are lingen Kot a pwäla ren i, mürin Kot epwe pwal pwäri lingen Nöün Aramas lon püsin i, nge epwe müttir alingala. ³³ Ämi nei kana, esap chüen tam fansoun ai nonom remi. Ämi oupwe küttaei. Nge iei üpwe ürenikemi mine üa fen üreni ekewe nöüwisen chon Juta, ‘Ousap tongeni feila ewe ia ngang üpwe feila ie.’ ✱ ³⁴ Iei üpwe ngenikemi eu allük mi fö: Oupwe echenifengenikemi lefilemi. Usun ngang üa echenikemi, iei usun pwal ämi oupwe echenifengenikemi. ✱ ³⁵ Are oupwe echenifengenikemi, aramas meinisin repwe silei, pwe ämi nei chon kaiö.”

Jesus a osuni usun än Petrus amamäsini i

13.36-38

(Mat 26.31-35; Mark 14.27-31; Luk 22.31-34)

³⁶ Iwe, Simon Petrus a aisini Jesus, “Ai Samol, ia kopwe feila ie?” Jesus a pölüeni, “Kosap tongeni etiei iei ia ngang üpwe feila ie. Nge me mürin kopwe tapweto müri.” ³⁷ Petrus a aisini, “Ai Samol, pwota üsap

✱ **13:16:** Mat 10.24; Luk 6.40; Joh 15.20 ✱ **13:18:** Kölf 41.9 ✱ **13:20:** Mat 10.4; Mark 9.37; Luk 9.48; 10.16 ✱ **13:33:** Joh 7.37 ✱ **13:34:** Joh 15.12,17; 1.Joh 3.23; 2.Joh 5

tongeni etuk iei? Ngang üa fen molotä ai üpwe mäla fän itom!”³⁸ Jesus a põlüeni, “Ifa usun, ka wesewesen molotä om kopwe mäla fän itei? Enlet, üpwe wesewesen ürenuk: Mwen än ewe chuko epwe kökkö en kopwe amamäsiniei fän ülüngat.”

14

Jesus ewe Al ngeni ewe Sam

14.1-14

¹ Iwe, Jesus a üreni nõn kewe chon kaiö, “Ousap lolilen lon lelukemi. Oupwe lükü Kot, nge oupwe pwal lüküei. ² Mi wor chomong ruum lon imwen Semei. Üpwe feila o amolätä leniemi. Üsap ürenikemi ei are esap let. ³ Mürin ai üpwe feila o amolätä leniemi, üpwe pwal liwinsefälito o angeekemi, pwe oupwe nonom rei, pwe ia ngang üpwe nom ie, iei ämi oupwe pwal nom ie. ⁴ Ämi oua silei ewe al a ale ngeni ewe leni ia üpwe feila ie.” ⁵ Iwe, Tomas a üreni, “Ai Samol, äm aisap silei ia kopwe feila ie. Epwe ifa usun äm aipwe silei ewe al?” ⁶ Jesus a üreni, “Ngang ewe al me ewe let me ewe manau. Esap wor eman epwe tongeni feila ren Semei me lüki.” ⁷ Iwe, a pwal üreniir, “Are oupwe silei, oupwe pwal silei Semei. Iwe, seni ei fansoun oua silei i, oua pwal küna i.” ⁸ Filip a üreni, “Ai Samol, kopwe pwäri ngenikem Semom, ina chök mine äm aia tüngor.” ⁹ Jesus a üreni, “A fansoun langatam ai üa nonom remi, nge en Filip kosap mwo silei? Iö a künaei, a küna Semei. Pwota ka tongeni apasa, pwe üpwe pwäri ngenikemi Semei? ¹⁰ Filip, ifa usun, kosap lükü, pwe ngang üa nom lon Semei, nge Semei a nom loi?” Mürin Jesus a üreni nõn kewe chon kaiö, “Ekewe kapas üa fen ürenikemi resap pop seniei, nge Semei mi nonom loi a föri an angang. ¹¹ Oupwe chök lüküei lupwen üa apasa pwe ngang üa nom lon Semei, nge Semei a nonom loi. Are ousap lükü mine üa apasa, oupwe lükü pokiten ekewe föföör üa föriir. ¹² Enlet, üpwe wesewesen ürenikemi: Iö a lüküei epwe föri ekewe föföör ngang üa föriir, ewer, epwe pwal mwo nge föri föföör mi lap seni ekei, pun ngang üpwe feila ren Semei. ¹³ Iwe, meinisin mine oupwe tüngor fän itei üpwe apwönüetä, pwe Semei epwe küna ling rei. ¹⁴ Are oupwe tüngor och fän itei, üpwe apwönüetä.

Ewe pwon usun ewe Ngünmifel

14.15-31

¹⁵ “Iwe, are oua echeniei, oupwe aleasochisi ai kewe allük. ¹⁶ Üpwe tüngor ngeni Semei, iwe i epwe ngenikemi pwal eman Soualilis, epwe nonom remi tori feilfeilachök. ¹⁷ I ewe Ngünmifel, a pwärätä mine a let usun Kot. Chon fanüfan resap tongeni angei, pun resap tongeni küna are silei i. Nge ämi oua silei i, pokiten a nonom remi, epwe pwal nonom lomi. ¹⁸ Üsap likitikemi usun ekewe mi mäsen. Üpwe liwinsefälito remi. ¹⁹ Mürin ekis chök fansoun, chon fanüfan resap chüen künaei. Nge ämi oupwe künaei. Iwe, pokiten ngang üa manau, ämi oupwe pwal manau. ²⁰ Lon ena rän ämi oupwe silei pwe ngang üa nonom lon Semei, nge ämi oua nonom loi, usun chök ngang üa nonom lomi. ²¹ Iö a etiwa ai kewe allük o aleasochisiir, i ätewe mi echeniei. Nge iö a echeniei Semei epwe echeni. Pwal ngang üpwe echeni o pwäri ngeni ususi.” ²² Mürin Jutas, (sap Jutas Iskariot) a üreni, “Ai Samol, ifa usun an epwe tongeni fis pwe kopwe pwäri ngenikem ususum, nge kosap pwäri ngeni chon

fanüfan?”²³ Jesus a pölüeni, “Are eman a echeniei, epwe aleasochisi ai kewe kapas. Iwe, Semei epwe echeni, o Semei me ngang aipwe feito ren o imweimw lon.²⁴ Iö esap echeniei, esap aleasochisi ai kewe kapas. Iwe, ekewe kapas oua rongorong resap ai, nge än Semei we mi tinieito.²⁵ Ekei mettoch meinisin üa fen ürenikemi lupwen üa chüen nom remi.²⁶ Nge ewe Soualilis, ewe Ngünmifel, Semei epwe tinato fän itei, epwe aiti ngenikemi ekei mettoch meinisin o achema ngenikemi meinisin mine üa fen ürenikemi.²⁷ Kinamwe üa likiti ngenikemi, ai kinamwe üa fang ngenikemi. Ai lifang esap wewe ngeni än fanüfan lifang. Ousap lolilen lon lelukemi, ousap pwal niuokus.²⁸ Ämi oua rongorong pwe üa ürenikemi, ‘Ngang üpwe feila, nge üpwe liwinsefälito remi.’ Are oupwe echeniei, ämi oupwe pwapwa ren, pwe üpwe feila ren Semei, pun Semei a tekia seniei.²⁹ Iwe, üa fen ürenikemi ekei mettoch me mwen ar repwe fis, pwe lupwen ar repwe fis, ämi oupwe lükü.³⁰ Üsap chüen kapas chomong ngenikemi, pun ewe samolun ei fanüfan epwele war. Esap wor an nemenem woi.³¹ Nge chon fanüfan repwe fokun silei pwe ngang üa echeni Semei. Ina popun ngang üa föri meinisin mine i a allük ngeniei. Ousipwe feila seni ikei.”

15

Jesus i wesewesen ewe irän wain

15.1-17

¹ “Ngang wesewesen ewe irän wain, nge Semei ewe chon tümwünü ewe tanipin wain.² Epwe pöküela ekewe palan meinisin mi nonom loi resap ua, nge ekewe palan meinisin mi ua, epwe limetiir, pwe epwe chomongola uar.³ Ämi oua fen limöch pokiten ekewe kapas üa ürenikemi.⁴ Oupwe nonom loi, nge ngang üpwe nonom lomi. Usun efoch palen irän wain esap tongeni püsin ua, are esap nonom lon ewe irän wain, iei usun pwal ämi ousap tongeni püsin ua are ousap nonom loi.

⁵ “Ngang ewe irän wain, ämi palan kana. Iö a nonom loi, nge ngang lon, epwe uani ua mi chomong, pun lüki ousap tongeni föri och.⁶ Iö esap nonom loi, epwe koturula usun efoch palen irän wain o epwe pwasala. Ekei sokun palan repwe ioifengen o koturulong lon ekkei pwe repwe karala.⁷ Are ämi oupwe nonom loi, nge ai kewe kapas repwe nonom lomi, oupwe tüngor meinisin mine oua mochen, iwe, epwe torikemi.⁸ Iei chök mine Semei epwe küna ling ren, are oupwe uani ua mi chomong o pwäräla pwe ämi nei chon kaiö.⁹ Usun Semei a echeniei, iei usun üa echenikemi, oupwe nonom lon ai chen.¹⁰ Are oua aleasochisi ai kewe allük, oupwe nonom lon ai chen, usun ngang üa aleasochisi än Semei kewe allük o nonom lon an chen.

¹¹ “Ngang üa fen ürenikemi usun ekei mettoch, pwe ai pwapwa epwe nom lomi o ämi pwapwa epwe unusöch.¹² Iei ai allük: Oupwe echenifengenikemi lefilemi usun ngang üa echenikemi. ✱¹³ Esap wor eman a eäni chen mi lapalap seni ei chen, are eman a pölükü manauan fän iten chiechian kana.¹⁴ Iwe, ämi chiechiei kana, are oupwe apwönüetä mine üa allük ngenikemi.¹⁵ Üsap chüen aita ngenikemi nei chon angang, pun eman chon angang esap silei mine an samol a föri. Nge üa aita ngenikemi chiechiei, pun üa asile ngenikemi meinisin mine üa rongorong me ren

✱ 15:12: Joh 13.34; 15.17; 1.Joh 3.23; 2.Joh 5

Semei. ¹⁶ Ämi ousap aflieie, nge ngang üa aflikemi o awisakemi, pwe oupwe feila o uani ua mi chomong, ewe sokun ua mi nonomola. Iei usun Semei epwe ngenikemi meinisin mine oua tüngor fän itei. ¹⁷ Iei ai allük ngenikemi: Oupwe echenifengenikemi lefilemi!

Än fanüfan oput nöün Jesus kewe chon kaiö

15.18–16.4

¹⁸ “Are fanüfan a oput ämi, oupwe chök chechemeni pwe a fen akomwen oputaei. ¹⁹ Are oupwe pop seni ei fanüfan, ei fanüfan epwe echenikemi usun nöün kana. Nge ämi ousap pop seni ei fanüfan, pun ngang üa aflikemi seni fanüfan, ina popun fanüfan a oput ämi. ²⁰ Oupwe chechemeni pwe üa ürenikemi, ‘Esap wor eman chon angang a lap seni an masta.’ Are ra ariaföüei, repwe pwal ariaföüükemi. Are ra aleasochisi ai kewe kapas, repwe pwal aleasochisi ämi kewe kapas. ✧ ²¹ Repwe föri ngenikemi ekei mettoch meinisin, pokiten ämi nei. Pun resap silei ewe mi tinieito. ²² Are üsap feito o kapas ngeniir, esap wor ar tipis. Nge iei esap chüen wor ar künetingen ren ar tipis. ²³ Iö a oputaei a pwal oputa Semei. ²⁴ Are ngang üsap föri leir ekewe föföör esap mwo wor eman a föriir, esap wor ar tipis. Iwe, iei ra küna ekewe manaman üa föriir, nge ra fen oputaei me Semei. ²⁵ Nge ei a fis pwe epwe pwönüetä mine a mak lon pwüngün ar lamalam, ‘Ra oputaei, nge esap wor popun.’ ✧

²⁶ Iwe, lupwen ewe Soualilis epwe war, ngang üpwe tinato remi seni Semei, i ewe Ngünmifel mi pwärätä mine a let usun Kot, a feito seni Semei, i epwe pwärätä usi. ²⁷ Pwal ämi oupwe pwärätä usi, pun ämi oua nonom rei seni lepopun.

16

¹ “Ngang üa fen ürenikemi ekei kapas, pwe ämi ousap tok seni ämi lükülük. ² Repwe atowukemi seni ar mwich lon ar kewe imwen felikis. Nge epwe war ewe fansoun lupwen chokewe mi nikemi repwe ekieki, pwe ar föföör eu angang ngeni Kot. ³ Aramas repwe föri ekei sokun föföör ngenikemi, pun resap mwo silei Semei, resap pwal sileei. ⁴ Nge üa fen ürenikemi ekei kapas, pwe lupwen epwe war ewe fansoun ar repwe föri ngenikemi ekei mettoch, ämi oupwe chemeni mine üa fen ürenikemi. Üsap ürenikemi ekei mettoch seni lepoputän, pun ngang üa nom remi.

Än ewe Ngünmifel angang

16.5-15

⁵ “Iwe, iei üpwe feila ren ewe mi tiniei, nge esap wor eman leimi a aisiniei ia üpwe feila ie. ⁶ Nge pokiten üa ürenikemi ekei kapas, oua uren lolilen. ⁷ Nge üpwe ürenikemi mine a let: Oupwe feiöch ren ai üpwe feila. Pun are ngang üsap feila, ewe Soualilis esap feito remi. Nge are üpwe feila, üpwe tinato remi ewe Soualilis. ⁸ Iwe, lupwen epwe war, epwe amefi ngeni chon fanüfan usun ar tipis, usun pwüng pwal usun än Kot apwüng. ⁹ Epwe amefi ngeniir usun ar tipis, pun resap lüküei. ¹⁰ Epwe amefi ngeniir usun pwüng, pun ngang üpwe feila ren Semei o ämi ousap chüen künaei. ¹¹ Epwe pwal amefi ngeniir usun apwüng, pun ewe samolun ei fanüfan a fen küna apwüng.

¹² Mi chüen wor chomong mettoch üpwe ürenikemi, nge epwe fokun weires ngenikemi iei. ¹³ Nge lupwen epwe war ewe Ngünmifel mi

pwärätä mine a let usun Kot, i epwe emwenikemiilong lon ewe let mi unusöch. Esap kapas fän püsin itan, nge epwe kapas usun met a rongorong o ürenikemi usun ekewe mettoch repwe feito. ¹⁴ Epwe alingaei, pun epwe angei seni mine ai o aronga ngenikemi. ¹⁵ Mettoch meinisin mine än Semei, iei pwal ai. Iei popun üpwe ürenikemi pwe ewe Ngümmifel epwe angei seni mine ai o aronga ngenikemi.

Lolilen me pwapwa

16.16-24

¹⁶ “Lon ekis chök fansoun ämi ousap chüen künaei, nge pwal ekis chök fansoun mürin oupwe künaei.” ¹⁷ Iwe, ekoch me lein nöün kewe chon kaiö ra aisfengen lefler, “Met wewen ekei kapas a ürenikich, ‘Lon ekis chök fansoun ämi ousap chüen künaei, nge pwal ekis chök fansoun mürin oupwe künaei?’ A pwal apasa, ‘Ei epwe fis, pun üa feila ren Semei.’” ¹⁸ Met chök wewen ‘ekis chök fansoun?’ Kich sisap silei mine a kapas usun!” ¹⁹ Jesus a silei pwe ra mochen kapas ais ngeni usun ei mettoch, iei mine a üreniir, “Ifa usun, oua aisfengen lefilemi met wewen ai apasa, ‘Ekis chök fansoun ämi ousap chüen künaei, nge pwal ekis chök fansoun mürin oupwe künaei?’” ²⁰ Enlet, üpwe wesewesen ürenikemi: Ämi oupwe kechü o ngüngüres, nge fanüfan epwe fokun pwapwa. Ämi oupwe lolilen, nge ämi lolilen epwe wiliti pwapwa. ²¹ Lupwen eman fefin a arap ngeni fansoun an epwe nöünöü, a metek. Nge lupwen a wes me nöünätü nöün we, a manlükala an we metek mi weires, pun a pwapwa pwe eman mönükol a uputiü won fanüfan. ²² Ina usun pwal ämi: Iei oua lolilen, nge üpwe pwal künasefälíkemi, mürin lelukemi epwe ur ren pwapwa, nge ei pwapwa esap wor eman epwe tongeni angei senikemi. ²³ Lon ena rän ämi ousap chüen aisiniei och. Enlet, üpwe wesewesen ürenikemi: Semei epwe ngenikemi meinisin mine oua tüngor fän itei. ²⁴ Tori iei ousap tüngor mwo och fän itei. Oupwe tütüngor, iwe, oupwe angei pwe ämi pwapwa epwe unusöch.

Jesus a akufu fanüfan

16.25-33

²⁵ “Iwe, üa fen kapas ngenikemi usun ekei mettoch lon kapas monomon. Nge epwe war ewe fansoun lupwen üsap chüen kapas ngenikemi lon kapas monomon, nge üpwe kapas ngenikemi usun Semei lon kapas mi fat. ²⁶ Lupwen epwe tori ena rän, ämi oupwe tüngor ngeni Semei fän itei. Üsap apasa, pwe ngang üpwe tüngor och fän itemi, ²⁷ pun Semei a püsin echenikemi. A echenikemi, pun ämi oua echeniei o lükü pwe üa feito seni Kot. ²⁸ Üa feito seni Semei o feitiü fanüfan. Nge iei üpwe towu seni fanüfan o liwinsefälila ren Semei.”

²⁹ Mürin nöün kewe chon kaiö ra üreni, “Iei a fat om kapas ngenikem, nge kosap chüen aea kapas monomon. ³⁰ Iei äm aia silei, pwe en ka silei mettoch meinisin. Kosap osun än eman epwe kapas ais ngonuk, iei popun äm aia lükü, pwe en ka feito seni Kot.” ³¹ Jesus a üreniir, “Oua wesewesen lüküei? ³² Nengeni, epwe war ewe fansoun, nge a fen tori, lupwen ämi meinisin oupwe toropasfeil lon en me lenian o ngang üpwe chök emanüla. Nge ngang üsap wesewesen emanüla, pun Semei a nom rei fansoun meinisin. ³³ Ngang üa fen ürenikemi usun ekei mettoch, pwe oupwe eäni kinamwe loi. Lon fanüfan ämi oupwe riaföü, nge oupwe apilükülük, pun ngang üa akufu fanüfan.”

17

Jesus a iotek fän iten nöün kewe chon kaiö

17.1-26

¹ Mürin än Jesus apasa ekei kapas, a anetai mesan ngeni läng o a apasa, “Semei, a tori ewe otun. Kopwe alingala Noumw, pwe Noumw epwe pwal alingala en. ² Pun ka ngeni nemenem won aramas meinisin, pwe epwe ngeni chokewe en ka ngeni manau esemüch. ³ Iwe, iei manau esemüch: Ar repwe silei en, ewe eman chök Kot mi let, repwe pwal silei Jesus Kraist, ewe ka tinato. ⁴ Üa fen alingok won fanüfan o awesala ewe angang ka ngeniei pwe üpwe föri. ⁵ Semei, iei kopwe alingaei me mwen mesom, ren ewe chök ling üa eäni lupwen üa nom reöm mwen fanüfan esamwo wor.

⁶ Üa pwärala itom ngeni chokewe ka ngeniei seni won fanüfan. Ir noumw kewe, nge ka fang ir ngeniei o ra aleasochisi om kewe kapas. ⁷ Iwe, iei ra silei pwe mettoch meinisin ka ngeniei ra feito senuk. ⁸ Pun üa ngeniir ekewe kapas en ka fen ngeniei o ir ra etiw eer. Iwe, ra silei pwe a let pwe üa feito senuk o ir ra lükü, pwe ka tinieito. ⁹ Ngang üa iotek fänäsengesiiir. Üsap iotek fänäsengesin chon fanüfan, nge fänäsengesin chokewe ka ngeniei, pun ir noumw. ¹⁰ Chokewe meinisin ir nei pwal noumw, nge chokewe meinisin ir noumw pwal nei, iwe, ai ling a pwäpwäla me rer. ¹¹ Iwe, iei üpwe feila reöm. Üsap chüen nom lon ei fanüfan, nge ir ra nom lon ei fanüfan. Semei mi pin, kose mochen kopwe tümwünüür ren manamanen itom we, ewe it ka ngeniei, pwe ir repwe eu usun chök en me ngang sia eu. ¹² Lupwen ngang üa nom rer, üa tümwünüür ren manamanen itom we, ewe it ka ngeniei. Üa tiirela, pwe esap wor eman me leir a pöütüla, chilon chök ewe eman mi feil ngeni an epwe pöütüla, pwe epwe pwönüetä mine a mak lon ekewe Toropwe mi Pin. ✧ ¹³ Iwe, iei üpwe feila reöm. Üa kapas usun ekei mettoch lupwen üa chüen nom lon fanüfan, pwe repwe eäni unusen ai we pwapwa lon leluker. ¹⁴ Üa ngeniir om kapas, nge fanüfan a oputeer, pun ir resap pop seni ei fanüfan, usun chök ngang üsap pop seni ei fanüfan. ¹⁵ Üsap tüngor pwe kopwe angeer seni lon ei fanüfan, nge üa tüngor pwe kopwe tümwünüür seni ewe Eman mi Ngau. ¹⁶ Usun ngang üsap pop seni ei fanüfan, iei usun ir resap pop seni ei fanüfan. ¹⁷ Kopwe apiniir lon ewe let. Om kapas a let. ¹⁸ Usun en ka tinieilong lon fanüfan, iei usun pwal ngang üa tiniirela won fanüfan. ¹⁹ Iwe, üa püsin apinie i fänäsengesiiir, pwe pwal ir repwe pin lon let.

²⁰ Nge üsap chök iotek fän iter, pwe üa pwal iotek fän iten chokewe mi lüküei ren ar afalafal. ²¹ Semei, üa iotek pwe ir meinisin repwe eu chök. Usun chök en ka nonom loi, nge ngang üa nonom lomw, iei usun ir repwe nonom loch, pwe fanüfan epwe lükü pwe en ka tinieito. ²² Ngang üa ngeniir ewe ling en ka ngeniei, pwe repwe eu chök usun kich sa eu: ²³ Ngang üa nonom lor o en ka nonom loi, pwe ar eufengen epwe unus, pwe fanüfan epwe silei pwe en ka tinieito, epwe pwal silei pwe en ka echeniir usun ka echeniei.

²⁴ Semei, üa mochen pwe chokewe ka ngeniei repwe nonom rei ia ngang üpwe nom ie, pwe repwe nenengeni ai we ling ka fen ngeniei, pun ka echeniei mwen fanüfan esamwo wor. ²⁵ Semei mi pwüng! Fanüfan

esap silei en, nge ngang üa sileek, nge chokei ra silei pwe en ka tinieito.
²⁶ Ngang üa asile ngeniir itom, nge üpwe sopwela ai föri iei usun, pwe ewe chen ka eäni ngeniei epwe nonom lor, pwal ngang üpwe nonom lor.”

18

Ra fötekini Jesus

18.1-11

(*Mat 26.47-56; Mark 14.43-50; Luk 22.47-53*)

¹ Mürin än Jesus wes le iotek, a feila fiti nöün kewe chon kaiö pekilan ewe öwö Kitron. Ikenan mi wor eu tanipi, i me nöün kewe chon kaiö ra tolong lon. ² Iwe, Jutas, ewe chon afangamä, a silei ewe leni, pun Jesus me nöün kewe chon kaiö ra soun chufengen ikenan. ³ Iei mine Jutas a feila ren ewe tanipi, o a emwenala eu mwichen sounfiu seni Rom me ekoch chon tümwünü imwenfel, ekewe souasor mi lap me ekewe Farisi ra tiniirela. Ra uwou pisekin maun, lamp me töl. ⁴ Jesus a silei meinisin mine epwe fis ngeni, iei mine a feila rer o aisiniir, “Tö oua kütta?” ⁵ Ra pölüeni, “Jesus seni Nasaret.” Jesus a üreniir, “Ngang ätewe.” Iwe, Jutas, ewe chon afangamä a pwal ütä rer. ⁶ Lupwen Jesus a üreniir, pwe i ätewe, ra nimärämärséfäl o turula lepwül. ⁷ Jesus a aissefäl ngeniir, “Tö oua kütta?” Ra pölüeni, “Jesus seni Nasaret.” ⁸ Jesus a üreniir, “Üa fen ürenikemi pwe ngang ätewe. Iei mine are oua küttaei, oupwe mwüt ngeni ätekei pwe repwe feila.” ⁹ Jesus a apasa ei ititin kapas pwe epwe pwönüetä mine a fen apasa, “Semei, esap wor eman me lein ätekeke ka ngeniei a pöüt seniei.” ¹⁰ Mürin Simon Petrus, ätewe a wor nöün ketilas, a üttawu nöün ketilas o pöküela selingefichin nöün ewe Souasor mi Lap we chon angang. Iten ewe chon angang Malkus. ¹¹ Iwe, Jesus a üreni Petrus, “Kopwe aliwinsefälielong noumw ketilas lon tükütükün. Ifa usun, ka ekieki pwe üsap ün seni ewe kapen riaföü Semei a ngeniei?” ✧

Jesus a ümwän Anas

18.12-14

¹² Mürin ewe mwichen sounfiu fiti nöür we meilap, pwal ekewe chon Juta mi tümwünü ewe imwenfel ra turufi Jesus o fötekini. ¹³ Ra akomwen emwenala ren Anas, pun i semen pwülüen Kaifas mi Souasor mi Lap lon ewe ier. ¹⁴ Kaifas ätewe mi öüröüra ekewe nöüwisen chon Juta, pwe a mürina än eman aramas epwe mäla fänäsengesin aramas meinisin. ✧

Petrus a amamäsini Jesus

18.15-18

(*Mat 26.69-70; Mark 14.66-68; Luk 22.55-57*)

¹⁵ Iwe, Simon Petrus me pwal eman seni ekewe chon kaiö ra tapwela mürin Jesus. Ewe eman chon kaiö a sil me ren ewe Souasor mi Lap, iei mine a eti Jesus le tolong lon ewe leni lükün imwen ewe Souasor mi Lap, ¹⁶ nge Petrus a chök ütä lükün ewe asamen tolong. Mürin ewe eman chon kaiö a liwinsefäliwu lükün o kapas ngeni ewe föpwül mi wisen mamasa ewe asamen tolong o a emwenalong Petrus lon ewe leni. ¹⁷ Iwe, ewe föpwül mi nom ünükün ewe asam a üreni Petrus, “Ifa usun, sap pwal en eman nöün enan mwän kewe chon kaiö?” Petrus a pölüeni, “Apw, sap pwal ngang.” ¹⁸ Lon ena fansoun a patekich, iei mine ekewe chon angang me ekewe chon tümwünü ewe imwenfel ra aküw eu ekkei

o ütā ünükün pwe ra apwichipwichiir. Petrus a pwal ütā rer o etiir le apwichipwichi.

Ewe Souasor mi Lap a kapas ais ngeni Jesus

18.19-24

(Mat 26.59-66; Mark 14.55-64; Luk 22.66-71)

¹⁹ Iwe, ewe Souasor mi Lap a aisini Jesus usun nöün kewe chon kaiö pwal usun an afalafal. ²⁰ Jesus a pölüeni, “Fansoun meinisin üa kapas le pwäpwäla ngeni aramas meinisin. Üa afalafal lon ekewe imwen felikis pwal lon ewe imwenfel ia ekewe aramas meinisin ra mwichfengen ie. Üsap apasa och le monomon. ²¹ Pwota ka kapas ais ngeniei won ei. Kopwe aisini ekewe aramas mi rong ai kewe afalafal. Kopwe aisiniir met üa kapas won, ir ra silei mine üa eäni afalafal.” ²² Lupwen Jesus a apasatä ekei kapas, eman me lein ekewe chon tümwünü imwenfel mi ü ünükün a pösapei o apasa, “Pwota ka nöönöü ei ititin kapas ngeni ewe Souasor mi Lap?” ²³ Jesus a pölüeni, “Are üa apasatä och kapas mi mwäl, kopwe alletätä met a mwäl. Nge are ngang üa pwüng lon met üa apasa, pwota ka pösapei?” ²⁴ Mürin Anas a tinala Jesus ren Kaifas ewe Souasor mi Lap, nge a chüen fötek.

Petrus a amamäsinisefäli Jesus

18.25-27

(Mat 26.71-75; Mark 14.69-72; Luk 22.58-62)

²⁵ Lupwen Petrus a chüen ütā o apwichipwichi, eman a aisini, “Ifa usun, sap pwal en eman me lein nöün ätenan kewe chon kaiö?” Nge Petrus a amam o apasa, “Apw, sap pwal ngang.” ²⁶ Iwe, eman me lein nöün ewe Souasor mi Lap kewe chon ngang, i eman märärin ewe mwän Petrus a pöküela selingan a aisini, “Ifan usun, üsap künok me lon ewe tanipi pwe ka eti ätenan?” ²⁷ Nge Petrus a amamsefäl. Lon ewe chök otun eman chuko a kökkö.

Jesus a ü mwen Pilatus

18.28-40

(Mat 27.1-2,11-14; Mark 15.1-5; Luk 23.1-5)

²⁸ Lesosorusich chök nge ra emwenala Jesus seni imwen Kaifas ngeni imwen ewe kepina. Nge ekewe nöüwisen chon Juta resap tolong lon ewe imw, pun ra mochen ar repwe limöch o apwönüetä pwüngün ar lamalam, lupwen repwe mongö ewe mongön Pasofer. ²⁹ Iei mine Pilatus a towu rer o aisiniir, “Met oua atipisi ei mwän ren?” ³⁰ Ra pölüeni, “Äm aisap tongeni emwenato ei mwän, are esap wor an föföringau.” ³¹ Pilatus a üreniir, “Ämi oupwe püsin apwüngü won pwüngün ämi allük.” Nge ir ra pölüeni, “Esap mwümwütä ngenikem pwe aipwe apwüngala än eman epwe mäla.” ³² Ei a fis an epwe pwönüetä met Jesus a apasa usun meni sokun mäla epwe mäli. ☆

³³ Iwe, Pilatus a liwinsefäli long lon imwan o a allük pwe repwe emwenato Jesus ren. A aisini, “Ifa usun, en nöün chon Juta we king?” ³⁴ Jesus a pölüeni, “Ifa usun, ei kapas ais a feito senuk, ika ekoch ra ürenuk och usi?” ³⁵ Pilatus a pölüeni, “Ifa usun, ka ekieki pwe ngang eman re Juta? Püsin aramasen fanüom me ekewe souasor mi lap ra aturuk rei. Met ka föri?” ³⁶ Jesus a üreni, “Mwü esap pop seni ei fanüfan. Are mwü epwe pop seni ei fanüfan, nei kewe chon ngang repwe fiu pwe repwe tümwünüei,

pwe üsap oolong lepöün ekewe nöüwisen chon Juta. Nge mwüi esap pop seni ikei.” ³⁷ Iei mine Pilatus a aisini, “Iwe, met, en eman king?” Jesus a pölüeni, “En ka fen apasa pwe ngang eman king. Popun ai uputiu o tolong lon ei fanüfan, pwe üpwe pwärätä mine a let. Iô a pop seni let epwe aüselingaei.” ³⁸ Iwe, Pilatus a aisini, “Met ewe a let?” Mürin Pilatus a liwinsefäliwu lükün ren ekewe aramas o a üreniir, “Üsap küna och tipis ren ei mwän an epwe ninnila. ³⁹ Nge lon pwüngün örüniemi üpwe amusawu eman chon fötek ngenikemi lupwen fansoun chulapen Pasofer. Ifa usun, oua mochen ai üpwe amusawu ngenikemi nöümi we king?” ⁴⁰ Iwe, ra kökkö fän leüömong, “Apwi, sap i. Kopwe amusa ngenikem Parapas.” (Parapas i eman chon achomau.)

19

A pwüngüla pwe Jesus epwe iräpenges

19.1-16

(Mat 27.15-31; Mark 15.6-20; Luk 23.13-25)

¹ Mürin Pilatus a üreni ekewe sounfiu, “Oupwe etekinala Jesus o wichi.” ² Iwe, ekewe sounfiu ra fittiifengeni palen iräföläföfö o isetä won möküran pwe mwärin, ra pwal aüfa ngeni echö üf mi parachol. ³ Ra feito ren o apasa, “Ränallim ngonuk, en kingen chon Juta!” Iwe, ra pwal pösapei. ⁴ Iwe, Pilatus a pwal liwinsefäliwu rer o üreni ewe mwichen aramas, “Nengeni, üpwe emwenawu ätei remi, pwe oupwe silei pwe ngang üsap küna och tipis ren an epwe ninnila.” ⁵ Iei mine Jesus a towu lükün, a mwärämwär epa mwärämwär seni palen iräföläföfö o üföüf echö üf mi parachol. Iwe, Pilatus a üreniir, “Nengeni, iei i ewe aramas!”

⁶ Lupwen ekewe souasor mi lap me ekewe chon tümwünü imwenfel ra küna Jesus, ra kökkö fän leüömong, “Kopwe iräpengesi! Kopwe iräpengesi!” Pilatus a üreniir, “Oupwe angei ätei o iräpengesi. Ngang üsap küna och tipis ren an epwe ninnila.” ⁷ Nge ewe mwichen aramas a pölüeni, “A wor rem eu allük a apasa pwe ätei epwe mäla, pun a apasa pwe i Nöün Kot.” ⁸ Lupwen Pilatus a rong ekei kapas, a fokun niuokus. ⁹ A liwinsefälilong lon ewe imw o aisini Jesus, “Ia ka feito me ie?” Nge Jesus esap pölüeni och. ¹⁰ Iei mine Pilatus a üreni, “Ifa usun, kosap mochen kapas ngeniei? Kosap silei pwe a wor ai pwüüng ai üpwe angasookala, pwal ai pwüüng ai üpwe apasa pwe kopwe iräpenges?” ¹¹ Jesus a pölüeni, “A chök wor om pwüüng woi pokiten Kot a ngonuk. Iei mine ätewe mi atolongaei lepoumw a kon watte an tipis lap seni om.” ¹² Iei mine Pilatus a sotuni le kütta efoch al an epwe angasa Jesus. Nge ewe mwichen aramas a kökkö ngeni fän leüömong, “Are en kopwe angasala ätei, kosap chiechien Sisar! Pun eman mi püsin apasa pwe i king, a ü ngeni Sisar!” ¹³ Lupwen Pilatus a rongorong ekei kapas, a emwenawu Jesus lükün o a möttiu won an lenien motun souapwüüng, lon ewe leni itan “Chech fau.” (Lon kapasen Ipru: Kapata.) ¹⁴ Ei otun ina epwe le arapakan leoloasen ewe rän mwen ewe chulapen Pasofer. Pilatus a üreni ekewe aramas, “Nengeni, iei i nöümi we king!” ¹⁵ Nge ir ra kökkö ngeni fän leüömong, “Kopwe niela, kopwe niela, kopwe iräpengesi!” Pilatus a aisiniir, “Ifa usun, oua mochen pwe üpwe iräpengesi nöümi king?” Ekewe souasor mi lap ra pölüeni, “Esap wor eman nöüm king pwe Sisar chök.” ¹⁶ Mürin Pilatus a mwüt ngeniir Jesus pwe epwe iräpenges. Iwe, ekewe sounfiu ra angei Jesus.

Jesus a iräpenges

19.17-27

(Mat 27.32-44; Mark 15.21-32; Luk 22.26-43)

¹⁷ Iwe, Jesus a mwärei an iräpenges, a towu lükün ewe telinimw o feila lon ewe leni itan “Lenien Pösökün Mökür” lon kapasen Ipru “Kolkota”.
¹⁸ Ikenan ra iräpengesi Jesus. Ra pwal iräpengesi ruoman mwän, eman a nom epek nge pwal eman epek, nge Jesus a nom lukalaper. ¹⁹ Pilatus a makkei ekei kapas o pachetä won ewe iräpenges: “Jesus seni Nasaret, ewe Kingen chon Juta.” ²⁰ Chomong aramas ra aleani ekei kapas, pun ewe leni ia Jesus a iräpenges ie a arap ngeni ewe telinimw. Ekewe kapas ra mak lon fosun Ipru, Latin me Krik. ²¹ Iwe, ekewe souasor mi lap ra üreni Pilatus, “Kosap makkei ‘Kingen chon Juta’, nge kopwe makkei ‘Ei mwän a apasa: Ngang ewe kingen chon Juta’.” ²² Nge Pilatus a pölüeni, “Met üa makkei, ina chök met epwe nom.”

²³ Iwe, lupwen ekewe sounfiu ra iräpengesi Jesus, ra angei seni üfan kewe o inetiir lon rüanü kinikin, eman sounfiu nge echö. Ra pwal angei üfan we mi tam esor lekochun, pun a türunus seni won tori fan. ²⁴ Iwe, ra kapasfengen lefiler, “Ousisap kamwei ei üf, nge ousipwe üttüt won, pwe epwe fat iö epwe angei.” Ei a fis pwe epwe pwönüetä mine a mak lon ekewe Toropwe mi Pin:

“Ra ineti üfei kewe lefiler

o üttüt won üfei we mi tam.” Iei usun mine ekewe sounfiu ra föri. ☆

²⁵ Nge ünükün ewe iräpengesi Jesus ra ütä inan we, pwiin inan we, Maria pwülüen Klopas me Maria Maktalene. ²⁶ Lupwen Jesus a küna inan we me ewe chon kaiö i a echeni mi ütä ikenan, a üreni inan we, “Nengeni, ätenan noumw.” ²⁷ Mürin a üreni ewe chon kaiö, “Nengeni, iei i inom.” Iwe, seni lon ena otun ewe chon kaiö a angei Maria pwe epwe nom ren lon imwan.

Än Jesus mäla

19.28-30

(Mat 27.45-56; Mark 15.33-41; Luk 23.44-49)

²⁸ Mürin Jesus a silei, pwe iei an angang meinsin a wesöchüla. Iwe, fän iten an epwe pwönüetä mine a mak lon ekewe Toropwe mi Pin, Jesus a apasa, “Üa kaka.” ☆ ²⁹ Mi wor eu rume mi ur ren wain mi mwal ikenan. Ra atukalong eu farawa lon o pachetä lesopun efoch mwüch seni ewe irä isop o pöüätä ngeni awen Jesus. ³⁰ Lupwen Jesus a wes me ün ewe wain, a apasa, “A wesila!” Mürin a rotiu o mäla.

Eman sounfiu a posu lepekin Jesus

19.31-37

³¹ Mürin ekewe nöüwisen chon Juta ra tüngorei Pilatus pwe epwe mwütätä, pwe repwe kupi pechen ekewe mwän mi iräpenges, repwe pwal angeatiu inisiir seni won ekewe iräpenges. Ra tüngor won ei, pun ei rän eu ränin amol, nge ir resap mochen pwe inisin ekewe aramas repwe nom won ekewe iräpenges lon ewe ränin sapat, pun ei ränin sapat eu rän mi fokun pin. ³² Iei mine ekewe sounfiu ra feila o kupi pechen ewe aemanün me aruomanün mwän ra iräpenges me Jesus. ³³ Nge lupwen ar feiliti Jesus, ra küna pwe a fen mäla, iei mine resap chüen kupi pechen. ³⁴ Nge eman ekewe sounfiu a angei wokun siles o posu ngeni lepekin Jesus. Iwe, lon chök ewe otun cha me koluk ra puwu seni. ³⁵ Ewe eman

mi küna fisitän ei mettoch a pwärätä usun, pwe ämi oupwe pwal lükü. An kapasen pwärätä a let, a silei pwe mine a apasa a let. ³⁶ Ekei mettoch ra fis pwe epwe pwönüetä mine a mak lon ekewe Toropwe mi Pin: “Esap wor efoch chün epwe kup.” ✧ ³⁷ Mi pwal wor eu fos a mak lon ekewe Toropwe mi Pin, “Aramas repwe nenengeni ätewe ra posu.” ✧

Jesus a peias

19.38-42

(*Mat 27.57-61; Mark 15.42-47; Luk 23.50-56*)

³⁸ Mürin ei, Josef seni ewe telinimw Arimatea a tüngorei Pilatus pwe epwe angeatiu somän Jesus me won ewe iräpenges. Josef, eman nöün Jesus kewe chon kaiö, nge le monomon chök, pun a niuokusiti ekewe nöüwisen chon Juta. Iwe, Pilatus a mwütätä, iei mine Josef a feila o angei ewe somä. ³⁹ Pwal Nikotemus a eti Josef, i ätewe a churi Jesus lepwin me mwan. Ätei a uwato löpwokus mi nofit ngeni mör me aloes ina epwe ükükün ipükü paun. ✧ ⁴⁰ Ekei ruoman mwän ra angeatiu somän Jesus o finiti ngeni mangaku mi pwechepwech fiti ekewe löpwokus, pun iei usun örünien chon Juta, lupwen ra amolätä eman somä an epwe peias. ⁴¹ A wor eu tanipi lon ewe leni ia Jesus a iräpenges ie. Ikenan a wor eu minefön peias, esap mwo wor eman a peias lon. ⁴² Pokiten ei rän ewe ränin amol mwen ewe ränin sapat, pwal pokiten ewe peias a chök arap, iei mine ra uwalong somän Jesus lon.

20

Ewe peias a pöön

20.1-10

(*Mat 28.1-8; Mark 16.1-8; Luk 24.1-12*)

¹ Iwe, lesosorusichin ewe aeuin ränin wiik, lupwen esamwo ränila, Maria Maktalene a feila ren ewe peias o a küna pwe ewe fau mi pwölüela mesen ewe peias ese chüen nom. ² Iei mine a säla ren Simon Petrus me ewe eman chon kaiö Jesus a echeni o a üreniir, “Ra angeala somän ach Samol seni ewe peias, nge sisap silei ia ra anomu iei!” ³ Mürin Petrus me ewe eman chon kaiö ra feila ren ewe peias. ⁴ Ir me ruoman ra sä, nge ewe eman chon kaiö a müttir seni Petrus, pwe a akomwen tori ewe peias. ⁵ A pworotiu o nelong lon o küna ekewe mangaku mi pwechepwech lon ewe peias, nge esap tolong lon. ⁶ Iwe, Simon Petrus a säto mürin o tolong lon ewe peias. A küna ekewe mangaku mi pwechepwech ikenan, ⁷ pwal ewe mangaku mi finifin ngeni möküren Jesus. Nge ei mangaku ese nomofengen me ekewe mangaku mi pwechepwech, pwe a numufengen won an. ⁸ Mürin ewe eman chon kaiö mi akomwen tori ewe peias a pwal tolong lon. Iwe, a küna ekewe mangaku o lükü, pwe Jesus a manausefäl. ⁹ (Resap mwo weweiti mine a mak lon ekewe Toropwe mi Pin, pwe Jesus epwe fokun manausefäl seni mäla.) ¹⁰ Mürin ekewe chon kaiö ra liwinsefäliti lenier.

Jesus a pwä ngeni Maria Maktalene

20.11-18

(*Mat 28.9-10; Mark 16.9-11*)

¹¹ Nge Maria a ükütä ünükün ewe peias o a kekechü. Lupwen a chüen kekechü a pworotiu o nenelong lon ewe peias. ¹² Iwe, a küna ruoman

chon läng mi üföüf üf mi pwechepwech, ra mot ewe ia somän Jesus a nom ie me mwan, eman a mot ünümöküran, nge eman a mot ünüpechen. ¹³ Iwe, ra aisini Maria, “Nemin, pwota ka kechü.” A pölüeni, “Pun ra angeala somän ai Samol, nge üsap silei ia ra anomu ie!” ¹⁴ Mürin a kul o küna Jesus pwe a ütâ ikenan. Nge esap silei pwe i Jesus. ¹⁵ Iwe, Jesus a aisini, “Nemin, pwota ka kechü? Iö na ka kükütta?” Nge Maria a ekieki pwe i eman chon tanipi, iei mine a üreni, “Ai samol, are en ka angeala somän Jesus, kose mochen üreniei ia ka anomu ie, pwe üpwe feila o angei.” ¹⁶ Iwe, Jesus a föüni iten neminewe o apasa, “Maria!” Mürin Maria a kul ngeni o apasa lon kapasen Ipru, “Rapponi!” (Wewen “Sense”) ¹⁷ Jesus a üreni, “Kosap atapaëi, pun üsamwo feitâ ren Semei. Nge kopwe feila ren pwii kewe o üreniir, pwe üpwe feitâ ren Semei pwal Semer, ren ai Kot pwal ar Kot.” ¹⁸ Iei mine Maria Maktalene a feila o üreni ekewe chon kaiö, “Üa küna ewe Samol!” A pwal apworausa ngeniir usun mine a eäni kapas ngeni.

Jesus a pwä ngeni nöün kewe chon kaiö

20.19-23

(Mat 28.16-20; Mark 16.14-18; Luk 24.36-49)

¹⁹ Iwe, lekuniolun ewe chök ränin, lon ewe aeuin ränin wiik, ekewe chon kaiö ra mwichfengen lon eu imw, nge ra lokeela asaman kewe, pun ra niuokusiti ekewe nöüwisen chon Juta. Mürin Jesus a feito, a ütâ lefler o üreniir, “Kinamwe epwe torikemi.” ²⁰ Mürin an apasatâ ekei kapas, a pwäri ngeniir pöün kewe me lepekin. Iwe, ekewe chon kaiö ra fokun pwapwa, pun ra küna ar we Samol. ²¹ Iwe, Jesus a kapasefäl ngeniir, “Kinamwe epwe torikemi! Usun Semei a tiniei, iei usun ngang üa tinikemi.” ²² Mürin än Jesus apasa ei, a ngasetiu wor o üreniir, “Oupwe angei ewe Ngünmifel. ²³ Are ämi oua amusala än eman tipis, epwe musala. Nge are ämi ousap amusala än eman tipis, esap musala.” ✱

Jesus me Tomas

20.24-29

²⁴ Iwe, Tomas a pwal iteni Lippwe, eman lein ekewe engol me ruoman chon kaiö, esap nom rer lupwen Jesus a wareitiir. ²⁵ Iei mine chiechian kewe chon kaiö ra asile ngeni, “Äm aia küna ach Samol!” Nge Tomas a pölüeniir, “Are üsap küna ekewe lemon chüfölon pöün o tikilong lon, are üsap pwal iseis pei won kinasen lepekin, üsap fokun lükülük.”

²⁶ Eu wiik mürin ekewe chon kaiö ra pwal mwichfengen lon ewe imw, nge Tomas a nom rer. Iwe, ekewe asam ra lokola, nge Jesus a feito, a ütâ lefler o üreniir, “Kinamwe epwe torikemi!” ²⁷ Mürin a üreni Tomas, “Kopwe atapa kinasen pei o nenengeniöchü, mürin kopwe aitiewu poumw o iseis won kinasen lepeki. Kosap chüen lükümwaramwar, nge kopwe chök lükü!” ²⁸ Iwe, Tomas a pölüeni, “Ai Samol me ai Kot!” ²⁹ Jesus a üreni, “Pokiten om ka künaei, ka lükü. Ra feiöch chokewe resap künakün, nge ra fen lükülük.”

Popun än ei Puk mak

20.30-31

³⁰ Iwe, Jesus a pwal föri chomong manaman me mwen mesen ekewe chon kaiö, nge resap makketiu lon ei puk. ³¹ Nge ekei manaman ra

✱ 20:23: Mat 16.19; 18.18

makketiu, pwe ämi oupwe lükü pwe Jesus ewe Kraist, ewe Nöün Kot, nge ren ämi lükü i oupwe eäni manau.

21

Jesus a pwä ngeni fūman chon kaiö

21.1-14

¹ Mürin ei pworaus, Jesus a pwal pwä ngeni nöün kewe chon kaiö arun ewe nomun Tiperias. Iei usun mine a fis: ² Simon Petrus, Tomas a pwal iteni Lippwe, Nataniel seni Kana lon Kalilea, nöün Sepeti kewe ruoman mwän pwal ruoman nöün Jesus kewe chon kaiö ra chufengen. ³ Iwe, Simon Petrus a üreni chiechian kewe, “Ngang üpwe feila attau.” Ra üreni, “Äm aipwe etuk.” Iei mine ra feila o tötä won efoch wa. Nge lon unusen ewe pwin resap liapeni eman. ✧

⁴ Iwe, lupwen akkar a tötä, Jesus a ütä lepi, nge ekewe chon kaiö resap silleni pwe i Jesus. ⁵ Mürin Jesus a kökköla rer, “Chiechiei kanan, ifa usun, ousap liap?” Ra pölüeni, “Apw.” ⁶ Jesus a üreniir, “Oupwe aturätü nöümi we chew lepelifichin wami na, iwe, oupwe liap.” Iei mine ra aturätü nöür we chew, nge resap chüen tongeni atekinatä won waar we, pun a chomong ik ra tup lon. ✧ ⁷ Mürin ewe chon kaiö Jesus a echeni a üreni Petrus, “Inan i ach Samol.” Lupwen Simon Petrus a rong pwe iwe i ar we Samol, a üföüfolong üfan seküt (pun a fen pwilitawu üfan we lupwen a attau) o aturätü lon ewe koluk. ⁸ Nge chiechian kewe chon kaiö ra fötül ngeni lepi o nukielong ewe chew mi ur ren ik. Resap toau seni wilifanü, pwe ina epwe ükükün ipükü iach chök. ⁹ Lupwen ra tiwelong wilifanü, ra küna eu ekkei mi kü, a wor ik won, pwal ekoch pilawa. ¹⁰ Jesus a üreniir, “Oupwe uwato ekoch liapemi kewe ik.” ¹¹ Simon Petrus a tötä won ewe wa, a atekinalong ewe chew mi ur ren ik mi watte o a ürätä lepi. Ükükün liaper ipükü lime me ülüman. Iei mwo ükükün chomongun ekewe ik, nge ewe chew esap kam. ¹² Iwe, Jesus a üreniir, “Ou etto, oupwe le mongön lesosor.” Esap wor eman me lein ekewe chon kaiö a tongeni ais, “En iö?” pun ra silei pwe i ewe Samol. ¹³ Mürin Jesus a kaneto, a angei ewe pilawa o ineti ngeniir, pwal ina chök usun mine a föri ngeni ekewe ik. ¹⁴ Iei aülüngatin fansoun än Jesus pwä ngeni ekewe chon kaiö mürin an manausefäl seni mäla.

Jesus me Petrus

21.15-19

¹⁵ Wesin ar mongön lesosor, Jesus a üreni Simon Petrus, “Simon, nöün Sona, ka echeniei lap seni ätekei?” Petrus a pölüeni, “Ewer, ai Samol, en ka silei pwe üa echenuk.” Jesus a üreni, “Kopwe amongöni nei kewe apanen sip.” ¹⁶ Jesus a aisini fän aruan, “Simon, nöün Sona, ka echeniei?” Petrus a pölüeni, “Ewer, ai Samol, en ka silei pwe üa echenuk.” Jesus a üreni, “Kopwe tümwünü nei kewe sip.” ¹⁷ Jesus a aisini fän aülüngatin, “Simon, nöün Sona, ka echeniei?” Petrus a letipeta, pun Jesus a aisini fän aülüngatin, “Ka echeniei?” Iei mine a üreni, “Ai Samol, en ka silei mettoch meinisin, ka silei pwe ngang üa echenuk.” Jesus a üreni, “Kopwe amongöü nei kewe sip.” ¹⁸ Enlet, üpwe wesewesen ürenuk: Lupwen om alüal ka soun ri lukalapom o feila ia ka mochen feila ie. Nge lupwen kopwe chinlap, kopwe aitiela poumw, nge eman epwe ri lukalapom o emwenukela ia kosap mochen feila ie.” ¹⁹ Jesus a apasatä ekei kapas

pwe epwe pwärätä met sokun mäla Petrus epwe mäli o alingala Kot ren. Mürin Jesus a üreni, “Kopwe tapweto müri.”

Jesus me ewe eman chon kaiö

21.20-24

²⁰ Iwe, Petrus a kul o küna ewe eman chon kaiö Jesus a echeni, pwe a tapwela mürir. Iei i ätewe mi roongeni Jesus lupwen ra mongön lekuniol o aisini, “Ai Samol, iö ewe epwe afangamä en?” ²¹ Lupwen Petrus a küna ätewe, a aisini Jesus, “Ai Samol, met epwe fis ngeni ätena?” ²² Jesus a pölüeni, “Are ngang üa mochen pwe epwe nonom tori ai üpwe liwinto, pwal met wewen ngonuk? Kopwe chök tapweto müri!” ²³ Iei mine a chöfeil ewe kapas lein ekewe chon kaiö, pwe ei eman chon kaiö esap mäla. Nge Jesus esap apasa pwe ätewe esap mäla, pwe a chök apasa, “Are üa mochen an epwe nonom tori ai üpwe liwinto, met pwal wewen ngonuk?” ²⁴ Iei i ewe chon kaiö mi pwärätä ekei mettoch, a pwal makkeetiu ekei mettoch. Iwe, kich sia silei pwe mine a pwärätä a let.

Kapasen lesopolan

21.25

²⁵ Iwe, Jesus a pwal föri chomong föför lükün ekei. Are iteiten eu me eu kewe föför repwe mak lon puk, üa ekieki pwe ekewe puk resap mwo nge fen kuch won unusen fanüfan.

Puken Föförün ekewe Soukünü

Kapas akom

I. Iten ei puk: Föför.

II. Chon makkei ei puk: Lukas ewe sousafei.

III. Itelapemongen ei puk: Uruwon me mämäritän ewe popun mwichefel.

IV. Kapas aüchean ei puk: Än Ngünmifel emweni ekewe soukünü lon ar angang.

V. Masouen ei puk: Ei puk Föförün ekewe Soukünü sopesopun ewe Pworausen Manau makkeen Lukas. Popun än Lukas makkei ei puk pwe epwe apworausä usun än nöün Jesus kewe chon kaiö ra apworausafeili ewe Pworausen Manau usun Jesus fän emwenien Ngünmifel. Ra föri ei angang “lon Jerusalem, lon unusen Jutea me Samaria tori lon unusen fanüfan” (1.8). Iei ewe pworaus usun mwökütükütün souläng mi popuetä lein ekewe chon Juta o a sopesopola tori a wiliti eu lamalamen lükü Jesus fän iten unusen fanüfan. Ewe chon makkei ei puk a mochen aweweöchü ngeni ekewe chon aleani pwe ekewe souläng resap eu mwichen afitikoko ngeni ewe Mwün Rom, a pwal afatöchü pwe än ekewe souläng lükü Jesus a wesewesen aunusöchüela ewe lamalamen chon Juta.

Ei puken Föför a kinikinitiu lon ülüngat kinikin mi afata chöülan afalafalen ewe Pworausen Manau usun Jesus pwal fisitän ewe mwichefel: (1) Poputän mwökütükütün souläng lon Jerusalem müirin än Jesus feitä läng. (2) Chöülan ewe mwökütüküt a pwal tori ekoch kinikinin ewe fanü Palestain. (3) A pwal chöüla ngeni ewe Mataulap, pwal tori Rom.

Angangen Ngünmifel iei aüchean lon ei puken Föför. Ngünmifel a feitiu won ekewe chon lükü lon Jerusalem lon ewe ränin Pentikost o sopwela le emweni o apöchöküla ewe mwichefel me ekewe souakomwen mwichefel, usun mine a pwä lon unusen ei puk. Än ekewe souläng akom afalafal a malap lon ekoch afalafal, nge ekewe pworaus mi makketiu lon ei puken Föför ra pwärätä manamanen ekei afalafal lon manauen ekewe chon lükü pwal lon än ekewe souläng chiechifengen lon mwichefel.

VI. Tettelin masouen ei puk:

Fansoun amol ren ekewe chon pwärätä 1.1-26

a) Amüchülan än Jesus allük me an pwon ngeni nöün kewe chon kaiö 1.1-14

b) Ewe eman mi siwili Jutas 1.15-26

Ewe angangen pwärätä lon Jerusalem 2.1-8.3

Ewe angangen pwärätä lon Jutea me Samaria 8.4-12.25

Än Paulus angang 13.1-28.31

a) Aeuin an sai le arongafeili ewe Pworausen Manau 13.1-14.28

b) Ewe mwichelap lon Jerusalem 15.1-35

c) Aruuen an sai le arongafeili ewe Pworausen Manau 15.36-18.22

d) Aülüngatin an sai le arongafeili ewe Pworausen Manau 18.23-21.16

e) Paulus eman chon fötek lon Jerusalem, Seserea me Rom 21.17-28.31

Kapas akom

1.1-5

¹ Ngeni en Achengicheng olowe Teofilus: Lon aeuin nei we toropwe üa makkeetiu usun ekewe mettoch meinisin Jesus a föri me an kewe afalafal, seni ewe fansoun a popuetäni an angang * ² tori ewe rän a feilunusetä läng. Nge mwen an feilunusetä a atowu kapasen öüröür fän manamanen Ngünmifel ngeni ekewe mwän a fliiretä pwe repwe nöün soukünü. ³ Lon ükükün faik rän mürin an mäla a pwä ngeniir fan chomong lon chomong sokun lapalap mi alletätä ngeniir pwe a wesewesen manau. Ra küna i, nge i a kapas ngeniir usun ewe Mwün Kot. ⁴ Iwe, lupwen a nonom rer, a allük ngeniir, “Ousap feil seni Jerusalem, nge oupwe witiwiti ewe lifang Semei a fen pwon ngenikemi, usun üa fen ürenikemi. * ⁵ Pun Johannes a papataisi aramas ren koluk, nge mürin ekoch rän ämi oupwe papataisi ren Ngünmifel.” *

Jesus a feilunusetä läng

1.6-11

⁶ Iwe, lupwen ekewe soukünü ra chufengen me Jesus, ra aisini, “Äm Samol, ifa usun, kopwe aliwinisefäli ngeni Israel Mwün we lon ei fansoun?” ⁷ Jesus a pölüeniir, “Esap wisemi pwe oupwe silei fansoun me ränin, pwe wisen chök Semei an epwe akota. ⁸ Nge ämi oupwe angei ewe manaman lupwen Ngünmifel epwe feitiu womi, iwe, oupwe pwäriei lon Jerusalem, lon unusen Jutea me Samaria tori lon unusen fanüfan.” * ⁹ Iwe, lupwen Jesus a wes le apasatä ekei kapas, a feilunusetä läng lupwen ar nenengeni. Iwe, eu kuchu a amonala seniir. * ¹⁰ Nge ra chök nenetä läng lupwen a feil seniir. Iwe, lon ewe chök otun ruoman mwän mi üföüf üf mi pwechepwech ra ütä ünüküür ¹¹ o ra üreniir, “Ämi re Kalilea, pwota oua ü ikei o nenetä chök läng? Ewe Jesus mi feil senikemi o feitä läng epwe liwinsefälito lon ewe chök lapalap oua küna lon lupwen a feitä läng.”

Ewe eman mi siwili Jutas

1.12-26

¹² Mürin ekewe soukünü ra feitiu me won ewe Chukun Olif o liwinsefäliti Jerusalem, toauen ewe Chukun Olif seni ewe telinimw ina epwe ükükün esop mwait. ¹³ Iwe, lupwen ra tolong lon Jerusalem, ra feitä lon ewe ruum ia ra nonom ie. Ätekewe mi nom lon ei ruum: Petrus, Johannes, James me Andru, Filip me Tomas, Partolomeus me Mateus, James nöün Alfäus, Simon i eman Selot * me Jut nöün James. * ¹⁴ Ir meinisin ra tipeeu le chufengen o ikiotek fiti ekoch fefin me Maria inen Jesus me pwiiin kewe.

¹⁵ Ekoch rän mürin a fis eu mwichen chon lükülük, ina epwe ükükün ipükü rüwe. Iwe, Petrus a ütä lefiler ¹⁶ o apasa, “Ämi pwii kana, mine a mak lon ekewe Toropwe mi Pin a pwönüetä usun mine Ngünmifel a apasa ren Tafit, lupwen a osuni usun Jutas, ätewe mi emweni chokewe mi fötekini Jesus. ¹⁷ Jutas eman me lon ach mwich, a filitä an epwe wor wisan lon ach angang.” ¹⁸ (Ewe moni Jutas a angei fän iten an föföör mi ngau ra möni ngeni eu fanü. Ikenan a turutiü o mäla, a mökküfesen

* **1:1:** Luk 1.1-4 * **1:4:** Luk 24.49 * **1:5:** Mat 3.11; Mark 1.8; Luk 3.16; Joh 1.33 * **1:8:** Mat 28.14; Mark 16.15; Luk 24.47-48 * **1:9:** Mark 16.19; Luk 24.50-51 * **1:13:** wewen Selot: eman aramas mi ekimongei feiöchün fanüan * **1:13:** Mat 10.2-4; Mark 3.16-19; Luk 6.14-16

lukan pwe afan ra seliseliwu. ¹⁹ Ekewe aramas meinisin lon Jerusalem ra rong usun, iei mine ra aita ngeni ewe fanü Akeltama, lon püsin ar kapas, wewen “Fanüen Cha”.) ✱

²⁰ “Pun a mak lon ewe puken Kölfel,
‘Amwo imwan epwe pönüla,

esap fokun wor eman epwe asoi.’ A pwal mak,

‘Amwo eman epwe siwili lon wisan.’ ✱ ²¹ Iei mine a öch ach sipwe filätä eman me lein ekei mwän mi etikich lon unusen fansoun ach Samol Jesus a nom rech. ²² Eman a fokun nom rech seni ewe fansoun Johannes a popuetä le föri an angangen papatais tori ewe rän Jesus a feil senikich o feitä läng. Pun eman me lein ätekei epwe fokun etikich le pwärätä pwe Jesus a manausefäl.” ✱ ²³ Iwe, ra atolonga iten ruoman mwän: Josef mi pwal iteni Parsapas (pwal itan Justus) me Matias. ²⁴ Mürin ra iotek, “Äm Samol, en ka silei mine a nom lon leluken aramas meinisin. Kopwe pwäri ngenikem iö lein ekei ruoman en ka filätä ²⁵ pwe epwe tolong lon ewe wisen Soukünü siwilin Jutas, ätewe mi feila ngeni ewe leni ia epwe wesewesen nom ie.” ²⁶ Mürin ra föri ewe angangen üttüt won ekewe ruoman mwän. Iwe, ra ütti Matias. Ätei a pach ngeni ewe mwichen ekewe engol me ruoman soukünü.

2

Ngünmifel a war

2.1-13

¹ Iwe, lupwen a tori ewe ränin Pentikost, ekewe chon lükü Jesus meinisin ra chufengen lon eu leni. ✱ ² Iwe, a müttir fis eu ngüngü seni läng mi wewe ngeni ngüngün asepwäl mi pöchökül, a aurala unusen ewe imw ia we ra motfengen ie. ³ Mürin ra küna chön mongö usun ekei mi parasefil, a feitiu won eman me eman ekewe aramas mi nom ikenan. ⁴ Iwe, ir meinisin ra urela ren Ngünmifel o ra popuetä le kapas lon kapasen ekis usun Ngünmifel a amwelielie.

⁵ A wor chon Juta mi niuokusiti Kot, ra nom lon Jerusalem, ra feito seni ekewe fanü meinisin won fanüfan. ⁶ Lupwen ra rong ei ngüngü, eu mwichen aramas mi chomong ra chufengen. Ir meinisin ra rükö, pun eman me eman leir a rong än ekewe chon lükü kapas lon en me kapasen fanüan. ⁷ Ra fokun mairü o weitifengenir o ra apasa, “Ifa usun, ekei mwän meinisin mi kapas lon ekei sokun kapas, esap ir re Kalilea? ⁸ Nge pwota chök pwe oukich meinisin sia rongorong ar kapas lon en me kapasen fanüach kewe sia uputiu lon? ⁹ Sia feito seni Partia, Metia me Elam, seni Mesopotamia, Jutea me Kapatosia, seni Pontus me Asia, ¹⁰ seni Frikia me Pamfilia, seni Isip me ekewe fanü lon Lipia arap ngeni Kirene. Ekoch me leich sia feito seni Rom, ¹¹ kich chon Juta me chon lükün Israel mi etiwa ewe lamalamen chon Juta. Ekoch me leich sia pwal feito seni Kreta me Arapia, nge oukich meinisin sia rongorong ar kapas lon kapasen fanüach kewe usun ekewe mettoch mi amwarar Kot a föri.” ¹² Pokiten ar mairü me osukosuk ra aisfengen lefiler, “Epwe met wewen ei sokun lapalap?” ¹³ Nge ekoch aramas ra takiri ekewe chon lükü Jesus o apasa, “Ekei aramas ra pulas.”

✱ **1:19:** Mat 27.3-8 ✱ **1:20:** Kölf 69.25; 109.8 ✱ **1:22:** Mat 3.16; Mark 1.9; 16.19; Luk 3.21; 24.51 ✱ **2:1:** Lif 23.15-21; Tut 16.9-11

Än Petrus afalafal

2.14-42

¹⁴ Mürin Petrus a ütä fiti ekewe engol me eman soukünö o a popuetä le kapas leüömong ngeni ewe mwichen aramas, “Ämi pwii kana chon Juta me ämi meinisin mi imweimw lon Jerusalem, oupwe aüselingaei o mwüt ngeniei ai üpwe awewe ngenikemi wewen ei lapalap. ¹⁵ Ekei aramas resap pulas usun oua ekieki. Ekärän chök kulok tiu lesosor. ¹⁶ Nge iei usun met ewe soufos Sowel a kapas usun:

¹⁷ ‘Kot a apasa: Iei usun met üpwe föri lon ekewe ränin sopolan.

Ngang üpwe tinato Ngüni won aramas meinisin.

Nöümi mwän me fefin repwe osuni,

nöümi alüal epwe wor künaer,

ekewe chinlap mwän me leimi repwe soutatan.

¹⁸ Pwal mwo nge nei chon angang mwän me fefin

üpwe tinatiu Ngüni wor lon ekana rän, pwe repwe arongafeili ai kewe kapas.

¹⁹ Üpwe awarato manaman seni läng

o föri asisil won fanüfan.

Epwe wor cha me ekkei me kuchu mi ötüöt usun ötüötün ekkei.

²⁰ Akkar epwe rochola, nge maram epwe wiliti cha,

mwen epwe war ränin ewe Samol, ewe rän mi lap o ling.

²¹ Nge iö epwe köri iten ewe Samol epwe manau.’ ✧

²² “Ämi aramasen Israel, oupwe rong ekei kapas: Jesus seni Nasaret, eman aramas mi wor an pwüüng me ren Kot, usun a pwä ngenikemi ren ekewe tufich me manaman me asisil Kot a föri ren Jesus. Oua püsin silei usun ei, pun ra fis ikei lefilemi. ²³ Püsin än Kot akot ei a fen apwüngala, pwe Jesus epwe oolong lepöümi, nge ämi oua niela ren ämi mwüt ngeni ekewe aramas mi tipis pwe repwe iräpengesi. ✧ ²⁴ Nge Kot a amanauasefäli seni mäla. A angasala i seni manamanen mäla, pun esap tufich pwe mäla epwe amwöchü i. ✧ ²⁵ Pun Tafit a kapas usun,

‘Üa küna ewe Samol, a nom mwen mesei fansoun meinisin.

A arap ngeniei, pwe üsap osukosuk.

²⁶ Iei mine letipei a fokun mwanek,

ai kewe kapas ra uren pwapwa.

Inamwo ika ngang eman aramas epwe mäla,

üpwe chök kinamwe lon ai apilükülüköch.

²⁷ Pun en kosap likitieila lon lenien ekewe mi mäla,

kosap pwal mwüt ngeni Noumw we mi Pin epwe mach inisin lon peiasan.

²⁸ En ka aiti ngeniei ewe alen manau.

Om nonom rei a afisätä ai pwapwa mi lapalap.’ ✧

²⁹ “Ämi pwii kana, üpwe kapas ngenikemi o afataöchü usun ach we lewo mi iteföüla King Tafit. A mäla o peias, nge peiasan a chüen nonom rech ikei tori ikenai. ³⁰ I eman soufos a silei met Kot a eäni pwon ngeni: Kot a pwon fän akapel pwe epwe awora eman mwirimwirin Tafit pwe epwe king, usun chök Tafit. ✧ ³¹ Tafit a küna met Kot epwe föri lon ekewe

✧ 2:21: Sow 2.28-32 ✧ 2:23: Mat 27.35; Mark 15.24; Luk 23.33; Joh 19.18 ✧ 2:24: Mat 28.5-6; Mark 16.6; Luk 24.5 ✧ 2:28: Kölf 16.8-11 ✧ 2:30: Kölf 132.11; 2.Sam 7.12-13

fansoun repwe feito, iei mine a kapas usun manausefälin ewe Kraist lupwen a apasa,

‘Esap likilik lon lenien ekewe mi mäla,

inisin esap mach lon peiasan.’ ³² Iwe, Kot a amanauasefäli ätei Jesus seni mäla, nge äm meinisin aia chon pwärätä pwe a wesewesen fis ei. ³³ Jesus a tekiatä o nom lepelifichin Kot Saman we, a angei seni Kot ewe Ngünmifel, usun a fen pwon ngeni. Iwe, met oua küna iei o rongorong, iei an we lifang a tinatiu woch. ³⁴ Pun Tafit esap püsin feitä läng, nge a apasa,

‘Ewe Samol a kapas ngeni ai Samol:

Kopwe mottiu lepelifichi,

³⁵ tori üpwe anomu chon oputom

pwe repwe lenien puun pecheöm.’ ✧ ³⁶ Iei mine ekewe chon Israel meinisin repwe fokun silei, pwe ätei Jesus ämi oua iräpengesi, i ätewe Kot a seikätä pwe epwe Samol me Kraist!”

³⁷ Lupwen ekewe aramas ra rongorong ekei kapas, a el letiper o ra aisini Petrus me ekewe ekoch soukünü, “Ämi pwiich kana, met äm aipwe föri.” ³⁸ Petrus a pölüeniir, “Ämi meinisin oupwe aier seni ämi tipis kana o papatais ngeni ifen Jesus Kraist, pwe ämi tipis kana repwe musala. Iwe, oupwe angei an Kot we lifang, ewe Ngünmifel. ³⁹ Pun iei met Kot a fen pwon ngenikemi me nöümi kana pwal ngeni chokewe meinisin mi toau, ir meinisin ewe Samol ach we Kot a püsin körireto ren.” ⁴⁰ Petrus a fönöü ir ren chomong kapas, a pese ngeniir o apasa, “Oupwe amanauakemi seni ewe feiengau epwe tori ei täppin aramas mi ngau!” ⁴¹ Iwe, chomong me leir ra lükü an afalafal o ra papatais. Lon ewe rän ina epwe ükükün ülüngat ngeröü aramas ra pach ngeni ewe mwichen chon lükü Jesus. ⁴² Ra likitü le kaiö seni mine ekewe soukünü ra aiti ngeniir, ra likitü lon ar chiechifengen o mongöfengen ewe mongön ach Samol me ikiotekfengen.

Usun än ekewe chon lükülük nonomfengen

2.43-47

⁴³ Iwe, chomong asisil me manaman ra fis ren ekewe soukünü, o ekewe aramas ra fokun mairü ren. ⁴⁴ Ekewe chon lükülük meinisin ra chök sowwela lon ar chiechifengen o alilifengen lefiler won pisekir. ✧ ⁴⁵ Ra amömöla fanüer me pisekir o ra ineti lefiler ewe moni ra angei won ükükün met eman me eman a osupwang ren. ⁴⁶ Iteiten rän ra tipeeufengen le mwichfengen lon ewe imwenfel, ra mongöfengen lon imwer fän pwapwa me tipetekison. ⁴⁷ Ra mwareiti Kot, ra pwal küna chen me ren ekewe aramas meinisin. Iwe, iteiten rän ewe Samol a apacha ngeni ar we mwich aramas mi küna manau.

3

Petrus me Johannes ra apöchöküla eman mwän mi pechemä

3.1-10

¹ Lon ewe rän Petrus me Johannes ra feila ren ewe imwenfel lon fansoun iotek kulok ülüngat leolopal. ² Iwe, eman mwän mi pechemä seni leuputuan a mot ünükün ewe asamen imwenfel mi iteni “Asamalap mi echipwör”. Iteiten rän aramas ra uweeto i ünükün ei asalalap pwe epwe tütüngor moni seni ekewe aramas mi tolong lon ewe imwenfel. ³ Lupwen ätei a küna pwe Petrus me Johannes repwe le tolong lon ewe imwenfel, a

tüngor rer pwe repwe ngeni och. ⁴ Iwe, ra newenewen ngeni, nge Petrus a üra, “Kopwe nenengenikem!” ⁵ Iei mine ei mwän a nenengeniir, pun a ekieki pwe epwe angei och seniir. ⁶ Nge Petrus a üreni, “Esap wor moni rei, nge mine a wor rei üpwe ngonuk: Fän iten Jesus Kraist seni Nasaret üpwe ürenuk kopwe ütä o fetal!” ⁷ Mürin Petrus a amwöchü pöüfichin ewe mwän o aütai. Iwe, lon ewe chök otun pechen me lekupukupun pechen ra pöchökületä. ⁸ Iwe, a mwetetä, a ütä won pechen o popuetä le fetal. Mürin a eti Petrus me Johannes le tolong lon ewe imwenfel, a fetal, a mwetemwet o mwareiti Kot. ⁹ Iwe, unusen ewe mwichen aramas ra küna an fetal o mwareiti Kot. ¹⁰ Nge lupwen ra asilla pwe i ewe chon tütüngor mi momot ünükün ewe imwenfel ren ewe Asamalap mi echipwör, ir meinisin ra mairü o weitifengeniir ren mine a fis ngeni.

Än Petrus afalafal me lon ewe imwenfel

3.11-26

¹¹ Lupwen ewe mwän a chök fitipacheiti Petrus me Johannes lon ewe leni itan “Pwalangen Salomon”, ekewe aramas meinisin ra mairü o ra säto rer. ¹² Iwe, lupwen Petrus a küna ekewe aramas, a üreniir, “Ämi aramasen Israel, pwota oua fokun mairü ren mine a fis, pwota oua nefotofot ngenikem? Oua ekieki pwe ren äm manaman me äm soulängöch aia tongeni apöchökülätä ei mwän pwe a tongeni fetal?” ¹³ Än Apraham, Isaak me Jakop we Kot, än ach kewe lewo we Kot a alingala nöün Chon Angang Jesus. Nge ämi oua atolonga lepöün ekewe souemwenin chon Juta o amamäsini i me mwen Pilatus, oua fen mwo nge föri ei, lupwen Pilatus a ekiekin angasala i. ✱ ¹⁴ Jesus a pin o pwüng, nge ämi oua amamäsini i o tüngor ngeni Pilatus pwe epwe angasa ngenikemi ewe chon niela aramas. ✱ ¹⁵ Ämi oua niela ätewe mi emweni aramas ngeni manau. Nge Kot a amanauasefäli seni mäla o äm aia chon pwärätä pwe a fis ei. ¹⁶ Ren manamanen iten Jesus ei mwän mi pechemä a pöchökületä. Met oua küna o silei a fis pokiten äm aia lükü itan. Ren äm lükü Jesus a fis pwe ei mwän a wesewesen pöchökületä usun ämi meinisin oua küna.

¹⁷ “Ämi pwii kana, iei üa silei pwe met ämi me nöümi souemwen oua föri ngeni Jesus, oua föri pokiten ämi silemang. ¹⁸ Nge iei usun Kot a apwönüetä met a fen apasa me lomlom ren ekewe soufos meinisin, lupwen a apasa pwe nöün we Kraist epwe küna riaföü. ¹⁹ Oupwe ekieksefäl o kul ngeni Kot, pwe ämi tipis epwe mola, ²⁰ pwe Kot epwe awora ngenikemi eu fansoun ngünümi epwe küna pöchökül. Epwe tinato Jesus, i ewe Kraist, Kot a fen filätä fän itemi. ²¹ Jesus epwe chök nom lon läng tori epwe war ewe fansoun pwe ekewe mettoch meinisin repwe försefäl, usun Kot a fen apasa me lomlom ren nöün kewe soufos mi pin. ²² Pun Moses a apasa, ‘Ewe Samol ämi we Kot epwe tinato eman soufos usun chök ngang, i eman seni püsün aramasemi. Oupwe fokun aleasochisi meinisin mine a ürenikemi pwe oupwe föri. ✱ ²³ Nge eman esap aleasochis ngeni ena soufos epwe käriwu seni aramasan.’ ✱ ²⁴ Iwe, ekewe soufos, pwal Samuel me chokewe mi tapw me mürin, ir meinisin mi afalafal, ra fen kapas usun met epwe fis lon ekei rän. ²⁵ Än Kot kewe pwon nöün kewe soufos ra aronga ra fän itemi, nge ämi oua pachelong lon ewe pwon, Kot a föri ngeni ämi kewe lewo, usun Kot a

kapas ngeni Apraham, ‘Üpwe afeiöchü aramasen fanüfan meinisin ren mwirimwirum.’ ✧ 26 Iei usun Kot a filätä nöün Chon Angang o tinato akom remi, pwe epwe afeiöchükemi ren an alisikemi pwe ämi meinisin oupwe kul seni ämi föföör mi ngau.”

4

Petrus me Johannes ra ü me mwen ewe mwichen soupwüing
4.1-22

¹ Iwe, lupwen Petrus me Johannes ra chüen kakapas, ekewe souasor, ewe meilapen chon tümwünü imwenfel me ekoch Satusi ra war. ² Ra song pokiten ekewe ruoman soukünü ra afalafala ngeni ekewe aramas pwe Jesus a manausefäl seni mäla, ei a alletätä pwe ekewe mi mäla repwe manausefäl. ³ Iei mine ra turufiir o atururelong lon imwen fötek tori sorotän ewe rän, pun a fen lekuniolula. ⁴ Nge chomong aramas mi rongorong ngeni ar afalafal ra lükü. Iwe, iteiter fengen meinisin ina epwe ükükün limungeröü mwän.

⁵ Iwe, sorotän ewe rän ekewe souemwenin chon Juta, ekewe souakom me ekewe Sensen Allük ra chufengen lon Jerusalem. ⁶ Anas, ewe Souasor mi Lap, Kaifas, Johannes, Aleksanter me pwal ekoch mwän seni familien ewe Souasor mi Lap ra pwal nom lon ewe mwich. ⁷ Iwe, ra emwenato Petrus me Johannes me mwer o popuetä le kapas ais ngeniir, “Fän meni manaman ika fän meni it ämi oua föri ei?” ⁸ Mürin Petrus mi ur ren Ngünmifel a pölüeniir, “Ämi souemwenin ekewe aramas me souakom: ⁹ Are ämi oua atittinakem usun ewe föföör mi mürina aia föri ngeni ewe mwän mi pechemä o ifa usun an küna pöchökül, ¹⁰ mürin ämi meinisin oupwe silei, pwal ekewe chon Israel meinisin repwe silei, pwe ei mwän mi ütä mwemi ikei a wesewesen pöchökül ren manamanen iten Jesus Kraist seni Nasaret, ätewe oua iräpengersi, nge Kot a amanauasefäli seni mäla. ¹¹ Iwe, Jesus i ätewe ekewe Toropwe mi Pin ra kapas usun, ‘Ewe fau ekewe chon kaü imw ra pöütala

a wiliti eföü fau mi fokun aüchea seni meinisin.’ ✧ ¹² Aramas repwe küna manau ren Jesus chök. Pun esap fokun wor pwal eu it won fanüfan Kot a ngeni aramas, pwe sipwe küna manau ren.”

¹³ Iwe, chon ewe mwichen soupwüing ra mairü lupwen ra küna än Petrus me Johannes pworacho, ra pwal silei pwe ir aramas resap fiti sukul. Iwe, ra mefi pwe ir fen chiechien Jesus. ¹⁴ Nge esap wor och mine repwe tongeni apasa, pun ra küna ewe mwän mi pöchökületa o ü ikenan ren Petrus me Johannes. ¹⁵ Iei mine ra üreniir, pwe repwe towu seni ewe ruum ia chon ewe mwichen soupwüing ra mwich ie. Mürin ra pwüingüpwüingfengen lefiler. ¹⁶ Iwe, ra ais, “Met sipwe föri ngeni ekei mwän? Aramas meinisin lon Jerusalem ra silei pwe ei manaman mi fokun amwarar a fis rer, nge sisap tongeni aopala. ¹⁷ Nge iei met sipwe föri, pwe ei pworaus esap chöfetal lein aramas. Sipwe fönöü ngeni ekei aramas, pwe resap fokun chüen kapas ngeni eman aramas usun ewe it Jesus.” ¹⁸ Mürin ra körisefäliirelong o allük ngeniir, pwe resap fokun kapas ika afalafal usun ewe it Jesus. ¹⁹ Nge Petrus me Johannes ra pölüeniir, “Oupwe püsin apwüingü are a pwüing mwen mesen Kot ach sipwe aleasochis ngenikemi mwen ach aleasochisi Kot. ²⁰ Pun am aisap tongeni ükütiu le kapas won met aia püsin küna o rongorong.” ²¹ Iwe,

chon ewe mwichen soupwüing ra fokun pöchökül le eniwer, pwe resap chüen afalafal, mürin ra amuserela. Resap küna och popun mine repwe ariaföüür ren, pun ekewe aramas ra mwareiti Kot ren mine a fis. ²² Pun ierin ewe mwän mi pöchökületä ren ewe manaman a fen lap seni faik ier.

Än ekewe chon lükü iotek
4.23-31

²³ Lon ewe chök otun Petrus me Johannes ra ngasala, ra liwiniti ar we mwich o apworausa ngeniir meinisin mine ekewe souasor mi lap me ekewe souakom ra üreniir. ²⁴ Iwe, lupwen ekewe chon lükü ra rong ei pworaus, ir meinisin ra tipeefungen le iotek ngeni Kot: “Äm Samol, en ka föri läng me fanüfan me matau o meinisin mine a nom lor! ✧ ²⁵ Fän emwenien Ngünmifel en ka kapas ren äm we lewo Tafit, noumw chon angang lupwen a apasa,

‘Pwota ekewe chon lükün Israel ra fokun lingeringer?

Pwota chon ekewe mwü ra föri ar raw mi lomotongau?

²⁶ Ekewe kingen fanüfan ra amoleeretä,

nge ekewe samol ra chufengen pwe repwe ü ngeni ewe Samol me nöün we Kraist.’ ✧ ²⁷ Pun iei usun mine a fis: Herotes me Pontius Pilatus ra mwichfengen me ekewe chon lükün Israel me ekewe aramasen Israel lon ei telinimw ar repwe ü ngeni Jesus noumw Chon Angang mi pin, ätewe en ka epiti. ✧ ²⁸ Ra chufengen ar repwe föri meinisin mine en ka fen akota fän om manaman me letipom an epwe pwönüetä. ²⁹ Äm Samol, iei kopwe ekieki ar kapasen eniweniw o atufichi noumw kei chon angang pwe repwe afalafala om kapas fän pwora. ³⁰ Kopwe pwärala om pöchökül pwe chon samau repwe pöchökületä, kopwe mwütätä pwe asisil me manaman repwe fis ren iten Jesus noumw we Chon Angang mi pin.” ³¹ Iwe, lupwen ra wes le iotek ewe leni ia ra mwichfengen ie a mwökütüküt. Ir meinisin ra urela ren Ngünmifel o ra popuetä le asilefeili än Kot kapas fän pwora.

Ekewe chon lükülük ra alilifengen won pisekir
4.32-37

³² Iwe, ewe mwichen chon lükü Jesus ra ekiekeu me tipeeu. Esap fokun wor eman leir epwe apasa, pwe mine a wor ren epwe an chök, nge ra alilifengen lefiler won meinisin mine ra eäni. ✧ ³³ Fän manaman mi lapalap ekewe soukünö ra pwärätä pwe ewe Samol Jesus a manausefäl seni mäla, o Kot a fokun afeiöchüür meinisin. ³⁴ Esap fokun wor eman me lon ewe mwich a osupwang. Chokewe mi wor fanüer ika imwer ra amömörela, nge ewe moni ra angei fän iten fanüer are imwer ra uwato ³⁵ o ngeni ekewe soukünö. Iwe, ei moni ra aineti ngeni eman me eman leir won ükükün mine a osupwang ren.

³⁶ Iwe, a wor eman mwän itan Josef seni ewe ainangen Lefi, a uputiu lon ewe fanü Saipros, ekewe soukünö ra pwal aita ngeni Parnapas (wewen ei it: Eman mi apöchöküla letipen aramas). ³⁷ Ätei a amömöla fanüan, nge liwinin ei fanü a uwato o ngeni ekewe soukünö.

✧ 4:24: Eks 20.11; Ne 9.6; Kölf 146.6 ✧ 4:26: Kölf 2.1-2 ✧ 4:27: Mat 27.1-2; Mark 15.1; Luk 23.1,7-11; Joh 18.28-29 ✧ 4:32: Föf 2.44-45

5

*Ananias me Safira ra mäfeingau**5.1-10*

¹ Nge a wor eman mwän itan Ananias, i me pwülüan itan Safira ra amömöla eu kinikin seni fanüer. ² Iwe, pwülüan ei a tipeeu ngeni an epwe aopala och seni ewe moni fän itan, nge ewe lusun a ngeni ekewe soukünü. ³ Mürin Petrus a üreni, “Ananias, pwota ka mwüt ngeni Satan pwe epwe nemeni letipom, pwe ka chofona ngeni Ngünmifel ren om aopala och seni ewe moni ka angei fän iten fanüom we? ⁴ Ifa usun, esap fanüom mwen om ka amömöla? Nge mürin om amömöla ewe moni esap noumw? Pwota ka ekiëkin föri ei sokun lapalap? Kosap chofona ngeni aramas, pwe ka chofona ngeni Kot.” ⁵ Lon ewe chök otun Ananias a rong ekei kapas, a turula o mäla. Iwe, ir meinisin mi rongorong usun mine a fis ngeni, ra fokun rükö. ⁶ Mürin ekoch alüal ra ütä o tükümala somän we, ra ekiewu lükün o peiaseni.

⁷ Ina epwe ülüngat awa mürin pwülüan we a feito, nge esap silei mine a fis. ⁸ Iwe, Petrus a aisini, “Kopwe üreniei ika iei unusen ewe moni en me pwülüom oua angei fän iten fanüemi we?” Neminewe a pölüeni, “Ewer, ina chök ükükün.” ⁹ Iei mine Petrus a üreni, “Pwota en me pwülüom oua tipeeufengen le sotuni Ngünün ewe Samol? Nengeni, ekewe alüal mi peiaseni pwülüom we ra nom lükün ewe asam iei, repwe pwal ekiëkewu!” ¹⁰ Lon ewe chök otun neminei a turula arun pechen Petrus o mäla. Iwe, ekewe alüal ra tolong o küna pwe Safira a mäla. Iei mine ra pwal ekiewu o peiaseni ünükün pwülüan we. ¹¹ Iwe, unusen chon ewe mwichefel me meinisin mi rongorong usun ei pworaus ra fokun rükö.

*Ekewe manaman me asisil**5.12-16*

¹² Iwe, ekewe soukünü ra föri chomong manaman me asisil me lein ekewe aramas. Ekewe chon lükü meinisin ra mwichfengen lon ewe leni itan “Pwalangen Salomon.” ¹³ Esap wor eman me lükün ar we mwich a pwora le chu ngeniir, inamwo ika ekewe aramas ra menitiir o kapasöch usur. ¹⁴ Nge a chomongola mwän me fefin ra lükü ewe Samol o pach ngeni ewe mwich. ¹⁵ Pokiten mine ekewe soukünü ra föri, aramas ra ekieto chon samau won ekewe al o alenier won peet me kiek, pwe are Petrus epwe pwereto o pwere seniir, nürün epwe tori ekoch me leir. ¹⁶ Iwe, chomong aramas ra feito seni ekewe telinimw mi nom ünükün Jerusalem, ra ekieto ekewe mi samau ika chokewe mi wor ngününgau wor. Iwe, ir meinisin ra pöchökületä.

*Ekewe Soukünü ra küna riaföü**5.17-42*

¹⁷ Mürin ewe Souasor mi Lap me chiechian kewe meinisin, ir chon ewe mwichen Satusi, ra fokun lolowoiti ekewe soukünü. ¹⁸ Iwe, ra turufiir o atururelong lon imwen fötek. ¹⁹ Nge lepwin eman nöün ewe Samol chon läng a suki asamen ewe imwen fötek o emwenawu ekewe soukünü me lon. Iwe, a üreniir, ²⁰ “Oupwe feila o ütä lon ewe imwenfel o afalafala ngeni ekewe aramas meinisin usun ei manau mi fö.” ²¹ Iwe, ekewe soukünü ra aleasochisi alon ewe chon läng. Lupwen a ränila ra tolong lon ewe imwenfel o popuetä le afalafal. Lupwen ewe Souasor mi Lap me chiechian kewe ra war, ra körifengeni ekewe souakomwen chon Israel meinisin pwe epwe le fis eu mwichen soupwüng. Mürin

ra tinala ekoch chon mas lon ewe imwen fötek, pwe repwe emwenato ekewe soukünü me mwer. ²² Nge lupwen ra tori ewe imwen fötek, resap kúna ekewe soukünü. Iei mine ra liwinsefáliti ewe mwichen soupwüng o apworaus ngeniir mine a fis, ²³ “Lupwen sia tori ewe imwen fötek, sia kúna pwe ekewe asam ra lokola o ekewe chon mas ra masafichi ekewe asamalap. Nge lupwen sia suki ekewe asam, esap wor eman a nom lon.” ²⁴ Iwe, lupwen ekewe souasor mi lap me ewe meilapen chon tümwünü imwenfel ra rongorong ei pworaus, ra mairü ren met a fis ngeni ekewe soukünü. ²⁵ Mürin eman mwän a war o üreniir, “Nengeni, ekewe mwän oua atururelong lon imwen fötek ra nom lon imwenfel o afalafala ekewe aramas.” ²⁶ Iei mine ewe meilap fiti ekewe chon tümwünü imwenfel ra feila o emwenisefálieto ekewe soukünü. Nge resap pöchökül ngeniir, pun ra niuokus ika ekewe aramas repwe mone ngeniir fau. ²⁷ Ra emweniirelong lon ewe inw o aütaar mwen ewe mwichen soupwüng, nge ewe Souasor mi Lap a kapas ais ngeniir. ²⁸ A üreniir, “Äm aia allük pöchökül ngenikemi pwe ousap chüen afalafal mine ei mwän a aiti ngenikemi. Oupwe nengeni met oua föri! Oua achöfetalei ämi afalafal lon unusen Jerusalem, oua pwal ekiëkin atipisikem ren än ei mwän mäla.” ☆ ²⁹ Iwe, Petrus me ekewe ekoch soukünü ra pölüeni, “Äm aipwe chök aleasochisi Kot lap seni äm aleasochisi aramas. ³⁰ Än ach ewe lewo we Kot a amanauasefáli Jesus seni mäla, ätewe oua niela ren ämi chüföluetä won efoch iräpenges. ³¹ Nge Kot a atekiatai o anomu lepelifichin pwe epwe Samol me Chon Amanau, pwe epwe awora ekiëksefäl me amusamusen tipis ngeni chon Israel. ³² Äm chon pwärätä ekei mettoch pwal Ngünmifel, i ewe Kot a ngeni chokewe mi aleasochis ngeni.”

³³ Iwe, lupwen chon ewe mwichen soupwüng ra rong ekei kapas, ra fokun lingeringer, pwe ra ekiëkin niela ekewe soukünü. ³⁴ Nge eman Farisi itan Kamaliel, eman Sensen Allük mi wor suföläun me ren ekewe aramas meinisin, a ütä me lon ewe mwichen soupwüng. A allük pwe ekewe soukünü repwe towu lükün lon ekis fansoun mochomoch. ³⁵ Mürin a üreni ewe mwichen soupwüng, “Ämi re Israel, oupwe ekiëkifichi mine oupwe föri ngeni ekei mwän. ³⁶ Ekoch ier a la a pwä eman mwän iten Teutas, a apasa pwe i eman souemwen mi lap, iwe, ina epwe ükükün föpükü mwän ra eti. Nge i a ninnila o chokewe meinisin mi chiechi ngeni ra toropasfeil o mine a ekiëkin föri a ükütiu. ³⁷ Mürin ei, Jutas eman re Kalilea a pwal pwä lupwen ewe fansoun makkeen it. A atupu eu mwichen aramas pwe repwe tapwela mürin. Pwal i a ninnila, nge chokewe mi eti ra toropasfeil. ³⁸ Iei met üpwe ürenikemi won ei lapalap. Ousap föri och mine epwe ü ngeni ekei mwän. Oupwe likitiirela! Are ar ekiëk me ar föföra a pop seni aramas, epwe ükütiu, ³⁹ nge are a pop seni Kot, ousap tongeni aüküretiu. Oupwe chök silei pwe oua fiu ngeni Kot.” Iwe, ewe mwichen soupwüng a tipeeu ngeni än Kamaliel we öüröür ngeniir. ⁴⁰ Iwe, ra köralong ekewe soukünü. Mürin ra allük ngeni ekewe chon mas pwe repwe wichiir, ra pwal pöchökül le fönöü ngeniir, pwe resap fokun chüen afalafal usun iten Jesus. Mürin ra amuseerela. ⁴¹ Iwe, ekewe soukünü ra towu seni ewe mwichen soupwüng, ra fokun pwapwa, pun ra tongeni tolong lon riaföü me itengau fän iten Jesus. ⁴² Iwe, iteiten

rän ra sopwela le afalafal lon ewe imwenfel pwal lon imwen aramas o aiti ngeni aramas ewe Pworausen Manau pwe Jesus ewe Kraist.

6

Ekewe fūman soualilis

6.1-7

¹ Ekoch fansoun mürin, lupwen ekewe chon lükü Jesus ra chomongola, a fis eu anini lefilen ekewe chon Juta mi fos lon kapasen Krik me ekewe chon Juta mi chök fos lon kapasen Ipru. Ekewe chon Juta mi fos lon kapasen Krik ra apasa, pwe ekewe fefin mi mä pwülüer seni lon ar we mwich resap angei inetiir mongö iteiten rän. ² Iwe, ekewe engol me ruoman soukünö ra amwichafengeni unusen ewe mwichen chon lükülük o üreniir, “Esap pwüng ngenikem äm aipwe tümwününgau ngeni äm afalafala kapasen Kot fän iten äm tümwünü ewe angangen inetin mongö. ³ Iei mine ämi pwii kana, oupwe filätä fūman mwän me leimi mi uren Ngünmifel o fokun tipachem, pwe sipwe awisa ngeniir ei angang. ⁴ Nge äm aipwe tupwöl le iotek o afalafala ewe kapasen Kot.” ⁵ Iwe, unusen ewe mwich a tipeeu ngeni mine ekewe soukünö ra eäni akot. Iei mine ra filätä Stefanus, eman mwän mi fokun lükülük o uren Ngünmifel, me Filip, Prokorus, Nikanor, Timon, Parmenas me Nikolaus seni Antiokia, eman chon lükün Israel mi etiwa lamalamen chon Juta me mwan. ⁶ Iwe, ra emwenala ekei mwän ren ekewe soukünö, nge ir ra iseis pöür won möküren eman me eman leir o iotek wor. ⁷ Iei usun ewe kapasen Kot a chöfetal. Nge ewe mwichen chon lükü Jesus lon Jerusalem ra fokun chochomongola, iwe, chomong lein ekewe souasor ra pwal lükü.

Ra fötekini Stefanus

6.8-15

⁸ Iwe, Stefanus eman mwän mi uren feiöch me ren Kot, a fokun wor an tufich, pwe a föri manaman me asisil mi lapalap me lein ekewe aramas. ⁹ Nge ekoch mwän ra ü ngeni Stefanus, ir chon ewe imwen felikis mi iteni “Chon Ngas”, ekoch chon Juta seni Kirene me Aleksantria ra choni ei mwich. Ir me pwal ekoch chon Juta seni ekewe fanü Silisia me Asia ra popuetä le anini ngeni Stefanus. ¹⁰ Nge Ngünmifel a ngeni Stefanus tipachem, pwe lupwen a kapas, ir resap tongeni pölüeni. ¹¹ Iei mine ra möni ekoch mwän pwe repwe apasa, “Äm aia rongorong pwe Stefanus a eäni kapasen turunufas usun Moses me Kot!” ¹² Ren ei sokun lapalap ra amwökütükütü letipen aramas me ekewe souakom me ekewe Sensen Allük. Iwe, ra turufi Stefanus o etekinala mwen ewe mwichen soupwüng. ¹³ Mürin ra emwenato ekoch mwän ar repwe apasa kapas chofona usun i. Ra üra, “Ei mwän esap ükütiu le kapasingau usun ach ei mwichefel me än Moses kewe allük. ¹⁴ Äm aia rongorong an apasa, pwe ei Jesus seni Nasaret epwe ataetiu ewe imwenfel o akasiwili ekewe örünien lamalam Moses a aiti ngenikich!” ¹⁵ Iwe, chon ewe mwichen soupwüng meinisin ra newenewen ngeni Stefanus o küna pwe wowoon wonmesan a usun chök wowoon wonmesen eman chon läng.

7

Än Stefanus afalafal

7.1-53

1 Iwe, ewe Souasor mi Lap a aisini Stefanus, “Ifa usun, a let mine ra aturuk won?” 2 Nge Stefanus a pölüeni, “Ämi pwii me semei kana, oupwe aüseling ngeniei! Me mwen än ach we lewo Apraham feila pwe epwe nonom lon Haran, ewe Kot mi ling a pwä ngeni me lon Mesopotamia 3 o üreni, ‘Kopwe towu seni om famili me fanüom, pwe kopwe feila lon ewe fanü ngang üpwe aiti ngonuk.’ * 4 Iei mine Apraham a towu seni fanüan o feila pwe epwe nonom lon Haran. Mürin än seman we mäla, Kot a tinala seni ikenan o emwenato lon ei fanü oua nonom lon ikenai. * 5 Kot esap ngeni Apraham och kinikin me lon ei fanü pwe epwe fanüeni, sap mwo nge ükükün chöchön eu chök ipw. Nge Kot a pwon ngeni, pwe i me mwirirwirin kana repwe fanüeni ewe fanü. Lon ewe fansoun Kot a eäni ei pwon, esamwo wor nöün Apraham. * 6 Iei usun met Kot a üreni, ‘Mwirirwirum kana repwe wasöla lon eu fanü esap fanüer, ia aramas repwe nöüniir amanau me ie. Ikenan repwe küna riaföü lon ükükün föpükü ier. * 7 Nge ngang üpwe apwüngü chon ewe fanü repwe angang ngeni. Iwe, mürin repwe towu seni ewe fanü o fel ngeniei me lon ei leni.’ * 8 Mürin Kot a ngeni Apraham ewe angangen sirkomsais, pwe epwe eu asisilen ewe pwon lefilen Kot me ekewe aramas. Iei mine Apraham a sirkomsaisi Isaak lon awaluen ränin mürin an uputiü, Isaak a sirkomsaisi Jakop, nge Jakop a sirkomsaisi nöün kewe engol me ruoman mwän, ir ach kewe lewo mi fokun iteföüla. * 9 Iwe, nöün Jakop kewe mwän ra lolowo ngeni pwiir we Josef, pwe ra amömöla an epwe eman amanau lon Isip. Nge Kot a eti i * 10 o amanau seni an kewe riaföü meinisin. Iwe, Kot a ngeni Josef mirit o atufichi i pwe epwe küna chen me ren ewe kingen Isip. Iei mine Farao a seikätä i pwe epwe wiseni ewe wisen kepina lon unusen Isip o nemeni imwan kewe meinisin. * 11 Mürin a fis eu lengita lon unusen Isip me Kanaan mi afisätä riaföü watte. Ach kewe lewo resap tongeni künökün aner mongö. * 12 Iwe, lupwen Jakop a rong pwe mi wor mongö lon Isip, a tinala ikenan nöün kewe mwän, ir ach kewe lewo, lon aeuin ar sai. 13 Lon aruuen ar sai ngeni Isip, Josef a pwäri i ngeni pwiin kewe o ewe kingen Isip a rongorong usun än Josef we famili. * 14 Iei mine Josef a tinala pworaus ngeni saman we Jakop o üreni pwe i me unusen an famili, irfengen meinisin ükükün fik me limman repwe feito Isip. * 15 Mürin Jakop a saila Isip. Ikenan i me nöün kewe mwän ra mäla. * 16 Iwe, somäär kewe ra uwato Sikem o peiaseniir lon ewe peias Apraham a möni seni nöün Hamor kewe mwän. *

17 “Lupwen a arap ewe fansoun pwe Kot epwe apwönüetä an we pwon a eäni ngeni Apraham, iteiten ach kewe aramas mi nom lon Isip ra fokun chomongola. 18 Mürin eman king mi fö esap silei usun Josef a seikitä, pwe epwe nemeni Isip. * 19 Ätewe a rawangauei ach kewe lewo o ariaföüür, a pöchökül ngeniir ar repwe pöütala nöür mönükol, pwe repwe mäla. * 20 Lon ena fansoun Moses a uputiü, i eman mönükol mi fokun äteöch. Inan a tümwünü lon imwan lon ükükün ülüngat maram. * 21 Nge lupwen a uwala lükün, nöün Farao fefin a mwüti o foleni pwe epwe wesewesen nöün. * 22 Iwe, Moses a kaiö tipachemen chon Isip meinisin, a fefeitä lon

* 7:3: Ken 12.1 * 7:4: Ken 11.31; 12.4 * 7:5: Ken 12.7; 13.5; 15.18; 17.8 * 7:6: Ken 15.13-14 * 7:7: Eks 3.12 * 7:8: Ken 17.10-14; 21.2-4; 25.26; 29.31-35.18 * 7:9: Ken 37.11,28; 39.2,21 * 7:10: Ken 41.39-41 * 7:11: Ken 42.1-2 * 7:13: Ken 45.1,16 * 7:14: Ken 45.9-10,17-18; 46.27 * 7:15: Ken 46.1-7; 49.33 * 7:16: Ken 23.3-16; 33.19; 50.7-13; Jos 24.32 * 7:18: Eks 1.7-8 * 7:19: Eks 1.10-11,22 * 7:20: Eks 2.2 * 7:21: Eks 2.3-10

an lipwäköch le kapas pwal lon an föföör.

²³ “Lupwen Moses a ierini faik, a filätä pwe epwe pii pwiin kewe chon Israel lon met a fis ngeniir. ✧ ²⁴ Iwe, a küna eman re Isip mi wichi eman re Israel, iei mine a feila rer pwe epwe peni ewe re Israel, iwe, a niela ewe re Isip. ²⁵ Moses a ekieki pwe püsin aramasan repwe weweiti pwe Kot a mochen nöüni i pwe epwe angaseerela, nge ir resap wewe ren. ²⁶ Sorotän ewe rän a küna pwe ruoman re Israel ra fiufengen. Iwe, a sotuni an epwe awora kinamwe lefiler o a üreniir, ‘Ätekanan, ämi pwipwi, pwota oua fiufengen lefilemi?’ ²⁷ Nge ewe eman mi wor an mwäl ngeni ewe eman a ofochokuw Moses o a aisini, ‘Tö a seikuketä pwe kopwe samol me soukapwüing wom?’ ²⁸ Ifa usun, ka pwal mochen nieila usun om ka niela ewe re Isip nanew?’ ²⁹ Lupwen Moses a rong ekei kapas, a sü seni Isip o a feila nonom lon ewe fanü Mitian. Ikenan pwülüan a nöüni ngeni ruoman ät. ✧

³⁰ “Iwe, mürin faik ier eman chon läng a pwä ngeni Moses lon pulupulen ekkei seni lon efoch iräföläföf me lon ewe fanüapö arap ngeni ewe Chuk Sinai. ³¹ Moses a mairü ren met a küna. Lupwen a feila arap ngeni ewe iräföläföf pwe epwe nenengeniöchü, a rongorong mwelien ewe Samol: ³² ‘Ngang än om kewe lewo we Kot, ngang än Apraham, Isaak me Jakob we Kot.’ Iwe, Moses a chechek ren an niuokus, pwe esap tongeni nenengeni ewe mettoch. ³³ Mürin ewe Samol a üreni Moses, ‘Kopwe pwilitawu ipwom sus, pun ei leni ka ütä won a pin. ³⁴ Üa küna ewe riaföü mi watte a fis ngeni nei kewe aramas lon Isip. Üa rongorong ar ngüngü o üa feila pwe üpwe angaseer. Kopwe etto iei, ngang üpwe tinukela Isip.’ ✧ ³⁵ Moses ätewe mi fen koput me ren ekewe aramasen Israel, ätewe ra aisini, ‘Tö a seikuketä pwe kopwe samol me soukapwüing wom?’ Iei i ewe eman Kot a tinala pwe epwe nemeni ekewe aramas o angaseer ren än ewe chon läng alilis, ewe mi pwä ngeni lon ewe iräföläföf mi ngetenget. ✧ ³⁶ Moses a emwenawu ekewe aramas seni Isip, a föri manaman me asisil lon Isip, arun ewe Setipar, pwal lon ewe fanüapö lon ükükün faik ier. ✧ ³⁷ Moses ätewe mi üreni ekewe aramasen Israel, ‘Kot epwe tinala remi eman soufos usun chök ngang, i epwe eman me lein püsin aramasemi.’ ✧ ³⁸ I ätewe mi eti ekewe aramasen Israel le mwichfengen me lon ewe fanüapö. A nom ikenan ren ach kewe lewo, pwal ren ewe chon läng mi kapas ngeni me won ewe Chuk Sinai. Iwe, a angei än Kot kapas mi manau pwe epwe asile ngenikich. ✧ ³⁹ Nge ach kewe lewo resap fokun mochen aleasochisi. Ra oputa i o lon letiper ra mochen liwinsefäliiti Isip. ⁴⁰ Iei mine ra üreni Aaron, ‘Kopwe föri ngenikem eman uluulun kot epwe emwenikem. Pun äm aisap silei met a fis ngeni Moses, ätewe mi emwenikeemiwu seni Isip.’ ✧ ⁴¹ Iwe, lon ena fansoun ra föri eu uluulun anümwäl lon lapalapen eman ätemwänin kow, ra uwato ar asor ngeni, ra föri eu kametip o asamolu mine ra föri ren pöür. ✧ ⁴² Iei mine Kot a kul seniir o asechiirela pwe repwe fel ngeni ekewe fүүn läng, usun a fen mak lon ekewe puken soufos:

‘Ämi chon Israel! Ifa usun, ämi oua uwato rei

asor me lifang lon ekewe faik ier me lon ewe fanüapö?

⁴³ Apwi! Ämi oua ekifetalei ewe imwenfel seni mangaku

✧ **7:23:** Eks 2.11-15 ✧ **7:29:** Eks 18.3-4 ✧ **7:34:** Eks 3.1-10 ✧ **7:35:** Eks 2.14 ✧ **7:36:** Eks 7.14,21; Num 14.33 ✧ **7:37:** Tut 18.15,18 ✧ **7:38:** Eks 19.1-20.17; Tut 5.1-33 ✧ **7:40:** Eks 32.1 ✧ **7:41:** Eks 32.2-6

än ewe kot Molok, pwal ewe uluulun Refan, ämi we koten fü.
Iei ekewe uluulun anümwäl ämi oua föriir pwe oupwe fel ngeniir.

Iei mine üpwe tinikemiila pekilan Papiilon pwe oupwe oola.’ ✧

44 “A wor ren ach kewe lewo me lon ewe fanüapö ewe imwenfel seni mangaku. A för usun chök met Kot a aiti ngeni Moses lon liosun we a fen pwäri ngeni me mwan. ✧ 45 Iwe, mürin ach kewe lewo mi angei ewe imwenfel seni mangaku seni semelaper kewe ra eki ei imwenfel lupwen ra eti Josua le feila o liapeni ewe fanü seni chon ekewe mwü Kot a fen asürela me mwer. Iwe, a nonom lon ewe fanü tori fansoun Tafit. ✧ 46 Tafit a küna chen me ren Kot o a tüngor ngeni an epwe mwüt ngeni, pwe epwe aüetä eu imwenfel fän iten än Jakob we Kot. ✧ 47 Nge Salomon ätewe mi aüetä ewe imwenfel fän itan. ✧ 48 Nge ewe Kot mi Unusen Tekia esap nom lon imw mi för ren pöün aramas. Usun ewe soufos a apasa,

49 ‘Ewe Samol a apasa: Läng ai lenien motun samol,
nge fanüfan lenien puun pechei.

Met sokun imw oupwe aüetä fän itei?

Ia a nom ie ewe leni üpwe nom lon?

50 Ifa usun, sap püsin ngang üa föri ekei mettoch meinisin?” ✧

51 Iwe, Stefanus a sowpala le kapas ngeniir, “Ämi aramas mi tipeföreal Letipemi ra usun chök chokewe resap lükü Kot, oua rongomang ngeni kapasen Kot! Ämi oua usun chök ämi kewe lewo: Pwal ämi oua ü ngeni Ngünmifel fansoun meinisin. ✧ 52 Ifa usun, mi wor eman soufos ämi kewe lewo resap ariaföüü? Ra niela nöün Kot kewe chon künö, chokewe ra arongato me lom usun waren nöün Kot we Chon Angang mi pwüing. Iwe, iei ämi oua afangamä i o niela. 53 Ämi chokewe mi angei än Kot kewe Allük mi feito me ren ekewe chon läng, nge ämi ousap aleasochis ngeni!”

Ra monei Stefanus ngeni fau

7.54-60

54 Iwe, lupwen chon ewe mwichen soupwüing ra rongorong ngeni än Stefanus afalafal, ra fokun lingeringer o asüngürü ngiir lon ar song. 55 Nge Stefanus a uren Ngünmifel, a anetai mesan ngeni läng o a küna lingen Kot me Jesus mi ütä lepelifichin Kot. 56 Iwe, a üra, “Nengeni, üa küna pwe läng a suk o Nöün Aramas a ütä lepelifichin Kot!” 57 Lupwen ra rong ekei kapas, ra pinela selinger ngeni pöür o pupuchör fän leüömong. Iwe, ir meinisin ra rangeiti Stefanus, 58 ra etekinawu lükün ewe telinimw o popuetä le monei ngeni fau. Nge ekewe chon atutur ra isenatiu üfer kewe ren eman alüal itan Saul. 59 Iwe, lupwen ar momonei Stefanus ngeni fau, i a kökkö lon an iotek ngeni ewe Samol, “Ai Samol Jesus, kopwe etiwa ngüni!” 60 Mürin a fotopwäsuketiu o kökkö fän leüömong, “Ai Samol, kopwe amusala ei tipis ra föri ngeniei.” Mürin an apasa ei a mäla.

8

Saul a ariaföüü chon mwichefel

8.1-3

1 Iwe, Saul a fokun tipeeu ngeni ar niela Stefanus. Lon ena chök rän chon ewe mwichefel lon Jerusalem ra tolong lon watten riaföü. Ekewe souläng meinisin ra toropasfeil lon unusen ewe fanü Jutea me Samaria,

✧ 7:43: Am 5.25-27 ✧ 7:44: Eks 25.9,40 ✧ 7:45: Jos 3.14-17 ✧ 7:46: 2.Sam 7.1-16; 1.Kron 17.1-14 ✧ 7:47: 1.King 6.1-38; 2.Kron 3.1-17 ✧ 7:50: Ais 66.1-2 ✧ 7:51: Ais 63.10

chilon chök ekewe soukünü. ² Ekoch mwän mi tupwöl lon ar lükülük ra peiaseni Stefanus o ra ngüngüres won lon ar kechü fän leüömong. ³ Nge Saul a popuetä le atala mwichefel. A feila ngeni imw me imw o etekinawu ekewe chon lükü, mwän me fefin, o atolongeer lon imwen fötek. ✧

Filip a afalafala ewe Pworausen Manau lon Samaria

8.4-25

⁴ Iwe, ekewe chon lükü mi toropasfeil ra fetalfeil ekis meinisin o afalafala ewe kapasen Kot. ⁵ Nge Filip a feila lon eu telinimw lon Samaria o afalafala usun Kraist ngeni ekewe aramas ikenan. ⁶ Lupwen ekewe aramas ra rongorong ngeni än Filip afalafal o küna ekewe manaman a föri, ir meinisin ra fokun aüseling ngeni mine a apasa. ⁷ Ekewe ngününgau ra towu seni chomong aramas fän ar pupuchör mi leüömong, pwal chomong aramas mi mwök me aramas mi pechemä ra pöchökületä. ⁸ Iei mine a fis eu watten pwapwa lon ewe telinimw.

⁹ Iwe, a wor eman mwän itan Simon lon ewe telinimw. Ätei a amairü ekewe chon Samaria ren an föri angangen roong. A apasa pwe i eman aramas mi tekia ¹⁰ o aramas meinisin lon ewe telinimw, seni ekewe aramas mi iteföüla tori aramas mi kis, ra fokun aüseling ngeni. Ra apasa, “Ätei ewe manamanen Kot, a pwä pwe i ewe Manaman mi Lap!” ¹¹ Aramas ra fokun aüselinga, pun fansoun langatam a amairüür ren an föri angangen roong. ¹² Nge lupwen ra lükü än Filip afalafala ewe Pworaus Allim usun ewe Mwün Kot pwal usun Jesus Kraist, iwe, mwän me fefin ra papatais. ¹³ Pwal Simon a lükü, nge mürin an papatais a chök nonom ren Filip. Nge lupwen a küna ekewe asisil mi lapalap me ekewe manaman Filip a föri, a fokun mairü ren.

¹⁴ Iwe, lupwen ekewe soukünü lon Jerusalem ra rongorong pwe ekewe chon Samaria ra etiwa ewe kapasen Kot, ra tinala Petrus me Johannes rer. ¹⁵ Lupwen ar toriir, ra iotek fän iten ekewe chon lükü Jesus, pwe pwal ir repwe angei ewe Ngünmifel, ¹⁶ pun ewe Ngünmifel esamwo feitiu won eman me leir. Ra chök papatais ngeni iten ewe Samol Jesus. ¹⁷ Mürin Petrus me Johannes ra iseis pöür wor, iwe, ra angei ewe Ngünmifel.

¹⁸ Iwe, lupwen Simon a küna pwe Ngünmifel a tori chokewe ekewe soukünü ra iseis pöür wor, a mochen ngeni Petrus me Johannes moni ¹⁹ o üra, “Oupwe pwal ngeniei ei manaman, pwe are ngang üpwe iseis pei won eman, epwe angei Ngünmifel.” ²⁰ Nge Petrus a pölüeni, “Amwo en me noumw moni oupwe tolong lon hell, pun ka ekieki pwe ka tongeni möni än Kot lifang ren moni! ²¹ Esap wor wisom are kinikinum lon ei angang, pun lelukom esap pwüing mwmen mesen Kot. ²² Kopwe ekieksefäl seni om ei ekiék mi ngau o iotek ngeni ach Samol, pwe i epwe amusala ei sokun ekiék mi nom lon lelukom. ²³ Pun üa küna pwe en ka fokun uren lolowo, ka pwal fötek ngeni tipis.” ²⁴ Mürin Simon a üreni Petrus me Johannes, “Ouse mochen oupwe iotek ngeni ewe Samol fän itei, pwe esap wor och lein ekei mettoch oua kapas usun epwe fis ngeniei.” ²⁵ Iwe, wesin än Petrus me Johannes pwärätä Jesus o apworaus a än ewe Samol kapas, ra liwinsefäliti Jerusalem. Lupwen ar sai ra afalafala ewe Pworausen Manau lon chomong sopw me lon Samaria.

Filip me ewe nöüwis seni Itiopia

8.26-40

²⁶ Iwe, eman nöün ewe Samol chon läng a üreni Filip, “Kopwe amolokotä o feila peliör won ewe al mi feila seni Jerusalem tori Kasa, ei al esap wor eman aramas a fetal won.” ²⁷ Iei mine Filip a feila, nge won ewe al a churi eman re Itiopia, i eman ätelipich mi reirei, eman nöüwis mi tekia nöün ewe kiwin Kantake seni Itiopia, a tümwünü pisekin mi aüchea me nöün moni meinisin. Ei mwän a feila Jerusalem pwe epwe fel ngeni Kot, ²⁸ nge iei a liwiniti lenian, a mot won waan woken o aleani puken ewe soufos Aisea. ²⁹ Iwe, Ngünmifel a üreni Filip, “Kopwe feiliti ewe woken o ouwärer ngeni le fetal.” ³⁰ Mürin Filip a sä ngeni o a rong pwe ewe nöüwis a aleani seni puken ewe soufos Aisea. Iwe, a aisini, “Ka weweiti mine ka aleani?” ³¹ Ewe nöüwis a pölüeni, “Epwe ifa usun ai üpwe tongeni weweiti nge esap wor eman a awewe ngeniei?” Iwe, a tüngor ngeni Filip pwe epwe tötä o mot ren won ewe woken. ³² Ikei ekewe wokisin ewe nöüwis a aleani,

“I a usun eman sip aramas ra emwenala pwe epwe ninnila,
a usun eman nienifön sip a fanafanala lupwen ar fichi ünan.

Esap apasa eu kapas.

³³ Lon an küna asäw, resap föri ngeni mine a pwüng.

Iö a tongeni kapas usun mwirimwirin kana?

Pun manauan won fanüfan a üküpöküla.” ✧ ³⁴ Iwe, ewe mwän a aisini Filip, “Kose mochen üreniei, iö ewe soufos a kapas usun? A kapas usun i ika usun eman?” ³⁵ Mürin Filip a popuetä le kapas won ekei wokisin o apworausä ngeni ewe Pworausen Manau usun Jesus. ³⁶ Lupwen ar sasai won ewe al, ra tori eu leni ia a wor koluk ie. Iwe, ewe nöüwis a üra, “Nengeni, a wor koluk ikei! Met a epeti ai üpwe papatais?” ³⁷ [Filip a pölüeni, “Are ka lükü ren unusen lelukom ka tongeni papatais.” Ewe nöüwis a pölüeni, “Ngang üa lükü pwe Jesus Kraist Nöün Kot.”] ³⁸ Iwe, ewe nöüwis a allük pwe ewe woken epwe köüla o ir me ruoman, Filip me ewe nöüwis, ra feitiu o tolong lon ewe koluk. Nge Filip a papataisi ätei. ³⁹ Lupwen ar towu me lon ewe koluk, Ngünün ach Samol a angeala Filip. Iwe, ewe nöüwis esap chüen küna, nge a sopwela lon an sai fän pwapwa mi watte. ⁴⁰ Iwe, Filip a pwä me lon Astot. A saifeil lon ekewe telinimw meinisin o afalafala ewe Pworausen Manau tori a tori Seserea.

9

Saul a wilila manauan

9.1-19

(Föf 22.6-16; 26.12-18)

¹ Lon ena fansoun Saul a chök sopwela le eniweniwa ekewe chon lükü ach Samol pwe epwe niirela. Iwe, a feila ren ewe Souasor mi Lap ² o tüngor ngeni an epwe makkei toropwen mwümwütä ngeni ekewe souemwen lon ekewe imwen felikis lon Tamaskus, pwe are epwe küna chokewe mi fetal won ewe Alen ach Samol, epwe tongeni fötekini mwän me fefin, o aliwiniir ngeni Jerusalem. ³ Iwe, lupwen Saul a sai o arap ngeni ewe telinimw Tamaskus, lon ena chök otun eu saram me läng a feitiu won. ⁴ Iwe, a turutiu le pwül, nge a rongorong eu möngüngü

mi üreni, “Saul, Saul, pwota ka ariaföüüei?”⁵ Nge Saul a aisini, “En iö Samol?” Ewe möngüngü a pölüeni, “Ngang Jesus, ewe ka ariaföüü.”⁶ Iei kopwe ütä o feila lon ewe telinimw. Ikenan repwe ürenuk mine kopwe föri.”⁷ Iwe, ekewe mwän mi eti Saul lon an sai ra chök ükütä o fanafanala. Ra rongorong ewe möngüngü, nge resap tongeni küna eman.⁸ Saul a ütä seni le pwül o nenela, nge esap küna och. Iei mine ra amwöchü pöün o emwenala Tamaskus.⁹ Lon ükükün ülüngat rän Saul esap tongeni küna mwan, esap pwal mongö ika ünümi och lon ena fansoun.

¹⁰ Iwe, a wor eman souläng lon Tamaskus itan Ananias. Ach Samol a kapas ngeni lon künaan o üreni, “Ananias!” Ätei a pölüeni, “Ngang iei, ai Samol.”¹¹ Ach Samol a üreni, “Kopwe amolokotä o feila lon imwen Jutas mi nom won ewe al itan Wenechar o ais usun eman mwän itan Saul seni Tarsus, pun i a iotek.”¹² Iwe, lon künaan a pwä ngeni eman mwän itan Ananias a feito o iseis pöün won pwe epwe tongeni küna mwan.”¹³ Ananias a üreni, “Ai Samol, üa rongorong chomong pworaus usun ei mwän me ekewe föför mi ngau meinisin a föri ngeni noumw kewe chon pin lon Jerusalem.”¹⁴ A feito ikei fän ewe pwüüng a angei seni ekewe souasor mi lap pwe epwe fötekiniir meinisin mi fel ngonuk.”¹⁵ Nge ach Samol a üreni Ananias, “Kopwe feila, pun ei mwän üa filätä pwe epwe angang ngeniei, epwe asilefeili itei ngeni chon lükün Israel, ngeni ekewe king pwal ngeni chon Israel.”¹⁶ Nge ngang üpwe pwäri ngeni meinisin ükükün ewe riaföü epwe küna fän itei.”¹⁷ Iei mine Ananias a feila o tolong lon ewe imw ia Saul a nom ie. A iseis pöün won o apasa, “Pwipwi Saul, ach Samol Jesus a tinieito, ewe mi pwä ngonuk won ewe al lupwen ka saito ikei. A tinieito pwe kopwe tongeni künasefäli mwomw, kopwe pwal uren Ngünmifel.”¹⁸ Lon ewe chök otun och mettoch usun ülen ik a turuwu seni lon mesen Saul pwe a tongeni künasefäli mwan. Iwe, a ütä o papatais.¹⁹ Iwe, mürin an mongö a pöchökülsefäl.

Saul a afalafal lon Tamaskus

9.19-25

Saul a nonom lon Tamaskus ren ekewe chon lükü Jesus ekoch rän.²⁰ A müttir feila lon ekewe imwen felikis o a popuetä le afalafal pwe Jesus i ewe Nöün Kot.²¹ Iwe, meinisin mi rongorong an afalafal ra mairü o ais, “Ifa usun, sap iei i ätewe mi niela chokewe mi fel ngeni Jesus lon Jerusalem? Esap iei i ätewe mi feito ikei ren ewe chök popun an epwe fötekini ekewe chon lükü o aliwiniir ngeni ekewe souasor mi lap?”²² Nge Saul a pöchökülela lon an afalafal o a fokun alletä pwe Jesus i ewe Kraist, pwe ekewe chon Juta mi nom lon Tamaskus resap tongeni pölüeni.²³ Iwe, mürin chomong rän ekewe chon Juta ra chufengen o ekielifengeni usun ar repwe niela Saul.²⁴ Nge eman a pwäri ngeni Saul ar ekiiek. Lerän me lepwin ra mamasa ekewe asalalapan ewe telinimw fän iten ar repwe niela.²⁵ Nge lon eu pwin nöün kewe chon kaiö ra atolonga lon eu chüük o aürätü me won tittin ewe telinimw. ✧

Saul a nom lon Jerusalem

9.26-31

²⁶ Iwe, Saul a feila Jerusalem o a sotuni an epwe chiechi ngeni ekewe chon kaiö. Nge ir meinisin ra niuokusiti, pun resap lükü pwe i wesewesen eman chon kaiö.²⁷ Mürin Parnapas a alisi o emwenala ren ekewe soukünü. A awewe ngeniir usun än Saul küna ach Samol won ewe al,

pwal usun än ach Samol kapas ngeni. A pwal apworaus a ngeniir usun än Saul pworacho le afalafal usun iten Jesus lon Tamaskus. ²⁸Iei usun Saul a nonom rer. A feilfetal lon unusen Jerusalem, nge a pworacho le afalafal usun iten ach Samol. ²⁹A pwal kapas o anini ngeni ekewe chon Juta mi fos lon kapasen Krik. Nge ir ra ekieki usun ar repwe niela. ³⁰Lupwen ekewe chon lükü Jesus ra rongorong usun ei ekiék, ra emwenala Saul ngeni Seserea o tinala Tarsus.

³¹Iwe, lon ena fansoun a fis pwe a kinamwela ekewe mwichefel lon unusen Jutea, Kalilea me Samaria. Ra pöchökülela o chochomongola ren än ewe Ngünmifel alilis o ra manau ren ar asamolu ach Samol.

Petrus a nom lon Litta me Joppa

9.32-43

³²Iwe, Petrus a saifeil lon ekewe fanü meinisin. A pwal feila pwe epwe churi ekewe chon pin lon Litta. ³³Ikenan a küna eman mwän itan Áneas mi mwök inisin, esap tongeni pwätä seni kian lon ükükün walu ier. ³⁴Iwe, Petrus a üreni, “Áneas, Jesus Kraist epwe apöchökülok iei. Kopwe pwätä o önü kiom.” Lon ewe chök otun Áneas a pwätä. ³⁵Iwe, ekewe aramas meinisin mi nonom lon Litta me ewe fanü Saron ra küna Áneas o ra kul ngeni ach Samol.

³⁶A wor eman fefin itan Tapita lon Joppa, a lükü Jesus. (Itan lon kapasen Krik Torkas, wewen: eman chia.) Neminei a fang an fansoun meinisin le föri föföör mürina o alisi chon wöüngau. ³⁷Lon ena fansoun neminei a samau o mäla. Iwe, ra anükünükü somän o anom lon eu ruum asan. ³⁸Joppa esap toau seni Litta. Iei mine lupwen ekewe chon lükü Jesus lon Joppa ra rong, pwe Petrus a nom lon Litta, ra tinala ruoman mwän ren, pwe repwe uwei ngeni ei pworaus, “Kose mochen kopwe müttir feito rech.” ³⁹Iei mine Petrus a ütä o etiir. Iwe, lupwen a tori ewe imw, ra emwenätä lon ewe ruum asan. Ikenan ekewe fefin mi mä pwülüer ra mwicheto ünükün, ra kechü o aiti ngeni Petrus ekewe söch me sokopaten üf Torkas a tei fän iter lupwen a chüen manau. ⁴⁰Iwe, Petrus a atowu ekewe aramas meinisin me lon ewe ruum, a fotopwäsuketiu o iotek. Mürin a kul ngeni ewe somä o apasa, “Tapita, kopwe pwätä!” Iwe, neminewe a nenela, nge lupwen a küna Petrus a pwätä. ⁴¹Petrus a amwöchü pöün o alisätä pwe epwe ütä. Mürin a kökköri ekewe chon lükü meinisin fiti ekewe fefin mi mä pwülüer o api ngeniir neminewe pwe a manau. ⁴²Iwe, ei pworaus a chöfetal lon unusen Joppa, nge chomong aramas ra lükü ach we Samol. ⁴³Mürin Petrus a nonom lon Joppa lon chomong rän, a nom ren eman mwän itan Simon, i eman chon angang ngeni silin man.

10

Petrus me Kornelius

10.1-33

¹Iwe, a wor eman mwän lon Seserea itan Kornelius, i eman meilapen ewe mwichen sounfiu seni Rom a iteni “Mwichen Itali”. ²A tupwöl lon an niuokusiti Kot, i me chon an famili meinisin. A pwal watte an alilis ngeni ekewe chon Juta mi wöüngau o a ikiotek ngeni Kot. ³Ina epwe kulok ülüngat leolopalen en rän a wor künaan. A künaöchü eman nöün Kot chon läng a feito ren o üreni, “Kornelius!” ⁴Kornelius a newenewen ngeni lon an niuokus o aisini, “Ai samol, met ka mochen?” Ewe chon

läng a pölüeni, “Kot a etiwa om iotek me om alisi ekewe chon wöüngau o a chechemenuk. ⁵ Iei kopwe tinala ekoch mwän Joppa pwe repwe emwenato reöm eman mwän itan Simon Petrus. ⁶ I a wasöla lon imwen eman chon angang ngeni silin man itan Simon, a nom imwan arosot.” ⁷ Iwe, lupwen ewe chon läng a feila seni, Kornelius a köri ruoman me lein nöün kewe chon angang me eman sounfiu mi niuokusiti Kot, eman me lein ekewe mi angang ngeni. ⁸ Iwe, a apworausana ngeniir meinisina mine a fis o a tiniirela Joppa.

⁹ Iwe, sorotän ewe rän lupwen ar sai o ra arap ngeni Joppa, Petrus a tötä won ewe imw leoloas pwe epwe iotek. ¹⁰ Mürin a popuetä an echik o a mochen mongö. Nge lupwen ra amolätä anan, a wor künaan. ¹¹ A küna pwe läng a sukula, nge och mettoch mi wewe ngeni echö chenikam mi watte a ürütü me läng, nge a föfö pwokukun me rüanü. ¹² Masouen lon ei mettoch sokopaten man mi wor fofoch pecher, sokun man mi tö won upwer, pwal machang mi mwacho. ¹³ Mürin eu möngüngü a üra, “Petrus kopwe ütä! Kopwe niela ekei man o kopwe ochoch fituker!” ¹⁴ Nge Petrus a üra, “Ai Samol, esap fokun öch ngeniei. Üsap fokun mwo nge mongö och mine a pin ngeniei o nom lon tettelin limengau.” ¹⁵ Iwe, ewe möngüngü a kapasefäl fan aruuan, “Kosap apasa pwe a limengau och mettoch are Kot a apasa pwe a limöch.” ¹⁶ Ei lapalap a fis fän ülungat. Mürin ewe mettoch a ürüsefälitä läng.

¹⁷ Iwe, lupwen Petrus a ekieki usun wewen künaan we, ekewe mwän Kornelius a tiniirela ra küna ia imwen Simon we a nom ie, iwe, ra ütä ünükün asamalapan. ¹⁸ Ra kökkö o ais are Simon mi pwal iteni Petrus a nom ikenan. ¹⁹ Nge lupwen Petrus a chüen chök ekieki usun wewen künaan we, Ngünmifel a kapas ngeni, “Simon, ülüman mwän ra küttok. ²⁰ Iei mine kopwe ütä o feitiu rer. Kosap tipemwaramwar om kopwe etiir, pun ngang üa tiniireto ikei.” ²¹ Iwe, Petrus a tötü o üreni ekewe mwän, “Ngang ätewe oua kütta. Pwota oua feito?” ²² Ekewe mwän ra pölüeni, “Kornelius ewe meilapen sounfiu a tinikeemito. I eman mwän mi pwüng o niuokusiti Kot, a wor meninin me ren ekewe aramasen Juta meinisina. Eman chon läng mi pin a üreni pwe epwe titi en, pwe kopwe feila lon imwan, pun a mochen rongorong met kopwe üreni.” ²³ Mürin Petrus a köralong ekewe mwän lon ewe imw, pwe repwe wasöla ren. Iwe, sorotän ewe rän Petrus a etiirela, nge pwal ekoch pwipwi seni Joppa ra etala.

²⁴ Sorotän ewe rän ra tori Seserea. Iwe, Kornelius a awitiir, a pwal körifengeni aramasan me chiechian kana mi kan ngeni. ²⁵ Lupwen Petrus a tolong lon ewe imw, Kornelius a churi o chapetiu mwan lon an meniniti. ²⁶ Nge Petrus a apwätai o üreni, “Kopwe ütä, pun ngang pwal eman chök aramas.” ²⁷ Lupwen ar kakapasfengen, Petrus a etalong Kornelius lon ewe imw, ikenan a küna chomong aramas mi mwichfengen. ²⁸ Iwe, a üreniir, “Ämi oua fokun silei, pwe a ü ngeni ach lamalam pwe eman chon Juta epwe chiechi ngeni eman chon lükün Israel are tolong lon imwan. Nge Kot a aiti ngeniei pwe üsap anomu eman aramas lon tettelin aramas mi limengau ika ngau. ²⁹ Iei mine lupwen oua titi ngang, üa feito, nge üsap eäni och kapasen pölüeni. Iei üpwe aisinikemi pwota oua titi ngang?” ³⁰ Iwe, Kornelius a pölüeni, “Rüanü rän a la ngang üa nom lon imwei lon ei chök otun kulok ülungat leolopan. A müttir fis pwe eman mwän mi üföüf üf mi saramaram a ütä mwei ³¹ o a apasa,

‘Kornelius! Kot a aüselinga om iotek o chechemeni om alilis ngeni ekewe chon wöüngau. ³² Kopwe tinala ekoch aramas Joppa ren Simon a pwal iteni Petrus pwe epwe feito. I a wasöla lon imwen Simon eman chon angang ngeni silin man, a nom imwan aroset.’ ³³ Iei mine üa müttir titi en, nge a mürina pwe ka feito. Iei äm meinisin aia nonom mwen mesen Kot, pwe aipwe aüseling ngeni meinisin mine ewe Samol a allük ngonuk pwe kopwe aiti ngenikem.”

Än Petrus afalafal

10.34-43

³⁴ Mürin Petrus a popuetä le kapas, “Iei üa fokun mefi pwe a let pwe Kot esap liflifil aramas, ³⁵ nge a etiwa aramas mi niuokusiti i o föri mine a pwüng seni ekewe mwü meinisin. ³⁶ Oua silei ewe kapas Kot a tinala ngeni ekewe aramasen Israel, a arongafeili ewe Pworausen Manau pwe sipwe kinamwefengen me Kot ren Jesus Kraist, i ewe Samol mi nemeni aramas meinisin. ³⁷ Oua silei met a fis lon unusen Jutea, a popuetä me lon Kalilea mürin ewe papatais Johannes a afalafal usun. ³⁸ Oua silei usun Jesus Kraist seni Nasaret, pwal usun än Kot tinatiu won ewe Ngünmifel o ngeni an manaman. A fetalfeil ekis meinisin, a föri föföör mürina o apöchöküla meinisin mi nom fän nemenien ewe Tefil, pun Kot a eti. ³⁹ Äm aia chon pwärätä usun ekewe mettoch meinisin a föri lon fanüen chon Juta pwal lon Jerusalem. Mürin ra niela i ren ar chüföläetä won eföch iräpenges. ⁴⁰ Nge Kot a amanauasefäli seni mäla lon aülüngatin rän o a föri pwe a pwä ngeni aramas. ⁴¹ Esap pwä ngeni aramas meinisin, nge a chök pwä ngenikem, äm kewe Kot a fen flikeemitä pwe aipwe chon pwärätä. Äm aia mongöfengen o ünfengen me i mürin an manausefäl seni mäla. ⁴² A allük ngenikem pwe aipwe afalafala ewe Pworausen Manau ngeni ekewe aramas o pwärätä pwe i ätewe Kot a filätä an epwe soukapwüng won aramas mi manau me aramas mi mäla. ⁴³ Ekewe soufos meinisin ra pwärätä usun i o apasa, pwe meinisin mi lükü i repwe küna amusamusen ar tipis kana pokiten itan.”

Ekewe chon lükün Israel ra angei ewe Ngünmifel

10.44-48

⁴⁴ Lupwen Petrus a chüen kapas, ewe Ngünmifel a feitiu won chokewe meinisin mi rongorong ngeni an afalafal. ⁴⁵ Ekewe chon lükü Jesus mi etato Petrus seni Joppa, ir chon Juta, ra mairü pwe Kot a pwal fangeto an lifang, ewe Ngünmifel ngeni chon lükün Israel. ⁴⁶ Pun ra rongorong pwe ir ra kapas lon kapasen ekis o fokun mwareiti Kot. Mürin Petrus a apasatä, ⁴⁷ “Ekei aramas ra angei ewe Ngünmifel usun chök äm aia angei. Ifa usun, eman a tongeni epetiir ar repwe papatais ren koluk?” ⁴⁸ Iei mine a allük ngeniir pwe repwe papatais lon iten Jesus Kraist. Mürin ra tüngor ngeni Petrus pwe epwe nonom rer ekoch rän.

11

Än Petrus pworaus ngeni chon ewe mwichefel lon Jerusalem

11.1-18

¹ Iwe, ekewe soukünü me ekewe chon lükü Jesus lon unusen Jutea ra rongorong pwe ekewe chon lükün Israel ra pwal etiwa kapasen Kot. ² Iei mine lupwen Petrus a feila Jerusalem, chokewe mi tipeni än ekewe

chon lükün Israel repwe sirkomsais, ra esita i o apasa, ³ “En ka wasöla lon imwen ekewe chon lükün Israel resap sirkomsais, ka pwal mwo nge etiiir le mongö!” ⁴ Mürin Petrus a popuetä le apworaus a ngeniir tichikin meinisin mine a fis seni lepoputän, ⁵ “Lupwen üa iotek me lon ewe telinimw Joppa, a wor künaei. Üa küna och mettoch mi wewe ngeni echö chenikam mi watte, a föfö pwokukun me rüanü, a ürütü me läng. Iwe, a köüla mwei. ⁶ Üa nenelong lon o üa küna sokopaten man mi wor fofoch pecher, manmwacho, sokopaten mantötö me machang mi mwacho. ⁷ Mürin üa rongorong eu möngüngü a üreniei, ‘Petrus, kopwe ütä, kopwe niela ekei man o kopwe ochoch fituker!’ ⁸ Nge üa pölüeni, ‘Ai Samol, esap fokun öch ngeniei! Üsap fokun mwo nge mongö och mine a pin ngeniei o nom lon tettelin limengau.’ ⁹ Ewe möngüngü a kapasgefäl seni läng, ‘Kosap apasa pwe a limengau och mettoch are Kot a apasa pwe a limöch.’ ¹⁰ Ei lapalap a fis fän ülüngat, mürin ewe mettoch a ürüsefälitä läng. ¹¹ Lon ena chök otun ekewe ülüman mwän Kornelius a tiniireto rei seni Seserea ra tori ewe imw ia üa nom ie. ¹² Iwe, ewe Ngünmifel a üreniei pwe üpwe etiiir, nge üsap tipemwaramwar. Ekei wonoman chon lükü Jesus seni Joppa ra pwal etiei le feila Seserea, äm meinisin aia tolong lon imwen Kornelius. ¹³ Iwe, Kornelius a apworaus a ngenikem usun an küna eman chon läng a ütä lon imwan o üreni, ‘Kopwe tinala ekoch mwän Joppa ren Simon mi pwal iteni Petrus, pwe epwe feito reöm. ¹⁴ I epwe afalafala ewe kapasen Kot ngenikemi, pwe en me chon leimwom meinisin oupwe küna manau.’ ¹⁵ Iwe, lupwen üa popuetä le kapas, ewe Ngünmifel a feitiu wor usun chök a feitiu woch me mwan. ¹⁶ Mürin üa chechemeni mine ewe Samol a fen apasa, ‘Johannes a papataisikemi ren koluk, nge ämi oupwe papatais ren Ngünmifel.’ ✧ ¹⁷ A fokun fat pwe Kot a fang ngeni ekei chon lükün Israel ewe chök lifang a ngenikich lupwen sia lükü ach Samol Jesus Kraist. Iö ngang pwe üpwe tongeni pinei mine Kot a mochen föri?” ¹⁸ Lupwen ra rongorong ei pworaus, ra ükütü le esita Petrus, ra mwareiti Kot o apasa, “Kot a pwal mwüt ngeni ekewe chon lükün Israel pwe repwe ekieksefäl o küna manau.”

A fis ewe mwichefel lon Antiokia

11.19-30

¹⁹ Iwe, ekewe chon lükü Jesus ra toropasfeil pokiten ewe riaföü watte a toriir lupwen Stefanus a ninnila. Ekoch leir ra feila tori Fönisia, Saipros me Antiokia o afalafala kapasen Kot ngeni ekewe chök chon Juta. ✧ ²⁰ Nge ekoch me lein ekewe chon lükü Jesus, ir mwän seni Saipros me Kirene, ra feila Antiokia o arongafeili kapasen Kot ngeni pwal ekewe chon lükün Israel, ra afalafala ngeniir ewe Pworausen Manau usun ach Samol Jesus. ²¹ Iwe, manamanen ach Samol a etiiir, pwe chomong aramas ra lükü o kul ngeni ewe Samol. ²² Ewe pworaus usun mine a fis a tori ewe mwichefel lon Jerusalem, iei mine ra tinala Parnapas Antiokia. ²³ Iwe, lupwen a tori Antiokia, a küna usun än Kot afeiöchü ekewe aramas, a pwapwa o pese ngeniir, pwe repwe allükülük o let ngeni ewe Samol ren unusen leluker. ²⁴ Parnapas eman mwän mi aramasöch, a uren Ngünmifel me lükülük o chomong aramas ra lükü ewe Samol ren.

²⁵ Mürin Parnapas a feila Tarsus pwe epwe kütta Saul. ²⁶ Iwe, lupwen an küna, a emwenato Antiokia. Lon ükükün eu ier Parnapas me Saul

ra chufengen me chon ei mwichefel o asukula eu mwichen aramas mi watte. A fis me lon Antiokia, pwe aramas ra popuetä le aita ngeni ekewe chon lükü “souläng” (Chon tapwela mürin Kraist).

²⁷ Lon ena fansoun ekoch soufos ra feito Antiokia seni Jerusalem. ²⁸ Eman leir itan Akapus a ütä o osuni fän manamanen ewe Ngünmifel, pwe eu mailengita epwe tori unusen fanüfan. (Ei a fis lon mwün Sisar Klautius.) ✧ ²⁹ Iwe, ekewe chon lükü Jesus ra tipeeufengen, pwe än eman me eman leir alilis won ükükün an tongeni epwe titila ngeni pwiir kewe chon lükü mi nom lon Jutea. ³⁰ Ra föri ei o tinala Parnapas me Saul, pwe repwe uwei ar we alilis ngeni ekewe souakomwen mwichefel lon Jerusalem.

12

A wattela ewe riaföü ngeni ekewe souläng

12.1-5

¹ Lon ewe fansoun ewe king Herotes a popuetä le ariaföüü ekoch chon ewe mwichefel. ² A niela James pwiin Johannes ren ketilas. ³ Lupwen a mefi pwe ekewe chon Juta ra pwapwa ren, a sopwela an föföro o a pwal turufi Petrus. Ei a fis lupwen fansoun chulapen mongö pilawa esap wor iis lon. ⁴ Mürin an turufi Petrus, a aturalong lon imwen fötek. Ikenan a atolonga lepöün rüanü mwichen sounfiu, akaföman lon eu mwich. Herotes a ekiikin föri kapwüing ngeni Petrus me mwen ekewe aramas mürin ewe chulapen Pasofer. ✧ ⁵ Iei usun Petrus a mwöchülong lon fötek, nge ekewe aramas lon ewe mwichefel ra likitü le ikiotek ngeni Kot fän itan.

Petrus a towu seni lon imwen fötek

12.6-19

⁶ Lon ewe pwinin me mwen än Herotes epwe apwüingü Petrus me mwen ekewe aramas, Petrus a möür lefilen ruoman sounfiu, a riri ngeniir ren ruofoch sein seni mächä, nge a wor chon mamas ra mamasa asamalapen ewe imwen fötek. ⁷ Lon ei chök otun eman nöün ewe Samol chon läng a ü ikenan o eu saram a asarama lon ewe ruum. Iwe, ewe chon läng a pisiri won afaren Petrus, a apwökätä o üreni, “Kopwe müttir pwätä!” Lon ei chök otun ekewe sein seni mächä ra turutiu seni won pöün Petrus. ⁸ Mürin ewe chon läng a üreni, “Kopwe anükü om pelit o ipweipwelong ipwom sus.” Iwe, Petrus a föri iei usun. Mürin ewe chon läng a üreni, “Kopwe üföüfolong üfom we o tapweto müri.” ⁹ Iwe, Petrus a tapwela mürin o towu seni ewe imwen fötek. Nge Petrus esap silei, pwe mine ewe chon läng a föri a wesewesen fis. A ekiiki pwe a wor künaan. ¹⁰ Ra pwere seni ewe aeuin mwichen chon mas me ewe aruuen mwichen chon mas o ra tori ewe amüchülan asamalap seni mächä mi wene ngeni ewe telinimw. Iwe, ewe asamalap a püsin sukula ngeniir o ir me ruoman ra towu. Ra mwinemwinela won ewe al, nge lon ei chök otun ewe chon läng a feil seni Petrus. ¹¹ Mürin Petrus a mefi mine a fis ngeni o a apasa, “Iei üa silei pwe mine a fis ngeniei a wesewesen let. Ewe Samol a tinato nöün we chon läng pwe epwe angasaei seni fän nemenemen Herotes, pwal seni ekewe mettoch meinisin ekewe aramasen Juta ra ekiikin föri ngeniei, pwe üpwe tolong lon riaföü.” ¹² Lupwen a wewela ren mine a fis ngeni, a feila ngeni imwen Maria, inen Johannes mi pwal iteni Markus.

Ikenan chomong aramas ra chufengen o iotekfengen. ¹³ Iwe, Petrus a fichifich won ewe asamalapen lükün o eman chon angang föpwül itan Rota a feiliti ewe asam pwe epwe pii iö we a fichifich. ¹⁴ Nge lupwen a silleni mwelien Petrus, a fokun pwapwa, pwe a liwiniti ewe mwichen aramas, nge esap mwo suki ewe asam. Iwe, a üreniir, pwe Petrus a nom lükün ewe asam. ¹⁵ Nge ir ra üreni, “Ka umwes!” Iwe, neminewe a chök änimau pwe a pwüng an kapas. Iei mine ra üra, “Iei i an chon läng.” ¹⁶ Nge Petrus a chök sopwela le fichifich. Iwe, lupwen ra suki ewe asam, ra küna i o ra fokun mairü. ¹⁷ Petrus a älipö ngeniir pwe repwe mosonoson o a apworaus ngeniir usun än ewe Samol emwenawu seni lon ewe imwen fötek. Mürin a üra, “Oupwe asile ngeni James me ekewe chon lükü ei pworaus.” Iwe, a feil seniir o feila lon pwal eu leni.

¹⁸ Iwe, lesosorun ewe rän a fis eu watten osukosuk lefilen ekewe chon mas, pun ra aisfengen lefiler met a fis ngeni Petrus. ¹⁹ Mürin än Herotes küttafichi Petrus, nge esap küna, a atittinafichi ekewe chon mas o a allük pwe repwe ninnila. Mürin ei, Herotes a feila seni Jutea o feila Seserea o a nonom ikenan eu fansoun.

Herotes a mäla
12.20-25

²⁰ Iwe, Herotes a fokun song ngeni ekewe chon Tirus me Siton. Iei mine ekoch me leir ra tipeefengen o feila pwe repwe churi Herotes. Ra akomwen aliapa Plastus, eman nöün ewe king nöüwis mi wisen nemelapei imwan, pwe epwe nom lon pekiir. Mürin ra feila ren Herotes o tüngor an epwe kinamwe ngeniir, pun ir me aramasen fanüer ra angei aner mongö seni fanüen ewe king. ²¹ Lon eu rän mi keflitä, Herotes a üföüfolong üfan üfen king, a mot won an lenien motun king o afalafal ngeni ekewe aramas. ²² Iwe, ekewe aramas ra kökkö fän leüömong, “Sap mwelien eman aramas, nge i mwelien eman kot!” ²³ Lon ewe chök otun nöün ewe Samol chon läng a ni Herotes, pun esap ngeni Kot lingan. Iwe, moso ra äni fitukan pwe a mäla.

²⁴ Nge ewe kapasen Kot a chök chöfetal ekis meinisin o lalapala. ²⁵ Iwe, lupwen Parnapas me Saul ra wes le föri ar angang, ra liwinsefäl seni Jerusalem, nge ra uwei Johannes mi pwal iteni Markus.

13

Ra filätä Parnapas me Saul o tiniirela pwe repwe föri ewe angangen Kot
13.1-3

¹ Iwe, a wor soufos me sense lon ewe mwichefel lon Antiokia iter Parnapas, Simeon a pwal iteni Niker, Lusius seni Kirene me Manaen, (ätei a folfengen me ewe samol Herotes) pwal Saul. ² Lupwen ar fel ngeni ewe Samol me echikefel, Ngünmifel a üreniir, “Oupwe aimwüela fän itei Parnapas me Saul pwe repwe föri ewe angang üa köriir ngeni.” ³ Mürin ar echikefel o iotek, ra afeiöchüür o tiniirela.

Parnapas me Saul ra afalafal lon Saipros
13.4-12

⁴ Iwe, Parnapas me Saul, ätekewe ewe Ngünmifel a tiniirela, ra feitiu Selusia, ra sai seni ikenan o sai ngeni ewe fanü Saipros. ⁵ Lupwen ar tori ewe telinimw Salamis, ra afalafala ewe kapasen Kot lon än ekewe chon Juta kewe imwen felikis. Iwe, Johannes Markus a pwal fitiir ren an epwe alisiir lon ewe angang. ⁶ Iwe, ra saifeil lon unusen ewe fanü tori ra tori

ewe telinimw Pafos. Ikenan ra churi eman chon Juta sourong me soufos chofona a iteni Par-Jesus. ⁷ Ätei a angang ngeni kepinan ewe fanü itan Serkius Paulus, i eman mwän mi tipachem. Ei kepina a körato Parnapas me Saul pwe repwe feito ren, pun a mochen aüseling ngeni kapasen Kot. ⁸ Nge ewe sourong Elimas a pölüeniir. (Elimas iei itan lon kapasen Krik.) A sotuni an epwe akulu letipen ewe kepina an esap lükü Jesus. ⁹ Mürin Saul mi pwal iteni Paulus a uren Ngümmifel, a newenewen ngeni Elimas ¹⁰ o a apasa, “En nöün ewe Tefil! En ewe chon oput meinisin mine a mürina! Ka uren sokopaten atuputup me ekisolä. Ka chök soreifochei än ach Samol kapas mi let ngeni kapas chofona! ¹¹ Pöün ach Samol epwe feitiu womw iei chök. Kopwe mesechun, pwe kosap chüen tongeni küna saramen akkar lon eu fansoun.” Lon ewe chök otun och toputup me rochopwak a feitiu won Elimas o atoputupala lon mesan. Iwe, a atapfeil o kütta eman epwe wisen amwöchü pöün o emweni. ¹² Lupwen ewe kepina a küna mine a fis, a lükü, pun a fokun mairü ren ewe afalafal usun ach Samol.

Parnapas me Paulus ra afalafal lon ewe telinimw Antiokia lon Pisitia 13.13-52

¹³ Iwe, Paulus me chienan kana ra sai seni Pafos o sai ngeni Perka lon Pamfilia. Ikenan Johannes Markus a imwü seniir o liwinsefäliiti Jerusalem. ¹⁴ Mürin ra sai seni Perka o tori Antiokia lon Pisitia. Nge lon ewe ränin sapat ra tolong lon ewe imwen felikis o mottiu. ¹⁵ Mürin ar aleani seni än Moses kewe Allük me ekewe puken soufos, ekewe meilapen ewe imwen felikis ra tini eman an epwe üreniir, “Ämi pwiim kana, are a wor ämi afalafalen apöchöküla ekei aramas, oupwe kapas.” ¹⁶ Iwe, Paulus a ütä, a aitiela pöün o apasa, “Ämi pwii kana re Israel me ämi chon lükün Israel meinisin mi fel ngeni Kot, oupwe aüseling ngenieil! ¹⁷ Än chon Israel we Kot a filätä ach kewe lewo o föri pwe repwe eu mwichen aramas mi chomong lupwen fansoun ar nonom lon Isip. Fän watten an manaman a emweniirewu seni ewe fanü. ✱ ¹⁸ Lon ükükün faik ier Kot a alisiir me lon fanüapö, inamwo ika ra lükümach ngeni. ✱ ¹⁹ A akufu fisu mwü lon ewe fanü Kanaan o öffönüa nöün kewe aramas ngeni ewe fanü. ✱ ²⁰ Ei a fis lon ükükün föpükü lime ier.

“Mürin ei, Kot a ngeniir soukapwüng pwe repwe emweniir tori lon fansoun ewe soufos Samuel. ✱ ²¹ Iwe, lupwen ra tüngor eman king, Kot a seikätä Saul nöün Kis seni ewe ainangen Peniamin, pwe epwe nöür king lon ükükün faik ier. ✱ ²² Mürin an asapwilatiu Saul, a seikätä Tafit pwe epwe nöür king. Iei usun mine Kot a pwärätä usun i, ‘Üa küna pwe Tafit nöün Jesi we a lelukeni lelukei. Epwe föri meinisin mine ngang üa mochen pwe epwe föri.’ ✱ ²³ Iwe, me lein mwirimwirin Tafit kewe, Kot a filätä Jesus pwe epwe Chon Amanau fän iten chon Israel, usun a fen pwon. ²⁴ Me mwen än Jesus epwe war, Johannes a afalafal ngeni ekewe aramasen Israel meinisin, pwe repwe kul seni ar tipis o papatais. ✱ ²⁵ Nge lupwen Johannes a arapakan ngeni an epwe awesala an angang, a üreni ekewe aramas, ‘Iö oua ekieki pwe ngang? Sap ngang ätewe oua witiwiti. Nge ewe eman epwe feito me müri, ngang üsap fich

✱ 13:17: Eks 1.7; 12.51 ✱ 13:18: Num 14.34; Tut 1.31 ✱ 13:19: Tut 7.1; Jos 14.1 ✱ 13:20: Souk 2.16; 1.Sam 3.20 ✱ 13:21: 1.Sam 8.5; 10.21 ✱ 13:22: 1.Sam 13.14; 16.12; Kölf 89.20 ✱ 13:24: Mark 1.4; Luk 3.3

ngeni ai üpwe apichi ririn ipwan sus.’ ✧ ²⁶ Ämi pwii kana re Israel, ämi mwirimwirin Apraham me ämi chon lükün Israel meinisin mi fel ngeni Kot: Ei kapasen manau Kot a fen tinato ngenikich! ²⁷ Pun ekewe aramas mi nom lon Jerusalem me nöür kewe souemwen resap silei pwe i ewe Chon Amanau, resap pwal weweiti kapasen ekewe soufos ra aleani iteiten ekewe ränin sapat. Nge lupwen ra atipisi Jesus, ra apwönüetä alon ekewe soufos. ²⁸ Inamwo ika resap tongeni küna och popun ar repwe atipisi pwe epwe mäla, ra tüngor ngeni Pilatus an epwe ninnila. ✧ ²⁹ Iwe, mürin ar föri meinisin mine ekewe Toropwe mi Pin ra kapas usun i, ra angeatiu inisin seni won ewe iräpenges o anomu lon eu peias. ✧ ³⁰ Nge Kot a amanaua i seni mäla. ³¹ Iwe, lon chomong rän a pwä ngeni chokewe mi eti i lon an saifetal seni Kalilea tori Jerusalem. Iei ir ra chon pwärätä i ngeni ekewe aramasen Israel. ✧ ³² Äm aia feito ikei o aronga ngenikemi ewe Pworausen Manau. Mine Kot a fen pwon ngeni ach kewe lewo ³³ a apwönüetä fän itach, kich mwirimwirir, ren an amanauasefäli Jesus, usun a fen mak lon Kölfel sopun ruu:

‘En nei mwän, ikenai üa wiliti semom.’ ✧ ³⁴ Iei usun mine Kot a apasa usun an epwe amanauasefäli seni mäla, pwe esap fokun küna machen somä:

‘Üpwe fokun afeiöchükemi ren ekewe feiöch mi pin usun üa fen pwon ngeni Tafit.’ ✧ ³⁵ Iei mine a pwal mak lon eu wokisin:

‘En kosap mwüt ngeni Noumw we mi Pin an epwe küna machen somä.’ ✧ ³⁶ Pun Tafit a föri mine Kot a akota ngeni lon fansoun manauan, mürin a mäla, a peias ren an kewe lewo, nge inisin a pomach. ³⁷ Nge ätewe Kot a amanauasefäli seni mäla esap pomach inisin. ³⁸ Iei mine ämi pwii kana, üa mochen ämi oupwe silei pwe ewe pworaus usun ach küna amusamusen tipis a torikemi ren Jesus. ³⁹ Ämi meinisin mi lükü i oua ngas seni ämi tipis kana, iei met ewe Allükün Moses esap tongeni föri, pun esap tongeni angasakemiila. ⁴⁰ Iei mine oupwe afälükemi, pwe esap fis ngenikemi mine ekewe soufos ra apasa,

⁴¹ ‘Oupwe nengeni ämi chon turunufasei alon Kot!

Oupwe weitifengenikemi o mäla!

Pun ngang üpwe föri ngenikemi och föföör lon ränin manauemi,

ämi ousap fokun mochen lükü,

inamwo are eman epwe awewe ngenikemi.’ ” ✧

⁴² Iwe, lupwen Paulus me Parnapas ra towu seni ewe imwen felikis, ekewe aramas ra tüngor ngeniir, pwe repwe liwinsefäl lon ewe ränin sapat me mürin o sopwela le kapas ngeniir usun ekei mettoch. ⁴³ Wesin än ekewe aramas mwichfengen, chomong chon Juta me chon lükün Israel mi etiwa ewe lamalamen chon Juta ra tapwela mürin Paulus me Parnapas. Ekewe soukünü ra kapas ngeniir o pese ngeniir pwe repwe sopwela le anomu ar lükülük won ewe ümöümöchün Kot.

⁴⁴ Lon ewe ränin sapat me mürin arapakan unusen chon ewe telinimw ra chufengen pwe repwe rongorong än ach we Samol kapas. ⁴⁵ Nge

✧ **13:25:** Mat 3.11; Mark 1.7; Luk 3.16; Joh 1.20,27 ✧ **13:28:** Mat 27.22-23; Mark 15.13-14; Luk 23.21-23; Joh 19.15 ✧ **13:29:** Mat 27.57-61; Mark 15.42-47; Luk 23.50-56; Joh 19.38-42 ✧ **13:31:** Föf 1.3 ✧ **13:33:** Kölf 2.7 ✧ **13:34:** Ais 55.3 ✧ **13:35:** Kölf 16.10 ✧ **13:41:** Ap 1.5

lupwen ekewe chon Juta ra kûna ewe mwicheichen aramas, ra fokun lolowo. Ra esita mine Paulus a apasa o kapasngau usun. ⁴⁶ Mûrin Paulus me Parnapas ra pôlûeniir fân pworâ, “A pwûng ngenikem âm aipwe akomwen afalafala ngenikemi ewe kapasen Kot. Nge pokiten ousap etiwa, ousap pwal ekieki pwe oua fich ngeni ewe manau esemûch, aipwe likitikemi o feila ngeni ekewe chon lûkûn Israel. ⁴⁷ Pun iei usun mine ewe Samol a allûk ngenikem,

‘Ûa fôri pwe kopwe eu saram fân iten chon lûkûn Israel,
pwe kopwe uwato manau ngeni chon fanûfan meinisin.’ * ✱

⁴⁸ Lupwen ekewe chon lûkûn Israel ra rong ei pworâus, ra pwapwa o mwareiti ân ach Samol kapas. Iwe, chokewe mi fil ngeni manau esemûch ra lûkû. ⁴⁹ Iwe, ân ach Samol kapas a chôfetal lon unusen ewe fanû. ⁵⁰ Nge ekewe chon Juta ra etipetipa ekewe finesamol seni chon lûkûn Israel mi fel ngeni Kot, pwal ekewe souemwenin ewe telinimw pwe repwe ü ngeniir. Ra popuetâ le ariaföüü Paulus me Parnapas o asûrela seni fanûer. ⁵¹ Iwe, ekewe soukûnô ra wichiki pwûlûn fân pecher pwe eu asisilen ar ü ngeni aramasen ewe telinimw o feila Ikonium. ✱ ⁵² Nge ekewe chon lûkû Jesus lon Antiokia ra fokun pwapwa o uren Ngûnmifel.

14

Paulus me Parnapas ra afalafal lon Ikonium

14.1-7

¹ Iwe, lon Ikonium a pwal fis pwe Paulus me Parnapas ra tolong lon ân chon Juta imwen felikis. Ikenan ra afalafal pwe eu mwichen chon Juta me chon lûkûn Israel mi chomong ra lûkû Jesus. ² Nge ekewe chon Juta resap lûkû ra etipetipa ekewe chon lûkûn Israel pwe repwe ü ngeni ekewe chon lûkûlûk. ³ Iei mine Paulus me Parnapas ra nonometiu ikenan fansoun langatam. Ra pworâ le afalafal usun ewe Samol, i ewe mi alletâ pwe ar afalafal usun an ümôümöch a let, pun a atufichiir pwe repwe fôri asisil me manaman. ⁴ Iwe, ekewe aramas lon ekewe telinimw ra tipefesen: Ekoch ra nom won pekin ekewe chon Juta, nge ekoch ra nom won pekin ekewe soukûnô. ⁵ Mûrin ekoch chon lûkûn Israel me chon Juta ra chufengen me nôür kewe souemwen pwe repwe ekieki fengeni usun ar repwe afeiengaua ekewe soukûnô o mone ngeniir fau pwe repwe mâla. ⁶ Nge lupwen ân ekewe soukûnô silei ei pworâus, ra sù ngeni ekewe telinimw Lистра me Terpe lon ewe fanû Likaonia pwal ngeni ekewe fanû ünükûn. ⁷ Lon ekana leni ra sopwela le afalafala ewe Pworâusen Manau.

Paulus me Parnapas ra afalafal lon Lистра me Terpe

14.8-20

⁸ A wor eman mwân lon Lистра a ter inisin. A mâ pechen seni le-uputuan, pwe esap tongeni tufichin fetal. ⁹ Ätei a rong ân Paulus afalafal. Paulus a kûna pwe a wor an lûkû pwe a tongeni pôchökületâ. Iei mine a newenewen ngeni ¹⁰ o apasa fân leüömong, “Kopwe üwenewenetâ won pecheöm!” Iwe, ewe mwân a mwetetâ o popuetâ le fetalfeil. ¹¹ Lupwen ewe mwichen aramas a kûna mine Paulus a fôri, ra kökkö fân leüömong lon fosun Likaonia, “Ekewe kot ra feitiu rech lon lapalapen aramas!” ¹² Ra aita ngeni Parnapas iten ar we kot Seus, nge Paulus ra aita ngeni Hermes iten pwal eman ar kewe kot, pun i âtewe mi silelap kapas.

¹³ Iwe, nöün ewe kot Seus souasor, an imwenfel a chök nom ünükün ewe telinimw, a uwato ätemwänin kow me mwärämwär ren asamalapen ewe telinimw, pun i me ewe mwichen aramas ra mochen eäniir asor ngeni ekewe soukünü. ¹⁴ Nge lupwen Parnapas me Paulus ra rong mine ra ekiekin föri, ra kamwei üfer, ra sälong lukalapen ewe mwichen aramas o kökkö fän leüömong, ¹⁵ “Pwota oua föri ei sokun lapalap? Äm aramas chök usun chök ämi! Äm aia nom ikei, pwe aipwe aronga ngenikemi ewe Pworausen Manau, pwe oupwe kul seni ämi fel ngeni ekei kot mi lomotongau o fel ngeni ewe Kot mi manau, ewe mi föri läng me fanüfan me matau me meinsin mine a nom lor. ✧ ¹⁶ Lon fansoun lom Kot a mwüt ngeni aramas meinsin pwe repwe püsin filätä mine ra mochen föri. ¹⁷ Nge Kot a chök pwärätä usun lapalapan ren an föri ekewe mettoch mi mürina: A fang ngenikemi üt seni läng, pwal kiniemi ua lon fansoun räs, a ngenikemi enemi o aura lelukemi ren pwapwa.” ¹⁸ Iei mwo ekei kapas ra eäni ngeniir, nge a weires ngeni ekewe soukünü pwe repwe pinei ewe mwichen aramas seni ar repwe asor ngeniir.

¹⁹ Mürin ra war ekoch chon Juta seni Antiokia lon Pisitia pwal seni Ikonium. Ra aliapa ewe mwichen aramas ngeni ar pekin, ra monei fau ngeni Paulus o ürawu seni lon ewe telinimw, pun ra ekieki pwe a mäla. ²⁰ Nge lupwen än ekewe chon lükü Jesus ütä pwelin ünükün, Paulus a ütä o liwinsefäliilong lon ewe telinimw. Iwe, sorotän ewe rän Paulus me Parnapas ra feila Terpe.

Paulus me Parnapas ra liwinsefäliiti Antiokia lon Siria

14.21-28

²¹ Iwe, Paulus me Parnapas ra afalafala ewe Pworausen Manau lon Terpe o asoulängala chomong aramas. Mürin ra liwinsefäliiti Listra me Ikonium o sai ngeni Antiokia lon Pisitia. ²² Ra apöchöküla ekewe chon lükü o anüküchareer pwe repwe tupwöl lon ar lükülük. Ra pwal üreniir, “Sipwe tolong lon Mwün Kot ren riaföü mi chomong.” ²³ Iwe, Paulus me Parnapas ra filätä souakom fän iten ekewe souläng lon eu me eu kewe mwichefel. Mürin ar iotek fan echikefel ra likitiir ngeni ach Samol, ewe ir ra anomu ar apilükülük won. ²⁴ Mürin ar saifetal lon ewe fanü Pisitia, ra tori Pamfilia. ²⁵ Nge lupwen ar wes le afalafala ewe kapasen Kot lon Perka, ra feitiu lon ewe telinimw Attalia. ²⁶ Seni ikenan ra liwinsefäliiti Antiokia, ewe leni ia ra anomuur ie me mwan fän tümwünün ewe ümöümöchün Kot fän iten ewe angang ra awesöchüela iei. ²⁷ Iwe, lupwen ar tori Antiokia, ra achufengeni aramasen ewe mwichefel o apworausen ngeniir meinsin mine Kot a föri ngeniir, pwal usun an suki eu asam ngeni ekewe chon lükün Israel pwe repwe lükü Jesus. ²⁸ Iwe, ra nonom ikenan ren ekewe chon lükü Jesus fansoun langatam.

15

Ewe mwichen Soukünü ra mwichfengen lon Jerusalem

15.1-21

¹ Iwe, ekoch mwän ra feito seni Jutea o feila Antiokia, ra popuetä le asukula ekewe chon lükülük, “Ämi ousap tongeni küna manau, are ousap sirkomsais usun met a mak lon än Moses kewe Allük.” ✧ ² Iei popun Paulus me Parnapas ra fokun anini o pölüeniir. Iwe, ra filätä Paulus me Parnapas fiti ekoch chon lükü Jesus seni Antiokia pwe repwe

feila Jerusalem o churi ekewe soukünü me souakom usun ei osukosuk. ³ Iwe, chon ewe mwichefel ra tiniirela, nge lupwen ar saifetal lon Fönisia me Samaria, ra apworaus a ngeni ekewe chon lükü Jesus usun än ekewe chon lükün Israel kul ngeni Kot. Ei pworaus a afisätä watten pwapwa lon leluken ekewe chon lükülük meinisin. ⁴ Lupwen ra tori Jerusalem, chon ewe mwichefel, ekewe soukünü me ekewe souakom ra etiwээр. Iwe, ra apworaus a ngeniir meinisin mine Kot a föri rer. ⁵ Mürin ekoch me lein ekewe chon lükü Jesus, ir chon ewe mwichen Farisi, ra ütä o apasa, “Ekewe chon lükün Israel repwe fokun sirkom-sais. Oupwe pwal üreniir, pwe repwe fokun aleasochisi än Moses kewe Allük.” ⁶ Iwe, ekewe soukünü me ekewe souakom ra chufengen, pwe repwe pwüngüpwüngfengen usun ei osukosuk. ⁷ Mürin chomongun ar akaninifengen Petrus a ütä o üreniir, “Ämi pwii kana, oua silei pwe ekoch ier ra la Kot a fliei me leimi pwe üpwe afalafala ewe Pworausen Manau ngeni ekewe chon lükün Israel, pwe repwe tongeni rongorong o lükü Jesus. ✱ ⁸ Iwe, Kot a silei ekiekin aramas meinisin, a pwäräla an etiwээр ren an fang ngeniir ewe Ngünmifel usun chök an fang ngenikich. ✱ ⁹ Esap wor aimwümwü lefilach me ir. A amusala ar tipis, pokiten ra lükü Jesus. ¹⁰ Iwe, pwota oua sotuni Kot ier ren ämi anomu won afaren ekewe chon lükü Jesus och chou ach kewe lewo pwal püsin kich mwo nge sisap tongeni uwei? ¹¹ Apwi! Kich sia lükü, pwe sia küna manau ren ümöömöchün ach Samol Jesus usun chök ir.” ¹² Iwe, unusen ewe mwich a fanafanala, lupwen ra rongorong usun än Parnapas me Paulus apworaus a ekewe asisil me manaman Kot a föri rer lein ekewe chon lükün Israel. ¹³ Nge lupwen ar wes le kapas, James a apasa, “Ämi pwii kana, oupwe aüseling ngeniei. ¹⁴ Simon a awewe ngenikich usun än Kot popueta le pwäräta an ekiek ren an angei me lein ekewe chon lükün Israel eu mwichen aramas fän itan. ¹⁵ Än ekewe soufos kapas ra fokun tipeefengen won ei, pun a mak,

¹⁶ ‘Iei alon ewe Samol: Lon kan fansoun mwach üpwe liwinsefäl o aüsefälietä ewe mwün Taftit. Üpwe försefäli mine a tala o apöchökülasefäli.

¹⁷ Pwe ekewe ekoch aramas meinisin repwe feito rei, ekewe chon lükün Israel meinisin, üa köri ngeniir nei.

¹⁸ Iei alon ewe Samol mi asile ngeni aramas ekei mettoch me lomlom.’” ✱

¹⁹ Iwe, James a sowwela lon an kapas, “Iei ai ekiek, pwe sisap aweiresi ekewe chon lükün Israel mi kul ngeni Kot. ²⁰ Nge sipwe makkei echö toropwe o asile ngeniir, pwe resap mongö och mongö mi limengau a piin asor ngeni ekewe uluulun anümwäl, resap föri sokun lisowu, resap pwal ochoch fituken man mi ffor me ün cha. ✱ ²¹ Pun än Moses kewe Allük a fen alea fän chomong lon ekewe imwen felikis iteiten ränin sapat, nge an kewe kapas ra afalafala lon ekewe telinimw meinisin.”

Ra tinala ewe toropwe ren ekewe chon lükü Jesus ir chon lükün Israel

15.22-35

²² Mürin ekewe soukünü me ekewe souakom fiti unusen chon ewe mwichefel ra apwüngala pwe repwe filätä ekoch mwän me leir, pwe

✱ 15:7: Föf 10.1-43 ✱ 15:8: Föf 2.4; 10.44 ✱ 15:18: Am 9.11-12 ✱ 15:20: Eks 34.15-17; Lif 17.10-16; 18.6-23

repwe tiniirela Antiokia fiti Paulus me Parnapas. Iwe, ra filätä Silas me Jutas mi pwal iteni Parsapas, ir ruoman souemwen me lein ekewe chon lükü Jesus. ²³ Iei masouen ewe toropwe ra tini ngeniir:

“Äm pwimi kewe soukünö me souakom, aia tinala äm kapong ngeni ämi pwim kana meinisin chon lükün Israel mi nom lon Antiokia, Siria me Silisia. ²⁴ Äm aia rongorong pwe ekoch mwän seni leim ra torikemi, ra osukosukakemi me orukorukakemi ren mine ra apasa, nge äm aisap tiniirela remi. ²⁵ Iei mine äm aia chufengen meinisin o tipeeufengen, pwe aipwe filätä ekoch mwän pwe aipwe tiniirela remi. Repwe fiti pwiich kewe mi achengicheng Parnapas me Paulus, ²⁶ ir ätekewe ra fangela manauer fän iten ewe angangen ach Samol Jesus Kraist, inamwo ika ra tolong lon riaföü. ²⁷ Iei mine aipwe tinala Jutas me Silas, repwe wisen apworaus a ngenikemi met kewe chök kapas aia makkei lon ei toropwe. ²⁸ Ewe Ngünmifel me äm aia tipeeufengen pwe aisap anomu womi och chou, pwe ekei chök allük oupwe apwönüretä: ²⁹ Ousap mongö ekewe mongö ra piin asor ngeni ekewe uluulun anümwäl, ousap ün cha, ousap ochoch fituken man mi ffor, ousap föri sokun lisowu. Are oua tümwünükemi seni ekei mettoch, oupwe feiöch. Äm aia kapong ngenikemi meinisin.”

³⁰ Mürin ra tinala ekewe mwän. Iwe, ra feila Antiokia. Ikenan ra amwichafengeni unusen ewe mwichen chon lükülük o ra ngeniir ewe toropwe. ³¹ Nge lupwen ekewe aramas ra aleani ewe toropwe, ra uren pwapwa ren ekewe kapas mi apöchöküla leluker. ³² Jutas me Silas, ir pwal soufos, ra achomonga ar kapasen apöchöküla o anüküchara ekewe chon lükülük. ³³ Mürin ar nonom ikenan ekoch fansoun, ekewe chon lükülük ra osürela fän kinamwe pwe repwe liwinla ren chokewe mi tiniireto. ³⁴ [Nge Silas a filätä pwe epwe nonometiu ikenan.] ³⁵ Iwe, Paulus me Parnapas ra nonometiu Antiokia. Ikenan ir me pwal ekoch chiechier ra awewei o afalafala kapasen ach Samol.

Paulus me Parnapas ra imwüfesen

15.36-41

³⁶ Iwe, ekoch fansoun mürin Paulus a üreni Parnapas, “Ousipwe liwinsefäl pwe sipwe churi pwiich kewe lon ekewe telinimw meinisin ia sia afalafala ie kapasen ach Samol, sipwe pwal piir ika ifa usur.” ³⁷ Iwe, Parnapas a mochen pwe Johannes mi pwal iteni Markus epwe pwal etiir, ³⁸ nge Paulus esap ekieki pwe epwe öch ar repwe uwei, pun esap likitü le etiir tori sopolan ar we angang, nge a likitiirela lon Pamfilia o liwinsefäliiti Jerusalem. ✠ ³⁹ Iwe, a fis eu watten aninifengen lefiler, pwe ra imwüfesen. Parnapas a uwei Markus o saila Saipros, ⁴⁰ nge Paulus a filätä Silas pwe epwe eti i. A feila, nge ekewe chon lükülük ra anomu i fän tümwünün ümömöchün ewe Samol. ⁴¹ A saifeil lon Siria me Silisia o apöchöküla chon ekewe mwichefel.

16

Timoty a eti Paulus me Silas

16.1-5

¹ Iwe, Paulus a sopwela an sai ngeni Terpe me Listra. Ikenan a nom eman souläng itan Timoty. Inan eman fin Juta mi souläng, nge saman

eman re Krik. ²Timoty a iteuöch me ren ekewe chon lükü Jesus meinisin lon Listra me Ikonium. ³Iwe, Paulus a mochen pwe Timoty epwe eti, iei mine a sirkomsaisi. A föri ei, pokiten ekewe chon Juta meinisin mi nom lon ekewe leni ra silei pwe semen Timoty eman re Krik. ⁴Iwe, lupwen ar saifeil lon ekewe telinimw, ra aronga ngeni ekewe chon lükü Jesus ekewe allük ekewe soukünö me ekewe souakom lon Jerusalem ra apwüngala, ra pwal üreniir pwe repwe aleasochisi ekei allük. ⁵Iei usun chon ekewe mwichefel ra pöchökülela lon ar lükülük o chochomongola iteiten rän.

A wor künaan Paulus me lon Troas
16.6-10

⁶Iwe, Paulus me chiechian kana ra sai lemenen ekewe fanü Frikia me Kalatia, pun ewe Ngünmifel esap mwüt ngeniir pwe repwe afalafala ewe Kapasen Kot lon ewe fanü Asia. ⁷Lupwen ar tori kiänin Misia, ra sotuni ar repwe tolong lon ewe fanü Pitinia, nge ewe Ngünün Jesus esap mwüt ngeniir. ⁸Iei mine ra sai lemenen Misia o feitiu lon ewe telinimw Troas. ⁹Lon ewe pwinin a wor künaan Paulus. A küna eman mwän seni Masetonia, a üta o tüngormau ngeni, “Kose mochen feito Masetonia o alisikem!” ¹⁰Mürin künaan Paulus ei, äm aia müttir amolätä pwe aipwe feila Masetonia, pun aia mefi pwe Kot a körikem pwe aipwe afalafala ewe Pworausen Manau ngeni ekewe aramas ikenan.

Litia a soulängila me lon Filipi
16.11-15

¹¹Iwe, äm aia sai won sip seni Troas o saila wenewen ngeni Samotrasia. Nge sorotän ewe rän aia tori Neapolis. ¹²Seni ikenan aia sai won fanü tori Filipi, iei ewe akaeuin telinimw lon ewe kinikinin fanü lon Masetonia, pwal eu telinimw ia ekewe chon Rom ra nonom ie. Iwe, äm aia nonom ikenan ekoch rän. ¹³Lon ewe ränin Sapat aia feila ngeni eu leni ünükün eu chanpupu lükün ewe telinimw, ewe ia aia ekieki pwe chon Juta ra mwichfengen ie pwe repwe iotek. Iwe, aia mottiu o kapas ngeni ekewe fefin mi mwichfengen ikenan. ¹⁴Iwe, eman me lein ekewe fefin mi aüselingakem Litia seni ewe telinimw Tiatira. Neminei eman chon amömö mangaku mi parachol, nge ra fokun mömong. Ei fefin a fel ngeni Kot, nge ewe Samol a suki lelukan pwe epwe rongosochis ngeni än Paulus afalafal. ¹⁵Mürin än neminei me chon leimwan papatais a tüngor ngenikem, “Oupwe feito o nonom lon imwei are oua ekieki pwe ngang eman chon enletin lükü ach Samol.” Iwe, a pesekem pwe aipwe feila lon imwan.

Paulus me Silas ra nom lon imwen fötek lon Filipi
16.16-40

¹⁶Lon eu rän, lupwen aia feila ngeni ewe lenien iotek, eman amanau föpwül a churikem, eman ngününgau a wäni pwe a tufichin osuni mine epwe fis lon fansoun epwe feito. Neminei a awora chomong moni tolong ngeni nöün kewe masta ren an osuni mine epwe fis ngeni aramas. ¹⁷Ei föpwül a tapwela mürin Paulus me äm chienan kewe o kökkö fän leüömong, “Ekei mwän ir nöün Kot ewe mi Unusen Tekia chon angang! Ra aronga ngenikemi usun ämi oua tongeni küna manau!” ¹⁸Iei usun mine a föri lon chomong kewe rän, tori Paulus a fokun weires ren, pwe a kul ngeni ewe föpwül o üreni ewe ngün mi nom won, “Fän iten Jesus Kraist üa allük ngonuk pwe kopwe towu seni neminei!” Iwe, lon ewe chök otun ewe ngün a towu seni. ¹⁹Lupwen nöün ewe föpwül kewe

masta ra mefi pwe ar alen moni tolong a ükütiü, ra turufi Paulus me Silas o etekiniirela lon ewe lenien chulap ren ekewe sounemenem. ²⁰ Ra emweniirela mwen ekewe samollap o ra üreniir, “Ekei mwän ir chon Juta, ra afisätä fitikoko lon ach ei telinimw. ²¹ Ra afalafal won ekoch örüni mi ü ngeni ach kewe allük. Kich chon Rom, sisap tongeni etiwa ika apwönüetä ekei örüni.” ²² Iwe, pwal ewe mwichen aramas a pöchökül le ü ngeni Paulus me Silas. Mürin ekewe samollap ra kamwei seniir üfer kewe o allük ngeni ekewe sounfiu pwe repwe wichiir. ²³ Wesin ar wichiir fän chomong, ra atururelong lon ewe imwen fötek, nge ra allük ngeni ewe chon masen imwen fötek pwe epwe mamasafichiir. ²⁴ Fän iten ei allük ewe chon masen fötek a atururelong lon ewe rum lukalapan ewe imwen fötek o anükü pecher lefilen irä mi chou.

²⁵ Iwe, ina epwe lukenipwin Paulus me Silas ra iotek o köl kölün mwareiti Kot, nge ekewe chon fötek ra aüseling ngeniir. ²⁶ Iwe, a müttir fis eu chechen fanü mi fokun watte, pwe ewe imwen fötek tori longolongun a mwökütüküt. Lon ewe chök otun ekewe asamalap meinisin ra sukula, nge ekewe selimächä mi föfö ngeni ekewe chon fötek ra pichila. ²⁷ Iwe, ewe chon masen imwen fötek a nenela. Nge lupwen a küna pwe ekewe asamalapan imwen fötek ra sukula, a ekieki pwe ekewe chon fötek ra süla. Iei mine a üttawu nöün ketilas o ekiekin an epwe püsin niela. ²⁸ Nge Paulus a kökkö fän mwelian mi leüömong, “Kosap püsin afeiangauok! Äm meinisin aia nom ikei!” ²⁹ Iwe, ewe chon masen imwen fötek a kökkö pwe eman epwe uwato eu lamp, iwe, a sälong lon ewe rum o chapetiu mwen Paulus me Silas fän chech. ³⁰ Mürin a emweniirewu lükün o aisiniir, “Ai samol kana, met ngang üpwe föri pwe üpwe küna manau?” ³¹ Ra pölüeni, “Kopwe lükü ach Samol Jesus, iwe, ämi me chon leimwom oupwe küna manau.” ³² Mürin ra afalafala kapasen ach Samol ngeni pwal ekewe aramas meinisin mi nom lon imwan. ³³ Lon ewe chök kulok lon ewe pwinin ewe chon masen imwen fötek a emweniirela lon pwal eu rum o a limeti kinaser kewe. Lon ewe chök otun i me chon leimwan meinisin ra papatais. ³⁴ Mürin a emwenala Paulus me Silas lon püsin imwan o amongöniir. Iwe, i me chon an famili meinisin ra fokun pwapwa, pun iei ra lükü Kot.

³⁵ Iwe, lesosorun sorotän ewe rän ekewe samollap ra tinala ekoch meilapen polis fän ei allük, “Oupwe amusala ekei mwän!” ³⁶ Iei mine ewe chon masen imwen fötek a üreni Paulus, “Ekewe samollap ra tinato ei allük pwe ämi me Silas oupwe musala. Iei oupwe le towu o feila fän kinamwe.” ³⁷ Nge Paulus a üreni ekewe meilapen polis, “Ra wichikem mwen mesen ekewe aramas, nge esap wor äm tipis, nge fen äm chon Rom! Mürin ra aturukeemilong lon imwen fötek, nge iei ra mochen tinikeemila le monomon? Apwi, esap fokun ina! Ekewe samollap repwe püsin feito ikei o atowukeemiwu.” ³⁸ Iwe, ekewe meilapen polis ra apworausä ekei kapas ngeni ekewe samollap. Nge lupwen ra rongorong pwe Paulus me Silas ir chon Rom, ra fokun niuokus. ³⁹ Iei mine ekewe samollap ra feila o amusamus ngeni Paulus me Silas. Mürin ra emweniirewu seni ewe imwen fötek o tüngor ngeniir pwe repwe feila seni ewe telinimw. ⁴⁰ Iwe, lupwen ar towu seni ewe imwen fötek, ra feila lon imwen Litia. Ikenan ra churi chiechier kewe chon lükü Jesus o apöchöküla letiper ren ar kapas, mürin ra feila seniir.

17

*Paulus me Silas ra angang ngeni Kot lon Tesalonika**17.1-9*

¹ Iwe, Paulus me Silas ra sai tori ekewe telinimw Amfipolis me Apolonia, ra pwal tori Tesalonika, ia a wor ie eu imwen felikis än chon Juta. ² Iwe, Paulus a tolong lon ewe imwen felikis usun an örüni. Lon ülüngat ränin sapat a kakapas ngeni ekewe aramas seni lon ekewe Toropwe mi Pin, ³ a awewe ngeniir o alletätä seni lon ekewe wokisin pwe ewe Kraist epwe fokun tolong lon riaföü o manausefäl seni mäla. Iwe, Paulus a üra, “Ätei Jesus, ngang üa afalafala ngenikemi usun, iei i ewe Kraist.” ⁴ Iwe, ekoch me lein ekewe aramas ra lükü o tipeeu ngeni Paulus me Silas, pwal chomong chon Krik mi fel ngeni Kot me chomong fefin mi iteföüla.

⁵ Nge ekewe chon Juta ra lolowo. Iei mine ra achufengeni ekoch aramasangau seni won ekewe al o förätä eu mwichen aftikoko mi popuetä eu osukosuk lon ewe telinimw. Ra atalong imwen eman mwän itan Jason fän iten ar repwe kütta Paulus me Silas pwe repwe emweniirewu mwen ewe mwichen aramas. ⁶ Nge pokiten resap küneer, ra etekinawu Jason me ekewe ekoch chon lükü Jesus mwen nöüwisen ewe telinimw o ra kökkö fän leüömong, “Ekei mwän ra afisätä fitikoko ekis meinisin! Nge iei ra feito lon ach ei telinimw. ⁷ Iwe, Jason a etiweer lon imwan. Ir meinisin ra atai än Sisar allük, pun ra apasa pwe mi pwal wor eman king itan Jesus.” ⁸ Iwe, lupwen ar rongorong ekei kapas, ewe mwichen aramas me ekewe nöüwisen ewe telinimw ra tolong lon watten fitikoko. ⁹ Mürin ekewe nöüwis ra echimwa Jason me ekewe ekoch aramas pwe repwe püngütüu moni fän iten ar repwe musala. Mürin ra amuseerewu.

*Paulus me Silas ra angang ngeni Kot lon Perea**17.10-15*

¹⁰ Iwe, lupwen a pwinila, ekewe chon lükü Jesus ra tinala Paulus me Silas Perea. Lupwen ra tori ikenan, ra feila lon ewe imwen felikis än chon Juta. ¹¹ Iwe, ekewe aramasen Perea ra tipemecheres seni ekewe aramasen Tesalonika, pun ra etiwa ewe afalafal fän mochenin letiper. Iteiten rän ra kaiö lon ekewe Toropwe mi Pin o kütta are met Paulus a apasa a wesewesen pwüng. ¹² Iwe, chomong chon Juta me leir ra lükü Jesus. Pwal chomong fin Krik mi itetekia me chomong re Krik ra pwal lükü. ¹³ Nge lupwen ekewe chon Juta mi nom lon Tesalonika ra silei pwe Paulus a pwal afalafala ewe kapasen Kot lon Perea, ra feila ikenan o etipetipa ekewe aramas pwe repwe förätä eu mwichen aftikoko. ¹⁴ Lon ewe chök otun ekewe chon lükü Jesus ra tinala Paulus lon ewe lenien suun sip, pwe epwe sai, nge Silas me Timoty ra nonometiu lon Perea. ¹⁵ Iwe, ätekewe mi emwenala Paulus ra etala tori Aten. Mürin ra liwinsefälti Perea fän än Paulus öüröür ngeniir, pwe Silas me Timoty repwe chök müttir saila ren.

*Paulus a nom lon Aten**17.16-34*

¹⁶ Iwe, lupwen Paulus a witiwiti Silas me Timoty lon Aten, a fokun weires lupwen a küna pwe ewe telinimw a ur ren uluulun anümwäl. ¹⁷ Iei mine a kakapas ngeni ekewe chon Juta me ekewe chon Krik mi fel ngeni Kot me lon ar we imwen felikis. A pwal kapas ngeni ekewe aramas mi feito lon ewe lenien chulap iteiten rän. ¹⁸ Iwe, pwal ekoch soutipachem seni ekewe mwichen Epikurean me Stoik ra aninifengen

me Paulus. Ekoch me leir ra ais, “Met ätei mi tiparoch a mochen apasa lon an aingaing?” Nge pwal ekoch ra apasa, “Usun itä a kakapas usun ekoch koten ekis.” Ra apasa ei, pokiten Paulus a afalafal usun Jesus me ewe manausefäl. Iei mine ra angei Paulus o emwenala ren ewe mwichen soupwüing mi mwichfengen won ewe Areopakus. ¹⁹ Iwe, ra üreni, “Äm aia mochen silei ei afalafal mi fö ka kakapas usun. ²⁰ Ka uwato och pworaus äm aisap fokun rongorong mwo me mwan. Äm aia mochen silei met wewen.” ²¹ (Pun ekewe chon Aten meinisin me ekewe chon ekis mi nom ikenan ra sani ar repwe awora fansoun le apworaus pworaus mi fö o aüseling ngeni pworaus mi fö.)

²² Mürin Paulus a üta me lon ewe mwich me won ewe Areopakus o apasa, “Ämi re Aten! Üa küna pwe oua fokun angang ngeni chomong kot. ²³ Pun lupwen üa fetalfeil lon ämi ei telinimw üa küna ekewe leni ia oua fel ngeni ekewe kot ie, üa pwal küna eu rongen asor a mak ekei kapas won, ‘Fän iten ewe Kot esap wor eman a silei.’ Ewe oua fel ngeni nge ouse fen mwo silei, iei i ewe üa aronga ngenikemi. ²⁴ Ewe Kot mi föri fanüfan me meinisin mine a wor lon, i Samolun läng me fanüfan, esap nonom lon imwenfel mi för ren pöün aramas. ✧ ²⁵ Esap wor och mine a osupwang ren, pwe aramas repwe tongeni awora fän itan, pun püsin i a ngeni aramas manau me ngasangas pwal mettoch meinisin. ²⁶ Seni eman aramas i a föri sokun aramas meinisin, pwe repwe nonom won unusen fanüfan. Mwen an föriir, a akota fansoun manauer o alenier lon en me lenian. ²⁷ Kot a föri ei, pwe aramas repwe kütta i, iwe, eli repwe küna i are repwe küküttafeili. Nge Kot esap wesewesen toau seni eman me eman leich, ²⁸ usun eman a fen apasa, ‘Sia manau me mwökütüküt me nonom lon i.’ A usun chök ekoch me lein nöümi chon makkei köl ra apasa, ‘Pwal kich sia nöün.’ ²⁹ Iei mine pokiten sia nöün Kot kana, sisap fokun ekieki pwe lapalapen Kot a wewe ngeni eu uluulun anümwäl seni kolt ika silifer ika fau, förien sousilelap. ³⁰ Iwe, Kot a manlükala ekewe fansoun lupwen aramas resap silei i. Nge iei a allük ngeni aramas meinisin lon ekewe leni meinisin pwe repwe kul seni ar föför mi ngau. ³¹ Pun a filätä eu rän epwe apwüingü unusen chon fanüfan meinisin fän pwüing ren eman mwän i a awisa ngeni. A fen alletätä ei ngeni aramas meinisin ren an amanauasefäli ei mwän seni mäla.”

³² Iwe, lupwen ekewe aramas ra rongorong pwe Paulus a afalafal usun manausefäl seni mäla, ekoch me leir ra takiri, nge pwal ekoch ra apasa, “Äm aia mochen rongorong om kopwe pwal kapasfäl usun ei mettoch.” ³³ Mürin ei, Paulus a feila seni ewe mwich. ³⁴ Iwe, ekoch mwän ra eti Paulus, pun ra lükü mine a eäni afalafal, eman me leir itan Tionisius, i eman chon ewe mwichen soupwüing. A pwal wor eman fefin itan Tamaris, pwal ekoch aramas mi lükü Jesus.

18

Paulus a angang ngeni Kot lon Korint

18.1-17

¹ Mürin ei, Paulus a feila seni Aten o feila Korint. ² Ikenan a churi eman re Juta itan Akwila, ätei a uputiu lon Pontus, nge ekärän chök feito seni

Itali me pwülüan we Prisila, pun ewe Sisar Klautius a allük pwe ekewe chon Juta meinsin repwe towu seni Rom. Iwe, Paulus a feila rer, ³ nge pokiten a sile angangen föri imw mangaku usun chök ir, a nonometiu o a angangfengen me ir, pwe epwe wor mine epwe manau seni. ⁴ Iwe, iteiten ränin sapat Paulus me ekewe aramas ra kakapasfengen lon ewe imwen felikis, o a achocho le elliapa ekewe chon Juta me chon Krik.

⁵ Iwe, lupwen Silas me Timoty ra feito seni Masetonia, Paulus a awora unusen an fansoun le afalafala ewe kapas, a pwärätä ngeni ekewe chon Juta pwe Jesus i ewe Kraist. ⁶ Nge lupwen ekewe chon Juta ra ü ngeni Paulus o apasatä kapas mi ngau usun i, Paulus a pölüeniir ren an wichikala pwülün üfan o üreniir, “Are ämi oua pöütmwälila, püsin tipisimi, nge sap tipis! Seni ikenai üpwe feila ren ekewe chon lükün Israel.” ⁷ Mürin Paulus a towu seniir o feila, pwe epwe nonom lon imwen eman chon lükün Israel itan Titius Justus, i eman mi fel ngeni Kot. Iwe, imwan a arap ngeni ewe imwen felikis. ⁸ Iwe, Krispus samolun ewe imwen felikis a lükü ewe Samol, i me chon an famili meinsin. Pwal chomong chon Korint mi rongorong än Paulus afalafal ra lükü Jesus o papatais.

⁹ Lon eu pwin ach Samol a kapas ngeni Paulus lon künaan, “Kosap niuokus, nge kopwe chök sopwela le afalafal. Kosap fangata, ¹⁰ pun ngang üpwe etuk. Esap wor eman epwe tongeni afeiangauok, pun a wor chomong nei aramas lon ei telinimw.” ¹¹ Iei mine Paulus a nonom ikenan lon ükükün eu esop ier o asukula ewe Kapasen Kot ngeni ekewe aramas.

¹² Iwe, lupwen Kallio a fil pwe epwe kepinan ewe fanü Akaia, ekewe chon Juta ra chufengen, ra turufi Paulus o etekinala lon ewe lenien kapwüng. ¹³ Ra apasa, “Ei mwän a sotuni an epwe pese ngeni aramas, pwe repwe fel ngeni Kot lon eu lapalap mi ü ngeni äm kewe allük.” ¹⁴ Iwe, lon ewe otun Paulus a mochen popuetä le kapas, Kallio a üreni ekewe chon Juta, “Are ämi oupwe uwato och kapasen tipi ngeni usun eu föföer esepwüng ika eu föföer mi fokun ngau, epwe öch ngeniei ai üpwe aüselingakemi. ¹⁵ Nge pokiten iei och anini usun kapas me it me ämi allük, püsin ämi oupwe apwüngala. Ngang üsap mochen soukapwüng won ekei sokun mettoch.” ¹⁶ Iwe, a asürewu seni lon ewe lenien kapwüng. ¹⁷ Mürin ir meinsin ra turufi Sostenes, ewe samolun imwen felikis, o wichi mwen ewe lenien kapwüng. Nge Kallio esap ekeiki usun mine ra föri.

Paulus a liwinsefäli Antiokia

18.18-23

¹⁸ Iwe, Paulus a nonom ren ekewe chon lükü Jesus lon Korint lon chomong rän. Mürin a feila seniir o a sai ngeni Siria, nge Prisila me Akwila ra eti. Me mwen än Paulus epwe sai seni Kenkrea, a reipöpöla möküran pokiten eu pwon a eäni. * ☆ ¹⁹ Iwe, ra tori Efisos, ikenan Paulus a likiti Prisila me Akwila. Nge i a feila lon ewe imwen felikis o kakapasfengen me ekewe chon Juta. ²⁰ Ir ra tüngor ngeni, pwe epwe nonom rer ekoch fansoun, nge i esap tipeeu ngeni. ²¹ Nge lupwen a feila seniir, a pwon ngeniir, “Are epwe letipen Kot, üpwe liwinsefäli remi.” Mürin a sai seni Efisos. ²² Iwe, lupwen a tori Seserea, a pwal feila ngeni Jerusalem o kapong ngeni chon ewe mwichefel. Mürin a feila Antiokia. ²³ Mürin an nonom ekoch fansoun ikenan, a feila seni Antiokia o fetalfeil

* **18:18:** wewen än eman reipöpöla möküran, pwe a awesala an pwonon Nasir. ☆ **18:18:** Num 6.18

lemenen ewe fanü Kalatia me Frikia. Iwe, a apöchöküla ekewe chon lükü Jesus meinisin.

Apollos a angang ngeni Kot lon Efisos me Korint.

18.24-28

²⁴ Lon ewe fansoun eman chon Juta itan Apollos, i a uputiü lon Aleksantria, a tori Efisos. Ätei eman mi silelap le afalafal, a pwal silefichi kapasen lon ekewe Toropwe mi Pin. ²⁵ A fen kaiö usun Alen ach Samol o seni pöchökülen pwapwan letipan a afalafal o aiti ngeni aramas ekewe mettoch mi enlet usun Jesus, nge a chök silei usun än Johannes angangen papatais. ²⁶ Ätei a popuetä le afalafal fän pwora lon ewe imwen felikis. Nge lupwen Prisila me Akwila ra aüseling ngeni, ra uweela lon imwer o awewefichi ngeni ewe Alen ach Samol. ²⁷ Iwe, Apollos a ekiëkin sai ngeni Akaia, iei mine ekewe chon lükü Jesus lon Efisos ra alisi ren ar mak toropwe ngeni ekewe chon lükü Jesus mi nom ikenan o tüngor ngeniir pwe repwe etiwa Apollos. Iwe, lupwen Apollos a tori Akaia, a fokun alisi chokewe mi lükü Jesus ren ümömöchün Kot. ²⁸ Pun fän pwüngün mine a anini won, a akufu ekewe chon Juta lon ar üpölüfengen mwen ekewe aramas ren an alletätä seni lon ekewe Toropwe mi Pin pwe Jesus ewe Kraist.

19

Paulus a angang ngeni Kot lon Efisos

19.1-10

¹ Iwe, lupwen Apollos a nom lon Korint, Paulus a saifetal lemenen ewe fanü o a tori Efisos. Ikenan a küna ekoch souläng ² o a aisiniir, “Ifa usun, oua angei Ngünmifel lupwen oua lükü?” Ir ra pölüeni, “Äm aisap rongorong mwo pwe a wor eman Ngünmifel.” ³ Iei mine Paulus a aisiniir, “Ika ina, iwe, met sokun papatais oua angei?” Ra pölüeni, “Ewe papatais Johannes a kapas usun.” ⁴ Mürin Paulus a üreniir, “Ewe papatais Johannes a eäni, a föri ngeni chokewe mi aier seni ar tipis. A pwal üreni ekewe aramas Israel ar repwe lükü ewe eman epwe feito me mürin, iei i Jesus.” ⁵ Iwe, mürin ar rong ekei kapas, ra papatais ngeni iten ewe Samol Jesus. ⁶ Lupwen Paulus a iseis pöün wor, ewe Ngünmifel a feitiu wor. Iwe, ra kapas lon kapasen ekis o arongafeili ewe Kapasen Kot. ⁷ Ina epwe iteiter meinisin engol me ruoman mwän.

⁸ Iwe, Paulus a feila lon ewe imwen felikis, nge a pwora le afalafal ngeni ekewe aramas lon ükükün ülüngat maram. A kakapas ngeniir o pese ngeniir ar repwe lükü, pwe met i a apasa usun ewe Mwün Kot a let. ⁹ Nge ekoch me leir ra tipeförea. Resap fokun lükü, nge ra fen kapasingau mwen ewe mwichen aramas usun ewe Alen ach Samol. Iei mine Paulus a feila seniir o uweela ekewe chon lükü. Iwe, iteiten rän a afalafal lon utten Tiranus ia aramas ra akafalafal ie. ¹⁰ Ei a fis lon ükükün ruu ier, pwe ekewe aramas meinisin mi nom lon ewe fanü Asia, ir ekewe chon Juta me ekewe chon lükün Israel, ra rongorong kapasen ach Samol.

Nöün Skefa kewe mwän

19.11-20

¹¹ Iwe, Kot a föri manaman mi amwarar ren Paulus. ¹² Ika mwo ekewe angkachi me mangaku Paulus a aea, aramas ra angei o iseis won ekewe chon samau, ar samau a wesila, nge ekewe ngününgau ra towu seniir.

✱ 19:4: Mat 3.11; Mark 1.4,7-8; Luk 3.4,16; Joh 1.26-27

¹³ Ekoch chon Juta mi saifetal o asüela ngününgau seni aramas ra pwal sotuni le aea iten ewe Samol Jesus lupwen ar föri ei angang. Ra kapas ngeni ekewe ngününgau, “Üa allük ngenikemi fän iten Jesus, ätewe Paulus a afalafal usun.” ¹⁴ A wor füman mwän nöün ewe souasor mi lap re Juta itan Skefa ra föri ei sokun föför. ¹⁵ Nge ewe ngününgau a kapas ngeniir, “Ngang üa silei Jesus, üa pwal silei usun Paulus, nge ämi iö?” ¹⁶ Iwe, ewe mwän ewe ngününgau a nom won a fokun pwora le fiu ngeniir, pwe ra kuf meinisin. Ra sü seni imwen ewe mwän, ra kinas, nge üfer ra kamwekamwekis seniir. ¹⁷ Iwe, ekewe chon Juta me ekewe chon lükün Israel meinisin mi nom lon Efisos ra rong usun ei pworaus. Ir meinisin ra fokun niuokus, nge iten ach Samol Jesus a fokun iteföüla. ¹⁸ Iwe, chomong lein ekewe chon lükü Jesus ra feito o pwärätä ar kewe föför mi ngau mwen mesen ekewe aramas. ¹⁹ Pwal chomong me lein chokewe mi föri angangen roong ra uwato nöür kewe puken roong o keniirela mwen mesen ekewe aramas meinisin. Nge lupwen ra apachafengeni liwinin ekewe puk, iwe, a pwä pwe ükükün liwinir lime ngeröü chala. ²⁰ Iwe, pokiten ekei mettoch mi amwarar ra fisitä, kapasen ach Samol a chöfetal o chomong aramas ra lükü Jesus.

A fis eu fitikoko watte lon Efisos

19.21-41

²¹ Mürin an fis ekei mettoch, Paulus a filätä fän emwenien ewe Ngünmifel pwe epwe sai lemenen Masetonia me Akaia o feila Jerusalem. A apasa, “Mürin ai feila ikenan, üpwe pwal fokun tori Rom.” ²² Iei mine a tinala Timoty me Erastus, ruoman me lein ekewe chon alisi lon ewe angang pwe repwe feila Masetonia, nge i epwe nonom lon Asia ekoch fansoun. ²³ Lon ena fansoun a fis eu osukosuk watte lon Efisos pokiten ewe Alen ach Samol. ²⁴ Iwe, eman mwän mi föri pisek seni silifer itan Temetrius a föri liosun imwenfelin ewe anüfeffin Artemis. Iwe, an we angang a aworato watten win ngeni nöün kewe chon angang. ²⁵ Iei mine a körifengeniir meinisin fiti chokewe mi föri ewe sokun angang usun ir o a üreniir, “Ämi mwän kana, oua silei pwe ach pisekisek a feito seni ei angang. ²⁶ Nge iei oua tongeni püsin küna o rongorong met ätenan Paulus a föri. A apasa pwe ekewe uluulun kot mi för ren pöün aramas resap wesewesen kot. Nge a fen liapenala chomong aramas ikei lon Efisos pwal lon arapakan unusen ei fanü Asia. ²⁷ A wor och afeiengau ngenikich, pwe ach angang epwe itengau. Nge a pwal wor och afeiengau, pwe imwenfelin ewe anülap feffin Artemis epwe aücheangauala o an itetekia epwe wesila. Iei i ewe anüfeffin aramasen Asia meinisin, pwal chon fanüfan meinisin ra fel ngeni!”

²⁸ Iwe, lupwen ekewe aramas lon ewe mwich ra rong ekei kapas, ra fokun lingeringer o ra popuetä le pupuchör, “A lalalap ewe anüfeffin Artemis seni Efisos!” ²⁹ Ewe akürang a chöfetal lon unusen ewe telinimw. Ekewe aramas mi afitikoko ra turufi Kaius me Aristarkus o müttir etekiniirela lon ewe lenien urumwot. Ätekei me ruoman re Masetonia mi eti Paulus lon an sai. ³⁰ Iwe, Paulus a mochen püsin feila mwen ewe mwich, nge ekewe chon lükü Jesus resap mwüt ngeni. ³¹ Pwal ekoch nöüwisen ewe fanü, ir chiechien Paulus, ra tinala pworaus ren Paulus o tüngormau ngeni, pwe esap feito lon ewe lenien urumwot. ³² Nge lon ewe otun unusen ewe mwichen aramas a fokun akürang. Ekoch aramas ra pupuchör won och, pwal ekoch ra pupuchör won och, nge chomong

me leir resap fen mwo nge silei ika met popun ar chufengen. ³³ Ekoch me lein ekewe aramas ra ekieki pwe Aleksanter i popun ei osukosuk, pun ekewe chon Juta ra pese ngeni pwe epwe ütā mwen ewe mwichen aramas. Mürin Aleksanter a änipō ngeni ekewe aramas pwe repwe fanafanala. Iwe, a sotuni le kapas ngeni ekewe aramas pwe esap tipisin me chiechian kewe, pwe a fis ei osukosuk. ³⁴ Nge lupwen ra silleni pwe i eman re Juta, ir meinsin ra köpökütā won ewe chök kapas lon ukükün ruu awa, “A lalalap ewe anüfeñin Artemis seni Efisos.”

³⁵ Iwe, ewe seketerin ei telinimw a tongeni aükala akürangen ekewe aramas. A üreniir, “Ämi chon Efisos! Aramas meinsin ra silei pwe ei telinimw Efisos a tümwünü imwenfelin ewe anülap Artemis, a pwal tümwünü ewe fau mi pin a turutiu seni läng. ³⁶ Esap wor eman a tongeni amam won ekei mettoch. Iei mine oupwe fokun mosononola, nge ousap föri och mettoch mi ngau. ³⁷ Ämi oua emwenato ekei mwän ikei, rese fen mwo nge solāni och seni ekewe imwenfel ika apasatā och kapas mi ngau usun ach we anüfeñin. ³⁸ Are a wor än Temetrius me nöün kewe chon angang kapasen atatur fän iten eman, a wor ekewe rän mi kefilitā fän iten kapwüng, a pwal wor ekewe sounemenem repwe tongeni apwüngü lon lenien kapwüng. ³⁹ Nge are mi pwal wor och lükün met ei oua mochen, ei epwe kapwüngüla me lon ewe mwich än chon ei telinimw mi akökkö me ren ekewe nöüwis. ⁴⁰ Pun mürin mine a fis ikenai, repwe tongeni atipisikich pokiten ewe mwichen aftikoko. Esap wor och popun fän iten ei akürang, sisap pwal tongeni pwärätā och popun mi mürina fän iten ei lalalap.” ⁴¹ Iwe, mürin an apasatā ekei kapas, a aserala ewe mwichen aramas.

20

Paulus me chiechian kana ra feila Masetonia me Akaia

20.1-6

¹ Iwe, wesin ewe fitikoko, Paulus a körifengeni ekewe chon lükü Jesus, a kapong ngeniir o eāni kapasen amwirimwir ngeniir mi apöchöküla letiper. Mürin a feil seniir o feila Masetonia. ² A saifeil lemenen ewe fanü o apöchöküla letipen ekewe aramas ren chomong an afalafal. Mürin a tori Akaia ³ o a nonom ikenan lon ukükün ülüngat maram. Lupwen Paulus a amolätā an epwe sai ngeni Siria, a rongorong pwe ekewe chon Juta ra rawangauei. Iei mine a filätā an epwe liwinsefäliti lemenen ewe fanü Masetonia. ⁴ Sopater nöün Pirrus seni Perea a eti, pwal Aristarkus me Sekuntus seni Tesalonika, Kaius seni Terpe, Tikikus me Trofimus seni ewe fanü Asia me Timoty. ⁵ Ra akomwola mwem o witiwitikem lon Troas. ⁶ Iwe, äm aia sai seni Filipi mürin ewe Chulapen mongö pilawa esap wor iis lon, nge limu rän mürin aia chufengen me ir lon Troas. Iwe, aia nonom ikenan lon ukükün eu wiik.

Amüchülan än Paulus nonom lon Troas

20.7-12

⁷ Iwe, lekuniolun räninamol äm aia chufengen o mongöfengen ewe mongön ach Samol. Iwe, Paulus a afalafala ekewe aramas, nge a chök sopwela le afalafaleer tori lukenipwin, pun a ekiekin feil seniir sorotän ewe rän. ⁸ Mi wor chomong lamp lon ewe ruum asan ia ra chufengen ie. ⁹ Eman alüal itan Oitikus a mot lon eu asammwacho. Nge lupwen Paulus a sopwela chök le afalafal, Oitikus a echikichikila o möürüla tori a

möürüchoula. Iwe, a turutiu lepwül me won aülüngatin sässärin ewe imw. Nge lupwen ra ekietä, a fen mäla. ¹⁰Nge Paulus a feitiu rer, a chapela won ewe alüal o romi. Iwe, a apasa, “Ousap lolilen, a chüen manau!” ¹¹Mürin a liwinsefälitä won ewe sässärin asan, a utu pilawa o ra mongöfengen me ekewe chon lükü Jesus. Iwe, Paulus a kapas ngeniir tori akkar a tötä, mürin a feil seniir. ¹²Iwe, ra emwenala ewe alüal ngeni lenian, nge a manau. Iwe, ekewe aramas ra fokun chipila.

Än Paulus sai seni Troas tori Miletus

20.13-16

¹³Iwe, äm aia akomwola won sip o saila tori Assos, ikenan äm aia angei Paulus me ie. Pun Paulus a ürenikem pwe aipwe föri iei usun, pokiten i a mochen fetal won fanü tori Assos. ¹⁴Lupwen a churikem me lon Assos, a tötä rem won ewe wa, o äm aia sai ngeni Mitilene. ¹⁵Äm aia sai seni ikenan o sorotän ewe rän äm aia tori wenewenen Kios. Eu rän mürin aia tori Samos, nge sorotän ewe rän aia tori Miletus. ¹⁶Iwe, Paulus a filätä pwe esap tori Efisos, pwe esap mochen alusala an fansoun lon ewe fanü Asia. Pun a atapwal ngeni an epwe tori Jerusalem lon ewe ränin Pentikost are epwe tufich.

Än Paulus kapasen amwirimwir ngeni ekewe souakom seni Efisos

20.17-38

¹⁷Iwe, seni Miletus Paulus a tinala echö toropwe Efisos o tüngor ngeni ekewe souakomwen mwichefel pwe repwe feito o chufengen. ¹⁸Lupwen ra feito ren, Paulus a üreniir, “Ämi oua silei usun manaei me ewe angang üa föri lon unusen ewe fansoun üa nonom remi, seni ewe aeuin rän üa tori ewe fanü Asia. ¹⁹Fän unusen tipetekison pwal fän watten chönün mesei üa föri ai angang usun eman nöün ewe Samol chon angang lon ekewe fansoun weires mi toriei pokiten än ekewe chon Juta rawan-gauaei. ²⁰Oua silei pwe üsap amwöchü och mine epwe alisikemi lupwen üa afalafalakemi o aiti ngenikemi ewe pworaus usun ewe Samol Jesus lon mwichen aramas pwal lon en me imwan. ²¹Üa apöchöküla ai fön ngeni ekewe chon Juta me ekewe chon lükün Israel, pwe repwe kul seni ar tipis kana o kul ngeni Kot, repwe pwal lükü ach Samol Jesus. ²²Nge iei, pokiten ai aleasochisi ewe Ngünmifel, ngang üpwe feila Jerusalem. Nge üsap silei mine epwe fis ngeniei me ikenan. ²³Üa chök silei pwe lon ekewe telinimw meinisin Ngünmifel a amefi ngeniei pwe üpwe tolong lon fötek me riaföü. ²⁴Nge manaei esap aüchea ngeniei. Üa chök mochen awesala ai kitir o awesöchüela ewe angang ach Samol Jesus a ngeniei pwe üpwe föri. Iei ewe angang ai üpwe pwärätä ewe Pworausen Manau usun ewe ümömöchün Kot. ✧ ²⁵Ngang üa nomfeil leimi o afalafal usun ewe Mwün Kot. Nge iei üa silei, pwe üsap chüen künasefälikemi. ²⁶Iei mine üpwe fokun pwäri ngenikemi ikenai: Are eman leimi epwe pöütmwälila, esap tipis. ²⁷Pun ngang üa apworaus a ngenikemi unusen ekiekin Kot, nge üsap amwöchü och senikemi. ²⁸Iei mine oupwe mamasakemi me unusen chon ewe mwichefel ewe Ngünmifel a atolongeer fän ämi tümwün. Oupwe chon masen ewe mwichefelin Kot, i a möni ren chaan püsin Nöün we. ²⁹Ngang üa silei pwe mürin ai üpwe feila senikemi, aramas mi wewe ngeni wolif mwacho repwe feito leimi o repwe fokun afeiengaua ämi we mwich. ³⁰Epwe war ewe fansoun, lupwen ekoch me lon ämi we mwich

repwe eäni kapas chofona ar repwe atokala ekewe chon lükü Jesus pwe repwe etiir. ³¹ Iei mine oupwe mamasa. Oupwe chechemeni pwe lon ükükün ülüngat ier, üsap ükütiü le fönöü eman me eman leimi lerän me lepwin fän chönün mesei. ³² Nge iei üa anomukemi fän tümwünüen Kot me an kapasen ümömöch. I a tongeni apöchökülakemiitä o ngenikemi ekewe feiöch a iseis fän iten nöün aramas meinisin. ³³ Ngang üsap mocheniäiti än eman silifer ika kolt ika mangaku. ³⁴ Ämi oua püsin silei, pwe ngang üa püsin angang ren pei pwe epwe wor ekewe mettoch meinisin ngang me chiechiei kewe aia osupwang ren. ³⁵ Ngang üa aiti ngenikemi lon ai föför meinisin, pwe ren ach angang weires lon ei sokun lapalap sipwe fokun alisi ekewe chon apwangapwang o chechemeni ekewe kapas ach Samol Jesus a püsin apasa, ‘Sia feiöch ren ach fang lap seni ach angei mettoch.’ ”

³⁶ Lupwen än Paulus wes le apasatä ekei kapas, a fotopwäsuketiu fiti ir meinisin o iotek. ³⁷ Iwe, ir meinisin ra kechü lupwen ra kapong ngeni fän ar tong. ³⁸ Ra fokun lolilen ren an apasa, pwe resap chüen künasefäli. Mürin ra etala tori ewe sip epwe eti.

21

Paulus a sai ngeni Jerusalem

21.1-16

¹ Iwe, äm aia kapong ngeniir o feil seniir. Mürin äm seseres wewenela aia tori Kos. Sorotän ewe rän aia tori Rotes, nge seni ikenan aia sai ngeni Patara. ² Ikenan aia küna efoch sip mi saila Fönisia, iei mine aia tötä won o fitala. ³ Iwe, aia tori eu leni ia aia tongeni küna Saipros me ie. Mürin aia saila örün ewe fanü o sai ngeni Siria. Aia tiwelong Tirus ia ra atötü wosen ewe sip me ie. ⁴ Ikenan aia küna ekoch chon lükü Jesus o aia nonom rer lon ükükün eu wiik. Iwe, fän aitian Ngünmifel ngeniir ra üreni Paulus, pwe esap feila Jerusalem. ⁵ Nge lupwen äm fansoun nonom rer a wes, aia likitiir o sopwela äm sai. Nge ir meinisin fiti pwülüer me nöür kana ra etikeemiwu seni ewe telinimw tori ewe pi. Ikenan äm meinisin aia fotopwäsuk o iotek. ⁶ Mürin aia kapong ngeniir o tötä won ewe sip, nge ir ra liwiniti lenier.

⁷ Iwe, aia sopwela äm we sai, aia seres seni Tirus tori Ptolemais. Ikenan aia kapong ngeni ekewe chon lükü Jesus o nonom rer eu rän. ⁸ Sorotän ewe rän aia sai seni ikenan o tori Seserea. Ikenan aia nonom lon imwen Filip, i eman chon arongafeili ewe Pworausen Manau, pwal i eman lein ekewe füman mwän mi keflitä me lon Jerusalem. ✨ ⁹ Ätei a wor föman nöün föpwül resap pwüpwülü, ra tongeni pwäri mine a monomon. ¹⁰ Mürin äm nonom ikenan ekoch rän, eman soufos itan Akapus a feito seni Jutea. ✨ ¹¹ A feito rem, a angei än Paulus pelit o föti ngeni pöün me pechen, iwe, a üra, “Iei met ewe Ngünmifel a apasa: ‘Ekewe chon Juta mi nom lon Jerusalem repwe föti ätewe mine an ei pelit lon ei lapalap, repwe pwal atolonga lepöün ekewe chon lükün Israel.’ ” ¹² Lupwen aia rong ekei kapas, äm me ekewe aramas mi nom rem, aia tüngormau ngeni Paulus, pwe esap feila Jerusalem. ¹³ Mürin Paulus a pölüeni, “Pwota oua kechü o atai letipei? Ngang üa molotä sap ngeni chök ai üpwe föfö, nge pwal ngeni ai üpwe mäla lon Jerusalem fän iten ach Samol Jesus.” ¹⁴ Iwe,

esap pitela rem, iei mine aia fanafanala. Iwe, aia üra, “Epwe fis letipen ach Samol.”

¹⁵ Mürin äm nonom ikenan ekoch fansoun, aia amolätä äm pisek o feila Jerusalem. ¹⁶ Nge ekoch me lein ekewe chon lükü Jesus me lon Seserea ra pwal etikem o emwenikeemila lon imwen eman mwän itan Mnason ia aia wasöla ie. Ätei i seni Saipros, eman chon lükü Jesus seni chök lom.

Paulus a churi James

21.17-26

¹⁷ Iwe, lupwen aia tori Jerusalem, ekewe chon lükü Jesus ra pwapwa le etiwakem. ¹⁸ Sorotän ewe rän, Paulus a etikem le feila churi James. Iwe, ekewe souakomwen mwichefel meinisin ra pwal nom. ¹⁹ Iwe, Paulus a kapong ngeniir o apworaus a ngeniir tichikin meinisin mine Kot a föri me lein ekewe chon lükün Israel ren an angang. ²⁰ Mürin ar rongorong ngeni, ir meinisin ra mwareiti Kot. Mürin ra üreni Paulus, “Pwiim Paulus, ka küna pwe mi wor chomong ngeröün chon Juta ra lükü Jesus, nge ir meinisin ra fokun achocho le apwönüetä ekewe Allük. ²¹ Ir ra rong usumw, pwe ka afalafala ekewe chon Juta meinisin mi nonom lon ekewe fanüen chon lükün Israel, pwe repwe pöütala än Moses kewe allük, ka pwal üreniir pwe resap sirkomsaisi nöür semirit ika aleasochisi örünien ekewe chon Juta. ²² Met sipwe föri? Ir repwe fokun rongorong pwe ka war. ²³ Iei met aia mochen pwe kopwe föri. Mi wor föman mwän mi nom ikei, ra fen föri eu pwon mwen mesen Kot. ²⁴ Kopwe etiir o pach ngeniir lon ar angangen limelim, kopwe pwal mönätiu ewe ükükün liwin fän iten ekewe asoren limelim. Mürin repwe tongeni reipöpöla möküer. Ren ei lapalap aramas meinisin repwe mefi pwe püsin en ka apwönüetä än Moses kewe Allük. ✧ ²⁵ Nge ren ekewe chon lükün Israel mi lükü Jesus, aia tinala toropwe ngeniir o asile ngeniir mine sia apwüngala, pwe resap mongö ekewe mongö ra piin asor ngeni ekewe uluulun anümwäl, resap ün cha, resap ochoch fituken man mi ffor, resap pwal föri sokun lisowu.” ✧ ²⁶ Iei mine Paulus a eti ekewe mwän, nge sorotän ewe rän a fitiir le föri ewe angangen limelim. Mürin a tolong lon ewe imwenfel o asile ngeniir inet ekewe ränin limelim repwe wesila o ekewe asor repwe tongeni fis fän iten eman me eman leir.

Ra turufi Paulus me lon imwenfel

21.27-36

²⁷ Nge lupwen a arapakan ngeni pwe ekewe fisu rän repwele sopola, ekoch re Juta seni ewe fanü Asia ra küna Paulus me lon ewe imwenfel. Ra etipetipa unusen chon ewe mwich o ra turufi Paulus. ²⁸ Ra kökkö fän leüömong, “Ämi re Israel! Oupwe alisikem! Iei i ewe mwän mi saifeil ekis meinisin o a eäni och sokun afalafal ngeni aramas meinisin mi ü ngeni ekewe aramasen Israel, än Moses kewe Allük me ei imwenfel. Nge iei a fen mwo nge uwato ekoch chon lükün Israel lon ei imwenfel o apiningaua ei leni mi pin!” ²⁹ (Ra apasa ei pokiten ra küna Trofimus seni Efisos mi eti Paulus lon ewe telinimw, nge ra ekieki pwe Paulus a uweela lon ewe imwenfel.) ✧ ³⁰ Iwe, eu fitikoko a chöfetal lon unusen ewe telinimw o ekewe aramas ra säto seni ekis meinisin. Ra turufi Paulus o atekinawu seni lon ewe imwenfel. Mürin ra müttir öpüngala ekewe asamalapen ewe imwenfel. ³¹ Lupwen ra sotuni ar repwe niela Paulus,

ewe pworaus a tori ewe sounemenemen sounfiun Rom, pwe unusen ewe telinimw Jerusalem a nom lon watten fitikoko. ³² Lon ewe chök otun ewe sounemenemen sounfiu a angei ekoch meilap me ekoch sounfiu o ra sätiu ren ewe mwichen aramas. Lupwen än ekewe aramas küna i fiti ekewe sounfiu, ra ükütiu le wichi Paulus. ³³ Iwe, ewe sounemenem a fetal wenewen ngeni Paulus, a turufi o allük pwe repwe föti ngeni ruofoch sein. Mürin a ais, “Iö ei mwän? Nge met a föri?” ³⁴ Iwe, ekoch me lon ewe mwich ra kökkötä won och, nge pwal ekoch won och. A fis eu watten fitikoko, pwe ewe sounemenem esap tongeni fateiti met a fis. Iei mine a allük ngeni nöün kewe sounfiu pwe repwe angei Paulus o uweetä won lenier we. ³⁵ Ra emwenala Paulus tori ewe latö, mürin ekewe sounfiu ra eki pokiten ekewe aramas lon ewe mwichen afitikoko ra fokun song. ³⁶ Ir meinisin ra tapweri o pupuchör, “Oupwe niela ätenan.”

Paulus a püsin peni i

21.37–22.5

³⁷ Iwe, lupwen än ekewe sounfiu repwe le emwenala Paulus lon ewe lenien sounfiu, Paulus a kapas ngeni ewe sounemenemen sounfiu, “Kose mochen üpwe apasa och ngonuk?” Ewe sounemenem a aisini, “Ifa usun, ka silei fosun Krik? ³⁸ Sap en ewe re Isip mi popuetä eu mwichen ü ngeni mwü o emwenawu rüanüngeröü chon ni aramas lon ewe fanüapö lon ekewe fansoun ra la?” ³⁹ Iwe, Paulus a pölüeni, “Ngang eman re Juta, üa uputiu lon ewe telinimw Tarsus lon Silisia, ngang eman chon eu telinimw mi iteföüla. Kose mochen mwüt ngeniei ai üpwe kapas ngeni ekei aramas.” ⁴⁰ Mürin ewe sounemenem a mwüt ngeni. Iei mine Paulus a ütä won ewe latö o a änipö ngeni ekewe aramas, pwe repwe fanafanala. Iwe, lupwen ra fanafanala, Paulus a popuetä le kapas ngeniir lon fosun Ipru:

22

¹ “Ämi pwii me semei kana, oupwe aüseling ngeniei, pun üpwe püsin peniei mwemi.” ² Lupwen ar rongorong an kapas ngeniir lon fosun Ipru, ra fokun mosonosonola. Mürin Paulus a sopwela le kapas ngeniir, ³ “Ngang eman re Juta, üa uputiu lon ewe telinimw Tarsus lon Silisia, nge üa mämäritä ikei lon Jerusalem. Üa sukul ren ewe sense Kamaliel, a aiti ngeniei tichikin ekewe allük seni ach kewe lewo pwe üpwe apwönüretä. Üa fangala manauai ngeni Kot usun chök ämi oua föri ikenai. ✧ ⁴ Üa ariaföüü ekewe aramas tori ar mäla, ir chokewe mi fetal won Alen ewe Samol. Üa turufi mwän me fefin o atururelong lon imwen fötek. ⁵ Ewe Souasor mi Lap me unusen ewe mwichen soupwüing ra tongeni alletätä pwe mine üa apasatä a let. Üa angei seniir ekewe toropwe ra mak ngeni pwiir kewe chon Juta mi nom lon Tamaskus. Iei mine üa feila ikenan pwe üpwe turufi ekei aramas o aliwinisefäliireto ngeni Jerusalem fän föföör, pwe repwe angei liwinin ar föföör. ✧

Paulus a pwärätä usun wililan manauan

22.6-16

(Föf 9.1-9; 26.12-18)

⁶ “Iwe, lupwen ai sai o üa arap ngeni Tamaskus, leoloas a fis pwe a pwäkai ngeniei och saram mi fokun saramaram me läng a feitiu woi.

7 Üa turutiu lepwül o üa rong eu möngüngü a üreniei, ‘Saul, Saul, pwota ka ariaföüiei?’⁸ Nge ngang üa aisini, ‘Samol, en iö?’ Iwe, a pölüeniei, ‘Ngang Jesus seni Nasaret ewe ka ariaföüü.’⁹ Iwe, ekewe mwän mi etiei ra chök kûna ewe saram, nge resap rongorong möngüngün ewe eman mi kapas ngeniei.¹⁰ Iwe, üa aisini, ‘Ai Samol, met ka mochen üpwe föri?’ Ewe Samol a üreniei, ‘Kopwe pwätä o feila lon ewe telinimw Tamaskus, ikenan repwe ürenuk meinisín mine Kot a akota pwe kopwe föri.’¹¹ Mesei ra chunula pokiten ewe saram, iei mine chiechiei kewe ra amwöchü pei o ra emwenieilong lon Tamaskus.

¹² “[Lon ena telinimw a wor eman mwän itan Ananias. I eman mwän mi achocho le fel ngeni Kot o aleasochisi ach kewe allük, a pwal watte sufölün me ren ekewe chon Juta meinisín mi nom lon Tamaskus. ¹³ Ätewe a feito rei, a ütä ünüki o üreniei, ‘Pwii Saul, kopwe künasefäli mwomw!’ Lon ewe chök otun üa künasefäli mwei o newenewen ngeni. ¹⁴ Iwe, Ananias a üra, ‘Än ach kewe lewo we Kot a filuketä pwe kopwe silei letipan, kopwe pwal kûna nöün we Chon Angang mi pwüng o kopwe rongorong mwelian lupwen a kapas ngonuk. ¹⁵ Pun en kopwe eman chon pwärätä fän itan ngeni aramas meinisín ren met ka kûna o rong. ¹⁶ Nge met ka witiwiti iei? Kopwe ütä o papatais, nge ren om iotek ngeni i om tipis kana repwe musala.’

Paulus a kö an epwe afalafal ngeni chon lükün Israel
22.17-29

¹⁷ “Iwe, üa liwinsefäliiti Jerusalem, nge lupwen ai iotek lon ewe imwenfel a wor künaei. ¹⁸ Üa kûna ach Samol a kapas ngeniei, ‘Kopwe müttir towu seni Jerusalem iei chök, pun ekewe aramas resap etiwa om pwärätä usi.’ ¹⁹ Iwe, üa pölüeniei, ‘Ai Samol, ir ra fokun silei pwe ngang üa feila lon ekewe imwen felikis ai üpwe turufi o wichi chokewe mi lükü en. ²⁰ Nge lupwen ar niela nounw chon pwärätä Stefanus, ngang üa nom ikenan o tipeeu ngeni ar niela, üa pwal tümwünü üfen ätekewe mi niela i.’^{*} ²¹ Iwe, ach Samol a üreniei, ‘Kopwe feila, pun ngang üpwe tinukela won ekewe fanü toau ren ekewe chon lükün Israel.’”

²² Iwe, ekewe aramas ra äüseling ngeni Paulus tori a apasätä ekei kapas. Nge mürin ra popuetä le pupuchör fän mwelier mi leüömong, “Oupwe fokun niela ätei! Esap fokun öch an epwe manau!” ²³ Ra pupuchör, ra änipüfetalei üfer kewe o aparasätä pwül läng. ²⁴ Mürin ewe sounemenemen sounfiu a allük ngeni nöün kewe sounfiu pwe repwe etekinalong Paulus lon ewe lenien sounfiu. Iwe, a üreniir pwe repwe wichi o kütta popun än ekewe chon Juta pupuchör ngeni lon ei lalalap. ²⁵ Nge lupwen ar chüen föti an epwe wichiwich, Paulus a üreni eman me lein ekewe meilapen sounfiu mi ü ikenan, “Ifa usun, a pwüng ngenikemi ämi oupwe wichi eman chon Rom, nge esamwo fat lon kapwüng pwe a tipis?” ²⁶ Lupwen ewe meilapen sounfiu a rong ekei kapas, a feila ren ewe sounemenem o aisini, “Met ka föri? Enan mwän i eman chon Rom.” ²⁷ Iei mine ewe sounemenem a feila ren Paulus o a aisini, “Kopwe pwäri ngeniei, ifa usun, en eman chon Rom?” Paulus a pölüeniei, “Ewer!” ²⁸ Ewe sounemenem a üra, “Ngang üa wiliti eman chon Rom ren ai mönätiu chomong moni.” Paulus a pölüeniei, “Nge ngang eman chon Rom seni chök ai uputiu.” ²⁹ Lon ewe chök otun ekewe mwän repwe atittina Paulus

* 22:20: Föf 7.58

ra timärämär seni. Nge ewe sounemenem a niuokus lupwen a silei pwe Paulus eman chon Rom, nge a fen föti ngeni sein.

Paulus a ü me mwen ewe mwichen soupwüing

22.30–23.11

³⁰ Iwe, ewe sounemenemen sounfiu a wesewesen mochen küttaöchü met ekewe chon Juta ra atipisi Paulus won. Iei mine sorotän ewe rän a apichi ekewe sein Paulus a föfö ngeni, a pwal allük ngeni ekewe souasor mi lap me unusen ewe mwichen soupwüing pwe repwe mwichfengen. Mürin a angei Paulus o aütai me mwer.

23

¹ Iwe, Paulus a newenewen ngeni ewe mwichen soupwüing o apasa, “Ämi pwii kana re Israel! Üa manaueni manau ei mwen mesen Kot, nge esap wor och mengiringirin letipei tori ikenai.” ² Ren ei ewe Souasor mi Lap Ananias a allük ngeni ätekewe mi ütä ünükün Paulus pwe repwe pösapei awan. ³ Mürin Paulus a üreni, “Kot epwe fokun pösapeek, en tit mi peinitipwech! Ka mot ikenan ren om kopwe apwüingüei fän pwüingün ekewe Allük, nge en ka purätü ekewe Allük ren om allük ngeniir, pwe repwe pösapeei!” ✧ ⁴ Iwe, ätekewe mi kan ngeni Paulus ra üreni, “En ka kapasingau usun nöün Kot we Souasor mi Lap!” ⁵ Paulus a pölüeni, “Ämi pwii kana, üsap silei pwe ätenan i ewe Souasor mi Lap, pun ekewe Toropwe mi Pin ra apasa, ‘Kosap kapasingau usun samolun noumw aramas!’ ” ✧

⁶ Iwe, lupwen Paulus a küna pwe ekoch chon ewe mwich ir Satusi, nge pwal ekoch ir Farisi, a leüömong le kapasowu ren ewe mwichen soupwüing, “Ämi pwii kana re Israel! Ngang eman Farisi, nöün eman Farisi. Üa kapwüing ikei pokiten ai apilükülük pwe ekewe mi mäla repwe manausefäl!” ✧ ⁷ Lon ewe chök otun a apasatä ekei kapas, ekewe Farisi me Satusi ra popuetä le aninifengen o ewe mwich a kinikinfesen. ⁸ (Pun ekewe Satusi ra apasa pwe esap wor manausefäl seni mäla, ra pwal apasa pwe esap wor chon läng me ngün. Nge ekewe Farisi ra lükü lon ir me ülüngat.) ✧ ⁹ Iwe, ar kapas a leüömongola o ekoch seni ekewe Sensen Allük, ir seni lon ewe mwichen Farisi, ra ütä o ra pöchökül le anini, “Äm aisap tongeni küna och mwälin ei mwän! Eli eman ngün ika eman chon läng a wesewesen kapas ngeni!” ¹⁰ Iwe, ewe anini a chök fokun wattela, pwe ewe sounemenemen sounfiu a niuokus, ika ekewe aramas repwe atatakisi inisin Paulus. Iei mine a allük ngeni nöün kewe sounfiu pwe repwe feitiu lon ewe mwich, repwe angeawu Paulus seniir o aliwinala lon ewe lenien sounfiu. ¹¹ Lon ewe pwinin, ewe Samol a ütä ren Paulus o a üreni, “Kosap niuokus! Ka pwäriei ikei lon Jerusalem, iei usun kopwe pwal fokun pwäriei lon Rom.”

Ra rawangauei Paulus

23.12–22

¹² Lesosorun sorotän ewe rän ekoch chon Juta ra chufengen o föri eu raw. Ra atolongeer lon eu pwon mi fis fän akapel, pwe resap mongö ika ün och tori ar repwe niela Paulus. ¹³ Mi wor lap seni faik mwän mi akotafengeni ei raw. ¹⁴ Mürin ra feila ren ekewe souasor mi lap me ekewe souakom o ra üreniir, “Äm aia atolongakem lon eu pwon, pwe aisap

mongö och tori äm aipwe niela Paulus. ¹⁵ Iei mine ämi me ewe mwichen soupwüng oupwe tinala ämi kapasen tüngor ngeni ewe sounemenemen sounfiu pwe epwe emwenatiu Paulus remi. Oupwe tipin föri pwe oua mochen kütta tichikin pworausen an föför. Nge äm aipwe molotä pwe aipwe niela i me mwën an esap mwo tori ikei.” ¹⁶ Nge nöün feñinen Paulus a rongorong usun ei raw. Iei mine a feila lon ewe lenien sounfiu o apworausä ngeni Paulus mine a fis. ¹⁷ Mürin Paulus a körato eman me lein ekewe meilapen sounfiu o a üreni, “Kose mochen emwenala ei alüal ngeni ewe sounemenemen sounfiu. A wor och mine epwe asile ngeni.” ¹⁸ Iwe, ewe meilapen sounfiu a angei ewe alüal o emwenala ren ewe sounemenem o üreni, “Ewe chon fötek Paulus a köriei o tüngor ngeniei pwe üpwe emwenato ei alüal reöm, pun a wor och mine epwe asile ngonuk.” ¹⁹ Ewe sounemenem a kamwöch pöün ewe alüal, a emwenala ekis o aisini, “Met ka mochen asile ngeniei?” ²⁰ Ewe alüal a üra, “Ekewe chon Juta ra tipeeufengen pwe repwe tüngor ngonuk leSOR om kopwe emwenatiu Paulus lon ar we mwichen soupwüng, nge repwe tipin föri ei pwe ra mochen kütta tichikin pworausen. ²¹ Nge üa tüngor ngonuk pwe kosap aüseling ngeniir, pun a wor lap seni faik mwän ra op o witiwit. Ra atolungeer lon eu pwon mi fis fän akapel, pwe resap mongö ika ün tori ra niela Paulus. Iei ra molotä pwe repwe föri ei o witiwiti om kopwe apwüngala ar tüngor.” ²² Iwe, ewe sounemenem a üreni, “Kosap üreni eman, pwe en ka apworausä ngeniei ei pworaus.” Mürin a tinala ewe alüal.

Ewe sounemenem a tinala Paulus ren ewe kepina Feliks

23.23-35

²³ Mürin ewe sounemenemen sounfiu a körato ruoman nöün kewe meilapen sounfiu o üreniir, “Oupwe amolätä ruopükü sounfiu pwe repwe feila Seserea me fik chon wawa oris, pwal ruopükü chon uwou siles. Iwe, oupwe molotä ämi oupwe sü seni ikei kulok tiu lepwinei. ²⁴ Oupwe pwal awora ekoch oris fän iten Paulus pwe epwe wawa o tümwünüöchü i lupwen oupwe uweela ren ewe kepina Feliks.” ²⁵ Mürin ewe sounemenemen sounfiu a makkei echö toropwe. Iei masouan:

²⁶ “Ngang Klautius Lisias üa kapong ngeni en ämäfen kepina Feliks:

²⁷ Ekewe chon Juta ra turufi ei mwän o ra sotun niela. Iwe, üa rong pwe i eman chon Rom, iei mine üa fiti nei kewe sounfiu o amanaua.

²⁸ Üa mochen silei met popun ar atipisi, iei mine üa emwenatiu lon ar we mwichen soupwüng.

²⁹ Iwe, üa küna pwe esap föri och mine epwe tipisin mäla ren ika tolong lon imwen fötek. Ar kewe kapasen tipi ngeni ra pop seni ekewe kapasen anini usun püsin ar kewe allük.

³⁰ Nge lupwen ar asile ngeniei, pwe ekoch chon Juta ra rawangauei ei mwän, üa müttir tinala reöm. Iwe, üa üreni ekewe chon atipisi, pwe repwe feila reöm o pwäri ngonuk me mwomw ar kewe kapasen tipin ngeni.”

³¹ Iwe, ekewe sounfiu ra apwönüetä mine ewe sounemenem a fen allük ngeniir. Ra angei Paulus o uweela lon ewe pwinin tori Antipatris.

³² Sorotän ewe rän ekewe sounfiu mi fetal ra liwinsefälti ewe lenien sounfiu o likiti ngeni ekewe chon wawa oris pwe repwe sowwela le emweni Paulus. ³³ Iwe, ra emwenala tori Seserea, ra ngeni ewe kepina ewe toropwe o ra atolonga Paulus fän nemenian. ³⁴ Ewe kepina a aleani

ewe toropwe o aisini Paulus meni fanü a feito seni. Iwe, lupwen a silei pwe Paulus a feito seni ewe fanü Silisia,³⁵ a üra, “Ngang üpwe rongorong ngonuk lon ewe kapwüng lupwen ekewe chon atipisuk repwe war.” Mürin a allük pwe sounfiu repwe mamasa Paulus lon ewe imw Herotes a aüetä.

24

Ekewe chon Juta ra atipisi Paulus

24.1-9

¹ Iwe, limu rän mürin ewe Souasor mi Lap Ananias a feila Seserea fiti ekoch souakom me eman souallük itan Tertullus. Ra feito mwen mesen ewe kepina Feliks o pwärätä ekewe tipis ra tipí ngeni Paulus. ² Mürin ar körato Paulus, Tertullus a popuetä le pwärätä an kapasen atutur. Iei usun mine a apasa: “En ämäfen kepina! Om tipachem le emwenikich a aworato kinamwe ngenikich lon fansoun langatam, pwal chomong minefön mettoch ra fisitä fän iten feiöchün fanüach. ³ Ekis meinisin pwal fansoun meinisin äm aia etiwa ei sokun feiöch, nge äm aia fokun kilisou chapur ngonuk. ⁴ Ngang üsap mochen atai om fansoun, nge üa tüngor ngonuk pwe kopwe kirikiröch ngenikem o aüseling ngeni äm kewe kapas mi mochomoch. ⁵ Äm aia mefi pwe ei mwän eman aramas mi fokun afeiangau. A popuetä fitikoko lein ekewe chon Juta won unusen fanüfan, i eman souemwenin ewe mwichen Nasaret. ⁶ A pwal sotuni an epwe apiningaua ewe Imwenfel, nge äm aia turufi. [Äm aia ekiëkin apwüngü fän pwüngün püsin äm kewe allük, ⁷ nge ewe sounemenemen sounfiu Lisias a war o angei senikem fän pöchökül. ⁸ Mürin Lisias a üreni, pwe ekewe chon atipisi ei mwän repwe feito me mwomw.] Are en kopwe kapas ais ngeni ei mwän, kopwe tongeni silei seni i usun ekewe mettoch meinisin aia atipisi won.” ⁹ Iwe, ekewe chon Juta ra tipeu ngeni ekewe kapasen atipisi o üra pwe meinisin a let.

Paulus a püsin peni me mwen ewe kepina Feliks

24.10-23

¹⁰ Iwe, ewe kepina a pwome ngeni Paulus an epwe kapas. Iwe, Paulus a üra, “Ngang üa silei pwe en ka fen soukapwüngün ei mwü lon chomong ier. Iei mine üa pwapwa ai üpwe püsin peniei me mwomw. ¹¹ Usun ka tongeni püsin silei pwe esap mwo lap seni engol me ruu rän ra la, pwe ngang üa feila Jerusalem ai üpwe fel ngeni Kot. ¹² Ekewe chon Juta resap küna pwe üa anini ngeni eman me lon ewe Imwenfel, resap pwal künaei pwe üa föri och mine aramas repwe fitikoko ren, sap lon ekewe imwen felikis ika ekis meinisin lon ewe telinimw. ¹³ Resap pwal tongeni alletätä pwe a let ekewe kapasen atipisi ra aturuei won iei. ¹⁴ Nge ngang üpwe pwärätä ei ngonuk: Üa fel ngeni än ach kewe lewo we Kot ren ai fetal won ewe Al ir ra apasa pwe mi mwäl. Nge üa pwal lükü meinisin mine a mak lon än Moses kewe Allük pwal lon ekewe puken soufos. ¹⁵ Üa pwal apilükülük lon ewe Kot ir ra pwal apilükülük ngeni, pwe aramas meinisin, ekewe chon pwüng me ekewe aramas mi ngau, repwe manausefäl seni mäla. ¹⁶ Iei mine üa achocho ngeni fansoun meinisin, pwe esap wor mengiringirin letipei me mwen Kot me aramas.

¹⁷ “Mürin ai toau seni Jerusalem ekoch ier, üa liwinto ikei ai üpwe uwato moni fän iten alilisin aramasei kewe chon Juta mi osupwang, üpwe pwal uwato ai asor. ¹⁸ Lupwen üa föri iei usun, ra künaei lon ewe Imwenfel,

mürin ai awesi ai we angangen alimelim. Esap wor eu mwichen aramas a nom rei, esap pwal wor och fitikoko. ✧ ¹⁹ Nge ekoch chon Juta seni ewe fanü Asia ra nom ikenan. Püsin ir repwe feito mwomw o pwärätä ar kapasen atutur are mi wor mine ra tongeni atipisiei won. ²⁰ Ika ekei mwän mi nom ikei repwe pwärätä met sokun föföringau ra küna rei lupwen üa ütä me mwen ewe mwichen soupwüng, ²¹ chilon chök ewe eu mettoch üa kökkö lupwen üa ütä me mwer, ‘Ngang üa küna kapwüng me remi ikenai fän iten üa lükü pwe ekewe sotup repwe manausefäl.’ ✧

²² Mürin Feliks mi sileöchü usun ewe Al a aukätü ewe kapwüng o üreniir, “Lupwen ewe sounemenemen sounfiu Lisias epwe war, üpwe atowu pwüngün ei kapwüng.” ²³ Iwe, a allük ngeni ewe meilapen sounfiu mi tümwünü Paulus, pwe epwe mamasaöchü Paulus, nge epwe ekis angasa o mwüt ngeni chiechian kana ar repwe alisi ngeni met a osupwang ren.

Paulus a ütä me mwen Feliks me Trusilla

24.24-27

²⁴ Mürin ekoch rän Feliks a feito fiti pwülüan we itan Trusilla, i eman fin Juta. A titi Paulus o aüseling ngeni lupwen a afalafal usun ach lükülük lon Kraist Jesus. ²⁵ Nge lupwen Paulus a sopwela le kakapas usun pwüng, usun ach sipwe tongeni nemeni püsin inisich, pwal usun ewe ränin kapwüng lon ewe fansoun lesopolan, Feliks a niuokus o apasa, “Kopwe feila iei, ngang üpwe kökkörisefäluk lupwen epwe wor ai fansoun mi fich.” ²⁶ Lon ena fansoun Feliks a pwal apilükülükü pwe Paulus epwe ngeni moni, iei popun a soun titi i pwe repwe pworausfengen. ²⁷ Iwe, ruu ier mürin, Porkius Festus a siwili Feliks lon wisen kepina. Nge Feliks a mochen kütta an chen me ren ekewe chon Juta, iei mine a likiti Paulus lon imwen fötek.

25

Paulus a tüngor pwe an kapwüng epwe amwet ngeni Sisar

25.1-12

¹ Iwe, ülüngat rän mürin än Festus tori ewe fanü, a feila seni Seserea tori Jerusalem. ² Ikenan ekewe souasor mi lap me ekewe souemwenin chon Juta ra aturu Paulus. Ra tüngor ngeni Festus, ³ pwe epwe alisiir pwe Paulus epwe feito Jerusalem, pun ra föri eu raw pwe repwe niela won ewe al. ⁴ Festus a pölüeniir, “Paulus epwe chök nom lon imwen fötek lon Seserea, nge püsin ngang üpwe feila ikenan mürin ekis fansoun mochomoch. ⁵ Nöümi kewe souemwen repwe etieila Seserea o aturu ei mwän are a föri och föföer mi ngau.”

⁶ Iwe, Festus a pwal nonom rer walu ika engol rän, mürin a feila Seserea. Sorotän ewe rän a mot won ewe lenien kapwüng o allük pwe repwe emwenato Paulus. ⁷ Nge lupwen Paulus a war, ekewe chon Juta mi feito seni Jerusalem ra ütä pwelin ünükün o popuetä le aturu won chomong föföer mi ngau ra atipisi won. Nge resap tongeni alletätä pwe a pwüng. ⁸ Nge Paulus a püsin peni i o apasa, “Üsap föri och mwäl ngeni än chon Juta kewe allük ika apiningaua ewe Imwenfel ika ü ngeni Sisar lon Rom.” ⁹ Nge Festus a mochen kütta an chen me ren ekewe chon Juta, iei mine a aisini Paulus, “Ifa usun, ka tipeeu ngeni om kopwe feila Jerusalem, pwe üpwe apwünguk ikenan won ekei kapasen atutur ra atipisuk won?” ¹⁰ Iwe, Paulus a üra, “Ngang üa ütä me mwen än Sisar

lenien kapwüŋ, ewe ia üpwe kapwüŋ ie. Ngang üsap föri och föför mi mwäl ngeni ekewe chon Juta usun ka fen silei. ¹¹ Are ngang üa purätü eu kewe allük o föri och pwe üpwe tolong lon tipisin mäla, ngang üsap tüngor pwe üpwe ngasala seni. Nge are esap pwüŋ ekewe kapasen atutur ra atipisiei won, esap wor eman a tongeni atolongaei lepöür. Iwe, ngang üa tüngor pwe ei kapwüŋ epwe amwet ngeni Sisar.” ¹² Mürin än Festus pworaus ngeni nöün kewe souöüröür a pölüeni, “Ka tüngor pwe om ei kapwüŋ epwe amwet ngeni ewe Sisar, iei popun kopwe fokun feila ren Sisar.”

Paulus a ütä me mwen Akripa me Pernika
25.13-27

¹³ Mürin ekoch fansoun ewe king Akripa me Pernike ra feito Seserea ar repwe churi o kapongen etiwetiwi ngeni Festus. ¹⁴ Mürin ar nonom ikenan ekoch rän, Festus a apworaus ngeni ewe king usun pworausen Paulus: A wor eman mwän ikei lon imwen fötek Feliks a likitätü. ¹⁵ Nge lupwen üa feila Jerusalem, nöün ekewe chon Juta kewe souasor mi lap me ekewe souakom ra uwato ar kapasen atutur ra atipisi won o tüngor ngeniei, pwe üpwe apwüŋgala pwe a tipis. ¹⁶ Nge ngang üa üreniir, pwe oukich chon Rom lon örüniach sisap atipisi eman aramas ren och tipis me mwen an epwe churi ekewe chon atipisi, pwe epwe tongeni püsin peni i won ekewe kapasen atutur ra atipisi won. ¹⁷ Iwe, lupwen ra feito ikei, üsap olusala ai fansoun, nge sorotän ewe rän üa mot lon ewe lenien kapwüŋ o allük pwe repwe emwenato ewe mwän rei. ¹⁸ Iwe, ekewe chon ü ngeni ra ütä, nge resap aturu won och föför mi fokun ngau usun üa ekieki pwe repwe föri. ¹⁹ A chök wor ekoch kapasen anini ngeni usun pwüŋgün ar lamalam, pwal usun eman mwän itan Jesus mi mäla, nge Paulus a apasa pwe a manausefäl. ²⁰ Iwe, üsap chüen silei epwe ifa usun ai üpwe tongeni angei ai wewe won ekei mettoch. Iei mine üa tüngor ngeni Paulus are epwe tipeeu ngeni an epwe feila Jerusalem, pwe epwe kapwüŋ ikenan won ekei kapasen atutur. ²¹ Nge Paulus a tüngor, pwe an kapwüŋ epwe amwet ngeni ewe Sisar an epwe filätä pwüŋgün, nge i epwe chök nom lon imwen fötek. Iei mine üa allük ngeni ekewe sounfiu, pwe repwe mamasa tori üpwe tongeni tinala i ren Sisar.” ²² Iwe, Akripa a üreni Festus, “Ngang üa mochen püsin rongorong ngeni ei mwän.” Festus a pölüeni, “Lesor kopwe rongorong ngeni.”

²³ Sorotän ewe rän Akripa me Pernika ra feito fän sokopaten fouter mi ling, pwal fän etiwetiwi seni ekewe aramas. Ra tolong lon ewe utten mwich fiti ekewe meilapen sounfiu me ekewe souemwenin ewe telinimw. Fän än Festus allük ra emwenato Paulus lon ar we mwich. ²⁴ Iwe, Festus a üra, “King Akripa pwal meinisin mi etikich le nom ikei: Ämi oua küna ei mwän ekewe chon Juta meinisin mi nom ikei me ekewe mi nom lon Jerusalem ra ü ngeni. Ra uwato ar kapasen atutur rei o ra pupuchör, pwe esap pwüŋ ngeni an epwe chüen manau. ²⁵ Ngang üsap küna och föför a föri fän iten an epwe tipisin mäla. Iwe, pokiten püsin i a tüngor pwe an kapwüŋ epwe amwet ngeni ewe Sisar; üa ekieki ai üpwe tinala ren. ²⁶ Nge esap wor och mine üpwe tongeni makkeela ren ewe Sisar usun föförün ätei. Iei mine üa emwenato i me mwemi meinisin, fokun me mwomw king Akripa, pun wesin ei angangen chosa fän itan, epwe wor mine üpwe tongeni makkeetü usun. ²⁷ Pun esap

pwüing ngeniei ai üpwe tinala eman chon fötek, nge esap fatöch ekewe kapasen atutur ra atipisi won.”

26

Paulus a püsin peni me mwen ewe king Akripa

26.1-11

¹ Iwe, Akripa a üreni Paulus, “Äm aia mwütätä ngonuk pwe kopwe pwärätä fän itom.” Iei mine Paulus a aitiewu pöün, a popuetä le püsin peni i o üra, ² “King Akripa! Üa fokun kilisou, pun üa tongeni püsin peniei me mwomw usun ekewe mettoch meinisin ekewe chon Juta ra atipisiei won. ³ Nge a fokun öch, pun ka fokun silefichi örünien ekewe chon Juta me mine ra anini won. Iei mine üa tüngor om kopwe aüselingaei fän mosonotam.

⁴ “Ekewe chon Juta meinisin ra silei usun nonomi seni leküküni. Ra silei usun uruwon manaei seni lepoputän lupwen üa nom lon fanüei pwal lon Jerusalem. ⁵ Ra fen silei seni me lom, nge ika ra mochen ra tongeni pwärätä usi, pwe ngang eman Farisi, chon ewe mwich mi fokun tichik me lon ach lamalam. ✧ ⁶ Nge iei üa ütä ikei pwe üpwe kapwüing pokiten ai apilükülükü ewe pwon Kot a ngeni ach kewe lewo, ⁷ ewe chök pwon aramasach kewe seni ekewe engol me ruu ainang ra apilükülükü pwe repwe angei lupwen ra fel ngeni Kot lerän me lepwin. Iwe, ämäfen king, pokiten ei apilükülük ekewe chon Juta ra atipisiei ren. ⁸ Pwota ämi chon Juta oua ekieki pwe esap tufich ach sipwe lükü pwe Kot epwe amanuatä ekewe mi mäla? ⁹ Püsin ngang üa ekieki, pwe üpwe fokun föri meinisin mine üa tongeni ai üpwe ü ngeni ewe Jesus seni Nasaret. ¹⁰ Iwe, iei met üa föri lon Jerusalem. Üa angei ai mwümwütä seni ekewe souasor mi lap pwe üpwe aturalong lon imwen fötek chomong nöün Kot kewe aramas, nge lupwen a towu pwüingün pwe repwe ninnila, üa pwal tipeeu ngeni. ¹¹ Fän chomong üa ariaföüür lon ar kewe imwen felikis, üa pwal achocho le föri mine repwe fangata ar lükülük ren. Lon ai lingeringeritiir üa fen mwo nge feila ngeni ekewe telinimwen chon ekis pwe üpwe ariaföüür. ✧

Paulus a pwärätä usun wililan manauan

26.12-18

(Föf 9.1-19; 22.6-16)

¹² “Iwe, fän iten ei popun üa feila Tamaskus fän pwüingün me akünöüen ekewe souasor mi lap. ¹³ Ämäfen king, lupwen üa fetal won ewe al leoloas, üa küna eu saram seni läng mi saramaram seni akkar a sarametiu ünüki me chiechiei kewe mi etiei. ¹⁴ Iwe, äm meinisin aia turutiu lepwül, nge ngang üa rong eu möngüngü mi kapas ngeniei lon fosun Ipru, ‘Saul, Saul, pwota ka ariaföüüei? Ka püsin afeiengauok ren om ü ngeniei, usun eman kow a chepeti ewe wok mi nom lepöün ewe chon tümwünü.’ ¹⁵ Iwe, ngang üa ais, ‘En iö Samol?’ Ach Samol a pölüeni, ‘Ngang Jesus ewe ka ariaföüü. ¹⁶ Kopwe pwätä o ütä. Ngang üa pwä ngonuk ai üpwe awisok pwe kopwe nei chon angang. Kopwe pwärätä mine ka küna usi ikenai, pwal mine üpwe pwäri ngonuk lon ekewe fansoun repwe feito. ¹⁷ Üpwe amanauok seni ekewe aramasen Israel, pwal seni ekewe chon lükün Israel, chokewe ngang üpwe tinukela rer. ¹⁸ Kopwe aneloi meser,

pwe repwe kul seni rochopwak o kul ngeni saram, repwe towu seni fän nemenien Satan o tolong fän nemenien Kot, nge ren ar lüküei repwe küna amusamusen ar tipis kana o angei lenier ren chokewe mi pin.’

Paulus a pwärätä usun an angang

26.19-32

¹⁹ “Iei mine ämäfen king Akripa, üsap aleasolap ngeni künaei we seni läng. ²⁰ Üa afalafal akom lon Tamaskus me Jerusalem, mürin lon unusen fanüen ekewe chon Juta, pwal lein ekewe chon lükün Israel, pwe repwe aier seni ar tipis o kul ngeni Kot, pwe repwe föri sokun föföör mi pwärätä pwe ra ekiexefäl. ☆ ²¹ Iei popun pwe ekewe chon Juta ra turufiei o sotuni ar repwe nieila. ²² Nge tori ikenai Kot a alisie, iei mine üa ütä ikei o pwärätä mine a let ngeni aramas meinisin, seni ekewe mi kis tori ekewe mi lap. Iwe, mine üa eäni afalafal a wewefengen me mine ekewe soufos me Moses ra afalafala pwe epwe fis, ²³ pwe ewe Kraist epwe fokun riaföü o epwe aemanün mi manausefäl seni mäla an epwe arongafeili ewe saramen manau ngeni ekewe chon Juta me ekewe chon lükün Israel.”

☆ ²⁴ Iwe, lupwen Paulus a püsin peni i lon ei ititin kapas, Festus a kökkö fän leüömong, “Paulus, ka umwes! Om silelap a aunwesuk!” ²⁵ Paulus a pölüeni, “En ämäfen Festus, ngang üsap umwes. Mine üa apasatä lon ai mirit a let. ²⁶ King Akripa, en ka silei usun ekei mettoch meinisin, iei mine üa pwora le kapas ngonuk. Üa lükü pwe ka sileiöchü ekei mettoch meinisin, pun resap fis le monomon chök. ²⁷ King Akripa, ka lükü kapasen ekewe soufos? Ngang üa silei pwe ka lükü!” ²⁸ Mürin Akripa a üreni Paulus, “Ka ekieki pwe ka tongeni peseei lon ei fansoun mochomoch, pwe üpwe soulängila?” ²⁹ Paulus a pölüeni, “Ese liflifil ika fansoun mochomoch ika fansoun langatam, nge üa chök iotek ngeni Kot pwe en me ir meinisin mi rongorong ngeniei ikenai oupwe wewe ngeniei lon ai souläng, nge sap lon ai föfö!”

³⁰ Mürin ewe king, ewe kepina me Pernike, pwal chokewe meinisin mi nom ra ütä o towu seni ewe leni. ³¹ Mürin ar towu ra kapasfengen lefiler, “Ei aramas esap föri och mine epwe tipisin mäla ren ika nom lon imwen fötek.” ³² Iwe, Akripa a üreni Festus, “Ei mwän a tongeni musala, nge pokiten a tüngör pwe an we kapwüng epwe amwet ngeni Sisar esap musala.”

27

Paulus a saila Rom

27.1-12

¹ Iwe, lupwen a pwüngüla pwe aipwe saila Itali, ra atolonga Paulus me ekoch chon fötek fän nemenien Julius, eman meilapen ewe mwichen sounfiun Rom itan “Än Sisar Mwichen Sounfiu”. ² Äm aia tötä won efoch sip seni Atramitium mi molotä an epwe sai ngeni ekewe lenien ilen sip lon ewe fanü Asia. Iwe, aia saila, nge Aristarkus eman re Masetonia seni Tesalonika a etikem. ³ Iwe, sorotän ewe rän aia ileiti Siton. Julius a kirikiröch ngeni Paulus o mwüt ngeni an epwe feila o churi chiechian kewe pwe repwe ngeni mine a osupwang ren. ⁴ Aia saila seni ikenan, nge pokiten pöchökülen ewe asepwäl mi torikem, aia saila lepekin ewe fanü Saipros ewe ia a ekis lüa ie. ⁵ Iwe, aia saila pekilan ewe matauen

Silisia me Pamfilia o tori Mira lon ewe fanü Lisia. ⁶ Ikenan ewe meilapen sounfiu a küna efoch sip seni Aleksantria epwe saila Itali, iei mine a atökeemitä won. ⁷ Iwe, äm aia mang le sai lon chomong rän, nge fän watten weires aia arap ngeni ewe telinimw Knitus. Pokiten ewe asepwäl a pöto me mwem, aisap tongeni sopwela äm sai, iei mine aia saila lepekin ewe fanü Kreta, ewe ia a ekis lüa ie awenewenen Salmone. ⁸ Aia saila arapakan ngeni ewe fanü, nge fän watten weires aia tori eu leni itan “Safe Harbors” * arap ngeni ewe telinimw Lasea. ⁹ Iwe, aia nonom ikenan fansoun langatam tori a fokun weiresila pwe aipwe sopwela äm sai, pun a fen sängerela ewe Ränin Echikefel än ekewe chon Juta. Iei mine Paulus a ngeniir ekei kapasen öüröür, ✧ ¹⁰ “Ämi mwän kana, üa küna pwe ach ei sai seni ikei epwe afeiengau, sap chök ren talan waach ei sip me uttenan, nge epwe pwal wor mi mäla.” ¹¹ Nge ewe meilapen sounfiu a lükü alon ewe pölü me alon ewe souwa, nge esap lükü alon Paulus. ¹² Ewe lenien ilen sip esap öch ar repwe mamaram ikenan tori lesopolan lefen. Iei mine chomong me lein ekewe mwän ra tipeeu ngeni ar repwe sai seni ikenan o ra sotuni ika repwe tori Föniks pwe repwe mamaram ikenan. Föniks eu lenien ilen sip lon Kreta mi sape ngeni lotou-ör me lotou-äfeng.

Ewe mölümöl le matau

27.13-38

¹³ Iwe, lupwen och kükün asepwäl seni ör a popuetä le enito, ekewe mwän ra ekieki pwe ra tongeni afisi mine ra akota. Iei mine ra efietä ewe angkö o seresila fokun kan ngeni chök ewe fanü Kreta. ¹⁴ Nge a müttir fis, pwe eu asepwäl mi fokun pöchökül itan “Ötiu-äfeng” a enito seni ewe fanü. ¹⁵ A weneiti ewe sip, nge pokiten ewe sip esap tongeni sai ngeni ewe mölümöl, aia chök likiti ngeni ewe mölümöl pwe aipwe maanula ren. ¹⁶ Iwe, aia ekis chuno lupwen aia saila örün ewe kükün fanü Kauta. Ikenan aia anükünükü timan ewe sip, nge fän weires chök. ¹⁷ Ra efietä ewe tima won ewe sip, mürin ra pweil ünükün ewe sip ngeni säl. Iwe, ra niuokus pwe repwe fanatä won petepeten arosetin Lipia, iei mine ra aürätü ewe amara o mamaanula ren ewe asepwäl. ¹⁸ Iwe, ewe mölümöl a chök sotosopola, iei mine sorotän ewe rän ra popuetä le aturätü uttenen ewe wa leset, ¹⁹ nge pwal eu rän mürin ra aturätü pisekin ewe sip. ²⁰ Lon chomong rän aisap tongeni küna akkar ika fü kana, nge ewe mölümöl a chök pöchökül le enitikem. Iwe, esap chüen wor äm apilükülük pwe aipwe manäu.

²¹ Iwe, fansoun langatam ekewe aramas resap mongö och, mürin Paulus a ütä me mwer o apasa, “Ämi mwän kana, epwe fen öch ika oupwe aüseling ngeniei pwe sisap sai seni Kreta. Pun ika itä oupwe aüseling ngeniei sisap tolong lon ei watten osukosuk me feiengau. ²² Nge iei üa tungor ngenikemi, pwe oupwe apilükülüköch, pun esap wor eman me leich epwe mäla, nge ei chök sip epwe tala. ²³ Pun lepwin ewe eman nöün Kot chon läng, ewe Kot üa nonom fän nemenian o üa angang ngeni, a feito rei ²⁴ o üreniei, ‘Kosap niuokus Paulus! Kopwe fokun ütä me mwen ewe Sisar. Nge Kot, lon an kirikiröch epwe pwal amanaua chokewe meinisin mi etuk lon ei sai.’ ²⁵ Iei mine ämi mwän, oupwe apilükülüköch! Pun üa lükü Kot, pwe epwe fis usun mine a üreniei. ²⁶ Nge sipwe fokun pasetä won wochen eu fanü.”

* **27:8:** wewen “Safe Harbors” lenien ilen sip mi chuno ✧ **27:9:** Lif 16.29-31; 23.27-32; Num 29.7

²⁷ Iwe, a iei engol me rüanü pwin aia mamaanfeil lon ewe matau watte itan Mediteranean ren ewe mölümöl. Ina epwe lukenipwin ekewe säla ra mefi pwe aia arap ngeni fanü. ²⁸ Iei mine ra esenätü efoch säl mi wor ochou won, iwe, ra küna alololun ewe ie ükükün ipükü rüe fit. Ekis fansoun mürin ra pwal aüküsfäli o küna pwe a chök tiwe fit alololun. ²⁹ Iwe, ra niuokus pwe ewe sip epwe fanatä won woch. Iei mine ra aturätü fofoch angkö me mürin, iwe, ra iotek pwe epwe ränila. ³⁰ Mürin ekewe säla ra sotuni ar repwe sü seni ewe sip. Ra aturätü ewe tima lon ewe sät, nge ra tipin esenätü ekoch angkö seni me mwen ewe sip. ³¹ Nge Paulus a üreni ewe meilapen sounfiu me ekewe sounfiu, “Are ekei säla resap nonom won ei wa, esap wor ämi apilükülüköch pwe oupwe manau.” ³² Iei mine ekewe sounfiu ra pökü ekewe säl mi riri ngeni ewe tima pwe a maanula.

³³ Me mwen an epwe ränila, Paulus a tüngor ngeniir meinisin pwe repwe mongö och. A üra, “A ükükün engol me rüanü pwinich iei ach sia witiwiti lon, nge ei ükükün fansoun ousap fokun mongö och. ³⁴ Üa tüngor ngenikemi pwe oupwe mongö. A lomot ngenikemi, pwe oupwe tongeni manau. Pun esap fokun mwo nge emet meten möküremi epwe turula.” ³⁵ Iwe, wesin an apasatä ekei kapas, Paulus a angei ekis pilawa o iotekin kilisou ngeni Kot won mwer meinisin. A kinikisietü o a popuetä le mongö. ³⁶ Mürin ir meinisin ra popuetä eäni apilükülüköch o ra pwal püsin mongö. ³⁷ Iwe, ükükün chochon wam we ruopükü fik me wonoman. ³⁸ Mürin äm meinisin aia mötüla, ra aturätü ekewe wiich meinisin le matau, pwe wam we a pwasetä.

Ewe sip a fanatä o mök

27.39-44

³⁹ Iwe, lupwen a ränila, ekewe säla resap tongeni asilla ewe fanü. Nge ra küna eu nomolong mi wor pian, iei mine ra ekiekietä pwe ika epwe tufich repwe afanatä ewe wa won. ⁴⁰ Iei mine ra pöküela ekewe angkö, pwe ra kokotiu lon ewe matau. Lon ewe chök otun ra pwal apichi ewe säl mi riri ngeni ewe mwirimwir. Mürin ra üratä ekewe amara mi nom mwen ewe sip, pwe ewe asepwäl epwe pönala mwan o weneiti ewe pi. ⁴¹ Nge ewe sip a fanatä mesen woch o mwöchüla, pwe lesopun me mwan a mwöch pwe esap chüen tongeni mwökütüküt, nge lesopun me mürin a tatakis ren watten ekewe no.

⁴² Iwe, ekewe sounfiu ra akota ar repwe niela ekewe chon fötek meinisin, pwe esap wor eman me leir epwe tongeni äälong wilifanü o süla. ⁴³ Nge ewe meilapen sounfiu a mochen amanau Paulus, iei mine a aüküretü pwe resap föri ei. Nge a chök allük ngeni ekewe mwän meinisin mi sile ää ar repwe akomwen atururetiü leset o äälong wilifanü. ⁴⁴ Iwe, ekewe ekoch aramas resap sile ää repwe kamwöch ekewe pap ika irän ewe sip. Iei usun äm meinisin aia manau ngeni fanü.

28

Mine a fis ngeni Paulus me won ewe fanü Malta

28.1-10

¹ Iwe, lupwen aia tiwelong wilifanü, aia silei pwe ewe fanü itan Malta. ² Chon ei fanü ra fokun kirikiröch ngenikem. Ra aküetä eu ekkei o etiwakem meinisin, pun a püng üt o patekich. ³ Paulus a pwal ionifengeni amwüch. Nge lupwen a uwoutä won ewe ekkei, eman serepenit a towu

me lon ekewe amwüch pokiten pwichikaren ewe ekkei, a küüw pöün o nikemeitiu won. ⁴ Iwe, lupwen chon ewe fanü ra küna ewe serepenit mi nikemeitiu won pöün Paulus, ra kapasfengen lefler, “Ei mwän i eman chon niela aramas. Pun inamwo ika a fen manaueto seni le matau, nge ewe anün pwüing esap mwüt ngeni an epwe manau.” ⁵ Nge Paulus a wichikalong ewe serepenit lon ewe ekkei, nge esap feiengau ren. ⁶ Iwe, ekewe aramas ra witiwiti pwe pöün Paulus epwe pwootä ika epwe fen turula o mäla. Ra witiwit fansoun langatam, nge lupwen resap küna och feiengau a fis ngeni, ra siwili ar ekiek o apasa, “Ätei eman kot!”

⁷ A wor ekoch fanü ikenan mi arap ngeni ei leni, fanüen Puplius, i samolun ewe fanü. Ätei a etiwakem lon lenian o lon ükükün ülüngat rän a awasölakem pokiten an kirikiröch. ⁸ Iwe, semen Puplius a mwelilong leimw ren an pwichikar me feiseni. Paulus a tolong lon rumwan o mürin an iotek fän itan a iseis pöün won o apöchökülätä. ⁹ Lupwen a fis ei, ekewe lusun chon samau meinisin me won ewe fanü ra feito, nge Paulus a apöchöküleerätä. ¹⁰ Iwe, chon ewe fanü ra ngenikem chomong lifang, nge lupwen aipwele sai, ra uwätä won ewe sip met a lomot fän iten äm we sai.

Ewe sai seni Malta tori Rom
28.11-15

¹¹ Iwe, mürin äm nonom ikenan ülüngat maram, aia sü won efoch sip seni Aleksantria mi wor liosun ekewe “Kot Lipwe” won lesopun me mwan iter Kastor me Polluk. Ei sip a mamaram ikenan fansoun lefen. ¹² Mürin äm aia tori ewe telinimw Sirakus o nonom ikenan lon ükükün ülüngat rän. ¹³ Seni ikenan aia sai o tori ewe telinimw Rekiüm. Sorotän ewe rän eu asepwäl a popuetä le enito seni ör o mürin ruu rän aia tori ewe telinimw Puteoli. ¹⁴ Ikenan aia churi ekoch chon lükü Jesus mi tüngor ngenikem pwe aipwe nonom rer lon ükükün eu wiik. Iei usun aia sai ngeni Rom. ¹⁵ Iwe, ekewe chon lükü Jesus mi nom lon Rom ra rong usum, ra feila tori ekewe kükün telinimw iter Appius Forum me Ülüngat Imwen Wasöla, pwe repwe sounikem. Iwe, lupwen Paulus a küneer, a kilisou ngeni Kot o letipan a fokun pöchökülela.

Paulus a churi ekewe chon Juta lon Rom
28.16-31

¹⁶ Iwe, lupwen äm tori Rom, ra mwüt ngeni Paulus pwe epwe tongeni aemanüla le nonom, nge eman sounfiu epwe nom ren o mamasa. ¹⁷ Mürin ülüngat rän, Paulus a körato ekewe souemwenin ekewe chon Juta mi chon lefanüla lon Rom pwe repwe mwichfengen. Iwe, lupwen ar chufengen, Paulus a üreniir, “Ämi pwii kana chon Israel! Inamwo ika ngang üsap föri och mi ü ngeni aramasach ika örüniach kewe sia angei seni ach kewe lewo, nge ra fötekiniei lon Jerusalem o atolongaei fän nemenien chon Rom. ¹⁸ Mürin än ekewe chon Rom atittinaei, ra mochen amusaei, pun üsap föri och föför üpwe tipisin mäla ren. ¹⁹ Nge lupwen ekewe chon Juta resap tipeeu ngeni, esap wor och mine üpwe tongeni föri. Üa chök tüngor pwe ai kapwüing epwe amwet ngeni Sisar, nge esap wor och ai kapasen tipi ngeni aramasei kewe. ✱ ²⁰ Ina popun üa tüngor pwe üpwe churikemi o kapas ngenikemi. Pun ngang üa fötek pokiten än ekewe chon Israel apilükülük.”

²¹ Iwe, ekewe chon Juta ra üreni Paulus, “Äm aisap angei echö toropwe seni Jutea usumw, esap pwal wor eman me lein aramasach a feito seni ikenan fän och pworaus, ika fän och kapas mi ngau usumw. ²² Nge aia mochen rongorong mefiom, pun aia silei pwe ekis meinisin aramas ra kapasen ü ngeni ei mwich ka choni.” ²³ Iei mine ra filätä eu rän pwe repwe churi Paulus lon. Iwe, chomong me leir ra feito lon ewe rän lon ewe leni ia Paulus a nonom ie. Seni lesosor tori lepwin a afalafaleer o awewe ngeniir usun ewe Mwün Kot. A sotuni le pese ngeniir usun ar repwe lükü Jesus ren an pwärätä ngeniir ekewe kapas seni än Moses kewe allük me seni mine ekewe soufos ra makkeetiu. ²⁴ Iwe, ekoç me leir ra lükü, pwe mine a apasa a let, nge ekoç resap lükü. ²⁵ Iei mine ra feila lon ar tipefesen lefiler mürin än Paulus apasatä ei eu mettoch: “A pwümg mine ewe Ngünmifel a kapas ren ewe soufos Aisea ngeni ach kewe lewo! ²⁶ Pun a apasa,

‘Kopwe feila o aronga ngeni ekei aramas:

Oupwe aü selingemi o rongorong,
nge ousap wewe ren.

Oupwe nenengeni, nge ousap küna och.

²⁷ Pun letipen ekei aramas a pöçhökül.

Ra ükütiü le rongorong

o ra amöürü meser.

Pun are resap föri iei usun,
repwe tongeni küna ren meser

o rongorong ren selinger, nge letiper repwe wewela,

repwe pwal kul ngeniei,

pwe üpwe apöçhöküleer. Iei alon Kot.’ ✧ ²⁸ Iei mine ngang üa mochen pwe ämi oupwe silei, pwe än Kot kapasen manau a tori ekewe chon lükün Israel o ir repwe aüselinga.” ²⁹ [Müriin än Paulus apasa ei, ekewe chon Juta ra feila, nge ra fokun aninifengen lefiler.]

³⁰ Iwe, lon ükükün ruu ier Paulus a nonom lon eu leni i a püsin möni o etiwa aramas meinisin mi feito ren, pwe repwe churi. ³¹ A afalafal usun Mwün Kot o aiti ngeniir usun ach Samol Jesus Kraist. A pwora le kapas, nge esap wor eman a pinei.

Nöün Paulus Toropwe ngeni ekewe Souläng lon Rom

Kapas akom

I. Chon makkei ei toropwe: Ewe soukünü Paulus.

II. A mak ngeni iö? Ngeni ekewe soulängin Rom.

III. Itelapemongen ei toropwe: Ach küna pwüng ren ach lükülük me ach küna pin ren Ngünmifel.

IV. Kapas aüchean ei toropwe: Än Kot akot fän iten än aramas repwe küna Manau.

V. Masouen ei toropwe: Paulus a makkei ei toropwe ngeni ekewe souläng lon ewe mwichefelin Rom pwe repwe amolätä fän iten an epwe churiir lon Rom. Än Paulus akot fän iten an epwe angang lein ekewe souläng lon ekoch fansoun, nge mürin epwe feila Spain ren ar alilis ngeni. A makkei ei toropwe pwe epwe awewei usun wewen ewe lükülük lon Kraist me lapalapan föfürün lon manauen souläng. Masouen än Paulus afalafal lon ei toropwe a fokun unusöch lap seni makkean kewe toropwe meinisin.

Mürin än Paulus kapong ngeni ekewe soulängin ewe mwichefel lon Rom, pwal mürin an üreniir pwe a iotek fän iter, a makkeetiu itelapemongen ei toropwe: “Ewe Pworausen Manau a pwärätä usun än Kot akot fän iten än aramas repwe küna pwüng me ren. Ei a fis ren lükülük seni lepopun tori lesopolan.” (Sopw 1.17)

Mürin Paulus a sopwela le awewei kapas aüchean ei toropwe: Aramas meinisin, chon Juta me chon lükün Israel, ra nom fän nemenien tipis, iei mine ra osun ar repwe küna pwüng me ren Kot. Aramas ra chök tongeni küna pwüng me ren Kot ren ar lükü Jesus Kraist. Mürin Paulus a awewei ewe manau mi fö ren eufengen me Kraist mi fis ren ewe chiechifengen mi fö lefilen aramas me Kot. Chokewe mi lükü a wor ar kinamwefengen me Kot, pun ewe Ngünün Kot a angasa ir seni ewe manamanen tipis me mäla. Lon sopun 5-8 Paulus a pwal awewei aüchean än Kot Allük me manamanen ewe Ngünün Kot lon manauen chon lükü. Mürin Paulus a achocho le awewei usun än ekewe chon Juta me ekewe chon lükün Israel chufengen lon än Kot we akot fän iten aramas meinisin. A apasa, pwe än chon Juta oput Jesus, iei eu kinikin lon än Kot akot fänäsengesen an epwe nukieto aramas meinisin, pwe än Kot ümöümöch epwe toriir lon Jesus Kraist. Paulus a pwal lükü pwe ekewe chon Juta resap oput Jesus fansoun meinisin. Lesopolan Paulus a makkei usun met eman souläng epwe föri lon manauan, lapalan usun än eman souläng epwe tongei aramas. A pwal awewei usun ach angang ngeni Kot, usun wisen souläng ngeni mwü, pwal usun wiser ngeni eman me eman aramas, pwal usun ewe mwelien letipen aramas. Amüchülan ei toropwe a pworaus usun püsün manauan, pwal usun an mwareiti Kot.

VI. Tettelin masouen ei toropwe:

Kapas akom me itelapemongen lon ei puk 1.1-17

Aramas meinisin ra osun ar repwe küna manau 1.18-3.20

Än Kot angangen amanaua aramas 3.21-4.24

Ewe manau mi fö lon Kraist 5.1-8.39

Än Kot akot ngeni chon Israel 9.1-11.36

Usun manauen souläng 12.1–15.13

Kapasen lesopolan me än Paulus kapong 15.14–16.27

Än Paulus kapong me wisan

1.1-7

¹ Ngang Paulus, eman chon angangen Kraist Jesus, üa kö pwe üpwe eman soukünü mi imwüla fän iten ai üpwe arongafeili än Kot we Pworausen Manau. ² Ei Pworausen Manau Kot a fen pwon me lomlom ren nöün kewe soufos usun a fen mak lon ekewe Toropwe mi Pin. ³ A kapas usun Nöün we, ach Samol Jesus Kraist: Lon an wiliti aramas, a uputiü lon tettelin eman mwirimwirin Taftit. ⁴ Nge lon pekin ngünün mi fel a pwä fän manaman mi lapalap pwe i Nöün Kot, ren an manausefäl seni mäla, i Jesus Kraist ach Samol. ⁵ Ren Jesus Kraist, Kot a ngeniei ewe ümöömöch, pwe üpwe wiseni ewe wisen soukünü fän itan, pwe üpwe emweni aramasen ekewe mwü meinisin pwe repwe lükü i o aleasochis ngeni. ⁶ Pwal ämi mi nonom lon Rom, oua pachelong lein chokewe Kot a köriir pwe oupwe nöün Jesus Kraist. ⁷ Iei mine üa mak ngenikemi meinisin mi nom lon Rom, ämi chokewe Kot a echenikemi o körikemi pwe oupwe chon pin: Kot Samach me ach Samol Jesus Kraist epwe ngenikemi ümöömöch me kinamwe.

Eu iotekin kilisou

1.8-15

⁸ Ngang üpwe akomwen kilisou ngeni ai Kot ren Jesus Kraist fänäsengesimi meinisin, pun aramasen unusen fanüfan ra rongorong usun ämi lükülük. ⁹ Kot, ewe eman üa angang ngeni ren unusen letipei ren ai afalafala ewe Pworausen Manau usun Nöün we, i nei chon pwärätä pwe üa fokun chechemenikemi ¹⁰ lon ai iotek fansoun meinisin. Üa tüngor ngeni Kot, pwe are fän letipan, epwe mwüt ngeniei pwe üpwe feila remi lon ei fansoun. ¹¹ Pun üa fokun mochen churikemi pwe üpwe ngenikemi och feiöchün ngün pwe oupwe pöchökülela, ¹² wewen, pwe ämi me ngang sipwe apöchökülafengenikich ren ach lükülük.

¹³ Ämi pwii kana, oupwe fokun chechemeni pwe fän chomong üa akota ai üpwe churikemi, nge a chök wor sokun epet a pineei fansoun meinisin ai üpwe feila remi. Ngang üa mochen asoulängala ekoch leimi, usun üa pwal föri me lein ekewe ekoch chon lükün Israel. ✧ ¹⁴ Pun mi wor wisei ngeni aramas meinisin, ngeni ekewe mi mirit me ekewe resap mirit, ngeni ekewe mi tipachem pwal ekewe mi tiparoch. ¹⁵ Iei mine üa fokun mochen afalafala ewe Pworausen Manau ngenikemi mi nonom lon Rom.

Manamanen ewe Pworausen Manau

1.16-17

¹⁶ Üsap säwäsini ewe Pworausen Manau, pun iei ewe manamanen Kot mi tongeni amanaua chokewe meinisin mi lükü, a kom ngeni ekewe chon Juta, nge mürin pwal ngeni ekewe chon lükün Israel. ✧ ¹⁷ Pun ewe Pworausen Manau a pwärätä usun än Kot akot fän iten än aramas repwe küna pwüng me mwan. Ei a fis ren lükülük seni lepoputän tori lesopolan. Usun ewe toropwe mi pin a apasa, “Ewe aramas mi küna pwüng mwen mesen Kot epwe manau ren an lükülük.” ✧

*Än chon fanüfan tipis**1.18-32*

¹⁸ Än Kot song a pwä seni läng won tipis meinisin me föföringauen aramas, ra pinei ewe let ren ar föföer esepwüng, pwe aramas resap silei.

¹⁹ Pun mine aramas ra tongeni silei usun Kot a fat ngeniir. Püsin Kot a fen afata ngeniir. ²⁰ Esap wor eman aramas a tongeni küna Kot. Nge aramas ra tongeni silei usun Kot ren ekewe mettoch i a föri. Pun seni ewe fansoun Kot a föri fanüfan ra fokun tongeni weweiti pwe an manaman a nom tori feilfeilachök, pwe i wesewesen Kot. Iei mine esap wor än aramas künetipingen. ²¹ Ikamwo ra silei usun Kot, nge resap asamolu i usun Kot, resap pwal kilisou ngeni. Ar ekiek esap fokun wor lomotan, nge letiper mi wewemang a uren rochopwak. ✧ ²² Ra apasa pwe ra tipachem, nge ra tiparoch. ²³ Akasiwilin ar fel ngeni ewe Kot mi manau feilfeilachök ra fel ngeni uluulun anümwäl mi för lon liosun aramas mi mä, ika liosun mansüsü, manfetal me mantötö. ✧

²⁴ Iei mine Kot a asechala ekei aramas pwe repwe föri föföer mi limengau ren mochenian letiper. Ra föri mettoch mi asäw lefiler eman ngeni eman. ²⁵ Ra akasiwili mine a let usun Kot ngeni mine a chofona. Ra fel ngeni mine Kot a föri o angang ngeni, nge resap fel ngeni Kot ewe Chon Föri mettoch meinisin, i ewe sipwe mwareiti tori feilfeilachök! Amen.

²⁶ Pokiten ar föri iei usun, Kot a asechiirelong lon sokun mocheniangau mi fokun asäw. Ekewe mwo fefin, nge ra sorei pwükütän ekewe föföer mi öch ngeni inisiir ngeni sokun föföer esap öch ngeniir. ²⁷ Pwal ina chök usun ren ekewe mwän, ra likitala föföer mi öch lefilen mwän me fefin o ra opucherela ren sokun mocheniangau fengen lefiler. Mwän ra föri sokun föföer mi fokun asäw lefiler eman ngeni eman, nge lesopolan ra püsin aworato liwiningau wor ren ar föföer mi ngau.

²⁸ Pokiten ekei aramas resap fokun mochen anwöchü lon letiper mine ra silei usun Kot, i a asechiirela lon ngauen letiper, pwe ra föri sokun föföer esap pwüng. ²⁹ Ra ur ren sokopaten föföer mi ngau, föföer esepwüng, tipemong, kirikiringau. Ra uren lolowo, niela aramas, fiu, likatuputup, ekingau. Ra ngününgün, ³⁰ ra kapasingau usun pwal eman, ra oput Kot, ra turunufas, ra lamalamtekia o sikesik. Ra chök ekieki sokun föföer mi ngau. Ra lükümach ngeni semer me iner. ³¹ Esap wor mengiringirin letiper, resap apwönüetä ar pwon, resap eäni kirikiröch ngeni aramas ika eäni tong ngeniir. ³² Ra silei pwe Kot a apwüngala, pwe ekewe aramas mi föri ekei sokun föföer repwe mäla. Iwe, resap chök sopwela le föri ekei sokun föföer, nge ra pwal tipeeu ngeni ekewe aramas ra föri iei usun.

2*Än Kot kapwüng**2.1-16*

¹ En pwii, ifa usun, ka apwüngü pwal ekoch? Esap fokun wor om künetipingen, ese lifilifil ika en iö. Pun lupwen ka apwüngü ekewe ekoch, nge mürin ka föri ekewe sokun föföer usun chök ir, ka püsin atipisuk. ✧

² Nge kich sia silei pwe Kot a wenechar lupwen a apwüngü ekewe aramas mi föri ekei sokun föföer. ³ Nge en pwii, ka püsin föri ekei sokun föföer ka apwüngü ekoch won! Ifa usun, ka ekieki pwe ka tongeni sü seni än Kot apwüngü? ⁴ Eli ka turunufasei an kirikiröch mi fokun lapalap, an

songomang me tongotam! Kosap mefi pwe än Kot kirikiröch a mochen emwenuk ngeni ekiexefäl? ⁵ Nge lelukom a tipepöchökül o ülöförea. Iei mine ka püsin alapala om liwiningau lon ewe rän lupwen Kot epwe pwäräla an song me an apwüngüwen. ⁶ Pun Kot epwe liwini ngeni aramas meinisin liwini ar föfö. ✧ ⁷ Ekoch aramas ra likitü lon ar föfö mürina, ra kütta ling me iteüöch me ewe manau esap müchüla. Iwe, Kot epwe ngeniir manau esemüch. ⁸ Nge pwal ekoch ra chök kütta püsin feiöchür, ra oput mine a let o ra föri mine ese pwüng. Iwe, Kot epwe tinatiu an song me lingeringer wor. ⁹ Epwe wor osukosuk me riaföü epwe tori aramas meinisin mi föri mine a ngau, akomwan epwe tori ekewe chon Juta, nge mürin epwe pwal tori ekewe chon lükün Israel. ¹⁰ Nge Kot epwe ngeni chokewe mi föri mine a mürina ling me iteüöch me kinamwe, akomwan ngeni ekewe chon Juta, nge mürin ngeni ekewe chon lükün Israel. ¹¹ Pun Kot esap lifilifil aramas lon an apwüngüür. ✧

¹² Iwe, ekewe chon lükün Israel esap wor rer än Moses kewe Allük, ra tipis o pöütmwäli, inamwo ika esap wor rer ekewe Allük. Ekewe chon Juta a wor rer ekewe Allük. Ra tipis o küna apwüng ren mine a mak lon ekewe Allük. ¹³ Pun ekewe aramas resap küna pwüng mwen mesen Kot ren ar rongorong ngeni ekewe Allük, nge ren ar apwönüetä pwüngün ekewe Allük. ¹⁴ Ekewe chon lükün Israel esap wor rer ekewe Allük. Nge iteiten fansoun ra föri pwüngün ekewe Allük ren mefien letiper, ra pwärätä pwe ra silei met repwe föri ika resap föri, inamwo ika esap wor rer ekewe Allük. ¹⁵ Ar föfö a pwärätä pwe pwüngün ekewe Allük a mak lon letiper. Mwelien letiper a pwal pwärätä pwe ei a let, pun fän ekoch ar ekiex a atipisiir, nge pwal fän ekoch a peniir. ¹⁶ Ren pwüngün ewe Pworausen Manau üa afalafala epwe iei usun mine epwe fis lon ewe Rän lupwen Kot epwe apwüngü ekewe ekiexin aramas mi monomon ren Jesus Kraist.

Ekewe chon Juta me än Moses kewe Allük

2.17-29

¹⁷ Nge ifa usun en? Ka püsin aita ngonuk eman chon Juta. Ka lükülükü ekewe Allük o sikäsini usun om chiechi ngeni Kot. ¹⁸ Ka silei mine Kot a mochen pwe kopwe föri, ka pwal kaiö seni ekewe Allük pwe kopwe filätä met a pwüng. ¹⁹ Ka lükü pwe en eman chon emwen fän iten ekewe mi mesechun, pwal eu saram fän iten chokewe mi nom lon rochopwak, ²⁰ pwal eman chon öüröür fän iten ekewe mi tiparoch me eman sense fän iten chokewe resap mirit. Ka lükü, pwe pokiten a wor reöm ekewe Allük ka silei unusen mettoch meinisin o mine ka apasa a fokun let. ²¹ En ka aiti ngeni aramas ekewe Allük, pwota kosap püsin aiti ngonuk? Ka afalafala aramas pwe resap solä, nge ifa usumw, kosap püsin solä? ²² Ka apasa ngeni aramas pwe resap lisowu, nge ifa usumw, kosap lisowu? En ka fokun oput ekewe uluulun anümwäl, nge ifa usumw, kosap soläni mettoch seni lon ar kewe imwenfel? ²³ Ka sikäsini usun än Kot kewe Allük mi nom reöm, nge ifa usumw, kosap atoto säw won Kot ren om purätü an kewe allük? ²⁴ Ekewe Toropwe mi Pin ra apasa, “Pokiten ämi chon Juta, ekewe chon lükün Israel ra aitungau iten Kot.” ✧

²⁵ Are ka aleasochisi ekewe Allük, om sirkomsais a lomot, nge are ka aleasolap ngeni ekewe Allük a usun chök pwe kosap fokun sirkomsais.

²⁶ Are eman chon lükün Israel esap sirkomsais a aleasochisi pwüngün ekewe Allük, ifa usun, Kot esap alealong i lon tettelin ekewe mi sirkomsais? ²⁷ Iei usun ekewe chon lükün Israel repwe atipisikemi ämi chon Juta, pun ämi oua purätü ekewe Allük, inamwo ika a makketiu fän itemi o ämi oua sirkomsais. Nge ir ra aleasochisi ekewe Allük, inamwo ika resap sirkomsais ren inisiir. ²⁸ Iwe, iö wesewesen eman re Juta mi enletin sirkomsais? Sap eman re Juta mi chök sirkomsais ren inisin me lükün. ²⁹ Esap ina! Nge eman mi enletin re Juta i eman re Juta lon letipan, wewen a sirkomsais lon letipan. Iei angangen ewe Ngünün Kot, sap angangen ekewe Allük mi makketiu. Ei sokun aramas epwe angei iteüchün seni Kot, sap seni aramas.

3

Kot a allükülük 3.1-8

¹ Ifa usun, ekewe chon Juta ra feiöch lap seni ekewe chon lükün Israel? Ika a wor lomoten ar sirkomsais? ² Ewer, a chomong ar feiöch lon chomong sokun pekin! Aeuin, Kot a lükü ngeniir an Kapas. ³ Nge ifa usun, are ekoch me leir resap allükülük? Iwe, wewen pwe Kot esap pwal allükülük? ⁴ Apwi, esap fokun ina usun! Kot epwe fokun let, inamwo ika aramas meinisin ra chon chofona. Usun ewe Toropwe mi Pin a apasa, “Epwe fokun pwäla pwe en mi pwüng lupwen ka kapas.

Kopwe fokun win lon kapwüng lupwen ra apwünguk.” ✱ ⁵ Nge ifa usun, are ach föfö esepwüng a pwärätä än Kot föfö mi pwüng? Met sipwe tongeni apasa? Sipwe tongeni apasa pwe Kot a mwäl lupwen a liwini ngenikich liwinin ach föföringau? (Üa chök apasatä ekei kapas lon ekiëkin aramas.) ⁶ Apwi, esap fokun ina usun! Are Kot esap pwüng, ifa usun an epwe tongeni apwüngü chon fanüfan? ⁷ Nge ifa usun, are ai likatuputup epwe afatöchü än Kot let o awattela an ling, pwota chök üpwe chüen kapwüng usun eman chon tipis? ⁸ Pwota chök ekoch aramas ra apasa, “Ousipwe föri mine a ngau, pwe epwe fisitä mine a mürina”? Ewer, ekoch aramas ra fen kapasingau usi ren ar atipisiei, pwe üa apasa ei sokun fos. Ir repwe küna kapwüng usun a fich ngeniir.

Esap wor eman aramas a pwüng 3.9-20

⁹ Iwe, ifa usun kich chon Juta, sia mürina seni ekewe chon lükün Israel? Apwi! Esap fokun ina! Üa fen pwärätä pwe chon Juta me chon lükün Israel ra wewefengen, ir meinisin ra nonom fän nemenien tipis. ¹⁰ Usun ekewe Toropwe mi Pin ra apasa:

“Esap fokun wor eman chon pwüng.

¹¹ Esap wor eman mi mirit,
esap wor eman mi kütta Kot.

¹² Ir meinisin ra kul seni Kot,
ir meinisin ra tokola.
Esap fokun wor eman a föri mine a pwüng,
esap fokun wor eman. ✱

¹³ Ar kewe kapas ra uren atuputup mi afeiangau.
Kapas chofona a towu seni chönawer,

pwal kapasen eniweniw mi usun chök poisonun serepenit ra towu seni tinawer. ✧

¹⁴ Ar kapas a ur ren ottek. ✧

¹⁵ Ra müttir ngeni ar afeiengaua o niela aramas.

¹⁶ Ra afisätä tatakis me feiengau ekis meinisín ia ra feila ie.

¹⁷ Resap silei met repwe föri,

pwe repwe eáni kinamwe ngeni aramas, ✧

¹⁸ resap pwal silei ar repwe niuokusiti Kot.” ✧

¹⁹ Iei sia silei pwe meinisín mine a mak lon ekewe Allük a fän iten chokewe mi nom fän ekewe Allük pwe epwe aükätü an aramas meinisín künetipingen o atolonga unusen fanüfan fän an Kot kapwüng. ²⁰ Pun esap wor eman aramas epwe küna pwüng ren an apwönüetä pwüngün ekewe Allük. Nge mine ekewe Allük ra föri, ra aiti ngeni aramas pwe ra tipis. ✧

Usun mine Kot a föri pwe sipwe küna pwüng ren i

3.21-31

²¹ Nge iei a pwála mine Kot a föri pwe aramas repwe küna pwüng me ren. Ei esap fis ren ekewe allük, inamwo ika an Moses kewe Allük me an ekewe soufos kapas ra pwäräta usun. ²² Kot a föri pwe aramas ra küna pwüng ren ar lükü Jesus Kraist. Kot a föri ei ngeni chokewe meinisín mi lükü Kraist, pun esap wor sokofesenin lefler meinisín: ✧ ²³ Pun aramas meinisín ra tipis, ra pwal osun lingen Kot. ²⁴ Nge ren an Kot we lifangen ümömöch esap kamö, aramas meinisín ra küna pwüng ren Kraist, ewe mi angaseerela. ²⁵ Kot a fangala Kraist, pwe ren an mäla a fis amusamusen an aramas tipis ren chaan pokiten ar lükü i. Kot a föri ei an epwe pwärätä pwe i a pwüng, pun lon an mosonotam esap apwüngü an ekewe aramas tipis ra föri me mwan. ²⁶ Nge ikenai Kot a föri och fän iten an aramas tipis, pwe epwe pwäräla an pwüng. Ren ei Kot a pwäräta pwe püsin i a pwüng, a pwal föri pwe ir mi lükü Jesus repwe küna pwüng.

²⁷ Iwe, met sia tongeni aingaing won? Esor! Met popun pwe a iei usun? Pokiten sia aleasochisi ekewe Allük? Apwi, nge sia lükü. ²⁸ Pun sia silei pwe eman a küna pwüng me ren Kot ren an chök lükü, sap ren an apwönüetä pwüngün ekewe Allük. ²⁹ Are ifa usun, Kot an chök ekewe chon Juta Kot? Esap pwal i an ekewe chon lükün Israel Kot? Ewer, pwal i ar Kot. ³⁰ Kot eman chök, i epwe föri pwe ekewe chon Juta repwe küna pwüng pokiten ar lükülük, i epwe pwal föri pwe ekewe chon lükün Israel repwe küna pwüng ren ar lükülük. ✧ ³¹ Ifa usun, wewen pwe ren ei lükülük sipwele pöütala ekewe Allük? Apwi, esap fokun ina, nge sia fen anüküchara ekewe Allük.

4

Araham a küna pwüng ren an lükülük

4.1-12

¹ Iwe, met sipwe apasa usun Araham, an am chon Juta we lewo? Met a fis ngeni? ² Are i a küna pwüng me ren Kot ren ekewe föfö a föri, epwe wor met epwe tongeni aingaing won. Nge esap tongeni aingaing mwen mesen Kot. ³ Ekewe Toropwe mi Pin ra apasa, “Araham a lükü Kot, nge pokiten an lükülük a küna pwüng me ren Kot.” ✧ ⁴ Eman aramas mi angang a angei liwinin an angang. Ewe aramas esap ekieki ngeni pwe eu

✧ 3:13: Kölf 5.9; 140.3 ✧ 3:14: Kölf 10.7 ✧ 3:17: Ais 59.7-8 ✧ 3:18: Kölf 36.1 ✧ 3:20: Kölf 143.2; Kal 2.16 ✧ 3:22: Kal 2.16 ✧ 3:30: Tut 6.4; Kal 3.20 ✧ 4:3: Ken 15.6; Kal 3.6

lifang, nge liwinin an angang. ⁵ Nge eman aramas mi longolong won an lükülük, nge esap wor an föför, i a lükü Kot ewe mi tongeni pwärätä pwe eman chon tipis a pwüng. Kot a föri iei usun ngeni, pwe a küna pwüng me ren pokiten an lükülük. ⁶ Iei usun wewen met Tafit a apasa usun feiöchün ewe aramas mi küna pwüng me ren Kot, nge esap longolong won met ewe aramas a föri:

⁷ “Feiöchün ätekewe ar pupungau a musala, nge ar tipis a mola.

⁸ Feiöchün ewe aramas, ewe Samol esap chechemeni an tipis!” ✱

⁹ Ifa usun, ei feiöch Tafit a kapas usun a chök fän iten chokewe mi sirkomsais? Apwi! A pwal fän iten chokewe resap sirkomsais. Pun sia fen apasa mine a mak lon ekewe Toropwe mi Pin: “Apraham a lükü Kot, nge pokiten an lükülük a küna pwüng me ren Kot.” ¹⁰ Inet a fis ei? A fis mwen än Apraham sirkomsais ika me mürin? A fis me mwan, nge sap mürin. ¹¹ An sirkomsais a fis me mürin. Nge an sirkomsais eu asisil mi pwärätä pwe pokiten an lükülük a küna pwüng me ren Kot me mwen an esamwo sirkomsais. Iei usun Apraham a semelapen chokewe meinisin mi lükü Kot o küna pwüng me ren, inamwo ika resap sirkomsais. ✱ ¹² I pwal semelapen chokewe ra sirkomsais, nge sap pokiten ar sirkomsais, nge pokiten ra manaueni ewe chök manauen lükülük semelapach Apraham a eäni me mwen an sirkomsais.

Än Kot pwon ngeni chokewe mi lükü i

4.13-25

¹³ Lupwen Kot a pwon ngeni Apraham me mwirimwirin kana pwe repwe fanüeni fanüfan, a föri ei sap pokiten än Apraham aleasochisi ekewe Allük, nge pokiten an küna pwüng me ren Kot ren an lükülük. ✱ ¹⁴ Pun are än Kot pwon a fän iten chök chokewe mi aleasochisi ekewe Allük, mürin än aramas lükülük esap wor aüchëan, nge än Kot pwon esap wor lomotan. ✱ ¹⁵ Pun ekewe allük ra atoto än Kot song, nge ia esap wor allük ie, esap pwal wor aleasolap ngeni allük. ¹⁶ Iei usun ewe pwon a longolong won lükülük, pwe epwe allükülükü än Kot we ümöümöch epwe tori ekewe mwirimwirin Apraham meinisin, esap chök tori chokewe mi aleasochisi ekewe Allük, nge epwe pwal tori chokewe mi lükü usun Apraham. Pun Apraham semelapach meinisin lon pekin ngün, ✱ ¹⁷ pun a mak lon ekewe Toropwe mi Pin, “Üa föri pwe kopwe semelapen aramasen chomong mwü.” Iwe, ei pwon a mürina mwen mesen Kot, i ewe Apraham a lükü, ewe Kot mi amanaua ekewe mi mäla, i ewe a pwal allük pwe mine esap wor epwe wor. ✱ ¹⁸ Iwe, Apraham a lükü Kot o apilükülük ngeni, inamwo ika esap wor popun an epwe apilükülük. Iei mine a wiliti “semelapen aramasen chomong mwü.” Usun chök ekewe Toropwe mi Pin ra apasa, “Mwirimwirun kana repwe chomong usun chök chomongun ekewe fü.” ✱ ¹⁹ Apraham a arapakan ipükü ier, nge an lükülük esap apwangapwangala lupwen a ekieki usun inisin pwe a arap ngeni mäla, nge pwal Sara pwülüan we esap chüen tongeni nöünöü. ✱ ²⁰ Iwe, Apraham a sopwela lon an lükülük, nge esap tipemwaramwar ngeni än Kot pwon. An lükülük a pöchökülela o a

✱ **4:8:** Kölf 32.1-2 ✱ **4:11:** Ken 17.10 ✱ **4:13:** Ken 17.4-6; 22.17-18; Kal 3.29 ✱ **4:14:** Kal 3.18 ✱ **4:16:** Kal 3.7 ✱ **4:17:** Ken 17.5 ✱ **4:18:** Ken 15.5 ✱ **4:19:** Ken 17.17

mwareiti Kot. ²¹ A fokun lükü pwe Kot a tongeni apwönüetä mine a eäni pwon. ²² Ina popun Apraham a küna pwüng me ren Kot ren an lükülük. ²³ Ekei kapas “a küna pwüng” resap makketiu fän iten Apraham chök. ²⁴ Ra pwal makketiu fän itach mi küna pwüng, kich mi lükü Kot ewe mi amanauasefäli Jesus ach Samol seni mäla. ²⁵ Jesus a mäla pokiten ach tipis, nge a manausefälitä seni mäla pwe sipwe küna pwüng me ren Kot.
☆

5

Ach küna pwüng me ren Kot

5.1-11

¹ Iwe, pokiten sia küna pwüng me ren Kot ren ach lükülük, sia kinamwefengen me Kot ren ach Samol Jesus Kraist. ² Ren ach lükülük, Kraist a emwenikichelong lon än Kot ümömöch, iei sia manau lon. Iei mine sia pwapwaäsini ach apilükülüköch ngeni ewe ling Kot epwe ngenikich. ³ Nge sap iei chök, sia pwal pwapwaäsini ach kewe riaföü, pun sia silei pwe riaföü a afisätä ach tipeppos, ⁴ nge ach tipeppos a atoto manauöch mwen mesen Kot, nge ach manauöch a afisätä apilükülüköch. ⁵ Ei apilükülüköch esap alichipwüngükich, pun Kot a iselong lon letipach an we chen ren ewe Ngünmifel, ewe i a lifang ngenikich. ⁶ Pun lupwen sia chüen nom lon ach apwangapwang, lon ena fansoun Kraist a fen mäla fän iten chon föföringau. ⁷ A men weires än eman epwe mäla fänäsengesin eman aramas mi pwüng. Eli epwe wor eman epwe tongeni mäla fänäsengesin eman aramas mi aramasöch. ⁸ Nge Kot a pwäri ngenikich ükükün an echenikich, pwe lupwen sia chüen nonom lon tipis, Kraist a mäla fänäsengesich. ⁹ Iwe, ren chaan sia küna pwüng me ren Kot. Nge epwe le fen ifan me watten an amanauakich seni än Kot song! ¹⁰ Me lom kich chon oputa Kot, nge sia chäfengen me Kot ren mälan Nöün we. Iwe, iei sia chäfengen me Kot, nge epwe le fen ifan me watten än Kraist amanauakich pokiten a manausefäl! ¹¹ Nge sap iei chök, pwe sia pwal pwapwa lon Kot pokiten ach Samol Jesus Kraist a achäfengenikich me Kot.

Atam me Kraist

5.12-21

¹² Iwe, ren eman mwän tipis a tolong lon fanüfan, nge an tipis a atoto mäla. Iei popun mäla a tori aramas meinisin, pun ir meinisin ra tipis.
☆ ¹³ A wor tipis lon fanüfan mwen än ekewe Allük resamwo fen wor. Nge ia esap wor allük ie, esap tongeni fis angangen atipisi eman ren allük. ¹⁴ Nge seni ewe fansoun Atam tori fansoun Moses, mäla a nemeni aramas meinisin, pwal mwo nge chokewe resap tipis usun Atam lupwen a aleasolap ngeni än Kot we allük. Atam a aliosunätä ewe eman epwe war me mürin. ¹⁵ Nge ekewe ruoman ra sokofesen, pun än Kot lifang a sokola seni än Atam tipis. Apwüng pwe chomong aramas ra mäla pokiten tipisin ewe eman aramas. Nge än Kot ümömöch a fokun watte seni, pwal an we lifang ese kamö a tori chomong aramas ren ümömöchün ewe eman aramas Jesus Kraist. ¹⁶ Iwe, a wor sokofesenin lefilen än Kot we lifang me tipisin ewe eman aramas. Mürin än ewe eman föri ewe eu tipis, Kot a apwüngala pwe “a tipis”. Nge mürin chomong ra tipis, Kot a pwärätä an ümömöch ngeniir ren an apasa, “Ämi ousap tipis.” ¹⁷ A pwüng pwe ren tipisin ewe eman mwän mäla a popuetä le nemenem,

pokiten ewe chök eman mwän. Nge epwe ifan me watten ewe feiöch mi fis ren ewe chök eman mwän Jesus Kraist! Iwe, chokewe meinisin mi etiwa än Kot ümöümöch mi somwola me an we lifangen pwüing repwe nemenem lon manauer ren Kraist. ¹⁸ Iei mine pokiten ewe eu chök tipis aramas meinisin ra nom fän liwiningauen tipis, ina chök usun ewe eu föförün pwüing a angasala aramas meinisin, a pwal amanauer. ¹⁹ Pun usun aramas meinisin ra tipis pokiten än ewe eman mwän aleasolap, ina chök usun chomong aramas repwe pwal küna pwüing me ren Kot pokiten än ewe eman mwän aleasochis. ²⁰ Allük ra fisitä pwe ekewe föför mi mwäl repwe lapala. Nge ia tipis a lapala ie, än Kot ümöümöch a fokun lapalapala seni. ²¹ Iwe, usun tipis a nemenem, pun aramas meinisin ra mäla, iei usun än Kot ümöümöch a nemenem, pun aramas ra küna pwüing me ren o i a emwenikich ngeni manau esemüch ren Jesus Kraist ach Samol.

6

Mäla ngeni tipis, nge manau lon Kraist

6.1-14

¹ Iwe, met sipwe üra? Sipwe sopwela le föföri tipis, pwe än Kot ümöümöch epwe lapalapala? ² Apwi, esap fokun ina! Kich sa mäla ngeni tipis, ifa usun ach sipwe tongeni sopwela le föföri tipis? ³ Ika ousap silei pwe kich meinisin mi fen papatais lon Kraist Jesus, sia papatais lon an we mäla? ⁴ Iwe, ren ach papatais sia peiasepök me i o eti i lon an mäla, pwe usun chök Kraist a manausefäl seni mäla ren amwararen manamanen ewe Sam, ina usun pwal kich sipwe manaueni eu manau mi fö.

⁵ Pun are sia eti Kraist lon an we mäla, sipwe pwal fokun eti i lon an we manausefäl. ⁶ Iwe, sia silei pwe ewe aramas mi mes a eti Kraist le mäla won an we iräpenges, pwe pöchökülen mochenian ach föri tipis epwe wesila, pun sisap chüen nonom fän nemenien tipis. ⁷ Pun lupwen eman aramas a mäla, a ngasala seni fän nemenien tipis. ⁸ Are sia eti Kraist le mäla, sia lükü pwe sipwe pwal eti i le manau. ⁹ Pun sia silei pwe Kraist a manausefäl seni mäla, o esap chüen tongeni mälasefäl. Iwe, mäla esap chüen nemeni i. ¹⁰ Iwe, pokiten a mäli ei sokun mäla, esap chüen wor nemenemen tipis won. Nge mine a manaueni a manaueni fänäsengesin Kot. ¹¹ Iei usun pwal ämi oupwe chechemeni pwe ämi oua fen mäla ngeni tipis, nge iei oua manau lon ämi chiechifengen me Kot lon Kraist Jesus.

¹² Tipis esap fokun chüen nemeni inisimi inisin mäla, pun ousap chüen aleasochisi ekewe mochenian fitukemi. ¹³ Ousap pwal fokun fangatä och kifetin inisimi ngeni tipis fänäsengesin föför mi ngau, nge oupwe fangala inisimi ngeni Kot usun chokewe mi towu seni mäla o tolong lon manau. Oupwe fokun fangatä unusen inisimi ngeni Kot fänäsengesin föför mi pwüing. ¹⁴ Ousap chüen nonom fän nemenien tipis, pun ousap chüen nonom fän nemenien allük, nge oua nonom fän nemenien ümöümöchün Kot.

Chon angang ngeni pwüing

6.15-23

¹⁵ Iwe, nge met chök sipwe apasa? Sipwe föri tipis pokiten sisap chüen nonom fän nemenien allük, nge sia nonom fän nemenien ümöümöchün Kot? Apwi, esap fokun ina! ¹⁶ Oua püsin silei, pwe lupwen oua fangatä inisimi ngeni eman pwe epwe nöünikemi chon angang o aleasochis

ngeni, oua chon angang ngeni ätewe oua aleasochisi. Ika oupwe aleasochis ngeni tipis, sopolan oupwe mäla, ika oupwe aleasochis ngeni Kot, sopolan oupwe küna pwüing mwen mesan. ¹⁷ Nge kilisou ngeni Kot, pwe inamwo ika oua chon angang ngeni tipis me lom, nge iei ren unusen letipemi oua aleasochis ngeni mine a let seni lon ewe afalafal oua rongorong. ¹⁸ Oua ngas seni tipis o oua wiliti chon angang ngeni pwüing. ¹⁹ Üa aea kapasen awewe seni nonomun manauen aramas pokiten apwangapwangen fitukemi. Me lom oua fangatä unusen inisimi pwe oupwe chon angang ngeni föföör mi limengau me föföör mi ngau fänäsengesin mine a ngau. Ina usun oupwe fokun fangatä unusen inisimi pwe oupwe chon angang ngeni pwüing fänäsengesin mine a pin. ²⁰ Lupwen oua chon angang ngeni tipis, ousap nonom fän nemenien pwüing. ²¹ Met sokun feiöch oua angei seni ekei föföör oua föriir me lom? Iei oua säw ren, pun sopolor mäla. ²² Nge iei oua ngas seni fän nemenien tipis o oua chon angang ngeni Kot. Feiöchümi pwe oua angei eu manau mi pin, nge sopolan ewe manau esemüch. ²³ Pun liwinin tipis mäla, nge än Kot lifang manau esemüch lon Kraist Jesus ach Samol.

7

Eu kapasen awewe usun pwüpwülü

7.1-6

¹ Pwii kana, oupwe fokun weweiti mine üa mochen kapas ngenikemi usun, pun ämi meinisin oua silei usun allük. Ewe allük a chök nemenem won eman aramas lupwen a chüen manau. ² Eu chök awewe: Eman fefin mi pwüpwülü a riri ngeni pwülüan lon ükükün räin manauan ren ewe allükün pwüpwülü. Nge lupwen ewe mwän a mäla, ei fefin esap chüen nonom fän ewe allükün pwüpwülü a riri ngeni pwülüan ren. ³ Iei mine, are neminei a pwüpwülü ngeni pwal eman mwän lupwen pwülüan we a chüen manau, epwe iteni eman fin lisowu. Nge are pwülüan we a mäla, neminei a ngas seni fän nemenien ewe allükün pwüpwülü, nge esap iteni eman fin lisowu, inamwo are a pwülüeni pwal eman mwän. ⁴ Ämi pwii kana, ina chök pwal usun ämi, oua mäla ngeni ewe Allük pokiten ämi oua eu kinikinin inisin Kraist. Iei ämi oua nöün ätewe Kot a amanauasefäli seni mäla, pwe epwe wor uän ach angang ngeni Kot. ⁵ Pun lupwen sia manau lon fitukach, ewe Allük a aselipato ekewe mochenian tipis lon inisich. Iwe, sia chon angang ngeni mäla. ⁶ Nge iei sia ngas seni fän nemenien ewe Allük pokiten sia fen mäla ngeni mine a fötekinikich. Iwe, sisap chüen angang ngeni Kot lon ewe lapalapen lom ren ewe allük mi makketiu, nge sia angang ngeni lon ewe lapalap mi fö ren Ngünmifel.

Allük me tipis

7.7-13

⁷ Iwe, met sipwe üra? Sipwe apasa pwe ewe Allük mi tipis? Apwi, esap fokun ina usun! Nge ewe Allük a amefi ngeniei met wewen tipis. Pun üsap weweiti usun mochenia are ewe allük esap apasa, “Kosap mochenia ngeni pisekin eman.” * ⁸ Nge tipis a küna ewe fansoun mi fich pwe epwe afisätä sokopaten mochenia lon ngang ren ewe allük. Pun are esap wor allük, tipis esap wor an manaman. ⁹ Me lom üa manau lupwen esamwo wor allük mi aiti ngeniei pwe a tipis ai föri föföör mi ngau. Nge lupwen üa silei ewe allük, tipis a popuetä le nemenem. ¹⁰ Iwe, üa mäla. Itä ewe allük

* 7:7: Eks 20.17; Tut 5.21

epwe aworato manau, nge a chök aworato mäla ngeniei. ¹¹ Tipis a küna eu fansoun mi fich, o ren ewe allük tipis a atupuei o nieila. ✧

¹² Iei usun än Moses kewe Allük ra pin o mine ewe allük a apasa a pwüng o mürina. ¹³ Met wewen ei? Epwe wewen pwe mine a mürina a aworato ai mäla? Apwi, esap fokun ina! Tipis a föri ei. Ren an aea mine a mürina, tipis a aworato mäla ngeniei, pwe epwe pwäpwäla wesewesen lapalapen tipis. Iei usun ren ewe allük a pwäla pwe tipis a fokun ngau.

Ewe fiu mi fis lon letipen aramas

7.14-25

¹⁴ Kich mi silei pwe ewe Allük sokun ngün, nge ngang sokun fituk, pwe üa nom fän nemenien tipis. ¹⁵ Üsap weweiti mine üa föri. Pun üsap föri mine üa mochen föri, nge üa föri mine üa oput. ✧ ¹⁶ Iwe, lupwen üa föri mine üsap mochen föri, a pwä pwe üa tipeeu ngeni pwe ewe Allük a pwüng. ¹⁷ Iei usun sap ngang wesewesen ewe mi föri ei, nge ewe tipis mi nonom loi. ¹⁸ Ngang üa silei pwe mine a mürina esap nom loi, wewen esap nom lon fitukei. Pun inamwo ika a nom rei ewe mochenin föri mine a mürina, nge üsap tongeni föri. ¹⁹ Ngang üsap föri mine a mürina usun üa mochen, nge üa föri mine a ngau, ewe sokun föföör ngang üsap mochen pwe üpwe föri. ²⁰ Are ngang üa föri mine üsap mochen föri, wewen pwe sap ngang üa föri ei, pwe ewe tipis mi nonom loi.

²¹ Iwe, üa küna pwe ei allük a angang lon manau: Lupwen üa mochen föri mine a mürina, üa chök filätä ai üpwe föri mine a ngau. ²² Pun seni lon letipei üa pwapwaiti än Kot allük. ²³ Nge üa küna pwal eu allük a angang lon inisi, ewe allük mi fiu ngeni ewe allük letipei a tipeeu ngeni, o a fötekiniei fän ewe allükün tipis, ewe a angang lon inisi. ²⁴ Ngang eman aramas mi atong o weiresikis! Iö epwe angasaei seni ei inis inisin mäla? ²⁵ Kilisou ngeni Kot a angasaei ren ach Samol Jesus Kraist!

Iwe, iei usi: Ngang won inisi üa angang ngeni än Kot allük ren letipei, nge lon fitukei üa angang ngeni ewe allükün tipis.

8

Manau ren ewe Ngünün Kot

8.1-17

¹ Iwe, iei esap wor liwinin tipisin chokewe mi nonom lon Kraist Jesus. ² Pun ewe allükün Ngün mi ngenikich manau lon Kraist Jesus a angasaei seni ewe allük mi afisätä tipis me mäla. ³ Iwe, mine ewe Allük esap tongeni föri pokiten fitukach a apwangapwang, Kot a föri: A ngeni tipis liwinin lon fituken Nöün we, ren an tinato püsün Nöün lon lapalapen aramas usun eman aramas tipis, pwe epwe eu asoren tipis. ⁴ Kot a föri ei, pwe pwüngün ewe allük epwe pwönüetä rech, kich mi manau fän nemenien Ngünmifel, nge sap fän nemenien fituk. ⁵ Chokewe mi manau lon pekin fituk ra nonom fän nemenien fituk. Nge chokewe mi manau lon pekin Ngün ra nonom fän nemenien Ngünmifel. ⁶ Are sia nonom fän nemenien fituk, sopolan mäla, nge are sia nonom fän nemenien Ngünmifel, sopolan manau me kinamwe. ⁷ Iei mine eman aramas a ü ngeni Kot lupwen a nonom fän nemenien tipis, pun esap aleasochisi än Kot allük, pwüngün esap tongeni aleasochis ngeni. ⁸ Chokewe mi aleasochis ngeni mochenin fituker resap tongeni apwapwai Kot.

⁹ Nge ämi ousap nonom fän nemenien fituk, pwe oua nonom fän nemenien Ngünmifel are Ngünün Kot a nom lomi. Nge iö esap eäni Ngünün Kraist, esap i nöün Kraist. ¹⁰ Nge are Kraist a nonom lomi, ewe Ngünmifel a ngenikemi manau pokiten oua pwüing me ren Kot, inamwo ika inisimi repwe mäla pokiten tipis. ¹¹ Are ewe Ngünün Kot mi amanauasefäli Jesus seni mäla a nom lomi, mürin ewe mi amanauasefäli Kraist seni mäla, epwe uwalong manau lon inisimi inisin mäla ren Ngünün we mi nom lomi. ✧

¹² Iwe, ämi pwii kana a wor wisach, nge esap lon ach sipwe nonom fän nemenien fituk. ¹³ Pun are oua nonom fän nemenien fituk, oupwe mäla. Nge are oupwe amäloi ekewe föförün tipis ren Ngünmifel, iwe, oupwe manau. ¹⁴ Iwe, chokewe mi nonom fän emwenien ewe Ngünün Kot, ir nöün Kot. ¹⁵ Pun ewe Ngün Kot a ngenikemi esap nöunikemi chon angang pwe oupwe niuokus, nge ewe Ngün a atolongakemi lon tettelin nöün Kot. Iwe, ren atufichien ewe Ngün sia kökkö ngeni Kot, "Sam! Semei!" ✧ ¹⁶ Iwe, ewe Ngünün Kot a pwäri ngeni ngünüch pwe kich sia nöün Kot kana. ¹⁷ Nge pokiten sia nöün Kot, sipwe feiöchüni ekewe feiöch i a amolätä fän iten nöün kana, sipwe pwal eti Kraist le wöüni ekewe wöün Kot a amolätä fän itan. Pun are sia eti Kraist lon an riaföü, sipwe pwal eti i lon an ling. ✧

Ewe ling epwe torikich me mürin

8.18-30

¹⁸ Ngang üa lükü, pwe ekewe riaföü mi torikich lon fansoun ikenai resap löllö ngeni ewe ling epwe pwä ngenikich. ¹⁹ Förien Kot kewe meinisin ra fokun ösöküsükü pwe Kot epwe pwäräla nöün kana. ²⁰ Pun Kot a föri pwe förian kana repwe lomotongauala, sap ren püsin letiper, nge pokiten letipen Kot pwe epwe iei usun. Nge mi wor ei apilükülüköch, ✧ ²¹ pwe lon eu rän förien Kot kana repwe ngasala seni ar ngauala me tala o eti nöün Kot kewe lon ar ngasala me ling. ²² Pun sia silei pwe tori ikenai förien Kot kewe meinisin ra ngüngü fän cheuch usun cheuchen fam. ²³ Nge sap chök förien Kot kana ra ngüngü, pwe pwal kich mi eäni Ngünmifel, iei aeuin än Kot lifang, sia pwal ngüngü loch lupwen sia witiwiti pwe Kot epwe angeekich pwe sipwe nöün o epwe angasala unusen inisich. ✧ ²⁴ Pun ren ei apilükülük sia küna manau. Nge are sia küna mine sia eäni apilükülük, ei esap wesewesen apilükülüköch. Pun iö epwe apilükülükü mine a fen küna? ²⁵ Nge are sia apilükülükü mine sisap küna mwo, sia witiwit ngeni fän likitü. ²⁶ Ina chök usun ewe Ngünmifel epwe alisikich lon ach apwangpawang. Pun sisap silei mine sipwe eäni iotek, nge püsin Ngünmifel a tüngor ngeni Kot fän itach ren sokun ngüngü esap wor eman a tongeni apasatä lon kapas. ²⁷ Nge Kot, ewe mi küna lon letipach, a silei ekiekin ewe Ngünmifel. Pun ewe Ngünmifel a tüngor ngeni Kot fän iten ekewe chon pin lon met mi fich ngeni letipan.

²⁸ Sia silei pwe lon mettoch meinisin Kot a afisätä feiöchün chokewe mi echeni i, chokewe i a köriir pwe repwe föri letipan. ²⁹ Iwe, chokewe Kot a fen filiiretä me lom a pwal aimwürela pwe repwe wewe ngeni Nöün we lon lapalapan, pwe i ewe epwe mwänichi lein pwiin kewe mi chomong. ³⁰ Iwe, chokewe Kot a aimwürela a pwal köriir, nge chokewe a köriir a föri

✧ 8:11: 1.Kor 3.16 ✧ 8:15: Mark 14.36; Kal 4.6 ✧ 8:17: Kal 4.5-7 ✧ 8:20: Ken 3.17-19
✧ 8:23: 2.Kor 5.2-4

pwe repwe küna pwüing me ren, nge chokewe mi küna pwüing me ren a pwal ngeniir lingan.

Än Kot chen lon Kraist Jesus

8.31-39

³¹ Iwe, met sipwe tongeni apasa ren ekei mettoch? Are Kot a penikich, iö epwe tongeni pölüenikich? ³² Ewer, esap Kot, pun i esap mwo nge amwöchü püsin Nöün, pwe a fangala fänäsengesich meinisin. Ifa usun, esap pwal fang ngenikich mettoch meinisin me Nöün we? ³³ Iö epwe atipisi afilien Kot kewe? Püsin Kot a pwärätä pwe resap tipis! ³⁴ Iö epwe ngeniir liwinin ar tipis? Kraist Jesus ewe mi mäla, nge a pwal fokun manausefälitä, i a nonom lepelifichin Kot, a iotek fänäsengesich o penikich. ³⁵ Meta epwe tongeni aimwükich seni än Kraist we chen? Ifa usun osukosuk, are weires, are riaföü, are echik, are mwelele, are feiengau, are mäla ra tongeni aimwükich? ³⁶ Pun iei usun a mak lon ewe Toropwe mi Pin,

“Fansoun meinisin aia nonom

lon feiengauen mäla fänäsengesum.

Ra ekieki pwe äm aia wewe ngeni sip

mi amol ngeni ar repwe ninnila.” ✧ ³⁷ Apwi, nge lon ekei mettoch meinisin sia fokun pwora ren ewe mi echenikich! ³⁸ Pun üa fokun lükü pwe esap fokun wor och mi tongeni aimwükich seni an we chen: sap mäla are manau, sap chon läng are ekewe anün rochopwak, sap mettochun ikenai are mettochun mürin are och manaman, ³⁹ esap pwal ekewe mettochun pekitä are ekewe mettochun pekitiu, esap fokun wor och lein förian kewe meinisin epwe tongeni aimwüfesenikich seni än Kot we chen mi torikich lon Kraist Jesus ach Samol.

9

Kot me nöün kewe aramas a fliiretä

9.1-18

¹ Ngang üpwe apasatä mine a let. Üsap chofona, pun ngang eman nöün Kraist. Mwelien letipei mi nom fän nemenien Ngünmifel a pwal anüküchara ngeniei, pwe üsap chofona, ² lupwen üa kapas usun watten ai lolilen, pwal usun riaföün letipei esap ükütiu ³ fän iten aramasei lon fitukei! Ai äneän pwe amwo püsin ngang üpwe nom fän än Kot anümamau o imwüla seni Kraist fänäsengesiiir. ⁴ Ir nöün Kot kewe aramas a fliiretä. I a atolonger lon tettelin nöün o a pwäri ngeniir an ling. I a föri an we pwon ngeniir o ngeniir ekewe Allük. Ra fel ngeni Kot fän pwüing o angei än Kot kewe pwon. ✧ ⁵ Ir mwirimwirin ar kewe lewo re Ipru mi iteföüla, pwal Kraist eman me leir lon an nom lon fituk. Sipwe mwareiti Kot tori feilfeilachök, ewe mi nemeni mettoch meinisin. Amen.

⁶ Ngang üsap apasa pwe än Kot we pwon esap pwönüetä. Pun sap chon Israel meinisin ra nöün Kot aramas. ⁷ Sap pwal ekewe mwirimwirin Apraham meinisin ir nöün Kot. Kot a üreni Apraham, “Ekewe mwirimwirin Isaak chök, ikkei ir mwirimwirum kewe üa pwon ngonuk.” ✧ ⁸ Wewen ei, pwe ekewe nau mi upun won Apraham sap ir meinisin nöün Kot. Nge ekewe nau mi uputiu pokiten än Kot we pwon, ir wesewesen mwirimwirin. ⁹ Pun iei masouen än Kot we pwon, “Lon

ewe fansoun mi fich üpwe liwinsefälito, iwe, Sara epwe nöüni eman ät.”
 ✧ ¹⁰ Nge sap iei chök. Pun nöün Repeka kewe ruoman ät ra semeni eman
 chök sam, iei i ach we lewo Isaak. ¹¹ Nge me mwen än ekewe lippwe
 resamwo uputiu, ika me mwen ar resamwo föri och föför mi mürina ika
 mi ngau, (pwe än Kot ekiek lon an fil epwe pwönüetä, ¹² ewe fil esap
 longolong won föför, nge a longolong won an kö) Kot a fen üreni Repeka,
 “Ewe mwänichi epwe angang ngeni ewe mi kis.” ✧ ¹³ Pun iei usun a mak
 lon ewe Toropwe mi Pin, “Üa echeni Jakop, nge üa oput Esau.” ✧

¹⁴ Iwe, ifa usun, sipwe apasa pwe Kot a föri mine esap pwüing? Apwi,
 esap ina! ¹⁵ Pun a apasa ngeni Moses, “Üpwe ümöümöch ngeni iö üa
 mochen ümöümöch ngeni. Üpwe pwal eäni tong ngeni iö üa mochen eäni
 tong ngeni.” ✧ ¹⁶ Iei mine än Kot fil esap longolong won än eman aramas
 mochen ika an föför, nge a longolong won än Kot ümöümöch. ¹⁷ Pun
 iei usun mine a mak lon ewe Toropwe mi Pin fän iten ewe kingen Isip,
 “Üa awisa ngonuk ewe wisen king pwe üpwe nöünöü en le pwärala ai
 manaman, pwe itei epwe föüla won unusen fanüfan.” ✧ ¹⁸ Iei usun Kot
 a ümöümöch ngeni iö a mochen ümöümöch ngeni, nge a pwal aülöföreali
 eman i a mochen aülöföreali.

Än Kot song me an ümöümöch
 9.19–10.4

¹⁹ Iwe, eman me leimi epwe üreniei, “Are a iei usun, epwe ifa usun än
 Kot epwe tongeni atipisi eman? Iö epwe tongeni ü ngeni letipen Kot?”
²⁰ Pwii, nge pwota ka tongeni wippin ngeni Kot? Ifa usun, eu sepi seni
 pwül a tongeni aisini ewe chon föri, “Pwota ka föriei pwe üpwe iei usun?”
 ✧ ²¹ Ifa usun, ewe chon för sepi esap wor an pwüing an epwe föri met a
 mochen seni ewe eu chök pwül? Esap tongeni föri eu sepi fän iten rän mi
 aüchea, pwal eu sepi fän iten iteiten rän?

²² Iei usun mine Kot a föri. A mochen pwärala an song o aiti ngeni
 aramas an manaman. Nge a fokun mosonotam lon an engila ngeni
 chokewe a song ngeniir, ir mi molotä ngeni feiengau. ²³ A pwal mochen
 pwärala an ling mi lapalap, a torikich, kich chokewe a ümöümöch ngeni,
 o a amolakich pwe sipwe angei an we ling. ²⁴ Pun kich chokewe i a köriir,
 sap chök seni me lein ekewe chon Juta, nge pwal seni me lein ekewe chon
 lükün Israel. ²⁵ Iei usun mine a mak lon puken Osea,

“Ekewe aramas esap ir nei,
 üpwe aita ngeniir ‘Nei aramas’!
 Chon ewe mwü üsap echeniir,
 üpwe aita ngeniir ‘Nei mi achengicheng’! ✧

²⁶ Lon ewe chök leni ia ra rongorong ewe kapas,
 ‘Ämi ousap nei aramas’, ikenan repwe iteni nöün Kot ewe mi
 Manau.” ✧ ²⁷ Iwe, Aisea a kökkö fän leüömong usun Israel,
 “Inamwo ika ekewe chon Israel ra chomong usun pien arosset,
 ekoch chök me leir repwe küna manau, ²⁸ pun ewe Samol epwe
 müttir apwüingü chon fanüfan meinisin.” ✧ ²⁹ Iei usun a fis mine
 Aisea a fen apasa me mwan, “Are ewe Samol mi Unusen Manaman

esap amanau ekoch mwirimwirich, kich sipwe usun chök chon Sotom me chon Komora.” ✧

Chon Israel me ewe Kapasen Manau

9.30–10.4

³⁰ Iwe, met sipwe tongeni apasa? Ekewe chon lükün Israel resap kütta usun ar repwe eäni pwüng me ren Kot, ra küna pwüng ren ar lükülük. ³¹ Nge ekewe chon Israel mi kütta eu allük epwe alisiir pwe repwe küna pwüng me ren Kot, nge resap küna. ³² Pwota resap küna? Pokiten mine ra föri esap longolong won lükülük, nge a longolong won met ra föri. Iei usun ra chepetek won ewe “föün chepetek”, ³³ usun ewe Toropwe mi Pin a kapas usun,

“Nengeni, üa anomu lon Sion eföü fau aramas repwe chepetek ren, eu achau aramas repwe opuri.

Nge iö a lükü i esap küna lichipüng.” ✧

10

¹ Ämi pwii kana, üa fokun mochen seni lon unusen letipei pwe püsin aramasei kewe repwe küna manau. Üa pwal iotek ngeni Kot fänäsengesiir. ² Üa tongeni pwärätä usur, pwe ra fokun tiliken le angang ngeni Kot, nge ar tiliken le angang esap longolong won ar silei usun mine a let. ³ Resap silei usun mine Kot a föri, pwe aramas repwe küna pwüng me ren, nge ra fen sotuni usun ar repwe küna püsin ar pwüng. Iei usun resap atolongeer fän mine Kot a föri pwe aramas repwe küna pwüng me ren. ⁴ Pun Kraist a fen aükätü manamanen ekewe Allük, pwe iteiten aramas mi lükü repwe küna pwüng me ren Kot.

Aramas meinisin ra tongeni küna manau

10.5-21

⁵ Iei usun mine Moses a makkei usun än aramas repwe küna pwüng me ren Kot ren ar aleasochisi ekewe Allük, “Iö epwe aleasochisi ekewe Allük epwe manau.” ✧ ⁶ Nge iei usun mine a mak lon ekewe Toropwe mi Pin usun än aramas repwe küna pwüng me ren Kot ren ar lükülük, “Kosap püsin ais ngonuk: Iö epwe feitä läng?” (wewen, iö epwe uwätü Kraist). ⁷ “Kosap pwal ais: Iö epwe feitü lon lenien mäla?” (wewen, iö epwe uweatä Kraist seni mäla). ⁸ Iei usun mine a mak lon ekewe Toropwe mi Pin, “Än Kot kapas a fokun kan ngonuk, a nom lon awom pwal lon lelukom”, iei ewe kapas usun ach lükülük sia afalafala. ✧ ⁹ Are kopwe pwärätä ren awom pwe Jesus i ewe Samol o lükü lon lelukom pwe Kot a amanauasefäli seni mäla, kopwe küna manau. ¹⁰ Pun sia lükü Jesus lon lelukach o küna pwüng me ren Kot, sia pwal pwärätä Jesus ren awach o küna manau ren. ¹¹ A mak lon ekewe Toropwe mi Pin, “Iö a lükü i esap lichipüng.” ✧ ¹² Pun esap wor sokofesenin chon Juta me chon lükün Israel. Kot ewe eman chök Samolun aramas meinisin, a fokun afeiöchü chokewe meinisin mi köri i. ¹³ Usun a mak lon ekewe Toropwe mi Pin, “Iteiten aramas mi köri iten ewe Samol epwe küna manau.” ✧ ¹⁴ Nge ifa usun ar repwe tongeni köri i, are resap lükü? Ifa usun ar repwe tongeni lükü, are resap rongorong an kapas? Nge ifa usun ar repwe tongeni rongorong ewe kapas, are esap wor eman a asile ngeniir? ¹⁵ Ifa usun an

✧ 9:29: Ais 1.9 ✧ 9:33: Ais 28.16 ✧ 10:5: Lif 18.5 ✧ 10:8: Tut 30.12-14 ✧ 10:11: Ais 28.16 ✧ 10:13: Sow 2.32

we kapas epwe asilesil, are Kot esap tinala chon künö? Usun a mak lon ekewe Toropwe mi Pin, “A mürina wareton ekewe chon künö mi uwato ewe Pworausen Manau!” ✧ ¹⁶ Nge sap aramas meinisin ra etiwa ewe Pworausen Manau. Aisea a püsin apasa, “Ai Samol, iö a lükü ewe kapas sia aronga?” ✧ ¹⁷ Iei mine än eman lükülük a pop seni an rongorong ewe kapas, nge ewe kapas a pop seni än eman afalafala Kraist. ¹⁸ Nge üa ais: Mi enlet pwe resap rongorong ewe kapas? Ewer, ra rongorong! Pun iei usun mine a mak lon ekewe Toropwe mi Pin,

“Mwelier a chöfetal won unusen fanüfan,

ar kapas a tori lesopun fanüfan.” ✧ ¹⁹ Üa aissefäl: Ifa usun, ekewe aramasen Israel resap weweiti? Moses ewe aemanün a pölüeni,

“Üpwe föri pwe ämi nei aramas oupwe lolowo

ngeni eu mwichen aramas sap ir wesewesen eu mwü,

üpwe föri pwe ämi oupwe song

ngeni chon eu mwü mi umwes.” ✧ ²⁰ Aisea a fokun pwora lupwen a apasa,

“Chokewe resap küttaei ra künaei.

Üa pwäriei ngeni chokewe resap ais usi.” ✧ ²¹ Nge fänäsengesin Israel a apasa, “Iteiten rän üa aitiela pei, pwe üpwe etiwa eu mwichen aramas mi lükümach o ü ngeniei.” ✧

11

Än Kot ümöümöch ngeni chon Israel

11.1-12

¹ Iwe, üa ais: Ifa usun, Kot a pöütala nöün kewe aramas? Apwi, esap fokun ina! Püsin ngang eman chon Israel, eman mwirimwirin Apraham, eman chon ewe ainangen Peniamin. ✧ ² Kot esap pöütala nöün aramas i a fen filiiretä seni lepopun. Oua silei mine a mak lon ekewe Toropwe mi Pin usun pworausen än Elias tüngormau ngeni Kot o tip ngeni chon Israel, ³ “Ai Samol, ra niela noumw kewe soufos o ataetiu om kewe rongen asor. Ngang chök üa chüen manau. Nge ra pwal ekiengin nieila.” ✧ ⁴ Met Kot a eäni pölüen ngeni Elias? “Üa aimwüela fän itei fisungeröü aramas me lon Israel, ir chokewe resap fel ngeni ewe anü Paal.” ✧ ⁵ Iei usun mine a pwal fis ikenai. Mi wor eu kükün mwichen aramas, ir chokewe Kot a filiiretä pokiten an ümöümöch. ⁶ An afiliiretä a longolong won an ümöümöch, nge sap won mine ra föri. Pun are an fil a longolong won met aramas ra föri, mürin an ümöümöch esap chüen enletin ümöümöch.

⁷ Iwe, met? Ekewe aramasen Israel resap küna mine ra kütta. Eu chök kükün mwich Kot a filiiretä ra küna. Nge ekewe ekoch Kot a föri pwe resap tongeni rongorong ngeni an kö. ⁸ Usun a mak lon ekewe Toropwe mi Pin, “Kot a föri pwe resap tongeni mefi ika weweiti och. Tori ikenai resap tongeni küna ika rongorong.” ✧ ⁹ Tafit a pwal apasa,

“Amwo ar kewe kametip repwe wiliti eu sär
me eu likatuputup fän iter.

¹⁰ Amwo meser kewe repwe chunula,

pwe resap tongeni küna mwer.

Kopwe pwal föri pwe sökürür epwe pwor

✧ **10:15:** Ais 52.7 ✧ **10:16:** Ais 53.1 ✧ **10:18:** Kölf 18.4 ✧ **10:19:** Tut 32.21 ✧ **10:20:** Ais 65.1 ✧ **10:21:** Ais 65.2 ✧ **11:1:** Filip 3.5 ✧ **11:3:** 1.King 19.10,14 ✧ **11:4:** 1.King 19.18 ✧ **11:8:** Tut 29.4; Ais 29.10

ren ar riaföü fansoun meinisin.” ✧ ¹¹ Üa pwal ais: Lupwen ekewe chon Juta ra chepetek, ra turula o unusen feiengau? Apwi, esap ina! Pokiten ra tipis, manau esemüch a tori ekewe chon lükün Israel, pwe ekewe chon Juta repwe lolloletä rer. ¹² Än ekewe chon Juta tipis a atoto watten feiöch ngeni chon fanüfan, nge ar wöüngau lon ngünür a atoto watten feiöch ngeni ekewe chon lükün Israel. Epwe ifan me watten ewe feiöch lupwen unusen chon Juta meinisin repwe kapachelong!

Än Kot amanaua ekewe chon lükün Israel

11.13-24

¹³ Iwe, iei üpwe kapas ngenikemi chon lükün Israel: Lupwen fansoun üa eman soukünü ngeni ekewe chon lükün Israel, ngang üpwe alapala ai ngang. ¹⁴ Eli üpwe tongeni föri, pwe püsin aramasei repwe lolloletä, pwe lupwen üpwe ngang ngeniir, Kot epwe amanaua ekoch me leir. ¹⁵ Pun lupwen Kot a pöütiirela, chon fanüfan ra chä ngeni Kot. Iwe, met epwe fis lupwen Kot epwe etiweer? Epwe fis manau seni mäla. ¹⁶ Are a pin och kinikinin pilawa eman a eäni asor ngeni Kot, unusen ewe pilawa a pwal pin. Nge are eman a eäni asor waren efoch irä ngeni Kot, palan kana ra pwal pin. ¹⁷ Ekoch palen ewe irä olif eman a tümwünü ra kuputiu, nge palen ewe irä olif mi chök püsin pwükütä lein pötöwöl a kapachelong lepökün. Ämi chon lükün Israel, oua wewe ngeni ewe irä olif mi pwükütä me lein pötöwöl, nge iei oua angei watten feiöch seni ekewe chon Juta, usun chök ewe palen irä olif mi pwükütä lein pötöwöl a angei feiöch seni chönün ewe irä olif eman a tümwünü. ¹⁸ Iei mine ousap turunufasei chokewe mi usun chök ekewe palen irä mi kuputiu. Pwota oupwe lamalamtekia? Ämi oua usun chök efoch palen irä. Ämi oua manau seni waren ewe irä, nge waren ewe irä resap manau senikemi. ¹⁹ Nge eli oupwe apasa, “Ewer, nge ekewe palan ra kuputiu, pwe epwe wor leniem.” ²⁰ Mi pwüing. Ra kuputiu pokiten resap lükü, nge ämi oua nomotiu lon lenier pokiten oua lükü. Iwe, ousap lamalamtekia usun ei, nge oupwe niuokus. ²¹ Pun Kot esap achika ekewe chon Juta, ir wesewesen palen ewe irä, ifa usun, oua ekieki pwe epwe achikakemi? ²² Iei mine oupwe ekieki usun än Kot kirikiröch me an pöchökül. A fokun pöchökül ngeni chokewe mi turutiu, nge a kirikiröch ngeni ämi. Are oua sopwela le föri mine a mürina, epwe sopwela le kirikiröch ngenikemi, nge are ousap föri iei usun, pwal ämi oupwe kuputiu. ²³ Iwe, are ekewe chon Juta repwe likitala ar lükümang, repwe liwinsefäliilong lon lenier me mwan, pun Kot a tongeni aliwinsefäliir. ²⁴ Ämi chon lükün Israel, oua wewe ngeni efoch palen ewe irä olif mi püsin pwükütä lein pötöwöl a kuputiu o kapach ngeni efoch irä olif eman a tümwünü, nge esap iei pwüingün ei sokun ngang. Ekewe chon Juta ra usun chök ewe irä olif eman a tümwünü. Iwe, epwe fokun mecheres ngeni Kot an epwe apachasefälielong ekewe palen irä mi kuputiu lon lenier me mwan.

Än Kot ümöömöch ngeni aramas meinisin

11.25-32

²⁵ Ämi pwii kana, mi wor eu monomon mi enlet üa mochen pwe ämi oupwe silei, pwe ousap ekieki püsin ämi tipachem. Iei ewe monomon: Än chon Israel ülöförea lon letiper esap sopesopola, nge epwe chök müchüla

lupwen epwe unus iteiten chon lükün Israel repwe feito ren Kot. ²⁶ Iwe, iei usun chon Israel meinisin repwe küna manau, usun a mak lon ekewe Toropwe mi Pin,

“Ewe chon Amanau epwe feito seni Sion

o angei seni ekewe mwirimwirin Jakob ar föföringau meinisin. ✧

²⁷ Üpwe föri ei pwon ngeniir,

lupwen üpwe angei seniir ar kewe tipis.” ✧ ²⁸ Iwe, pokiten ekewe chon Juta resap etiwa ewe Pworausen Manau, ir chon oput Kot fänäsengesin ämi chon lükün Israel. Nge pokiten Kot a filiiretä, ir ra chen me ren fänäsengesin ar kewe lewo. ²⁹ Pun Kot esap akasiwili ekiekin letipan ren iö a filätä o afeiöchü. ³⁰ Iwe, ämi chon lükün Israel oua aleasolap ngeni Kot me lom. Nge iei oua angei än Kot ümömöch pokiten än ekewe chon Juta aleasolap. ³¹ Pwal ina chök usun, ekewe chon Juta ra aleasolap ngeni Kot iei, pwal ir repwe angei än Kot ümömöch iei, pun Kot a pwal ümömöch ngenikemi. ³² Pun Kot a föri pwe aramas meinisin repwe fötek fän nemenien aleasolap, pwe epwe pwärala an ümömöch ngeniir meinisin.

Sipwe mwareiti Kot

11.33-36

³³ A ifan me watten wöün Kot! A ifan me alololun an tipachem me silelap! Iö a tongeni awewei an apwüng? Iö a tongeni weweiti an kewe föför? ✧ ³⁴ Usun a mak lon ekewe Toropwe mi Pin,

“Iö a silei ekiekin ewe Samol?

Iö a tongeni öüröüra? ✧

³⁵ Iö a ngeni och mettoch,

pwe epwe wisen aliwinisefäli?” ✧ ³⁶ Pun Kot a föri mettoch meinisin, mettoch meinisin ra manau ren o nom fänäsengesin. Kot epwe ling tori feilfeilachök! Amen. ✧

12

Eu manau mi fich lon ach angang ngeni Kot

12.1-12

¹ Iei mine üa pese ngenikemi, ämi pwii kana, pokiten watten än Kot ümömöch ngenikich, pwe oupwe fangala inisimi pwe eu asor mi manau o pin fän iten än Kot angang o i epwe pwapwa ren. Iei usun pwüngün ämi fel ngeni Kot. ² Ousap apirü pomwen fanüfan, nge oupwe mwüt ngeni Kot pwe epwe awilikemi o asöföla unusen letipemi. Mürin oupwe tongeni silei letipen Kot, ren met mi mürina me unusöch, pwal met mi apwapwai i.

³ Iwe, pokiten än Kot lifangen ümömöch ngeniei, üpwe ürenikemi meinisin: Ousap ekiekin tipetekia seni mine a fichitikemi, nge oupwe tipetekison lon ämi ekiek o püsin apwüngükemi ngeni ewe aükükün lükülük Kot a ngenikemi. ⁴ A wor chomong kifetin inisich, nge ekei kifet meinisin ra sokofesen lon en me an angang. ⁵ Inamwo ika kich chomong sokun aramas, nge sia eu chök inis lon Kraist. Iwe, eman me eman leich sia chufengen usun ekewe sokopaten kifet lon eu chök inis. ✧ ⁶ Iei mine sipwe anganga ekewe sokopaten tufich Kot a lifang ngenikich lon aükükün an ümömöch. Are eman a tufichin afalafala än Kot we kapas,

epwe föri won aukükün ewe lükülük a eäni. ⁷ Are eman a tufichin angang lon mwichefel, epwe angang, are eman a tufichin asukul, epwe asukul. ⁸ Are eman a tufichin apöchöküla letipen aramas, epwe föri iei usun. Iö a eäni ewe tufichin alisi aramas, epwe föri seni unusen letipan, iö a eäni ewe tufichin nemenem, epwe achocho le angang, iö a wor ren ewe tufichin eäni kirikiröch ngeni aramas, epwe föri fän pwapwan letipan. ✱

⁹ Ämi chen epwe fokun wenechar. Oupwe oput mine a ngau o kamwöchünük won mine a mürina. ¹⁰ Tongen pwipwi lon Kraist epwe pwichikar lefilemi. Oupwe fokun asamolufengenikemi lefilemi. ¹¹ Oupwe achocho le angang, nge ousap chipwang. Oupwe angang ngeni ewe Samol ren unusen letipemi. ¹² Oupwe pwapwa lon ämi apilükülüköch, oupwe mosonotam lon ämi riaföü, oupwe iotek fansoun meinisin. ¹³ Oupwe alisi pwimi kewe souläng mi osupwang, oupwe etywaöchü ekewe wasöla.

¹⁴ Oupwe tüngror ngeni Kot pwe epwe afeiöchü chokewe mi ariaföükemi. Ewer, oupwe tüngror ngeni pwe epwe afeiöchüür, nge esap afeiengauer. ✱ ¹⁵ Oupwe eti chokewe mi pwapwa le pwapwa, nge oupwe eti chokewe mi kechü le kechü. ¹⁶ Oupwe tipeufengen lefilemi. Ousap lamalamtekia, nge oupwe tipeni le föri angang mi tekisoon. Ousap ekieki pwe oua tipachem. ✱

¹⁷ Are eman a föri mi ngau ngenikemi, ousap liwini ngeni lon föföör mi ngau. Oupwe achocho le föri mine a öch ngeni aramas meinisin. ¹⁸ Oupwe föri mine oupwe kinamwefengen me aramas meinisin ren ukükün ämi tongeni. ¹⁹ Ämi pwii kana, ousap liwini ngeni eman chappen an föföör, nge oupwe mwüt ngeni Kot epwe föri. Pun a mak lon ewe Toropwe mi Pin, “Ngang üpwe ngeniür chappen ar föföör, üpwe liwini ngeniür ukükün liwinin ar föföör mi ngau, iei alon ewe Samol.” ✱ ²⁰ Nge iei oupwe föri usun mine a mak lon ekewe Toropwe mi Pin, “Are chon oputom a echik, kopwe amongöü, nge are a kaka, kopwe aünü, pun are kopwe föri iei usun, säw epwe küri usun ekkei a kükikich.” ✱ ²¹ Kosap mwüt ngeni ngau epwe akufuk, nge kopwe akufu met mi ngau ren om föfööröch.

13

Wisach ngeni mwü

13.1-7

¹ Aramas meinisin repwe aleasochisi nöüwisen ewe mwü mi nemeniir. Pun esap wor ar nemenem are Kot esap mwütätä ngeniür, nge Kot a ngeni ekewe nöüwis wiser pwe repwe nemenem. ² Are eman a ü ngeni ekewe nöüwis, a ü ngeni met Kot a akota. Nge ika eman epwe föri iei usun, epwe kûna kapwüng. ³ Pun chokewe mi föri mine a mürina resap niuokusiti ekewe nöüwis, pwe chokewe chök ra föri mine a ngau. Ifa usun, oua mochen ämi ousap niuokusiti chokewe mi nemenem? Mürin oupwe föri mine a mürina, iwe, repwe mwareitikemi. ⁴ Pun ir nöün Kot chon angang, ra angang fänäsengesimi pwe oupwe feiöch. Nge are oua föri mine a ngau, oupwe niuokusitiir, pun a wor ar pöchökül le apwüngü aramas. Ir nöün Kot kewe chon angang, ra wisen apwönüetä pwüngün än Kot we apwüng ngeni chokewe mi föri mine a ngau. ⁵ Iei popun ämi oupwe aleasochisi

✱ **12:8:** 1.Kor 12.4-11 ✱ **12:14:** Mat 5.44; Luk 6.28 ✱ **12:16:** SalF 3.7 ✱ **12:19:** Tut 32.35

✱ **12:20:** SalF 25.21-22

ekewe nöüwis, esap pokiten chök än Kot we apwüing, nge pwal pokiten iei mefien letipemi.

⁶ Iei pwal popun pwe ämi oupwe mönätiu ämi takises, pun ekewe nöüwis ra angang fän iten Kot lupwen ra apwönüetä wiser. ⁷ Oupwe ngeni ekei aramas mine oupwe wisen ngeniir. Oupwe mönätiu ämi takises me ekewe sokopaten takises ngeni chokewe ra wisen angei takises senikemi, oupwe meniniti ekewe aramas a wor meniniir, oupwe asamolu ekewe aramas a wor suföläüür. ✧

Wisach ngeni eman me eman aramas

13.8-14

⁸ Ousap liwinimang ngeni eman och mettoch, nge iei chök ewe liwinimang oupwe eäni: oupwe echenifengenikemi lefilemi. Iö a föri iei usun a aleasochisi ekewe Allük. ⁹ Ekewe allük, “Kosap lisowu, kosap solä, kosap mocheniati pisekin eman”, ekei allük meinisin me pwal ekewe ekoch ra nom fän ewe eu chök allük, “Kopwe echeni chon arum usun püsin om echenuk.” ✧ ¹⁰ Are oua echeni eman, ousap fokun föri och föför mi ngau ngeni. Ren ämi echeni aramas oua apwönüetä ekewe Allük meinisin.

¹¹ Oupwe fokun föri iei usun, pun oua silei pwe ewe fansoun a arapoto, pwe ämi oupwe pwätä seni möür. Pun ewe ränin än Kot amanauakich a kaneto iei lap seni ewe fansoun sia popuetä le lükü Jesus Kraist. ¹² Pwin a arap ngeni chök epwe le la, nge rän epwe le war. Iei mine ousipwe ükütiu le föri föförün rochopwak, nge sipwe angei ekewe pisekin maun pwe sipwe maun lon saram. ¹³ Ousipwe föri föförün pwüing usun aramas mi nom lon saram. Sisap mongömong ika ünüpuch, sisap lisowu ika föföringau, sisap anini ika lolowo. ¹⁴ Nge oupwe angei än ach Samol Jesus Kraist kewe pisekin maun, oupwe ükütiu le ekieki usun ämi oupwe apwönüetä mochenian fitukemi.

14

Ousap apwüingü pwimi souläng

14.1-12

¹ Oupwe etiwa ewe aramas mi apwangapwang lon an lükülük, nge ousap anini ngeni won met mefian. ² Eman aramas a lükü pwe a tongeni mongö sokun mongö meinisin, nge eman aramas mi apwangapwang lon an lükülük a chök mongö mongön atake. ³ Ewe aramas mi mongö ekewe sokopaten mongö esap esita ewe eman esap mongö ekewe mongö. Nge ätewe mi mongö chök mongön atake esap apwüingü ewe eman mi mongö ekewe mongö meinisin. Pun Kot a pwal etiwa i. ⁴ En iö pwe kopwe apwüingü nöün eman chon angang? Wisen nöün we masta pwe epwe apwüingala ika an angang a öch ika a ngau. Iwe, an angang epwe fokun öch, pun ach Samol a tufichin alisi pwe epwe öch an angang.

⁵ Eman aramas a ekieki pwe eu rän a aüchea seni ekewe ekoch rän. Nge pwal eman a ekieki pwe ekewe rän meinisin ra nönnöpök. Eman me eman epwe fokun lükü pwe mefian a pwüing. ⁶ Ätewe mi ekieki pwe a fokun aüchea ewe eu rän, a föri iei usun fän iten an epwe pwärala pwe a alinga ach Samol. Ätewe mi mongö ekewe mongö meinisin, a föri iei usun pwe epwe alingala ach Samol, pokiten a kilisou ngeni Kot fän iten ewe mongö. Nge ätewe esap mochen mongö ekoch sokun mongö, a föri iei

usun pwe epwe alinga ach Samol o kilisou ngeni Kot. ✧ ⁷ Esap wor eman me leich a manau fän püsin itan, esap pwal wor eman a mäla fän püsin itan. ⁸ Are sia manau, sia manau fän iten ach Samol, nge are sia mäla, sia mäla fän iten ach Samol. Iei mine are sia manau ika mäla, sia nöün ach Samol. ⁹ Pun Kraist a mäla o manausefal pwe epwe samoluni ekewe chon manau me ekewe chon mäla. ¹⁰ Iwe, pwota en ka apwüngü pwiüm we? Nge pwal en, pwota ka esita pwiüm we? Kich meinsin sipwe ütä mwen mesen Kot pwe sipwe kapwüng me ren. ✧ ¹¹ Pun a mak lon ekewe Toropwe mi Pin,

“Ewe Samol a apasa: Üa akapelüei,
pwe aramas meinsin repwe fotopwäsuk mwen mesei,
nge aramas meinsin repwe pwärätä pwe ngang Kot.” ✧ ¹² Iei mine kich meinsin sipwe en me püsin pwärätä föförün lon manauan ngeni Kot.

Kosap föri mine pwiüm epwe tipis ren

14.13-23

¹³ Iei mine sipwe ükütiu le apwüngüfengenikich eman ngeni eman. Nge iei mine oupwe ekiekietä lon letipemi, pwe ousap föri och met pwimi epwe chepetek ren ika turutiu lon tipis. ¹⁴ Pokiten ai nonom lon ach Samol Jesus üa wesewesen lükü pwe esap wor och mongö mi pin ngeniei. Nge are eman aramas a lükü pwe ekoch mongö ra pin ngeni, mürin ewe mongö a pin ngeni. ¹⁵ Are pwiüm a weires reöm pokiten ka mongö och sokun mongö, ka föri och föför esap chüen fis fän tong. Kosap mwütätä pwe om mongö och sokun mongö epwe afeiengaua ewe aramas Kraist a mäla fänäsengesin. ¹⁶ Kosap föri och met aramas repwe esita mine en ka ekieki pwe a mürina. ¹⁷ Pun Mwün Kot esap longolong won anach me ünümach, nge a longolong won pwüng, kinamwe me pwapwa mi feito seni ewe Ngünmifel. ¹⁸ Iwe, eman me eman mi angang ngeni Kraist lon ei sokun lapalap a apwapwai Kot o aramas repwe pwal tipeeu ngeni.

¹⁹ Iei mine sipwe fokun achocho ngeni mine epwe afisätä kinamwe o alilifengen le apöchökülafengenikich lefilach. ²⁰ Ousap atala än Kot we angang pokiten mongö. Ekewe mongö meinsin oua tongeni mongö, nge esap pwüng än eman epwe mongö och mine epwe afisätä än eman epwe turutiu lon tipis ren. ²¹ Esap mürina om kopwe ochoch fituk ika ün wain ika föri och sokun föför mine epwe afisätä än pwiüm we epwe chepetek ren. ²² Met ka lükü won ekei mettoch lefilom chök me Kot. A feiöch ewe aramas esap mengiringir lupwen a föri och a ekieki pwe mi pwüng. ²³ Nge are eman a tipemwaramwar ren mine a mongö, Kot epwe apwüngü pwe a tipis lupwen a mongö, pun an föför esap longolong won lükülük. Mettoch meinsin sia föri nge resap longolong won lükülük, iei tipis.

15

Sipwe apwapwai chienach souläng, nge sisap püsin apwapwai kich

15.1-6

¹ Oukich kewe mi pöchökül lon ach lükülük sipwe alisi ekewe mi apwangapwang lon ar lükülük, pwe repwe tipeppos lon ar lükülük, nge sisap föri chök mine sipwe pwapwa ren. ² Kich meinsin sipwe föri mine pwiich kewe souläng repwe pwapwa o feiöch ren, pwe repwe fefeitä

lon ar lükülük. ³ Pun Kraist esap chök kütta mine epwe püsin pwapwa ren. Nge iei usun a mak lon ekewe Toropwe mi Pin, “Ekewe kapasen esit mi toruk ra pwal toriei.” ✧ ⁴ Pun meinisin mine a mak lon ekewe Toropwe mi Pin a mak fän iten ach sipwe kaiö seni, pwe epwe wor ach apilükülüköch ren ach likitü pwal ren ach küna pöchökülen letipach mi torikich seni ekewe Toropwe mi Pin. ⁵ Nge Kot, i popun ach likitü me ach küna pöchökülen letipach, epwe atufichikemi pwe oupwe tipeeufengen lefilemi ren ämi apirü föförün Kraist Jesus, ⁶ pwe ämi meinisin oupwe tipeeufengen le mwareiti Kot, i Semen ach Samol Jesus Kraist.

Ewe Pworausen Manau fän iten ekewe chon lükün Israel

15.7-13

⁷ Iwe, oupwe etiwafengenikemi lefilemi, usun chök Kraist a etiwakemi, pwe lingen Kot epwe fis. ⁸ Pun üa ürenikemi pwe Kraist a wiliti eman chon angang fän iten ekewe chon Juta an epwe pwärätä pwe Kot a allükülük, o epwe apwönüetä än Kot kewe pwon ngeni ar kewe lewo, ⁹ epwe pwal atufichi ekewe chon lükün Israel pwe repwe mwareiti Kot ren an we tong, usun a mak lon ekewe Toropwe mi Pin,

“Iei mine üpwe kilisou ngonuk me lein ekewe chon lükün Israel, üpwe kölün mwareiti itom.” ✧ ¹⁰ A pwal mak,

“Ämi chon lükün Israel oupwe fiti

nöün Kot kewe aramas le pwapwa!” ✧ ¹¹ A pwal mak,

“Oupwe mwareiti ewe Samol ämi chon lükün Israel meinisin,

oupwe fokun mwareiti i ämi aramas meinisin!” ✧ ¹² Aisea a pwal apasa,

“Eman mwirimwirin Jesi epwe war.

Epwe feito pwe epwe nemeni ekewe chon lükün Israel,

nge ir repwe anomu ar apilükülük won.” ✧ ¹³ Nge ewe Kot, i popun ämi apilükülük, epwe aurakemi ren watten pwapwa me kinamwe ren ämi lükü i, pwe ämi apilükülüköch epwe säsewu ren manamanen Ngünmifel.

Popun än Paulus pwora le makkei ei toropwe

15.14-21

¹⁴ Ämi pwii kana, ngang won inisi üa lükü pwe oua urela ren föför mi mürina pwal ren sokopaten silelap, nge oua pwal tongeni püsin ööröürafengenikemi. ¹⁵ Nge lon ei toropwe üa fokun pwora le makkei ngenikemi usun ekoch itelap üa mochen achema ngenikemi. Üa föri ei pokiten ewe wis mi aüchea Kot a ngeniei, ¹⁶ pwe üpwe eman chon angangen Kraist Jesus ai üpwe angang ngeni ekewe chon lükün Israel. Üa angang usun eman souasor lon ai afalafala ewe Pworausen Manau seni Kot, pwe ekewe chon lükün Israel repwe wiliti eu asor mi tiw me ren Kot, a pin ren Ngünmifel.

¹⁷ Iei mine lon ai eufengen me Kraist üa tongeni aingaing lon ai angang ngeni Kot. ¹⁸ Pun üsap mochen kapas usun och mettoch, nge üpwe chök kapas usun met Kraist a föri rei lon ai emweni ekewe chon lükün Israel pwe repwe aleasochisi Kot. A föri ei ren ai kewe kapas me föför, ¹⁹ ren pöchökülen ekewe asisil me manaman pwal ren manamanen ewe Ngünün Kot. Iei usun üa sai seni Jerusalem tori Illirikum o arongafeili

✧ 15:3: Kölf 69.9 ✧ 15:9: 2.Sam 22.50; Kölf 18.49 ✧ 15:10: Tut 32.43 ✧ 15:11: Kölf 117.1

✧ 15:12: Ais 11.10

unusen ewe Pworausen Manau usun Kraist. ²⁰ Iei ai mochen fansoun meinisin, pwe üpwe arongafeili ewe Pworausen Manau lon ekewe leni ia aramas resamwo rongorong usun Kraist, pwe üsap aüetä won eu longolong eman a fen föri. ²¹ Usun a mak lon ekewe Toropwe mi Pin, “Chokewe esap wor eman a aronga ngeniir usun i repwe kûna, nge chokewe mi rongorong repwe wewe ren.” ✧

Än Paulus akot fän iten an saila Rom
15.22-33

²² Iwe, iei popun a wor met a epetiei fän chomong, pwe üsap tongeni feila remi. ✧ ²³ Nge iei üa awesala ai angang lon ekei leni. Pokiten chomong ier üa fen mochen feila remi pwe üpwe churikemi, ²⁴ üa apilükülükü ai üpwe tongeni feila remi iei. Ngang üa mochen pwe üpwe churikemi lon ai sai ngeni Spain. Üa mochen oupwe alisie i lon ai sai ngeni ikenan me mürin ai pwapwa le nonom remi ekoch fansoun. ²⁵ Nge iei üpwe feila Jerusalem o uweela alilisin ekewe chon pin mi nom ikenan. ²⁶ Pun ekewe mwichefel lon Masetonia me Krik ra ekielikfengeni ar repwe fangala ar asor fän iten alilisin ekewe chon wöüngau me lein ekewe chon pin lon Jerusalem. ✧ ²⁷ Ei ekielik püsin ir ra filätä ar repwe föri. Nge wesewesen pwüngün mi wor wiser pwe repwe alisi ekewe chon wöüngau. Ekewe chon Juta ra fangala ar kewe feiöchün ngün ngeni ekewe chon lükün Israel, iei mine ekewe chon lükün Israel repwe alisi ekewe chon Juta ren ar kewe feiöchün inis. ✧ ²⁸ Lupwen üpwe awesala ai angang o ngeniir unusen ewe moni aramas ra fesini fän iter, üpwe churikemi lon ai sai ngeni Spain. ²⁹ Iwe, üa silei pwe lupwen üpwe torikemi, üpwe uwato remi unusen än Kraist we feiöch.

³⁰ Ämi pwii kana, üa pese ngenikemi fän iten ach Samol Jesus Kraist pwal fän iten ewe tong ewe Ngünmifel a fangeto, pwe oupwe etiei lon ämi tiliken le iotek ngeni Kot fänäsengesi. ³¹ Oupwe iotek pwe üsap feiengau ren ekewe chon Juta resap lükü Jesus, oupwe pwal iotek pwe ai angang lon Jerusalem epwe ketiw me ren ekewe chon pin mi nom ikenan. ³² Mürin ngang üpwe feila remi fän watten pwapwa, are iei letipen Kot, pwe üpwe pwapwa le asösö lon fansoun ai nonom remi. ³³ Kot, i popun ach kinamwe, epwe etikemi meinisin. Amen.

16

Än Paulus kapong
16.1-16

¹ Üa mochen asile ngenikemi pworausen fefinach we Föpe mi angang lon ewe mwichefel lon Kenkrea. ² Oupwe etiwa neminei fän iten ewe Samol usun mine oua föri ngeni ekewe chon pin o oupwe alisi i lon mine a osupwang ren, pun i a pwal alisi chomong aramas, a pwal alisie.

³ Ai kapong ngeni Prisila me Akwila, chienei kewe chon angang lon ewe angangen Kraist. ✧ ⁴ Ra amoleeretä pwe repwe ninnila fän itei. Üa fokun kilisou ngeniir, nge sap ngang chök, pwe pwal chon ekewe mwichefelin chon lükün Israel meinisin. ⁵ Pwal ai kapong ngeni ewe mwichefel mi chufengen lon imwer.

✧ 15:21: Ais 52.15 ✧ 15:22: Rom 1.13 ✧ 15:26: 1.Kor 16.1-4 ✧ 15:27: 1.Kor 9.11
✧ 16:3: Föf 18.2

Ai kapong ngeni chienei mi achengicheng Epänetus, i ätewe mi akomwen lükü Kraist lon ewe fanü Asia. ⁶ Ai kapong ngeni Maria, nem-inewe mi angang weires fän itemi. ⁷ Pwal ai kapong ngeni Antronikus me Junias chienei kewe chon Juta mi etiei le nom lon imwen fötek. Ra fokun iteföüla me lein ekewe soukünü o ra pwal akom le souläng mwei. ⁸ Ai kapong ngeni Ampliatus chienei we mi achengicheng lon ach Samol. ⁹ Ai kapong ngeni Urpanus chienach we chon angang lon än Kraist angang, pwal ngeni Stakis chienei we mi achengicheng. ¹⁰ Ai kapong ngeni Apeles, an allükülük ngeni Kraist a pwäpwäla. Pwal ai kapong ngeni chon leimwen Aristopulus. ¹¹ Ai kapong ngeni Herotian, eman chienei chon Juta, pwal ngeni ekewe souläng ir chon leimwen Narsisus. ¹² Ai kapong ngeni Trifana me Trifosa, ir mi angang ngeni ach Samol, pwal ai kapong ngeni fefinei mi achengicheng Persis, neminewe mi fokun angang weires fän iten ach Samol. ¹³ Ai kapong ngeni Rufus, i ewe chon angang mi iteföüla lon än ewe Samol angang, pwal ngeni inan we mi tümwünüei usun eman nöün. ✧ ¹⁴ Ai kapong ngeni Asinkritus, Flekon, Hermes, Patropas, Hermas, pwal ngeni ekewe souläng mi nom rer. ¹⁵ Ai kapong ngeni Filolokus me Julia, ngeni Nereus me fefinan we, ngeni Olimpas, pwal ngeni ekewe chon pin meinisin mi nom rer. ¹⁶ Oupwe kapongfengen lefilemi ren ewe kapongen souläng. Chon ewe mwichefelin Kraist meinisin ra kapong ngenikemi.

Sopolan än Paulus kapasen öüröür

16.17-24

¹⁷ Ämi pwii kana, üa pese ngenikemi pwe oupwe afälikemi ren chokewe mi afisätä kinikinfesen lefilen aramas o atoka än aramas lükülük, ir ra ü ngeni ekewe kapas sia aiti ngenikemi. Ousap chiechi ngeniir. ¹⁸ Pun chokewe mi föri ei sokun föföör resap angang ngeni Kraist ach Samol, nge ra angang ngeni püsin inisir. Ren ar kapas motoutou me kapas amichimich ra atupu ekewe aramas mi miritimang. ¹⁹ Aramas meinisin ra rongorong usun ämi aleasochis ngeni ewe Pworausen Manau, iei popun üa pwapwa usumi. Üa mochen ämi oupwe miritikai ngeni met a mürina, nge oupwe miritimang ngeni mine a ngau. ²⁰ Iwe, Kot, i popun ach kinamwe, epwe müttir apachacha Satan fän pechemi. Ümömöchün ach Samol Jesus epwe nonom remi.

²¹ Timoty, chienei we chon angang, a kapong ngenikemi, pwal Lusius, Jason me Sosipater, ir chienei kewe chon Juta, ra pwal kapong ngenikemi. ✧ ²² Ngang Tertius, ewe mi makkei ei toropwe, üa eäni ewe kapongen souläng ngenikemi. ²³ Kaius, ätewe üa nonom ren, pwal chon ewe mwichefel a mwichfengen lon imwan ra kapong ngenikemi. Erastus, ewe chon tümwünü moni fän iten ewe telinimw, me pwiich Kwartus ra kapong ngenikemi. ✧ ²⁴ [Ümömöchün ach Samol Jesus Kraist epwe nonom remi meinisin. Amen.]

Än Paulus iotekin lesopolan

16.25-27

²⁵ Ousipwe mwareiti Kot! I a tongeni anükücharakemi lon ämi lükülük ren ewe Pworausen Manau üa afalafala, ewe pworaus usun Jesus Kraist, pwal ren pwälan ewe monomon mi let a monomonola me lom lon

chomong, chomong fansoun. ²⁶ Nge iei ena monomon a pwäpwäla ren makkeen ekewe soufos, o ren än Kot, ewe mi manau tori feilfeilachök we allük a pwäla ngeni chon ekewe mwü meininis ar repwe silei usun, pwe meininis repwe lükü o aleasochis ngeni. ²⁷ Ewe eman chök Kot, i chök ewe eman mi unusen tipachem, epwe ling ren Jesus Kraist tori feilfeilachök! Amen.

Aeuin nöün Paulus Toropwe ngeni ekewe Souläng lon Korint

Kapas akom

I. Chon makkei ei toropwe: Ewe soukünü Paulus.

II. A mak ngeni iö: Ngeni ekewe souläng lon Korint.

III. Itelapemongen ei toropwe: Ekewe osukosuken lon ewe mwichefel.

IV. Kapas aüchean ei toropwe: Ekewe föför mi mwäl repwe lime-limewu seni lon ewe mwichefel.

V. Masouen ei toropwe: Paulus a mak ewe aeuin toropwe ngeni ekewe souläng lon Korint pwe epwe afata ngeniir usun ekewe osukosuk lon manauen ekewe souläng me ar lükülük mi fisitä lon ewe mwichefel Paulus a popuetä lon Korint. Lon ena fansoun ei telinimw Korint eu telinimw mi fokun watte lon Krik, ewe samolon telinimw lon ewe fanü Akaia mi nom fän nemenien ewe mwün Rom. Ei telinimw a iteföüla ren angangen amömö, ren örünien fanüer, ren föför mi fokun ngau, pwal ren chomong sokopaten lamalam.

Ewe soukünü Paulus a fokun chüngü ekewe osukosuk usun ar kinikin-fesen me föför mi fokun ngau, ekewe kapas ais usun lefilen mwän me fefin me pwüngün pwüpwülü, pwal ekewe sokun memef seni letip, usun kotöchün lon mwichefel, ekewe lifang seni Ngünmifel me ewe manausefäl seni sotup. Seni alololun an mirit a aiti ngeniir met ewe Pworausen Manau a apasa usun ar kei kapas ais.

Lon sopun 13 a pwärätä pwe chen än Kot lifang mi fokun aüchea ngeni nöün aramas. Ekei wokisin lon ei sopun aramas ra fokun sileöchü seni ekewe wokisin meinsin lon ei toropwe.

VI. Tettelin masouen ei toropwe:

Kapas akom 1.1-9

Kinikin lon ewe mwichefel 1.10-4.21

Pwüngün lefilen mwän me fefin me famili 5.1-7.40

Souläng me chon lükün 8.1-11.1

Nonomun mwichefel me ar fel ngeni Kot 11.2-14.40

Än Kraist manausefäl me än ekewe chon lükü i manausefäl 15.1-58

Ewe asor fänäsengesin ekewe souläng lon Juta 16.1-4

Kapassen lesopolan 16.5-24

Kapong

1.1-3

¹ Ngang Paulus, ewe mi kö me ren letipen Kot an epwe nöün Kraist Jesus soukünü, pwal pwüch ei Sostenes, ² aia kapong ngeni än Kot we mwichefel mi nom lon Korint, ngeni chokewe mi küna pin lon Kraist Jesus, ir mi kö pwe repwe pin fitifengen me chokewe ekis meinsin mi köri iten ach Samol Jesus Kraist, i ouach Samol: ✧ ³ Iwe, Samach Kot me ach Samol Jesus Kraist epwe ngenikemi ümöümöch me kinamwe.

Ekewe feiöch lon Kraist

1.4-9

⁴ Üa kilisou ngeni Kot fänäsengesimi fansoun meinsin pokiten ewe ümömöch i a ngenikemi ren Kraist Jesus. ⁵ Pun lon Kraist oua wöü lon mettoch meinsin, pwal lon ämi kapas me ämi silelap meinsin. ⁶ Ach kapasen pwärätä usun Kraist a fokun nüküchar lomi, ⁷ iei mine ousap osupwang ren och ekewe feiöchün Ngün lupwen oua witiwiti ach Samol Jesus Kraist an epwe pwä. ⁸ I epwe pwal anükücharakemi tori lesopolan, pwe esap wor eman epwe tip ngenikemi och mi mwäl lon ewe Ränin ach Samol Jesus Kraist. ⁹ Kot a allükülük, i ewe a körikemi pwe oupwe chiechi ngeni Nöün we Jesus Kraist ach Samol.

Kinikinfesen lon mwichefel

1.10-17

¹⁰ Üa tüngormau ngenikemi, ämi pwii kana, fän iten ach Samol Jesus Kraist, pwe oupwe tipeefengen lefilemi, pwe esap wor kinikinfesen leimi. Oupwe fokun tip-eu me ekiek eu. ¹¹ Ämi pwii kana, ekoch aramas seni än Kloe famili ra asile ngeniei pwe mi wor aninifengen lefilemi. ¹² Iei met üa kapas usun: Eman a apasa, “Ngang nöün Paulus souläng,” eman a pwal apasa, “Ngang nöün Apolos souläng,” pwal eman a apasa, “Ngang nöün Petrus souläng,” nge pwal eman a apasa, “Ngang nöün Kraist souläng.” * ¹³ Ifa usun, Kraist a kinikinfesen? Ifa usun, Paulus a mäla won iräpenges fän itemi? Ifa usun, oua papataisi ngeni iten Paulus?

¹⁴ Ngang üa kilisou ngeni Kot pwe üsap papataisi eman leimi, chilon chök Krispus me Kaius, * ¹⁵ iei mine esap wor eman a tongeni apasa pwe üa papataisi eman ngeni itei. ¹⁶ (Ewer, üa pwal papataisi Stefanas me chon leimwan, nge üsap tongeni chechemeni ika üa papataisi eman me lükün.) * ¹⁷ Kraist esap akünöüei pwe üpwe papataisi aramas, nge a akünöüei pwe üpwe arongafeili ewe Pworausen Manau, nge sap lon kapasen tipachemen aramas, pwe än Kraist mäla won iräpenges esap lomotongau.

Kraist ewe manaman me tipachemen Kot

1.18-31

¹⁸ Pun ewe kapas usun än Kraist mäla won iräpenges och kapas mi umwes ngeni chokewe mi pöütmwälila, nge ngenikich mi küna manau och manamanen Kot. ¹⁹ Pun a mak lon ekewe Toropwe mi Pin, “Ngang üpwe atala tipachemen ekewe soutipachem

o awesi ekiekin ekewe souekiek.” * ²⁰ Iwe, ifa i ewe soutipachem? Ifa i ewe souekiek? Ifa i ewe mi silelap le anini lon kapasen ei fanüfan? Ifa usun, Kot esap pwärätä pwe tipachemen ei fanüfan mi chök umwes? *

²¹ Pun lon än Kot tipachem, a föri pwe aramas resap tongeni silei i ren püsin ar tipachem. Nge Kot a akota pwe epwe amanaua chokewe mi lükü ewe kapas aia afalafala, iei ewe kapas ekoch aramas ra aita ngeni pwe och kapasen umwes. ²² Ekewe chon Juta ra mochen küna asisil mi alletätä pwe ewe kapas a pop seni Kot, nge ekewe chon Krik ra kütta tipachem. ²³ Nge kich sia arongafeili ewe Kraist mi iräpenges, iei ewe kapas chon Juta ra chepetek ren, nge ekewe chon lükün Israel ra apasa pwe och kapas mi umwes. ²⁴ Nge ren chokewe Kot a köriir me lein chon Juta me chon lükün Israel, Kraist ewe manamanen Kot me ewe

* **1:12:** Föf 18.24 * **1:14:** Föf 18.8; 19.29; Rom 16.23 * **1:16:** 1.Kor 16.15 * **1:19:** Ais 29.14 * **1:20:** Hiop 12.17; Ais 19.12; 33.18; 44.25

tipachemen Kot. ²⁵ Pun inamwo ika aramas ra apasa pwe Kot a umwes, nge än Kot umwes a tipachem seni än aramas tipachem. Inamwo ika aramas ra apasa pwe Kot a apwangapwang, nge an apwangapwang a pöchökül seni än aramas pöchökül.

²⁶ Ämi pwii kana, oupwe chechemeni usun nonomumi me lom lupwen Kot a körikemi. Lon ekiëkin aramas sap chomong me leimi ra tipachem, sap chomong leimi a wor maner, sap chomong ra uputekia. ²⁷ Nge Kot a filätä ekewe mi umwes me ren fanüfan, pwe epwe asäwa ekewe chon tipachem. Kot a pwal filätä ekewe mi apwangapwang me ren fanüfan, pwe epwe asäwa ekewe chon pöchökül. ²⁸ A filätä ekewe mi uputekison me ren fanüfan, pwal ekewe mi küna koput me ekewe esap wor aüchear, pwe epwe awesi ekewe mi wor aüchear me ren fanüfan. ²⁹ Iei popun esap wor eman aramas epwe tongeni aingaing mwen mesen Kot. ³⁰ Nge Kot chök popun ämi nonom lon Kraist Jesus. Kot a föri pwe Kraist ach tipachem, ach pwüing, ach pin me ach ngas seni ach tipis. ³¹ Pun iei usun a mak lon ekewe Toropwe mi Pin, “Iö a mochen aingaing epwe aingaing won ach Samol.” ✧

2

Än Paulus afalafal usun Kraist mi iräpenges

2.1-5

¹ Iwe, ämi pwii kana, lupwen üa feila remi pwe üpwe afalafala ewe kapas mi let usun Kot a monomonola me lom, üsap aea kapas mi tekia ika kapasen tipachem. ² Pun lupwen üa nonom remi, üa filätä pwe üsap silei och pwe Jesus Kraist chök, nge enletin an we mäla won iräpenges. ³ Lupwen üa nonom remi, üa apwangapwang o chech fän watten ai niuokus. ✧ ⁴ Iwe, ai afalafal me ai asukul ngenikemi esap fis ren kapasen tipachemen aramas ra aea le elliapa aramas, nge a fis ren sokun afalafal mi alletätä manamanen Kot me Ngünün, ⁵ pwe ämi lükü esap longolong won tipachemen aramas, nge won manamanen Kot.

Än Kot tipachem

2.6-16

⁶ Nge sia aronga eu kapasen tipachem ngeni chokewe mi mirit lon ar souläng. Esap ewe sokun tipachem mi pop seni ei fanüfan ika seni ekewe chon nemenem lon ei fanüfan, ar nemenem epwe wesila. ⁷ Ewe tipachem sia arongafeili, iei än Kot we tipachem mi monomon, a monola seni aramas, nge Kot a fen amolätä me mwen än fanüfan esamwo wor, pwe sipwe küna ling ren. ⁸ Esap wor eman sounemenemen ei fanüfan a silei ei tipachem, pun ika repwe silei, resap iräpengesi ewe Samol mi ling. ⁹ Nge iei usun a mak lon ekewe Toropwe mi Pin,

“Met aramas resap mwo küna ika rongorong,

met aramas resap mwo ekiëki lon letiper pwe epwe fis,

iei ewe mettoch Kot a amolätä fän iten chokewe mi echeni.” ✧ ¹⁰ Nge Kot a pwäri ngenikich ei monomon ren Ngünün we. Pun Ngünün we a atittina mettoch meinisin, pwal mwo nge ekewe ekiëkin Kot mi alolol. ¹¹ Pun ren eman aramas püsin ngünün chök a silei usun an ekiëk. Ina chök usun Ngünün Kot a püsin silei usun ekiëkin Kot. ¹² Kich sisap angei ewe ngünün fanüfan, nge sia angei ewe Ngün

Kot a tinato, pwe sipwe silei meinisin mine Kot a fang ngenikich. ¹³Iei mine äm aisap afalafala ekewe kapas aitian aramas seni lon ar tipachem, nge aia afalafala ekewe kapas aitian ewe Ngünmifel lupwen aia awewei ekewe kapas mi let ngeni chokewe mi eäni Ngünmifel. ¹⁴Iö esap eäni Ngünmifel esap tongeni etiwa ekewe lifang mi feito seni ewe Ngünün Kot, pun epwe ekieki ngeniir pwe ekoch mettochun umwes. Esap tongeni wewetiir, pun aramas ra chök tongeni mefi aüchear ren ewe Ngünmifel. ¹⁵Nge iö a eäni Ngünmifel a tongeni weweti aüchear mettoch meinisin, nge esap wor eman a tongeni apwüngü püsin i. ¹⁶Pun iei usun met a mak lon ekewe Toropwe mi Pin,

“Iö a silei ekiekin ewe Samol?

Iö a tongeni öüröra?” Nge kich sia eäni ekiekin Kraist. ✧

3

Nöün Kot chon angang

3.1-23

¹Ämi pwii kana, üsap tongeni kapas ngenikemi usun ai üpwe kapas ngeni ekewe aramas mi eäni Ngünmifel. Nge üa kapas ngenikemi usun itä nge ämi soulängin fituk, usun semirit lon Kraist. ²Ngang üa aünükemi milik, nge üsap amongöü ngenikemi mongö mi pöchökül, pun ousap mwo tufich ngeni. Nge pwal iei ousap mwo tufich ngeni, ✧ ³pokiten oua chüen manaueni manauen soulängin fituk. Pun lupwen a wor lolowo me aninifengen lefilemi, ifa usun ei esap alletätä pwe ämi oua pop seni ei fanüfan? Ifa usun, ousap föri föförün chon ei fanüfan? ⁴Pun are eman leimi a üra, “Ngang nöün Paulus souläng,” pwal eman a apasa, “Ngang nöün Apolos souläng,” ifa usun, ousap föri föförün chon ei fanüfan? ✧ ⁵Iwe, iö Apolos? Pwal iö Paulus? Äm aia chök nöün Kot chon angang mi alisikemi pwe oupwe lükü Kraist. Eman me eman äm aia föri ewe angang ach Samol a awisa ngenikem. ⁶Ngang üa fotuki ekewe pwükil, Apolos a atütüür, nge Kot a amäriiretä. ✧ ⁷Iei mine ewe chon fotuki me ewe chon atütü esap wor aüchear, nge Kot echök ewe mi aüchea, pun a amärätä ekewe irä. ⁸Esap wor sokofesenin ewe chon fofot me ewe chon atütü, Kot epwe liwini ngeni eman me eman liwinin aükükün an angang a föri. ⁹Pun äm aia angangfengen lon ewe angang fän iten Kot, nge ämi än Kot tanipi.

Ämi pwal imwen Kot. ¹⁰Ren ewe ümömöch Kot a fang ngeniei, ngang üa föri ewe longolong usun eman mi silelap le aüetä imw, nge eman aramas a köütä won. Iwe, eman me eman epwe tümwünüöchü met epwe aüetä won. ¹¹Pun Kot a fen anomu Jesus Kraist pwe i chök ewe longolong, nge esap pwal wor eu longolong me lükün. ¹²Ekoch repwe aea kolt, silifer ika fau aüchea pisekin köütä won ewe longolong, nge pwal ekoch repwe aea mwüch, fetilipwas ika äsät. ¹³Iwe, aüchear än eman me eman angang epwe pwä me fatala lon ewe Ränin Kraist. Pun lon ena rän ekkei epwe afata angangen eman me eman. Ekkei epwe asosota än eman me eman angang, pwe epwe pwä aüchear. ¹⁴Are ewe ekkei esap kenala mine eman a aüetä won ewe longolong, ewe chon aüetä epwe angei liwinin.

¹⁵ Nge are än eman angang a karala, esap angei liwinin. Iwe, püsin i epwe küna manau usun chök nge itä a sü seni lon ewe ekkei.

¹⁶ Ifa usun, ousap silei pwe ämi än Kot imwenfel, nge Ngünün Kot a nom lomi. ✧ ¹⁷ Iei mine are eman a atai än Kot imwenfel, ätewe Kot epwe atai. Pun än Kot imwenfel a pin, iwe, ämi än Kot imwenfel.

¹⁸ Ousap püsin atupukemi. Are eman leimi a ekieki pwe a tipachem ren tipachemen ei fanüfan, i epwe wiliti eman aramas mi umwes fän iten an epwe wesewesen eman aramas mi tipachem. ¹⁹ Pun met ei fanüfan a ekieki pwe ina tipachem, a umwes me ren Kot. Iei usun a mak lon ekewe Toropwe mi Pin, “Kot a liapeni ekewe chon tipachem lon ar tipachemsolä.” ✧ ²⁰ A pwal mak lon ekoch Toropwe mi Pin, “Ewe Samol a silei pwe ekiekin ekewe chon tipachem a lomotongau.” ✧ ²¹ Iei mine esap wor eman epwe aingaing won met aramas ra föri. Pun mettoch meinisin ra nom fän nemeniemi: ²² Paulus, Apolos me Petrus, ei fanüfan, manau me mäla, ikenai me ewe fansoun mürin, ekei mettoch meinisin ämi, ²³ iwe, ämi nöün Kraist, nge Kraist nöün Kot.

4

Nöün Kraist soukünö

4.1-21

¹ Iwe, ämi oupwe ekieki ngenikem pwe äm nöün Kraist chon angang, wisem pwe aipwe tümwünü än Kot we monomon mi let. ² Eu chök mettoch epwe fokun aüchea ren eman chon angang, pwe epwe allükülük ngeni an samol. ³ Üsap fokun ekieki ika üpwe küna kapwüng me remi, ika me ren eu mwichen aramas ir soukapwüng. Üsap pwal mwo nge püsin apwüngüei. ⁴ Letipei a limöch, nge ei esap alletätä pwe esap wor ai tipis. Ach Samol chök i ewe epwe apwüngüei. ⁵ Iei mine ousap apwüngü eman me mwen an epwe war ewe fansoun mi fich. Ewe amüchülan kapwüng epwe witiwit tori ach Samol epwe war. I epwe asarama mine a monomonola lon rochopwak o pwärawu mine a monomon lon ekiekin aramas. Mürin aramas meinisin repwe angei me ren Kot iteüöchür lon met a fich ngeni eman me eman.

⁶ Ämi pwii kana, ekei mettoch meinisin üa kapas usun iei, üa eänikem me Apolos kapasen awewe, pwe oupwe tongeni kaiö me rem met wewen ekei kapas, “Oupwe chök apwönüetä mine a mak.” Esap wor eman epwe ingeiti eman are oputa eman. ⁷ Pun iö a seikuketä pwe kopwe lap seni ekewe ekoch? Ifa usun, Kot esap fang ngonuk mettoch meinisin mine ka eäni? Pwota ka aingaing won met mi wor reöm usun itä nge esap minen lifang?

⁸ Ifa usun, a fen wor remi mettoch meinisin oua osupwang ren? Ou a fen pisekisekila? Ifa usun, oua sounemenem, nge äm aisap etikemi? Üa fokun äneän pwe amwo oupwe nemenem, pwe äm aipwe etikemi le nemenem. ⁹ Pun üa ekieki pwe Kot a aleniakem äm soukünö, pwe aipwe nom fälalalapen aramas meinisin, pwe aia wewe ngeni aramas a fen kapwüngüla pwe repwe ninnila me mwen mesen aramas, pwe aipwe och minen atakirikir me ren ekewe chon läng meinisin me chon fanüfan meinisin. ¹⁰ Äm chon umwes fänäsengesin Kraist, nge ämi chon tipachem lon Kraist! Äm chon apwangapwang, nge ämi chon pöchökül. Äm chon

küna turunufas, nge ämi chon iteüöch. ¹¹ Tori ei fansoun äm aia echik me kaka, aia üföüf üf mi kamwakam, ra wichikem, aia süsüfeil ngeni leni me leni. ¹² Aia angang weires ren püsin pöüm. Lupwen ra ottekikem, aia afeiochüür, lupwen ra ariaföüükem, aia engila ngeniir. ✱ ¹³ Lupwen ra aitengauakem, aia pölüeniir lon kapas pwetete. Aia wewe ngeni mettoch lon lenien koturula, aia wewe ngeni limengauen ei fanüfan tori ikenai.

¹⁴ Üa makei ekei kapas ngenikemi, sap pokiten üa mochen asäwakemi, nge fän iten ai mochen öüröürakemi usun püsin nei mi achengicheng. ¹⁵ Pun inamwo ika a wor engol ngeröü nöümi souemwen lon manauen ämi souläng, nge oua chök semeni eman. Pun lon Kraist Jesus üa wiliti eman sememi ren ai afalafala ewe Pworausen Manau ngenikemi. ¹⁶ Iei mine üa tüngormau ngenikemi pwe oupwe apirüei. ✱ ¹⁷ Iei popun üa tinala remi Timoty, i nei we mi achengicheng o allükülük lon ach Samol. I epwe achema ngenikemi usun ei manau mi fö üa manaueni lon Kraist Jesus usun üa afalafala lon ekewe mwichefel ekis meinisin.

¹⁸ Ekoch me leimi oua lamalamtekia, pun oua ekieki pwe üsap feito pwe üpwe churikemi. ¹⁹ Nge are epwe fen letipen Kot, ngang üpwe müttir feila remi. Mürin üpwe püsin küna ewe tufich ekei aramas mi lamalamtekia ra eäni, nge sap chök lon met ra apasa. ²⁰ Pun Mwün Kot esap pwä lon kapas chök, nge lon manaman. ²¹ Met ämi oua mochen? Oua mochen ai üpwe feila remi fän efoch wok, ika üpwe feila remi fän tong me lukpwetete?

5

Föför mi fokun ngau lon mwichefel

5.1-13

¹ Iwe, aramas ra apworausaua pwe mi wor föförün lisowu lefilemi, eu sokun föför mi fokun ngau, pwe esap mwo nge fis ren ekewe chon lükün lamalam. Eman a asile ngeniei, pwe mi wor eman mwän a kon ren pwülüen saman. ✱ ² Iwe, epwe ifa usun ämi oupwe tongeni lamalamtekia? Nge pwüngün pwe oupwe fokun letipeta, oupwe pwal atowu seni lefilemi ätewe mi föri ei sokun föför. ³ Inamwo ika ngang üsap nom remi ren inisi, nge üa nom remi lon ngüni. Üa fen apwüngala liwinin tipis inisi ätewe mi föri ei sokun föför mi fokun ngau usun itä nge üa nom remi. ⁴ Lupwen oua mwichfengen fän iten ach Samol Jesus, ngang üa nom remi lon ngüni. Ren manamanen ach Samol Jesus mi nom remi, ⁵ oupwe esechala ätei ngeni Satan pwe inisin epwe mäfeiangau, nge ngünün epwe küna manau lon ewe Ränin ach Samol.

⁶ Esap öch ngenikemi pwe oupwe lamalamtekia. Ousap silei pwe ekis chök iis a apwola unusen eu pilawa? ✱ ⁷ Oupwe atowu ewe issin lom, a aliosunätä tipis, pwe oupwe wesewesen limöch. Mürin oupwe wewe ngeni pilawa mi fö a öüwöü, esap wor iis lon. Ngang üa silei pwe ina usumi. Pun Kraist ach we Lamem Pasofer a fen ninnila. ✱ ⁸ Iei mine ousipwe föri ewe mongön Pasofer, sap ren ewe pilawa mi wor ewe issin lom lon, a aliosunätä tipis me föföringau, nge ren ewe pilawa esap wor iis lon, a aliosunätä limöch me let. ✱

⁹ Lon ewe toropwe üa fen makkei ngenikemi, üa ürenikemi pwe ousap chiechi ngeni ekewe aramas mi föri sokun föför mi fokun ngau. ¹⁰ Nge

✱ **4:12:** Föf 18.3 ✱ **4:16:** 1.Kor 11.1; Filip 3.17 ✱ **5:1:** Tut 22.30 ✱ **5:6:** Kal 5.9 ✱ **5:7:** Eks 12.5 ✱ **5:8:** Eks 13.7; Tut 16.3

esap iei wewen ai kapas, pwe ousap chufengen me ekewe chon lükün mi föri sokun föför mi fokun ngau, ika chon tipemong, ika chon solä, ika chon angang ngeni anümwäl, pun are epwe iei usun, oupwe fokun towu seni ei fanüfan. ¹¹ Iwe, iei wewen ai kei kapas, pwe ousap chiechi ngeni eman aramas mi püsin aita ngeni pwe i eman souläng, nge fen i eman mi föri sokun föför mi fokun ngau, ika eman chon tipemong, ika eman chon angang ngeni anümwäl, ika eman chon aitengaua aramas, ika eman chon ünüpuch, ika eman chon solä. Ousap mwo nge mongöfengen me ena sokun aramas.

¹² Esap wor ai pwüing pwe üpwe apwüingü chokewe mi nom lükün mwichefel. Ifa usun, esap wisemi pwe oupwe apwüingü chokewe mi nom lon mwichefel? ¹³ Kot epwe apwüingü chokewe mi nonom lükün. Pun iei usun a mak lon ekewe Toropwe mi Pin, “Oupwe atowu ewe aramas mi föföringau seni lon ämi we mwich.” ✧

6

Usun än souläng kapwüingfengen lefler

6.1-11

¹ Are eman leimi a wor an fitikoko ngeni eman chiechian souläng, pwota a tongeni uwala ren soukapwüing resap souläng, nge esap uwala ren ekewe chon pin? ² Ousap silei pwe ekewe chon pin repwe apwüingü fanüfan? Nge are oupwe apwüingü fanüfan, ifa usun ousap tufich ngeni ämi oupwe apwüingü ekewe mettoch mi kisikis? ³ Ousap silei pwe kich sipwe apwüingü ekewe chon läng? Iwe, sipwe fokun apwüingü ekewe mettochun lon ei manau. ⁴ Are ekei sokun osukosuk a fis, pwota oupwe uweerela ren ekewe aramas esap wor wiser lon mwichefel? ⁵ Asäwemi! Ifa usun, esap wor eman mi tipachem me leimi epwe tongeni apwüingü fitikokon lefilen souläng? ⁶ Nge eman souläng a uwala lon kapwüing an fitikoko ngeni pwal eman chiechian souläng, pwe eman soukapwüing esap souläng epwe apwüingü.

⁷ Ämi uwala lon kapwüing fitikokon lefilemi a pwärätä pwe oua kuf lon ämi souläng. Ifa usun, esap fen öch än eman epwe föri mine a mwäl ngenikemi? Esap fen öch än eman epwe soläni pisekimi? ⁸ Nge fen püsin ämi oua föri mine a mwäl o soläni pisekin eman, ei mwo nge oua fen föri ngeni chiechiemi souläng. ⁹ Enlet, oua silei pwe ekewe chon föföringau resap mwüni Mwün Kot. Ousap püsin atupukemi! Chon föri föförün lisowu, ika chon angang ngeni anümwäl, ika chon lisowu ngeni mi pwüpwülü, ika chon amömö inisir, ika chon lisowufengen lefilen mwän me mwän ika fefin me fefin, ¹⁰ ika chon solä, ika chon tipemong, ika chon ünüpuch, ika chon aitengaua aramas, ika chon achomau resap mwüni mwün Kot. ¹¹ Iwe, ekoch me leimi ra föri ekei sokun föför me lom. Nge oua fen küna limöch seni ämi tipis, oua küna pin, oua küna pwüing fän iten ach Samol Jesus Kraist, pwal ren ewe Ngünün ach Kot.

Oupwe alingala Kot ren inisimi

6.12-20

¹² Ekoch repwe apasa, “A mwümwütä ngeniei ai üpwe föri mettoch meinisin.” Ewer, nge esap mettoch meinisin ra mürina ngonuk. Üa tongeni apasa, pwe a mwümwütä ngeniei ai üpwe föri mettoch meinisin, nge üsap mwütätä pwe och mettoch epwe nemeniei. ✧ ¹³ Ekoch repwe

apasa, “Mongö a wor fänäsengesin lukach, nge lukach a wor fänäsengesin mongö.” Ewer, nge lon eu rän Kot epwe atala ir me ruu. Sisap aea inisich fänäsengesin föförün lisowu mi ngau, nge sipwe aea fänäsengesin ach angang ngeni ach Samol, iwe, ach Samol epwe tümwünü inisich. ¹⁴Ren än Kot manaman a amanauasefäli ach Samol seni mäla, epwe pwal amanauasefälikich.

¹⁵Ousap silei pwe inisimi eu kinikinin ewe inisin Kraist? Ifa usun, üpwe angei eu kinikinin inisin Kraist o föri pwe epwe eu kinikinin inisin eman fin lisowu? Apwi, esap fokun ina! ¹⁶Ousap silei pwe eman mwän mi chufengen me eman fin lisowu a iniseu ren? Pun iei usun a mak lon ekewe Toropwe mi Pin, “Ekewe ruoman repwe wiliti eu chök inis.” ✧ ¹⁷Nge iö a chufengen me ach Samol a eufengen me i lon ngün. ¹⁸Ousap fokun föri sokun föförün lisowu! Ekewe sokun tipis meinsin eman aramas a föri esap küü inisin, nge are eman aramas a föri föförün lisowu a tipis ngeni püsin inisin. ¹⁹Ousap silei pwe inisimi eu imwenfelin Ngünmifel a nom lomi, ewe Ngün Kot a ngenikemi? Ousap püsin nemenikemi, pwe ämi nöün Kot, ²⁰i a mönikemi ren eu liwin, iei mine oupwe alinga Kot ren inisimi.

7

Usun pwüngün än souläng pwüpwülü

7.1-16

¹Iwe, iei üpwe pworaus usun ekewe mettoch oua makketo rei: A mürina ngeni eman mwän an esap pwüpwülü. ²Nge pokiten a wattela föförün lisowu, eman mwän epwe wor püsin pwülüan, pwal eman fefin epwe wor püsin pwülüan. ³Eman mwän epwe föri wisan ngeni pwülüan, pwal eman fefin epwe föri wisan ngeni pwülüan. Eman me eman leir epwe föri pwüngün lefilan ngeni pwülüan. ⁴Pun eman fefin esap wor an nemenem won püsin inisin, pwe pwülüan a nemeni. Pwal ina chök usun, eman mwän esap wor an nemenem won püsin inisin, pwe pwülüan a nemeni. ⁵Ämi mi pwüpwülü ousap amwöchü inisimi seni pwülüemi are ousap akomwen tipeeufengen won pwe oupwe föri lon eu fansoun, pwe epwe wor fansoun ämi iotek. Mürin oupwe pwal konsefälfengen, pwe Satan esap sotunikemi pokiten ousap tongeni püsin nemeni inisimi.

⁶Ekei kapas üa ürenikemi esap eu allük, pun mi fen mwütätä ngenikemi. ⁷Üa wesewesen mochen pwe ämi meinsin oupwe wewe ngeniei. Nge eman me eman a wor en me lifangan me ren Kot, eman a angei och sokun lifang, nge pwal eman och sokun lifang.

⁸Iwe, üa ürenikemi, ämi chokewe esap wor pwülüemi, pwal ämi mi mä pwülüemi, pwe epwe mürina ngenikemi ämi ousap pwüpwülü usun pwal ngang. ⁹Nge are ousap tongeni nemeni mochenin fitukemi, oupwe pwüpwülü. Pun a mürina ämi oupwe pwüpwülü lap seni ämi oupwe nom lon pwichikaren ämi mochenia.

¹⁰Ngeni ämi kewe mi pwüpwülü a wor eu allük, sap ai, nge än ach Samol: Eman fefin esap mwü seni pwülüan, ¹¹nge are epwe mwü seni, epwe chök nonom lon an lipich, ika epwe chäsefäl ngeni pwülüan. Iwe, eman mwän esap fokun mwü seni pwülüan.

¹²Ngeni pwal ekewe ekoch ngang üa üreniir, nge sap ach Samol: Are eman mwän mi souläng a pwüpwülü ngeni eman fefin esap souläng, nge

neminewe a tipeeu ngeni an epwe nonom ren, ätewe esap fokun mwü seni. ¹³ Iwe, are eman fefin mi souläng a pwüpwülü ngeni eman mwän esap souläng, nge ätewe a tipeeu ngeni an epwe nonom ren, neminewe esap fokun mwü seni. ¹⁴ Pun ewe mwän esap souläng a küna pin ren pwülüan we mi souläng, nge ewe fefin esap souläng a küna pin ren pwülüan we mi souläng. Pun are esap iei usun, nöür kewe repwe usun nöün chon lükün, nge iei ra pin. ¹⁵ Nge are eman esap souläng a mochen mwü seni pwülüan mi souläng, epwe mwüla. Lon ei sokun lapalap ewe mwän mi souläng ika ewe fefin mi souläng a ngasala. Pun Kot a körikemi ämi oupwe nonom lon kinamwe. ¹⁶ En fefin mi souläng, ifa usun om kopwe silei pwe kopwe tongeni amanaua pwülüom we? Ika en mwän mi souläng, ifa usun om kopwe silei pwe kopwe tongeni amanaua pwülüom we?

Oupwe nonom lon nonomumi oua nonom lon lupwen Kot a körikemi
7.17-24

¹⁷ Iwe, eman me eman epwe chök nonom lon nonomun lon manauan usun ach Samol a akota ngeni lupwen Kot a köri. Iei ewe allük üa afalafala lon ekewe mwichefel meinisin. ¹⁸ Are eman mwän a fen sirkomsais lupwen Kot a köri, esap fokun sotuni an epwe amola asisilen an sirkomsais. Nge are eman mwän esap sirkomsais lupwen Kot a köri, esap kütta an epwe sirkomsais. ¹⁹ Pun esap wor lomoten än eman mwän sirkomsais ika esap sirkomsais, pwe a chök wor aüchean än eman epwe aleasochisi än Kot allük. ²⁰ Eman me eman aramas epwe chök nonom lon nonomun a nom lon lupwen Kot a köri. ²¹ Ifa usun, en eman amanau lupwen Kot a köruk? Kosap lolilen usun. Nge are kopwe tufichin ngasala, kopwe achocho le alomota ewe tufich. ²² Pun eman amanau mi kö me ren ach Samol, i eman nöün ach Samol mi ngas. Ina chök usun ätewe mi ngas lupwen a kö me ren Kraist, i eman nöün Kraist amanau. ²³ Kot a mönikemi ren eu liwin, iei mine ousap wiliti nöün aramas amanau. ²⁴ Ämi pwii kana, eman me eman leimi epwe chök chiechi ngeni Kot o nonom lon nonomun lon manauan lupwen Kot a köri.

Usun pwüngün än ekewe souläng esap wor pwülüer me ekewe mi mä pwülüer
7.25-40

²⁵ Iwe, usun ekewe föpwül esap wor pwülüer üa fen mak ngenikemi: Esap wor eu allük seni ach Samol, nge üa atowu mefie i usun eman mi allükülük pokiten tongen ach Samol.

²⁶ Pokiten ekei riaföü mi fis lon ei fansoun, üa ekieki pwe a öch än eman aramas epwe chök nonom lon mine nonomun. ²⁷ Ifa usun, a wor pwülüom? Iwe, kosap mwü seni. Ifa usun, esap wor pwülüom? Iwe, kosap kütta eman pwülüom. ²⁸ Nge are kopwe pwüpwülü, kosap tipis ren. Are eman föpwül epwe pwüpwülü, esap tipis ren. Nge chokewe mi pwüpwülü a wor chomong ar osukosuk lon manauer, iwe, üa mochen pwe ousap tolong lon ekei sokun osukosuk.

²⁹ Ämi pwii kana, iei wewen mine üa apasa: Esap chüen langatam ach fansoun. Seni ikenai, ekewe mwän mi pwüpwülü repwe nonom usun itä nge resap pwüpwülü, ³⁰ chokewe mi kechü repwe usun itä nge resap kechü, chokewe mi pwapwa repwe usun itä nge resap pwapwa, chokewe mi kamö och repwe usun itä nge resap eäni och, ³¹ nge chokewe

mi aea mettochun fanüfan repwe usun itä nge resap aea. Pun lapalapen ei fanüfanen ikenai epwe morola.

³² Iwe, üa mochen pwe ousap öürek. Eman mwän esap pwüpwülü a chök ekieki usun än ach Samol angang, pun a chök mochen apwapwai ach Samol. ³³ Nge eman mwän mi pwüpwülü a ekieki usun mettochun fanüfan, pun a mochen apwapwai pwülüan, ³⁴ iei mine a kinikinfe-sen letipan. Eman fefin esap pwüpwülü, ika eman föpwül esap mwo pwüpwülü a chök ekieki usun än ach Samol angang, pun a mochen pwe inisin me ngünün repwe pin fän iten ach Samol. Nge eman fefin mi pwüpwülü a ekieki mettochun ei fanüfan, pun a mochen apwapwai pwülüan. ³⁵ Iwe, üa apasa ekei kapas, pun üa mochen alisikemi. Üsap mochen allük ngenikemi och, nge üa fen mochen pwe oupwe föri mine a pwüng o mürina, pwe oupwe fangala unusen manauemi ngeni än ach Samol angang, nge ousap rik seni.

³⁶ Are eman mwän a kofot ngeni eman föpwül o a ekieki pwe esap pwülüeni, mürin a mefi pwe a föri och mine a mwäl ngeni ewe föpwül, are mochenin letipan a fokun pwichikar ngeni pwe a mefi pwe epwe pwüpwülü ngeni, ätewe epwe pwülüeni neminewe usun an mochen, nge esap tipis ren. ³⁷ Are eman mwän a fokun ekiekietä lon letipan pwe esap pwüpwülü, nge esap wor eman a echimwa ngeni, are i a wesewesen nemeni mochenin letipan o a fen filätä lon püsin letipan mine epwe föri, ätei a föri mine a mürina are esap pwülüeni ewe föpwül. ³⁸ Iei usun eman mwän mi pwüpwülü a föri mine a mürina, nge eman mwän esap pwüpwülü a föri mine a mürina seni.

³⁹ Eman fefin mi pwüpwülü a riri ngeni pwülüan lon ükükün fansoun pwülüan we a manau. Nge lupwen pwülüan we a mäla, neminewe a tongeni pwülüeni iö a mochen, nge a chök tongeni pwülüeni eman mi souläng. ⁴⁰ Nge neminewe epwe fokun pwapwa are epwe nonom lon an lipich. Iei mefiei o üa ekieki pwe pwal ngang üa eäni ewe Ngünün Kot.

8

Usun pwüngün ewe mongö ra eäni asor ngeni uluulun anümwäl

8.1-13

¹ Iwe, iei usun pwüngün met oua makketo rei fän iten ekewe mongö aramas ra asor ngeni ekewe uluulun anümwäl. Ewer, a fokun let pwe “oukich meinsin a wor ach silelap”, usun ra apasa. Nge ei sokun silelap a afisätä lamalamtekia, nge chen a afisätä fisiöchün ach souläng. ² Iö aramas a ekieki pwe a wor an silei lon ekoch mettoch, ätei esap mwo wor wesewesen ürürün met epwe silei. ³ Nge ewe aramas mi echeni Kot a sil me ren Kot.

⁴ Iwe, usun ach mongö ekewe mongö ra asor ngeni ekewe uluulun anümwäl: Kich sia silei pwe eu uluulun anümwäl a aliosunätä och mettoch esap fokun wor. Kich sia silei pwe mi wor eman chök Kot. ⁵ Pun inamwo ika ekoch ra apasa pwe mi wor “kot” lon läng ika won fanüfan, pwal inamwo ika a wor chomong ekei sokun “kot” me “samol”, ⁶ nge fän itach mi wor eman chök Kot, i ewe Sam mi föri mettoch meinsin, nge kich sia manau fänäsengesin. Sia pwal eäni eman chök Samol, Jesus Kraist, mettoch meinsin ra för ren o kich sia manau ren.

⁷ Nge sap aramas meinsin ra silei ei let. Ekoch aramas ra chüen örüni angang ngeni anümwäl tori ikenai, pwe lupwen ar mongö ewe mongö ra

chüen ekieki, pwe ewe mongö aramas ra wesewesen asomä ngeni ekewe uluulun anümwäl. Mwelien letiper a apwangapwang, iei mine ra mefi pwe ra limengau ren ewe mongö. ⁸ Iwe, mongö esap alisikich lon ach chiechi ngeni Kot. Sisap lus och are sisap mongö och, sisap pwal feiöch ren are sia mongö och.

⁹ Nge oupwe chök föröchü, pwe mine oua föri lon ämi ngasala esap wiliti eu lenien chepetek ngeni ekewe mi apwangapwang lon ar lükü. ¹⁰ Pun are eman aramas mi apwangapwang mwelien letipan epwe künok, en mi silelap, pwe ka mongö lon imwenfelin eman uluulun anümwäl, ifa usun, ei esap apöchöküla letipan an epwe pwal mongö ekewe mongö ra asor ngeni ekewe uluulun anümwäl? ¹¹ Iei usun pwiüm mi apwangapwang, ätewe Kraist a mäla fän itan, epwe pöütmwälila pokiten om silelap. ¹² Lupwen ka tipis ngeni pwiüm lon ei sokun lapalap o afeiengaua mwelien letipan mi apwangapwang, ka tipis ngeni Kraist. ¹³ Iei mine are pwii a tolong lon tipis pokiten mine üa mongö, üsap fokun chüen ochochsefäl fituk, pun üsap mochen pwe pwii we epwe tolong lon tipis.

9

Än eman soukünö pwüüng me wisan

9.1-27

¹ Ifa usun, sap ngang eman aramas mi ngas? Ifa usun, sap ngang eman soukünö? Üsap fen künä ren mesei ach Samol Jesus? Ifa usun, sap ämi uän ai angang fän iten ach Samol? ² Inamwo ika ekoch aramas resap etiwaei usun eman soukünö, nge fen iei mine oua föri! Pokiten ämi oua souläng, iei met a alletätä pwe ngang eman soukünö.

³ Lupwen aramas ra esitaei, iei met üa püsin peniei won: ⁴ Ifa usun, esap wor ai pwüüng ai üpwe angei anei me ünümei fän iten ai angang? ⁵ Ifa usun, esap wor ai pwüüng ai üpwe uwei eman pwülüei souläng lon ai sai, usun chök ekewe ekoch soukünö me ekewe pwiin ach Samol pwal Petrus ra föri? ⁶ Ika äm chök me Parnapas aipwe wisen angang fän iten met aipwe manau ren? ⁷ Iö sounfiu a püsin mönätü liwinin mettochun lupwen a nom lon an mwichen sounfiu? Ifa usun, eman chon tanipi esap ochoch uän fotan wain seni lon an tanipi? Ifa usun, eman chon masen sip esap ünümi milik seni püsin nöün sip?

⁸ Ifa usun, üa chök kapas usun pwüngün lefilen aramas? Ifa usun, ekewe Allük resap wewefengen le kapas usun ei mettoch? ⁹ Pun a mak lon än Moses kewe Allük, “Kosap föti awen eman ätemwänin kow lupwen a puri ekewe umwun wiich, pwe föün repwe towu seni pöör.” Ifa usun, Kot a chök ekieki ekewe ätemwänin kow? ✧ ¹⁰ Ifa usun, esap fokun ekieki kich lupwen a apasa ekei kapas? Ewer, ekei kapas ra mak fän itach. Ewe mwän mi tuw pwül, pwal ätewe mi kini ekewe föün irä lon fansoun räs repwe föri ar angang fän apilükülük, pwe repwe angei wiser seni ewe räs. ¹¹ Äm aia amworafeili ewe sokun pwükil lefilemi mi afisätä ämi feiöch lon pekin ngün, ifa usun, epwe ngau are aipwe angei senikemi ekewe feiöchün fanüfan? ✧ ¹² Are ekewe ekoch a wor ar pwüüng pwe repwe angei alilisiir senikemi, ifa usun, esap fen wor watten äm pwüüng won met aipwe angei senikemi?

Nge äm aisap aea ei sokun pwüüng, pwe aia fen tupwöl fän sokopaten osukosuk, pwe aisap epeti ewe Pworausen Manau usun Kraist pwe epwe rongofeil. ¹³ Ämi oua fokun silei, pwe ekewe mwän mi angang lon ewe imwenfel ra angei aner mongö seni ewe imwenfel, nge chokewe mi föri ewe angangen asor won ewe rongen asor ra angei wiser seni ewe asor. ✧ ¹⁴ Iei usun ach Samol a allük, pwe chokewe mi arongafeili ewe Pworausen Manau repwe manau seni ewe angang ra föri. ✧

¹⁵ Nge üsap aea och me lein ekei pwüüng. Üsap pwal makkei ekei kapas, pun üa apilükülükü pwe oupwe föri ekei mettoch fän itei. Epwe fen öch ai üpwe mäla akom, pwe esap wor eman epwe akasiwili ai aingaing mi pwüüng ngeni kapas mi pön. ¹⁶ Nge esap wor ai pwüüng pwe üpwe aingaing pokiten üa afalafala ewe Pworausen Manau, pun iei wesewesen wisei Kraist a allük ngeniei pwe üpwe föri. Feiengaei are üsap afalafala ewe Pworausen Manau! ¹⁷ Pun are üa föri ai angang seni püsin mochenin letipei, epwe wor liwinin ai angang. Nge üa föri ei angang fän asopwisek, pun Kot a awisa ngeniei pwe üpwe föri. ¹⁸ Iwe, met sokun liwin üpwe angei? Iei chök liwini, pwe üpwe afalafala ewe Pworausen Manau nge üsap angei och liwin seni, üsap aea ai pwüüng lon ai angang fän iten ewe Pworausen Manau.

¹⁹ Ngang eman aramas mi ngas, esap wor eman a nöüniei amanau, nge püsin ngang üa atolongaie ai üpwe eman amanau fän iten aramas meinisin, pwe üpwe asoulängala chomong me leir. ²⁰ Lupwen üa afalafala ewe Pworausen Manau ngeni ekewe chon Juta, üa manau usun chök eman chon Juta, pwe üpwe asoulängirela. Lupwen üa afalafala ewe Pworausen Manau ngeni ekewe mi nom fän än Moses kewe Allük, üa manau usun chök eman mi nom fän ekewe Allük, inamwo ika üsap nom fän ekewe Allük. Nge üa föri ei, pwe üpwe asoulängirela. ²¹ Pwal ina chök usun, lupwen üa afalafala ewe Pworausen Manau ngeni ekewe chon lükün Israel, üa manau usun chök eman chon lükün Israel esap nom fän än ekewe chon Juta Allük, pwe üpwe asoulängirela. Ei esap wewen pwe üsap aleasochisi än Kot kewe allük, pun üa fokun nom fän än Kraist allük. ²² Lupwen üa nom lein ekewe mi apwangapwang lon ar lükülük, üa usun chök eman mi apwangapwang me leir, pwe üpwe asoulängirela. Iei usun üa manaueni sokun manau meinisin lein sokun aramas ese liflifil, pwe üpwe tongeni amanaua ekoch me leir ren met epwe tufich ngeniei.

²³ Ekei mettoch meinisin üa föri fänäsengesin ewe Pworausen Manau, pwe üpwe angei wisei lon ekewe feiöch. ²⁴ Ousap silei pwe ekewe chon kitir meinisin ra sä lon lenien kitir, nge eman chök leir a angei winnan? Iei mine oupwe kitir, pwe oupwe angei winnemi. ²⁵ Iteiten sensü meinisin ra achocho ngeni ar repwe fiti pwüüngün allükün ar rensü, pwe repwe angei epa mwärämwär mi morokai. Nge kich sipwe achocho ngeni manauen ach souläng, pwe sipwe angei epa mwärämwär epwe nonom tori feilfeilachök. ²⁶ Iei popun üa sä wenechar ngeni ewe tepkiri, pwal iei popun üa wewe ngeni eman chon köfön esap chök köfön chöü. ²⁷ Üa fokun pöchökül ngeni inisi o anomu fän nemeniei, pwe üsap afalafala ekoch, nge püsin ngang üa lipwäkingau.

10

*Kapasen fön usun ach sipwe ü ngeni angangen anümwäl**10.1–11.1*

¹ Ämi pwii kana, üa mochen ämi oupwe chechemeni mine a fis ngeni ach kewe lewo lupwen Moses a emweniir. Ir meinisin ra nom fän tümwünün ewe kuchu o pwerela pekilan ewe Setipar. ² Ir meinisin ra papatais ngeni Moses lon ewe kuchu pwal lon ewe Setipar. ³ Ir meinisin ra mongö eu chök mongön ngün ⁴ o ünümi eu chök kolukun ngün. Ra ün seni ewe achauen ngün mi etiir, nge ei achau iei i Kraist. ⁵ Nge iei mwo nge Kot esap pwapwa ren chomong me leir, iei mine somäär a toropasfel lon ewe fanüapö. ^{*}

⁶ Iwe, ekei mettoch mi fis eu lenien awewe fän itach an epwe fönöökich, pwe sisap mochenia ngeni mettoch mi ngau usun ir ra föri, ⁷ sisap pwal fel ngeni uluulun anümwäl usun ekoch me leir ra föri. Pun iei usun a mak lon ekewe Toropwe mi Pin, “Ekewe aramas ra mottiu pwe repwe momongö o ükün, mürin ra ütä o urumwotongau.” ⁸ Sisap fokun föri föförün lisowu mi fokun ngau usun ekoch me leir ra föri, iwe, lon eu chök rän rüe me ülungatngeröü ra mäla. ⁹ Sisap fokun sotuni Kraist usun ekoch me leir ra föri, iwe, ra feiengau o mäla ren ekewe serepenit. ^{*} ¹⁰ Sisap pwal lalangau usun ekoch me leir ra föri, iei mine ra ninnila o rosola ren ewe Chon Läng. ^{*}

¹¹ Ekei mettoch meinisin ra fis ngeniir pwe eu lenien awewe fän iten ekewe pwal ekoch, eman a makkeretiu pwe repwe eu kapasen fön fän itach. Pun sia manau lon eu fansoun a arapoto fansoun sopolan.

¹² Iei mine iö a ekieki pwe a nüküchar, epwe fokun tümwünüfichi pwe esap turula. ¹³ Ekewe sosot ra torikemi sosotun aramas chök. Nge Kot a apwönüetä an pwon o esap mwütätä ngenikemi pwe oupwe tolong lon sokun sosot mi lap seni ämi tufich. Nge lupwen oupwe tolong lon sosot, i epwe föri efoch alen towu, pwe oupwe tongeni pwora ngeni.

¹⁴ Iei mine ämi chiechiei mi achengicheng, oupwe ükütiu seni ämi angang ngeni uluulun anümwäl. ¹⁵ Üa kapas ngenikemi usun ai kapas ngeni aramas mi mirit. Oupwe püsin apwüngü mine üa apasa. ¹⁶ Lupwen sia ün seni ewe kap sia aea lupwen ach eäni ewe mongö än ach Samol o sia kilisowu ngeni Kot ren, sia chiechifengen lon ewe chaan Kraist. Nge ren ach utu ewe pilawa lupwen sia mongö seni, sia chiechifengen lon ewe inisin Kraist. ¹⁷ Pokiten mi wor efoch chök pilawa, kich mi chomong, sia eu chök inis, pun kich meinisin sia mongö seni ewe chök efoch pilawa.

¹⁸ Oupwe ekieki usun ekewe aramasen Israel. Chokewe mi mongö seni ewe asor ra chiechifengen me Kot, i ewe, ekewe aramas ra uwala ar asor ngeni won ewe rongen asor. ¹⁹ Met wewen ai kei kapas? Wewen pwe eu uluulun anümwäl ika ewe mongö aramas ra asor ngeni a wor lomotan? ²⁰ Apwi! Wewen ai kei kapas, pwe mine chon lükün ra eäni asor won ekewe rongen asor ra asor ngeni ekewe anün rochopwak, nge sap ngeni Kot. Iwe, ngang üsap mochen ämi oupwe chiechi ngeni ekewe anün rochopwak. ²¹ Ousap tongeni ün seni än ach Samol kap pwal ün seni än ekewe anün rochopwak kap. Ousap pwal tongeni mongö seni än ach Samol chepel, nge pwal mongö seni än ekewe anün rochopwak

^{*} **10:1:** Eks 13.21-22; 14.22-29 ^{*} **10:3:** Eks 16.35 ^{*} **10:4:** Eks 17.6; Num 20.11 ^{*} **10:5:** Num 14.29-30 ^{*} **10:6:** Num 11.14 ^{*} **10:7:** Eks 32.6 ^{*} **10:8:** Num 25.1-18 ^{*} **10:9:** Num 21.5-6 ^{*} **10:10:** Num 16.41-49 ^{*} **10:16:** Mat 26.26-28; Mark 14.22-24; Luk 22.19-20 ^{*} **10:18:** Lif 7.6 ^{*} **10:20:** Tut 32.17

chepel. ²² Ika sia mochen asonga ach Samol? Ifa usun, sia pöchökül seni i? *

²³ Iwe, ra apasa, “A mwümwütä ngenikich pwe sipwe föri mettoch meinisin.” Ewer, mi pwüing, nge sap mettoch meinisin ra lomot ngenikich. “A mwümwü ngenikich ach sipwe föri mettoch meinisin,” nge sap mettoch meinisin ra alisikich. * ²⁴ Esap wor eman leimi epwe chök kütta püsin an feiöch, nge epwe pwal kütta feiöchün chiechian souläng. ²⁵ A mwümwü ngenikemi ämi oupwe ochoch ewe fituk oua möni me lon ewe lenien amömö, nge ousap ais och kapas ais, pun ete fis mengiringirin lelukemi. ²⁶ Pun iei usun a mak lon ekewe Toropwe mi Pin, “Fanüfan me masouan meinisin än ewe Samol.” *

²⁷ Are eman esap souläng a körikemi pwe oupwe mongö ren, o ämi oua feila, oupwe mongö met a molotä mwemi, nge ousap ais och kapas ais, pun ete fis mengiringirin lelukemi. ²⁸ Nge are eman a ürenikemi, “Ei mongö aramas ra fen asor ngeni uluulun anümwäl,” mürin ousap mongö, pokiten ätewe mi asile ngenikemi, pwal pokiten mengiringirin leluken eman. ²⁹ Üsap kapas usun mengiringirin lelukemi, nge üa kapas usun mengiringirin leluken ewe eman.

Eli eman epwe ais, “Pwota üpwe küna apwüing won mine üa föri lon ai ngas, pokiten mengiringirin leluken eman? ³⁰ Are üa kilisou ngeni Kot fän iten anei, pwota eman epwe esitaei usun och mongö üa kilisou ren?”

³¹ Iei mine are oua momongö ika ükün, ika met oua föri, oupwe föri meinisin pwe Kot epwe ling ren. ³² Ousap manaueni eu sokun manau epwe afisätä chepetek ngeni ekewe chon Juta, ika ngeni ekewe chon lükün Israel, ika ngeni chon ewe mwichefelin Kot. ³³ Oupwe chök föri usun mine ngang üa föri. Üa sotuni ai üpwe apwapwai aramas meinisin lon meinisin mine üa föri. Üsap kütta mine üpwe püsin feiöch ren, nge üa kütta mine ekewe chomong repwe feiöch ren, pun üa mochen pwe repwe küna manau.

11

¹ Oupwe apirüei usun ngang üa apirü Kraist. *

Usun än fefin pwölüela möküren lon ar fel ngeni Kot

11.2-16

² Iwe, üa mwareitikemi pokiten oua chechemeniei fansoun meinisin, oua pwal aleasochisi ekewe afalafal üa ngenikemi. ³ Nge üa mochen oupwe weweiti pwe Kraist möküren mwän meinisin, nge mwän möküren fefin, nge Kot möküren Kraist. ⁴ Iwe, are eman mwän epwe iotek ika pwärätä met mi monomon lon imwenfel, nge a pwölüela möküran, ätei a aitengaua Kraist möküran we. ⁵ Nge are eman fefin epwe iotek ika pwärätä met mi monomon lon imwenfel, nge esap pwölüela möküran, neminei a aitengaua pwülüan möküran we. Esap wor sokofesenin neminei me eman fefin mi reipöpöla möküran. ⁶ Are eman fefin esap pwölüela möküran, mei fen öch an epwe fichi möküran. Nge are och minen asaw ren eman fefin an epwe reipöpöla möküran ika fichi möküran, epwe fokun pwölüela möküran. ⁷ Esap wor lomoten än eman mwän epwe pwölüela möküran, pun i lapalapen Kot mi aliosunätä lingen Kot, nge eman fefin a aliosunatä lingen mwän. * ⁸ Pun mwän esap för seni fefin, nge fefin a

* **10:22:** Tut 32.21 * **10:23:** 1.Kor 6.12 * **10:26:** Kölf 24.1 * **11:1:** 1.Kor 4.16; Filip 3.17

* **11:7:** Ken 1.26-27

för seni mwän. ⁹ Mwän esap pwal för fänäsengesin feffin, nge feffin a för fänäsengesin mwän. ✧ ¹⁰ Iwe, pokiten ekewe chon läng, eman feffin epwe pwöülüela möküran pwe epwe pwä, pwe a nom fän nemenien pwülüan. ¹¹ Nge lon ach Samol, esap tufich pwe eman feffin epwe imwüla won an seni mwän, esap pwal tufich pwe eman mwän epwe imwüla won an seni feffin. ¹² Pun usun ewe feffin a för seni mwän, pwal ina chök usun mwän a uputiu seni feffin, nge Kot a förätä mettoch meinisin.

¹³ Oupwe püsin apwüngü lefilemi ika a öch ngeni eman feffin pwe epwe iotek ngeni Kot lon imwenfel mwen mesen aramas, nge esap pwöülüela möküran. ¹⁴ Ifa usun, ousap püsin mefi pwe a asäw ngeni eman mwän epwe tam meten möküran? ¹⁵ Nge are meten möküren eman feffin a langatam, iei met a liöch ren. Pun Kot a ngeni meten möküran pwe pwölpwölün. ¹⁶ Nge are eman a mochen anini won ekei mettoch, üa chök tongeni apasa, pwe äm me ekewe mwicheffelin Kot esap wor rem och sokun lapalap ika örüni.

Usun ewe mongö än ach Samol

11.17-34

(Mat 26.26-29; Mark 14.22-25; Luk 22.14-20)

¹⁷ Nge lon ekei kapasen ööröür üpwe ngenikemi, üsap tongeni mwareitikemi, pun lupwen oua mwichfengen esap fisöchüla ämi souläng, pwe a fen ngauala. ¹⁸ Akomwan üa rongorong pwe a wor kinikinfesen lefilemi lupwen oua mwichfengen. Esopun ei pworaus üa fen lükü. ¹⁹ Ewer, epwe fokun wor kinikinfesen lefilemi, pwe chokewe mi pwüng repwe fokun pwäpwäla. ²⁰ Lupwen oua mwichfengen, esap iei ewe mongö än ach Samol oua eäni. ²¹ Pun lupwen oua mongö, eman me eman a popuetä le mongö püsin anan, nge esap witiwit. Iei mine ekoch me leimi ra echik lupwen ekoch ra sakauala. ²² Ifa usun, esap wor püsin imwemi ia oua tongeni momongö o ükün ie? Are ifa usun, oua mochen turunufasei ewe mwicheffelin Kot o aitengaua ekewe aramas mi wöüngau? Met üpwe ürenikemi usun ei? Ifa usun, üpwe mwareitikemi? Apwi! Üsap fokun mwareitikemi! ²³ Pun üa angei seni ach Samol ekewe kapas üa aiti ngenikemi, pwe lon ewe pwinin Jutas epwe afangamä ach Samol Jesus, Jesus a angei ewe pilawa, ²⁴ a iotekin kilisou ngeni Kot won, a utu o apasa, “Oupwe angei o äni, pun iei inisi üa fangala fänäsengesimi. Iei met oupwe föri pwe oupwe chechemeniei.” ²⁵ Pwal ina chök usun mürin ar mongö, a angei ewe kap o apasa, “Ei kap iei än Kot we pwon mi fö lon chai. Iteiten fansoun oupwe ün seni ei kap, oupwe chechemeniei.” ✧ ²⁶ Wewen ei, pwe iteiten fansoun lupwen oupwe mongö ei pilawa o ün seni ei kap, oupwe asilefeili mälan ach Samol tori epwe war. ²⁷ Iei mine are eman epwe mongö ei pilawa ika ün seni ei kap än ach Samol lon an esap fich ngeni, i epwe tipis ngeni inisin ach Samol me chaan. ²⁸ Iei mine eman aramas epwe akomwen atittina manauan, mürin epwapw mongö ewe pilawa o ün seni ewe kap. ²⁹ Pun are eman esap aücheani wewen inisin ach Samol lupwen a mongö ewe pilawa o ün seni ewe kap, i epwe atoto apwüng won ren an mongö me ün. ³⁰ Ina popun chomong me leimi ra samau o apwangapwang, nge ekoch ra fen mäla. ³¹ Nge are sia akomwen atittinakich, Kot esap apwüngkich. ³² Nge lupwen sia küna apwüng me

ren ach Samol, i a amiritikich, pwe sisap eti fanüfan le küna liwiningauen tipis.

³³ Iei mine, ämi pwii kana, lupwen oua mwichfengen le mongö ewe mongö än ach Samol, oupwe witiwiti chiechiemi kewe. ³⁴ Nge are eman a echik, epwe mongö lon imwan, pwe ousap küna apwüng me ren Kot lupwen oua mwichfengen. Iwe, ren ekewe ekoch mettoch, üpwe öüröüra ngenikemi lupwen üpwe feila remi.

12

Ekewe lifang seni ewe Ngünmifel

12.1-11

¹ Iwe, ämi pwii kana, üa mochen pwe oupwe silei met a let usun ekewe lifang seni ewe Ngünmifel. ² Oua fen silei, pwe lupwen ousamwo souläng, oua tokola lon chomong sokun lapalap, pwe ämi oupwe fel ngeni ekewe uluulun anümwäl resap manau. ³ Iei mine üa mochen ämi oupwe silei, pwe esap wor eman epwe tongeni apasa fän emwenien ewe Ngünün Kot, “Jesus epwe anümamau,” esap pwal wor eman a tongeni pwärätä, “Jesus i Samol”, are ewe Ngünmifel esap emweni.

⁴ Mi wor sokopaten lifangen ngün, nge eman chök Ngün a fangeto. ⁵ Mi wor sokopaten angang, nge kich meinisin sia angang ngeni eman chök Samol. ⁶ Mi wor sokopaten tufich ach sipwe föri angang, nge ewe eman chök Kot a ngeni aramas meinisin ewe tufich fänäsengesin en me an angang. ⁷ Ewe Ngünmifel a pwäla lon sokopaten lapalap lon manauen eman me eman leich, pwe epwe wor ach feiöch meinisin. ⁸ Ewe Ngün a lifang ngeni eman aramas an epwe afalafala ewe kapas fän tipachem, pwal ewe chök Ngün a lifang ngeni eman an epwe afalafala ewe kapas fän silelap. ⁹ Ewe chök Ngün a lifang ngeni eman an epwe wor an lükülük, nge ngeni pwal eman a lifang ewe tufich an epwe apöchöküla aramas. ¹⁰ Ewe Ngün a lifang ngeni eman aramas ewe tufich an epwe föri manaman, a pwal lifang ngeni eman ewe tufich an epwe afalafala än Kot kapas, nge pwal ngeni eman an epwe tufichin alefila leflen ekewe lifang mi pop seni ewe Ngünmifel me ekewe lifang resap pop seni. Ngeni eman aramas a lifang ngeni tufichin an epwe fos lon kapasen ekis, nge ngeni pwal eman a lifang ewe tufichin an epwe awewei met eman a apasa. ¹¹ Nge ewe eman chök Ngün a föri ekei mettoch meinisin, a ngeni eman me eman aramas ekewe sokopaten lifang usun an mochen. *

Eu inis me chomong kifetin

12.12-31

¹² Iwe, usun inisich a chök eu o a wor chomong kifetin, inamwo ika a sokopat ekewe kifet, nge ra nom lon eu chök inis. Ina chök usun Kraist. * ¹³ Iei usun oukich meinisin, ese lifilifil ika chon Juta ika chon lükün Israel, ika amanau ika aramas mi ngas, kich meinisin sia papatais lon eu chök inis ren eman chök Ngün, kich meinisin sia pwal ün seni eman chök Ngün.

¹⁴ Pun inisich esap fis ren eu chök kifet, nge a fis ren chomong kifet. ¹⁵ Are pechech epwe apasa, “Pokiten ngang üsap efoch pau, üsap chu ngeni ewe inis,” ei esap tongeni imwüwu seni an epwe eu kifetin inisich. ¹⁶ Nge are selingach epwe apasa, “Pokiten ngang üsap eföü mas, üsap chu ngeni ewe inis,” ei esap tongeni imwüwu seni an epwe eu kifetin

inisich. ¹⁷ Are unusen eu inis epwe chök eföü mas, epwe ifa usun an epwe tongeni rongorong? Nge are epwe chök eu seling, epwe ifa usun an epwe tongeni tini och? ¹⁸ Iei usun Kot a anomu ekewe sokopaten kifet won inisich usun met mochenin letipan. ¹⁹ Esap wor eu inis are unusen meinisin epwe eu chök kifet! ²⁰ Iei usun a wor chomong kifet, nge eu chök inis.

²¹ Iei mine mesach esap tongeni apasa ngeni pöüch, “Esap wor lomotom ngeniei.” Pwal mökürach esap tongeni apasa ngeni pechech, “Esap wor lomotom ngeniei.” ²² Nge a fokun lomot ngenikich ekewe kifetin inisich usun nge sia ekieki pwe itä ra apwangapwang. ²³ Iwe, ekewe kifet sia ekieki pwe esap wor aüchear, sia fokun achocho ngeni ach sipwe kütta met repwe aüchea ren. Nge ekewe kifet resap nien lapalapöch, sia kütta met sipwe pwölürela ren, pwe esap pwä asäwir. ²⁴ Nge ekewe kifet ra fen lapalapöch, esap lomot ach sipwe pwölürela. Püsin Kot a achufengeni inisich lon eu sokun lapalap pwe a fokun alinga ekewe sokun kifet esap wor linger. ²⁵ Iei mine esap wor kinikinfesen lon ewe inis, nge ekewe sokopaten kifet meinisin repwe chüngüfengeniir lefiler. ²⁶ Are eu kifet a riaföü, ekewe lusun kifet meinisin ra eti le riaföü, nge are eu kifet a iteüöch, ekewe lusun kifet meinisin ra eti lon an pwapwa.

²⁷ Ämi meinisin inisin Kraist, nge eman me eman leimi kifetin. ²⁸ Iwe, Kot a awiser meinisin lon en me lenian lon imwenfel: Akomwan ekewe soukünö, aruan ekewe soufos, nge aülüngatin ekewe sense. Mürin chokewe mi föri manaman, pwal chokewe mi wor ar tufichin apöchöküla aramas, chokewe mi alisi aramas, chokewe ir souemwen, pwal chokewe mi fos lon kapasen ekis. ✧ ²⁹ Ifa usun, ir meinisin ra soukünö, ika soufos, ika sense? Ifa usun, ir meinisin a wor rer tufichin föri manaman, ³⁰ ika tufichin apöchöküla aramas, ika tufichin fos lon kapasen ekis, ika tufichin awewei ekewe kapasen ekis? ³¹ Iwe, oupwe achocho le kütta ämi oupwe eäni ekewe lifang mi fokun aüchea. Nge iei üpwe aiti ngenikemi eu sokun manau mi mürina seni meinisin.

13

Ach eäni chen a aüchea seni ach eäni tufich meinisin

13.1-13

¹ Are üpwe tongeni kapas lon kapasen aramas me chon läng kana, nge üsap eäni chen, üpwe wewe ngeni och piras mi tik me och mächä mi akürang. ² Are üpwe eäni ewe tufichin osuni o weweöchiti meinisin mine a monomon o eäni silelap meinisin, are üpwe pwal eäni lükülük meinisin, pwe üpwe tongeni amwökütü chuk kana, nge üsap eäni chen, esap wor ai aüchea. ✧ ³ Are üpwe fangala piseki meinisin ngeni chon wöüngau, are üpwe pwal fangetä inisi pwe epwe kek, nge üsap eäni chen, üsap feiöch ren.

⁴ Chen a mosonotam o kirikiröch, chen esap lolowo ika sikesik ika lamalamtekoa. ⁵ Chen esap föri mine a asäw, esap kütta püsin an, esap koum, esap ekieki o chechemeni mine eman a mwäl ngeni won. ⁶ Chen esap pwapwaäsini mine a ngau, nge a pwapwaäsini mine a let. ⁷ Chen a engila fän mettoch meinisin, a lükü meinisin, a apilüküni meinisin, a tipeppos fän mettoch meinisin.

⁸ Chen epwe nonomola tori feilfeilachök. Ach kapasen osuni epwe mýchüla, ach fos lon kapasen ekis epwe ükütiu, nge ach silelap epwe mýchüla. ⁹ Pun ach silelap me ach kapasen osuni resap unus, ¹⁰ nge lupwen epwe war met mi unus, mürin met esap unus epwe mýchüla.

¹¹ Lupwen ngang üa eman semirit, üa kapas usun eman semirit o ai memef me ekiék mefien semirit me ekiékin semirit. Nge iei lupwen üa mwän, üsap chüen usuni ususun eman semirit. ¹² Pun mine sia küna iei a usun chök ngününgünün mettoch mi toputop lon kilas, nge mürin sipwe tongeni wesewesen küna fatöchün ren mesach. Met ngang üa silei iei esap unus, nge mürin üpwe silei unusan, usun chök Kot a wesewesen sileei.

¹³ Iei usun ekei ülüngat repwe nonomola: lükülük, apilükülüköch me chen, nge chen a lapalap seniir.

14

Pwal ekoch kapasen ööröür usun ekewe lifang seni ewe Ngünmifel

14.1-25

¹ Iwe, oupwe fokun achocho ngeni ämi oupwe eäni chen. Nge oupwe pwal kütta ekewe lifang seni Ngünmifel, akaeuin ewe lifangen afalafala än Kot kapas. ² Pun eman mi fos lon kapasen ekis, esap kapas ngeni aramas pwe a kapas ngeni Kot, pun esap wor eman a weweiti an kapas. Ätewe a pwärätä monomonen ewe let ren manamanen Ngünmifel. ³ Nge ewe eman mi afalafala än Kot kapas, a kapas ngeni aramas, a alisiir, a apöchöküla ar souläng o echiper lon manauer. ⁴ Iwe, ewe eman mi fos lon kapasen ekis a chök püsin alisi won inisin, nge ewe eman mi afalafala än Kot kapas a alisi unusen mwichefel.

⁵ Üa mochen pwe ämi meininis oupwe fos lon kapasen ekis, nge üpwe fokun mochen pwe epwe wor remi ewe lifangen afalafala än Kot kapas. Pun ätewe mi afalafala än Kot kapas a lap seni ewe eman mi fos lon kapasen ekis. A chök wor lomoten än eman fos lon kapasen ekis are a wor eman a aföü an kapas, pwe unusen ewe mwichefel epwe fefeitä ren. ⁶ Iei mine, ämi pwii kana, lupwen üpwe feito remi, met sokun feiöch üpwe ngenikemi are üpwe fos lon kapasen ekis? Ese fokun wor, are üsap ngenikemi och kapasen pwärätä seni Kot, ika och kapasen silelap, ika och kapasen osuní, ika och kapasen kait.

⁷ Oupwe ekiéki usun ekewe pisekin ettik esap wor manau lor, usun ewe likaangün ika ewe kitar. Epwe ifa usun än eman epwe silei ngingiin echö köl, are ewe chon ettik epwe chök ettikichou, nge esap fiti notenin pwe epwe fatöch ngingin? ⁸ Nge are ewe mwän mi ettiki ewe rappwa esap fat an ettiki asilesilen maun, iö epwe amolätä ngeni maun? ⁹ Ina chök usun met a fis remi. Are ämi afalafal lon kapasen ekis esap fat wewen, ifa usun än eman epwe tongeni weweiti? Ämi kapas epwe chök morola lon asepwäl. ¹⁰ A wor chomong sokun än aramas fos lon ei fanüfan, nge esap wor eu me leir esap wor wewen. ¹¹ Nge are üsap silei ewe fos eman a kapas lon, ewe aramas mi kapas epwe usun eman chon ekis ngeniei, nge ngang üpwe usun eman chon ekis ngeni. ¹² Pokiten ämi oua fokun mochen an epwe wor remi ekewe lifang seni ewe Ngünmifel, oupwe fokun achocho ngeni an epwe chomongola ekewe sokun lifang mi alisi mwichefel pwe epwe fefeitä ren.

¹³Iei mine ewe aramas mi fos lon kapasen ekis epwe iotek, pwe epwe wor an tufich an epwe aföüü mine a apasa. ¹⁴Pun are üpwe iotek lon kapasen ekis, ngüni a wesewesen iotek, nge ai ekiek esap nom lon. ¹⁵Iwe, met üpwe föri? Üpwe iotek lon ngüni, nge üpwe pwal iotek fiti ekiekin letipei. Üpwe köl lon ngüni, nge üpwe pwal köl fiti ekiekin letipei. ¹⁶Lupwen oua kilisou ngeni Kot lon ngünümi chök, epwe ifan usun än eman mi fiti ämi mwich epwe tongeni apasa “Amen” wesin ämi iotekin kilisou, are esap silei met oua kapas usun? ¹⁷Inamwo ika ämi iotekin kilisou ngeni Kot a mürina, nge esap alisi ekewe ekoch aramas.

¹⁸Üa kilisou ngeni Kot pwe üa tongeni kapas lon kapasen ekis lap seni ämi meinisin. ¹⁹Nge lon imwenfel, lupwen ach fel ngeni Kot, üa efich ai üpwe apasa limu kapas pwe aramas ra tongeni wewe ren lupwen üpwe asukuler, lap seni ai üpwe fos lon ngeröün kapasen ekis.

²⁰Ämi pwii kana, ousap wewe ngeni semirit lon ämi ekiek. Oupwe semirit lon föföör mi ngau, nge oupwe mirit lon ämi ekiek. ²¹Pun iei usun mine a mak lon ekewe Toropwe mi Pin,

“Üpwe kapas ngeni nei aramas

ren aramas mi fos lon kapasen ekis.

Üpwe kapas ngeniir ren awen chon ekis,

nge iei mwo nei aramas resap mochen aüselingaei.” ✱ ²²Iei usun ewe lifangen ach fos lon kapasen ekis eu asisil fän iten chokewe resap lükü, sap fän iten chon lükü. Nge ewe lifangen afalafala än Kot kapas eu asisil fän iten ekewe chon lükü, sap fän iten chokewe resap lükü. ²³Iei mine are unusen ewe mwichiefel a mwichfengen o ir meinisin repwe fos lon kapasen ekis, are ekoch chon lükün ika chon resap lükü repwe tolong remi, ifa usun, resap apasa pwe ämi oua umwes? ²⁴Nge are eman a afalafala än Kot kapas lupwen eman aramas esap lükü ika eman chon lükün epwe tolong remi, i epwe mefi an tipis ren met a rongorong. Epwe küna apwüng ren meinisin mine a rongorong, ²⁵ekiekin letipan mi monomon epwe pwäpwäla. Iwe, epwe chapetiu o fel ngeni Kot, epwe pwal pwärätä, “Enlet, Kot a nonom lefilemi!”

Kokoten lon mwichiefel

14.26-40

²⁶Iwe, ämi pwii kana, iei met üpwe kapas usun. Lupwen oua mwichfengen pwe oupwe fel ngeni Kot, oupwe apasa en me mefian eman echö köl, eman eu afalafal, eman eu kapasen pwärätä seni Kot, pwal eman eu fos lon kapasen ekis, nge pwal eman eu kapasen aföüü met ätewe a apasa. Nge ekei alilis meinisin repwe fokun afefetai mwichiefel. ²⁷Are eman epwe fos lon kapasen ekis, ruoman ika ülüman echök repwe fos, eman mürin eman, nge epwe pwal wor eman epwe aföüü met ra apasa. ²⁸Nge are esap wor eman a tongeni aföüü, ätewe mi fos lon kapasen ekis epwe fanafanala, epwe chök fos ngeni püsin i me Kot. ²⁹Ruoman ika ülüman chon afalafal ra tongeni kapas, nge ekewe ekoch repwe apwüngü mine ra afalafal won. ³⁰Are eman mi mot lon ewe mwich a angei eu kapasen pwärätä seni Kot, ewe eman mi kapas epwe köüla, nge ewe mi angei ewe kapasen pwärätä epwe kapas. ³¹Ämi meinisin oua tongeni afalafala än Kot kapas, eman mürin pwal eman, pwe ekewe aramas meinisin repwe

kaiö seni o ar souläng epwe pöchökül ren. ³² Iwe, ewe lifangen afalafala än Kot kapas epwe nonom fän nemenien ewe chon afalafal, ³³ pun Kot esap mochen pwe epwe wor fitikoko, nge a mochen pwe epwe wor kinamwe.

Lon ekewe mwichefelin chon pin meinisin ³⁴ ekewe fefin repwe fanafanala lon ekewe mwich. Esap mwümwütä ngeniir ar repwe kapas, usun mine a mak lon än ekewe chon Juta Allük pwe esap wor ar nemenem. ³⁵ Are ra mochen silei och, repwe aisini pwülüer lon imwer. Pun a fokun asäw ngeni eman fefin an epwe kapas lon ekewe mwich lon imwenfel.

³⁶ Ifa usun, än Kot kapas a pop senikemi? Ika ewe kapasen Kot a chök torikemi? ³⁷ Are eman a ekeiki pwe i eman nöün Kot chon afalafal, ika a wor ren eu lifang seni Ngünmifel, epwe mefi pwe mine üa mak ngenikemi, iei än Kot allük. ³⁸ Nge ika esap afäli ekei kapas, ousap pwal afäli.

³⁹ Iei mine ämi pwii kana, oupwe fokun achocho ngeni ämi oupwe afalafala än Kot kapas. Ousap pinei chokewe mi fos lon kapasen ekis, ⁴⁰ nge mettoch meinisin epwe fis fän pwüng me kokotöch.

15

Än Kraist manausefäl

15.1-11

¹ Iwe, ämi pwii kana, iei üa mochen achema ngenikemi usun ewe Pworausen Manau üa fen afalafala ngenikemi, ewe oua etiwa o alonga ämi lükülük won. ² Iei ewe Pworausen Manau oua küna manau ren are oupwe kamwöchünük won. Nge are ousap kamwöchünük won, ämi lükü a lomotongau.

³ Üa ngenikemi mine üa fen angei met a fokun aüchea: pwe Kraist a mäla fän iten ach tipis usun a mak lon ekewe Toropwe mi Pin, ✧ ⁴ pwe a peias, nge mürin ülüngat rän a manausefälitä usun a mak lon ekewe Toropwe mi Pin, ✧ ⁵ pwe a pwä ngeni Petrus, nge mürin a pwä ngeni ekewe engol me ruoman soukünö. ✧ ⁶ Mürin a pwä ngeni lap seni limupükü chon lükü i lon eu chök fansoun, chomong me leir ra chüen manau, nge ekoch ra mäla. ⁷ Mürin a pwä ngeni James, mürin a pwal pwä ngeni ekewe soukünö meinisin.

⁸ Iwe, amüchülan a pwal pwä ngeniei, inamwo ika üa wewe ngeni eman aramas mi uputiü lon fansoun esap pwüng ngeni. ✧ ⁹ Pun ngang üa kis seni ekewe soukünö meinisin, esap fich ngeniei ai üpwe iteni eman soukünö, pun üa ariaföüü chon ewe mwichefelin Kot. ✧ ¹⁰ Nge ren än Kot ümöümöch üa wilila o wiliti eman soukünö. Iwe, an ümöümöch ngeniei esap lomotongau, pun mi enlet üa fokun achocho le angang lap seniir meinisin. Nge pwüngün pwe sap ngang üa föri ei angang pwe än Kot ümöümöch a nom rei. ¹¹ Iei mine ese liflifil ika ngang üa afalafala ewe Pworausen Manau ika pwal ekewe ekoch soukünö, am meinisin aia afalafala eu chök Pworausen Manau, iei met oua lükü.

Usun ach manausefäl

15.12-34

✧ **15:3:** Ais 53.5-12 ✧ **15:4:** Kölf 16.8-10; Mat 12.40; Föf 2.24-32 ✧ **15:5:** Mat 28.16-17; Mark 16.14; Luk 24.34,36; Joh 20.19 ✧ **15:8:** Föf 9.3-6 ✧ **15:9:** Föf 8.3

¹² Iwe, pokiten sia afalafala pwe Kot a amanauasefäli Kraist seni mäla, pwota ekoch me leimi ra apasa pwe ekewe mi mäla resap manausefäl? ¹³ Are mi pwüng pwe resap manausefäl, wewen Kraist esap pwal manausefäl. ¹⁴ Nge are Kraist esap manausefäl seni mäla, mürin äm afalafala a lomotongau, pwal ämi lükü a lomotongau. ¹⁵ Pwal och, epwe pwäla pwe aia chofona usun Kot, pun aia apasa pwe Kot a amanauasefäli Kraist seni mäla. Nge are a pwüng pwe ekewe mi mäla resap manausefäl, mürin Kot esap amanauasefäli Kraist. ¹⁶ Pun are ekewe mi mäla resap manausefäl, Kraist esap pwal manausefäl. ¹⁷ Nge are Kraist esap manausefäl, ämi lükü i a aücheangau o ämi oua chüen nom lon ämi tipis. ¹⁸ Iwe, pwal wewen, pwe ekewe chon lükü Kraist mi fen mäla ra pöütmwälila. ¹⁹ Are sia apilükülükü Kraist lon ei chök manau, sia atting seni aramas meinisin mi nom won ei fanüfan.

²⁰ Nge a pwüng pwe Kot a amanauasefäli Kraist seni mäla, iei mine a allükülük pwe chokewe mi mäla repwe pwal manausefäl. ²¹ Pun usun chök mäla a pop seni eman aramas, pwal ina chök usun ewe manausefäl seni mäla a pop seni eman aramas. ²² Pun usun aramas meinisin ra mäla lon Atam, iei usun aramas meinisin repwe manausefäl lon Kraist. ²³ Nge meinisin repwe manausefäl lon en me tettelin: Kraist a akom, mürin chokewe ir nöün Kraist repwe manausefäl lon fansoun an liwinsefäl. ²⁴ Mürin epwe war ewe fansoun sopolan. Kraist epwe akufu ekewe samol, ekewe sounemenem me ekewe manaman o atolonga mwün fän nemenien Saman Kot. ²⁵ Pun Kraist epwe fokun nemenem tori Kot epwe akufu chon oputan meinisin o anomuur fän pechen. ✧ ²⁶ Iwe, ewe amüchülan chon oputan epwe mola, iei mäla. ²⁷ Pun iei mine a mak lon ekewe Toropwe mi Pin, “Kot a anomu mettoch meinisin fän pechen.” Ewer, a fokun fat pwe ewe kapas “mettoch meinisin” Kot esap pachelong lon, i ewe mi anomu mettoch meinsin fän nemenien Kraist. ✧ ²⁸ Iwe, nge lupwen ekewe mettoch meinisin ra nom fän nemenien Kraist, mürin ewe Nau epwe püsin anomu i fän nemenien Kot, i ewe mi anomu mettoch meinisin fän nemenian. Iwe, Kot epwe unusen nemeni mettoch meinisin.

²⁹ Iwe, ifa usun ren ekewe aramas mi papatais fänäsengesin ekewe mi mäla? Pwota ra föri iei usun? Are a let pwe ekewe mi mäla resap manausefäl, pwota ekei aramas ra papatais fänäsengesin ekewe mi mäla? ³⁰ Nge me rem, pwota äm aipwe küküna feiengau iteiten fansoun meinisin? ³¹ Ämi pwii kana, üa sereni feiengauen mäla iteiten rän. Üa apasa ei lon ai sikäsinikemi lon Kraist Jesus ach Samol. ³² Are ngang üa fiu ngeni ekewe manmwacho lon Efisos fänäsengesin ekoch popun mi fis seni ekiengin aramas, met lomotan ngeniei? Nge are ekewe mi mäla resap manausefäl, pwota sisap chök föri usun met ekewe ekoch ra apasa, “Ousipwe momongö o ükün, pun lesor sipwe mäla”? ✧

³³ Ousap püsin atupukemi: “Chiechi ngeni aramas mi ngau a angauala manauach.” ³⁴ Oupwe miritila, iwe, oupwe ükütü le föri tipis. Pun ekoch me leimi resap silei Kot, üa pwärätä ei pwe oupwe säw ren.

Manausefälin inisich 15.35-58

³⁵ Iwe, eli eman epwe ais, “Ifa usun än ekewe mi mäla repwe manausefäl? Met sokun inis repwe inisini?” ³⁶ Ka umwes! Lupwen ka fotuki eföü pwükil lon pwül, esap pwükütä are esap akomwen mäla. ³⁷ Nge mine ka fotuki eföü chök pwükil, eli eföü föün wiich ika och sokun föün irä, sap inisin ewe irä epwe märitä me mürin. ³⁸ Iwe, Kot a ngeni ewe pwükil eu inis usun i a mochen. A ngeni eföü me eföü pwükil en me inisin.

³⁹ Fituken mönümanau meinisin a sokofesen. Mi wor och sokun fituken aramas, och sokun fituken man, och sokun fituken machang, pwal och sokun fituken ik.

⁴⁰ A wor inis minen läng, a pwal wor inis minen fanüfan. Lingen ekewe inis minen läng a sokola seni lingen ekewe inis minen fanüfan. ⁴¹ A wor eu sokun lingen akkar, eu sokun lingen maram, pwal eu sokun lingen ekewe fü, pwal mwo nge lefilen ekewe fü a sokofesen linger.

⁴² Iei usun mine epwe fis lupwen ekewe mi mäla repwe manausefäl. Ewe inis mi fotuti a mämmä, nge ewe inis mi manausefäl esap mämmä.

⁴³ Lupwen a fotuti a lingengau o apwangapwang, nge lupwen epwe manausefäl epwe ling o pöchökül. ⁴⁴ Met a fotuti eu inis sokun fituk, nge met epwe manausefäl eu inis sokun ngün. Are a wor eu inis sokun fituk, epwe pwal wor eu inis sokun ngün. ⁴⁵ Pun iei usun mine a mak lon ekewe Toropwe mi Pin, “Ewe poputän aramas Atam, i eman aramas mi manau”, nge ewe amüchülan Atam, i eman Ngün mi afisätä manau. ✧

⁴⁶ Nge sap ewe inis sokun ngün a akom, pwe ewe inis sokun fituk, mürin ewe inis sokun ngün. ⁴⁷ Ewe aeumanün Atam a för seni pwül, nge ewe aruomanün Atam a feito seni läng. ⁴⁸ Chokewe mi pop seni pwül ra usun chök ätewe mi för seni pwül, nge chokewe mi pop seni läng ra usun chök ätewe mi feito seni läng. ⁴⁹ Usun sia sokuni sokun ewe aramas mi för seni pwül, ina usun sipwe pwal sokuni sokun ewe Aramas seni läng.

⁵⁰ Ämi pwii kana, iei wewen ai kei kapas: Mine a för seni fituk me cha esap tongeni mwüni mwün Kot, nge mine a morola esap tongeni eäni mine esap morola. ⁵¹ Oupwe rongorong, üpwe ürenikemi eu kapas monomon: Sap kich meinisin sipwe mäla, nge lupwen ewe amüchülan rappwa epwe tik, kich meinisin sipwe müttir wilila ⁵² lon eu chök morupun mas. Pun lupwen ewe rappwa epwe tik, ekewe mi mäla repwe manausefäl, nge resap chüen mälasefäl, nge kich meinisin sipwe wilila.

✧ ⁵³ Pun met mi morola epwe siwil ngeni met esap tongeni morola, nge met mi mämmä epwe siwil ngeni met esap tongeni mämmä. ⁵⁴ Iwe, lupwen met mi morola epwe siwil ngeni met esap tongeni morola, o met mi mämmä epwe siwil ngeni met esap tongeni mämmä, mürin epwe pwönüetä mine a mak lon ekewe Toropwe mi Pin, “Manau a akufu mäla pwe esap chüen wor!” ✧

⁵⁵ “En mäla, ifa om win?

En mäla, ifa om manamanen akafeiengau?” ✧ ⁵⁶ Mäla a angei an manamanen akafeiengau seni tipis, nge tipis a angei an manaman seni ekewe Allük. ⁵⁷ Nge kilisou ngeni Kot mi ngenikich ach win ren ach Samol Jesus Kraist!

⁵⁸ Iei mine ämi pwii kana mi achengicheng, oupwe apposakemi, ousap mwöküt seni ämi souläng. Oupwe alapalaföhei ämi achocho lon ewe angangen ach Samol, pun oua silei pwe esap lomotongau ämi angang lon ach Samol.

16

Ekewe asor fän iten ekewe souläng lon Jerusalem

16.1-4

¹ Iwe, iei mine üa makkei ngenikemi usun ewe alilis oua ionifengeni fän iten ekewe chon pin lon Jutea: oupwe fokun föri usun met üa fen üreni ekewe souläng lon ekewe mwichefel lon Kalatia. ✱ ² Iteiten räninfele eman me eman leimi epwe aimwüela och alilis lon ükükün met a tufich ngeni. Iwe, oupwe iseis, pwe esap fis ämi ionifengeni ewe alilis lupwen üpwe war. ³ Lupwen üpwe torikemi, üpwe tinala ätekewe oua filiiretä o ngeniir toropwe, pwe repwe uwala ewe lifang lon Jerusalem. ⁴ Nge are epwe öch ngeniei ai üpwe pwal feila, iwe, ir repwe tongeni etiei.

Än Paulus kokot

16.5-12

⁵ Iwe, üpwe feila remi mürin ai saifeil lon Masetonia, pun üa fen akota ai üpwe saifeil lon Masetonia. ✱ ⁶ Eli üpwe nom remi lon ekoch fansoun, eli lon unusen fansoun patapat. Iwe, oua tongeni alisie pwe üpwe sopwela ai sai ekis meinisin ia üpwe feila ie. ⁷ Pun üsap mochen üpwe churikemi fansoun mochomoch, nge üa apilüköch pwe üpwe nonom remi fansoun langatam are ach Samol a mwüt ngeniei.

⁸ Üpwe nonom ikei lon Efisos tori ewe ränin Pentikost, ✱ ⁹ pun a wor eu asam mi suk chöchöla pwe üpwe föri ewe angang mi aüchea, nge a pwal wor chomong chon pinei ewe angang.

¹⁰ Iwe, are Timoty epwe torikemi, oupwe tümwünüfichi ämi oupwe etiwöchü, pun i a angang fän iten ach Samol usun chök ngang. ¹¹ Esap wor eman leimi epwe ösüfölungauei, nge oupwe alisi pwe epwe sopwela an sai fän kinamwe. Iwe, epwe liwinsefälito rei, pun üa witiwiti fiti pwal pwiich kewe.

¹² Iwe, ren pwiich we Apolos, ngang üa fokun tüngor ngeni fän chomong, pwe epwe churikemi me pwal pwiich kewe ekoch, nge esap fokun mefi pwe a öch an epwe feila lon ei fansoun. Iwe, epwe feila remi are a wor an fansoun.

Än Paulus kapasen lesopolan

16.13-24

¹³ Oupwe mamasa, oupwe üppos lon ämi lükülük, oupwe eäni sokun mwän, oupwe pöchökülela. ¹⁴ Meinisin mine oupwe föri, oupwe föri lon chen.

¹⁵ Oua silei usun Stefanas me chon an famili. Ir ra akom le soulängila me lon Akaia, ra fokun achocho le angang ngeni ekewe chon pin. Ämi pwii kana, üa tüngormau ngenikemi, ✱ ¹⁶ pwe oupwe aleasochis ngeni ekei sokun aramas usun ir, pwal ngeni chokewe mi etiiir le angang o angang weires.

¹⁷ Üa pwapwa ren än Stefanas, Fortunatus me Akaikus wareto, pun ra siwilikemi lupwen ämi ousap nom rei. ¹⁸ Ra apwapwai letipei usun chök ra apwapwai letipemi. Ekana sokun aramas oupwe aücheaniir. ¹⁹ Chon ekewe mwichefel lon ewe fanü Asia ra kapong ngenikemi. Akwila me Prisila pwal chon ewe mwichefel mi mwichfengen lon imwer ra fokun kapong ngenikemi lon ach Samol. ✱ ²⁰ Pwiich kewe meinisin mi nom ikei ra kapong ngenikemi. Oupwe kapongfengen lefilemi ren ewe kapongen

✱ **16:1:** Rom 15.25-26 ✱ **16:5:** Föf 19.21 ✱ **16:8:** Lif 23.15-21; Tut 16.9-11 ✱ **16:15:** 1.Kor 1.16 ✱ **16:19:** Föf 18.2

souläng. ²¹ Ngang Paulus üa makkei ai ei kapong ren püsin pei. ²² Iö esap tongei ach Samol i epwe anümanau! Maranatha. (wewen: Äm Samol kopwe feito!) ²³ Ümöömöchün ach Samol Jesus epwe nonom remi. ²⁴ Ai chen epwe nonom remi meinisin lon Kraist Jesus. Amen.

Aruachön nöün Paulus Toropwe ngeni ekewe Souläng lon Korint

Kapas akom

I. Chon makkei ei toropwe: Ewe soukünü Paulus.

II. A mak ngeni iö: Ngeni ekewe souläng lon Korint.

III. Itelapemongen ei toropwe: Usun än Paulus mochen awesi ewe osukosuk lon ewe mwichefel lon Korint.

IV. Kapas aü^{chean} ewe toropwe: Än Kot ümöömöch a lingela lon ach apwangapwang.

V. Masouen ei toropwe: Aruachön nöün Paulus toropwe ngeni ekewe souläng lon Korint a mak lon eu fansoun a fis osukosuk lefilan me chon ewe mwichefel lon Korint. Ekoch chon ewe mwichefel ra pöchökül le ü ngeni Paulus. Nge Paulus a pwärätä an ekinlonei an epwe wor chäfengen lefiler o pwäri an watten pwapwa lupwen a fis.

Lon aeuin kinikinin ewe toropwe Paulus a awewei usun an chiechifengen me chon ewe mwichefel lon Korint. A awewei popun an pölüeni fän pöchökül ekewe kapasen esit me kapasen ü ngeni seni chon ewe mwichefel. A pwal pwärätä an pwapwa pwe an kapas pöchökül a afisätä ekiexefäl me chäsefäl. Mürin a tüngor ngeni chon ewe mwichefel pwe repwe kichiöch le asor fän iten ekewe souläng mi mwelele lon Jutea. Iwe, lon ekewe sopolan sopun lon ei toropwe Paulus a peni an angangen soukünü ren an pölüeni ekoch aramas lon Korint mi püsin seikiiretä pwe ir soukünü mi pwüing, nge ra atipisi Paulus pwe i eman soukünü mi chofona.

VI. Tettelin masouen ei toropwe:

Kapas akom 1.1-11

Paulus me chon ewe mwichefel lon Korint 1.12–7.16

Usun ewe asor fän iten ekewe souläng lon Jutea 8.1–9.15

Än Paulus peni an pwüing pwe i eman soukünü 10.1–13.10

Kapasen lesopolan 13.11-14

Kapong

1.1-2

¹ Ngang Paulus, eman nöün Kraist Jesus soukünü ren letipen Kot, pwal pwiich ei Timoty, aia kapong ngeni chon ewe mwichefel lon Korint, pwal ngeni ekewe chon pin meinisin lon unusen ewe fanü Akaia. ² Samach Kot me ach Samol Jesus Kraist epwe ngenikemi ümöömöch me kinamwe.

Paulus a pwärätä an kilisou ngeni Kot

1.3-11

³ Sipwe mwareiti Kot i Semen ach Samol Jesus Kraist, ewe Sam mi eäni tong me ewe Kot mi echipakich lon mettoch meinisin. ⁴ A akachipakich lon ach riaföü meinisin, pwe pwal kich sipwe tongeni echipa chokewe mi nom lon sokopaten riaföü meinisin ren ewe chip sia püsin angei me ren Kot. ⁵ Pun usun sia eti Kraist lon an kewe riaföü mi chomong, ina usun sia pwal angei ewe chip mi lapalap me ren Kraist. ⁶ Are aia küna riaföü, a fis ämi chip me manau ren. Nge are aia küna chip, a pwal fis ämi chip mi pwä lupwen oua mosonotam o engila lon ekewe chök riaföü

äm aia fen tolong lon. ⁷ Iwe, äm apilükülüköch fänäsengesimi a fokun nükücharala, pun aia silei, pwe usun oua etikem lon äm riaföü, ina usun oupwe pwal etikem lon äm küna chip.

⁸ Ämi pwii kana, aia mochen achema ngenikemi usun ekewe riaföü mi torikem lon ewe fanü Asia. Äm aia nom fän watten me choun ekewe weires mi lap seni äm tongeni, pwe aia apilükingau ngeni äm aipwe chüen manau. ⁹ Aia fokun mefi pwe aipwele mäla. Nge ei a fis, pwe äm aisap anomu äm apilükülük won püsin äm, pwe won Kot echök mi amanauasefäli ekewe mi mäla. ¹⁰ I a angasakem seni ekewe feiengauen mäla, i epwe pwal fokun angasakem. Äm aia anomu äm apilükülük won, pwe epwe sopwela le angasakem, ¹¹ ika ämi oua alisikem lon ämi iotek. Iwe, epwe iei usun pwe ekewe chomong iotek fän item epwe pwönüetä o Kot epwe afeiöchükem, mürin chomong repwe kilisou ngeni fän item.

Paulus a awewei popun an siwili akoten an sai

1.12–2.4

¹² Iwe, iei met aia aingaing won, pwe mwelien letipem a pwäri ngenikem pwe manauem won ei fanüfan, pwal fokun äm chiechifengen me ämi a fis fän let me wenechar mi feito seni Kot. Äm aia föri iei usun, sap fän tipachemen fanüfan, nge fän än Kot ümömöch. ¹³ Äm aia chök mak ngenikemi met oua tongeni aleani o wewe ren. Iwe, üa apilükülük, ¹⁴ pwe usun oua wewetikem eu kinikin chök, iei usun oupwe unusen weweti, pwe oua tongeni aingaing wom usun chök pwal äm aipwe aingaing womi lon ewe Ränin ach Samol Jesus.

¹⁵ Pokiten üa apilükülükü ei, üa akota ai üpwe akomwen churikemi, pwe oupwe küna feiöch fän ruu. ¹⁶ Üa fen akota ai üpwe churikemi lon ai sai ngeni Masetonia, pwal lupwen üpwe liwinsefäli ngenikemi seni Masetonia. Mürin oupwe tongeni alisie lon ai sai ngeni Jutea. ✧ ¹⁷ Lupwen üa akota ei, ifa usun üa siwilikisi ai ekiek, nge esap wor popun? Ika üa föri ai akot lon ekiekin fanüfan, pwe üpwe apasa “Ewer, ewer,” pwal “Apw, apw” lon eu chök otun? ¹⁸ Nge usun Kot a erletin allükülük, ai pwon ngenikemi esap “Ewer” me “Apw”. ¹⁹ Pun Jesus Kraist ewe Nöün Kot, äm me Silas me Timoty aia afalafala leimi, i sap eman mi apasa, “Ewer” me “Apw” lon eu chök otun, nge lon i Kot a apasa “Ewer” iteiten fansoun. ✧ ²⁰ Pun än Kot kewe pwon meinisin ra pwönüetä lon Kraist. Iei popun ren Jesus Kraist sia apasa “Amen”, pwe Kot epwe ling ren. ²¹ Iwe, püsin Kot a anükücharakem me ämi lon Kraist. I a aflilikich ²² o pwaunikich pwe sipwe nöün. A fangelong lon lelukach Ngünün pwe allükülükün mettoch meinisin mine a molotä fän itach.

²³ Ngang üa köri Kot pwe nei chon pwärätä, i a silei letipei. Iwe, üsap mochen aweiresikemi, iei mine üsap chüen ekiekin feila Korint. ²⁴ Äm aisap mochen pese ngenikemi met oupwe lükü, pun oua nüküchar lon ämi lükülük. Nge sia chök angangfengen fänäsengesin ämi pwapwa.

2

¹ Iei mine üa ekiekietä pwe üsap chüen liwinsefälitikemi, pun üsap mochen oupwe letipeta. ² Pun are üpwe föri pwe oupwe letipeta, iö chök epwe chüen echipaei, nge chokewe chök ra küna letipeta rei? ³ Iei popun üa makkei ena toropwe ngenikemi, pun üsap mochen feila remi o küna

letipeta ren chokewe ürürün pwe repwe apwapwaei. Pun üa mefi, pwe lupwen ngang üa pwapwa, pwal ämi meinisin oupwe pwapwa. ⁴ Pun üa mak ngenikemi fän watten weires me riaföün letipei, pwal fän watten chönün mesei. Üsap mochen pwe oupwe küna letipeta, nge üa mochen pwe oupwe mefi alololun ewe chen üa eäni ngenikemi meinisin.

Usun ach sipwe amusala tipisin aramas

2.5-11

⁵ Iwe, are eman a afisätä än eman letipeta, esap föri ngenieie, nge a föri ngenikemi meinisin, ika ngeni ekoch me leimi. Üa apasa ei, pun üsap mochen pöchökül ngeni ätewe mi föri ei sokun föför. ⁶ A naf fän iten ei aramas pwe a küna apwüng lon ei ükükün me ren chomong leimi. ⁷ Nge iei oupwe amusala tipisin ätewe o echipa letipan, pwe esap tolong lon letipeta mi fokun watte, pwe epwe fangatä an souläng. ⁸ Iei mine üa tüngor ngenikemi ämi oupwe asile ngeni pwe oua wesewesen tongei. ⁹ Iei popun üa makkei ngenikemi ena toropwe, pun üa mochen sotunikemi, pwe üpwe silei are oua aleasochisieie lon mettoch meinisin. ¹⁰ Lupwen oua amusala tipisin eman ren met a föri, ngang üa pwal amusala an tipis. Pun are mi wor och mine üpwe amusala won, ngang üa amusala fänäsengesimi mwen mesen Kraist. ¹¹ Üa föri ei, pwe esap wor än Satan nemenem woch, pun sia silei an ekiek.

Usun än Paulus ekichou me lon Troas

2.12-13

¹² Iwe, lupwen üa tori Troas pwe üpwe afalafala ewe Pworausen Manau usun Kraist, üa küna pwe ach Samol a suki eu asam ngenieie fän iten ewe angang. ¹³ Nge letipeie esap kinamwe, pun üsap küna pwii we Titus. Iei mine üa kapong ngeni ekewe aramas ikenan o feila Masetonia.

☆

Ach win ren Kraist

2.14-17

¹⁴ Nge kilisou ngeni Kot! Pun lon Kraist Kot a emwenikich fansoun meinisin, pwe sipwe eti Kraist lon an win. Kot a nöünökich, pwe sipwe achöfetaleie ewe pworaus usun Kraist pwe aramas repwe silei i, usun och löpwokus mi pwopwonfeil. ¹⁵ Pun sia usun chök och pwokusun Kraist ngeni Kot, a pwopwonfeil lein chokewe mi küna manau, pwal lein chokewe mi pöütmwälila. ¹⁶ Iwe, ngeni chokewe mi pöütmwälila, iei eu pwokus mi afisätä mäla, nge ngeni chokewe mi küna manau, iei eu pwokus mi atoto manau. Iwe, iö a lipwäköch ngeni ei sokun angang? ¹⁷ Äm aisap usun ekewe chomong aramas ra aea än Kot kapas minen amömö fän iten ar repwe kütta win. Nge pokiten Kot a tinikem, äm aia kapas fän wenechar mwen mesan usun nöün Kraist chon angang.

3

Chon angangen ewe pwon mi fö

3.1-18

¹ Ifa usun, oua ekieki pwe aia püsin sikäsiniem? Ika epwe lomot ngenikem äm aipwe uwala remi ika tüngor senikemi toropwen allükülük usun ekoch ra föri? ² Püsin ämi nöüm toropwen allükülük, a mak won letipem, pwe aramas repwe tongeni silei o aleani. ³ A fat pwe püsin Kraist a makkei ei toropwe o tinato rech. Esap mak ren ink, nge ren Ngünün

ewe Kot mi manau, esap mak won fau mi chöpöp, nge a mak won letipen aramas. ✧

⁴ Aia apasa ei, pun a wor äm apilükülük won Kot ren Kraist. ⁵ Esap wor och rem äm aipwe tongeni apasa, pwe a wor äm lipwäköch le föri ei angang, pwe äm lipwäköch a pop seni Kot. ⁶ I ewe mi alipwäköchükem äm aipwe chon angang ngeni ewe pwon mi fö. Ei pwon esap fis ren allük mi mak, nge a fis ren Ngünmifel, pun ewe allük mi mak a afisätä mäla, nge ewe Ngünmifel a ngenikich manau. ✧

⁷ Ekewe Allük ra rup ren mesen mak won ekewe fau mi chöpöp o än Kot ling a pwä lupwen a tori aramas. Inamwo ika saramaramen won mesen Moses a kisikisila, nge a fokun saram pwe ekewe chon Israel resap tongeni nenengeni won mesan. Ika ekewe Allük mi afisätä mäla ra toriir lon ena sokun ling, ✧ ⁸ epwe fen ifan me watten ewe ling lon angangen ewe Ngünmifel? ⁹ Are ewe angang mi atoto liwiningau ngeni aramas a ling, epwe fen ifan me watten ewe ling mi atoto ach pwüing? ¹⁰ Pun mine a ling me lom, esap chüen ling ikenai, are sia awewe ngeni ewe ling mi fokun lapalap. ¹¹ Are a wor ling lon ewe pwonon lom mi chök nom ekis chök fansoun, epwe fen ifan me watten ewe ling lon ewe pwon mi fö mi nonom tori feilfeilachök!

¹² Pokiten mi wor rem ei sokun apilükülük, äm aia pwora le kapas. ¹³ Aisap wewe ngeni Moses mi pwölüela won mesan ren echö mangaku, pwe ekewe chon Israel resap tongeni küna pwe ewe ling a kisikisila o wesila. ✧ ¹⁴ Nge letiper a kopüngüla, tori ikenai ekiengin letiper a pwölüla ren ewe chök pwölüpwöl, lupwen ra aleani ekewe puken ewe pwonon lom. Ewe pwölüpwöl a särifila ren Kraist chök. ¹⁵ Tori mwo nge ikenai, iteitin fansoun ar aleani än Moses kewe Allük, ewe pwölüpwöl a chüen pwölüela ekiengin letiper. ¹⁶ Nge ewe pwölüpwöl a särifila, lupwen eman aramas a kul ngeni ach Samol. ✧ ¹⁷ Iwe, ach Samol, i ewe Ngün, nge ia Ngünün ach Samol a nom ie, ikenan a wor ngasala. ¹⁸ Nge kich meinisin esap pwölüpwöl won mesach, sia nenengeni lingen ach Samol o lingela ren. A awilikich ngeni eu ling tori pwal eu ling, tori sipwe fokun wewe ngeni i lon ususun. Ei a pop seni ach Samol, i ewe Ngünmifel.

4

Ekewe Feiöchün Ngün lon ekewe sepi mi för seni pwül

4.1-15

¹ Iwe, pokiten än Kot tong a atolongakem lon ei angang, iei mine aisap apilükingau. ² Nge aia pöütala ekewe föför meinisin mi monomon me ekewe föför mi asäw. Aisap föri föförün atuputup, aisap pwal amwäli än Kot kapas. Nge aia pwärätä mine a let mwen mesen Kot o sotuni äm aipwe aitöchükem ngeni ekiengin aramas meinisin. ³ Pun are ewe Pworausen Manau äm aia afalafala a monomonola, a chök monomonola ngeni chokewe mi pöütmwälila. ⁴ Ewe koten ei fanüfan a achuna ekiengin letipen chokewe resap lükü, pwe resap tongeni küna saramen ewe Pworausen Manau usun ewe lingen Kraist, i ewe mi lapalapeni lapalapen Kot. ⁵ Pun aisap afalafal usun püsin äm, nge aia afalafal usun Jesus Kraist, pwe i Samol, nge aia nöümi chon angang fän iten Kraist. ⁶ Pun Kot, ewe mi apasa, “Saram epwe tinewu seni lon rochopwak”, i

✧ **3:3:** Eks 24.12; Jer 31.33; Is 11.19; 36.26 ✧ **3:6:** Jer 31.31 ✧ **3:7:** Eks 34.29 ✧ **3:13:** Eks 34.33 ✧ **3:16:** Eks 34.34

chök ewe Kot mi asarama letipem o ngenikem ewe saram, pwe aipwe silei usun än Kot we ling mi pwä won mesen Kraist. ✧

⁷ Nge a wor rem ei feiöch mi aüchea lon sepi mi för seni pwül, pwe epwe pwä pwe ei tufich mi somwola a pop seni Kot, nge esap pop senikem. ⁸ Fän chomong aia küna riaföü, nge aisap fangatä. Fän ekoch aia tipemwaramwar, nge aisap apilükingau. ⁹ Aia küna ninni, nge aisap küna tamepich, aia kufula, nge aisap feiengau. ¹⁰ Fansoun meinisin aia uwoufeili än Jesus mäla lon inisim, pwe än Jesus manau epwe pwal pwä lon inisim. ¹¹ Pun lon unusen manauem aia nonom lon feiengauen mäla fansoun meinisin fän iten Jesus, pwe manauen Jesus epwe pwä lon inisim inisin mäla. ¹² Iei usun mäla a angang lom, nge manau a angang lomi.

¹³ A mak lon ekewe Toropwe mi Pin, “Üa lükü, iei mine üa kapas.” Ren ena chök ngünün lükülük äm aia pwal lükü, iei mine aia kapas. ✧

¹⁴ Äm aia silei, pwe Kot ewe mi amanauasefäli ach Samol Jesus, epwe pwal amanauasefälikem fiti Jesus o uweikeemila me ämi mwen mesan. ¹⁵ Ekei mettoch meinisin ra fis ngenikem fän itemi, pwe än Kot ümömöch mi tori chomong, chomong aramas epwe afisätä ar iotekin kilisou mi urourela, pwe Kot epwe ling ren.

Manau ren lükülük
4.16–5.10

¹⁶ Iei mine sisap apilükingau. Inamwo ika inisich a apwangapwangala o mäla, nge manauen ngünüch a söföla rän me rän. ¹⁷ A müchükai ach riaföü, a pwal pal, nge epwe atoto ngenikich eu watten ling esemüch a fokun lapalap seni ekei riaföü. ¹⁸ Pun sisap afota mesach won ekewe mettoch sia tongeni küna, nge sia afota mesach won ekewe mettoch sisap tongeni küna. Pun ekewe mettoch sia tongeni küna repwe müchüla, nge ekewe mettoch sisap tongeni küna repwe nonom tori feilfeilachök.

5

¹ Pun sia silei, pwe lupwen imwach imwen siamü sia nom lon, wewen inisich won ei fanüfan, epwe tala, mi wor imwach me ren Kot, imwach imwen wilipos mi nom läng tori feilfeilachök, esap förien aramas. ² Nge iei sia ngüngü lon ach pwos, pun sia mochen pwe sipwe tolong lon imwach mi nom läng. ³ Pun lupwen sia tolong lon, esap pwäla selesan ngünüch. ⁴ Iwe, lupwen sia nom lon imwach imwen siamü, sia ngüngü fän ach weires. Esap wewen pwe sia mochen towu seni inisich me fanüfan, nge sia mochen pwe inisich me läng epwe pwilipwil woch, pwe mine a mämmä epwe wili ngeni manau. ⁵ Iwe, Kot ewe mi amolakich ngeni ei sokun siwil, i a ngenikich Ngünün pwe allükülükün mettoch meinisin a amolätä fän itach.

⁶ Iei mine fansoun meinisin sia fokun apilükülük o silei, pwe lupwen sia nom lon inisich me fanüfan, sia toau seni lenien ach Samol. ⁷ Pun sia manau lon lükülük, nge sap lon met sia küna. ⁸ Sia fokun apilükülüköch o sia fokun mochen ach sipwe towu seni inisich o feila pwe sipwe nom ren ach Samol. ⁹ Iei mine sia fokun mochen apwapwai i, ese lifliful ika sia nom lon inisich me ikei, ika lon inisich me läng. ¹⁰ Pun kich meinisin sipwe ütä me mwen Kraist, pwe i epwe apwüngükich. Eman me eman

epwe angei en me liwinin an föfö a föri lon manauan, liwinin föfö mürina, ika liwinin föfö mi ngau. ✧

Ewe angangen chäfengen

5.11-21

¹¹ Äm aia silei usun ach niuokusiti ach Samol, iei mine aia sotuni le pese ngeni aramas ar repwe etiwa ewe Pworausen Manau. Kot a wesewesen silekem, nge ngang üa apilükülüköch pwe ämi oua pwal sileei lon letipemi. ¹² Äm aisap mochen sotunisefäli le allükülükü püsin äm ngenikemi, nge aia mochen ngenikemi och popun mi mürina pwe oupwe sikäsinikem, pwe oupwe tongeni pölüeni chokewe mi sikesik won met ra küna ren lapalapen eman aramas me lükün, nge esap met a nom lon letipan. ¹³ Oua ekieki pwe äm mi umwes? Ika äm mi umwes, iwe, epwe fänäsengesin Kot. Nge pwüngün pwe aia mirit. Ren ei oua küna feiöch. ¹⁴ Sia nom fän nemenien än Kraist we chen ngenikich, pun sia silei pwe eman aramas a mäla fän iten aramas meinisin, iei mine ir meinisin ra eti lon an mäla. ¹⁵ A mäla fän iten aramas meinisin, pwe chokewe mi manau resap chüen manau fän püsin iter, nge repwe chök manau fän iten ewe mi mäla o manusefäl fän iter.

¹⁶ Seni ei fansoun sisap chüen ekieki och mettoch usun eman aramas lon pekin fituk. Inamwo ika sia ekieki usun Kraist lon pekin fituk me mwan, nge iei sisap chüen ekieki usun ei. ¹⁷ Iei mine are eman a nonom lon Kraist, i eman förien Kot mi fö. Ewe manauen lom a wes, nge eu manau mi fö a fis. ¹⁸ Ekei mettoch meinisin ra pop seni Kot, i ewe mi achäfengenikich me i ren Kraist o ngenikich ewe angangen achächä. ¹⁹ Iei masouen ach afalafal, pwe Kot a nonom lon Kraist o achäsefäli chon fanüfan ngeni püsin i. Esap chüen chechemeni ar tipis, pwe a awisakich pwe sipwe afalafala ewe kapasen achächä. ²⁰ Iei mine äm aia chon arong fän iten Kraist usun itä nge Kot a nöünöü äm le tüngor ngenikemi. Äm aia tüngormau ngenikemi fän iten Kraist: Oupwe chäfengen me Kot. ²¹ Kraist esap wor an tipis, nge fän itach Kot a föri pwe i a tipisini tipisich, pwe kich sipwe küna pwüngün Kot lon i.

6

Angangen eman soukünö

6.1-13

¹ Iwe, lon äm angangfengen me Kot, aia tüngormau ngenikemi, pwe ousap alomotongauei än Kot ümöümöch oua angei. ² Pun iei met Kot a apasa,

“Lon fansoun fich üa aüselingok,

lon ränin küna manau üa alisuk.” Nengeni, ikenai fokun fansoun fich, nengeni, ikenai ränin küna manau! ✧

³ Äm aisap mochen än eman epwe küna och mwälin äm angang, iei mine aisap anomu ngeni eman och lenien chepetek. ⁴ Nge lon mettoch meinisin aia föri aia pwärätä pwe äm nöün Kot chon angang: Ren äm engila fän riaföü me weires me feiengau. ⁵ Ra wichikem, ra aturukeemilong lon imwen fötek, ra afitikoko ngenikem. Äm aia fokun angang weires, fän ekoch esap wor fansoun äm möür, aia pwal echik. ✧ ⁶ Aia pwärätä pwe äm nöün Kot chon angang ren limöch, silelap, mosonotam me kirikiröch,

ren ewe Ngünmifel, ren äm eäni chen enlet, ⁷ ren äm afalafala ewe kapas mi let pwal ren manamanen Kot. Aia eäni pwüing pisekin maun, pwal äm pisekin epet senikem feiengau. ⁸ Ekoch ra aitöchükem o ekoch ra aitengauakem, ekoch ra turunufaseikem o ekoch ra mwareitikem. Ra apasa pwe aia chon atuputup, nge äm aia apasatä kapas mi let. ⁹ Aramas resap silekem, nge aia sil me ren aramas lon ekewe leni meinisin. Aia wewe ngeni chon mäla, nge ngeni aia manau. Ra wichikem, nge resap nikeemila. ¹⁰ Aia letipeta, nge aia pwapwa fansoun meinisin. Aia usun itä nge chon wöüngau, nge aia awöüü chomong aramas. Aia usun itä nge aisap eäni och, nge aia wesewesen eäni mettoch meinisin.

¹¹ Ämi chiechiem kana mi achengicheng lon Korint! Aia kapas ngenikemi fän wenechar. Aia fokun suki letipem ngenikemi. ¹² Äm aisap apüngala letipem ngenikemi, nge ämi oua apüngala letipemi ngenikem. ¹³ Iei üa kapas ngenikemi usun itä nge ämi nei kana. Oupwe pwäri ngenikem ewe chök sokun memef äm aia eäni ngenikemi. Oupwe pwal fokun suki letipemi ngenikem!

Ousap chiechi ngeni chokewe resap lükü Kot

6.14–7.1

¹⁴ Ousap rifengenikemi me chokewe resap lükü Kot, ousap etiir lon ar angang. Pun ifa usun än pwüing me pwüingau epwe chufengen ren? Are meta saram epwe chiechi ngeni rochopwak ren? ¹⁵ Ifa usun än Kraist me Satan repwe tongeni tipeefengen? Ika met eman chon lükü Kot epwe eänifengeni me eman esap lükü? ¹⁶ Ifa usun, än Kot imwenfel me uluulun anümwäl ra tongeni nonomfengen? Pun kich än ewe Kot mi manau imwenfel. Usun Kot a apasa,
“Üpwe nonom rer o fetalfeil lefiler.

Ngang üpwe ar Kot, nge ir repwe nei aramas.” ✧ ¹⁷ Iei mine ach Samol a apasa,

“Oupwe towu seniir o aimwükemiila seniir.

Ousap atapa och mettoch mi limengau, pwe üpwe etiwakemi. ✧

¹⁸ Ngang üpwe sememi,

Nge ämi oupwe nei mwän me nei fefin,

iei alon ewe Samol mi Unusen Manaman.” ✧

7

¹ Ämi chiechiei kana mi achengicheng, Kot a fen ngenikich ekei kapasen pwon meinisin, iei mine sipwe püsin limetikich seni sokun limengauen inis me ngün, o sipwe manaueni eu manau mi unusen pin lon ach niuokusiti Kot.

Än Paulus pwapwa

7.2-16

² Oupwe suki letipemi ngenikem. Äm aisap föri och mi mwäl ngeni eman, aisap afeiengaua eman are atupu eman. ³ Üsap apasa ei ren ai üpwe apwüngükemi, pun üa fen apasa me mwan pwe aia echenikemi, pwe sia nonomfengen fansoun meinisin, ese liflifil ika sia manau ika sia mäla. ⁴ A fokun watte ai apilükülükükemi, üa fokun sikäsiniikemi. Lon äm riaföü meinisin ngang üa chüen apilükülüköch, a fokun somwola ai pwapwa.

✧ **6:16:** Lif 26.12; Is 37.27; 1.Kor 3.16; 6.19 ✧ **6:17:** Ais 52.11 ✧ **6:18:** 2.Sam 7.14; 1.Kron 17.13; Ais 43.6; Jer 31.9

⁵ Pun lupwen aia tori Masetonia, esap wor äm asösö, nge aia tolong lon riaföü fansoun meinisin. Ekoch aramas ra anini ngenikem, o niuokus a wor lon letipem. ✧ ⁶ Nge Kot, ewe mi echipa chokewe mi tipetekison, a echipakem ren wareton Titus. ⁷ Nge aisap chök chip ren an feito, pwe aia pwal chip ren an apworaus a ngenikem usun ämi echipa i. A apworaus a ngenikem usun ämi pwositiei, usun ämi letipeta, pwal usun ämi tiliken le peniei. Iei mine a lapalap ai pwapwa lon ei fansoun.

⁸ Pun inamwo ika nei we toropwe a afisätä ämi letipeta, üsap liamam usun mine üa makkei lon. Ngang üpwe tongeni liamam lupwen üa küna pwe masouen nei we toropwe a afisätä ämi letipeta lon ekis chök fansoun. ⁹ Nge iei üa pwapwa, sap pokiten üa afisätä ämi letipeta, nge pokiten ämi letipeta a afisätä ämi ekiexefäl. Ei sokun letipeta oua nom lon a fis ren letipen Kot, iei mine äm aisap atoto feiengau womi. ¹⁰ Pun ewe letipeta me ren Kot a atoto ekiexefäl mi emweni ngenikich ach sipwe küna manau, nge esap wor liamam lon. Nge ewe letipeta me ren fanüfan a atoto mäla. ¹¹ Oupwe nenengeni met Kot a föri ren ämi letipeta: A afisätä ämi achocho pwal ämi mochen alletätä pwe esap wor ämi tipis. A afisätä ämi song, ämi niuokus, ämi pwos, ämi tiliken me ämi mochen apwüngü mine a ngau. Ren ekei mettoch meinisin oua pwärätä pwe esap wor och mwäl remi. ¹² Iwe, inamwo ika üa makkei ngenikemi ena toropwe, üsap mak fän iten ätewe mi föri mine a mwäl, ika ätewe mi weires ren ewe mwäl, nge üa makkei ai üpwe afata ngenikemi pwe Kot a silei pwe oua fokun chüngükem. ¹³ Iei popun äm aia apilükülüköch.

Nge äm aisap chök apilükülüköch, aia pwal fokun pwapwa pokiten än Titus pwapwa, pun ämi meinisin oua alisi i pwe epwe chip. ¹⁴ Ngang üa sikäsiniemi ngeni Titus, o ämi ousap alichipüngüei. Äm aia kapas let ngenikemi fansoun meinisin, ina chök usun äm sikäsiniemi ngeni Titus a pwä pwe a let. ¹⁵ Iwe, än Titus tongekemi a fokun lalapala, lupwen a chechemeni usun ämi meinisin oua aleasochis ngeni an kewe öüröür, pwal usun ämi etiwa i fän tipetekison me menin. ¹⁶ Üa fokun pwapwa pwe üa tongeni apilükülükükemi lon mettoch meinisin.

8

Usun än souläng lifang

8.1-15

¹ Ämi pwiich kana souläng, aia mochen ämi oupwe silei usun mine a fis lon ekewe mwichefel lon Masetonia ren än Kot ümöümöch. ² Ra küna watten sosot ren ekewe riaföü a toriir. Nge ar pwapwa a fokun lapalap, pwe ra fokun fangafangöch lon ar lifang, inamwo ika ra fokun wöüngau. ³ Üa pwäri ngenikemi, pwe ra lifang won ükükün ar tongeni, nge pwal lap seni ar tongeni. Seni püsin mochenin letiper ⁴ ra fokun tütüngor ngenikem, pwe repwe pachelong lon ewe angangen alilis fän iten ekewe chon pin lon Jutea. ✧ ⁵ Iwe, ei alilis a fen lap seni mine aia tongeni apilükülükü. Akomwan ra fangala püsin manauer ngeni ach Samol, nge mürin ra pwal fangala püsin ir ngenikem ren letipen Kot. ⁶ Iei mine aia pesei Titus, ätewe mi popuetä ei angang, pwe epwe sopwela o alisikemi, pwe oupwe awesala ei angang mi fis fän tong. ⁷ Ämi oua fokun pisekisekila lon mettoch meinisin: lon ämi lükü Kraist, lon ämi silei

kapas, lon ämi silelap, lon ämi achocho le alilis, pwal lon ämi tongekem. Iei mine sia mochen pwe oupwe pwal fangafangöch lon ei angang mi fis fän tong.

⁸ Üsap mochen allük ngenikemi ren ekei kapas. Nge ren ai aiti ngenikemi usun än ekewe pwal ekoch achocho le alilis, üa sotuni ai üpwe küna enletin ämi chen. ⁹ Pun oua silei ewe ümöümöch än ach Samol Jesus Kraist, inamwo ika a pisekisekila, nge a wöüngauela fän itemi, pwe ämi oupwe pisekisekila ren an wöüngaue.

¹⁰ Iwe, iei ai öüröür ngenikemi won ei angangen alilis: A mürina ngenikemi, pwe oupwe awesala iei met oua popuetäni lon ewe ier a la. Ousap chök akom le föri ewe alilis, nge oua pwal tipeeu ngeni le föri. ¹¹ Iei mine oupwe sopwela o awesala ewe angang. Oupwe achocho ngeni an epwe wesila, usun oua fen amolätä lon ämi akot. Oupwe lifang won ükükün met mi wor remi. ¹² Pun are a wor remi ewe mochen lifang, Kot epwe etiwa ämi lifang won ükükün met oua tongeni, sap won ükükün met ousap tongeni.

¹³ Ngang üsap mochen pwe ekoch repwe mecheres, nge ämi oupwe weires, nge üa mochen pwe ämi oupwe wewefengen. ¹⁴ Pun lon fansoun ikenai somwen wöümi epwe alisi met ra osupwang ren, pwe lupwen epwe tori ämi osupwang, ir repwe alisikemi ren somwen wöür. Iwe, iei usun ämi meinisin oupwe wewefengen. ¹⁵ Pun a mak lon ekewe Toropwe mi Pin, “Tó a ioni chomong esap wor somwan, nge iö a ioni kükün esap nafangau.” ✧

Titus me chianan kana
8.16-24

¹⁶ Iwe, aia kilisou ngeni Kot ren an atolonga lon letipen Titus pwe epwe achocho le alisikemi usun chök pwal am. ¹⁷ Titus esap chök etiwa am tünigor, nge a pwal fokun achocho an epwe alisikemi, pwe a püsin filätä seni mochenin letipan pwe epwe feila remi. ¹⁸ Aia pwal tinala eman pwiich pwe epwe eti Titus, i eman mi iteföüla lon ekewe mwichefel meinisin fän iten an angangen afalafala ewe Pworausen Manau. ¹⁹ Sap iei chök, nge a pwal fil me ren chon ekewe mwichefel pwe epwe etikem lon am sai. Epwe alisikem le tümwünü ei alilis aia ionifengeni, pwe ach Samol Jesus Kraist epwe ling ren, epwe pwal pwä pwe aia achocho le alisi ekewe souläng mi osupwang.

²⁰ Äm aia püsin afälikem, pwe esap wor eman epwe tongeni atipisikem ren lapalapan am tümwünü ei lifang mi watte. ²¹ Pun aia fokun ekiekin föri met mi pwüng, sap chök me mwen mesen ach Samol, nge pwal me mwen mesen aramas meinisin. ✧

²² Aia pwal tinala pwiich we pwe epwe etiir. Aia sotuni i fän chomong o küna pwe a fokun achocho le alilis fansoun meinisin. Nge iei a fen alapala an achocho, pun a fokun apilükülükükemi. ²³ Iwe, ren Titus, i chiechiei mi etiei lon ai angangen alisikemi. Nge ren pwiich kewe ekoch mi eti Titus, ir ra tupuni ekewe mwichefel o alinga Kraist. ²⁴ Iei mine oupwe pwäri ngeni ekei mwän leten ämi chen, pwe chon ekewe mwichefel meinisin repwe küna o silei pwe a pwüng am sikäsiniemi.

9

*Souläng repwe alisi chiechier souläng**9.1-15*

¹ Iwe, esap wor lomoten ai üpwe mak ngenikemi usun ewe alilis epwe titila ngeni ekewe chon pin lon Jutea. ² Üa silei pwe oua fokun mochen alilis o üa sikäsini-kemi ngeni ekewe souläng lon Masetonia. Üa apasa ngeniir, pwe chiechiach kewe souläng lon Akaia ra fen molotä seni lon ewe ier a la ar repwe alilis. Iwe, chomong me leir ra lolloletä ren ämi achocho. ³ Iei üpwe tinala remi pwiich kei, pwe epwe pwä pwe äm sikäsini-kemi usun ei mettoch esap kapas pön chök. Nge ämi oupwe molotä ngeni ämi alilis usun üa fen apasa. ⁴ Pun are ekewe souläng seni Masetonia repwe etiei o künakemi pwe oua molongau, äm aipwe fokun säw pokiten äm apilükülükükemi, nge ämi oupwe pwal säw. ⁵ Iei mine üa ekieki, pwe a lomot ai üpwe pesei pwiich kei, pwe repwe akomwola remi pwe repwe akomwen amolätä ewe lifang oua pwon pwe oupwe föri. Mürin epwe molotä lupwen ngang üpwe torikemi. Iwe, epwe pwä pwe oua fang seni mochenin letipemi, nge sap seni än eman pese ngenikemi.

⁶ Oupwe chechemeni, pwe are fotan eman a üküküngau, kinian epwe pwal üküküngau, nge are fotan eman a somwosomwöch, kinian epwe pwal somwosomwöch. ⁷ Oupwe fang en me usun miefien letipan. Ousap fangürüfituk ika fang fän echimw. Pun Kot a echeni eman mi pwapwa le lifang. ⁸ Iwe, Kot a tufichin fang ngenikemi sokopaten feiöch mi somwola, pwe fansoun meinisin epwe naf ngenikemi mettoch meinisin fän püsin itemi, epwe pwal somwola ämi pisekisek, pwe oupwe tongeni föri sokun föföör mürina meinisin. ⁹ Pun iei usun mine a mak lon ekewe Toropwe mi Pin,

“A fangafangöch ngeni ekewe chon wöüngau,

an kirikiröch epwe nonom tori feilfeilachök.” ✧ ¹⁰ Iwe, Kot mi awora pwükil fän iten ewe chon fofot, pwal föri pwe epwe wor mongö, i epwe pwal awora ngenikemi ekewe pwükil meinisin oua tongeni fotuki, epwe pwal amäriiretä, pwe epwe wor räs watte ngenikemi ren ämi fangafangöch. ✧ ¹¹ Kot epwe apisekisekikemi lon mettoch meinisin, pwe oupwe tongeni fangafangöch fansoun meinisin. Iwe, chomong aramas repwe kilisou ngeni Kot fän iten ämi lifang repwe angei senikemi. ¹² Pun ei angangen alilis oua föri esap chök awesi än ekewe chon pin osupwang, nge a pwal efisätä pwe chomong aramas repwe iotekin kilisou ngeni Kot ren. ¹³ Iwe, pokiten a pwä allükülükün ämi angangen alilis, chomong aramas repwe mwareiti Kot fän iten ämi aleasochis ngeni ewe Pworausen Manau usun Kraist ämi oua pwärätä, pwal fän iten ämi fangafangöch lon ämi alilis ngeniir pwal ngeni aramas meinisin. ¹⁴ Iwe, fän watten ar tongekemi, repwe iotek fänäsengesimi, pokiten ewe ümöümöch mi fokun lapalap Kot a ngenikemi. ¹⁵ Ousipwe kilisou ngeni Kot ren an we lifang ngenikich, esap tufich ach sipwe awewei lon ach kapas.

10

¹ Iwe, püsin ngang Paulus üa tüngormau ngenikemi, ngang ätewe aramas ra apasa pwe üa tekison lupwen üa nom remi, nge üa kapas pöchökül

lupwen üa toau senikemi. Ren än Kraist tekison me kirikiröch² üa tüngr ngenikemi, pwe ousap peseei ai üpwe kapas pöchökül ngenikemi, lupwen üpwe feila remi. Üa silei pwe üpwe tongeni eäni kapas pöchökül ngeni chokewe mi apasa pwe aia chök föri föförün fanüfan. ³ Mi pwüng pwe aia nom lon ei fanüfan, nge aisap maun lon lapalapan fanüfan. ⁴ Ekewe pisekin maun aia aea le maun sap pisekin ei fanüfan, nge pisekin Kot mi manaman, aia aea le atai ekewe lenien pöchökül. ⁵ Äm aia awesi ekewe kapas mi mwäl o ataetiu ekewe leni mi tekia meinisini mi epeti än aramas repwe silei Kot. Aia liapeni sokun ekiekin aramas meinisini, pwe repwe aleasochis ngeni Kraist. ⁶ Nge mürin ämi alletätä unusen ämi aleasochis, äm aia molotä ngeni äm aipwe apwüngü chokewe meinisini mi aleasolap.

⁷ Ämi oua chök nenengeni met a pwä me lükün. Are mi wor eman a ekieki pwe i nöün Kraist, i epwe ekiekisefäli usun püsin i, pun pwal äm nöün Kraist usun chök i. ⁸ Pun ngang üsap säw, inamwo ika a kon lap ai aingaing won ewe manaman ach Samol a ngenikem pwe aipwe aea le apöchöküla manauen ämi souläng, nge sap fän iten aipwe aea le atai ämi souläng. ⁹ Üsap mochen pwe oupwe ekieki pwe üa mochen aniuokusukemi ren nei kewe toropwe. ¹⁰ Pun ekoch aramas ra apasa, “Kapasen nöün Paulus kewe toropwe ra ken o pöchökül, nge lupwen a püsin nom rech a apwangapwang o an kewe kapas ra aücheangau.” ¹¹ Ena sokun aramas repwe fokun weweiti pwe esap wor sokofesenin lefilen met aia makkei lon nöüm toropwe lupwen aia toau senikemi me met aia föri lupwen aia nonom remi.

¹² Ewer, aisap tongeni püsin atettelikem ika anönnöfengenikem me chokewe mi püsin aitöchüür. A ifan me watten umwesiir! Ra püsin föri och aükük pwe repwe maselong lon, mürin ra püsin aükü manauer ren. ¹³ Nge me rem, äm aingaing esap lu seni ewe aükük, epwe chök nom won aükükün ewe angang Kot a awisa ngenikem, a pwal pachelong äm angang leimi. ¹⁴ Pokiten ämi oua nom lon ei aükük, äm aisap lu seni lupwen aia feila remi o uwato ewe Pworausen Manau usun Kraist. ¹⁵ Iei mine aisap aingaing won ewe angang ekewe ekoch aramas ra föri mi lu seni ewe aükük Kot a awisa ngenikem. Nge aia apilükülükoch pwe ämi lükü epwe mämäritä, pwe aipwe tongeni föri lefilemi eu angang mi fokun watte, nge aipwe chök föri lon ewe aükük Kot a awisa ngenikem. ¹⁶ Mürin aia tongeni afalafala ewe Pworausen Manau lon pwal ekoch fanü pekilan fanüemi, nge aisap aingaing won och angang eman a fen föri lon ewe leni Kot a awisa ngeni. ¹⁷ Iei usun mine a mak lon ekewe Toropwe mi Pin, “Iö a mochen aingaing epwe fokun aingaing won ach Samol.” ✧ ¹⁸ Pun esap wor allükülükün än eman püsin aitöchü, nge iö ach Samol a aitöchü, ina i a iteüöch.

11

Paulus me ekewe soukünü chofona

11.1-15

¹ Amwo ämi oupwe songomang ngeniei, inamwo ika üa aloni alon eman esap mirit. Ouse mochen oupwe föri iei usun. ² Üa lukomong womi, usun chök Kot a lukomong womi. Ämi oua wewe ngeni eman föpwül mi limelimöch, üa pwon pwe epwe pwülüeni eman chök mwän, iei

i Kraist. ³ Nge ngang üa niuokus pwe usun ewe serepenit a atupu Efa ren an tipachemsolä, iei usun ämi ekiék epwe tokola seni ämi enletin echeni Kraist fän allükülük. ✱ ⁴ Pun ämi oua pwapwa ika eman a feito o afalafala ngenikemi usun eman Jesus mi sokola seni ewe eman aia fen afalafal usun, ika oua angei eman ngün mi sokola seni ewe ngün oua fen angei, ika oua pwal angei eu pworausen manau mi fokun sokola seni ewe aia aiti ngenikemi.

⁵ Üa ekiéki pwe üsap fokun kuf ren ätekewe oua aita ngeniir “soukünü mi lap”. ⁶ Inamwo ika ngang üsap angangöch le kapas, nge a fokun alolol ai silelap. Äm aia afata ei ngenikemi fansoun meinisin pwal lon mettoch meinisin.

⁷ Üa afalafala ngenikemi ewe Pworausen Manau seni Kot, nge ousap möni ngeniei och. Üa püsin atekisonaeitiu, pwe ämi oupwe tekiatä. Ifa usun, üa tipis ren ei? ⁸ Lupwen üa angang leimi, ekoch ekewe mwichefel ra tinato alilisi, pwe üpwe tongeni angang ngenikemi. Ren ei usun itä nge üa soläniir. ⁹ Lon fansoun üa nom remi, üsap aweiresikemi lupwen üa nom lon osupwang. Pun pwiich kewe mi feito seni Masetonia ra uwato meinisin met üa osupwang ren. Usun mine üa föri lon ekewe fansoun me mwan, iei usun üpwe pwal föri lon kan fansoun mwach: Üsap fokun aweiresikemi! ✱ ¹⁰ Pokiten än Kraist we let mi nom loi üa pwon pwe ai ei aingaing esap wor eman epwe äükätiu lon unusen ewe fanü Akaia. ¹¹ Ifa usun, üa apasa ei pokiten üsap echenikemi? Kot a silei pwe üa echenikemi!

¹² Iwe, ngang üpwe chök sopwela le föri mine üa föri iei, pun üa mochen pinei än ekewe pwal ekoch “soukünü” aingaing pwe ra föri ar angang usun chök äm. ¹³ Pun ekei mwän ir soukünü mi chofona, chon angang mi atuputup, ra siwili lapalaper usun itä nge ir wesewesen nöün Kraist soukünü. ¹⁴ Sisap mairü ren ei sokun föför, pun Satan a püsin siwili lapalapan usun itä nge i eman chon länjin saram! ¹⁵ Iei mine sisap mairü ren are nöün Satan chon angang ra siwili lapalaper pwe repwe usun itä nge ir chon angangen ewe Kot mi pwüing. Iwe, sopolan manauer repwe chök küna liwinin ar föför.

Paulus a aingaing won an küna riaföü

11.16-33

¹⁶ Iwe, üpwe aliwinisefäli mine üa apasa: Esap wor eman epwe ekiéki pwe üsap mirit. Nge are oua ekiéki pwe üsap mirit, oupwe chök etiwaiéi usun eman esap mirit, pwe epwe wor popun ai üpwe ekis aingaing. ¹⁷ Ewer, met üpwe apasa iei, esap iei met ach Samol a mochen üpwe apasa. Ren ei sokun aingaing üa wesewesen kapas usun eman esap mirit. ¹⁸ Nge pokiten a wor chomong mi aingaing won mettochun ei fanüfan, pwal ngang üpwe aingaing. ¹⁹ Püsin ämi oua fokun tipachem, iei mine oua songomang ngeni chokewe resap mirit! ²⁰ Ousap song ngeni chokewe mi nöünikemi amanau, ika chokewe mi ariaföüükemi, ika chokewe mi aliapakemi, ika chokewe mi lamalamtekia womi me chokewe mi pösapeikemi. ²¹ Ngang üa säw ai üpwe pwärätä pwe aia kon apwangapwang le föri ekei sokun föför!

Nge ngang üa aloni alon eman esap mirit. Are eman a pwora an epwe aingaing won och mettoch, ngang üpwe pwal pwora lon ai aingaing. ²² Ra

apasa pwe ir re Ipru, pwal ngang. Ra apasa pwe ir chon Israel, pwal ngang. Ra apasa pwe ir mwirimwirin Apraham, pwal ngang. ²³ Ra apasa pwe ir nöün Kraist chon angang. Üa aloni alon eman mi umwes, ngang eman nöün Kraist chon angang mi mürina seniir! Üa fokun angang weires lap seniir, üa nom lon imwen fötek lap seniir, üa angei wichiwich lap seniir, üa arap ngeni ar repwe nieila lap seniir. ✧ ²⁴ Lon limu fansoun ekewe chon Juta ra wichiei fän ilik me tiu. ✧ ²⁵ Fän ülüngat ekewe chon Rom ra wichiei, fän eu ra mone ngeniei fau. Fän ülüngat üa küna wata me le matau, fän eu üa ämmün le matau lon ükükün rüwe me rüanü awa. ✧ ²⁶ Lon ai saifeil fän chomong üa nom lon feiengauen puun chanpupu, pwal feiengau seni chon achomau, feiengau me ren aramasei ekewe chon Juta me feiengau me ren ekewe chon lükün Israel. A wor afeiengau lon ekewe telinimw, afeiengau lon fanüapö, afeiengau me le matau, pwal afeiengau seni ekewe souläng chofona. ✧ ²⁷ Mi wor ai angang weires, fän chomong üsap möür. Üa echik me kaka, fän chomong esap naf anei, üa föü, esap wor üfei. ²⁸ A pwal wor ekoç me lükün ekei riaföü üsap föüni. Iteiten rän üa nom fän weiresin ai öürek fän iten ekewe mwichefel meinisin. ²⁹ Lupwen eman a apwangapwang, ngang üa pwal mefi apwangapwang. Lupwen eman a tur lon tipis, ngang üa fokun riaföü.

³⁰ Are ngang üpwe fokun aingaing, üpwe aingaing won ekewe mettoch mi pwärätä ai apwangapwang. ³¹ Ewe Kot, i Semen ach Samol Jesus a silei pwe üsap chofona. Itan epwe feiöç tori feilfeilachök! ³² Lupwen üa nom Tamaskus, ewe kepina mi nom fän ewe king Aretas a anomu chon mas, pwe repwe mamasa asamalapen ewe telinimw pwe repwe turufiei. ³³ Nge chiechiei kewe souläng ra aürüeitiu lon eu paskit seni eu asamachon tittin ewe telinimw. Iwe, üa sü seni.

12

Mine Kot a aküna ngeni Paulus o pwäri ngeni

12.1-10

¹ Iwe, üpwe chök sopwela le aingaing, inamwo ika esap wor lomotan. Nge iei üpwe kapas usun mine ach Samol a aküna o pwäri ngeniei. ² Ngang üa silei eman aramas lon Kraist, engol me rüanü ier a la a feitä o tori ewe aülüngatin sässärin läng. Üsap silei ika a nom ikenan lon inisin ika lon ngünün, Kot chök a silei. ³ Üpwe apasasefäli, üa silei pwe ei mwän a feitä o nom lon Paratis, üsap silei ika a nom ikenan lon inisin ika lon ngünün, Kot chök a silei. ⁴ Ikenan a rongorong sokun kapas esap wor eman a tongeni apasatä, esap mwümwü ngeni eman an epwe kapas usun. ⁵ Iwe, üpwe aingaing won ei aramas, nge üsap aingaing won püsin ngang, pwe won chök ekewe mettoch mi pwärätä ai apwangapwang. ⁶ Are üa mochen aingaing, üsap eman aramas ese wor an mirit, pun üpwe kapas won mine a let. Nge üsap mochen aingaing, pun üsap mochen pwe eman epwe ekieki ngeniei pwe üa tekia seni mine a küna rei ika rongorong seniei.

⁷ Pwe üsap fokun lamalamtekia ren chomongun ekewe mettoch mi amwarar üa küna lon künaei we, Kot a ngeniei eu samau üa fokun metek ren usun itä nge eman nöün Satan chon künö a wichiei, pwe üsap lamalamtekia. ⁸ Fän ülüngat üa iotek ngeni ach Samol usun ei o tüngor

ngeni pwe epwe angei seniei. ⁹ Nge a pölüeniei, “Ai ümöümöch a naf ngonuk, pun ai manaman a fokun unusöchüla lon om apwangapwang.” Iei mine üa fokun pwapwa lon ai aingaing won ai apwangapwang, pwe ewe manamanen Kraist epwe tümwünüei. ¹⁰ Iei mine üa pwapwa lon ai apwangapwang, lon ai küna turunufas, lon ai weires, lon ai ninni, pwal lon ai riaföü fän iten Kraist. Pun lupwen üa apwangapwang, ngang üa pöchökül.

Paulus a öüreki ekewe souläng lon Korint

12.11-21

¹¹ Ngang üa föri föförün eman esap mirit, nge ämi oua arianiei, pwe üpwe föri iei usun. Ämi ätekewe oupwe aitöchüei. Inamwo ika ngang üa aücheangau, üsap fokun kis seni nöümi kana “soukünü mi lap”. ¹² Ekewe asisil me manaman me sokun föför mi amwarar ra fis lefilemi fän watten mosonotam ra alletätä pwe ngang eman soukünü. ¹³ Pun ren met a kis ämi feiöch seni ekewe ekoch mwichefel, nge eu chök pwe üsap aweiresikemi pwe oupwe ngeniei och alilis? Ouse mochen oupwe amusala ai mwäl.

¹⁴ Iei üa amolätä ai üpwe churikemi lon aülüngatin fansoun. Nge üsap mochen aweiresikemi, pun üsap mochen nöümi moni, ngei ämi. Ewer, iei pwüngün pwe esap ekewe semirit repwe tümwünü semer me iner, nge ekewe sam me in repwe tümwünü nöür. ¹⁵ Iei mine üpwe pwapwa le fangala meinisin met mi wor rei, pwal püsin manau ei, pwe üpwe alisikemi. Ifa usun, epwe kisikisila ämi echeniei pokiten a watte ai echenikemi?

¹⁶ Iwe, üa alletä pwe üsap aweiresikemi. Nge eman a tongeni apasa, pwe üa eman souraw, üa säreikemi ren kapas chofona. ¹⁷ Ifa usun, üa atupukemi ren eman lein ekewe soukünü üa tinala remi? ¹⁸ Üa tüngormau ngeni Titus pwe epwe feila remi, üa pwal tinala eman pwii souläng pwe epwe eti. Ifa usun, Titus a atupukemi? Ifa usun, Titus me ngang aisap tipeeufengen lon äm ekiek me äm föför?

¹⁹ Ifa usun, oua ekieki pwe äm aia püsin penikem me mwemi lon ekewe fansoun me mwan? Apwi, äm aia kapas mwen mesen Kot usun chon nom lon Kraist. Ämi pwiim kana mi achengicheng, aia föri mettoch meinisin pwe aipwe alisikemi lon ämi souläng. ²⁰ Pun ngang üa niuokus, pwe lupwen üpwe torikemi üsap küna remi usun met üa mochen küna, nge ämi ousap küna rei met oua mochen küna. Üa niuokus pwe mi wor remi anini me lolowo, lisosong me meicha, kapasen esit me uwokükü, pwal lamalamtekie me fitikoko. ²¹ Üa niuokus, pwe lupwen üpwe liwinsefälito remi, ai Kot epwe atekisonaeitiu me mwemi, iwe, ngang üpwe kechüeiti chomong mi tipis me lom, nge resap aier seni ar föför mi fokun ngau, ar föförün lisowu me ar mocheisou.

13

Än Paulus kapasen fön me kapasen lesopolan

13.1-10

¹ Iwe, iei aülüngatin fansoun ai üpwe feila churikemi. Usun a mak lon ekewe Toropwe mi Pin, “A chök fis allükülükün tipisin eman are a wor ruoman ika ülüman chon pwärätä.” ☆ ² Üa fen ürenikemi me mwan lupwen üa nom remi aruen fansoun, nge iei üpwe pwal aliwinisefäli

☆ 13:1: Tut 17.6; 19.15

ngenikemi ai kewe kapas lupwen üa toau senikemi: Lupwen üpwe liwinsefälitikemi üpwe fokun apwüngü chokewe mi tipis me mwan ika pwal ekewe ekoch, ³ pun oua kütta och minen pwärätä pwe Kraist a kapas me rei. I esap apwangapwang lon an angang ngenikemi, nge a pwärätä an manaman leimi. ⁴ Pun inamwo ika Kraist a iräpenges lon an apwangapwang, nge a manau ren än Kot manaman. Pwal äm aia apwangapwang lon Kraist, nge ren manamanen Kot aipwe eti Kraist le manau, pwe aipwe angang ngenikemi.

⁵ Oupwe püsin sotunikemi o apwüngükemi, pwe oupwe silei ika oua wesewesen lükü Kraist. Ifa usun, ousap silei pwe Jesus Kraist a nonom lomi? Are ousap silei, oua lipwäkingau lon ewe sosot. ⁶ Üa apilükülüköch pwe oua silei pwe äm aisap lipwäkingau. ⁷ Nge aia tüngor ngeni Kot pwe ousap föri mine a mwäl, sap fän iten an epwe pwä äm lipwäköch, nge fän iten ämi oupwe föri mine a mürina, inamwo ika usun itä nge äm aia lipwäkingau. ⁸ Pun äm aisap tongeni föri och mine epwe tongeni ü ngeni ewe let, nge äm aia chök tongeni föri met epwe alisi ngeni. ⁹ Äm aia pwapwa lupwen aia apwangapwang, nge ämi oua pöchökül. Iei mine aia iotek pwe ämi oupwe unusöchüla lon ämi souläng. ¹⁰ Iei popun üa makkei ekei toropwe lupwen üa toau senikemi, pun lupwen üpwe wareitikemi üsap mochen pöchökül ngenikemi lon ai üpwe aea ewe pwüüng ach Samol a ngeniei, ewe pwüüng üpwe aea le apöchöküla ämi souläng, nge üsap aea le atai ämi souläng.

Kapongen lesopolan

13.11-13

¹¹ Ämi pwii kana, iei lesopolan mine üa makkei lon ei toropwe. Kot epwe etikemi. Oupwe achocho ngeni ämi oupwe unusöch lon ämi souläng. Oupwe aleasochis ngeni ai kewe kapasen öüröür. Oupwe tipeeufengen lefilemi, oupwe kinamwefengen. Iwe, ewe Kot mi echenikich o ngenikich kinamwe epwe nonom remi. ¹² Oupwe kapongfengen lefilemi ren ewe kapongen souläng. ¹³ Ekewe chon pin meinisin ra kapong ngenikemi. ¹⁴ Ümöümöchün ach Samol Jesus Kraist me än Kot chen me chiechifengenin Ngünmifel epwe nonom remi meinisin.

Nöün Paulus Toropwe ngeni ekewe Souläng lon Kalatia

Kapas akom

I. Chon makkei ei toropwe: Ewe soukünü Paulus.

II. A mak ngeni iö me fansoun a mak: Ngeni chon ekewe mwichefel lon Kalatia. Eli a mak lefilen ekewe ier 55 me 60 A.D.

III. Itelapemongen ei toropwe: Sia ngasala pokiten Kraist.

IV. Kapas aüchean ei toropwe: Ren lükülük chök aramas ra küna pwüing me ren Kot, nge sap ren ar apwönüetä än Moses kewe Allük.

V. Masouen ei toropwe: Lupwen ekewe soukünü ra popuetä le afalafala ewe Pworausen Manau usun Jesus o ekewe aramas sap ir chon Juta ra etiwä, a wor och kapas ais a fisitä, ika eman aramas epwe fokun aleasochisi än Moses kewe Allük fän iten an epwe eman souläng enlet. Paulus a awewei, pwe esap wor lomoten än eman epwe föri iei usun. Nge pwüingün pwe a chök wor eu longolong fän iten ewe manau lon Kraist, iei lükülük. Ren ei lükülük kich meinisin sia küna pwüing me ren Kot. Nge lein ekewe mwichefel lon Kalatia, iei eu fanü lon Asia Kisikis mi nom fän nemenien Rom, a wor ekoch aramas ra feito o ü ngeni Paulus. Ra üra pwe eman souläng enlet epwe pwal apwönüetä än Moses kewe Allük pwe epwe küna pwüing me ren Kot.

Paulus a makkei ei toropwe ngeni ekewe souläng lon Kalatia fän iten an epwe aliwinisefälieto ekewe aramas mi tokola ren afalafal chofona ngeni ewe lükülük mi enlet o ngeni ewe manauen souläng. Paulus a popuetä an toropwe ren an alletä pwe mi wor an pwüing an epwe iteni eman nöün Jesus Kraist soukünü. A fokun afata pwe an kö ngeni an epwe eman soukünü a feito seni Kot, sap seni eman aramas mi wor an nemenem. A pwal afata pwe a kö pwe epwe angang ngeni ekewe chon lükün Israel. Mürin a sopwela le awewei pwe ren lükülük chök aramas ra küna pwüing me ren Kot. Lesopolan ekewe sopun Paulus a afata pwe manauen souläng a pop seni ewe tong mi fisitä seni ar lükü Kraist.

VI. Tettelin masouen ei toropwe:

Kapas akom 1.1-10

Än Paulus alletä pwe i eman soukünü 1.11-2.21

Ewe Kapasen Manau usun än Kot ümöümöch 3.1-4.31

Än souläng ngasala me wiser 5.1-6.10

Kapases lesopolan 6.11-18

Kapong ngeni ekewe mwichefel lon Kalatia

1.1-5

¹ Ngang Paulus, eman soukünü, üsap angei wisei seni eman aramas, esap pwal feito seni eman aramas, nge üa angei seni Jesus Kraist me Samach Kot ewe mi amanauasefäli Jesus seni mäla. ² Äm me pwi-ich kei souläng meinisin mi nom ikei aia kapong ngeni chon ekewe mwichefel lon Kalatia: ³ Samach Kot me ach Samol Jesus Kraist epwe fang ngenikemi ümöümöch me kinamwe.

⁴ Kraist a fangala manauan fänäsengesin ach tipis kana ren an aleasochisi letipen ach Kot i Samach pwe epwe angasakich seni ei fansoun mi ngau. ⁵ Ousipwe mwareiti Kot tori feilfeilachök! Amen.

Eu chök Pworausen Manau

1.6-10

⁶ Ngang üa mairü remi, pwe oua müttir sü seni ewe mi körikemi ren än Kraist ümömöch, nge oua etiwa pwal eu Pworausen Manau. ⁷ Enlet, esap fokun wor “pwal eu Pworausen Manau”. Üa apasa ei ititin kapas, pun a wor ekoch aramas mi afitikokokemi o sotuni ar repwe sorei ewe Pworausen Manau usun Kraist. ⁸ Nge ikamwo epwe fen äm ika eman chon läng epwe afalafala ngenikemi eu Pworausen Manau mi soko seni ewe eu aia fen afalafala ngenikemi, i epwe anümamau! ⁹ Aia fen apasa me mwan, nge iei üpwe pwal apasasefäli: Are eman epwe afalafala ngenikemi eu Pworausen Manau mi soko seni ewe oua fen etiwa, i epwe anümamau! ¹⁰ Ifa usun, üa sotuni ai üpwe apwapwai letipen aramas? Apwi! Üa mochen kütta met Kot epwe pwapwa ren! Ifa usun, üa sotuni ai üpwe kütta itei me ren aramas? Are üpwe chüen kütta itei me ren aramas, ngang üsap nöün Kraist chon angang.

Usun än Paulus wiliti eman soukünö

1.11-24

¹¹ Ämi pwii kana, üpwe ürenikemi, pwe ewe Pworausen Manau üa afalafala esap pop seni aramas. ¹² Üsap angei seni eman aramas, esap pwal wor eman a aiti ngeniei. Püsin Kraist a pwäri ngeniei.

¹³ Ämi oua fen rong usun manaei me lom, lupwen üa achocho lon ewe lamalamen chon Juta. Oua rong usun ai ariaföüü chon ewe mwichefelin Kot, nge üsap eäni tong, üa pwal achocho ngeni ai üpwe atala ewe mwichefel. ✱ ¹⁴ Üa fokun fefeitä lon ai angang ngeni ewe lamalamen chon Juta lap seni chomong piloi kana me lein aramasei, üa pwal fokun tiliken le apwönüetä örünien ach kewe lewo. ✱

¹⁵ Nge Kot a filieitä lon an ümömöch mwen üsamwo uputiu o köriei ai üpwe angang ngeni. Iwe, lupwen a filätä ¹⁶ an epwe pwäri ngeniei Nöün we, pwe üpwe afalafala ewe Pworausen Manau usun i ngeni ekewe chon lükün Israel, ngang üsap angei än eman öüröür ngeniei, ✱ ¹⁷ üsap pwal feila Jerusalem fän iten ai üpwe churi ätekewe mi akom mwei lon ewe wisen soukünö. Nge üa müttir feila lon ewe fanü Arapia, mürin üa liwinsefäliti Tamaskus. ¹⁸ Iwe, mürin ülüngat ier üa feila Jerusalem pwe üpwe churi Petrus o üa nonom ren lon ükükün engol me limu rän. ✱ ¹⁹ Üsap küna pwal eman ekewe soukünö, chilon chök James pwiin ach Samol. ²⁰ Met üa makkei a let. Kot a silei pwe üsap chofona! ²¹ Mürin üa feila lon ekewe fanü Siria me Silisia. ²² Lon ena fansoun chon ekewe mwichefel lon Juta resap mwo künaei. ²³ Ra chök silei mine pwal ekoch ra apasa, “Ewe mwän mi ariaföüü kich me lom, iei a afalafala ewe lükülük i a achocho le atala me lom.” ²⁴ Iei usun ra mwareiti Kot fänäsengesin met Kot a föri fän itei.

2

Ekewe soukünö ra etiwa Paulus

2.1-10

✱ **1:13:** Föf8.3; 22.4-5; 26.9-11 ✱ **1:14:** Föf22.3 ✱ **1:16:** Föf9.3-6; 22.6-10; 26.13-18 ✱ **1:18:** Föf9.26-30

¹ Iwe, mürin engol me rüanü ier üa liwinsefäliiti Jerusalem, nge Parnapas a fitiei, üa pwal uwei Titus. ✧ ² Üa liwinsefäl, pun Kot a pwäri ngeniei pwe üpwe liwinla. Lon äm chufengen me ekewe souakom, üa awewe ngeniir ewe Pworausen Manau üa afalafala ngeni ekewe chon lükün Israel. Üsap mochen pwe ai angang lon ekewe fansoun ra la ika pwal lon fansoun ikenai epwe lomotongau. ³ Iwe, chiechiei Titus, inamwo ika i eman re Krik, nge ekewe souakom rese echimwa pwe epwe sirkomsais, ⁴ usun ekoch ra mochen. Ekei mwän ra pomweni pwe ir chiechiach chon lükülük o ra aniflong lon ach mwich pwe repwe operi ach ngas sia eäni lon Kraist Jesus. Ra mochen ach sipwe wewe ngeni amanau lon ach sipwe apwönüetä mine ekewe allük ra apasa pwe sipwe föri. ⁵ Nge sisap fokun tipeeu ngeni ar kewe allük, pun sia mochen pwe enletin ewe Pworausen Manau epwe chök nonom remi.

⁶ Nge ätekewe, aramas ra apasa pwe ir souakom, üa apasa ei pokiten esap liflifil me rei met sokun aramas ir. Kot esap nenengeni lapalapen aramas me lükün, üpwe apasa, ekei souakom resap apasa pwe üpwe siwili och lon ai afalafal. ✧ ⁷ Nge ra fen mefi pwe Kot a ngeniei ewe wis pwe üpwe afalafala ewe Pworausen Manau ngeni ekewe chon lükün Israel, usun chök a ngeni Petrus ewe wis an epwe afalafala ewe Pworausen Manau ngeni ekewe chon Juta. ⁸ Pun ren än manaman Kot a awisaei pwe üpwe eman soukünö ngeni ekewe chon lükün Israel, usun chök an awisa Petrus pwe epwe eman soukünö ngeni ekewe chon Juta. ⁹ Iwe, James, Petrus me Johannes, ir ekewe ürelapen mwichefel, ra mefi pwe Kot a ngeniei ei wis. Iei mine ra kapong won pöür ngenikem me Parnapas, iei ewe asisil pwe sia tipeeufengen lon ach angang. Ra tipeeu ngeni pwe Parnapas me ngang aipwe angang lein ekewe chon lükün Israel, nge ir repwe angang lein ekewe chon Juta. ¹⁰ Iwe, ra chök tüngor pwe aipwe chechemeni ekewe mi osupwang lon ar we mwich, iei ewe mettoch üa fen achocho le föri.

Paulus a apwüngü Petrus lon Antiokia

2.11-14

¹¹ Nge lupwen Petrus a tori Antiokia, üa kapas awenewen ngeni me mwen ekewe aramas, pun a mwäl an föför. ¹² Pun me mwen ekoch mwän, James a tiniirela, resamwo tori Antiokia, Petrus a momongöfengen me ekewe soulängin chon lükün Israel. Nge lupwen an ekei mwän war, Petrus a ütä seniir o esap chüen etiir le mongö, pun a niuokusiti ätekewe mi apasa pwe ekewe chon lükün Israel repwe sirkomsais. ¹³ Iwe, pwal ekewe ekoch souläng ir chon Juta ra pwal eti Petrus lon an likatuputup, pwal mwo nge Parnapas a tokola ren ar likatuputup. ¹⁴ Lupwen üa küna pwe ra föri och mine esap pwüng ngeni enletin ewe Pworausen Manau, üa üreni Petrus me mwer meinisin, “En eman chon Juta, nge ka föri örünien ekewe chon lükün Israel, nge sap örünien ekewe chon Juta. Pwota ka sotuni le echimwa ekewe chon lükün Israel pwe repwe föri örünien ekewe chon Juta?”

Chon Juta me chon lükün Israel ra küna manau ren ar lükülük

2.15-21

¹⁵ Kich pwükütän chon Juta pokiten samach me inach ir chon Juta, nge sisap “chon tipis seni chon lükün Israel”. ¹⁶ Nge sia silei pwe eman

aramas a kûna pwûng me ren Kot ren an lûkû Jesus Kraist chök, nge esap ren an apwönüetä ekewe Allük. Iei usun pwal kich sia lûkû Jesus Kraist, pwe sipwe kûna pwûng me ren Kot ren ach lûkû Kraist, nge sap ren ach apwönüetä ekewe Allük. Pun esap fokun wor eman a kûna pwûng me ren Kot ren an apwönüetä ekewe Allük. ✧ ¹⁷ Nge lupwen sia kütta pwe sipwe kûna pwûng me ren Kot ren ach eufengen me Kraist, a pwä pwe kich chon tipis usun chök ekewe chon lûkûn Israel. Iwe, ifa usun, wewen ei pwe Kraist eman mi alisätä tipis? Apwi, esap fokun ina! ¹⁸ Are ngang üa aüsefälietä ewe lamalamen Allük üa fen atala, mürin a pwä pwe üa pûsin atala ewe Allük. ¹⁹ Iei mine ren pwûngûn ekewe Allük ngang üa fen mäla, üa mäla ngeni ekewe Allük pwe üpwe manau fän iten Kot. Ngang üa fen iräpenges me Kraist, ²⁰ iei mine sap ngang üa chüen manau, nge Kraist a manau loi. Ei manau üa manaueni iei üa manau ren ai lûkû ewe Nöün Kot mi echeniei o fangala manauan fän itei. ²¹ Üsap fokun mochen pwe üpwe pöütala än Kot ümömöch. Pun ika eman aramas epwe kûna pwûng me ren Kot ren ekewe Allük, wewen pwe än Kraist mäla a lomotongau!

3

Allük ika lûkülük 3:1-14

¹ Ämi chon Kalatia oua tiparoch! Iö a arocha letipemi? Ngang üa afata ngenikemi mwen mesemi usun än Jesus Kraist mäla won iräpenges. ² Oupwe pölüeni ngeniei ewe eu chök kapas ais, “Ifa usun, oua angei ewe Ngünûn Kot ren ämi apwönüetä pwûngûn ekewe Allük, ika ren ämi rongorong o lûkû ewe Pworausen Manau?” ³ Pwota a iei me tiparochumi? Oua popuetä ämi souläng ren ewe Ngünûn Kot, ifa usun, oua mochen sopwela ämi souläng iei lon fituk? ⁴ Ifa usun, a lomotongau ekewe mettoch ra fis ngenikemi? Enlet, mi wor lomoter! ⁵ Ifa usun, Kot a ngenikemi Ngünmifel o föri manaman leimi pokiten oua apwönüetä pwûngûn ekewe Allük, ika pokiten oua rongorong o lûkû ewe Pworausen Manau?

⁶ Oupwe ekiiki usun mine a fis ngeni Apraham. Usun a mak lon ekewe Toropwe mi Pin, “Apraham a lûkû Kot, nge pokiten an lûkülük a kûna pwûng me ren Kot.” ✧ ⁷ Iei mine oupwe silei, pwe ekewe wesewesen mwirimwirin Apraham, ir ekewe aramas mi wor ar lûkülük. ✧ ⁸ Ekewe Toropwe mi Pin ra fen pwärätä me mwan, pwe Kot epwe anomu ekewe chon lûkûn Israel lon tettelin chon pwûng ren ar lûkülük. Iei usun mine a mak lon ekewe Toropwe mi Pin usun ewe Pworausen Manau a tori Apraham, “Aramas meinisin won fanüfan repwe kûna feiöch reöm.” ✧ ⁹ Apraham a lûkû Kot o a feiöch ren, iei usun chokewe mi lûkû Kot repwe pwal feiöch usun Apraham.

¹⁰ Iwe, chokewe meinisin mi anomu ar apilükülük won ar aleasochisi ekewe Allük ra anümamau. Pun a mak lon ekewe Toropwe mi Pin, “Tö esap aleasochisi meinisin mine a mak lon ewe puken Allük epwe anümamau!” ✧ ¹¹ Iwe, iei a fat pwe esap wor eman aramas epwe kûna pwûng me ren Kot ren an apwönüetä ekewe Allük, pun a mak lon ekewe Toropwe mi Pin, “Ewe chök aramas mi kûna pwûng me ren Kot epwe manau ren an lûkülük.” ✧ ¹² Nge ekewe Allük resap longolong won

✧ 2:16: Kölf 143.2; Rom 3.20,22 ✧ 3:6: Ken 15.6; Rom 4.3 ✧ 3:7: Rom 4.16 ✧ 3:8: Ken 12.3 ✧ 3:10: Tut 27.26 ✧ 3:11: Ap 2.4

lükülük, pun iei usun mine a mak lon ekewe Toropwe mi Pin, “Iö a föri pwüngün ekewe Allük epwe manau.” ✧

¹³ Nge ren än Kraist küna anümamau fän itach a angasakich seni ewe anümamau ekewe Allük ra atoto woch, pun a mak lon ekewe Toropwe mi Pin, “Iö a mwöch won eföch irä a anümamau me ren Kot.” ✧ ¹⁴ Kraist a föri ei, pwe ewe feiöch Kot a pwon ngeni Apraham epwe tori ekewe chon lükün Israel ren Kraist Jesus, pwe ren ach lükü sipwe angei ewe Ngünmifel Kot a fen pwon ngenikich.

Ekewe Allük me ewe Pwon
3.15-20

¹⁵ Ämi pwii kana, üpwe eäni eu pworausen awewe usun nonomun aramas: Lupwen ruoman aramas ra tipeeufengen won och o saini eu toropwen atipeeu, esap fokun wor eman a tongeni atai ewe toropwen atipeeu ika apacha och ngeni mürin an sain. ¹⁶ Iwe, Kot a föri an pwon ngeni Apraham me mwirimwirin we. Lon ekewe Toropwe mi Pin esap mak “mwirimwirin kana”, wewen chomong aramas, nge a mak “mwirimwirin we”, wewen eman chök aramas, iei i Kraist. ✧ ¹⁷ Iei usun mine üa mochen apasa: Kot a föri eu pwonen atipeeu ngeni Apraham o pwon ngeni pwe epwe apwönüetä. Ekewe Allük Kot a ngeni ekewe chon Israel föpükü ilik ier mürin resap tongeni atala ewe pwonen atipeeu, esap pwal tongeni amoralä än Kot we pwon. ✧ ¹⁸ Pun are än Kot we lifang epwe longolong won ekewe Allük, mürin esap chüen longolong won än Kot pwon. Nge Kot a ngeni Apraham ei lifang pokiten an we pwon. ✧

¹⁹ Iwe, met popun a wor ekewe Allük? Kot a apachatä ekewe Allük ngeni ewe pwonen atipeeu ar repwe aiti ngeni aramas ar föföör mi mwäl, repwe pwal nonom tori epwe war mwirimwirin Apraham we, ätewe Kot a eäni ewe pwon fän itan. Ekewe chon läng ra uwätüu ekewe Allük le pöün eman chon afför lefilen Kot me aramas. ²⁰ Esap wor lomoten eman chon afför lupwen a wor eman chök aramas, pun Kot eman chök.

Popun ekewe Allük
3.21-4.7

²¹ Iwe, ifa usun, wewen ei pwe ekewe Allük ra ü ngeni än Kot kewe pwon? Apwi, esap fokun ina! Pun are aramas ra angei eu allük mi atoto manau, mürin ir meinisin repwe tongeni küna pwüng me ren Kot ren ar aleasochis ngeni ei allük. ²² Nge a mak lon ekewe Toropwe mi Pin pwe unusen fanüfan a nom fän nemenien tipis. Iei mine ewe lifang Kot a pwon, a longolong won än eman lükü Jesus Kraist, a tori chokewe mi lükü.

²³ Nge mwen ewe fansoun ewe lükülük esamwo wor, ekewe Allük ra fötekinikich tori wareton ei lükülük epwe pwäpwäla. ²⁴ Iei usun ekewe Allük ra nemenikich tori Kraist a war, pwe sia tongeni küna pwüng me ren Kot ren ach lükülük. ²⁵ Nge iei otun ewe lükülük a war, ekewe Allük resap chüen nemenikich. ²⁶ Lon Kraist Jesus ämi meinisin oua nöün Kot ren ämi lükü. ²⁷ Pun ämi meinisin mi fen papatais lon Kraist oua manaueni manauen Kraist. ²⁸ Esap wor sokofesenin lefilen chon Juta me chon lükün Israel, lefilen amanau me aramas mi ngas, lefilen mwän me fefin, pun ämi meinisin oua eufengen lon Kraist Jesus. ²⁹ Are ämi oua

✧ 3:12: Lif 18.5 ✧ 3:13: Tut 21.23 ✧ 3:16: Ken 12.7 ✧ 3:17: Eks 12.40 ✧ 3:18: Rom 4.14

nöün Kraist, mürin oua mwirimwirin Apraham, iwe, oupwe angei ewe mine Kot a fen pwonei. ✧

4

¹ Iei met üpwe sowwela le apasa: Eman nau epwe angei mettochun saman meinisin, nge lupwen fansoun a chüen eman semirit, a usun chök eman amanau, inamwo ika i a wesewesen eäni ekewe mettoch meinisin. ² Lupwen a chüen eman semirit, mi wor mwän ra wisen tümwünü i o nemeni mettochun kewe tori ewe fansoun mi kefilitä me ren saman we. ³ Ina chök pwal usun kich. Lupwen sia chüen semirit lon ach souläng, sia nonom fän nemenien ekewe ngün mi nemeni ei fanüfan. ⁴ Nge lupwen a war ewe fansoun mi kapwüngüla, Kot a tinato püsin Nöün. A uputiü seni eman fefin o a nonom fän ekewe Allük, ⁵ pwe epwe angasa chokewe mi nonom fän ekewe Allük, pwe sipwe tolong lon tettelin nöün Kot.

⁶ Iwe, pokiten ämi oua nöün Kot, Kot a tinato Ngünün Nöün we lon lelukemi, ewe Ngün mi apasa, “Sam, Semei!” ⁷ Iei mine ämi ousap chüen usun amanau, pun oua nöün. Nge pokiten oua nöün, Kot epwe ngenikemi meinisin mine a iseis fän iten nöün kana. ✧

Paulus a öüreki ekewe soulängin Kalatia

4.8-20

⁸ Me lom, lupwen ousap silei Kot, oua nonom fän nemenien ekewe ngün esap ir kot. ⁹ Nge iei oua silei Kot, ika üpwe tongeni apasa, pwe iei Kot a silekemi, pwota oua mochen kulsefäli ekewe ngün mi apwangapwang o attong? Pwota oua mochen oupwe nomsefäl fän nemenier? ¹⁰ Oua pinini ekoch rän, maram, kinikinin fansoun me ekoch ier. ¹¹ Üa öürekikemi! Ifa usun, epwe tufich pwe ai angang ngenikemi a lomotongau?

¹² Ämi pwii kana, üa fokun tüngor ngenikemi, pwe oupwe wewe ngeniei, pun pwal ngang üa wewe ngenikemi. Ämi ousap föri och mi mwäl ngeniei. ¹³ Oua silei pwe pokiten üa samau üa afalafala ewe Pworausen Manau ngenikemi lon ewe aeuin fansoun. ¹⁴ Nge inamwo ika lapalapen inisi a fokun aweiresikemi, nge ousap turunufasei ika pöütieila. Iwe, nge oua fen etiwaei usun ämi oua etywa eman chon läng, oua etiwaei usun ämi etywa Kraist Jesus. ¹⁵ Ämi oua fokun pwapwa! Met a fis ngenikemi iei? Püsin ngang üa tongeni pwärätä, pwe are epwe tufich oupwe alusawu föün mesemi o ngeniei. ¹⁶ Iwe, ifa usun, üa wiliti eman chon oputemi iei, pokiten ai ürenikemi mine a let?

¹⁷ Iwe, ekewe ekoch aramas ra achocho le chäächäärikemi, nge popun ar chäächäärikemi esap mürina. Ra chök mochen aimwüfesenikich, pwe oupwe chäächääriir usun chök ir ra chäächäärikemi. ¹⁸ A öch ach sipwe achocho le chäächääri eman ren eu popun mi mürina. Ei a pwüng fansoun meinisin, nge sap chök lupwen ai nom remi. ¹⁹ Ämi nei kana mi achengicheng! Üa usun chök eman fefin lon fansoun an nöünöü. Üa mefi ei sokun metek fänäsengesimi tori manauen Kraist epwe fis lomi. ²⁰ Üa fokun äneän ai üpwe nonom remi iei, pwe üpwe tongeni siwili itiitin ai kapas ngenikemi. Ngang üa fokun öürekikemi!

Kapasen awewe usun Hakar me Sara

4.21-31

21 Üa mochen aisini iö kewe me leimi ra mochen nonom fän nemenien ekewe Allük: Ifa usun, oua wesewesen weweiti mine ekewe Allük ra apasa? 22 A mak pwe a wor ruoman nöün Apraham ät, eman a nöüni me won eman amanau fefin, nge eman a nöüni me won eman fefin mi ngas. ✧ 23 Nöün we ät a nöüni me won ewe amanau fefin a uputiu lon lapalapen än aramas uputiu. Nge nöün we a nöüni me won ewe fefin mi ngas a uputiu lon pwüngün än Kot we pwon. 24 Ekei mettoch sia tongeni awewe ngeni eu lios: Ekewe ruoman fefin ra aliosunätä ruu pwon. Nöün ewe fefin Hakar kewe mi up seni ir amanau. Hakar a aliosunätä ewe pwon mi fis me won ewe chuk Sinai. 25 Hakar mi wewe ngeni ewe chuk Sinai lon Arapia a aliosunätä ewe telinimw Jerusalem ikenai, aramasen lon meinsin ir amanau. 26 Nge ewe Jerusalem lon läng mi ngas, iei i inach. 27 Pun a mak lon ekewe Toropwe mi Pin, “Kopwe pwapwa en fefin mi rit!

Kopwe kökkö fän leüömong

o mweireir fän pwapwa,

en neminewe esap toruk cheuchen fam!

Pun ewe fefin mi aleman epwe wor chomong nöün,

lap seni ewe fefin mi wor pwülüan.” ✧ 28 Ämi pwii kana, iei ämi oua nöün Kot pokiten an we pwon, usun chök Isaak. 29 Lon ena fansoun ewe nau mi uputiu lon lapalapen än aramas uputiu a ariaföüü ewe eman mi uputiu ren manamanen ewe Ngünün Kot. Iei usun a pwal fis ikenai. ✧ 30 Nge met a mak lon ekewe Toropwe mi Pin? A mak, “Kopwe asüela ewe amanau fefin me nöün we, pun nöün ewe amanau fefin esap eti nöün ewe fefin mi ngas le wöüni wöün ewe sam.” ✧ 31 Iei mine ämi pwii kana, sisap nöün ewe amanau fefin, nge sia nöün ewe fefin mi ngas.

5

Oupwe kamwöchünük won ämi ngasala

5.1-15

1 Iwe, sia ngasala, pun Kraist a angasakich. Iei mine oupwe üppos usun aramas mi ngas, ousap chüen atolongasefälikemi lon tettelin amanau. 2 Oupwe aüseling! Ngang Paulus üpwe ürenikemi, pwe are oupwe mwütätä pwe oupwe sirkomsais, wewen chök nge a fokun lomotongau mine Kraist a föri fän itemi. 3 Üpwe asilesefäli ngenikemi, pwe ika eman mwän epwe tipeeu ngeni an epwe sirkomsais, ätewe epwe fokun aleasochisi ekewe Allük meinsin. 4 Iwe, chokewe me leimi mi sotuni ar repwe küna pwüng me ren Kot ren ar aleasochisi ekewe Allük, ra püsin aimwürela seni Kraist. Iwe, ir ra nonom lükün än Kot ümöümöch. 5 Nge kich sia apilükülükü pwe Kot epwe föri pwe sipwe küna pwüng me ren. Iei met sia witiwiti ren ewe manamanen Ngünün Kot mi angang loch ren ach lükülük. 6 Pun lupwen sia fen nonom lon Kraist Jesus, esap chüen wor lomoten ach sipwe sirkomsais ika sisap sirkomsais, nge met chök a aüchea, iei ach lükü Jesus mi pwä lon ach echeni aramas.

7 Oua fokun fefeitä lon ämi lükü Kraist! Iö a aükätü ämi aleasochisi mine a let? Ifa usun an pesekemi? 8 Ei sokun pesepes esap pop seni Kot, ewe mi körükemi. 9 Mi wor eu mwiitun a apasa, “Èkis chök iis a apwotä

unusen ewe pilawa.” ✧ ¹⁰ Nge ngang üa chüen apilükülükükemi. Ach eufengen me ach Samol a eselipato ai apilükülük, pwe ämi oupwe tipeeu ngeniei lon ai ekiek. Nge Kot epwe apwüngü ätewe mi atolongakemi lon fitikoko, ese lifilifil ika i iö.

¹¹ Ämi pwii kana, are üpwe chüen afalafal pwe aramas repwe sirkom-sais, pwota chök üpwe chüen küna riaföü? Ika epwe pwüng ei, mürin ai afalafal usun ewe iräpensesin Kraist esap eselipato osukosuk. ¹² Üa äneän pwe amwo chokewe mi afitikokokemi repwe chök sopwela ar föför o püsin pöküela och kinikinin inisiir.

¹³ Nge ämi pwii kana, Kot a körikemi pwe oupwe ngas. Nge pokiten oua ngas, ousap ekieki pwe oua tongeni mwüt ngeni mochenian fitukemi epwe chüen nemenikemi, nge oupwe angangfengen lefilemi fän tong. ¹⁴ Pun ekewe Allük meinisin ra unusolong lon ewe eu chök allük, “Kopwe echeni chon arum usun püsin om echenuk.” ✧ ¹⁵ Nge are oua usun manmwacho ren ämi küfengenikemi o ocheifengenikemi, oupwe tümwünükemi pwe ousap arosafengenikemi.

Ewe Ngünün Kot me lapalapen aramas

5.16-26

¹⁶ Iei wewen mine üa mochen apasa: Oupwe tipeni pwe ewe Ngünmifel epwe emwenikemi, mürin ousap apwönüetä mochenian fitukemi. ¹⁷ Pun mochenin fitukach a ü ngeni mine Ngünmifel a mochen, iwe, mine Ngünmifel a mochen a ü ngeni mochenin fitukach. Ekei ruu mochen ra üküfengen, wewen pwe ousap tongeni föri met oua mochen föri. ✧ ¹⁸ Nge are Ngünmifel a emwenikemi, mürin ousap nonom fän nemenien ekewe Allük.

¹⁹ Iwe, a pwä ekewe angangen fituk: Lisowu, limengau, mocheisou, ²⁰ fel ngeni anümwäl, angangen rong, oputfengen me fiufengen, koumfengen, song, apangau, tipefesen, mwichaiei, ²¹ lolowo, ünüpuh, mongömong me sokun föför mi wewe ngeni ekei. Üpwe apasasefäli ngenikemiiei, met üa fen ürenikemi me mwan: chokewe mi föri ekei sokun föför resap tongeni mwüni Mwün Kot.

²² Ngeiei ekewe uän Ngün: chen, pwapwa, kinamwe, mosonotam, kirikiröch, aramasöch, allükülük, ²³ tipetekison me tipepwoa. Esap wor och allük a ü ngeni ekei sokun föför. ²⁴ Iwe, chokewe ir nöün Kraist Jesus ra iräpensesi mochenian fituker me sokun ar mocheniangau me mochenian leluker. ²⁵ Ewe Ngünmifel a fang ngenikich manau, i epwe pwal fokun nemeni manauach. ²⁶ Sisap lamalamtekia ika akuffengenikich ika lolowofengen lefilach.

6

Oupwe mwärelong fän wosen chiechiemi wosochou

6.1-10

¹ Ämi pwii kana, are eman me leimi a tur lon tipis, chokewe me leimi mi eäni Ngünmifel repwe apwüngü fän tipepwetete. Nge oupwe püsin afälikemi pwe ousap pwal turulong lon sosot. ² Oupwe mwärelong fän wosen chiechiemi wosochou, ika oupwe föri ei, oupwe aleasochisi än Kraist allük. ³ Are eman a ekieki pwe mi wor itan, nge esap fokun wor, ätewe a püsin atupu. ⁴ Eman me eman epwe püsin apwüngü an föför. Are

a mürina, mürin a tongeni pwapwa ren met a föri, nge esap awewei met i a föri ngeni met eman a föri. ⁵ Pun eman me eman epwe püsin mwärei wosan wosochou.

⁶ Eman mi kaiö Kapasen Kot epwe aeafengen me nöün we sense ekewe mettoch meinisin mi mürina a eäni. ⁷ Ousap püsin atupukemi. Sisap tongeni urumwotei Kot. Pun mine eman aramas a fotuki, iei met epwe pwal kini. ⁸ Are eman a fofot lon mochenian fitukan, epwe kini mäla. Nge are eman a fofot lon Ngün, epwe kini manau esemüch. ⁹ Iwe, sisap achanü le föföri mine a mürina. Pun are sisap achanü, epwe war ewe fansoun lupwen sipwe kini ewe räs. ¹⁰ Iei mine lupwen mi wor ach fansoun fich, sipwe eäni kirikiröch ngeni aramas meinisin, nge akaeuin ngeni chokewe mi nom lon ewe familien chon lükülük.

Kapasen amwirimwir me kapong

6.11-18

¹¹ Oupwe ngeni ekei mesen mak mi watte üa makkei ngenikemi ren püsin pei! ¹² Ekewe aramas mi mochen erianikemi pwe oupwe sirkomsais, ir ätekewe mi sikesik o aingaing won mettochun lükün. Ra föri ei, pwe resap küna riaföü pokiten ewe iräpengesin Kraist. ¹³ Pwal mwo nge chokewe mi sirkomsais resap aleasochis ngeni ekewe Allük. Ra mochen pwe ämi oupwe pwal sirkomsais, pwe ra tongeni aingaing won ämi tipeeu ngeni ei sokun föfö. ¹⁴ Nge ngang won inisi üpwe chök aingaing won ewe iräpengesin ach Samol Jesus Kraist. Pun ren an we iräpenges fanüfan a iräpenges ngeniei, nge ngang üa iräpenges ngeni fanüfan. ¹⁵ Esap wor lomoten än eman sirkomsais ika esap sirkomsais, nge a chök lomot än eman epwe wiliti eman aramas mi fö. ¹⁶ Kinamwe me tong epwe nom ren chokewe meinisin mi aleasochisi ai kei kapas lon manauer, ewer, epwe nonom rer pwal ren nöün Kot kewe aramas meinisin.

¹⁷ Iwe, lesopolan ai kei kapas: Esap wor eman epwe chüen aweiresiei, pun ekewe lemon kinas mi nom won inisi ra pwärätä pwe ngang nöün Jesus amanau.

¹⁸ Ümömöchün ach Samol Jesus Kraist epwe nonom remi meinisin, pwii kana. Amen.

Nöün Paulus Toropwe ngeni ekewe Souläng lon Efisos

Kapas akom

I. Chon makkei ei toropwe: Ewe soukünö Paulus.

II. A mak ngeni iö me fansoun a mak: Ngeni chon ewe mwichefel lon Efisos, eli a mak me lon imwen fötek lon Rom lefilen ekewe ier 60 me 64 A.D.

III. Itelapemongen ei toropwe: Chon mwichefel repwe eu chök lon Kraist.

IV. Kapas aüchean ei toropwe: Esap wor sokofesenin chon Juta me chon lükün Israel mi lükü Jesus.

V. Masouen ei toropwe: Nöün Paulus toropwe ngeni chon ewe mwichefel lon Efisos a akomwen apworausä usun än Kot akot fän iten an epwe achufengeni förian meinisin mi nom läng me won fanüfan pwe repwe nom fän nemenien Kraist. (1.10) A pwal tüngor ngeni nöün Kot aramas pwe repwe manau lon ei sokun manau mi fich ngeni ei akot mi lapalap fän iten atipeeufengenin aramas meinisin won fanüfan ren ar eufengen me Kraist Jesus.

Lon aeuin kinikinin ei toropwe Paulus a awewe aüchean eufengen ren an kapas usun än Kot ewe Sam a filätä nöün aramas, usun an amuserela o angaseerela seni ar tipis, pwal usun än Kot apwönüetä an we pwon mi lapalap ren ewe Ngünmifel. Lon aruuen kinikin a tüngor ngeni ekewe chon aleani ei toropwe, pwe repwe manau lon ei sokun manau pwe ar eufengen lon Kraist epwe pwä lon ar manaufengen.

Paulus a aea ekoch kapasen awewe pwe epwe pwärätä ewe ririfengenin nöün Kot aramas lon ar eufengen me Kraist: ewe mwichefel a usun chök eu inis, nge Kraist ewe mökür, ika a usun chök eu imw, nge Kraist ewe föün lepwokuku, ika a usun chök eman fefin, nge Kraist pwülün. Ei toropwe a masou ren sokun ekiem mi tekia lupwen Paulus a mak fän an mwökütüküt ren än Kot ümöümöch lon Kraist. A küna meinisin lon saramen än Kraist we tong, an asor manauan, an amusala tipis, an ümöümöch me an limelimöch.

VI. Tettelin masouen ei toropwe:

Kapas akom 1.1-2

Kraist me ewe mwichefel 1.3-3.21

Ewe manau mi fö lon Kraist 4.1-6.20

Kapasen lesopolan 6.21-24

Kapong

1.1-2

¹ Ngang Paulus eman nöün Kraist Jesus soukünö fän letipen Kot, üa kapong ngeni ekewe chon pin lon Efisos mi allükülük lon manauer lon Kraist Jesus: ✧ ² Samach Kot me ach Samol Jesus Kraist epwe fang ngenikemi ümöümöch me kinamwe.

Ekewe feiöchün Ngün lon Kraist

1.3-14

³ Sipwe kilisou ngeni Kot Semen ach Samol Jesus Kraist, pun a afeiöchükich lon Kraist ren ekewe feiöchün ngün meinisin ra nonom lon

✧ 1:1: Föf 18.19-21; 19.1

läng. ⁴ Kot a aflikich lon Kraist me mwen än fanüfan esamwo fis, pwe sipwe pin o unusöch me mwen mesan. ⁵ Lon an chen a fen aflikich pwe sipwe tolong lon tettelin püsin nöün ren Jesus Kraist, pun iei usun met a apwapwai letipan. ⁶ Sipwe mwareiti Kot ren an we ümöümöch mi fokun amwarar, a lifang ngenikich lon püsin Nöün we mi achengicheng! ⁷ Pun lon Kraist sia ngasala ren chaan, pwe ach kewe tipis ra musala. A ifan me watten än Kot we ümöümöch ⁸ a fang ngenikich lon an kisäsew mi somwosomwola! ⁹ Lon än Kot tipachem me tipemirit meinisin a apwönüetä mine a fen eäni akot o asile ngenikich an ekiek mi monomon a fen filätä pwe epwe aunusala ren Kraist. ¹⁰ Ei ekiek Kot epwe aunusöchü lupwen epwe tori ewe fansoun mi afat pwe epwe achufengeni förïan meinisin lon läng me fanüfan, pwe repwe nonom fän nemenien Kraist.

¹¹ Ekei mettoch meinisin ra fisitä usun met Kot a fen ekiekietä o filätä. Kot a aflikichetä pwe sipwe nöün aramas lon Kraist lon pwüngün an akot mi longolong won met a fen filätä me lepoputän. ¹² Iei mine kich mi akomwen apilükülükü Kraist sipwe eu lenien mwareiti lingen Kot. ¹³ Pwal ämi oua wiliti nöün Kot aramas lupwen oua rongorong ewe kapasen Kot mi let, iei ewe Pworausen Manau oua küna manau ren. Ämi oua lükü Kraist, nge Kot a pwaunikemi pwe oupwe nöün ren an ngenikemi ewe Ngünmifel, usun i a fen pwonei. ¹⁴ Pokiten sia eäni Ngünmifel, sia fokun silei pwe sipwe angei mine Kot a fen pwon ngeni nöün aramas. Ei a allükülükü ngenikich pwe Kot epwe wesewesen angasala nöün kana meinisin. Sipwe mwareiti an we ling!

Än Paulus iotek
1.15-23

¹⁵ Iei popun, seni ewe fansoun üa rongorong usun ämi lükü ach Samol Jesus pwal usun ämi echeni ekewe chon pin meinisin, ¹⁶ üsap ükütiu le kilisou ngeni Kot fänäsengesimi. Üa chechemenikemi lon ai iotek ¹⁷ o tüngor ngeni än ach we Samol Jesus Kraist we Kot, i Samach we mi ling, pwe epwe ngenikemi ewe Ngünmifel. I ewe mi atipachemakemi o asile ngenikemi usun Kot, pwe epwe lapala ämi silei i. ¹⁸ Üa tüngor pwe mesen letipemi epwe nennela pwe oupwe küna an saram, pwe oupwe silei usun ewe apilükülüköch i a köri ngenikemi, pwal usun watten ekewe feiöch mi amwarar i a pwon ngeni ekewe chon pin, ¹⁹ pwal usun löllön an we manaman mi angang loch chon lükü i. Ei sokun manaman a wewe ngeni än Kot we manaman mi pöchökül ²⁰ a aea lupwen a amanauasefäli Kraist seni mäla o amota i lepelifichin lon läng. ²¹ Kraist a watte an nemenem ikenan lap seni ekewe sounemenem lon läng, seni ekewe manaman me ekewe samol. Wisan a tekia seni wisen ekewe sounemenem lon ei fansoun pwal lon ekewe fansoun repwe feito. ²² Kot a anomu mettoch meinisin fän nemenien Kraist. A awisa i pwe epwe möküren mwichefel o nemeni mettoch meinisin. ²³ Mwichefel iei ewe inisin Kraist. Iwe, mwichefel a afisätä unusöchülan Kraist, usun püsin Kraist a aunusöchüela mettoch meinisin ekis meinisin. ✧

2

Ach küna manau seni mäla
2.1-10

¹ Me lom oua mäla lon pekin ngün pokiten ämi lükümach me tipis. ² Lon ena fansoun oua manaueni ewe manauen fanüfan mi ngau. Oua aleasochis ngeni ewe mi nemeni ekewe ngününgau mi nom fän läng, ewe ngün mi nemeni ekewe aramas mi aleasolap ngeni Kot iei. ³ Enletin, oukich meinisin sia usun chök ir me lom, sia manau lon mochenian fitukach, sia chök apwönüetä mochenin inisich me ekiakin letipach. Pokiten sia usun chök aramas meinisin, sia nom fän riaföün än Kot song.

⁴ Nge pokiten än Kot ümöümöch a fokun somwosomwola o an echenikich a fokun lapalap, ⁵ a amanauakich me Kraist lupwen sia mäla lon ach pupungau. Ren än Kot ümöümöch sia küna manau. ✧ ⁶ Lon ach eufengen me Kraist Jesus, Kot a amanauakich me Kraist pwe sipwe eti Kraist le nemenem lon läng. ⁷ A föri iei usun, pwe epwe pwärätä lon ekewe fansoun repwe feito an we ümöümöch mi fokun lapalap esap wor eman a tongeni awewei, a nom lon an we chen a pwäri ngenikich lon Kraist Jesus. ⁸ Pun ren än Kot we ümöümöch oua küna manau ren ämi lükülük. Nge ei manau oua eäni esap afisiemi, pwe än Kot lifang ngenikemi, ⁹ esap pwal liwinin ämi angang, pwe esap wor eman epwe tongeni aingaing ren. ¹⁰ Pun Kot a förikich pwe sipwe eäni ei manau, a förikich lon Kraist Jesus pwe sipwe föri ekewe föför mi mürina a fen amolätä fän itach pwe sipwe föföri.

*Chon Juta me chon lükün Israel ra eu chök lon Kraist
2.11-22*

¹¹ Iwe, ämi chon lükün Israel lon pekin fituk, ekewe chon Juta ra aita ngenikemi “chon resap sirkomsais”, nge ir ra püsin aita ngeniir “chon sirkomsais”, (aramas ra föri ei ngeni püsin inisiir) oupwe chechemeni met sokun lapalap oua eäni me lom. ¹² Lon ena fansoun oua imwü seni Kraist. Oua chon ekis, nge ousap pachelong lein ekewe aramas mi fil me ren Kot. Esap wor wisemi lon ekewe pwon mi longolong won än Kot pwon ngeni nöün kewe aramas, pwe oua nonom lon ei fanüfan, nge esap wor ämi apilüköch, esap pwal wor ämi Kot. ¹³ Nge iei, pokiten oua nonom lon Kraist Jesus, ämi mi toauala me lom, oua kaneto ren chaan Kraist. ¹⁴ Pun püsin Kraist i ach kinamwe. A föri pwe chon Juta me chon lükün Israel repwe eu chök sokun aramas. Ren püsin inisin a ataetiu ewe tit mi aimwüfeseniiir o afisätä ar oputfengen lefiler. ¹⁵ A amoralä än ekewe chon Juta Allük fiti pwüngün me tichikin, nge a föri seni ekewe ruu sokun mwichen aramas eu chök mwichen aramas mi fö lon püsin i. Ren ei a awora kinamwe. ✧ ¹⁶ Ren än Kraist mäla won ewe iräpenges a amola ar oputfengen lefiler. Pun ren ewe iräpenges a achäfengeni ekewe ruu sokun mwichen aramas, pwe repwe eu chök mwich o aliwinisefäliir ngeni Kot. ✧ ¹⁷ Iei usun Kraist a feito o afalafala ewe Pworausen Manau usun kinamwe ngeni aramas meinisin, ngeni ämi chon lükün Israel mi toau seni Kot, pwal ngeni ekewe chon Juta mi arap ngeni. ✧ ¹⁸ Pun ren Kraist kich meinisin, chon Juta me chon lükün Israel, sia tongeni feito mwen mesen Samach ren eman chök Ngün.

¹⁹ Iei mine ämi chon lükün Israel ousap chüen chon ekis ika wasöla, nge iei oua chon wilipos fiti nöün Kot kewe aramas, oua chon ewe familien Kot. ²⁰ Pwal ämi oua köütä won ewe longolong mi för ren ekewe soukünü me ekewe soufos, nge püsin Kraist Jesus i ewe föün lepwokuku. ²¹ I ewe

eman mi amwöchüfengeni unusen ewe imw o föri an epwe fefeitä, pwe epwe eu imwenfel fän iten ach we Samol. ²² Lon Kraist pwal ämi oua kööpökütä fiti ekewe chon lükü, pwe oupwe eu leni ia Kot epwe nonom ie ren Ngünün.

3

Än Paulus angang ngeni ekewe chon lükün Israel

3.1-13

¹ Fän iten ei popun, ngang Paulus, eman chon fötek fän iten Kraist Jesus fänäsengesi ämi chon lükün Israel, üa iotek ngeni Kot. ² Üa lükü pwe oua fen rong, pwe lon än Kot ümömöch a ngeniei ei angang pwe üpwe föri fänäsengesimi. ³ Kot a pwäri ngeniei an we ekiek mi monomon o a aiti ngeniei wewen, usun üa manlapei le makkei me mwan. ⁴ Nge are oupwe aleani mine üa fen makkeetiu, oupwe tongeni silei usun ai weweiti ewe monomonen Kraist. ⁵ Lon ekewe fansoun ra la Kot esap asile ngeni aramas won fanüfan usun ei monomon, nge iei Kot a pwärara ren Ngünmifel ngeni nöün kewe soukünü me soufos mi pin. ⁶ Iei ewe monomon: Ren ewe Pworausen Manau ekewe chon lükün Israel repwe eti ekewe chon Juta le feiöchüni än Kot kewe feiöch, repwe chufengen lon ewe eu chök inis o aeafengen ewe feiöchün pwon Kot a föri ren Kraist Jesus. ✱ ⁷ Kot a awisaei pwe üpwe eman chon angang ngeni ewe Pworausen Manau, ren an we lifangen ümömöch a ngeniei ren tufichin an we manaman. ⁸ Ngang ewe mi kis seni ekewe chon pin meinisin, nge Kot a ngeniei ei wis mi aüchea pwe üpwe uwei ngeni ekewe chon lükün Israel ewe Pworausen Manau usun ewe wöün Kraist esap wor epin, ⁹ üpwe pwal afataöchü ngeni aramas meinisin usun än Kot we ekiek mi monomon epwe pwönüetä. Kot ewe mi föri mettoch meinisin a amonomona an we monomon lon ekewe fansoun lomlom, ¹⁰ pwe lon fansoun ikenai mwichiefel epwe iei ewe leni ia ekewe sounemenem me manaman mi nom lon läng repwe silei usun mesemesekisin än Kot tipachem. ¹¹ Iei än Kot we akot seni chök me lomlom, nge a apwönüetä lon Kraist Jesus ach Samol. ¹² Lon Kraist pwal ren ach lükü i sia pwora o apilükülük lon ach churi Kot. ¹³ Iei mine üa tüngor ngenikemi pwe ousap apilüküingau ren ekei riaföü ra toriei fän itemi, pun iei ämi feiöch.

Än Kraist we chen

3.14-21

¹⁴ Iwe, ren ei popun üa fotopwäsuk me mwen Samach lon läng, ¹⁵ pun iteiten famili lon läng pwal won fanüfan ra angei iter me ren. ¹⁶ Üa tüngor ngeni Kot pwe epwe fang ngenikemi tufichin Ngünün we seni lon wöün an we ling, pwe oupwe pöchökül lon letipemi. ¹⁷ Üa iotek pwe Kraist epwe nonom lon lelukemi ren ämi lükü i. Üa pwal iotek pwe oupwe warar o longolong won chen, ¹⁸ pwe ämi me ekewe chon pin meinisin oupwe tufichin weweiti ükükün chölanan me langataman, pwal tekian me alololun än Kraist we chen. ¹⁹ Ewer, oupwe silei usun an we chen, inamwo ika esap fokun wor eman a tongeni silei unusan, pwe oupwe unusen urela ren lapalapen Kot. ²⁰ Sipwe mwareiti Kot, i ewe a tongeni föri mettoch meinisin lap seni mine sia tongeni tüngor ika ekieki ren an

✱ 3:6: Kol 1.26-27

we manaman mi akangang loch, ²¹ sipwe alinga i me lon mwichefel pwal lon Kraist Jesus lon fansoun meinsin tori feilfeilachök! Amen.

4

Eufengen lon ewe inisin Kraist

4.1-16

¹ Ngang eman chon fötek pokiten ai angang ngeni ach Samol, üa mochen pese ngenikemi pwe oupwe manaueni eu manau mi fich ngeni ewe kö seni Kot. ² Oupwe tipetekison fansoun meinsin, oupwe tipepwetete o mosonotam. Oupwe echenifengenikemi ren ämi songomangfengen lefilemi. ✧ ³ Oupwe fokun achocho le tümwünü ämi tipeeufengen lon ewe Ngünmifel ren ewe kinamwe mi rifengenikemi. ⁴ Mi wor eu chök inis me eman chök Ngün, usun a pwal wor eu chök apilükülüköch Kot a köri ngenikemi. ⁵ Mi wor eman chök ämi Samol, eu chök lükülük, eu chök papatais, ⁶ oua pwal eäni eman chök Kot, ewe Semen aramas meinsin, i a nemeni mettoch meinsin, a angang ren mettoch meinsin o nonom loch meinsin.

⁷ Iwe, iteiten eman me eman leich sia fen angei ewe lifangen ümöümöch lon aükükün ewe lifang Kraist a ngenikich. ⁸ Iei usun mine a mak lon ekewe Toropwe mi Pin:

“Lupwen a feitä won ewe chuk mi fokun tekia,

a emwenatä chomong chon oola lon an we mwich

a pwal ngeni ekewe aramas lifanger.” ✧ ⁹ Iwe, met wewen “a feitä”?

Wewen pwe a akomwen feitiu lon ekewe leni mi alolol epin fanüfan. ¹⁰ Ewe eman mi feitiu pwal i chök ewe eman mi feitä asen ekewe läng meinsin, pwe epwe amasoua unusen läng me fanüfan. ¹¹ I ewe mi “ngeni aramas lifanger”. A filätä ekoch pwe repwe soukünü, pwal ekoch repwe soufos, pwal ekoch repwe chon asoulängala aramas, nge pwal ekoch repwe soumas me sense. ¹² A föri ei pwe epwe amolöchü nöün Kot kewe aramas meinsin fän iten ewe angang souläng ra wisen föri, pwe repwe apöchökülätä ewe inisin Kraist. ¹³ Iei usun oukich meinsin sipwe achufengenikich pwe sipwe eufengen lon ach lükü Jesus pwal lon ach sileöchü ewe Nöün Kot. Sipwe eäni tipen mwän lon manauach, pwe sipwe tori ükükün ewe unusöchün Kraist. ¹⁴ Mürin sisap chüen sokuni sokun semirit, sisap chüen chüwölüwölfeil ren no kana o mamaanfeil ren enienin asepwälin än chon likatuputup afalafal, ir ätekewe mi emweningaua ekoch aramas ren ar tunochofona. ¹⁵ Nge ren ach kapas wenechar fän tong sipwe fokun mämäritä lon mettoch meinsin ngeni Kraist, i ewe möküren mwichefel. ¹⁶ Fan an nemenem ekewe sokopaten kifetin ewe inis meinsin ra masfengen, nge unusen ewe inis a kochufengen ren ekewe kirupun lekupukup meinsin mi wor ren. Iei usun lupwen eu me eu kewe kifetin inis a föri wisan, unusen ewe inis epwe mämäritä o püsin pöchökületä ren tong. ✧

Ewe manau mi fö lon Kraist

4.17-32

¹⁷ Iwe, fän iten ach Samol üa fönöökemi pwe ousap sopwela le manaueni manauen chokewe mi nom lon rochopwak, pun ar ekiek a lo-motongau, ¹⁸ a rochopwak lon letiper. Resap etikich le manaueni ewe manau mi fö Kot a ngenikich, pun ra fokun tiparoch o tipeförea. ¹⁹ Resap mefi säw. Ra fangatä püsin ir ngeni mocheisou me sokun föför mi limengau meinisin, nge resap mochen ükütiu seni.

²⁰ Nge mine oua kaiö usun Kraist esap iei usun. ²¹ Enlet, ämi oua fen rongorong usun i, oua pwal kaiö ewe let mi nom lon Jesus, pokiten oua chon tapwela mürin. ²² Iei mine oupwe likitätü ekewe föför oua föföri lupwen oua manaueni ewe manauen lom, iei ewe manau a katala ren an kewe mochenia mi atuputup. ✧ ²³ Letipemi me ekiekimi epwe fokun söfösefäl, ²⁴ oupwe fokun angei ewe manau mi fö mi för lon lapalapen Kot o pwäla lon eu manau mi enletin pwüng me pin. ✧

²⁵ Iei mine ousap chüen kapas chofona. Oupwe eäni kapas wenechar ngeni pwimi kewe souläng, pun kich meinisin kifetin ewe inisin Kraist. ✧ ²⁶ Are oua song, ousap mwüt ngeni ämi song epwe emwenikemiilong lon tipis! Ousap amwöchü ämi song tori akkar epwe tupütü. ✧ ²⁷ Ousap mwüt ngeni Tefil an epwe sotunikemi pwe oupwe tipis. ²⁸ Eman mi sosolä me lom epwe ükütiu le solä, nge epwe achocho le angang pwe epwe wor met epwe lomot ngeni püsin i, epwe pwal tongeni alisi ekewe mi wöüngau. ²⁹ Esap wor kapas mi ngau epwe towu seni lon awemi, pwe kapas mi mürina chök, sokun kapas mi afefetai aramas o alisiir lon ar osupwang, pwe chokewe mi rongorong ngeni repwe feiöch ren. ³⁰ Ousap achouala Ngünmifel, ewe Ngünün Kot, oua pwau ren tori ewe ränin än Kot epwe angasakemi. ³¹ Oupwe atoaua senikemi sokun koum, chou me song. Ousap chüen akürang ngeni aramas ika turunufaser, ousap pwal chüen oput eman aramas. ³² Nge oupwe eäni kirikiröch o leluköch lefilemi, oupwe amusamusfengen usun chök Kot a amusala ämi tipis ren Kraist. ✧

5

Manau lon saram

5.1-20

¹ Pokiten ämi nöün Kot mi achengicheng, oupwe fokun apirü i. ² Chen epwe nemeni manauemi, usun Kraist a echenikich o fangala manuan fän itach pwe epwe eu asor mi pwoöch me eu lifang mi apwapwai Kot. ✧

³ Pokiten ämi nöün Kot aramas mi pin, esap pwüng pwe sokopaten föförün lisowu ika mocheisou ika tipemong epwe fen mwo nge fis ika föü lefilemi. ⁴ Esap pwal fichitikemi pwe oupwe apasa sokun kapas mi ngau, kapas mi lomotongau me kapasen turunufas, nge oupwe chök kilisou ngeni Kot. ⁵ Oupwe fokun silei, pwe esap wor eman mi föri sokun föförün lisowu ika mocheisou ika tipemong (pun tipemong a wewe ngeni angang ngeni anümwäl) epwe angei och feiöch seni lon ewe Mwün Kraist me Kot. ⁶ Ousap tup ren än aramas kapasen atuputup, pun ren ekei sokun föför än Kot song epwe tori chokewe mi lükümach ngeni. ⁷ Iei mine ousap chiechi ngeni ekei sokun aramas.

⁸ Me lom oua nom lon rochopwak, nge iei oua nom lon saram pokiten oua wiliti nöün ach Samol aramas. Iei mine oupwe manaueni eu manau

✧ **4:22:** Kol 3.9 ✧ **4:24:** Ken 1.26; Kol 3.10 ✧ **4:25:** Sek 8.16 ✧ **4:26:** Kölf 4.4 ✧ **4:32:** Kol 3.13 ✧ **5:2:** Eks 29.18; Kölf 40.6

mi nom fän ewe saram, ⁹ pun ewe saram a atoto eu räs mi watte ren sokun föför mürina, föförün pwüng me let. ¹⁰ Oupwe achocho le kütta mine ach Samol epwe pwapwa ren. ¹¹ Ousap eti aramas le föri ekewe föför mi lomotongau, ekewe föförün rochopwak, nge oupwe sarifiir, pwe repwe pwäwu lon saram. ¹² Pun a fokun asäw ach sipwe mwo nge föüni ekewe föför ra föri le monomon. ¹³ Nge lupwen ekewe mettoch meinisin ra pwäwu lon saram, mürin enletin sokosokun manauer a pwäöchüla. ¹⁴ Pun meinisin mine a pwäöchüla a saram. Iei mine a mak:

“En chon möür, kopwe pwätä,
kopwe towu seni mäla,
pun Kraist epwe asaramok.”

¹⁵ Iei mine oupwe afalikemi lon mine oua föri. Ousap föri föförün chon tiparoch, nge oupwe föri föförün chon tipachem. ¹⁶ Oupwe alomota fansoun manauemi, pun ekei rän ra ngau. ✧ ¹⁷ Iei mine ousap föri föförün chon tiparoch, nge oupwe achocho le kütta met letipen ach Samol fän itemi.

¹⁸ Ousap apuchakemi ren wain, pun ei epwe afeiengauakemi. Nge oupwe urela ren Ngünmifel. ¹⁹ Oupwe aea le kapasfengen lefilemi ekewe kölfel, ekewe kölün lamalam me ekewe köl mi pin. Oupwe kölü ekewe kölün lamalam me ekewe kölfel ngeni ach Samol, oupwe mwareiti i lon lelukemi. ²⁰ Oupwe kilisou fansoun meinisin ren mettoch meinisin ngeni Samach Kot fän iten ach Samol Jesus Kraist. ✧

Pwüngün lefilen pwüpwülü

5.21-33

²¹ Oupwe aleasochisfengen lefilemi pokiten oua asamolu Kraist.

²² Ämi fefin kana, oupwe aleasochisi pwülüemi usun chök ämi oupwe aleasochisi ach Samol. ✧ ²³ Pun eman mwän möküren pwülüan usun Kraist möküren mwichefel. Kraist ewe Chon Amanauen mwichefel, nge mwichefel iei inisin Kraist. ²⁴ Iei usun chök pwal ekewe fefin repwe fokun aleasochisi pwülüer kewe lon mettoch meinisin usun chök mwichefel a aleasochisi Kraist.

²⁵ Ämi mwän kana oupwe echeni pwülüemi usun Kraist a echeni mwichefel o fangala manauan fän itan. ✧ ²⁶ A föri ei pwe epwe apini mwichefel fän iten Kot, a limeti mwichefel ren koluk, iei an kapas, ²⁷ fän iten an epwe äütai mwichefel fän püsin itan lon unusen lingöchün, pwe esap wor tikitikipwülün are lemomon are och limengau, nge epwe pin o unusöch. ²⁸ Ina usun ekewe mwän repwe echeni pwülüer usun chök ar püsin echeni inisiir. Eman mwän mi echeni pwülüan a echeni püsin i. ²⁹ Esap fokun wor eman a oput püsin inisin, nge a fokun amongöni o tümwünü usun chök met Kraist a föri ngeni mwichefel. ³⁰ Pun oukich meinisin kifetin inisin. ³¹ Usun a mak lon ekewe Toropwe mi Pin, “Iei mine eman mwän epwe likitala saman me inan o pache ngeni pwülüan, nge ekewe ruoman repwe wiliti eu chök inis.” ✧ ³² Iei eu monomon mi fokun watte a pwä lon ei wokisin, nge usun ai weweiti pwe a wewe ngeni Kraist me mwichefel. ³³ Nge a pwal wewe ngenikemi: Ämi mwän meinisin oupwe fokun echeni en me pwülüan usun ämi echeni püsin inisimi, nge ämi fefin meinisin oupwe meniniti pwülüemi.

✧ 5:16: Kol 4.5 ✧ 5:20: Kol 3.16-17 ✧ 5:22: Kol 3.18; 1.Pet 3.1 ✧ 5:25: Kol 3.19; 1.Pet 3.7

✧ 5:31: Ken 2.24

6

Pwüingün lefilen nau me sam me in
6,1-4

¹ Ämi nau kana, oupwe aleasochisi sememi me inemi lon ach Samol, pun iei met mi pwüing pwe oupwe föri. ✧ ² “Kopwe asamolu semom me inom,” iei ewe aeuin allük a riri ngeni eu pwon, ³ “pwe kopwe feiöch me manauatam won fanüfan.” ✧

⁴ Ämi sam me in ousap föri ngeni nöümi kana mine repwe song ren. Nge oupwe tümwünüöchür fän ämi fönöör o öüröürer lon ach Samol. ✧

Pwüingün lefilen amanau me ar samol
6,5-9

⁵ Ämi amanau, oupwe aleasochisi ämi samol lon ei fanüfan fän niuokus me chechek. Oupwe föri ei fän wenecharen lelukemi usun chök nge oupwe aleasochisi Kraist. ⁶ Ousap föri chök ei lupwen ra nenengenikemi pokiten oua mochen ar repwe aitöchükemi, nge seni unusen letipemi oupwe föri letipen Kot usun eman nöün Kraist amanau. ⁷ Ämi amanau oupwe föri ämi angang fän pwapwa usun ämi oupwe angang ngeni ach Samol, nge sap ngeni aramas. ⁸ Oupwe chechemeni pwe ach Samol epwe liwini ngeni eman me eman an föför mürina, ese lifilifil ika i eman amanau ika i eman chon ngas. ✧

⁹ Ämi samol kana, oupwe pwal föri usun chök ngeni nöümi amanau, oupwe ükütiu le aniuokusur. Oupwe chechemeni pwe ämi me nöümi kewe amanau oua nöün ewe eman chök Samol lon läng, i ewe esap lifilifil aramas. ✧

Än souläng pisekin maun ngeni rochopwak
6,10-20

¹⁰ Iwe, iei ai kapasen lesopolan: Oupwe apöchökülakemi lon ach Samol pwal lon pöchökülen an we manaman. ¹¹ Oupwe pwilitalong womi ekewe pisekin maun Kot a ngenikemi, pwe oupwe tongeni üpöchökül ngeni än ewe Tefil angangen atuputup. ¹² Pun sisap maun ngeni fituk me cha, nge sia maun ngeni ekewe anün rochopwak mi nom fän läng, ngeni ekewe anüsamol, ngeni ekewe anüsor, pwal ngeni ekewe ngününgau mi nemeni aramas lon ei fanüfan mi rochopwak. ¹³ Iei mine oupwe pwilitalong womi än Kot kewe pisekin maun iei! Mürin, lupwen epwe war ewe rän mi ngau, oupwe tongeni pworacho ngeni än ewe chon oputemi maun ngenikemi. Iwe, mürin oupwe chök üpöchökül tori lesopolan ämi maun. ¹⁴ Iwe, oupwe amolakemi, oupwe peliti ngeni lukalapemi let, oupwe üföüf pwüing pwe iei ämi chechen leupw mi för seni mächä, ✧ ¹⁵ nge oupwe ipweipw susun molotä ngeni ämi oupwe aronga ewe Pworausen Manau mi wor kinamwe lon. ✧ ¹⁶ Iteiten fansoun meinisin oupwe lükü Kot pwe ina ämi epetin maun, pwe oupwe tongeni kunu ngeni ekewe föün esefich mi pulopulen ekkei seni ewe Eman mi Ngau. ¹⁷ Oupwe angei ewe Manau pwe ina inwemi akau, pwal ewe kapasen Kot pwe ina nöümi ketilas ewe Ngünmifel a ngenikemi. ✧ ¹⁸ Oupwe föri ekei mettoch meinisin lon ämi iotek ngeni Kot pwe epwe alisikemi. Oupwe iotek won met oua föri usun Ngünmifel a emwenikemi. Iei popun ämi oupwe mamasa o tupwöl fansoun meinisin, oupwe iotek fän iten ekewe chon pin meinisin iteiten

✧ 6:1: Kol 3.20 ✧ 6:3: Eks 20.12; Tut 5.16 ✧ 6:4: Kol 3.21 ✧ 6:8: Kol 3.22-25 ✧ 6:9: Tut 10.17; Kol 3.25; 4.1 ✧ 6:14: Ais 11.5; 59.17 ✧ 6:15: Ais 52.7 ✧ 6:17: Ais 59.17

fansoun meinisin. ¹⁹Oupwe pwal iotek fän itei pwe Kot epwe aiti ngeniei ekewe kapas üpwe apasa lon ai afalafal, pwe üpwe pwora le kapas o asile ngeni aramas monomonen ewe Pworausen Manau. ²⁰Pun ngang eman chon künö fän iten ei Pworausen Manau, inamwo ika ngang üa nom lon imwen fötek iei. Oupwe iotek pwe üpwe pwora le apasatä ewe Pworausen Manau, pun iei wisei.

Kapasen lesopolan

6.21-24

²¹Tikikus pwiich ei mi achengicheng, pwal i ewe chon angang mi allükülük lon ewe angangen ach Samol epwe apworausä ngenikemi pworausäi meinisin, pwe oupwe silei usun met üa föri o pwal usun nonomi. ☆ ²²Ina popun üa tinala i remi, pwe epwe apworausä ngenikemi usun nonomum, epwe pwal apöchöküla letipemi. ☆

²³Samach Kot me ach Samol Jesus Kraist epwe ngenikemi ämi pwiich lon Kraist kinamwe, chen me lükü. ²⁴Än Kot ümöümöch epwe nonom remi meinisin ämi mi echeni ach Samol Jesus Kraist ren ewe chen esap ükütü.

Nöün Paulus Toropwe ngeni ekewe Souläng lon Filipi

Kapas akom

I. Chon makkei ei toropwe: Ewe soukünü Paulus.

II. A mak ngeni iö: Ngeni ekewe souläng lon Filipi lupwen a nom lon imwen fötek lon Rom.

III. Itelapemongen ei toropwe: Oupwe fokun pwapwa! (4.4)

IV. Kapas aüchean ei toropwe: Jesus Kraist ach Samol.

V. Masouen ei toropwe: Paulus a mak nöün ei toropwe ngeni chon ewe mwichefel lon Filipi, iei aeuin mwichefel lon Europe a fisitä ren än Paulus angang ngeni. Filipi a nom lon ewe fanü Masetonia mi nom fän nemenien mwün Rom. Paulus a mak ei toropwe lupwen a nom lon imwen fötek lupwen fansoun a nom lon osukosuk me ren ekoch chon angang ngeni Kot mi ü ngeni, a pwal riaföü ren ekewe afalafal mi mwäl aramas ra afalafala lon ewe mwichefel Filipi. Nge masouen nöün ei toropwe a pwärätä ngenikich usun pwapwa me apilükük mi pop seni alololun än Paulus lükü Jesus Kraist.

Popun än Paulus makkei ei toropwe pwe epwe kilisou ngeni ekewe souläng lon Filipi fän iten ewe lifang ra tinala ren, pwe epwe alisi lon fansoun an osupwang. A aea ei fansoun an epwe apöchöküleer lon ar souläng, pwe repwe tipepworä o apilüköch, inamwo ika i me ir ra nom lon riaföü. A fokun tüngor ngeniir pwe repwe eäni än Jesus tipetekison, nge resap nom fän nemenien apangau me lamalamtekia. A achema ngeniir, pwe ewe manau ra manaueni lon Kraist eu lifangen än Kot ümömöch ngeniir ra angei ren ar lükü, nge esap ren ar aleasochis ngeni pwüngün än ekewe chon Juta we lamalam. A makkei usun ewe pwapwa me kinamwe Kot a fang ngeni chokewe mi nom lon Kraist.

Ei toropwe a fokun pwärätä usun pwapwa, apilüköch, tipeeufengen me likitü lon manauen souläng me ar lükü. A pwal pwäräla alololun än Paulus tongei chon ewe mwichefel lon Filipi.

VI. Tettelin masouen ei toropwe:

Kapas akom 1.1-11

Usun lalalapen manauen Paulus 1.12-26

Ewe manau lon Kraist 1.27-2.18

Ekewe akot fän iten Timoty me Epafrotitus 2.19-30

Kapasen fön usun ar repwe afäliir ren ekewe chon oputer me ekewe mettoch repwe afeiengauer 3.1-4.9

Paulus me chiechian kewe chon Filipi 4.10-20

Kapasen lesopolan 4.21-23

Kapong

1.1-2

¹ Äm Paulus me Timoty, äm nöün Kraist kewe chon angang, aia kapong ngeni ekewe chon pin lon Kraist Jesus mi nom lon Filipi, pwal ngeni ekewe soumasen mwichefel me ekewe sounkoa: * ² Samach Kot me ach Samol Jesus Kraist epwe ngenikemi ümömöch me kinamwe.

Paulus a iotek fän iten ekewe souläng lon Filipi

1.3-11

³ Ngang üa kilisou ngeni ai Kot fansoun meinisin lupwen ai chechemenikemi. ⁴ Fansoun meinisin lupwen üa iotek fän itemi, üa iotek fän pwapwa ⁵ pokiten ämi oua alisieï lon ai angangen arongafeili ewe Pworausen Manau seni lepoputän ai nom remi tori ikenai. ⁶ Üa fokun lükü, pwe Kot ewe mi popuetä lomi ei angang mi mürina epwe pwal sopwela tori an epwe wesöchüela lon ewe Ränin än Kraist Jesus epwe liwinsefälito. ⁷ Üa chechemenikemi lon letipei fansoun meinisin, iei mine a pwüng ngeniei an epwe iei usun ai tongekemi. Pun ämi meinisin oua chieneniei lon ei angang mi aüchea Kot a ngeniei, sap chök lon ei fansoun üa nom lon imwen fötek, nge pwal lon ewe fansoun lupwen üa ngasala pwe üpwe peni ewe Pworausen Manau o anüküchara. ⁸ Kot i nei chon pwärätä pwe a let mine üa apasa, pwe üa tongekemi meinisin, usun chök Kraist Jesus a fen tongekemi.

⁹ Ngang üa iotek pwe ämi chen epwe fokun lalapala lefilemi, oupwe pwal silei mine a let o weweöchiti mettoch meinisin, ¹⁰ pwe oupwe tongeni filätä mine a fokun mürina. Mürin oupwe limöch, esap pwal wor och mine oupwe mwäl won lon ewe Ränin än Kraist epwe liwinsefäl. ¹¹ Iwe, manauemi epwe urela ren sokun föföör mürina Jesus Kraist chök a tongeni afisätä, pwe Kot epwe ling o iteüöch ren.

Kraist chök i popun ach manau

1.12-30

¹² Iwe, ämi pwii kana, üa mochen pwe oupwe silei pwe ekewe mettoch mi fis ngeniei ra wesewesen alisi chöülan ewe Pworausen Manau. ¹³ Iei popun ekewe sounfiu mi mamasa imwen Sisar pwal ekewe ekoch aramas ra silei pwe üa nom lon imwen fötek pokiten ngang eman chon angang ngeni Kraist. ✧ ¹⁴ Ren ai nonom lon imwen fötek a fis pwe chomong pwiich kewe souläng ra apilükülükü ach Samol, iei mine a lapala ar pwora le afalafala ewe kapasen Kot, nge resap niuokus.

¹⁵ Ewer, ekoch me leir ra afalafala Kraist pokiten ra lolowo me anini, nge pwal ekoch ra afalafala ren öchün letiper. ¹⁶ Ätekei ra föri ei seni ar eäni chen, pokiten ar silei pwe Kot a ngeniei ewe angangen peni ewe Pworausen Manau, ¹⁷ nge ekewe ekoch resap afalafala Kraist fän wenecharen letiper, nge ren ar mochen kütta püsün ar, ra ekieki pwe repwe chök ariaföüüei lupwen üa nom lon imwen fötek.

¹⁸ Iwe, nge pwota üpwe lolilen ren? Ngang üpwe chök pwapwa pwe aramas ra afalafala Kraist lon sokopaten lalapal, ese lifilifil ika a pop seni och ekiek mi mwäl ika och ekiek mi pwüng. Ewer, üpwe chök sopwela le pwapwa, ¹⁹ pun üa silei pwe pokiten ämi iotek, pwal ren än Ngünün Jesus Kraist alisieï üpwe ngasala. ²⁰ Üa fokun ösüküsükü o apilükülükü pwe üsap achanü, pwe üpwe föri wisei, nge fansoun meinisin epwe wor ai tipepwora, fokun lon ei fansoun, pwe üpwe alinga Kraist lon unusen manau, ese lifilifil ika üpwe manau ika üpwe mäla. ²¹ Pun me rei Kraist ai manau, nge mäla ai feiöch. ²² Nge are ren ai üpwe sopwela le manau üa tongeni föri chomong sokun angang mi lomot, iwe, nge üsap silei mine üpwe filätä. ²³ Iei mine üa tiperüörü lefilen ekei ruu ekiek: Üa fokun mochen ai üpwe feila o nom ren Kraist, pun iei met epwe fokun

mürina, ²⁴ nge ren ai üpwe manau epwe watte lomotan fänäsengesimi. ²⁵ Üa fokun lükü pwe met üa apasa a pwüng, iei mine üa silei pwe üpwe nonometiu. Üpwe nonom remi meinsin pwe üpwe alisikemiitä pwe oupwe fefeitä o pwapwa lon ämi lükülük, ²⁶ pwe lupwen üpwe liwinsefäl o nonom remi epwe fokun wor popun ämi oupwe aingaing lon Kraist Jesus fänäsengesi. ²⁷ Iwe, iei ewe mettoch mi aüchea, pwe lapalapen manauemi epwe fich ngeni ewe Pworausen Manau usun Kraist. Mürin ese lifilifil ika ngang üpwe tongeni feila churikemi ika üsap, nge üpwe rongorong pwe oua üppos lon eu chök popun, oua pwal achocho le ütä lon eu chök tip fän iten ämi lükü ewe Pworausen Manau. ²⁸ Ousap niuokusiti ekewe aramas mi ü ngenikemi. Oupwe tipepworä fansoun meinsin. Ei epwe alletätä ngeniir pwe ir ra lus, nge ämi oua win, pokiten Kot a fang ngenikemi ämi win. ²⁹ Pun Kot a ngenikemi ewe wis mi aüchea pwe oupwe angang ngeni Kraist, sap chök ren ämi oupwe lükü i, nge pwal ren ämi oupwe riaföü fän itan. ³⁰ Iei ämi oua tongeni etiei lon ewe fiu üa eäni fän iten ai peni ewe Pworausen Manau. Iei pwal chök ewe fiu oua küna me rei me lom, nge oua pwal rongorong pwe üa chüen eäni iei. ☆

2

Än Kraist tekison me an tekia

2.1-11

¹ Iwe, manauemi lon Kraist a apöchöküla letipemi, an chen a echipakemi, oua chiechifengen me Ngünmifel, oua pwal eäni kirikiröch me tongfengen lefilemi. ² Iei mine üa pese ngenikemi ämi oupwe föri met ai pwapwa epwe unus ren. Oupwe eäni eu chök ekiek, eu chök chen, oupwe pwal ngün eu me tipeeu. ³ Ousap föri föförün apangau are föri och ekiekin sikesisik, nge oupwe tipetekisonfengen lefilemi, ousap ekieki pwe oua mürina seni ekewe ekoch. ⁴ Ousap chök ekieki en me an feiöch, nge oupwe pwal ekieki feiöchün chienemi. ⁵ Oupwe eäni ewe chök ekiek Kraist Jesus a eäni: ⁶ A lapalapeni lapalapen Kot, nge esap ekiekin amwöchünükü an wewe ngeni Kot usun ach amwöchünükü mettochüch. ⁷ Nge seni lon letipan a fangala meinsin mine a eäni, pwe a lapalapeni lapalapen eman chon angang. A wiliti ususun aramas o pomweni pomwen aramas. ⁸ A püsin atekisonatiu o eäni aleasochis tori mäla, tori an mäla won iräpenges. ⁹ Iei mine Kot a atekiatai won eu leni mi fokun tekia, a pwal ngeni eu it mi iteföüla seni it meinsin. ¹⁰ Iwe, chokewe meinsin mi nom won läng me fanüfan pwal failol repwe fotopwäsuk o asamolu ewe it iten Jesus, ¹¹ nge ir meinsin repwe pwärätä pwe Jesus Kraist i Samol, pwe Kot Sam epwe ling ren. ☆

Oupwe tin usun eu saram won fanüfan

2.12-18

¹² Iei mine chienei kana mi achengicheng, usun ämi oua aleasochisiei fansoun meinsin lupwen üa nonom remi, iei usun a men aüchea ämi oupwe aleasochisiei lupwen üa toau senikemi. Oupwe achocho le anganga püsin ämi küna manau fän niuokus me chechech, ¹³ pun Kot ewe a angang lomi, epwe afisätä ämi mochen me ämi tufichin apwönüetä letipan.

¹⁴ Oupwe föri ämi angang meinisin, nge ousap lal are anini, ¹⁵ pwe esap wor och mi mwäl lon manauemi, nge oupwe limöch usun nöün Kot kana mi unusöch ra nonom won ei fanüfan mi ur ren aramas mi kirikiringau me tipis. Oupwe fokun tittin lefler usun ekewe fü ra tittin fän läng, ✨ ¹⁶ lupwen oua ngeniir ewe Kapasen Manau. Are epwe iei usun mine oua föri, epwe wor popun ai üpwe sikäsinikemi lon ewe Ränin än Kraist epwe liwinsefäl, pun epwe pwä pwe ai achocho me ai angang weires esap lomotongau. ¹⁷ Nge inamwo ika chai epwe ninnila usun eu asoren ün won ewe asor me ewe angang mi fis ren ämi lükülük, ngang üpwe chök pwapwa o ämi meinisin oupwe etiei lon ai pwapwa. ¹⁸ Ina usun ämi oupwe pwal pwapwa, nge ngang üpwe etikemi lon ämi pwapwa.

Timoty me Epafrotitus

2.19-30

¹⁹ Iwe, are iei letipen ach Samol, üa apilükülüköch pwe üpwe tongeni müttir tinala Timoty remi, pwe letipei epwe pöchökületä lupwen üpwe rongorong ewe pworaus usumi. ²⁰ I chök ewe eman aia wewefengen lon äm ekiék, i a pwal wesewesen chüngükemi. ²¹ Pun ekewe ekoch ra chök ekiéki püsin ar, nge resap ekiéki usun ewe angangen Jesus Kraist. ²² Iwe, ämi oua püsin silei usun lomotöchün ätei, pwe i me ngang aia angangfengen fän iten ewe Pworausen Manau usun chök eman nau a angangfengen me saman. ²³ Iei mine üa apilüköch ai üpwe tinala ätei remi lon ewe chök otun üa silei met epwe fis ngeniei lon ai nom lon fötek. ²⁴ Nge ngang üa apilükülük lon ach Samol pwe püsin ngang üpwe tongeni müttir feila remi. ²⁵ Ngang üa ekiéki pwe epwe öch ai üpwe tinsefäliela remi pwiich Epafrotitus, ätei a etiei le angang pwal le maun, ätewe ämi oua akünöü pwe epwe alisie. ²⁶ Epafrotitus a fokun positikemi meinisin, a pwal fokun lolilen pokiten oua rongorong pwe a samau. ²⁷ Enlet, a fokun samau o arap ngeni an epwe mäla. Nge Kot a tongei, nge sap i chök pwe pwal ngang, pun esap mochen ai üpwe tolong lon watten letipeta. ²⁸ Iei mine üa fokun mochen amüttirala remi, pwe oupwe pwapwasefäl lupwen oupwe küna i, nge ai lolilen epwe wesila. ²⁹ Iwe, oupwe etiwa i fän pwapwa usun eman pwimi lon ach Samol. Oupwe meniniti ei sokun aramas, ³⁰ pun a fangala manauan o arapakan ngeni an epwe mäla fän iten än Kraist angang, pwe epwe siwilikemi le alisie, lupwen ämi ousap tongeni.

3

Ewe pwüng mi longolong won ach lükü Kraist

3.1-12

¹ Ämi pwii kana, iei amüchülan ai kapas ngenikemi: Oupwe pwapwa lon ach Samol. Üsap weires ren ai üpwe aliwinisefäli mine üa fen makkei ngenikemi me mwan, nge oupwe fen feiöch ren are üpwe föri iei usun. ² Oupwe afälükemi ren chokewe mi föri föföör mi ngau, ra usun chök kolak. Ir ätekewe mi apöchöküla an epwe fis reirei won inisin aramas. ³ Sap ir, nge kich sia angei ewe enletin sirkomsais, pun sia fel ngeni Kot ren Ngünün, sia pwapwa lon manauach lon Kraist Jesus, nge sisap anomu ach apilükülük won met sia föri ngeni inisich. ⁴ Ewer, ngang üa tongeni anomu ai apilükülük won ena sokun lapalap. Are eman a ekiéki pwe mi wor popun an epwe tongeni anomu an apilükülük won ei sokun

lapalap, ngang won inisi a fen wor rei ekoch popun mi watte: ⁵ Ngang üa sirkomsais lon awaluen ränin mürin ai uputiu, ngang eman wesewesen re Israel seni chök ai uputiu, seni lon ewe ainangen Peniamin, ai kewe lewo meinsin ir re Ipru. Ngang eman Farisi lon ai apwönüetä än ekewe chon Juta kewe Allük, ⁶ üa pwal fokun tiliken lon ai ariaföüü ekewe chon lükü Jesus. Are eman aramas a ekieki pwe a tongeni küna pwüing ren an aleasochisi ekewe Allük, ngang üa apwönüetä meinsin. ⁷ Nge ekei mettoch meinsin üa aita ngeni feiöch me lom, iei üa aita ngeniir feiengau pokiten Kraist. ⁸ Nge sap ikei chök. Ngang üa ekieki pwe mettoch meinsin ra fokun aücheangau fän iten ewe eu mi fokun aüchea seni meinsin, iei ai silei Kraist Jesus ai Samol. Pun fän itan üa pöütala meinsin, üa ekieki pwe meinsin ra usun chök pipi lon lenien koturula, pwe üpwe eäni Kraist ⁹ o wesewesen eufengen me i. Üsap chüen eäni püsin ai pwüing, ewe sokun pwüing üa angei ren ai aleasochisi ekewe Allük. Iei üa eäni ewe pwüing a toriei ren ai lükü Kraist, ewe pwüing mi feito seni Kot o a longolong won ai lükü Kraist. ¹⁰ Üa fokun mochen ai üpwe silei Kraist o mefi manamanen an manausefäl, üpwe pwal eti i lon an riaföü, pwe üpwe wewe ngeni i lon an mäla. ¹¹ Pun üa apilükülükü pwe ngang üpwe eti ewe mwen manausefäl seni mäla ngeni manau.

Ach achocho ngeni sopolan ach kitir

3.12-21

¹² Üsap apasa pwe üa fen apwönüetä ekei mettoch ika üa fen unusöchüla lon. Nge üa chök achocho ngeni ai üpwe angei ewe win, pun iei mine Kraist Jesus a turufiei ren. ¹³ Ämi pwii kana, ngang won inisi üsap ekieki pwe üa fen angei ewe win, nge eu mettoch üa föri: Üa manlükala mine a nom lükisöküri, nge üa achocho ngeni ai üpwe tori mine a nom mwei. ¹⁴ Iei mine üa säwenewen ngeni ewe sopolan ai üpwe angei ewe win, iei än Kot kö ren Kraist Jesus ngeni ewe manau esemüch.

¹⁵ Kich meinsin mi eäni mirit lon ach souläng sipwe ekiekipökü usun ekei mettoch. Nge are ekoch leimi a sokola ar ekiek, Kot epwe afatöchü ngenikemi. ¹⁶ Nge ousipwe chök fefetal ngeni mwach lon pwüingün ekewe allük sia fen aleasochisi tori iei.

¹⁷ Ämi pwii kana, oupwe chök sowwela le apirüei. Oupwe nenengeni chokewe mi föri sokun föföri mi pwüing am aia aiti ngenikemi. ¹⁸ Ngang üa fen ürenikemi ei fän chomong me mwan, nge iei üpwe aliwinisefäli ngenikemi fän ai kechü: A wor chomong aramas mi manaueni eu sokun manau a pwärätä pwe ir ra oputa ewe iräpengesin Kraist. ¹⁹ Lesopolan manauer repwe nom lon hell, pun ar kot iei mochenian inisiir. Ra sikäsini mine repwe säw ren o ekieki chök mettochun lon ei fanüfan. ²⁰ Nge kich sia chon wiliposun läng. Sia ösüküsükü eman Chon Amanau ach Samol Jesus Kraist pwe epwe feito seni läng, ²¹ i ätewe epwe awili inisich inisin tekison pwe epwe wewe ngeni inisin we mi ling ren an we manaman a tongeni anomu mettoch meinsin fän nemenian.

4

Kapasen öüröür

4.1-9

¹ Iwe, ämi pwii kana, üa fokun echenikemi o positikemi. Ämi oua apwapwaei o üa sikäsini-kemi. Iei mine, ämi pwii kana mi achengicheng, oupwe nüküchar lon manauemi lon ach Samol.

² Ngang üa tüngormau ngenikemi Eutia me Sintike, ouse mochen oupwe tipeeufengen usun chök pwipwi lon ach Samol. ³ Iwe, pwal en chienei chon angang mi allükülük, üa tüngor ngonuk pwe kopwe alisi ekei fefin, pun ra fokun angang weires o etiei le arongafeili ewe Pworausen Manau, irfengen me Klement me pwal ekewe ekoch mi etiei lon ewe angang, ir chokewe meinisin mi mak iter lon än Kot we puken iten chon manau.

⁴ Oupwe pwapwa lon ach Samol fansoun meinisin, üpwe apasasefäli: Oupwe pwapwa! ⁵ Oupwe tipepwetete ngeni aramas meinisin. Ach Samol a arapoto. ⁶ Ousap lolilenäsini och mettoch, nge lon ämi osupwang meinisin oupwe iotek o tüngor ngeni Kot pwe epwe alisikemi. Oupwe tüngor fansoun meinisin fän kilisou. ⁷ Iwe, än Kot kinamwe mi tekia seni ach tongeni weweiti epwe tümwünü lelukemi me ekiekimi lon Kraist Jesus.

⁸ Iwe, amüchülan ai kapas, ämi pwii kana, oupwe amwöchünükü lon ämi ekiek ekei mettoch mi mürina o amwarar: mettoch mi let me aüchea, mettoch mi pwüng me limöch, mettoch aramas ra efich me meniniti. ⁹ Oupwe apwönüetä mine oua kaiö o angei seniei, mine oua rong seni ai kewe kapas o küna seni ai kewe föför. Iwe, Kot ewe mi ngenikich kinamwe epwe nonom remi.

Kapassen kilisou ren ekewe lifang

4.10-20

¹⁰ Iwe, a fokun watte ai pwapwa lon ach Samol, pwe mürin fansoun langatam oua tongeni pwärisefäli ämi alisie. Esap wewen pwe oua ükütiu le alisie, nge esap chök wor alen ämi oupwe pwäri ngeniei. ¹¹ Üsap apasa ei pokiten a wor ai osupwang, pun üa asipaei ai üpwe menemenöch ren mine a wor rei. ¹² Üa silei ai üpwe nonom lon wöüngau pwal ai üpwe nonom lon wöümong. Üa kaiö ewe monomon pwe üpwe kinamwe ekis meinisin me fansoun meinisin, ese lifilifil ika üa möt ika üa echik, ika piseki a somwosomwola ika üa mwelele. ¹³ Meinisin a ki ngeniei ren Kraist ewe mi atufichiei.

¹⁴ Nge a fokun öch pwe oua alisie lon ai osupwang. ¹⁵ Iwe, ämi chon Filipi, oua fokun silei, pwe lupwen üa feila seni Masetonia, lon ewe fansoun üa popuetä le afalafala ewe Pworausen Manau, ämi na chök mwichefel a alisie, ämi chök oua lifang ngeniei usun mine üa lifang ngenikemi. ✧ ¹⁶ Lupwen üa nom lon Tesalonika oua tinato rei ai alilis fän ekoch pwe üsap osupwang. ✧ ¹⁷ Esap wewen pwe üa chök mochen angei lifang, nge üa mochen ai üpwe küna watten ämi föför mürina epwe kapach ngeni mine oua fen föri. ¹⁸ Iei toropwen ekewe mettoch meinisin oua ngeniei, ewer, a fen somwosomwola. Iei a wor rei mettoch meinisin, pun üa angei seni Epafrotitus ekewe lifang oua tinato rei. Ekei lifang ra usun chök eu asor ngeni Kot mi poöch, eu lifang Kot a etiya o pwapwa ren. ✧ ¹⁹ Nge ai Kot epwe ngenikemi meinisin mine oua osupwang ren lon wöün mi somwola lon Kraist Jesus. ²⁰ Ach Kot, i Samach epwe küna ling tori feilfeilachök! Amen.

*Kapongen lesopolan**4.21-23*

²¹ Ai kapong ngeni ekewe chon pin meinisin ir nöün Kraist Jesus. Pwiich kewe souläng mi nom rei ra pwal kapong ngenikemi. ²² Ekewe chon pin meinisin ra kapong ngenikemi, lapalan chokewe mi nom lon imwen Sisar. ²³ Ümömöchün ach Samol Jesus Kraist epwe nonom remi meinisin. Amen.

Nöün Paulus Toropwe ngeni ekewe Souläng lon Kolose

Kapas akom

I. Chon makkei ei toropwe: Ewe soukünö Paulus

II. A mak ngeni iö me fansoun an mak: Ngeni ekewe souläng lon Kolose, eli a mak lefilen ekewe ier 60 me 64 A.D. lupwen a nom lon imwen fötek lon Rom.

III. Itelapemongen ei toropwe: Kraist möküren mwichefel.

IV. Kapas aüchean ei toropwe: Än Kraist ling me lingen an angang.

V. Masouen ei toropwe: Paulus a makkei nöün ei toropwe ngeni chon ewe mwichefel lon Kolose. Kolose eu telinimw lon Asia Kisikis ötiuen Efisos. Ei mwichefel esap fisitä ren än Paulus angang ngeni, nge a nonom lon ewe leni ia Paulus a angang ie, pun a tinala chon angang seni Efisos, iei samolun telinimwen ewe kinikinin fanü lon Asia mi nom fän nemenien mwün Rom. Paulus a rongorong pwe a wor chon afalafal chofona lon ewe mwichefel lon Kolose mi pese ngeni aramas, pwe are ra mochen silei Kot o eäni unusen ewe manau esemüch repwe fokun fel ngeni ekoch anüsamol me anüsor. Ekei chon afalafal ra pwal apasa pwe aramas repwe fokun atolonga inisir fän sokun angangepin usun chök sirkomsais, repwe pwal fokun tümwünü ekewe pin usun pinin mongö me pwal ekoch pinin sokun mettoch.

Paulus a makkei ei toropwe pwe epwe pölüeni ekei sokun afalafal ren an aiti ngeniir ewe enletin manau fän iten souläng. Aüchean an kewe kapas, pwe Jesus Kraist a tongeni ngenikich unusen ewe manau esemüch, nge ekewe ekoch sokun lükü me föföör ra wesewesen atokakichela seni Kraist. Kot a förätä fanüfan ren Kraist, nge ren Kraist epwe pwal aliwinisefäli ngeni püsin i. Ren ach eufengen me Kraist chök a wor ach apilükülük ngeni ewe manau esemüch fän iten chon fanüfan. Mürin Paulus a afata usun lomoten ei afalafal mi aüchea fän iten manauen ekewe chon lükü.

A aüchea ach sipwe silei pwe Tikikus, ewe mi uwei ei toropwe ngeni ekewe souläng lon Kolose fän iten Paulus, a wor eman chiechian itan Onesimus, i ewe amanau Paulus a makkei ewe toropwe ngeni Filimon pokitan.

VI. Tettelin masouen ei toropwe:

Kapas akom 1.1-8

Lapalapen Kraist me an angang 1.9-2.19

Ewe manau mi fö lon Kraist 2.20-4.6

Kapasen lesopolan 4.7-18

Kapong

1.1-2

¹Ngang Paulus eman nöün Kraist Jesus soukünö ren letipen Kot, pwal pwiich ei Timoty, ²aia kapong ngeni ekewe chon pin lon Kolose, ir pwiich kewe mi allükülük lon Kraist: Samach Kot epwe fang ngenikemi ümöümöch me kinamwe.

Eu iotekin kilisou

1.3-14

³ Äm aia kilisou ngeni Kot Semen ach Samol Jesus Kraist fansoun meinisin lupwen aia iotek fänäsengesimi. ⁴ Pun aia rongorong usun ämi lükü Kraist Jesus, pwal usun ämi echeni ekewe chon pin meinisin. ⁵ Lupwen ewe Pworausen Manau mi enlet a akomwen torikemi, oua rongorong usun ewe apilükülük mi pop seni ewe Pworausen Manau. Iei mine ämi lükülük me chen a longolong won met oua apilükülük a iseis lon läng fän itemi. ⁶ Ei Pworausen Manau a akatoto feiöch, a chöfetal won unusen fanüfan usun a fen fis lefilemi, seni ewe rän oua kärän popuetä le rongorong o weweöchiti än Kot ümöümöch mi wesewesen enlet. ⁷ Oua rongorong usun än Kot ümöümöch seni Epafras chienach we chon angang mi achengicheng, i nöün Kraist chon angang mi allükülük fänäsengesimi. ✧ ⁸ Epafras a pwal asile ngenikem usun ewe chen ewe Ngünmifel a fang ngenikemi.

⁹ Iei popun, seni ewe rän aia rongorong usumi, aisap ükütiü le iotek fän itemi. Aia tüngor ngeni Kot pwe epwe aurakemi ren tufichin silei letipan me unusen mirit me weweöchiti ekewe mettoch lon pekin ngün. ¹⁰ Mürin oupwe tongeni manaueni eu manau mi fich ngeni ach Samol o oupwe föri mine epwe pwapwa ren. Iwe, epwe wor sokopaten föför mürina lon manauemi, oupwe mämäritä lon ämi silei Kot. ¹¹ Iwe, oupwe pöchökülela ren sokun tufich meinisin mi pop seni an manaman me ling, pwe oupwe tongeni likitü o mosonotam. ¹² Oupwe pwapwa lon ämi kilisou ngeni Samach Kot, i ewe mi atufichikemi pwe oupwe eäni ekewe feiöch Kot a iseis fän iten ekewe chon pin lon ewe mwün saram. ¹³ A angasakich seni fän nemenien rochopwak o atolongakich lon mwün Nöün we mi achengicheng. ¹⁴ I ewe mi angasakichela, wewen pwe a amusala ach tipis. ✧

Usun Kraist me an angang

1.15-23

¹⁵ Kraist, ätewe sia tongeni küna, a lapalapeni lapalapen Kot, ewe sisap tongeni küna. I Nöün we mwänichi, a tekia seni förien Kot meinisin. ¹⁶ Pun ren Kraist Kot a föri mettoch meinisin lon läng me won fanüfan, ekewe mettoch sia tongeni küna me ekewe mettoch sisap tongeni küna, pwal ekewe ngün mi wor ar pöchökül me nemenem, ir samol mi fokun manaman. Kot a föri mettoch meinisin ren i o pwal fän itan. ¹⁷ Kraist a fen nonom mwen mettoch meinisin, nge lon i mettoch meinisin ra chufengen. ¹⁸ I möküren inisin we, iei ewe mwichefel. I popun pwe ewe inis a manau. I Nöün Kot, ewe mwänichi, Kot a amanauasefäli seni mäla, pwe i chök epwe tekia mwen mettoch meinisin. ✧ ¹⁹ Pun iei püsin än Kot akot, pwe unusen lapalapen Kot epwe unusolong lon Nöün we. ²⁰ Ren Nöün we Kot a akota pwe epwe achäsefäli mettoch meinisin ngeni püsin i. Kot a afisätä kinamwe ren chaan Nöün we mi pupula me won ewe iräpenges o a achäsefäli mettoch meinisin won fanüfan pwal lon läng ngeni püsin i. ✧

²¹ Me lom oua toau seni Kot o chon oputa i pokiten ekewe mettoch oua föföri o ekkekieki. ²² Nge iei oua chä ngeni Kot ren mälan Nöün we, pwe epwe ätäikemi mwen mesan fän pin me limöch, pwe esap wor och mine oua mwäl won. ²³ Nge ämi oupwe fokun sopwela lon ämi lükülük won eu longolong mi pöchökül o nüküchar, ousap fokun mwöküt seni ewe

apilükülüköch oua angei lupwen oua rongorong ewe Pworausen Manau. Iei ewe Pworausen Manau aramas ra arongafeili ngeni aramas meinisin won fanüfan, ngang Paulus üa pwal eman chon angang ngeni.

Än Paulus angang ngeni mwichefel

1.24-2.5

²⁴ Iwe, iei üa pwapwa lon ai riaföü fänäsengesimi, pun ren ai riaföü lon inisi üa alisi le aunusöchüela mine esamwo unus lon än Kraist riaföü fänäsengesin inisin we, iei ewe mwichefel. ²⁵ Kot a awisaei, pwe üpwe eman chon angang ngeni mwichefel, i ewe mi ngeniei ei angang ai üpwe föri pwe oupwe feiöch ren. Iei ewe angangen arongafeili unusen an we kapas, ²⁶ ewe monomon Kot a amonala seni aramas meinisin lon ekewe fansoun lomlom, nge iei a pwärala ngeni ekewe chon pin. ²⁷ Kot a mochen pwe epwe pwäri ngeniir an we monomon mi aüchea o ling a amolätä fän iten aramas meinisin. Iei ewe monomon pwe Kraist a nonom lomi, i ach apilükülük pwe sipwe eti lon an ling. ²⁸ Iei mine sia arongafeili Kraist ngeni aramas meinisin. Sia fönöör o asukuler ren sokun tipachem meinisin, pwe sipwe emwenato eman me eman mwen Kot fän ar unusöch lon Kraist. ²⁹ Üa fokun angang weires pwe epwe fis ei o üa aea ewe watten pöchökül Kraist a ngeniei, ewe a pwal akangang loi.

2

¹ Üa mochen asile ngenikemi usun ai weires le angang fän itemi, fän iten ekewe souläng lon Laotisea, pwal fän iten ekewe ekoch aramas resap sisileei. ² Popun ai föri ei, pwe letiper epwe pöchökületä, repwe pwal tipeefungen lon chen, pwe repwe mefi unusen aüchean ar weweöchiti o silei ewe monomonen Kot, iei i Kraist. ³ Kraist i ewe mi tongeni pwärala wöün än Kot tipachem me silelap meinisin mi monomonola. ⁴ Iei mine üa ürenikemi, pwe ousap tupula ren ekewe kapasen anini mi mwäl, inamwo ika ra usun chök kapas mi mürina. ⁵ Pun ikamwo ngang üsap nom remi ren inisi, nge üa nom remi lon ngüni. Üa pwapwa lupwen üa küna usun ämi tipeefungen o nükücharfungen lon ämi lükü Kraist.

Ewe manau mi unusöch lon Kraist

2.6-19

⁶ Pokiten oua fen etiwa Kraist Jesus pwe ämi Samol, oupwe le sopwela lon ämi nonom lon i. ⁷ Oupwe warar lon i usun efoch irä mi warar, oupwe fefeitä lon manauemi o pöpöchökülela lon ämi lükü Kraist usun oua fen kaiö. Iwe, oupwe fokun pwärätä ämi kilisou.

⁸ Oupwe tümwünükemi, pwe esap wor eman epwe liapenikemi ren atuputupun tipachemen fanüfan mi aücheangau, a pop seni sokopaten uruwon lom aramas ra aiti ngeni aramas, pwal seni ekewe ngün mi wor ar nemenem fän läng, nge esap pop seni Kraist. ⁹ Pun sokun Kot meinisin a nom lon Kraist lupwen a manau won fanüfan. ¹⁰ Iwe, lon Kraist oua tongeni manaueni eu manau mi unusöch. I a tekia seni ekewe ngün meinisin mi nemenem me ekewe manaman.

¹¹ Lon Kraist oua sirkomsais, sap ren ewe sirkomsais aramas ra föri, nge ren ewe sirkomsais Kraist a föri, pwe oua ngas seni fän nemenien fitukemi mi tipis. ¹² Pun lupwen oua papatais, oua eti Kraist le peias, nge lon ämi papatais oua pwal eti Kraist lon an manausefäl ren ämi lükü manamanen Kot mi amanauasefäli Kraist seni mäla. ✧ ¹³ Me lom oua

mäla lon pekin ngün pokiten oua tipis, pwal pokiten oua chon lükün Israel, esap nom remi än Moses kewe Allük. Nge iei Kot a amanauakemi fiti Kraist. A amusala ach tipis meinisin ✧¹⁴ o amola makken ach kewe liwinimang mi mak lon ewe toropwe fiti allükün kewe mi ü ngenikich. A angei senikich meinisin o chüföläüretä won ewe iräpenges. ✧¹⁵ Iwe, won ewe iräpenges Kraist a awesi pöchökülen ekewe ngün mi nemenem o manaman. A asäwer mwen mesen aramas ren an emweniir usun chon fötek mi fetalela mürin ewe chon win.

¹⁶Iei mine ousap mwüt ngeni än eman epwe föri allük usun met oupwe mongö ika ün, ika meni rän oupwe pinini, ika usun ekewe chulap mi fis lon fansoun lelingen maram me ekewe ränin sapat. ✧¹⁷ Ekei mettoch meinisin ngünüen chök ekewe mettoch repwe feito me mürin, nge ewe mi wesewesen enlet, iei i Kraist. ¹⁸Ousap mwüt ngeni eman epwe angei senikemi winnemi, ewe mi apasa pwe a tekia pokiten künaan mi mürina, a pwapwaiti an epwe atekisonamwälietiu o fel ngeni chon läng. Ei sokun aramas a sikesik ren ekiekin fituk, nge esap wor popun an epwe föri iei usun, ¹⁹a ükütiü le pach ngeni Kraist, i möküren ewe inis. Fän än Kraist nemenem unusen ewe inis a manauöch o chufengen ren ekewe kirupun lekupukup me ekewe wa mi pöchökül, a mämäritä usun Kot a mochen. ✧

Ach mäla me manau fiti Kraist

2.20–3.4

²⁰Iwe, oua mäla fiti Kraist o ngas seni fän nemenien ekewe ngün mi nemeni ei fanüfan. Pwota chök oua manaueni eu sokun manau usun itä nge ämi nöün ei fanüfan? Pwota oua aleasochisi ekei sokun allük, ²¹“Ousap amwöchü ei! Ousap neni ena! Ousap atapa ekei mettoch!” ²²Ekei allük meinisin ra kapas usun mettoch repwe morola mürin ach eäniir. Förien aramas chök ekei allük, pwal mine ra aiti ngeni aramas. ²³Ewer, ekei sokun allük usun itä nge mi longolong won tipachem. Ra ariani aramas ngeni sokun angangen fel, ra atekisonamwäliiretiü o ra föri pwe aramas repwe püsin ariaföüü inisiir. Nge ekei allük esap fokun wor lomoter ngeni än eman epwe nemeni mocheniangauen inisin.

3

¹Iwe, pokiten oua manausefäl fiti Kraist, iei mine oupwe anomu ämi ekiek won ekewe mettoch mi nom läng ia Kraist a mot ié won an lenien mot mi nom lepelifichin Kot. ✧² Oupwe tipeni ekewe mettoch mi nom läng, nge sap ekewe mettoch mi nom ikei won fanüfan. ³Pun oua fen mäla, iwe, manauemi a opola ren Kraist lon Kot. ⁴Kraist i wesewesen ämi manau, nge lupwen i epwe pwä, mürin pwal ämi oupwe pwä fiti i lon ligan.

Ewe manauen lom me ewe manau mi fö

3.5-17

⁵Iei mine oupwe amäloi ekewe mochenian fanüfan mi nom remi: sokopaten föföürün lisowu, lüangau, mocheisou, mocheniangau me tipemong. (Pun tipemong och sokun angang ngeni anümwäl.) ⁶Pun pokiten ekei mettoch än Kot song epwe tori chokewe resap aleasochis ngeni. ⁷Me lom pwal ämi oua soun manaueni ei sokun manau, lupwen oua nom fän nemenien ekei sokun mochenia.

⁸ Nge iei oupwe fokun ükütiu le föri ekei sokun föför: song, lingeringer me koput. Esap wor kapasen thurunufas ika kapasingau epwe towu seni lon awemi. ⁹ Ousap kapas chofona lefilemi, pun oua pwilitawu ewe manauen lom me föförün, ✧ ¹⁰ nge oua pwilitalong ewe manau mi fö. Iei ewe aramas mi fö Kot a förätä, epwe pwal akasöfösefäli lon püsin lapalapan, pwe ämi silei Kot epwe unusöch. ✧ ¹¹ Iwe, pokiten ei, esap chüen wor sokofesenin lefilen chon lükün Israel me chon Juta, chon sirkomsais me chon resap sirkomsais, chon ekis, chon kichiniwel, ekewe amanau me ekewe aramas mi ngas, pun Kraist chök a aüchea seniir meinisin a pwal nom lor meinisin.

¹² Ämi chon fil me ren Kot, ämi chon pin kana i a echenikemi, oupwe pwilitalong womi tong, kirikiröch, tipetekison, lukpwetete me mosonotam. ✧ ¹³ Oupwe songomangfengen o amusamusfengen are eman a chou ngeni eman. Oupwe fokun amusamusfengen usun ach Samol a amusala ämi tipis. ✧ ¹⁴ Nge lükün ekei föför meinisin oupwe echenifengenikemi lefilemi, pun chen a pilüküfengeni ekei mettoch meinisin, pwe ra unusöch lon ar chufengen. ¹⁵ Iwe, ewe kinamwe Kraist a ngenikemi epwe nemeni letipemi, pun Kot a körifengenikemi lon eu chök inis ngeni ei kinamwe. Iwe, oupwe kilisou ngeni Kot. ¹⁶ Än Kraist kapas mi fokun aüchea epwe nonom lon letipemi. Oupwe aiti ngeni eman me eman lefilemi ei kapas o fönöofengenikemi fän mirit. Oupwe kölü ekewe kölfel, ekewe kölün lamalam me ekewe köl mi pin. Oupwe köl ngeni Kot fän kilisou lon letipemi. ¹⁷ Iwe, meinisin mine oupwe föri ika apasa, oupwe föri fän iten ach Samol Jesus o oupwe kilisou ngeni Samach Kot ren i. ✧

Usun ach ririfengen lon ewe manau mi fö

3.18-4.1

¹⁸ Ämi fefin kana, oupwe aleasochis ngeni pwülüemi, pun iei met oupwe föri lon ämi souläng. ✧ ¹⁹ Ämi mwän kana, oupwe echeni pwülüemi, nge ousap pöchökül ngeniir. ✧ ²⁰ Ämi nau kana, oupwe aleasochisi sememi me inemi lon mettoch meinisin, pun iei met Kot a pwapwa ren. ✧ ²¹ Ämi sam me in kana, ousap asonga nöümi kana ren ämi apwüngüchouur, pwe resap apilükingau. ✧ ²² Ämi amanau kana, oupwe aleasochisi ämi samol lon ei fanüfan lon mettoch meinisin, sap lupwen chök ar nenengenikemi pokiten oua mochen aitöchükemi. Nge oupwe föri ämi angang fän wenecharen letipemi, pun oua meniniti ach Samol. ✧ ²³ Meinisin mine oua föri, oupwe angang ngeni ren unusen letipemi usun itä nge oua angang ngeni ach Samol, nge sap ngeni aramas. ²⁴ Oupwe chechemeni pwe ach Samol epwe ngenikemi liwinimi mine a iseis fän iten nöün aramas. Pun Kraist i wesewesen ämi Samol oua angang ngeni. ²⁵ Nge aramas meinisin mi föri mine a ngau repwe angei liwinin ar föför, pun Kot esap lifilifil aramas lon an apwüngüür. ✧

4

¹ Ämi samol kana, oupwe aramasöch o eäni pwüng ngeni nöümi amanau. Oupwe chechemeni pwe mi pwal wor ämi Samol lon läng. ✧

✧ **3:9:** Ef 4.22 ✧ **3:10:** Ken 1.26; Ef 4.24 ✧ **3:12:** Ef 4.2 ✧ **3:13:** Ef 4.32 ✧ **3:17:** Ef 5.19-20 ✧ **3:18:** Ef 5.22; 1.Pet 3.1 ✧ **3:19:** Ef 5.25; 1.Pet 3.7 ✧ **3:20:** Ef 6.1 ✧ **3:21:** Ef 6.4 ✧ **3:22:** Ef 6.5-8 ✧ **3:25:** Tut 10.17; Ef 6.9 ✧ **4:1:** Ef 6.9

Kapasen öüröür

4.2-6

² Oupwe likitü o mamasa lon ämi iotek, oupwe pwal iotekin kilisou ngeni Kot. ³ Oupwe pwal iotek fän item pwe Kot epwe suki eu asam ngenikem, pwe aipwe tongeni afalafala an kapas usun ewe monomonen Kraist. Pun iei popun pwe üa nom lon imwen fötek. ⁴ Iei mine oupwe iotek pwe mine üa eäni afalafal epwe fatöch, usun a pwüng ngeni wisei.

⁵ Oupwe eäni tipachem lon ämi föför ngeni chokewe resap lükü, oupwe alomotöchü ämi fansoun. ✧ ⁶ Ämi kapas epwe pwetete o apwapwai aramas, iwe, oupwe silei mine oupwe pölüeniöchü ngeni aramas meinisin.

Kapongen lesopolan

4.7-18

⁷ Tikikus pwiich we mi achengicheng, i eman chon angang mi allükülük me chienem chon angang lon angangen ach Samol, epwe apworausa ngenikemi usun pworausai meinisin. ✧ ⁸ Ina popun üa tinala i remi pwe epwe apöchöküla letipemi ren an apworausa ngenikemi usun mine a fis ngenikem. ✧ ⁹ Iwe, Onesimus pwiich we mi achengicheng me allükülük epwe eti Tikikus le feila remi, ätei i eman chon ämi mwich. Ätekei repwe apworausa ngenikemi mine a fis me ikei. ✧

¹⁰ Aristarkus chienei chon fötek a tinala an kapong ngenikemi, pwal Markus pwiin Parnapas. (Oua fen angei ekewe kapasen öüröür usun ämi oupwe etiwa Markus are epwe feito remi.) ✧ ¹¹ Josua mi pwal iteni Justus a pwal kapong ngenikemi. Ätekei me ülüman ir chök me lein ekewe chon Juta mi soulängila, ra etiei lon ewe angang fän iten ewe Mwün Kot, a fokun watte ar alilis ngeniei.

¹² Kapong seni Epafras, pwal i eman chon ämi we mwich me eman nöün Kraist Jesus chon angang. A fokun achocho le iotek fän itemi o tüngor ngeni Kot an epwe anükücharakemi, pwe oupwe mirit lon ämi souläng, nge ousap tipemwaramwar, oupwe pwal fokun aleasochisi letipen Kot. ✧ ¹³ Püsin ngang üa tongeni pwärätä usun an angang weires fän itemi pwal fän iten ekewe souläng lon Laotisea me Hierapolis. ¹⁴ Lukas nöüch we sousafei mi achengicheng pwal Temas ra tinala ar kapong ngenikemi. ✧

¹⁵ Oupwe uwei äm kapong ngeni pwiich kewe lon Laotisea, pwal ngeni Nimfa me chon ewe mwichefel mi chufengen lon imwan. ¹⁶ Iwe, mürin ämi wes me aleani ei toropwe, oupwe pii pwe epwe pwal alea ngeni chon ewe mwichefel lon Laotisea. Nge pwal ämi oupwe aleani ewe toropwe pwiich kewe lon Laotisea repwe tinala remi. ¹⁷ Oupwe üreni Arkipus, “Kopwe föri ewe angang ra awisa ngonuk lon än ewe Samol we angang pwe kopwe apwönüetä.” ✧

¹⁸ Ei kapong ngang Paulus üa makkei ren püsin pei. Oupwe chechemeni pwe üa nom lon imwen fötek! Än Kot ümöümöch epwe nonom remi meinisin.

✧ 4:5: Ef 5.16 ✧ 4:7: Föf 20.4; 2.Tim 4.12 ✧ 4:8: Ef 6.21-22 ✧ 4:9: Filim 10-12 ✧ 4:10: Föf 19.29; 27.2; Filim 24; Föf 12.12,25; 13.13; 15.37-39 ✧ 4:12: Kol 1.7; Filim 23 ✧ 4:14: 2.Tim 4.10,11; Filim 24 ✧ 4:17: Filip 2

Aeuin nöün Paulus Toropwe ngeni ekewe Souläng lon Tesalonika

Kapas akom

I. Chon makkei ei toropwe: Ewe soukünö Paulus.

II. A mak ngeni iö: Ngeni ekewe souläng lon Tesalonika.

III. Itelapemongen ei toropwe: Paulus a apöchöküla ekewe souläng pwe repwe nüküchar lon ar lükülük.

IV. Kapas aüchean ei toropwe: Souläng repwe apilükülüköch ngeni ewe fansoun än Jesus liwinsefäl.

V. Masouen ei toropwe: Tesalonika iei ewe samolun telinimw lon ewe fanü Masetonia mi nom fän nemenien ewe mwün Rom. Paulus a popuetä eu mwichefel ikenan mürin an feila seni Filipi. Nge a müttir fis pwe a wor chon Juta mi ü ngeni Paulus, pun ra lolowoiti pwönüetän än Paulus afalafala ewe kapasen Kot ngeni ekewe aramas esap ir chon Juta, ir chokewe mi mochen silei usun ewe lamalamen chon Juta. Ra asüela Paulus, pwe a towu seni Tesalonika o feila Perea. Iwe, me mürin än Paulus tori Korint a angei eu pworaus usun nonomun ewe mwichefel lon Tesalonika seni Timoty, chiechian we mi eti lon an angang.

Paulus a makkei aeuin nöün toropwe ngeni ekewe souläng lon Tesalonika an epwe apöchöküla letiper o anüküchara ar lükülük. A pwärätä an kilisou ren an rong usun pworausen ar lükülük me tong. A achema ngeniir usun ewe sokun manau a manauen lupwen a nom rer. Mürin a pwal pölueni ekoch kapas ais mi fisitä seni lon ewe mwichefel usun än Jesus liwinsefälito: Ifa usun, eman chon lükü mi mäla me mwen än Kraist liwinsefälito epwe chüen eäni ewe manau esemüch? Nge inet Kraist epwe liwinsefälito? Iwe, Paulus a üreniir, pwe repwe chök sopwela lon ar angang fän mosonoson lupwen ra witiwit fän apilükökoch ngeni än Kraist liwinsefäl.

VI. Tettelin masouen ei toropwe:

Kapasen kapong 1.1

Kapasen kilisou me mwareiti ekewe souläng 1.2–3.13

Kapasen fön fän iten manauen ar souläng 4.1-12

Kapasen öüröür usun än Jesus liwinsefäl 4.13–5.11

Sopolan kapasen fön 5.12-22

Kapasen lesopolan 5.23-28

Kapong

1.1

¹ Äm Paulus, Silas me Timoty aia kapong ngeni chon ewe mwichefel lon Tesalonika, ir nöün Samach Kot me ach Samol Jesus Kraist: Ümömöch me kinamwe epwe nonom remi. ✱

Än chon Tesalonika manau me lükülük

1.2-10

² Äm aia kilisoufochofoch ngeni Kot fänäsengesimi meinisin lupwen aia chechemenikemi lon äm iotek. ³ Pun aia chechemeni me mwen ach Kot

i Samach usun ämi lükülük mi pwä lon ämi föföör, usun ämi tong mi pwä lon ämi angang weires, pwal usun ämi apilükülüköch mi nüküchar lon ach Samol Jesus Kraist. ⁴ Ämi pwiim kana, aia silei pwe Kot a echenikemi o afilikemi pwe oupwe nöün. ⁵ Pun aia uwato ewe Pworausen Manau ngenikemi, sap lon kapas chök, nge ren manaman me Ngünmifel, pwal ren äm wesewesen lükü pwe a let ewe kapas. Ämi oua silei ifa usun nonomum lupwen aia nonom remi lon fansoun äm alisikemi. ⁶ Ämi oua apirükem me ach Samol. Inamwo ika oua tolong lon watten riaföü, oua etiwa ewe Kapasen Kot fän pwapwa mi feito seni ewe Ngünmifel. ✱ ⁷ Iei usun oua wiliti eu lenien apirü fän iten ekewe chon lükü meinisin mi nom lon Masetonia me Akaia. ⁸ Pun esap chök ewe kapas usun ach Samol a towu senikemi o chöfetal lon Masetonia me Akaia, nge pwal ewe pworaus usun ämi lükü Kot a chöfetal ekis meinisin. Esap wor och mine aipwe chüen tongeni apasa. ⁹ Ekei aramas meinisin ra kapas usun ämi etiwakem lupwen aia churikemi, pwal usun ämi kul ngeni Kot o kul seni ekewe uluulun anümwäl, pwe oupwe angang ngeni ewe Kot mi manau o wesewesen Kot, ¹⁰ pwal usun ämi witiwiti nöün we epwe feito seni läng. Iei i Jesus nöün we i a amanauasefäli seni mäla, epwe angasakich seni än Kot song epwe feito.

2

Än Paulus angang lon Tesalonika

2.1-16

¹ Ämi pwiim kana, oua püsin silei pwe äm churikemi esap lomotongau. ² Ämi oua silei pwe aia fen küna riaföü me itengau lon Filipi me mwen äm feito remi lon Tesalonika. Inamwo ika a wor chomong chon ü ngenikem, nge ach Kot a ngenikem pwora pwe aipwe aiti ngenikemi ewe Pworausen Manau mi feito seni i. ✱ ³ Äm afalafal ngenikemi esap longolong won met mi mwäl ika won ekiexsolä, sisap pwal atupu eman. ⁴ Nge iteiten fansoun aia apasatä mine Kot a mochen, pun a apwüngala pwe aipwe fich ngeni an epwe lükü ngenikem ewe Pworausen Manau. Äm aisap mochen apwapwai aramas, nge aia mochen apwapwai Kot ewe mi sotuni ekiexin letipach. ⁵ Pun oua fokun silei pwe aisap feito remi fän kapas amichimich, aisap pwal aea sokun kapas epwe pwölüela äm tipemong. Kot i nöüch chon pwärätä. ⁶ Aisap pwal föri met aramas repwe mwareitikem ren, aisap föri ngenikemi, aisap pwal föri ngeni ekoch. ⁷ Inamwo ika a wor äm pwüüng womi pokiten äm nöün Kraist soukünü, nge aia tipepwetete lupwen aia nonom remi, usun eman in a tümwünü püsin nöün kana. ⁸ Iwe, pokiten aia fokun tongekemi, aia pwal pwapwa le fang ngenikemi sap chök ewe Pworausen Manau seni Kot, nge pwal püsin manauem, pun aia fokun echenikemi. ⁹ Ämi pwiim kana, oua fokun chechemeni usun äm angang weires. Äm aia angang lerän me lepwün pwe aisap aweiresikemi lupwen aia afalafala ngenikemi ewe Pworausen Manau seni Kot.

¹⁰ Ämi nöüm chon pwärätä, pwal Kot, pwe äm föföör ngenikemi ämi mi lükü ewe Pworausen Manau a limöch me pwüng, nge esap wor mwäl lon. ¹¹ Ämi oua silei pwe aia alisi eman me eman leimi usun chök eman sam

a alisi püsin nöün kana. ¹² Äm aia apöchöküla letipemi o aururukemi, aia pwal allük ngenikemi pwe oupwe manaueni ewe sokun manau mi apwapwai Kot, ewe mi körikemi pwe oupwe eti i lon Mwün me ligan.

¹³ Iwe, mi pwal wor ewe popun pwota sia kilisoufochofoch ngeni Kot. Lupwen sia uwato remi ewe kapasen Kot, oua rongorong ngeni o etiwa. Ousap ekieki pwe kapasen aramas, nge oua etiwa pwe iei wesewesen kapasen Kot. Pun ewe kapas a angang lomi ämi mi lükülük. ¹⁴ Ämi pwiim kana, mine a fis ngenikemi a fen fis ngeni än Kot kewe mwichefel lon Jutea, ir chokewe nöün Kraist Jesus. Ämi oua küna riaföü seni püsin chon fanüemi, usun chök ir ra küna riaföü seni ekewe chon Juta, ✧ ¹⁵ ir chokewe mi niela ach Samol Jesus me ekewe soufos, ra pwal ariaföüükem. Ifan me ar asonga Kot! Ifan me ar oput aramas meinisin. ✧ ¹⁶ Ra pwal mwo nge sotuni ar repwe pinekem seni äm afalafala ngeni ekewe chon lükün Israel ewe kapasen Kot mi atoto rer manau. Iei ewe amüchülan me lein ekewe tipis meinisin ra föri seni me lom. Iwe, iei än Kot song a fokun feitiu wor.

Än Paulus mochen churisefäli ekewe souläng

2.17-3.13

¹⁷ Ämi pwiim kana, lupwen sia imwüfesen o sia nonom toau senikemi ekis chök fansoun,- ewer, sia chök imwü senikemi ren inisim, nge sap ren lelukem,- äm aia fokun positikemi o achocho ngeni äm aipwe künasefälikemi. ¹⁸ Äm aia mochen liwinsefälitikemi. Ngang Paulus üa sotuni ai üpwe liwinsefälitikemi fän ekoch, nge Satan a pinekem. ¹⁹ Pun ämi chök popun äm apilükülükoch, äm pwapwa, pwal popun äm aingaing lon äm win mwen mesen ach Samol Jesus lupwen epwe liwinsefälito. ²⁰ Enlet, ämi chök popun äm ling me äm pwapwa!

3

¹ Iwe, lupwen aisap chüen tongeni engila ren äm positikemi, aia ekiekifengeni, pwe äm chök aipwe nonom lon Aten, ✧ ² nge aipwe tinala Timoty, pwiim we mi etikem le angang ngeni Kot lon äm afalafala ewe Pworausen Manau usun Kraist. Äm aia tinala pwe epwe apöchöküla letipemi o alisikemi lon ämi lükülük, ³ pwe esap wor eman me leimi epwe kulsefäl pokiten ekei riaföü mi torikemi. Oua püsin silei pwe iei letipen Kot ngenikich pwe sipwe tolong lon ekei sokun riaföü. ⁴ Pun lupwen aia chüen nom remi, aia ürenikemi me mwen an esamwo fis, pwe sipwe tolong lon riaföü. Iwe, ei a wesewesen fis usun oua fokun silei. ⁵ Iei popun üa tinala Timoty, pun üsap chüen tongeni engila ngeni ai üsap silei pworausemi. Iei usun üa tinala i an epwe pii ika ifa usun ämi lükülük. Ewer, üa chök niuokus ika Tefil a sotunikemi o äm angang meinisin epwe lomotongau.

⁶ Nge iei Timoty a liwinsefälito o uwato rem pworaus mi mürina usun ämi lükülük me tong. A apworaus a ngenikem pwe fansoun meinisin oua chechemenikem fän pwapwa o oua fokun mochen churikem, usun pwal äm aia fokun mochen churikemi. ✧ ⁷ Iei mine ämi pwiim kana, lon ekei weires me riaföü meinisin mi torikem, letipem a pöchökülela fänäsengesimi ren ämi lükülük. ⁸ Pun iei aia wesewesen manau, pokiten oua nüküchar lon ämi souläng lon ach Samol. ⁹ Iei aia kilisou ngeni Kot

✧ **2:14:** Föf 17.5 ✧ **2:15:** Föf 9.23,29; 13.45,50; 14.2,5,19; 17.5,13; 18.12 ✧ **3:1:** Föf 17.15

✧ **3:6:** Föf 18.5

fänäsengesimi. Aia kilisou ngeni fän iten ewe pwapwa aia eäni mwen mesen Kot pokitemi. ¹⁰ Lerän me lepwin aia tungor ngeni Kot ren unusen letipem pwe epwe mwüt ngenikem pwe aipwe churikemi o awora ngenikemi met oua osupwang ren lon ämi lükülük. ¹¹ Amwo Samach Kot me ach Samol Jesus epwe püsin wäsi alem, pwe aipwe tongeni feila remi. ¹² Amwo ach Samol epwe alapala ämi chen lefilemi pwal ngeni aramas meinisin, pwe epwe fokun wattela usun watten äm echenikemi. ¹³ Ach Samol epwe apöchöküla letipemi, pwe oupwe unusöch o pin mwen mesen Samach Kot, lupwen ach Samol Jesus epwe liwinsefälito fiti nöün kewe chon pin meinisin.

4

Eu manau mi apwapwai Kot

4.1-12

¹ Ämi pwiim kana, iei sopesopolan met oua kaiö senikem usun ewe sokun manau oupwe manaueni pwe oupwe apwapwai Kot ren. Ewer, iei usun mine oua fen manau lon. Nge iei äm aia tungormau o pese ngenikemi fän iten ach Samol Jesus, pwe manauemi epwe fokun mürinala. ² Pun oua fen silei ekewe kapasen öüröür aia ngenikemi fän alon ach Samol Jesus. ³ Pun iei letipen Kot pwe oupwe pin o unusen ngas seni sokun föförün lisowu. ⁴ Ämi mwän kana, eman me eman leimi epwe silei usun an nomofengen me pwülüan fän pin me üöch, ⁵ esap fän mocheisou usun ekewe aramas mi nom lon rochopwak resap silei Kot. ⁶ Iwe, ren ei lapalap esap wor eman mwän epwe föri och mi mwäl ngeni chiechian souläng ika föri angangen atuputup ngeni. Äm aia fen ürenikemi ei me mwan o aia fokun fönöü ngenikemi, pwe ach Samol epwe apwüngü chokewe mi föri ei sokun föför mi ngau. ⁷ Pun Kot esap körikich pwe sipwe manau lon ei sokun manauen mocheniangau, nge a körikich pwe sipwe manaueni eu manau mi pin. ⁸ Iei mine iö a pöütala ekei kapasen fön, esap pöütala kapasen aramas pwe kapasen Kot, ewe mi fang ngenikich ngünün we Ngünmifel.

⁹ Iwe, esap wor lomoten äm aipwe mak ngenikemi usun ämi oupwe echeni chiechiemi kewe souläng, pun püsin Kot a fen aiti ngenikemi usun ämi oupwe echenifengenikemi lefilemi. ¹⁰ Enlet, oua fen echeni pwimi kewe souläng meinisin lon Masetonia. Iei mine pwiim kana, aia tungormau ngenikemi, oupwe alapala ämi echenifengenikemi lefilemi. ¹¹ Oupwe achocho ngeni ämi oupwe manaueni eu manau mi mosonoson, oupwe en me püsin föri an angang o anganga met oupwe manau ren usun aia fen ürenikemi me mwan. ¹² Are oua föri ei, chokewe resap lükü Jesus repwe menitikemi, ousap pwal tungor än eman epwe fang ngenikemi met oua osupwang ren.

Ewe Samol epwe liwinsefäl

4.13-18

¹³ Ämi pwiim kana, äm aia mochen pwe oupwe silei mine a let usun chokewe mi mäla, pwe ousap lolilen usun chokewe esap wor ar apilükülüköch. ¹⁴ Sia lükü pwe Jesus a mäla o manausefälitä, iei mine sia pwal lükü pwe Kot epwe aliwinsefäli Jesus me chokewe mi mäla lon ar lükü i. ¹⁵ Mine aia aiti ngenikemi iei alon ach Samol: Kich mi chüen manau ngeni ewe rän ach Samol epwe liwinsefälito lon sisap akom

mwen chokewe ra fen mäla. ¹⁶ Pun püsin ach Samol epwe feitiu me läng fän mwelian mi leüömong, fän mwelian ewe samolun chon läng, pwal fän puun nöün Kot rappa. Iwe, chokewe ra fen mäla lon ar lükü Kraist repwe akomwen manausefäl. ¹⁷ Mürin kich mi chüen manau ngeni ena fansoun sipwe etekitä o chufengen me ir lon kuchu, pwe sipwe churi ach Samol lon längin asepwäl. Iei usun sipwe nonomfengen me ach Samol fansoun meinisin. ✧ ¹⁸ Iei mine oupwe echipafengenikemi ren ekei kapas.

5

Oupwe amolätä ngeni liwinsefälin ewe Samol

5.1-11

¹ Iwe, ämi pwiim kana, esap wor lomoten aipwe mak ngenikemi usun ewe fansoun ika ewe rän ekei mettoch repwe fisitä lon. ² Pun ämi oua püsin silefichi, pwe ewe rän ach Samol epwe war lon epwe usun chök än eman chon solä war lepwin. ✧ ³ Lupwen aramas ra apasa, “Mettoch meinisin a kinamwe o nükünüköch”, mürin feingau epwe müttir toriir usun cheuchen fam a tori eman fefin, nge esap wor eman aramas epwe tongeni sü seni. ⁴ Nge ämi pwiim kana, ousap nonom lon rochopwak, pwe ousap serengau ren ewe Rän usun än eman serengau ren eman chon solä. ⁵ Ämi meinisin oua aramas mi nom lon saram, oua chon lerän. Kich sisap chon lepwin ika nonom lon rochopwak. ⁶ Iei mine sisap möür usun pwal ekoch, nge sipwe nenela o mamasafichi. ⁷ Pun chokewe mi möür, ra möür lepwin, nge chokewe mi puch, ra puch lepwin. ⁸ Nge kich sia chon lerän, ousipwe mamasafichi. Sipwe üföüf lükülük me chen usun chök eman a üföüf echö chechen leupw mi för seni mächä, sipwe pwal eäni apilüköchün manau pwe ina imwach akau. ✧ ⁹ Kot esap afilikich pwe sipwe angei riaföün an song, nge a afilikich pwe sipwe küna manau ren ach Samol Jesus Kraist, ¹⁰ i ätewe a mäla fän itach pwe sipwe nonomfengen me i, ese lifilifil ika sia manau ika sia mäla lupwen an epwe liwinsefälito. ¹¹ Iei mine oupwe apöchökülafengenikemi o alilisfengen lefilemi, usun oua fen föri iei.

Kapasen öüröür me kapong

5.12-28

¹² Ämi pwiim kana, aia tüngormau ngenikemi pwe oupwe meniniti ätekewe mi angang ngenikemi, ir mi emwenikemi o öüröürakemi lon manauen ämi souläng. ¹³ Oupwe asamoluur fän watten suföl me chen pokiten ewe angang ra föri ngenikemi. Oupwe kinamwefengen lefilemi.

¹⁴ Ämi pwiim kana, aia pesekemi pwe oupwe fönöü chokewe mi chipwang, oupwe apöchöküla letipen chon niuokus, oupwe alisi ekewe chon apwangapwang, oupwe pwal mosonotam ngeni aramas meinisin. ¹⁵ Oupwe pii pwe esap wor eman epwe liwiningau ei föföringauen eman ngeni, nge fansoun meinisin oupwe achocho le föri mine a mürina lefilemi, pwal ngeni aramas meinisin.

¹⁶ Oupwe pwapwafochofoch, ¹⁷ oupwe iotek fansoun meinisin, ¹⁸ oupwe kilisou lon mettoch meinisin, pun iei letipen Kot ngenikemi lon Kraist Jesus. ¹⁹ Ousap kunuela ewe Ngünmifel, ²⁰ ousap turunufasei ekewe kapasen osuni, ²¹ nge oupwe sotuniir meinisin. Iwe, oupwe

amwöchü mine a mürina ²² o pöütala meininis mine a ngau. ²³ Kot, ewe mi fang ngenikich kinamwe epwe unusen apinikemi, pwe unusen ngünümi me letipemi me inisimi epwe unusöch tori ach Samol Jesus Kraist epwe war. ²⁴ A allükülük ewe mi körikemi, i ewe epwe föri ngenikemi iei usun. ²⁵ Ämi pwiim kana, oupwe iotek fänäsengesim. ²⁶ Oupwe kapong ngeni ekewe chon lükü Jesus meininis ren ewe kapongen souläng. ²⁷ Üa allük ngenikemi fän iten ach Samol pwe oupwe aleani ei toropwe ngeni ekewe chon lükü Jesus meininis. ²⁸ Ümöümöchün ach Samol Jesus Kraist epwe nonom remi meininis.

Aruachön nöün Paulus Toropwe ngeni ekewe Souläng lon Tesalonika

Kapas akom

I. Chon makkei ei toropwe: Ewe soukünü Paulus.

II. A mak ngeni iö: Ngeni ekewe souläng lon Tesalonika.

III. Itelapemongen ei toropwe: Än Jesus liwinsefäl.

IV. Kapas aüchean ei toropwe: Souläng repwe üppos o kamwöchünük won ekewe kapas mi let.

V. Masouen ei toropwe: Pokiten wewengauen ewe kapas usun än Jesus liwinsefäl a chök sotosopola osukosuken chon ewe mwichefel lon Tesalonika. Aruachön nöün Paulus toropwe a pworaus usun ewe lükülük pwe itä ewe ränin än Jesus liwinsefäl a fen fis. Paulus a afataöchü ei ekiek o aiti ngeni ekewe souläng, pwe mwen än Jesus liwinsefäl föföer esepwüing me föföringau epwe fokun wattela fän nemenien eman mi monomon itan “Ewe Aramas mi Tipis”, ätewe epwe ü ngeni Kraist.

Ewe soukünü Paulus a aitifichi ngeni chokewe mi aleani ei toropwe aüchean ar repwe nüküchar lon ar lükü, inamwo ika a toriir weires me riaföü, repwe angang pwe epwe wor met repwe manau seni usun Paulus me chienan kewe ra föri, repwe pwal likitü le föri mine a mürina.

VI. Tettelin masouen ei toropwe:

Kapas akom 1.1-2

Kapasen mwareiti me kapasen ing 1.3-12

Kapasen öüröür usun än Jesus epwe liwinsefälito 2.1-17

Kapasen fön usun manauen souläng 3.1-15

Kapasen lesopolan 3.16-18

Kapong

1.1-2

¹ Äm Paulus me Timoty aia kapong ngeni chon ewe mwichefel lon Tesalonika, ir nöün Samach Kot me ach Samol Jesus Kraist: ✧ ² Samach Kot me ach Samol Jesus Kraist epwe ngenikemi ümöümöch me kinamwe.

Ewe kapwüing lupwen Kraist epwe liwinsefäl

1.3-12

³ Ämi pwiim kana, äm aia fokun kilisou ngeni Kot fänäsengesimi fansoun meinisin. A pwüing ngenikem pwe aipwe föri ei, pokiten ämi lükülük a fokun fefeitä o ämi chen lefilemi a fokun lapalapala. ⁴ Iei popun äm aia aingaing womi lein än Kot kewe mwichefel. Aia aingaing won ämi likitü me ämi lükülük lon ekewe ninni me riaföü meinisin mi fis ngenikemi.

⁵ Ekei mettoch meinisin ra alletätä pwe än Kot kapwüing a pwüing. Iei popun oupwe fich ngeni ämi oupwe alealong lon Mwün Kot, ewe mwü oua riaföü fänäsengesin. ⁶ Enlet, Kot epwe föri mine a pwüing: Epwe atoto riaföü won chokewe mi ariaföüükemi, ⁷ epwe pwal angasakemi ämi mi riaföü, epwe pwal angasakem. Ei epwe fis lupwen ach Samol epwe feito seni läng fiti nöün kewe chon läng mi pöchökül, ⁸ epwe pwal feito ren

ngetengeten ekkei, pwe epwe apwüngü chokewe mi pöütala Kot, resap pwal aleasochis ngeni ewe Pworausen Manau usun ach Samol Jesus. ⁹ Ir repwe riaföü ren ewe apwüngün feiengau esemüch, repwe imwü seni mwen mesen ach Samol pwal seni an we pöchökül mi amwarar, ✱ ¹⁰ lupwen epwe war lon ewe Ränin, nöün kewe chon pin meinisin repwe alinga i o ekewe chon lükülük meinisin repwe asamolu i. Pwal ämi oupwe etiir, pun oua lükü ewe kapasen Kot äm aia aiti ngenikemi.

¹¹ Iei mine äm aia iotek fän itemi fansoun meinisin. Aia tüngor ngeni ach Kot pwe epwe alisikemi, pwe oupwe fich ngeni ewe manau i a körikemiilong lon. Iwe, Kot epwe atufichikemi ren an manaman, pwe oupwe tongeni föri ekewe föför mi mürina meinisin oua mochen föriir, epwe pwal aunosöchü ämi angang oua föri pokiten ämi lükülük. ¹² Ren ei iten ach Samol Jesus epwe ling me remi, nge pwal ämi oupwe ling me ren. Ei epwe fis pokiten ümöümöchün ach Kot me ach Samol Jesus ngenikemi.

2

Ewe Aramas mi Tipis

2.1-12

¹ Nge usun waren ach Samol Jesus Kraist, pwal usun ach chufengen me i o nonom ren, ngang üa tüngormau ngenikemi, ämi pwii kana, ✱ ² pwe ousap müttir rukola lon ämi ekiek, ika osukosuk ren ewe kapas pwe ewe Ränin ach Samol a fen war. Eli oua ekieki, pwe aia apasa ei lupwen aia osuni ika aia afalafal ika aia makkei ekei kapas lon toropwe. ³ Ousap mwüt ngeni eman epwe atupukemi lon sokopaten angangen atuputup. Pun ewe Rän esap wareto mwen an epwe fis pwe aramas repwe üfengen me Kot o ewe Aramas mi Tipis epwe pwäto, i ewe epwe kiteterila lon ewe hell. ⁴ I epwe ü ngeni iteiten mettoch aramas ra aita ngeni Kot o fel ngeni, epwe pwal püsin seikätä wor meinisin. Epwe mwo nge feila lon än Kot we imwenfel o mot won an lenien mot o püsin aita ngeni pwe i Kot. ✱

⁵ Ousap chechemeni pwe üa fen ürenikemi ekei mettoch meinisin lupwen üa nonom remi? ⁶ Nge mi wor och a pinei ei an epwe fis iei, o ämi oua silei met a pinei. Iwe, ewe Aramas mi Tipis epwe pwäto lon ewe fansoun mi fich ngeni. ⁷ Pun ewe tipis mi monomonola a fen akangang iei, nge ewe eman mi pinei an epwe fis ei iei epwe chök sopwela le föri iei usun tori Kot epwe angeala. ⁸ Mürin ewe Aramas mi Tipis epwe pwäla. Nge lupwen ach Samol Jesus epwe war epwe niela i ren enienin ngasangan mi towu seni awan o amüchala ren lingen an war. ✱ ⁹ Ewe Aramas mi Tipis epwe war fän pöchökülen Satan o föri sokopaten manaman me asilil mi chofona, ✱ ¹⁰ epwe aea sokopaten angangen atuputup mi ngau ngeni chokewe repwe pöütmwälila. Repwe pöütmwälila pokiten resap fokun mochen etiwa o aücheani ewe kapas mi let pwe repwe küna manau ren. ¹¹ Iei popun Kot a tinala rer ewe manamanen atuputup, pwe repwe lükü mine a chofona. ¹² Iei mine chokewe meinisin resap lükü ewe kapas mi let, nge ra pwapwa le föri tipis, Kot epwe apwüngala pwe ra tipis.

Kot a afilikemi pwe oupwe küna manau

2.13-17

¹³ Iwe, äm aipwe fokun kilisou ngeni Kot fansoun meinisin fänäsengesimi pwiim kana mi chen me ren ach Samol. Pun seni

✱ 1:9: Ais 2.10 ✱ 2:1: 1.Tes 4.15-17 ✱ 2:4: Tan 11.36; Is 28.2 ✱ 2:8: Ais 11.4 ✱ 2:9: Mat 24.24

lepoputän, Kot a afilikemi pwe oupwe küna manau ren än Ngünmifel apinikemi, pwal ren ämi lükü ewe kapas mi let. ¹⁴ Kot a körikemi ngeni ei manau mi fö ren ewe Pworausen Manau aia afalafala ngenikemi. A körikemi pwe oupwe angei wisemi lon lingen ach Samol Jesus Kraist. ¹⁵ Iei mine ämi pwiim kana, oupwe üppos o kamwöchünük won ekewe kapas mi let äm aia aiti ngenikemi lon äm kewe afalafal pwal lon ekewe toropwe aia mak ngenikemi.

¹⁶ Püsin ach Samol Jesus Kraist me Samach Kot, ewe mi echenikich o fang ngenikich chipen letipach fansoun meinisin pwal ach apilükülüköch ren an ümöümöch, ¹⁷ epwe echipa letipemi o apöchökülakemi, pwe oupwe föri o apasa mine a mürina fansoun meinisin.

3

Paulus a tüngor pwe ekewe souläng repwe iotek fän iter

3.1-5

¹ Iwe, ämi pwiim kana, oupwe iotek fän item, pwe än ewe Samol kapas epwe müttir chöfetal o aramas repwe etiwa fän ar suföl, usun chök a fen fisitä lefilemi. ² Oupwe pwal iotek, pwe Kot epwe angasakem seni ekewe aramas mi ngau me kirikiringau. Pun sap aramas meinisin ra lükü ewe kapas. ³ Nge ach Samol a allükülük, i epwe apöchökülakemi o tümwünükemi seni ewe mi ngau. ⁴ Iwe, äm aia apilükülük ngeni ach Samol fänäsengesimi pwe oupwe apwönüetä o sopwela le föri meinisin mine aia allük ngenikemi. ⁵ Ach Samol epwe emweni letipemi ngeni än Kot chen, pwal ngeni än Kraist tipeppos.

Wisach pwe sipwe angang

3.6-15

⁶ Ämi pwiim kana, äm aia allük ngenikemi fän iten ach Samol Jesus Kraist pwe oupwe aimwükemi seni ekewe pwiipwi meinisin mi chipwang le angang, resap pwal aleasochisi ekewe kapasen öüröür aia ngeniir. ⁷ Ämi oua fokun silei pwe oupwe chök föri usun mine aia föri. Äm aisap chipwang le angang lupwen aia nonom remi, ⁸ aisap pwal angei anem mongö ika aisap isetiu liwinin. Nge aia achocho le angang lerän me lepwin fän weires, pwe aisap aweiresikemi. ⁹ Aia föri ei, sap pokiten esap wor äm pwüüng äm aipwe angei äm alilis senikemi, nge aia föri ei pwe aipwe eu lenien apirü fän itemi. ¹⁰ Pun lupwen aia nom remi aia ükürenikemi, "Iö esap mochen angang esap pwal tongeni mongö."

¹¹ Aia apasa ei pun aia rongorong pwe ekoch me leimi ra chipwang le angang, resap föri och, chilon chök pwe ra angelong lon än eman angang. ¹² Fän iten ach Samol Jesus Kraist äm aia allük ngeni ekei aramas o fönöör, pwe repwe manauöch o föri ar angang pwe epwe wor liwinin aner mongö. ¹³ Nge ämi pwiim kana, ousap fokun chipwangela lon ämi föfööröch. ¹⁴ Are eman esap mochen aleasochisi äm kewe kapasen öüröür mi mak lon ei toropwe, oupwe asilla i. Ousap chiechi ngeni, pwe epwe mefi an säw. ¹⁵ Nge ousap föri ngeni usun itä nge i eman oua oputa, nge oupwe fönöü usun chök eman pwiimi.

Kapasen lesopolan

3.16-18

¹⁶ Ach Samol, i popun ach kinamwe, epwe püsin ngenikemi kinamwe fansoun meinisin pwal ekis meinisin. Ach Samol epwe nonom remi

meininis. ¹⁷ Ngang Paulus üa makkei ekei kapasen kapong ren püsin pei. Iei usun ai saini ekewe toropwe meinisin. Iei usun ai mak.
¹⁸ Ümömöchün ach Samol Jesus Kraist epwe nonom remi meinisin.

Aeuin nöün Paulus Toropwe ngeni Timoty

Kapas akom

I. Chon makkei ei toropwe: Ewe soukünü Paulus.

II. A mak ngeni iö: Ngeni ewe alüal Timoty, eman chon angang ngeni Kot.

III. Itelapemongen ei toropwe: Kapasen öüröür me fön ngeni Timoty lon wisan me an angang ngeni ewe Pworausen Manau.

IV. Kapas aüchean ei toropwe: Kopwe tümwünü masouen om afalafala ewe Pworausen Manau mi feito seni Kot.

V. Masouen ei toropwe: Timoty, eman alüal mi souläng seni Asia Kisikis, i nöün eman fefin seni Jutea, nge saman eman re Krik. A chieneni Paulus o alisi i lon an angangen missionari. Aeuin nöün Paulus toropwe ngeni Timoty a kapas usun ülungat sokun ekiek mi aüchea.

Ewe aeuin ekiek mi aüchea eu kapasen fön usun än Timoty epwe ü ngeni ekewe afalafal chofona mi fis lon mwichefel. Ei sokun afalafal a nofitifengeni ekiekin chon Juta me ekiekin ekewe aramas sap ir chon Juta. A longolong won ewe lükülük pwe ei fanüfan a ngau, o esap wor eman a küna manau chilon chök ir mi eäni och sokun silelap mi monomon, pwal ir mi tümwünüfichi ar resap mongö ekoch sokun mongö, resap pwal pwüpwülü. Pwal masouen ei toropwe a mak kapasen öüröür usun emweni mwichefel me usun fel ngeni Kot. A pwal aweweni met sokun manau eman chon emweni mwichefel me eman chon alisi epwe manaueni. Lesopolan Paulus a öüröüra Timoty usun an epwe eman nöün Jesus Kraist chon angang mi mürina, pwal usun wisan ngeni ekewe chon lükülük lon ekewe sokopaten mwich.

VI. Tettelin masouen ei toropwe:

Kapas akom 1.1-2

Kapasen öüröür usun angangen lon mwichefel, pwal usun ekewe nöüwis 1.3-3.16

Kapasen öüröür ngeni Timoty usun an angang 4.1-6.21

Kapong

1.1-2

¹ Ngang Paulus, eman nöün Kraist Jesus soukünü fän än Kot ach we Chon Amanau allük me Kraist Jesus ach apilükülük, ² üa kapong ngonuk Timoty wesewesen nei lon lükülük: Samach Kot me ach Samol Kraist Jesus epwe ngonuk ümömöch, tong me kinamwe. ✧

Kapasen fön usun än Timoty epwe ü ngeni ekewe afalafal chofona

1.3-11

³ Üa mochen pwe kopwe nonometiu lon Efisos, usun üa fen tüngor ngonuk lupwen üa saila Masetonia. Mi wor ekoch aramas ikenan ra afalafalafeili sokun afalafal chofona usun ewe lükülükün souläng. Iwe, kopwe allük ngeniir, pwe repwe ükütü. ⁴ Kopwe üreniir, pwe resap asolapala ar fansoun le apworausä ekewe tutulap me tettelin uruwon ekewe lewo, pun ra chök afisätä anini, nge resap apwönüetä än Kot akot

fän itach, ewe sia silei ren ach lükü. ⁵ Popun ai ei allük pwe epwe afisätä ewe chen mi pop seni eu leluk mi limöch me eu mwelien letip mi mürina, pwal eu lükülük mi let. ⁶ Ekoch aramas ra kul seni ekei sokun mettoch o ra tokola seni aler ren sokopaten kapasen anini mi lomotongau. ⁷ Ra mochen asukula än Kot kewe allük, nge resap silei mine ra kapas usun ika ekewe mettoch ra fos won fän watten ar apilükülük.

⁸ Kich sia silei pwe ekewe Allük ra mürina are sia eäniir lon met pwüngün. ⁹ Sia pwal silei pwe ekewe allük resap för fän iten ekewe chon pwüng, nge ra för fän iten ekewe chon atai allük me chon ü ngeni mwü, fän iten chokewe resap meniniti Kot me chon tipis, fän iten chokewe resap mochen apini manauer me chokewe resap meniniti lamalam, fän iten chokewe mi niela semer me iner, pwal fän iten ekewe chon niela aramas, ¹⁰ fän iten chokewe mi föri föföörün lisowu me chokewe mi föri sokun föföörün lisowu lefilen mwän me mwän, fän iten chokewe mi soläni aramas me chokewe mi eäni kapas chofona o pwärätä pwärier mi mwäl, pwal fän iten chokewe meinisin mi ü ngeni ewe kapasen Kot mi let sia afalafala. ¹¹ Ei sokun afalafala a pwä lon ewe Pworausen Manau mi lükülük ngeniei pwe üpwe arongafeili, iei ewe Pworausen Manau seni ewe Kot mi ling o pin.

Än Paulus kilisou fän iten än Kot ümöümöch

1.12-20

¹² Üa kilisou ngeni Kraist Jesus ach Samol, ewe mi fang ngeniei pöchökül fän iten ai angang. Üa kilisou ngeni ren an ekieki pwe ngang mi allükülük o a awisaei pwe üpwe angang ngeni. ¹³ Inamwo ika me lom üa kapasingau usun i, üa ariaföü o turunufaseei. Nge Kot a eäni tong ngeniei, pun esap mwo wor ai lükülük, iei mine üsap silei mine üa föri. ✱ ¹⁴ Iwe, ach Samol a tinatiu woi an ümöümöch mi somwola o fang ngeniei lükülük me chen mi nom lon Kraist Jesus. ¹⁵ A allükülük ewe kapas pwe aramas repwe fokun etiwa o lükü: Kraist Jesus a feito lon ei fanüfan pwe epwe amanaua chon tipis. Ngang eman chon tipis mi ngau seniir meinisin. ¹⁶ Nge Kot a eäni tong ngeniei, pwe Kraist Jesus epwe pwärala unusen an mosonotam lon met a föri ngeniei, ngang eman chon tipis mi ngau seniir meinisin, pwe üpwe eu minen awewe ngeni chokewe repwe lükü i me mürin o repwe küna ewe manau esemüch. ¹⁷ Ewe King mi nonom tori feilfeilachök, ewe eman chök Kot, ewe esap tongeni mäla, esap wor eman a tongeni küna, sipwe meniniti o alinga tori feilfeilachök! Amen.

¹⁸ En nei Timoty, üpwe ngonuk ei allük, a usun chök mine ekewe soufos ra apasa usumw me lom. Kopwe aea ekei kapas pwe om pisekin fiu, pwe kopwe mauneni ewe maun mi öch, ¹⁹ kopwe pwal amwöchü om lükülük me eu mwelien letip mi mürina. E Koch aramas resap rongorong ngeni mwelien letiper, iwe, ra küna wata lon ar lükülük. ²⁰ Ruoman me leir Himenäus me Aleksanter, ätekei üa likitiir ngeni Satan pwe epwe apwüngüür. Ren ei repwe kaiö pwe repwe ükütiu le turunufasei Kot.

2

Än Paulus kapasen öüröür usun angangen fel

2.1-15

¹ Iwe, mwen mettoch meinisin üa pese ngonuk, pwe souläng repwe iotekin tüngor me kilisou ngeni Kot fänäsengesis aramas meinisin, ² fänäsengesis ekewe king me ekewe nöüwis meinisin, pwe sipwe manaueni eu manau fän mosonon me kinamwe, sipwe pwal asamolu Kot o aramasöch ngeni aramas. ³ Pun iei a mürina o apwapwai Kot ach Chon Amanau, ⁴ i ewe mi mochen pwe aramas meinisin repwe küna manau, repwe pwal silei ewe let. ⁵ Pun mi wor eman chök Kot, pwal eman chök chon afför lefilen Kot me aramas kana, iei i ewe aramas Kraist Jesus, ⁶ i ewe mi fangala püsin manauan, pwe epwe angasala aramas meinisin seni tipis. Iei och minen pwärätä lon fansoun mi fich, pwe Kot a mochen pwe aramas meinisin repwe küna manau. ⁷ Iei popun üa fil pwe üpwe eman soukünö me eman senseen ekewe chon lükün Israel ai üpwe arongafeili ewe kapasen lükülük me let. Ngang üa kapas wenechar, üsap chofona. ✱

⁸ Üa mochen pwe lon ekewe lenien fel meinisin mwän repwe iotek, ir mwän mi pin fän iten Kot, repwe aitiätä pöür lon ar iotek, nge resap song ika anini.

⁹ Üa pwal mochen pwe ekewe fefin repwe üföüföch, repwe öököchü üfer o üföüf sokun üf mi fich ngeni souläng. Resap firesi mökürer ren sokopaten fifires, ika mwärämwär kolt ika fau aüchea ika üföüf üf mi mömong, ✱ ¹⁰ nge repwe foute ngeniir föföf mürina usun a fich ngeni fefin kana mi souläng. ¹¹ Ekewe fefin repwe kaiö fän mosonon me tipetekison. ¹² Üsap mwüt ngeniir pwe repwe asukul ika repwe nemenem won mwän. Repwe fokun tipemosonon. ¹³ Pun Kot a akomwen föri Atam, mürin a föri Efa. ✱ ¹⁴ Iwe, esap Atam a tupula, nge ewe fefin a tupula o atai än Kot allük. ✱ ¹⁵ Nge ekewe fefin repwe küna manau ren ar nöünöü, are repwe likitü lon ar lükü, lon ar eäni chen, lon ar pin me mirit.

3

Usun ekewe soumasen mwichefel

3.1-7

¹ A let ewe kapas: Are eman a mochen wiseni ewe wisen soumasen mwichefel, a tipeni eu angang mi aüchea. ² Iwe, eman soumas epwe fokun unusöch lon manauan. Epwe pwülüeni eman chök fefin, epwe tipefesir, epwe tufichin nemeni püsin inisin, epwe mirit, epwe etiwaöchü wasöla, epwe pwal lipwäköch le asukul. ³ Esap ünüpuch are rochongau, nge epwe tipepwetete o afisätä kinamwe, esap eman mi mochenian moni. ⁴ Epwe emwenöchü püsin chon an famili o aörüni ngeni nöün kana ar repwe aleasochis ngeni fän menin. ⁵ Pun are eman esap silei usun an epwe emwenöchü püsin chon an famili, ifa usun an epwe tongeni tümwünöchü mwichefelin Kot? ⁶ Esap öch an epwe eman souläng mi fö, pwe ete lamalamtekia o tolong lon kapwüng usun än ewe Tefil küna kapwüng. ⁷ Iwe, epwe pwal iteüöch me ren ekewe chon lükün, pwe esap tolong lon itengau o tup lon än Tefil sär. ✱

Usun ekewe soualilis lon mwichefel

3.8-13

⁸ Ekewe soualilis repwe usun chök ekewe soumas, repwe aramasöch, resap aweruu, resap ünümong wain ika tipemong won moni. ⁹ Repwe

✱ 2:7: 2.Tim.1.11 ✱ 2:9: 1.Pet.3.3 ✱ 2:13: Ken.2.7,21-22 ✱ 2:14: Ken.3.1-6 ✱ 3:7: Tit.1.6-9

kamwöchünük won ewe monomonen lükülük mi let ren mwelien letiper mi limöch. ¹⁰Iwe, repwe akomwen küna sosot, mürin are a pwä pwe esap wor eman a atipisiir, repwapw alilis lon angangen mwichefel. ¹¹Pwal ina chök usun ekewe soalilis fefin repwe aramasöch, esap luapas, repwe tipefesir o allükülük lon mettoch meinisin. ¹²Eman soalilis epwe pwülüeni eman chök fefin, epwe pwal emwenöchü püsin nöün kana me chon an famili. ¹³Iwe, ekana soalilis mi angangöch repwe küna iteüöch me ren aramas, repwe pwal tufichin pworacho le kapas usun ar lükü Kraist Jesus.

Usun monomonen ach lükülük

3.14-16

¹⁴Lupwen üa makkei ei toropwe ngonuk, üa apilükülük pwe üpwe müttirila reöm pwe üpwe churuk. ¹⁵Nge are üpwe mang, ei toropwe epwe afata ngonuk usun ach föför lein chon ewe familien Kot, iei än Kot, ewe mi manau we mwichefel, ewe ürelap me longolongun ewe let. ¹⁶Kich sia pwärätä pwe a fokun lapalap monomonen ach lükülük:

I a pwäla lon fituk,

a pwä pwe a pwüng me ren Ngünmifel,

chon läng kana ra küna i,

chon fanüfan ra rongorong pworausau,

won fanüfan mi wor chon lükü itan,

Kot a angeatä lon lingau.

4

Ekewe chon afalafal chofona

4.1-5

¹Iwe, ewe Ngünmifel a afata, pwe lon ekewe fansoun mürin ekoch aramas repwe pöütala ar lükülük, repwe rongorong ngeni ekewe ngün mi chofona o aleasochis ngeni aitian ekewe anün rochopwak. ²Ekei sokun kapasen kait ra chöüfeil ren ekewe chon chofona mi atuputup, mwelien letiper a mä, ra usun itä nge ra kar ren efoch mächä mi fokun sarara. ³Ekei sokun aramas ra afalafala pwe a ngau pwüpwülü, ra pwal apini ekoch sokun mongö. Nge Kot a awora ekei sokun mongö pwe sipwe mongö. Iwe, kich mi lükü o silei ewe let sipwe eni ewe mongö fän ach iotekin kilisou. ⁴Pun meinisin mine Kot a föri a mürina. Esap wor och sipwe oput are sipwe angei fän ach iotekin kilisou, ⁵pun än Kot kapas me ewe iotek ra afisätä pwe epwe mürina me ren Kot.

Eman chon angangen Kraist Jesus mi mürina

4.6-16

⁶Iwe, are kopwe aiti ngeni pwiüm kewe souläng ekei kapasen öüröür, kopwe eman chon angangen Kraist Jesus mi mürina. Kopwe püsin amongöni ngünüm ekewe kapasen lükülük, pwal ekewe kapasen kait ka fen aleasochisi tori ikenai. ⁷Kopwe afäluk ren ekewe tutulap mi ü ngeni ewe kapasen Kot, esap wor lomoten ach sipwe apworausau, nge kopwe chök achocho le asipok lon om souläng. ⁸Pun ach achocho le asipakich lon ach souläng a atoto ekis chök feiöch, nge ach achocho le asipakich lon ach souläng a atoto rech feiöch meinisin, pun a pwon ngenikich manau lon ei fansoun ikenai pwal lon ekewe fansoun repwe feito. ⁹A allükülük ei kapas pwe aramas repwe fokun etiwa o lükü. ¹⁰Iei popun sia achocho le angang weires, pun sia anomu ach apilükülük won ewe Kot mi manau, i ewe

Chon Amanau fän iten aramas meinisín, nge lapalan fän iten chokewe mi lükü ewe kapasen Kot.

¹¹ Kopwe afalafala o aiti ngeni ekewe souläng ekei kapasen öüröür me ekei kapasen kait. ¹² Kopwe tümwünuk, pwe esap wor eman epwe urumwoteek pokiten om alüal, nge kopwe eu lenien apirü ngeni ekewe chon lükü lon om kapas, lon om föför, lon om chen, lon om lükülük, pwal lon om limöch. ¹³ Tori ai üpwe war, kopwe likitü lon om aleani ekewe Toropwe mi Pin ngeni ekewe souläng, kopwe afalafaleer usun o asukula ngeniir. ¹⁴ Kosap tümwünungau ngeni ewe lifang seni ewe Ngünmifel, a toruk ren än ekewe soufos kapas, lupwen ekewe souakom ra iseis pöür womw. ¹⁵ Kopwe föri pwüngün ekei mettoch o fokun achocho ngeni om kopwe apwönüretä, pwe aramas meinisín repwe küna om fefeitä lon om souläng. ¹⁶ Kopwe püsin tümwünuk, kopwe pwal tümwünü mine ka afalafal won. Kopwe likitü le föri ekei mettoch, pun are kopwe föri iei usun, kopwe püsin amanauok me chokewe mi aüselingok.

5

Pwüngün wisen Timoty ngeni ekewe souläng

5.1–6.2

¹ Kosap apwüngüchou eman mwän mi chinlap, nge kopwe chök fönöü usun itä nge om kopwe fönöü semom. Kopwe fönöü ekewe alüal usun itä nge ir pwiüm kewe. ² Kopwe fönöü ekewe chinlap fefin usun itä nge ir inelap, kopwe pwal fönöü ekewe föpwül usun itä nge ir fefinom. Kopwe föri ei ren limöchün lelukom.

³ Kopwe meniniti ekewe fefin mi mä pwülüer, chokewe mi wesewesen akaleman, esap wor eman a tümwünüür. ⁴ Nge ika eman fefin mi mä pwülüan a wor nöün ika nöün nöün, ir repwe akomwen apwönüretä pwüngün wiser lon ar souläng ngeni püsin ar famili. Ren ei repwe liwini ngeni semer me iner, pwal ngeni semen me inen semer me iner mine ra piin föri ngeniir, pun iei met Kot a pwapwa ren. ⁵ Eman fefin mi mä pwülüan o akaleman, esap wor eman a tümwünü, a anomu an apilükülük won Kot, a sowwela le iotek lerän me lepwin o tüngor ngeni Kot pwe epwe alisi. ⁶ Nge eman fefin mi mä pwülüan nge a chök apwapwai inisin lon sokun pwapwan fanüfan, neminei a fen mäla, inamwo ika a chüen manau lon inisin. ⁷ Kopwe aiti ngeni ekewe aramas ekei kapasen öüröür, pwe esap wor och mine eman epwe atipisimwäliir won. ⁸ Nge are eman esap püsin tümwünü aramasan, fokun püsin chon an famili, a amamäsini an lükülük o an föför a ngau seni föförün eman esap souläng.

⁹ Kopwe makkeelong eman fefin mi mä pwülüan lon tettelin ewe mwichen fefin mi mä pwülüer are a ierini wone feitä. Pwal eu, are neminewe a chök pwülüeni eman chök mwän, ¹⁰ a pwal sil me ren aramas ren an föför mürina, a foleniöchü nöün kana, a etiwaöchü wasöla lon imwan, a talü pechen ekewe chon pin, a alisi aramas mi nom lon osupwang o fokun achocho le föri föför mürina fansoun meinisín.

¹¹ Nge kosap apachalong ekewe fefin mi mä pwülüer lon ewe tettel are ierir a kis seni wone, pun lupwen ra mochen pwüpwülü lon ar mochenia, repwe kul seni Kraist. ¹² Iei usun repwe tipis ren ar atai ar we pwon ngeni Kraist ra eäni me mwan. ¹³ Ra pwal aörüni ngeniir ar repwe asolapala ar fansoun ren ar einimweifeil. Nge resap chök asolapala ar fansoun, pwe ra pwal aörüni ngeniir ar epwe luapas o fosolong lon än

eman angang, ra kakapas won mettoch esap wiser pwe repwe kapas won. ¹⁴ Iei mine üa mochen pwe ekewe fefin mi mä pwülür nge ra ier kükün repwe pwüpwülüsefäl, repwe nöönöü o tümwünü angangen lon imwer. Repwe föri ei pwe resap awora ngeni ekewe chon oputakich och popun ar repwe kapasingau usuch. ¹⁵ Pun ekoch me leir ra fen tokola o ra aleasochis ngeni Satan. ¹⁶ Nge are eman souläng fefin a wor ren fefin mi mä pwülür, i epwe fokun tümwünüür, nge esap wätä won mwichefel och weires, pwe mwichefel epwe tongeni tümwünü ekewe fefin mi mä pwülür, ir chokewe mi akaleman chök.

¹⁷ Ekewe souakom mi angangöch le emweni mwichefel a aüchea ngeniir ar repwe angei liwiniir fän ruu, fokun ätekewe mi angang weires lon ar afalafal me asukula aramas ewe kapasen Kot. ¹⁸ Pun iei usun mine a mak lon ekewe Toropwe mi Pin, “Kosap föti awen eman ätemwänin kow lupwen a puri ekewe irän wiich, pwe föür repwe towu seni pöör.” A pwal mak, “Eman chon angang epwe angei liwinin.” ✧ ¹⁹ Kosap aüseling ngeni än eman atipisi eman souakom are esap wor ruoman ika ülüman chon pwärätä an tipis. ✧ ²⁰ Kopwe apwüngüchou ekewe souakom mi föri tipis mwen mesen souläng meinisin, pwe pwal ekewe ekoch souläng repwe niukus.

²¹ Me mwen mesen Kot me Kraist Jesus me ekewe chon läng mi fil üa fokun allük ngonuk pwe kopwe aleasochis ngeni ekei kapasen öüröür, nge kosap oput eman ika efich eman lon meinisin mine ka föri. ²² Kosap müttir le iseis poumw won eman om kopwe afeiöchü fän iten ewe angangen ach Samol. Kosap atolongok lon tipisin pwal ekoch aramas. Kopwe püsin tümwünüok om kopwe limöch. ²³ Kosap ünümi koluk echök, nge kopwe ünümi ekis wain pokiten chükünükanom, pwal pokiten ka samau fän chomong. ²⁴ Tipisin ekoch aramas ra fokun pwäpwäla, ra akomwola mwer lon ewe lenien kapwüng, nge tipisin ekoch a chök pwä me mürin. ²⁵ Ina chök usun föföör mi mürina ra fokun pwäpwäla, inamwo ika ekoch ekei föföör resap kon pwäpwäla, nge resap tongeni monola.

6

¹ Iwe, ätekewe ir amanau repwe fokun asamolu ar kewe masta, pun iei pwüngün mine repwe föri ngeniir, pwe esap wor eman epwe kapasingau usun iten Kot pwal usun ach afalafal. ² Nge ekewe amanau mi nom fän nemenien ekewe masta mi souläng resap turunufasei ar kewe masta pokiten ir pwiir souläng. Nge repwe alapala ar achocho le angang ngeniir, pun chokewe mi feiöch seni ar angang, ir chon lükü Kraist ra chen me rer. Ikei ekewe kapas kopwe aiti ngeni ekewe souläng o pese ngeniir pwe repwe aleasochis ngeni.

Afalafal chofona me mochenian moni

6.3-10

³ Nge are eman a asukula och sokun kapas, esap pwal tipeeu ngeni ewe kapas enlet än ach Samol me ewe kapasen kait lon ach lamalam, ⁴ i a uren lamalamtekia o esap silei och. A chök mochen akanini o afitikoko won kapas mi afisätä lolowo, tipefesen, turunufas me ekiekingau, ⁵ pwal fitikoko lefilen aramas. Än ekei aramas ekiek a fokun ngau, resap silei mine a let, ra ekieki pwe ach souläng a awora ngenikich ach win.

⁶ Ewer, ach souläng eu win mi lapalap are a wor rech menemenöch. ⁷ Pun esap wor och mettoch sia uwalong lon fanüfan, esap pwal wor och mine sipwe uwawu me lon. ⁸ Iei mine are a wor anach me üfach sipwe menemenöch ren. ⁹ Nge chokewe mi mochen ar repwe pisekisek ra tolong lon sosot o ra tup lon eu sârin chomong sokun mochenia mi umwes me afeiengau, ra aturrelong lon feiengau me pöütüla. ¹⁰ Pun mochenian moni iei popun sokopaten ngau meinisin. Ekoch mi ekieki ar repwe pisekisek ra mwalech seni ar lükülük o ra püsin aworato wor chomong riaföü mi fokun aweires.

*Än Paulus kapasen öüröür ngeni Timoty
6.11-21*

¹¹ Nge en nöün Kot aramas, kopwe sü seni ekei mettoch meinisin. Kopwe fokun achocho ngeni om kopwe eäni pwüing, soulängöch, lükülük, chen, likitü me kirikiröch. ¹² Kopwe eäni ewe maunen lükülük mi fokun mürina, iwe, kopwe angei ewe manau esemüch, pun iei met Kot a kóruk ngeni, lupwen ka pwora le pwärätä om lükülük mwen mesen chomong chon pwärätä. ¹³ Üa allük ngonuk mwen mesen Kot mi fang manau ngeni mettoch meinisin, pwal mwen mesen Kraist Jesus mi pwora le pwärätä an lükülük mwen mesen Pontius Pilatus, ✱ ¹⁴ pwe kopwe aleasochisi ekei allük fän allükülük, pwe esap wor eman epwe tongeni atipisuk tori ewe rän lupwen ach Samol Jesus Kraist epwe wareto. ¹⁵ An wareto epwe fis lon ewe otun Kot a filätä. Kot i ewe eman chök Sounemenem sipwe mwareiti, i ewe King mi lapalap seni king meinisin, pwal i ewe Samol mi lapalap seni samol meinisin. ¹⁶ I chök ewe eman esap tongeni mäla, a nom lon eu leni mi fokun saram, pwe esap wor eman a tongeni arap ngeni. Esap wor eman a piin küna, esap pwal fokun wor eman epwe tongeni küna i. I epwe angei iteüöch me nemenem tori feilfeilachök! Amen.

¹⁷ Kopwe allük ngeni ekewe mi pisekisek lon mettochun ei fanüfan pwe resap lamalamtekia. Resap pwal anomu ar apilükülük won wöür epwe morola, nge repwe apilükülükü Kot mi fangesom ngenikich mettoch meinisin pwe sipwe feiöch ren. ¹⁸ Kopwe allük ngeniir, pwe repwe föri mine a mürina, pwe repwe pisekisek lon ar föföri mürina, repwe kichiöch o mochen alisi aramas. ¹⁹ Ren ei repwe iseis fän iter och wöü epwe eu longolong mi nükünük fän iten ewe fansoun epwe feito. Mürin repwe angei ewe manau, iei ewe enletin manau. ²⁰ Iwe, en Timoty, kopwe tümwünü met Kot a lükü ngonuk. Kosap aüseling ngeni kapas mi ngau me ekewe kapasen anini mi lomotongau, ekoch aramas ra aita ngeni “silelap”, nge a mwäl rer. ²¹ Pun ekoch ra apasa pwe ra eäni ei silelap, iei mine ra tokola seni ar lükülük.

Än Kot ümöümöch epwe nonom remi meinisin.

Aruachön nöün Paulus Toropwe ngeni Timoty

Kapas akom

I. Chon makkei ei toropwe: Ewe soukünü Paulus.

II. A mak ngeni iö me fansoun an mak: Ngeni ewe alüal Timoty, eman chon angangen Kot, eli a mak me lon Rom lefilen ekewe ier 65 me 67 A.D.

III. Itelapemongen ei toropwe: Kapasen öüröür ngeni Timoty pwe epwe likitü lon an angang ngeni Kot.

IV. Kapas aüchean ei toropwe: Kopwe tümwünü ewe kapasen pwärätä, pun iei ach manau seni Kot.

V. Masouen ei toropwe: Aruachön nöün Paulus toropwe ngeni Timoty a eäni kapasen öüröür ngeni, pun i eman chiechian alüal me eman chon alisi. Itelapen ei toropwe: likitü. Paulus a öüröüra Timoty o apöchöküla an epwe sopwela le pwärätä Jesus Kraist fän allükülük, epwe kamwöchünük won an afalafala ewe Pworausen Manau mi let me kapasen ewe Testamentin Lom, epwe pwal föri wisan, wisen sense me chon asoulängala aramas. Epwe föri ekei angang meinisin, inamwo are epwe tolong lon riaföü o aramas repwe ü ngeni.

Paulus a fönöü Timoty pwe epwe tümwünü seni feiengauen an pachelong lon sokun anini mi lomotongau o esap wor mirit lon, esap pwal afeiöchü aramas, nge a chök afeiengaua ir mi aüseling ngeni.

Lon ekei kapas meinisin Paulus a achema ngeni Timoty pwe epwe apirü püsin manauan lon an lükülük, an mosonotam, an echeni aramas, an likitü pwal lon an küna riaföü lon ekewe ninni a tolong lon.

VI. Tettelin masouen ei toropwe:

Kapas akom 1.1-2

Kapasen mwareiti Kot me kapasen pesepes ngeni Timoty 1.3-2.13

Kapasen öüröür me fön 2.14-4.5

Usun nonomun manauen Paulus 4.6-18

Kapasen lesopolan 4.19-22

Kapong

1.1-2

¹ Ngang Paulus, eman nöün Kraist Jesus soukünü ren letipen Kot, a tini ei pwe üpwe arongafeili ewe manau a pwon ngenikich, sia eäni lon Kraist Jesus, ² üa kapong ngonuk Timoty nei mi achengicheng: Samach Kot me Kraist Jesus ach Samol epwe ngonuk ümöümöch, chen me kinamwe. ✱

Kapasen kilisou me kapasen apöchöküla Timoty lon wisan

1.3-18

³ Üa kilisou ngeni Kot, ewe üa angang ngeni ren mwelien letipei mi limöch usun ai kewe lewo ra föri. Üa kilisou ngeni Kot lupwen üa chechemenük fansoun meinisin lon ai iotek lerän me lepwin. ⁴ Üa chechemeni om kechü o üa fokun mochen künok, pwe üpwe urela ren pwapwa. ⁵ Üa chechemeni ewe lükülük mi let ka eäni, ewe sokun lükülük

a pwal nom ren inen inom Lois me inom Eunike. Üa fokun lükü pwe a pwal nom reöm. ✧ ⁶ Iei popun üa achema ngonuk, pwe kopwe alapala le aea än Kot we lifang mi nom reöm ren ai iseis pei womw. ⁷ Pun ewe Ngünmifel Kot a ngenikich esap afisi ngenikich ach sipwe pireir, nge a ngenikich Ngünün mi aurakich ren pwora, chen me ewe tufichin püsin nemeni inisich.

⁸ Iei mine kosap säwäsini om kopwe pwärätä ach Samol, kosap pwal säwäsini, ngang eman chon fötek fän iten Kraist. Nge kopwe etiei le riaföü fän iten ewe Pworausen Manau ren än Kot manaman. ⁹ I a amanauakich o kōrikich pwe sipwe manaueni eu manau mi pin, sap pokiten ach föfōr, nge pokiten püsin an ekiek me an ümōümōch. A ngenikich ei ümōümōch lon Kraist Jesus mwen fanüfan esamwo wor, ¹⁰ nge iei a pwäla ngenikich ren wareton ach chon Amanau Kraist Jesus. I a awesi ewe manamanen mäla o pwäräla lon saram ren ewe Pworausen Manau eu sokun manau esap tongeni mäla.

¹¹ Kot a awisaei pwe üpwe eman soukünö me sense, pwe üpwe aron-gafeili ewe Pworausen Manau. ✧ ¹² Iei popun üa nom lon ei sokun riaföü, nge üsap säw ren. Pun üa silei iö üa lükü, nge üa alletä pwe a tongeni tümwünü mine a lükü ngeniei tori ewe Ränin lesopolan. ¹³ Kopwe kamwōchünük won ekewe kapas mi let üa aiti ngonuk, pwe repwe eu lenien apirü ngonuk lon om afalafal. Kopwe apposok lon ewe lükülük me chen mi nom lon Kraist Jesus. ¹⁴ Ren manamanen ewe Ngünmifel mi nom loch kopwe tümwünüöchü ewe Pworausen Manau Kot a lükü ngonuk.

¹⁵ En ka fen silei pwe ekewe souläng meinisin lon Asia ra sü seniei, pwal Fikelus me Hermokenes. ¹⁶ Ach Samol epwe ümōümōch ngeni chon familien Onesiforus, pun i a echipaei fän chomong. Esap säwäsini pwe ngang üa nom lon fötek, ¹⁷ nge lupwen a tori Rom a achocho le küttaei tori a künaei. ¹⁸ Ach Samol epwe ümōümōch ngeni lon ewe Ränin kapwüng! Ka fokun silei usun ükükün an alisie me lon Efisos.

2

Eman nöün Kraist Jesus sounfiu mi allükülük

2.1-13

¹ Iwe, en nei, kopwe pōchökül ren ewe ümōümōch mi nom lon Kraist Jesus. ² Met ka rongorong seniei pwe üa afalafala me mwen chomong chon pwärätä, kopwe lükü ngeni ätekewe mi allükülük o tufichin asukula pwal ekewe ekoch souläng.

³ Kopwe molotä om kopwe pwal tolong lon riaföü usun eman nöün Kraist Jesus sounfiu mi allükülük. ⁴ Eman sounfiu mi föri wisan a mochen föri met an samol epwe pwapwa ren, nge esap pachelong lon sokun angangen manauen aramas. ⁵ Eman chon kitir mi sä lon eu kitir esap tongeni angei winnan, are esap aleasochisi allükün kitir. ⁶ Eman chon tanipi mi föri an angang weires epwe akomwen angei wisan seni uän ewe räs. ⁷ Kopwe ekieki usun mine üa apasa, pun ach Samol epwe atufichuk om kopwe weweiti ekei mettoch meinisin.

⁸ Kopwe chechemeni Jesus Kraist, ewe mi manausefäl seni mäla, i eman mwirimwirin Tafit, usun a pwäla lon ai afalafala ewe Pworausen Manau. ⁹ Pokiten ngang üa afalafala ewe Pworausen Manau, üa tolong lon riaföü, üa fen mwo nge föfö ngeni selimächä usun eman chon

föföringau. Nge än Kot kapas esap föfö. ¹⁰Iei mine üa likitü lon ekei riaföü meinisin fänäsengesis nöün Kot kewe mi fil, pwe pwal ir repwe küna ewe manau a nom lon Kraist Jesus me ewe ling esemüch. ¹¹Iei eu fos mi let:

“Are sia eti Kraist le mäla,

sipwe pwal eti i lon an manau.

¹²Are sia likitü, sipwe eti i lon an nemenem.

Are sia amamäsini i, i epwe pwal amamäsinikich. ✱

¹³Are sisap allükülük, i epwe chök nonom lon an allükülük, pun i esap tongeni siwili sokun.”

Eman nöün Kraist chon angang Kot a tipeeu ngeni

2.14-26

¹⁴Iwe, kopwe achema ngeni noum kewe aramas ekei mettoch o allük ngeniir mwén mesen Kot, pwe resap anini won kapas, pun esap wor lomotan, nge a chök afeiengaua aramas mi aüseling ngeni. ¹⁵Kopwe fokun achocho ngeni pwe Kot epwe tipeeu ngenuk, pwe kopwe eman chon angang esap säw ren an angang, pun ka afalafala än Kot kapas mi let fän pwüng. ¹⁶Kopwe afäluk seni ekewe kapas mi ngau me ekewe kapasen anini mi lomotongau, ra chök atoauala aramas seni Kot. ¹⁷Pun ekei sokun afalafal ra usun chök ruup mi enala fituk. Ruoman mwän, Himenäus me Filetus, ra afalafala ekei kapas. ¹⁸Ra tokola seni mine a let ren ar afalafala pwe a fen fis manausefälin sotup kana, iwe, ra atai än ekoch souläng lükülük. ¹⁹Nge ewe longolong mi nükünük Kot a anomu esap tongeni mwökütüküt. A mak won ei longolong ekei kapas: “Ach Samol a silei chokewe ir nöün,” a pwal mak “Tö a apasa pwe i nöün ach Samol epwe fokun kul seni föföringau.” ✱

²⁰Iwe, lon eu imw mi watte a wor sokopaten sepi: ekoch ra för seni silifer me kolt, nge pwal ekoch ra för seni mwüch me pwülüpar. Ekoch sepi ra aea fän iten rän mi aüchea, nge ekoch ra aea fän iten iteiten rän. ²¹Are eman aramas a püsin limeti seni ekana sokun lapalap mi ngau, i epwe eu pisekin aea fän iten ekoch popun mi aüchea, pun a pin o lomot fän iten an Samol, a molotä pwe epwe eu pisekin aea fän iten föfö mürina meinisin. ²²Kopwe sü seni tipen alüal, nge kopwe fokun achocho ngeni om kopwe eäni pwüng, lükülük, chen me kinamwe, fiti chokewe meinisin mi köri iten ach Samol ren eu leluk mi limöch. ²³Kopwe afäluk seni ekewe kapasen anini mi umwes o lomotongau, pun ka silei pwe ra chök afisätä fitikoko. ²⁴Eman nöün ach Samol chon angang esap fokun anini, nge epwe kirikiröch ngeni aramas meinisin, epwe lipwäköch le asukula aramas fän mosonotam, ²⁵epwe pwal tipepwetete lon an fönöü chokewe mi ü ngeni, pun eli epwe fis pwe Kot epwe ngeniir tufichin ar repwe ekiexefäl, pwe repwe silei ewe let. ²⁶Mürin repwe miritila o sü seni ewe särin Tefil mi liapaniir, pwe repwe föri letipan.

3

Ekewe ränin lesopolan

3.1-9

¹Iwe, kopwe chechemeni pwe lon ekewe ränin lesopolan epwe wor fansoun weires. ²Aramas repwe ekeiki chök püsin ir, repwe efich moni, repwe tunomong me lamalamtekia, repwe turunufas o aleasolap ngeni semer me iner, resap sile kilisou, resap meniniti lamalam, ³resap

eäni tong, resap amusala tipisin aramas, ra luapas, resap tongeni püsin nemeni inisir, ra lingersingikai, ra oput mine a mürina, ⁴ ra rawan-gauei aramas, ra rochongau o uren lamalamtekoa, ra efich pwapwan fanüfan, nge resap echeni Kot. ⁵ Repwe pomweni pomwen souläng, nge manamanan ra pöütala. Kosap chiechi ngeni ekei sokun aramas. ⁶ Iwe, ekoch me leir ra tolong lon imwen aramas o liapeni ekewe fefin mi apwangapwang lon ar souläng, ra nonom fän choun ar tipis o chuwenewenfeil ren sokopaten ar mochenia, ⁷ fefin mi chök kakaiö fansoun meinsin, nge resap fokun tongeni silei ewe let. ⁸ Usun Jannes me Jampres ra ü ngeni Moses, ina usun ekei aramas ra ü ngeni ewe let, ir aramas mi fokun ngau ar ekiek, ar lükülük esap pwüng. ⁹ Nge resap fefeitä lon manauer, pun aramas meinsin repwe küna ar tiparoch. Ina chök usun mine a fis ngeni Jannes me Jampres.

Lesopolan än Paulus kapasen öüröür ngeni Timoty
3.10–4.8

¹⁰ Nge en ka sileöchü ai afalafal, ai föför me met üa awena manaueni ngeni. Ka silei ai lükülük, ai mosonotam, ai chen, ai likitü, ¹¹ ai küna ninni me ai riaföü. Ka silei meinsin mine a fis ngeniei me lon Antiochia, Ikonium me Listra, pwe a fokun afeiengau ekewe sokun ninni üa engila fan. Nge ach Samol a angasaei seniir meinsin. ¹² A pwüng pwe aramas meinsin mi mochen manaueni eu manauen souläng lon Kraist Jesus repwe tolong lon ninni. ¹³ Nge ekewe aramasangau me soulängatuputup repwe chök fokun ngauala, ra atupu aramas o püsin küna atuputup. ¹⁴ Nge en Timoty, kopwe chök kamwöchünük won mine ka kaiö o nüküchar le lükü. Ka silei iö a asukulok, ¹⁵ ka chechemeni pwe seni chök lekükünüm ka silei kapasen ekewe Toropwe mi Pin, ra tongeni atipachemok o emwenuk ngeni om kopwe küna manau ren om lükü Kraist Jesus. ¹⁶ Iwe, kapasen lon ekewe Toropwe mi Pin meinsin ra pop seni Ngünün Kot, ra aüchea fän iten afalafala ewe kapas mi let, ra amiritikich, ra apwüngükich o aiti ngenikich usun ach sipwe manau fän pwüng, ¹⁷ pwe ewe aramas mi angang ngeni Kot epwe fokun tufich o lipwäköch ngeni sokun angang mürina meinsin.

4

¹ Üpwe fokun fönok me mwen mesen Kot me Kraist Jesus, ätewe epwe apwüngü ekewe mi manau me ekewe mi mäla, pwal i epwe war o nemenem usun eman king, ² pwe kopwe afalafala ewe Kapasen Kot. Kopwe achocho ngeni om kopwe arongafeili ewe Kapas, ese liflifil ika lon fansoun öch ika lon fansoun ese öch. Kopwe föri ewe angangen fön, apwüng me apöchöküla manauen souläng lupwen ka föri ewe angangen asukul fän mosonotam. ³ Pun epwe war ewe fansoun, lupwen aramas resap mochen aüseling ngeni afalafal mi let. Nge repwe chök fiti mochenin letiper o repwe achufengeni chomong sense fän iter, ir ätekewe repwe üreniir mine ra mochen rongorong. ⁴ Repwe kul seni ar aüseling ngeni ewe kapas mi let, nge repwe aüseling ngeni ekewe tutulap. ⁵ Nge en kopwe ekisaram lon om föför meinsin, kopwe likitü lon riaföü, kopwe föri angangen eman chon asoulängala aramas, kopwe unusen apwönüetä wisom usun eman nöün Kot chon angang.

⁶ Nge me rei, a tori ewe fansoun ai üpwe fangala manau ei ngeni Kot pwe eu asor, a tori ewe otun ai üpwe mäla. ⁷ Üa eäni ewe maun mi öch, üa awesöchüela ewe kitir, üa amwöchü ai lükülük. ⁸ Seni iei a iseis ngeniei ewe mwäriin pwüing, ewe win ach Samol ewe Soukapwüing mi pwüing epwe ngeniei lon ewe Rän. Nge esap ngeniei chök, nge pwal ngeni chokewe meinisin mi fokun witiwiti an wareto.

Än Paulus kapas won püsin inisin

4.9-18

⁹ Kopwe achocho ngeni om kopwe müttir feito rei. ¹⁰ Pun Temas a echeni ei fanüfanen ikenai, a likitiei o feila Tesalonika. Kresens a feila Kalatia o Titus a feila Talmatia. ✧ ¹¹ Lukas chök a nom rei. Kopwe angei Markus pwe epwe etuketo, pun a tongeni alisie lon ai angang. ✧ ¹² Üa tinala Tikikus ngeni Efisos. ✧ ¹³ Lupwen kopwe feito, kopwe uweeto üfei na sekit üa likitala lon Troas ren Karpus, kopwe pwal uwato ekewe puk, akaeuin ekewe mi för seni silin man. ✧

¹⁴ Aleksanter, ätewe mi föri pisek seni mächä, a fokun ariaföüüei. Ach Samol epwe ngeni chappen an föfö ngeniei. ✧ ¹⁵ Kopwe afäluk ren ätewe, pun a fokun pöchökül le ü ngeni ach afalafal.

¹⁶ Lon aeuin fansoun üa küna kapwüing esap wor eman a alisie. Ir meinisin ra likitieila. Amwo Kot esap liwini ngeniir liwinin ar föfö!
¹⁷ Nge ach Samol a nom rei, a atufichiei pwe üpwe tongeni arongafeili unusen ewe Kapasen Kot, pwe ekewe chon lükün Israel meinisin repwe rongorong. Iwe, üa ngas seni ar apwüingüei ngeni mäla. ¹⁸ Ach samol epwe pwal angasaei seni ekewe sokun angangingau meinisin o amanauaei, pwe epwe uweela ngeni mwün lon läng. I epwe ling tori feilfeilachök! Amen.

Ekewe kapongen lesopolan

4.19-22

¹⁹ Ngang üa kapong ngeni Prisila me Akwila, pwal ngeni chon ewe familien Onesiforus. ✧ ²⁰ Erastus a nometiu lon Korint, nge Trofimus üa likitala lon Miletus, pun a samau. ✧ ²¹ Kopwe achocho ngeni om kopwe feito rei mwen lefen. Eupulus, Putens, Linus me Klautia ra kapong ngonuk, pwal pwiich kewe souläng meinisin ra kapong ngonuk.

²² Ach Samol epwe eti ngünüm. Än Kot ümömöch epwe nonom remi meinisin.

✧ **4:10:** Kol 4.14; Filim 24; 2.Kor 8.23; Kal 2.3; Tit 1.4 ✧ **4:11:** Kol 4.14; Filim 24; Föf 12.12,25; 13.13; 15.37-39; Kol 4.10 ✧ **4:12:** Föf 20.4; Ef 6.21-22; Kol 4.7-8 ✧ **4:13:** Föf 20.6 ✧ **4:14:** 1.Tim 1.20; Kölf 62.12; Rom 2.6 ✧ **4:19:** Föf 18.2; 2.Tim 1.16-17 ✧ **4:20:** Föf 19.22; Rom 16.23; Föf 20.4; 21.29

Nöün Paulus Toropwe ngeni Titus

Kapas akom

I. Chon makkei ei toropwe: Ewe soukünü Paulus.

II. A mak ngeni iö: Ngeni Titus, ewe chon angang ngeni Kot.

III. Itelapemongen ei toropwe: Kapasen öüröür me kapasen fön usun än Titus epwe föri än Kot angang.

IV. Kapas aüchean ei toropwe: Sisap küna manau ren ach föfööröch, nge sia küna manau, pwe sipwe föri föföör mi öch.

V. Masouen ei toropwe: Titus, eman chon lükün Israel a soulängila, nge mürin a chieneni Paulus o alisi i lon an föri angangen missionari. Paulus a makkei ei toropwe ngeni ei alüal Titus nöün we chon alilis, i a likitätü lon Kreta, pwe epwe tümwünü angangen lon ewe mwichefel. Ei toropwe a kapas usun ülüngat sokun ekiek mi aüchea:

Aeuin, Paulus a achema ngeni Titus met sokun manau eman chon emweni mwichefel epwe manaueni. Ei a aüchea, pokiten manauen chomong chon Kreta a ngau. Aruan, Paulus a öürööra Titus usun an epwe asukula ekewe sokopaten mwichen aramas lon mwichefel, ekewe chinlap mwän me chinlap fefin, (ir chokewe repwe asukula ekewe föpwül me mürin) pwal usun an epwe asukula ekewe alüal me ekewe amanau. Sopolan Paulus a öürööra ngeni Titus usun ewe manauen souläng, akaeuin usun ar repwe kinamwefengen me kirikiröchfengen, nge resap koputfengen, aninifengen me kinikinfesen lon mwichefel.

VI. Tettelin masouen ei toropwe:

Kapas akom 1.1-4

Usun ekewe nöüwisen mwichefel 1.5-16

Wisen ekewe sokopaten mwichen aramas lon mwichefel 2.1-15

Kapasen pesepes me kapasen fön 3.1-11

Kapasen lesopolan 3.12-15

Kapong

1.1-4

¹ Kapong seni ngang Paulus, eman nöün Kot chon angang me eman nöün Jesus Kraist soukünü.

Kot a filiei o tinieila, pwe üpwe alisi nöün Kot kewe mi fil lon ar lükülük o emweniir ngeni ar repwe silei ewe let sia kaiö seni ach lamalam. ² Iei ewe let mi longolong won ach apilükülük ngeni ewe manau esemüch. Kot, ewe esap chofona, a pwon ngenikich ei manau me mwen fansoun esepop, ³ nge lon fansoun mi fich a pwärala ewe let lon an kapas. Kot, ach Chon Amanau, a lükü ngeniei ei kapas, pwe üpwe arongafeili ren an we allük ngeniei. ⁴ Üa makkei ei toropwe ngonuk, Titus, en wesewesen nei lon ewe lükülük sia eänifengeni. Samach Kot me Kraist Jesus ach Chon Amanau epwe ngonuk ümöümöch me kinamwe. ✧

Än Titus angang lon Kreta

1.5-16

⁵ Ûa likituketiu lon Kreta, pwe kopwe akota ekewe mettoch resamwo kotöch, kopwe pwal filätä souakom lon iteiten ekewe mwichefel. Kopwe chechemeni ai kewe kapasen öüröür ngonuk: ⁶ Eman souakom epwe fokun unusöch lon manauan, epwe pwülüeni eman chök fefin, nge nöün kana repwe souläng, pwe esap wor eman epwe tip ngeniir pwe ra föföringau ika lükümach. ⁷ Pokiten eman soumas epwe tümwünü än Kot angang, i epwe eman mi unusöch lon manauan, esap eman mi lamalamtekia are songokai, are eman mi ünüpuch, are rochongau are tipemong won moni. ⁸ Epwe etiwöchü wasöla, epwe pwapwaiti le föri mine a mürina, epwe tufichin nemeni püsin inisin, epwe föri mine a pwüng, epwe apini manauan o eäni mirit lon manauan. ⁹ Epwe fokun kamwöchünük won ewe Kapasen Kot mi allükülük usun a kaiö ngeni, pwe epwe tongeni apöchöküla ekewe souläng ren an afalafala ewe kapas mi let usun ach lükülük, epwe pwal tongeni pölüeni chokewe mi ü ngeni.

✧

¹⁰ Pun mi wor chomong aramas mi lükümach, ar kapas a lomotongau, ra atupu aramas, akaeuin ir seni ewe mwichen chon Juta mi soulängila. ¹¹ Kopwe fokun aükätü ar kapas, pun ra afitikokoi ekoch chon ekewe famili ren ar afalafala mine esap pwüng. Ra föri ei fän iten eu popun mi asäw, pun ra mochen angei moni. ¹² Eman me lein nöür kewe soufos seni Kreta a apasa, “Chon Kreta ra kapas chofona fansoun meinisin, ra usun chök manmwacho mi ngau me chon mongömong mi chipwang.” ¹³ Ekei kapas ra let. Iei mine kopwe fokun apwüngüür, pwe epwe pwüng ar lükülük, ¹⁴ nge resap chüen aüseling ngeni än ekewe chon Juta tutulap, pwal ngeni ekewe allük mi pop seni ekewe aramas mi likitala ewe let. ¹⁵ Mettoch meinisin ra limöch ngeni chokewe mi limöch manauer, nge esap wor och a limöch ngeni chokewe mi limengau manauer, ir chokewe mi lükümang, pun ar ekiek me mwelien letiper a fen limengau. ¹⁶ Ra apasa pwe ra silei Kot, nge ar föfö a pwärätä pwe resap silei i. Ra anioput me ren Kot, ra lükümach, resap tongeni ar repwe föri och mi mürina.

2

Afalafal mi let usun ach lükülük

2.1-15

¹ Nge en Titus, kopwe fokun afalafal won met mi tipeu ngeni pwüngüöchün ach lükülük. ² Kopwe aiti ngeni ekewe chinlap mwän ar repwe tipefesir me tipepwetete, repwe tufichin nemeni püsin inisiir, repwe pöchökül lon ar lükülük, lon ar chen, pwal lon ar likitü. ³ Ina chök usun om kopwe aiti ngeni ekewe chinlap fefin ar repwe usun ekewe fefin mi manaueni eu manau mi pin. Resap luapas, resap riri ngeni ükün wain. Repwe fokun asukula mine a mürina ⁴ lon ar aiti ngeni ekewe föpwül usun ar repwe echeni pwülüer me nöür kana, ⁵ usun ar repwe nemeni püsin inisiir o eäni eu letip mi limöch, usun ar repwe sipeöch le angang lon imw, repwe eäni kirikiröch o aleasochis ngeni pwülüer, pwe esap wor eman epwe kapas ingau usun än Kot kapas.

⁶ Ina chök usun om kopwe fönöü ekewe alüal ar repwe nemeni püsin inisiir. ⁷ Nge en kopwe fokun eu lenien apirü lon om föfö mi mürina. Kopwe wenechar o tiliken lon om afalafal. ⁸ Kopwe aea kapas mi pwüng, pwe esap wor eman epwe tongeni esitok. Mürin, ekewe chon oputom

repwe säw, pun esap wor och kapas mi ngau repwe tongeni apasatä usuch.

⁹ Kopwe aiti ngeni ekewe amanau pwe repwe anomur fän nemenien ar kewe masta o apwapwaar lon mettoch meinisin. Resap wippin ngeniir, ¹⁰ ika soläni och seniir, nge repwe fokun pwärala pwe ra wenechar o allükülük. Iei usun repwe aitöchü ewe angangen asukul usun Kot ach Chon Amanau lon mettoch meinisin. ¹¹ Pun Kot a pwärala an ümöümöch, pwe aramas meinisin repwe küna manau ren. ¹² Än Kot ümöümöch a aiti ngenikich ach sipwe likitala ach turunufas me mochenian fanüfan, nge sipwe eäni mirit, pwüng me soulängöch lon ach manau lon ei fanüfan. ¹³ Iwe, sipwe witiwiti ewe Ränin feiöch sia apilükülük ngeni, lupwen lingen ach we Kot mi tekia, ach Chon Amanau Jesus Kraist epwe wareto. ¹⁴ I a fangala manuan fänäsengesich, pwe epwe angasakich seni ach föföringau meinisin, epwe pwal limetikich seni ach tipis, pwe sipwe nöün aramas mi fokun achocho le föri mine a mürina. *

¹⁵ Ikkei ekewe mettoch kopwe aiti ngeni ekewe souläng. Kopwe aea om pwüüng lon wisom, lupwen kopwe apöchöküla än ekewe souläng lükülük, pwal lupwen om kopwe apwüngüür. Kosap mwüt ngeni eman epwe turunufaseek.

3

Kapasen öüröür fän iten souläng

3.1-11

¹ Kopwe achema ngeni noumw kewe souläng, pwe repwe fokun aleasochis ngeni ekewe samol me sounemenem, repwe pwal molotä ngeni ar repwe föri sokun föföer mi mürina. ² Kopwe üreniir, pwe resap kapas ingau usun eman aramas, repwe afisätä kinamwe me chiechiöch o pwärala ar tipepwetete ngeni aramas meinisin. ³ Pun me lom püsin kich sia miritimang o aleasolap, sia pwal mwalechela. Sia nom fän nemenien sokopaten mochenia me pwapwan fanüfan. Sia manaueni eu manau mi ngau me lolowo, aramas ra oputakich, nge kich sia oputa ir. ⁴ Nge lupwen än Kot, ach Chon Amanau kirikiröch me tong a pwäla, ⁵ i a amanauakich, esap pokiten föriach föförün pwüng, nge pokiten an tong. A amanauakich ren ewe Ngünmifel, ewe mi aupusefälikich o ngenikich eu manau mi fö ren an limetikich. ⁶ Kot a fokun tinatiu woch ewe Ngünmifel ren Jesus Kraist ach Chon Amanau, ⁷ pwe ren an ümöümöch sipwe küna pwüng me ren Kot o eäni ewe manau esemüch sia apilükülük ngeni. ⁸ A allükülük ekei kapas.

Üa mochen pwe kopwe fokun aweweöchü ekei mettoch, pwe chokewe mi lükü Kot repwe fokun alomota ar fansoun le föri föföer mi mürina, sokun föföer mi öch o lomot ngeni aramas meinisin. ⁹ Nge kopwe afäluk seni ekewe kapasen anini esor mirit lon, seni tettelin uruwon ekewe lewo, seni ekiikin tipefesen me kapasen anini usun ekewe allük, pun ra lomotongau o aücheangau. ¹⁰ Kopwe chök apwüngü fän eu ika fän ruu eman aramas mi afisätä tipefesen, nge mürin kosap chüen iamüri. ¹¹ En ka silei, pwe ena sokun aramas a fokun ngau. An kewe tipis a alletätä pwe i mi mwäl.

* **2:14:** Kölf 130.8; Eks 19.5; Tut 4.20; 7.6; 14.2; 1.Pet 2.9

Än Paulus kapasen öüröür lesopolan

3.12-15

¹² Lupwen üpwe tinala reöm Artemas ika Tikikus, kopwe achocho ngeni om kopwe feito rei Nikapolis, pun üa fen ekiekin nonom ikenan lon fansoun lefen. ✧ ¹³ Kopwe pwal achocho le alisi Senas ewe souallük me Apolos lon ar sai, kopwe pii pwe resap osupwang ren och. ✧

¹⁴ Kopwe aiti ngeni chiechiach kewe souläng, pwe repwe fokun alomota ar fansoun le föri föför mürina, pwe epwe wor rer mine ra osupwang ren, pwe manauer esap lomotongau.

¹⁵ Chokewe meinisin mi nom rei ra kapong ngonuk. Kopwe uwei äm kapong ngeni chiechiach kewe souläng lon ach lükülük.

Än Kot ümömöch epwe nonom remi meinisin.

Nöün Paulus Toropwe ngeni Filimon

Kapas akom

I. Chon makkei ei toropwe: Ewe soukünö Paulus.

II. A mak ngeni iö: Ngeni ewe souläng Filimon.

III. Itelapemongen ei toropwe: Usun än souläng repwe amusala tipisin aramas.

IV. Kapas aüchean ei toropwe: Lon Kraist echök a wor enletin pwipwifengenin sokun aramas.

V. Masouen ei toropwe: Filimon eman souläng mi iteföüla, eli i eman chon ewe mwichefel lon Kolose, a nöüni eman amanau itan Onesimus. Ei amanau a sü seni an ei masta. Nge mürin a churi Paulus mi nom lon imwen fötek lon ena fansoun. Paulus a alisi Onesimus an epwe soulängila. Lon nöün Paulus ei toropwe ngeni Filimon a tüngor ngeni Filimon an epwe chäsefäl ngeni nöün ei amanau, ätei Paulus a tinsefäliela ren. A tüngor ngeni an epwe etiwa nöün ei amanau o amusala an tipis, nge epwe pwal etiwa usun eman pwiin souläng.

VI. Tettelin masouen ei toropwe:

Kapas akom 1-3

Än Paulus mwareiti Filimon 4-7

Än Paulus tüngor fän iten Onesimus 8-22

Kapasen lesopolan 23-25

Kapong

1-3

¹ Ngang Paulus eman chon fötek fän iten Kraist Jesus, pwal pwiich ei Timoty, aia kapong ngonuk en achengicheng Filimon, en chienach we chon angangen Kraist. ² Aia pwal kapong ngeni fefinach Appia, ngeni Arkipus chienach we sounfiu fän iten Kraist, pwal ngeni chon ewe mwichefel mi chufengen lon imwom: ✧ ³ Samach Kot me ach Samol Jesus Kraist epwe fang ngenikemi ümöümöch me kinamwe.

Än Filimon tong me lükülük

4-7

⁴ Pwii Filimon, fansoun meinisin üa kilisou ngeni ai Kot lupwen üa chechemenuk lon ai iotek, ⁵ pun üa rongorong usun om tong ngeni ekewe chon pin meinisin, pwal usun om lükü ach Samol Jesus Kraist. ⁶ Üa iotek pwe ach chiechifengen me en lon ach lükü Jesus epwe atoto watten ach weweöchiti ekewe sokopaten feiöch sia eäni lon Kraist. ⁷ En pwii achengicheng, om tong a atoto ngeniei watten pwapwa me watten chip, pun en ka apwapwai leluken ekewe chon pin meinisin.

Eu tüngor fänäsengesin Onesimus

8-22

⁸ Iei popun üa tongeni pwora lon Kraist, pwe üpwe allük ngonuk mine kopwe föri. ⁹ Nge pokiten ai echenuk üpwe le tüngor ngonuk. Ngang üa föri ei, inamwo ika ngang Paulus üa chinlap, nge pwal lon ei fansoun

üa eman chon fötek fän iten Kraist Jesus. ¹⁰ Iei mine üa tüngron ngonuk fänäsengesin Onesimus, i wesewesen nei lon Kraist, pun lupwen üa nonom lon fötek üa wiliti eman semelapan lon ngün. ✧ ¹¹ Me lom i a lomotongau ngonuk, nge iei a fokun lomotöch ngonuk, pwal ngeniei.

¹² Ngang üa tinsefäliela reöm iei, nge lelukei a pwal etala i. ¹³ Ngang üa mochen amwöchü i, pwe epwe nom rei lupwen üa nom lon imwen fötek fän iten ewe Pworausen Manau, pwe epwe tongeni siwiliik le alisie. ¹⁴ Nge ngang üsap mochen arianuk om kopwe alisie, pun üa mochen pwe kopwe föri ei seni mochenin letipom. Iei mine üsap föri och are kosap tipeeu ngeni.

¹⁵ Eli a fis pwe Onesimus a toau senuk lon eu fansoun mochomoch, pwe kopwe angesefäli pwe epwe nom reöm fansoun meinisin. ¹⁶ Iwe, iei esap chüen chök eman amanau, nge a kon aüchea seni eman amanau, pun i eman pwiich mi achengicheng lon Kraist. A men fokun aüchea me rei! Nge epwe le fen ifan me aüchean me reöm, pwe i eman amanau nge pwal eman pwiich lon ach Samol.

¹⁷ Iei mine are ka ekieki pwe ngang eman chienom, kopwe etiwasefäli Onesimus usun chök om etiwaei. ¹⁸ Nge are Onesimus a föri och mi mwäl ngonuk, are a liwinimang ngonuk won och, kopwe makkei itei won pwe üpwe wisen mönätii. ¹⁹ Ngang Paulus üa makkei ei ren püsin pei, pwe üpwe mönisefäli ngonuk meinisin. Nge enlet, üsap wisen achema ngonuk pwe en ka liwinimang ngeniei ren püsin manauom. ²⁰ Iei mine en pwii, kose mochen kopwe apwönüetä ai ei tüngron fän iten ach Samol. Kopwe apwapwai letipei, pun en pwii lon Kraist.

²¹ Lupwen üa makkei ei toropwe ngonuk, üa silei pwe kopwe aleasochisi mine üa tüngron. Enlet, üa silei pwe kopwe fen föri lap seni mine üa tüngron. ²² Iwe, pwal och: Kose mochen kopwe amolätä eu ruum fän itei, pun üa apilüköch pwe Kot epwe apwönüetä mine oua tüngron lon ämi iotek pwe üpwe liwinsefälila remi.

Kapongen lesopolan

23-25

²³ Epafra mi nom rei lon imwen fötek fän iten Kraist Jesus a tinala an kapong ngonuk, ✧ ²⁴ pwal Markus, Aristarkus, Temas me Lukas chienei kewe chon angang ra kapong ngonuk. ✧ ²⁵ Ümömöchün ach Samol Jesus Kraist epwe nonom remi meinisin.

Echö Toropwe ngeni ekewe chon Ipru

Kapas akom

I. Chon makkei ei toropwe: Ese fat, nge ekoch sousilelap lon Paipel ra ekieki ngeni pwe Paulus, ika Parnapas, ika Lukas, ika Apollos, ika pwal ekoch aramas.

II. A mak ngeni iö: Ngeni ekewe chon Ipru mi souläng.

III. Itelapemongen ei toropwe: Kraist a tekia seni ekewe chon läng me ekewe aramas mi iteföüla lon Testamentin Lom, pwal an angang a aüchea seni ar angang.

IV. Kapas aüchean ei toropwe: Än Kot akot a wesöchüla lon Kraist.

V. Masouen ei toropwe: Ei toropwe ngeni ekewe chon Ipru a mak ngeni eu mwichen souläng a tolong lon watten riaföü pokiten chon ü ngeniir. Ra tolong lon sosot pwe repwe likitala ar lükü Kraist. Ewe chon makkei ei toropwe a apöchöküleer lon ar lükülük ren an aiti ngeniir pwe Jesus Kraist i enletin amüchülan chon pwärätä usun Kot. Ren an föri ei a aweweöchü ülungat kapas mi let. (1) Jesus i Nöün Kot lon fansoun esemüch, a kaiö ewe enletin aleasochis ngeni ewe Sam ren ewe riaföü a tolong lon. Pokiten i Nöün Kot, Jesus a tekia seni ekewe soufos lon ewe Testamentin Lom, a tekia seni ekewe chon läng pwal seni Moses. (2) Kot a pwärätä pwe Jesus ewe souasor lon fansoun esemüch, a tekia seni ekewe souasor lon ewe Testamentin Lom. (3) Ren Jesus ekewe chon lükü i ra ngas seni tipis, niuokus me mäla. Jesus ewe souasor mi lap a awora ewe angangen enletin küna manau esemüch. Ei sokun angang a chök ekis pwä ren ekewe sokun pomw chon Ipru ra pomweni, pwal ren ar angangen asor man usun a fis lon ar lamalam.

Ewe chon makkei ei toropwe a apworausausun ewe lükülük än ekoch aramas mi iteföüla lon uruwon Israel o tüngor ngeni ekewe chon aleani, pwe repwe likitü lon ar lükü Kraist. (sopun 11). Lon sopun 12 a pese ngeni ekewe chon aleani ar repwe sopwela lon ar lükü Kraist tori lesopolan, repwe chök nenengeni Jesus o likitü lon ekewe sokopaten weires me riaföü epwe toriir. Sopolan ei toropwe a mak usun kapasen ööröür me kapasen fön.

VI. Tettelin masouen ei toropwe:

Kapas akom: Kraist ewe mi unusen pwärätä usun Kot 1.1-3

Kraist a tekia seni ekewe chon läng 1.4-2.18

Kraist a tekia seni Moses me Josua 3.1-4.13

Kraist ewe souasor mi lap a tekia seni ekewe souasor meinisin 4.14-7.28

Än Kraist pwon a aüchea seni ekewe pwon meinisin 8.1-9.28

Än Kraist asor a aüchea seni ekewe asor meinisin 10.1-39

Aüchean ach lükü Jesus 11.1-12.29

Amüchülan kapasen fön me kapasen lesopolan 13.1-25

*Än Kot kapas ngenikich ren Nöün we
1.1-3*

¹ Me lom Kot a kapas ngeni ach kewe lewo fän chomong pwal lon sokopaten lapalap ren ekewe soufos. ² Nge lon ekei ränin sopolan a kapas ngenikich ren Nöün we. I ätewe Kot a föri fanüfan me läng ren, ätewe Kot a filätä pwe epwe eäni mettoch meinisin. ³ A lingeni lingen Kot o wesewesen lapalapeni lapalapan Kot. A anükünüköchü mettoch meinisin ren an kapas mi manaman. Mürin an awesala amusamusen än chon fanüfan tipis, a mottiu lepelifichin Kot lon läng, i ewe mi manaman seni meinisin.

Nöün Kot a tekia seni ekewe chon läng

1.4-14

⁴ Ewe Nau a tekia seni ekewe chon läng, usun chök ewe it Kot a ngeni a tekia seni iter. ⁵ Pun Kot esamwo apasa ngeni eman nöün kewe chon läng,

“En nei, ikenai üa wiliti Semom.” Kot esap pwal apasa usun eman chon läng,

“Ngang üpwe Saman, nge i epwe Nei.” ✧ ⁶ Nge lupwen Kot ekärän tinato Nöün mwänichi lon ei fanüfan, a apasa,

“Nöün Kot kewe chon läng meinisin repwe fokun fel ngeni.” ✧

⁷ Iwe, Kot a apasa usun ekewe chon läng,

“Kot a föri pwe nöün kewe chon läng ra usun asepwäl,

pwal nöün kewe chon angang ra usun pulopulen ekkei.” ✧

⁸ Nge usun Nöün we Kot a apasa,

“O Kot, mwum epwe nonom tori feilfeilachök. Ka nemeni noumw aramas fän pwüing.

⁹ Ka efich pwüing, nge ka oput mine a ngau.

Iei mine Kot, om we Kot a filuketä, a fang ngonuk pwapwan om iteüöch lap seni an fang ngeni chiechiom kewe.” ✧

¹⁰ A pwal apasa,

“En Samol, lepoputän ka föri fanüfan, nge ren püsin poumw ka föri ekewe läng.

¹¹ Ir repwe tala, nge en kopwe nonom fochofoch, repwe mesila usun echö üf.

¹² Kopwe numufengeniir usun echö sekit, kopwe siwiliir usun eman a siwili üfan.

Nge en ka ususum we chök, manauom esap müchüla.” ✧

¹³ Kot esap fokun apasa ngeni eman nöün kewe chon läng,

“Kopwe mottiu lepelifichi tori üpwe anomu chon oputom, pwe repwe lenien puun pecheöm.” ✧

¹⁴ Iwe, nge met ren ekewe chon läng? Ir meinisin ngün mi angang ngeni Kot. Kot a tiniirela pwe repwe alisi chokewe repwe küna manau.

✧ **1:5:** Kölf 2.7; 2.Sam 7.14; 1.Kron 17.13 ✧ **1:6:** Tut 32.43 ✧ **1:7:** Kölf 104.4 ✧ **1:9:** Kölf 45.6-7 ✧ **1:12:** Kölf 102.25-27 ✧ **1:13:** Kölf 110.1

2

Usun ach küna manau mi fokun aüchea

2.1-4

¹ Iei mine sipwe fokun kamwöchünük won ekewe kapas mi let sia fen rongorong, pwe sisap tokola seni. ² Ekewe kapas, ekewe chon läng ra ngeni ach kewe lewo a pwä pwe ra let, nge are eman esap tümwünü ika aleasochis ngeni a angei liwiningauen an föför usun a fich ngeni. ³ Epwe ifa usun ach sipwe tongeni sü seni ach küna liwiningau are sisap aüseling ngeni ekewe kapas usun ach küna manau mi fokun aüchea. Ewe Samol a akomwen asile ngeni aramas usun ei küna manau, nge chokewe mi rongorong ngeni ra alletätä ngenikich pwe a let. ⁴ Lon ena chök fansoun Kot a apacha an kapasen pwärätä ngeni ar ren an föri asisil me manaman me sokopaten föför mi amwarar, pwal ren an aineti ekewe lifangen Ngünmifel usun mochenin letipan.

Ewe Eman mi emwenikich ngeni manau esemüch

2.5-18

⁵ Iwe, Kot esap awisa ngeni ekewe chon läng pwe repwe nemeni ewe fanüfan mi fö epwe fisitä, iei ewe fanüfan sia fen kapas usun. ⁶ Nge iei usun a mak lon eu kewe Toropwe mi Pin,

“Ai Kot, met aüchean nöün aramas pwe ka ekieki usun,
nge met aüchean nöün aramas pwe ka tümwünü?”

⁷ Ka föri pwe i epwe kis fän ekewe chon läng
lon fansoun mochomoch.

Ka ämwärämwära ngeni ling me iteüöch ⁸ o awisa pwe epwe nemeni mettoch meinisin.” A apasa pwe Kot a awisa ngeni aramas pwe epwe “nemeni mettoch meinisin”. Wewen ei, esap fokun wor och mine esap nonom fän nemenian. Iwe, lon ei fansoun kich sisap küna pwe mettoch meinisin ra nom fän nemenian. ✧ ⁹ Nge sia küna Jesus, ewe Kot a föri pwe epwe kis fän ekewe chon läng lon fansoun mochomoch, pwe ren än Kot ümöümöch epwe mäla fänäsengesin aramas meinisin. Iwe, iei sia küna i, pwe a mwärini ling me iteüöch pokiten an riaföü me mäla. ¹⁰ A fokun pwüing pwe Kot, ewe mi föri o tümwünü mettoch meinisin, a föri pwe Jesus epwe unusöch ren an riaföü fän iten an epwe emwenato chomong nöün, pwe repwe eti i lon an ling. Pun Jesus ewe mi emweniir ngeni ar repwe küna manau.

¹¹ Jesus a alimöchü aramas seni ar tipis, iwe, i me chokewe mi küna limöch ra semeni eman chök Sam. Iei popun Jesus esap säwäsini an aita ngeniir pwiin. ¹² Iwe, a apasa ngeni Kot,

“Üpwe apworausau ngeni pwii kewe mine ka föri,
üpwe mwareituk lein ewe mwichen aramas.” ✧

¹³ A pwal apasa, “Üpwe anomu ai apilükülük won Kot.” A pwal apasa, “Ngang üa nom ikei me ekewe nau Kot a ngeniei.” ✧

¹⁴ Pokiten ekei nau, ir aramas seni fituk me cha, püsin Jesus a wiliti aramas usun ir o sokuni sokur. A föri ei, pwe ren an mäla epwe atala manamanen Tefil a eäni nemenem won mäla. ¹⁵ Iwe, ren ei a angasala chokewe mi fötek lon unusen manauer pokiten ar niuokusiti mäla. ¹⁶ Pun a fat pwe esap alisi ekewe chon läng. Nge usun a mak lon ekewe Toropwe mi Pin, “A alisi ekewe mwirimwirin Apraham.” ¹⁷ Wewen ei, pwe epwe

wiliti aramas usun pwiiin kewe lon mettoch meinisin fän iten an epwe nöür Souasor mi Lap mi eäni tong o allükülük lon an angang ngeni Kot, pwe än ekewe aramas tipis epwe musala. ¹⁸ Iwe, iei a tongeni alisi chokewe mi tolong lon sosot, pun püsin i a fen piin tolong lon sosot me riaföü.

3

Jesus a tekia seni Moses

3.1-6

¹ Iei mine ämi pwii kana souläng mi pwal kö me ren Kot, oupwe fokun ekieki usun Jesus, ewe Soukünü me Souasor mi Lap sia pwärätä usun. ² I a allükülük ngeni Kot, ewe mi filätä an epwe föri ei angang, usun chök Moses a allükülük lon an angang lon imwen Kot. ✧ ³ Eman mwän mi aüetä eu imw a angei iteuöch lap seni ewe imw. Ina usun Jesus a fokun fich ngeni an epwe angei iteuöch lap seni Moses. ⁴ Ewer, iteiten imw aramas ra aüetä, nge Kot ewe mi aüetä mettoch meinisin. ⁵ Moses a allükülük lon wisen eman chon angang lon unusen imwen Kot, a kapas usun ekewe mettoch Kot epwe apasa lon ekewe fansoun repwe feito. ⁶ Nge Kraist a allükülük lon wisen eman nau o nemeni imwen Kot. Iwe, kich imwen Kot are sia likitü lon ach tipepworda me ach apilükülük lon met sia apilükülük ngeni.

Eu asösö fän iten nöün Kot kewe aramas

3.7-4.13

⁷ Iwe, iei usun met ewe Ngümmifel a apasa, “Ikenai are oua rong mwelien Kot,
⁸ ousap apöchöküla lelukemi usun ämi kewe lewo,
lupwen ar pöchökül le ü ngeni Kot,
usun met ra föri lon ewe rän lon fanüapö,
lupwen ra sotuni Kot.

⁹ Kot a apasa: Ikenan ra sotunie,
inamwo ika ra küna mine üa föri lon ekewe ükükün faik ier.

¹⁰ Iei mine üa song ngeni ekei aramas o üa üra,
‘Ir eu mwichen aramas mi tokola leluker,
resap fokun mochen aleasochisi ai kewe allük.’

¹¹ Iwe, lon ai song üa pwon fän akapel ngeniir:
‘Resap fokun tolong lon ewe fanü ia üpwe asösöör ie!’ ✧

¹² Ämi pwii kana mi lükü Jesus, oupwe afälikemi pwe esap wor eman leimi epwe eäni eu leluk mi ngau o lükümang, pwe epwe tokola seni ewe Kot mi manau. ¹³ Nge oupwe fokun alilifengen lefilemi iteiten rän lon ei ükükün fansoun mi iteni “Ikenai”, pwe esap wor eman epwe tup lon tipis o tipepöchökül lon letipan. ¹⁴ Pun oukich meinisin sia chiechien Kraist are sia kamwöchünük tori lesopolan won ewe apilüköch sia eäni seni me lepoputän. ¹⁵ Iei usun met a mak lon ekewe Toropwe mi Pin,
“Ikenai are oua rong mwelien Kot,

ousap apöchöküla lelukemi usun ämi kewe lewo,
lupwen ra pöchökül le ü ngeni Kot.” ✧

¹⁶ Iö ekewe aramas mi rong mwelien Kot o pöchökül le ü ngeni? Ir chokewe meinisin Moses a emweniirewu seni Isip. ¹⁷ Nge iö Kot a song ngeni lon ükükün faik ier? Ir chokewe mi tipis o mätiu lon ewe fanüapö.

¹⁸ Ngeni iö Kot a pwon fän akapel pwe resap fokun tolong lon ewe fanü ia repwe asösö ie? Sap ir chokewe mi aleasolap? ✧ ¹⁹ Iei usun sia silei pwe resap tongeni tolong lon ewe fanü pokiten ar lükülükümang.

4

¹ Iwe, Kot a ngenikich ewe pwon, pwe sipwe tolong lon ewe asösö a kapas usun me mwan. Iei mine sipwe fokun tümwünüfichi pwe esap wor eman leimi esap tolong lon ewe asösö Kot a fen pwon. ² Pun sia pwal rongorong ewe Pworausen Manau usun chök ir. Ir ra rongorong ewe pworaus, nge resap feiöch ren, pun lupwen ar rongorong, resap etiya fän ar lükü. ³ Iei mine oukich mi lükü sia tolong lon ewe asösö Kot a fen pwonei. Iei usun a fen apasa,

“Lon ai song üa pwon fän akapel ngeniir,

‘Resap fokun tolong lon ewe fanü ia üpwe asösöör ie.’ ”

Iei usun met Kot a apasa, inamwo ika an kewe angang ra wesila seni ewe fansoun a föri fanüfan. ✧ ⁴ Pun a mak lon eu kewe Toropwe mi Pin usun ewe afisuen rän, “Kot a asösö seni an kewe angang meinisin lon ewe afisuen rän.” ✧ ⁵ A pwal mak lon eu kewe wokisin usun ewe kapas asösö, “Resap fokun tolong lon ewe fanü ia üpwe asösöör ie.” ✧ ⁶ Iwe, chokewe mi akomwen rongorong ewe Pworaus Allim resap tolong lon ewe asösö, pun ra aleasolap. Nge mi wor pwal ekoach a mwümwütä ngeniir pwe repwe tolong lon ewe asösö. ⁷ Ei a fat ren än Kot filätä pwal eu rän mi iteni “Ikenai”. Chomong ier mürin a kapas me ren Tafit usun met a fen mak lon ekewe Toropwe mi Pin,

“Ikenai are oua rong mwelien Kot,
ousap apöchöküla lelukemi.” ✧

⁸ Pun are Josua a atolonga ekewe aramas lon ewe asösö Kot a fen pwon, Kot esap pwal kapasfäl me mürin usun pwal eu rän. ✧ ⁹ Iwe, mi chüen wor eu asösö a witiwit fän iten nöün Kot kewe aramas, a usun chök ewe asösö än Kot lon ewe afisuen rän. ¹⁰ Pun iö a tolong lon ewe asösö Kot a pwonei, epwe pwal asösö seni an angang usun chök Kot a asösö seni an angang. ✧ ¹¹ Iei mine sipwe fokun achocho ach sipwe tolong lon ewe asösö, pwe esap wor eman leich epwe tur usun ir pokiten ar aleasolap.

¹² Pun än Kot kapas a manau o manaman, a ken seni efoch ketilas mi seisei me rüpek. A tililong lon manauach o aimwüfeseni letipach me ngünüch, pwal lekupukupun lon chü me fituken lon chü. A pwal apwüngü mochen me ekiekin letipen aramas. ¹³ Esap fokun wor och epwe tongeni monola seni Kot. Förian kana meinisin ra säretä o pwäpwäla mwen mesan. Iwe, kich meinisin sipwe fokun pwärätä ngeni i ach föföör meinisin.

Jesus ewe Souasor mi Lap

4.14–5.10

¹⁴ Iei mine ousipwe kamwöchünük won ewe lükü sia pwärätä usun. Pun a nom rech eman Souasor mi Lap, Jesus ewe Nöün Kot, a feitä läng o a nonom mwen mesen Kot. ¹⁵ Pun ach we Souasor mi Lap esap eman mi tongomang ngeni ach apwangapwang. Nge a nom rech eman Souasor mi Lap mi tolong lon sokopaten sosot usun chök kich, nge esap tipis. ¹⁶ Iei mine sipwe arap ngeni än Kot we lenien mot fän apilüköch, ia sia küna

✧ **3:18:** Num 14.1-35 ✧ **4:3:** Kölf 95.11 ✧ **4:4:** Ken 2.2 ✧ **4:5:** Kölf 95.11 ✧ **4:7:** Kölf 95.7-8 ✧ **4:8:** Tut 31.7; Jos 22.4 ✧ **4:10:** Ken 2.2

ümöümöch me ie. Ikenan sipwe angei tong o küna ümöümöch, pwe epwe alisikich lon fansoun ach osupwang.

5

¹ Iwe, iteiten souasor mi lap a keflitä me lein aramasan, a angei wisan an epwe angang ngeni Kot fän iten ekewe aramas, pwe epwe föri angangen asor o föri ekewe asoren tipis. ² Pokiten i a apwangapwang lon püsin manauan, a tongeni tipepwetete ngeni chokewe mi wewemang o föri mine a mwäl. ³ Iwe, pokiten püsin i a apwangapwang, epwe fokun föri asoren amusamusen tipis, sap fän iten chök än ekewe aramas tipis, pwe pwal fän iten püsin an tipis. ✧ ⁴ Esap wor eman a seikätä püsin i an epwe wiseni ewe wisen souasor mi lap. Nge Kot echök a seikätä eman aramas an epwe wiseni ewe wisen souasor mi lap, usun chök mine a fis ngeni Aaron. ✧ ⁵ Ina chök usun Kraist, esap püsin seikätä an epwe wiseni ewe wisen souasor mi lap. Nge Kot a üreni,

“En Nei, ikenai üa wiliti Semom.” ✧

⁶ A pwal apasa lon eu kewe Toropwe mi Pin,

“En kopwe eman souasor tori feilfeilachök

lon tettelin Melkisetek.” ✧

⁷ Lon fansoun än Jesus manau won fanüfan, a iotek o tüngor fän mwelian mi leüömong, a pwal kechü ngeni Kot, ewe mi tongeni amanaua i seni mäla. Iwe, Kot a aüselinga i, pun a meniniti i. ✧ ⁸ Iwe, inamwo are i Nöün Kot, nge a kaiö aleasochis ren ekewe riaföü a tolong lon. ⁹ Iwe, lupwen a unusöchüla manauan won fanüfan, a wiliti ewe popun küna manau esemüch fän iten chokewe mi aleasochis ngeni. ¹⁰ Iwe, Kot a aita ngeni souasor mi lap lon tettelin Melkisetek.

Kapasen fön usun ach sisap likitala ach lükülük

5.11–6.12

¹¹ Mi wor chomong mine aipwe tongeni apasa usun ei mettoch, nge a weires äm aipwe awewe ngenikemi, pun oua fokun wewemang. ¹² A fen tori fansoun ämi oupwe sense, nge oua chüen osun än eman epwe asukulakemi ekewe lessen fän iten chon popuetä kaiö kapasen Kot. Üürün pwe oupwe mongö mongö mi pöchökül, nge oua chüen chök ükün milik. ¹³ Eman mi chök ükün milik a chüen eman mönükol, esap tongeni sipeöch lon ewe kapasen pwüng. ✧ ¹⁴ Nge mongö mi pöchökül a chök fän iten ekewe aramas mi mwukula, ir chokewe mi aörüni ngeniir ar repwe tufichin alefila lefilen mine a öch me mine a ngau.

6

¹ Iei mine sisap chüen eäni ekewe lepoputän lessen usun Kraist, nge sipwe sopwela ren ekewe afalafal mi fich ngeni chokewe mi mirit lon ar souläng. Sisap chüen aliwinisefäli ngenikemi ewe afalafalen longolongun ach souläng usun ach aier seni ekewe föföör mi lomotongau, usun ach lükü Kot, ² ekewe afalafal usun papatais me ach isetä pöüch won aramas, usun ewe manausefäl seni sotup, pwal usun ewe kapwüng esemüch. ³ Iwe, iei met sipwe föri are Kot epwe mwüt ngenikich.

⁴ Pun epwe ifa usun ach sipwe tongeni aliwinisefäli chokewe mi pöütala ar lükü, pwe repwe aiersefäl? Ra eäni än Kot saram me mwan,

✧ 5:3: Lif 9.7 ✧ 5:4: Eks 28.1 ✧ 5:5: Kölf 2.7 ✧ 5:6: Kölf 110.4 ✧ 5:7: Mat 26.36-46; Mark 14.32-42; Luk 22.39-46 ✧ 5:13: 1.Kor 3.2

ra neni ewe lifang seni läng o angei ewe Ngünmifel. ⁵ Ra silei seni mine a fis ngeniir, pwe än Kot kapas a mürina o ra mefi ekewe manamanen ewe fansoun epwe feito. ⁶ Nge mürin ra pötöala ar lükü! Ese fokun tufich ach sipwe aliwinesefäliir pwe repwe aiersefäl, pun ra iräpensesifäli ewe Nöün Kot o asäwa i me mwen mesen aramas.

⁷ Kot a afeiöchü ewe pwül mi ünümi ewe üt a püngütiu won fän chomong, pwe a amärätä irä mi lomot ngeni chokewe ewe pwül a molotä fän iter. ⁸ Nge ika ewe pwül a amärätä iräföläföf me pötöwölingau, esap fokun wor lomotan. A fetal ngeni chök an epwe anümamau me ren Kot, nge feilfeil epwe karala ren ekkei. ✱

⁹ Iwe, ämi chiechiem kana mi achengicheng, inamwo ika aia eäni ekei sokun kapas, nge aia apilüköch fän itemi o silei pwe oua eäni ekewe feiöch mi kon aüchea ra nom lon ämi küna manau. ¹⁰ Kot esap eäni föföf esepwüng, esap manlükala ewe angang oua föri me ewe chen oua pwäri ngeni i lupwen oua alisi chiechiemi kewe souläng, nge oua pwal sopwela le alisiir. ¹¹ Äm aia fokun mochen, pwe eman me eman leimi epwe chök achocho tori sopolan, pwe ekewe mettoch oua apilükülükü repwe pwönüetä. ¹² Äm aisap mochen pwe oupwe chipwang, nge oupwe wewe ngeni chokewe mi angei mine Kot a eäni pwon ren ar lükü me mosonotam.

Än Kot pwon epwe fokun pwönüetä

6.13-20

¹³ Iwe, lupwen Kot a pwon ngeni Apraham, a pwon fän akapel pwe epwe apwönüetä. Pokiten esap wor eman mi tekia seni püsin i, a akapelü püsin itan. ¹⁴ A apasa, “Üpwe fokun afeiöchuk o achomongala mwirimwirum.” ✱ ¹⁵ Apraham a likitü fän mosonotam, iei mine a fis ngeni mine Kot a eäni pwon. ¹⁶ Are eman aramas a eäni eu akapel, a akapelü iten eman mi tekia seni püsin i. Iwe, ei akapel a alükülükü met a pwon o aukätü än aramas anini meinisin. ¹⁷ Kot a mochen afata ngeni chokewe repwe angei mine a eäni pwon pwe esap fokun siwili ekiekin letipan, iei mine a apacha an akapel ngeni mine a eäni pwon. ¹⁸ Ikkei ekewe ruu mettoch resap tongeni siwil, pun esap tufich pwe Kot epwe tongeni chofona. Iei mine kich mi nom fän tümwünüan sia fokun tipepwora lon ach kamwöchünük lon ewe apilükülüköch a anomu mwach. ¹⁹ Sia eäni ei apilükülüköch usun eu angkö mi allükülük o nüküchar fän iten manauach, a tolong pekilongen ewe cheech mangaku lon ewe imwenfel lon läng o tolong lon ewe leni mi unusen pin. ✱ ²⁰ Fän itach Jesus a akomwolong mwach lon ewe leni o wiliti eman souasor mi lap tori feilfeilachök lon tettelin Melkisetek. ✱

7

Ewe souasor Melkisetek

7.1-14

¹ Ätei Melkisetek i kingen Salem, pwal eman souasor nöün Kot ewe mi Unusen Tekia. Lon fansoun Apraham a liwinto seni ewe maun lupwen a akufu ekewe föman king, Melkisetek a churi o afeiöchü. ² Iwe, Apraham a ngeni ätei eu leengolun choon wokun meinisin. Aeuin wewen ei it Melkisetek “Kingen Pwüng”, nge pokiten i kingen Salem itan a pwal iei

wewen “Kingen Kinamwe”. ✧ ³ Esap wor uruwon saman ika inan ika an lewo, esap pwal wor uruwon an uputiu ika an mäla. Iwe, a usun ewe Nöün Kot, a nonom lon wisen souasor tori feilfeilachök.

⁴ Ren ei oua silei usun tekian Melkisetek. Apraham ach we lewo mi iteföüla a ngeni eu leengolun choon wokun meinisin. ⁵ Iwe, lon pwüngün ewe allük ekewe mwirimwirin Lefi, ir mi wiseni ewe wisen souasor, ra wisen angei ewe leengolun seni mine ekewe chon Israel ra eäni, wewen seni pwiir kewe. Nge inamwo ika ir pwiir kewe, ir pwal mwirimwirin Apraham. ✧ ⁶ Melkisetek esap eman mwirimwirin Lefi, nge a angei ewe leengol seni Apraham o afeiöchü Apraham, nge Apraham ätewe Kot a fen pwon ngeni. ⁷ Sia fokun silei pwe ätewe mi lap a wisen afeiöchü ätewe mi kis. ⁸ Ren ekewe souasor mi ionifengeni ewe leengol, ir aramas repwe tolong lon mäla. Nge ren Melkisetek a angei ewe leengol, i ewe eman mi manau, esap mäla usun mine a mak lon ekewe Toropwe mi Pin. ⁹ Iwe, sipwe tongeni apasa, pwe lupwen Apraham a isetiu ewe leengol, Lefi a pwal isetiu, inamwo ika mwirimwirin kana ra angei ewe leengol seni aramas. ¹⁰ Pun Lefi esamwo uputiu, nge sia tongeni apasa pwe a nom lon inisin an we lewo Apraham, lupwen Melkisetek a churi.

¹¹ Kot a ngeni ekewe aramasen Israel ekewe Allük, nge ra longolong won angangen ekewe souasor, ir mwirimwirin Lefi. Iwe, are angangen ekewe souasor, ir mwirimwirin Lefi, epwe unusöch, esap wor lomoten än pwal eman souasor epwe wareto seni lon tettelin Melkisetek, nge sap eman seni lon tettelin Aaron. ¹² Pun are tettelin ekewe souasor epwe siwil, epwe pwal wor siwilin ekewe allük. ¹³ Iwe, ekei kapas ra makketiu fän iten ach Samol a nom lon pwal eu sokun ainang. Esap wor eman seni an we ainang a fen mwo nge wiseni ewe wisen souasor. ¹⁴ Pun a fokun fat pwe ach Samol a uputiu seni ewe ainangen Juta. Nge Moses esap kapas usun ei ainang lupwen a fos usun ekewe souasor.

Pwal eman souasor usun chök Melkisetek

7.15-28

¹⁵ Ei pworaus a fokun fatafatöchüla, pwe pwal eman souasor usun chök Melkisetek a wareto. ¹⁶ I a tolong lon ewe wisen souasor sap pokiten än aramas allük ika akot, nge pokiten manamanen eu manau esap tongeni mÜchüla. ¹⁷ Pun a mak lon ekewe Toropwe mi Pin, “En kopwe eman souasor tori feilfeilachök lon tettelin Melkisetek.” ✧ ¹⁸ Iei usun ewe allük minen lom a wesila, pun a apwangapwang o lomotongau. ¹⁹ Pun ekewe Allük resap tongeni aunusöchüela och mettoch. Nge iei eu apilükülüköch mi mürina seni a fen molotä fän itach, pwe sipwe arap ngeni Kot ren.

²⁰ Iwe, mi pwal wor än Kot pwon fän akapel. Lupwen ekewe pwal ekoch ra tolong lon wisen souasor, esap wor ena sokun akapel. ²¹ Nge Jesus a wiseni ewe wisen souasor ren eu pwon fän akapel, lupwen Kot a üreni,
“Ewe Samol a pwon fän akapel,
nge esap siwili an ekiek,

‘En kopwe eman souasor tori feilfeilachök.’ ”

²² Pokiten ei pwon fän akapel Jesus a wiliti eu minen allükülükün eu pwon mi fokun mürina.

²³ Iwe, mi wor chomong ekewe souasor, pokiten ra mäla resap tongeni sopwela angangen wiser. ²⁴ Nge Jesus a manau tori feilfeilachök, an

angang lon wisan wisen souasor esap la ngeni pwal eman. ²⁵ Iei mine a tongeni amanaua chokewe meinisin mi arap ngeni Kot ren i fansoun meinisin, pun a manau tori feilfeilachök pwe epwe tüngor ngeni Kot fänäsengesiir.

²⁶ Iei usun Jesus ewe Souasor mi Lap a alisikich lon ach osupwang meinisin. I ewe mi pin, esap wor an mwäl ika an tipis. Kot a aimwüela i seni chon tipis o atekiatai seni ekewe läng. ²⁷ Nge Jesus esap pwal wewe ngeni ekewe ekoch souasor mi lap. Esap wor lomoten an epwe eäni asor iteiten rän, akom fän iten püsin an tipis, mürin fän iten an ekewe aramas tipis. A eäni eu asor fän eu chök, nge a naf ngeni fansoun meinisin, lupwen a asor püsin inisin. ✧ ²⁸ Lon pwüngün ekewe Allük, aramas resap unusöch ra keflitä lon ewe wisen souasor mi lap. Nge an Kot pwon mi fis fän akapel a tapweto me mürin ekewe Allük, a filätä ewe Nau mi unusöch tori feilfeilachök.

8

Jesus ach we Souasor mi Lap

8.1-13

¹ Iwe, iei aüchean mine sia kapas usun: Sia eäni eman Souasor mi Lap a mot lepelifichin ewe mi Unusen Tekia lon läng. ✧ ² I a angang lon ewe wisen souasor mi lap lon ewe Leni mi Unusen Pin, iei wesewesen ewe imwenfel seni mangaku ewe Samol a aüetä, nge sap aramas.

³ Iteiten eman me eman souasor mi lap a keflitä pwe epwe uwato sokopaten asor o eäni asoren man ngeni Kot. Iei mine ach we Souasor mi Lap epwe pwal fokun wor mine epwe eäni asor. ⁴ Ika i epwe nonom won fanüfan, esap fokun wiseni ewe wisen souasor, pun mi wor souasor ra eäni asor ekewe lifang fän pwüngün an ekewe chon Juta allük. ⁵ Ewe angang ra föri lon wiser wisen souasor a chök eu lios me ngünüen ekewe mettoch mi wor lon läng. Pwal iei chök usun mine a fis ren Moses. Me mwen an epwe aüetä ewe imwenfel seni mangaku, Kot a üreni, “Kopwe tümwünüfichi pwe kopwe föri meinisin lon lapalapen ewe lios ka küna me won ewe chuk.” ✧ ⁶ Nge iei Jesus a angei ewe wisen souasor mi tekia seni wisen ekewe souasor mi lap, usun chök ewe pwon i a föri lefilen Kot me nöün kewe aramas a fokun aüchea seni ewe pwonon lom, pun a longolong won ekewe pwon mi fokun mürina.

⁷ Pun are esap wor och mwäl lon ewe aeuin pwon, esap wor lomoten an epwe pwal wor eu aruen pwon. ⁸ Nge lupwen Kot a küna mwälin nöün kewe aramas, a apasa,

“Ewe Samol a apasa: Epwe war ewe fansoun,

lupwen üpwe föri eu pwon mi fö ngeni chon Israel me chon Juta.

⁹ Ei pwon esap wewe ngeni ewe üa föri ngeni ar kewe lewo,

lon ewe rän üa amwöchü pöür o emweniirewu seni ewe fanü Isip.

Resap apwönüetä pwüngün ewe pwon üa föri ngeniir,

iei mine üa kul seniir.

¹⁰ Iwe, iei ewe pwon üpwe föri ngeni ekewe chon Israel

lon ewe fansoun epwe feito, iei alon ewe Samol:

Üpwe atolonga ai kewe allük lon ekiekiir

o makkeretiu lon letiper.

Iwe, nge ang üpwe ar Kot,

nge ir repwe nei aramas kana.

¹¹ Esap wor eman epwe aiti ngeni chon lenian,
ika apworaus a ngeni chon fanüan, ‘Kopwe silei ewe Samol.’
Pun ir meinisin repwe sileei,
seni ekewe mi kis tori ekewe mi lap.

¹² Pun üpwe amusala ar tipis,
nge üsap chüen chechemeni ar kewe föföör mi ngau.” ✧

¹³ Lupwen Kot a kapas usun eu pwon mi fö, a föri pwe ewe aeuin pwon epwe mesila. Nge mine a mes esap chüen wor lomotan, epwe müttir morola.

9

Usun Fel ngeni Kot won fanüfan pwal lon läng

9.1-22

¹ Iwe, ewe aeuin pwon a wor allükün fän iten än aramas repwe fel ngeni Kot, pwal eu leni mi pin aramas ra föri fän iten ar repwe fel lon.

² Ra aüetä eu imwenfel seni mangaku mi wor ruu kinikin lon. Ewe aeuin kinikin a iteni ewe Leni mi Pin. Lon ei leni a nom ewe lenien atittin me ewe chepel ia ekewe pilawa mi pin ra nom ie. ✧ ³ Pekilongen ewe aruachön cheech mangaku a wor eu leni mi iteni Unusen Pin. ✧ ⁴ Lon ei leni a nom ewe rongen asoren ötütöt seni kolt me ewe Pworun Pwon mi pwölüpwöl ngeni kolt. Lon ei Pworun Pwon a wor ewe pör seni kolt ia ekewe mana ra nom ie me wokun Aaron we mi fasar, pwal ekewe rüepk fau ia ekewe allük ra mak ie. ✧ ⁵ Won öppüngün ewe Pworun Pwon ra nom uluulun ruoman kerop, asisilen pwe Kot a nom ikiwe ie, pöükässir ra itiwu o meresila won ewe leni ia aramas ra küna amusamusen ar tipis ie. Nge iei esap wor fansoun ach sipwe awewei tichikin ekei mettoch meinisin. ✧

⁶ Iei usun kokotöchün ekei mettoch meinisin. Ekewe souasor ra tolong lon ewe Leni mi Pin iteiten rän ar repwe föri ar angang. ✧ ⁷ Nge ewe Souasor mi Lap echök a tolong lon ewe Leni mi Unusen Pin fän eu chök lon eu ier. A uwei chaan ewe mönün asor a eäni asor ngeni Kot fän püsin itan pwal fän iten än ekewe aramas tipis ra föri lon ar chechengau. ✧ ⁸ Iwe, ewe Ngünmifel a afatöchü lon ekei kokot meinisin, pwe ewe al ngeni ewe Leni mi Unusen Pin esamwo suk lupwen fansoun ewe Leni mi Pin a chüen nom. ⁹ Iei eu lios fän itach ikenai. Wewen pwe ekewe sokopaten asor me ekewe asoren man aramas ra uwato pwe ar asor ngeni Kot, resap tongeni aunusöchüela letipen chokewe mi fel ngeni Kot. ¹⁰ Pun ekei sokun asor ra chök masoueni mongö, minen ün me sokopaten angangen limelim. Ekei mettoch allük fän iten chök inisich, ra chök pöchökül tori ewe fansoun lupwen Kot epwe akotasefäli me asöföü mettoch meinisin.

¹¹ Nge Kraist a feito lon ewe wisen Souasor mi Lap fän iten ekewe mettoch mi mürina ra fen nom ikei. Ewe imwenfel seni mangaku i a angang lon a lap o fokun unusöch. Esap för ren pöün aramas, pun esap eu kinikinin minen fanüfan. ¹² Lupwen Kraist a tolong lon ewe imwenfel seni mangaku, a tolong lon ewe Leni mi Unusen Pin fän eu chök, nge a naf ngeni fansoun meinisin. Iwe, esap uwalong chaan kuuch me chaan ätemwänin kow, pwe epwe eäni asor, nge a uwalong püsin chaan,

✧ **8:12:** Jer 31.31-34 (LXX) ✧ **9:2:** Eks 26.1-30; Eks 25.31-40; Eks 25.23-30 ✧ **9:3:** Eks 26.31-33 ✧ **9:4:** Eks 30.1-6; Eks 25.10-16; Eks 16.33; Num 17.8-10; Eks 25.16; Tut 10.3-5 ✧ **9:5:** Eks 25.18-22 ✧ **9:6:** Num 18.2-6 ✧ **9:7:** Lif 16.2-34

pwe epwe angasakich seni ach tipis tori feilfeilachök. ¹³ Iwe, ra angei chaan ekewe kuuch me chaan ekewe ätemwänin kow, pwal falangen ewe nienifön kow mi kekkila mi nofit ngeni koluk o äsupu ngeni ekewe aramas mi nom lon tettelin limengau, pwe repwe limöch seni sokun ar limengau. ✧ ¹⁴ Pokiten ei a pwüing, epwe le ifan me ükükün aüchewan ewe chaan Kraist. Ren ewe Ngün esemüch a asor ngeni Kot püsin inisin pwe eu asor mi unusöch. Chaan Kraist epwe limeti mwelien letipach seni sokun föföör mi lomotongau, pwe sipwe tongeni angang ngeni ewe Kot mi manau.

¹⁵ Iei popun Kraist a wisen chon afförün ewe pwon mi fö, pwe chokewe Kot a köriir repwe angei ewe feiöch esemüch, Kot a fen pwon. Ei a tongeni fis, pun Kraist a mäla pwe epwe angasa aramas seni ar tipis kana ra föri fän ewe aeuin pwon. ¹⁶ Are a fis eu pwonon amwirinimä, a chök manaman lupwen eman a pwärätä pwe ewe aramas mi föri a mäla. ¹⁷ Pun eu amwirinimä a lomotongau are ewe aramas mi föri a chüen manau, pwe a chök tongeni pwönüetä mürin an mäla. ¹⁸ Iei popun pwe ewe aeuin pwon a chök fis lupwen ra aea cha. ¹⁹ Akomwan Moses a asile ngeni ekewe aramas masouen ekewe allük meinisin. Mürin a angei chaan ekewe ätemwänin kow me chaan ekewe kuuch mi nofitfengen me koluk o aea ülün ewe irä isop me ülen sip mi parapap le äsupu ngeni ewe puken allük pwal ngeni ekewe aramas meinisin. ²⁰ Iwe, Moses a apasa, “Iei ewe cha mi anüküchana ewe pwon Kot a allük ngenikemi pwe oupwe aleasochisi.” ✧ ²¹ Ina chök usun Moses a pwal äsupu ewe cha won ewe imwenfel seni mangaku pwal won ekewe mettoch meinisin ra aea lon ar fel ngeni Kot. ✧ ²² Pwüingün lon ewe Allük pwe arapakan mettoch meinisin ra limelim ren cha, pwal ina usun tipis a chök tongeni musala ren pupulan cha. ✧

Än Kraist asor inisin a amoralala tipis

9.23–10.18

²³ Ekei mettoch, aramas ra wisen limeti lon ei chök lapalap, liosun ekewe mettochun lon läng. Nge fän iten limelimen ekewe mettochun lon läng epwe fokun wor sokun asor mi mürina seni. ²⁴ Pun Kraist esap tolong lon eu Leni mi Pin aramas ra föri, ewe mi chök aliosunätä ewe wesewesen Leni mi Pin. Nge a tolong lon läng o a nonom mwen mesen Kot iei fänäsengesich. ²⁵ Ewe Souasor mi Lap a tolong lon ewe Leni mi Unusen Pin iteiten ier ren chaan eman man. Nge Kraist esap tolong läng pwe epwe asor inisin fän chomong, ²⁶ pun are epwe iei usun, epwe riaföü fän chomong seni ewe fansoun Kot a föri fanüfan. Nge iei lupwen a arapakan sopolan fansoun fanüfan, Kraist a wareto fän eu chök, nge a naf ngeni fansoun meinisin, pwe epwe amoralala tipis ren an asor püsin inisin. ²⁷ Aramas meinisin repwe mäla fän eu chök, nge mürin Kot epwe apwüingüür. ²⁸ Iei usun Kraist a fangala püsin inisin pwe eu asor fän eu chök, pwe epwe amoralala tipisin chomong aramas. Iwe, lupwen epwe wareto fän aruan, esap chüen föri och fänäsengesin tipis, nge epwe amanaua chokewe mi witiwiti. ✧

10

¹ Pun ekewe Allük ra chök ngüntüen ekewe mettoch mi mürina repwe feito, nge esap wesewesen iei inisin ekewe mettoch. Ra eäni ekewe chök

✧ **9:13:** Lif 16.15-16; Num 19.9,17-19 ✧ **9:20:** Eks 24.6-8 ✧ **9:21:** Lif 8.15 ✧ **9:22:** Lif 17.11 ✧ **9:28:** Ais 53.12

sokun asor fansoun meinisin iteiten ier me ier. Epwe ifa usun än ekewe aramas mi feito ren Kot repwe tongeni unusöchüla ren ar apwönüetä ekewe allük usun ekewe asor? ² Ika ekewe aramas mi fel ngeni Kot ra wesewesen limöchüla seni ar tipis, resap chüen mefi ar tipis o ekewe asor meinisin repwe köüla. ³ Nge ekewe asor mi fis iteiten ier ra achema ngeni ekewe aramas ar tipis. ⁴ Pun chaan ekewe ätemwänin kow me chaan ekewe kuuch resap fokun tongeni amoralala tipis.

⁵ Iei mine, lupwen Kraist epwele feito fanüfan a üreni Kot, “Kosap mochen ekewe asor me lifang, nge ka ngeniei eu inis.

⁶ Kosap pwapwaiti asoren man mi kekkila won ewe rongen asor, ika sokun asor mi amoralala tipis.

⁷ Mürin üa apasa, ‘Ai Kot, ngang iei, üpwe föri letipom, usun a mak usi lon ewe puken Allük.’” ✧

⁸ A akomwen apasa, “Kosap mochen ika pwapwaiti ekewe asor me lifang, ika asoren man mi kekkila won ewe rongen asor me sokun asor mi amoralala tipis.” A apasa ei, inamwo ika ekei asor meinisin ra fis fän pwüngün ekewe Allük. ⁹ Mürin a apasa, “Ai Kot, ngang iei, üpwe föri letipom.” Iei mine Kot a awesi ekewe asor minen lom o atolonga ewe asor än Kraist lon lenier. ¹⁰ Pokiten Jesus Kraist a föri mine Kot a mochen pwe epwe föri, kich meinisin sia küna limöch seni tipis pun a eäni asor püsin inisin fän eu chök, nge a naf ngeni fansoun meinisin.

¹¹ Ekewe souasor meinisin ra föri ar angang iteiten rän o eäni asor ekewe chök sokun asor fän chomong. Nge ekei asor resap tongeni amoralala än aramas tipis. ✧ ¹² Nge Kraist a eäni eu chök asor fän iten tipis, eu asor mi manaman tori feilfeilachök. Mürin a mottiu lepelifichin Kot. ¹³ Seni ena fansoun a witiwit tori Kot epwe anomu chon oputan pwe repwe lenien puun pechen. ✧ ¹⁴ Pun ren eu chök asor a aunusöchüela chokewe meinisin mi küna limöch seni ar tipis tori feilfeilachök.

¹⁵ Iwe, pwal ewe Ngünmifel a pwärätä ngenikich usun ei. Akomwan a apasa,

¹⁶ “Iei ewe pwon üpwe föri ngeniir
lon ekewe rän repwe feito, iei alon ewe Samol:
Üpwe atolonga ai kewe allük lon leluiker
o makkeretiu lon letiper.” ✧

¹⁷ Mürin a apasa, “Ngang üsap chüen chechemeni ar kewe tipis me föföör mi ngau.” ✧ ¹⁸ Iei mine lupwen ar kewe tipis a musala, esap chüen wor lomoten an epwe fis asoren amusamusen tipis.

Ousipwe arapfochofoch ngeni Kot
10.19-39

¹⁹ Iei mine ämi pwii kana, esap fokun wor och mine epwe epetikich ach sipwe tolong lon ewe Leni mi Unusen Pin ren chaan Jesus. ²⁰ I a suki ngenikich efoch al mi fö, efoch al mi manau, mi pwerelong pekilan ewe cheech mangaku, wewen iei püsin inisin. ²¹ Sia eäni eman souasor mi tekia, a nemeni ewe imwen Kot. ²² Iei mine ousipwe arap ngeni Kot ren wenecharen letipach, pwal fän lükülük mi nüküchar, ren letipach mi limöch seni mengiringirin ach tipis, pwal ren inisich mi limelim ren koluk mi limöch. ✧ ²³ Ousipwe kamwöchünük won ewe apilüköch sia

pwärätä, pun Kot ewe mi pwon a allükülük. ²⁴ Ousipwe ekiekifengeni usun ach sipwe tongeni alollolätai chienach ren ach eäni chen me föföri mürina. ²⁵ Sisap likiti ach eti ach mwichfengen usun ekoch ra föföri. Nge sipwe fokun apöchökülafengenikich lefilach, pun sia silei pwe Ränin ach Samol a arapoto.

²⁶ Pun are sia chök sopwela le föri tipis mürin ach sia fen silei ewe let, esap chüen wor och asor fänäsengesen ach tipis. ²⁷ Nge sipwe chök witiwit fän niuokus ren ewe Ränin Kapwüing me afeiengauen ewe ekkei epwe arosala chokewe mi ü ngeni Kot. ✧ ²⁸ Are ruoman ika ülüman chon pwärätä ra tongeni alletätä pwe eman aramas a tipisin aleasolap ngeni än Moses Allük, epwe chök ninnila, nge esap küna ümömöch. ✧ ²⁹ Oupwe ekieki epwe ifan me watten liwinin tipisin eman aramas mi aitengaua ewe Nöün Kot o aüongaua pinin chaan än Kot we pwon a küna pin ren, a pwal turunufasei ewe Ngütün ümömöch. ✧ ³⁰ Pun sia silei ewe mi apasa, “Üpwe ngeniir chappen ar föföri, ngang üpwe liwini ngeniir.” A pwal apasa, “Ewe Samol epwe apwüingü nöün aramas.” ✧ ³¹ A men fokun eniweniw ach turulong lepöün ewe Kot mi manau!

³² Oupwe chechemeni mine a fis ngenikemi me lom. Lon ekewe rän, mürin än Kot saram a tin lomi, oua küna chomong sokun riaföü, nge ousap kuf lon ekewe weires oua tolong lon. ³³ Fän ekoch oua küna turunufas me riaföü mwen mesen aramas, nge pwal fän ekoch oua chiechi ngeni chokewe mi tolong lon ekei sokun riaföü. ³⁴ Oua tongäsini chokewe mi nom lon imwen fötek, nge lupwen ra angei pisekimi meinisin fän pöchökül, oua likiti ngeniir fän pwapwa, pun oua silei pwe oua chüen eäni och mi mürina seni, epwe nonomola tori feilfeilachök. ³⁵ Ousap pöütala ämi apilüköch, pun epwe atoto ngenikemi eu liwin mi watte. ³⁶ Oupwe fokun likitü, pwe oupwe föri letipen Kot o angei mine a eäni pwon. ³⁷ Pun a mak lon ekewe Toropwe mi Pin,

“Ekiş chök fansoun mürin

ätewe epwe feito epwe war, esap mang.

³⁸ Ekewe chon pwüing repwe manau ren ar lükü Kot.

Nge are eman leir epwe liwinsefäl, ngang üsap pwapwaiti.” ✧

³⁹ Nge kich sisap eti chokewe mi liwinsefäl o pöütmwälila, pwe sia eti chokewe mi lükü o küna manau.

11

Usun ekewe aramas mi lükü Kot

11.1-40

¹ Iwe, iei wewen lükü: sia alletätä ekewe mettoch sia apilüküni, sia pwal silei usun mettoch mi wor sisap tongeni küna. ² Ren ar lükü ekewe aramasen lom ra küna iteüöch me ren Kot.

³ Ren ach lükü sia tongeni weweiti pwe läng me fanüfan ra för ren än Kot kapas, pwe mine sia tongeni küna a fisitä ren mine sisap tongeni küna. ✧

⁴ Ren än Epel lükü, a eäni ngeni Kot eu asor mi mürina seni än Kain asor. Ren an lükü Kot a alletätä pwe i eman chon pwüing, pun Kot a tipeeu ngeni an lifang kana. Ren än Epel lükülük a chüen afalafal ikenai, inamwo ika a fen mäla. ✧

✧ **10:27:** Ais 26.11 ✧ **10:28:** Tut 17.6; 19.15 ✧ **10:29:** Eks 24.8 ✧ **10:30:** Tut 32.35-36
✧ **10:38:** Ap 2.3-4 ✧ **11:3:** Ken 1.1; Kölf 33.6,9; Joh 1.3 ✧ **11:4:** Ken 4.3-10

⁵ Ren än Enok lükü, a fis pwe esap mäla. Kot a angeatä läng, iei mine esap wor eman a chüen tongeni küna. Pun a mak lon ekewe Toropwe mi Pin, pwe mwen än Enok feitä läng, Kot a pwapwa ren. ✧ ⁶ Esap wor eman a tongeni apwapwai Kot are esap wor an lükü. Pun iö a feito ren Kot epwe fokun lükü pwe mi wor Kot, nge epwe ngeni chokewe mi kütta i liwiniir.

⁷ Ren än Noa lükü, a rongorong än Kot kapasen fön usun ekewe mettoch repwe fis lon ekewe fansoun repwe feito, nge esamwo tongeni küna. A aleasochisi Kot o föri efoch waimw ia i me chon an famili ra tongeni manau ie. Ren an lükü a pwä pwe fanüfan a tipis. Nge Noa a angei ewe sokun pwüng me ren Kot pokiten an lükü. ✧

⁸ Ren än Apraham lükü, a aleasochisi Kot lupwen a köri pwe epwe towu seni fanüan o feila ngeni eu fanü Kot a pwon ngeni pwe epwe fanüeni. A feila seni fanüan, nge esap silei ia epwe feila ie. ✧ ⁹ Ren an lükü a nonom lon ewe fanü Kot a pwon ngeni usun eman chon ekis. A nom lon imw mangaku usun chök pwal Isaak me Jakop, ätekewe mi pwal angei ewe chök pwon me ren Kot. ✧ ¹⁰ Pun Apraham a witiwiti ewe fansoun pwe epwe nom lon ewe telinimw Kot a föri liosun o aüetä, ewe telinimw a wor longolongun esap tongeni tala. ¹¹ Ren än Apraham lükü a wiliti eman sam, inamwo ika a fokun chinlap, pwal Sara a rit. Apraham a lükü Kot an epwe apwönüetä mine a eäni pwon ngeni. ✧ ¹² Inamwo ika Apraham a usun chök eman mi mäla, seni ei chök eman mwän a wor chomong mwirimwirin usun chomongun ekewe fü, pwal usun chomongun ekewe pien arosset. ✧

¹³ Ekei aramas meinisn ra mäla lon ar lükülük, nge resap angei ekewe mettoch Kot a pwon ngeniir. Ra küna ekewe mettoch me toau o ra pwapwa rer. Ra pwärätä mwen mesen aramas pwe ir chon ekis me choisä won fanüfan. ✧ ¹⁴ Chokewe mi apasatä ei sokun kapas ra afatafichi, pwe ir ra kütta eu fanü repwe tongeni fanüeni. ¹⁵ Resap ekieki ewe fanü ra likitala, pun ika repwe ekieki usun, epwe wor fansoun ar repwe liwinsefäl ngeni. ¹⁶ Nge ra ösöküsükü eu fanü mi mürina seni, ewe fanü mi nom läng. Iei mine Kot esap säwäsiniir ar repwe aita ngeni i ar Kot, pun a amolätä eu telinimw fän iter.

¹⁷ Ren än Apraham lükü, a eäni asor Isaak nöün we, lupwen Kot a sotuni. Apraham, ätewe Kot a eäni ewe pwon ngeni, nge a fen molotä an epwe eäni asor nöün we aleman, ✧ ¹⁸ inamwo ika Kot a fen üreni, “Mwirimwirum epwe chök seni Isaak, usun üa fen pwon ngonuk.” ✧ ¹⁹ Apraham a apilükülükü pwe Kot a tongeni amanauasefäli Isaak seni mäla. Iwe, sia tongeni apasa, pwe Apraham a angesefäli Isaak seni mäla.

²⁰ Ren än Isaak lükü, a eäni pwon ngeni Jakop me Esau pwe repwe feiöch lon ekewe fansoun repwe feito. ✧

²¹ Ren än Jakop lükü, a afeiöchü nöün Josef kewe ät me mwen an epwe mäla. Iwe, a itetiu won wokun we o fel ngeni Kot. ✧

²² Ren än Josef lükü, a kapas usun än chon Israel towu seni Isip o amwirimwir ngeniir usun mine repwe föri ngeni chün, lupwen an fetal ngeni an epwe mäla. ✧

✧ **11:5:** Ken 5.21-24 ✧ **11:7:** Ken 6.13-22 ✧ **11:8:** Ken 12.1-5 ✧ **11:9:** Ken 35.27 ✧ **11:11:** Ken 18.11-14; 21.2 ✧ **11:12:** Ken 15.5; 22.17; 32.12 ✧ **11:13:** Ken 23.4; 1.Kron 29.15; Kölf 39.12 ✧ **11:17:** Ken 22.1-14 ✧ **11:18:** Ken 21.12 ✧ **11:20:** Ken 27.27-29,39-40 ✧ **11:21:** Ken 47.31-48.20 ✧ **11:22:** Ken 50.24-25; Eks 13.19

²³ Ren än semen me inen Moses lükü, ra aopala Moses lon ükükün ülüngat maram mürin an uputiu, pun ra küna pwe i eman mönükol mi äteöch, resap pwal niuokusiti än ewe king allük. ✧

²⁴ Ren än Moses lükü, esap mochen an epwe iteni nöün nöün ewe king föpwül lupwen an mwän. ²⁵ A filätä an epwe eti nöün Kot kewe aramas le riaföü, lap seni an epwe pwapwaiti tipis lon ekis chök fansoun. ²⁶ A ekieki pwe an küna itengau fän iten ewe Mesaia a aüchea seni wöün Isip, pun a nenengeni ewe liwin epwe angei me mürin.

²⁷ Ren än Moses lükü, a likitala Isip, nge esap niuokusiti än ewe king song. Moses a chök likitü, pun usun chök nge a küna ewe Kot sisap tongeni küna. ✧ ²⁸ Ren an lükü a föri ewe Pasofer o a allük pwe repwe äsupu chaan ewe mönün asor ngeni penkasamen imwer, pwe ewe chon läng mi ni aramas esap niela mwänichien nöün ekewe chon Israel. ✧

²⁹ Ren än ekewe chon Israel lükü, ra tolong o fetalela epek ewe Setipar usun chök ar fetal won fanü mi pwasapwas. Nge lupwen ekewe chon Isip ra sotuni ar repwe föri iei usun, ewe sät a amopuretiu. ✧ ³⁰ Ren än ekewe chon Israel lükü ewe tittin Jeriko a turutiu mürin ar karisfeil ünükün lon ükükün fisu rän. ✧ ³¹ Ren än ewe fin lisowu Rahap lükü, i esap ninnila usun chokewe mi aleasolap ngeni Kot, pun a etiwa ekewe chon Israel mi operi ewe fanü. ✧

³² Iwe, met üpwe sopwela le pworaus won? Esap naf fansoun ai üpwe kapas usun Kition, Parak, Samson, Jefta, Tafit, Samuel me ekewe soufos. ✧ ³³ Ren ar lükü ra maun ngeni ekewe mwü o pworaitiir. Ra föri met mi pwüing o angei mine Kot a pwon ngeniir. Ra pinei awen ekewe laion ✧ ³⁴ o kunuela ekkei mi fokun sarara, ra sü seni ar repwe ninnila ren ketilas. Ra apwangapwang, nge ra pöchökületä, ra pwora lon maun o akufu ekewe mwichen sounfiun chon ekis. ✧ ³⁵ Ren än ekewe fefin lükü, ra angesefäli aramaser kewe mi mäla mürin ar manusefäl. Nge pwal ekoeh aramas resap tipeeu ngeni ar repwe ngasala, iei mine ra mäla pokiten aramas ra fokun ariaföüür, pwe repwe manusefäl ngeni eu sokun manau mi fokun mürina. ✧ ³⁶ Ekoeh ra küna turunufas me wichiwich, nge pwal ekoeh ra föfö o koturulong lon imwen fötek. ✧ ³⁷ Ra mäla ren ar monei ngeniir fau, ren ar ngerefeseni inisiir, pwal ar niirela ren ketilas. Ra fetalfeil fän üfer seni ünüchen sip ika kuuch, ra mwelele, aramas ra ariaföüür o aweiresiir. ✧ ³⁸ Fanüfan esap eu leni mi öch fän iter. Ra süsüfeil lon ekewe fanüapö pwal won ekewe chuk, ra nom lon ekewe föimw me ekewe pwang fän pwül. ³⁹ Ekei aramas meinisin ra fokun iteüöch ren ar lükü, nge resap angei mine Kot a pwon ngeniir, ⁴⁰ pun Kot a akota och mi fokun mürina fän itach, pwe repwe chök tongeni unusöchüla lupwen kich sipwe unusöchüla.

12

Kot a amiriti nöün kana

12.1-11

¹ Pokiten a fen wor rech eu watten mwichen chon pwärätä ar lükü ra pwelifeilikich, iei mine ousipwe likitätü mettoch meinisin mi epetikich,

✧ **11:23:** Eks 2.2; 1.22 ✧ **11:27:** Eks 2.15 ✧ **11:28:** Eks 12.21-30 ✧ **11:29:** Eks 14.21-31
 ✧ **11:30:** Jos 6.12-21 ✧ **11:31:** Jos 2.1-21; 6.22-25 ✧ **11:32:** Souk 6.11-8.32; 4.6-5.31;
 13.2-16.31; 11.1-12.7; 1.Sam 16.1-1.King 2.11; 1.Sam 1.1-25.1 ✧ **11:33:** Tan 6.1-27 ✧ **11:34:**
 Tan 3.1-30 ✧ **11:35:** 1.King 17.17-24; 2.King 4.25-37 ✧ **11:36:** 1.King 22.26-27; 2.Kron
 18.25-26; Jer 20.2; 37.15; 38.6 ✧ **11:37:** 2.Kron 24.21

pwal sokun tipis mi alikafifikich, nge sipwe tipeppos le sä lon ewe kitir mi nom mwach. ² Ousipwe chök nenengeni Jesus ewe chon popuetä me chon awesala ach lükülük. Esap fangatä pokiten ewe iräpenges, nge fänäsengesiin ewe pwapwa mi nom mwan esap ekieki itengauen an mäla won ewe iräpenges. Iwe, iei a mottiu lepelifichin Kot. ³ Oupwe ekieki usun watten an riaföü pokiten ekewe chon tipis mi oput i! Iei mine ousap apilükingau o fangatä. ⁴ Pun lon ämi fiu ngeni tipis ousamwo üpöchökül tori ewe aükük pwe oupwe ninnila. ⁵ Ifa usun, oua manlükala ekewe kapasen apöchökül Kot a ürenikemi pokiten ämi nöün kana?

“Nei, kosap aücheangauei än ewe Samol kapasen fön,

Kosap apilükingau lupwen a amirituk.

⁶ Pun ewe Samol a fönöü iö a echeni,

a fokun apwüngü meinisin i a etiwere pwe nöün.” ✱

⁷ Oupwe likitü fän ewe riaföü a torikemi usun än sememi apwüngükemi. Kot a föri ngenikemi usun mine a föri ngeni nöün kana. Ifa usun, mi wor eman nau saman esap apwüngü? ⁸ Are Kot esap apwüngükemi usun an apwüngü nöün kana meinisin, wesen ämi ousap wesewesen nöün, pwe ämi upun leroch. ⁹ Ina chök usun samach lon pekin fituk, ra apwüngükich, nge kich sia menitiir. Epwe ifan me watten ach sipwe aleasochisi Samach we lon pekin ngünüch o manau! ¹⁰ Samach kana lon pekin fituk ra apwüngükich lon fansoun mochomoch, usun ra ekieki pwe a pwüng. Nge Kot a ekieki ach feiöch lupwen a apwüngükich, pwe sipwe eäni an pin. ¹¹ Lupwen Kot a apwüngükich usun itä nge sia mefi lon ewe otun pwe och mettoch sia letipeta ren, nge sisap pwapwa. Nge mürin chokewe mi angei ei sokun apwüng repwe manaueni eu manauen kinamwe me pwüng.

Kapasen öüröür me kapasen fön

12.12-29

¹² Iei mine oupwe apöchökülätä pöümi me pwäsukumi kana mi apwangapwang. ✱ ¹³ Oupwe awenechara ekewe al oupwe fetal won, pwe ekewe chon pechemä resap apwangapwangala, nge repwe pöchöküela.

¹⁴ Oupwe achocho ngeni ämi oupwe kinamwefengen me aramas meinisin, oupwe pwal achocho ngeni ämi oupwe manaueni eu manau mi pin, pun esap wor eman epwe küna ach Samol are esap pin. ¹⁵ Oupwe tümwünüfichikemi pwe esap wor eman leimi epwe kul seni än Kot ümömöch. Esap pwal wor eman epwe usun chök efoch irä maras mi märitä o afsätä chomong fitikoko, pwe chomong repwe limengau ren. ✱ ¹⁶ Esap pwal wor eman epwe föri föföürün lisowu ika sufölingau ngeni Kot usun chök Esau, pun a amömöla wisan wisen mwänichi ren eu chök mongö. ✱ ¹⁷ Iwe, oua silei pwe a mochen angei feiöchün me ren saman me mürin, nge esap chüen tongeni angei. Esap chüen küna efoch alen an epwe siwilisefäli mine a fen föri, inamwo ika a kütta ewe feiöch fän chönün mesan. ✱

¹⁸ Ämi ousap feito ngeni eu chuk oua tongeni atapa, ousap feito ngeni ewe chuk Sinai mi ngetenget ren ekkei, mi rochopwak me toputup me mölümöl, ¹⁹ ren tikimongun rappwa me eu möngüngü. Lupwen ekewe aramasen Israel ra rongorong ewe möngüngü, ra tüngror pwe resap chüen

✱ **12:6:** Hiop 5.17; SalF 3.11-12 (LXX) ✱ **12:12:** Ais 35.3 (LXX) ✱ **12:13:** SalF 4.26 (LXX)

✱ **12:15:** Tut 29.18 (LXX) ✱ **12:16:** Ken 25.29-34 ✱ **12:17:** Ken 27.30-40

rongorong pwal eu kapas, ✨²⁰ pun resap tongeni etiwa ewe allük a apasa, “Ikamwo eman man epwe tori ewe chuk, epwe fokun momon ngeni fau tori an epwe mäla.” ✨²¹ Mine ekewe aramas ra küna a fokun eniweniw, pwe Moses a apasa, “Ngang üa chechek ren ai niuokus.” ✨²² Nge ämi oua feito ngeni ewe Chuk Sion, pwal ngeni ewe telinimwen ewe Kot mi manau, ewe Jerusalem mi nom läng fiti ngeröün chon läng. ²³ Oua feito ren ewe mwichen souläng mi usun chök nöün Kot kewe mwänichi, ra chufengen fän pwapwa, iter a mak lon läng. Oua feito ren Kot ewe soukapwüng fän iten aramas meinisin, pwal ren ngünün ekewe chon pwüng mi unusöch. ²⁴ Oua feito ren Jesus ewe chon afförün eu pwon mi fö, pwal ren ewe cha ra aea le käsüp, a ääni kapas mürina seni chaan Epel.

✨²⁵ Iwe, oupwe tümwünüfichi pwe ousap oput ätewe mi kapas. Chokewe mi oput ätewe mi aronga än Kot kapas won fanüfan, resap tongeni sü seni liwiningauen ar tipis. Are epwe iei usun, epwe ifan me watten ewe liwiningau sipwe küna, are sia kul seni ewe mi kapas seni läng. ✨²⁶ An möngüngü a achechecha fanüfan lon ena fansoun, nge iei a pwon, “Pwal fän eu üpwe achechecha fanüfan, nge sap fanüfan chök pwe pwal läng.” ✨²⁷ Ewe kapas “pwal fän eu” a pwärätä pwe ekewe mettoch mi för repwe chechek o morola, pwe ekewe mettoch resap tongeni chechek repwe nonomola.

²⁸ Iei mine ousipwe kilisou, pun sia mwüni eu mwü esap tongeni siwil. Ousipwe kilisou o fel ngeni Kot fän suföl me menin lon eu lapalap i epwe pwapwa ren, ²⁹ pun ach Kot a wesewesen eu ekkei mi fokun afeiengau.

13

Usun ach sipwe apwapwai Kot

13.1-19

¹ Oupwe sopwela le tongfengen lefilemi, pun ämi pwipwi lon Kraist. ² Oupwe chechemeni ämi oupwe etiwa chon ekis lon imwemi. Pun mi wor ekoch aramas mi föri iei usun, ra etiwa chon läng, nge resap silei. ✨³ Oupwe chechemeni chokewe mi nom lon imwen fötek, usun chök itä nge oua etiir le nom lon imwen fötek. Oupwe pwal chechemeni chokewe mi küna riaföü, usun chök nge itä oua püsin nom lon ewe riaföü.

⁴ Aramas meinisin repwe aücheani pwüpwülü. Ekewe mi pwüpwülü resap kirikiringaufengen lefiler, pun Kot epwe apwüngü chokewe mi lisowu ngeni mi lipich, pwal chokewe mi lisowu ngeni mi pwüpwülü.

⁵ Oupwe afälikemi pwe ousap manaueni eu manauen mochenian moni, nge oupwe menemenöch ren mine oua ääni. Pun Kot a apasa, “Ngang üsap fokun likituk, üsap pwal tümwününgau ngonuk.” ✨⁶ Iei mine sipwe tongeni apasa fän apilükülüköch, “Ewe Samol i ai Soualilis, üsap fokun niuokus, met aramas repwe tongeni föri ngeniei?” ✨

⁷ Oupwe chechemeni ämi souemwen me lom, chokewe mi afalafalakemi kapasen Kot. Oupwe ekiiki usun nonomur, pwal usun ar mäla, pwe oupwe apirü ar lükülük. ⁸ Jesus Kraist usun ewe chök

✨ **12:19:** Eks 19.16-22; 20.18-21; Tut 4.11-12; 5.22-27 ✨ **12:20:** Eks 19.12-13 ✨ **12:21:** Tut 9.19 ✨ **12:24:** Ken 4.10 ✨ **12:25:** Eks 20.22 ✨ **12:26:** Ak 2.6 (LXX) ✨ **12:29:** Tut 4.24 ✨ **13:2:** Ken 18.1-8; 19.1-3 ✨ **13:5:** Tut 31.6,8; Ais 1.5 ✨ **13:6:** Kölf 118.6 (LXX)

lom, ikenai tori feilfeilachök. ⁹ Ousap mwüt ngeni sokopaten afalafal mi mwäl repwe atokakemi seni ewe al mi pwüing. A fokun mürina ngenikemi pwe letipemi epwe pöchökül ren än Kot ümömöch, nge sap ren ämi aleasochisi ekewe allük usun mongö. Chokewe mi aleasochisi ekei allük resap angei ar feiöch seniir.

¹⁰ Ekewe souasor mi angang lon ewe imwenfel seni mangaku esap wor ar pwüing ar repwe mongö seni ewe asor mi nom won ach rongen asor. ¹¹ Ewe Souasor mi Lap a uwato chaan ekewe mönün asor lon ewe Leni mi Unusen Pin, pwe epwe eäni asor fän iten amusamusen tipis, nge inisin ekewe man ra kek lükün ewe leni ia ekewe aramas ra nom ie. ¹² Iei popun Jesus a pwal mäla lükün ewe telinimw, pwe epwe apini ekewe aramas ren püsin chaan. ¹³ Iei mine ousipwe feila ren lükün ewe leni ia ekewe aramas ra nom ie, pwe sipwe eti i lon an itengau. ¹⁴ Pun esap wor ach lenien wilipos ikei won fanüfan, pwe sia kütta ewe leni a souni kich me mürin. ¹⁵ Iei mine ousipwe mwareiti Kot fansoun meinisin pwe iei ach asor ngeni ren Jesus. Iei ewe asor sia eäni ren tinawach, lupwen sia pwärätä pwe Jesus ach Samol. ¹⁶ Ousap manlükala ämi oupwe föri föföri mi öch o alilifengen lefilemi, pun ena sokun asor Kot a pwapwa ren.

¹⁷ Oupwe aleasochisi nöümi kewe souemwen o föri mine ra allük ngenikemi. Ra mamasa ngünümi fansoun meinisin, pun ra wisen pwäri ngeni Kot usun mine ra föri lon ar angang. Are oua aleasochisiir, repwe föri ar angang fän pwapwa, nge are oua lükümach, repwe föri ar angang fän letipeta. Ren ei ousap feiöch ren. ¹⁸ Oupwe sopwela le iotek fän item. Sia silei, pwe mwelien letipem a limelimöch, pun sia fokun mochen föri mine a pwüing fansoun meinisin. ¹⁹ Üa fokun tüngormau ngenikemi, pwe oupwe iotek pwe Kot epwe müttir tinsefälieila remi.

Iotekin lesopolan

13.20-21

²⁰ Iwe, ewe Koten kinamwe mi amanauasefäli ach Samol Jesus seni mäla ren chaan ewe pwon mi nom tori feilfeilachök, i ewe Chon Masen sip mi fokun tekia, ²¹ epwe atufichikemi ren mettoch meinisin mi mürina, pwe oupwe föri letipan. Epwe föri loch ren Jesus Kraist mine i epwe pwapwa ren. Kraist epwe ling tori feilfeilachök! Amen.

Kapasen lesopolan

13.22-25

²² Ämi pwii kana, üa fokun tüngor ngenikemi, pwe oupwe rongorong ngeni ekei kapasen apöchökül fän tipeppos. Pun ei toropwe üa makkei ngenikemi esap langatam. ²³ Üa mochen ämi oupwe silei pwe pwiiich we Timoty a fen musowu seni imwen fötek. Are epwe müttir feito, i epwe etiei lupwen üpwe feila churikemi. ²⁴ Äm kapong ngeni nöümi kewe souemwen meinisin, pwal ngeni nöün Kot kewe aramas meinisin. Pwiimi kewe souläng seni Itali ra pwal kapong ngenikemi. ²⁵ Än Kot ümömöch epwe nonom remi meinisin.

Echö Toropwe nöün James

Kapas akom

I. Chon makkei ei toropwe: Ese fat, nge ekoch sousilelap lon Paipel ra ekieki pwe James, ätewe Paulus a aita ngeni “pwiin ach Samol” (Kal 1.19) a makkei ei toropwe.

II. A mak ngeni iö: Ngeni ekewe chon Juta, ir souläng mi nom won ekewe fanü lükün Israel.

III. Itelapemongen ei toropwe: Usun än souläng repwe pwärätä ar enletin lükü lon ar föför.

IV. Kapas aüchewan ei toropwe: Oupwe chon apwönüetä kapasen Kot, nge sap chon rong chök.

V. Masouen ei toropwe: Ewe toropwe seni James ekoch kapasen öüröür usun föförün manauen souläng ra chufengen lon. A mak ngeni “ekewe engol me ruu ainang mi toropasfeil won unusen fanüfan”. James a aea chomong sokun kapasen aweve an epwe atowu kapasen öüröür usun än eman epwe eäni tipachem lon föförün, pwal kapasen emwen usun än souläng ekielik me föför. A eäni longolong pwüngün souläng, lupwen a mak usun sokopaten itelap: usun pisekisek me wöüngau, sosot, föför mürina, lifilifil aramas, lükülük me föför, kapasen awach, tipachem, anini, lamalamtekia me tipetekison, apwüngü aramas, sikesik, mosonotam me iotek.

Ewe toropwe a afata aüchewan föför fiti lükülük lon föförün manauen eman souläng.

VI. Tettelin masouen ei toropwe:

Kapas akom 1.1

Lükülük me tipachem 1.2-8

Wöüngau me pisekisek 1.9-11

Asosot me sosot 1.12-18

Rong me föri 1.19-27

Kapasen fön usun lifilifil aramas 2.1-13

Lükülük me angang 2.14-26

Eman souläng me kapasen awan 3.1-18

Eman souläng me fanüfan 4.1-5.6

Sokopaten kapasen öüröür 5.7-20

Kapong

1.1

¹Ngang James, eman nöün Kot me ach Samol Jesus Kraist chon angang, üa kapong ngeni ekewe engol me ruu ainang mi toropasfeil won unusen fanüfan. ✧

Lükülük me tipachem

1.2-8

²Ämi pwii kana, oupwe fokun ekiekin pwapwa lupwen oupwe tolong lon sokopaten sosot, ³pun oua silei pwe mine a sotuni ämi lükülük a afisätä ämi tipeppos. ⁴Iwe, ämi tipeppos epwe chöchöla lon föförümi meinisin, pwe oupwe mirit o unusöchüla, nge ousap osun och mettoch

lon manauemi. ⁵ Nge are eman leimi a osun tipachem, epwe tüngor ngeni Kot, iwe, i epwe fang ngeni, pun Kot a fangafangöch ngeni aramas meinisin, nge esap laleiti eman. ⁶ Nge lupwen epwe tüngor, epwe tüngor fän lükülük, nge esap tipemwaramwar. Pun eman mi tipemwaramwar a wewe ngeni eu noon lematau, a mwökütüküt o nono ren asepwäl. ⁷ Ei sokun aramas esap ekieki pwe epwe angei och seni ach Samol, ⁸ pun i eman aramas mi tipekinikin, a wiliwilikis lon an föföör meinisin.

Wöüngau me pisekisek

1.9-11

⁹ Eman souläng mi wöüngau epwe fokun pwapwa lupwen Kot epwe atekiatä. ¹⁰ Nge eman souläng mi pisekisek epwe fokun pwapwa lupwen Kot epwe atekisonatiu. Pun ekewe chon pisekisek repwe mwor usun epö pön irän lemäl a mworotiu. ¹¹ Pun akkar a tötä fiti pwichikaran o a keni ewe irä, pwe pön ewe irä a mworotiu o lingan a tala. Ina usun ewe mwän mi pisekisek epwe müch manuan lon an föri an kewe angang. ✧

Asosot me sosot

1.12-18

¹² A feiöch eman aramas mi tipeppos lon sosot, pun are epwe mokos lon ewe sosot, epwe angei ewe mwäarin manau Kot a pwon ngeni chokewe mi echeni i. ¹³ Are eman aramas a tolong lon sosot, esap fokun apasa, “Ei sosot a feito seni Kot.” Pun Kot esap tongeni küna sosotingau, i esap pwal sotuningau ei eman. ¹⁴ Nge eman me eman aramas a tori sosotun ren püsin an mochenia mi atekini o pani letipan. ¹⁵ Iwe, are än eman mochenia a liapeni letipan, a fis an tipis, nge are an tipis a unusela, a fis an mäla.

¹⁶ Ämi pwii kana mi achengicheng, ousap tupula! ¹⁷ Lifang mi mürina meinisin me feiöch mi unusöch meinisin ra feitiu seni läng, ra feitiu seni ewe Sam mi föri ekewe Saram lon läng, ewe esap siwil, esap pwal fis rochopwak ren an kul. ¹⁸ Ren püsin letipan a afisikich ren ewe kapas mi let, pwe sipwe nöün mwänichi lein förian kana meinisin.

Sipwe rong o föri kapasen Kot

1.19-27

¹⁹ Ämi pwii kana mi achengicheng, oupwe chechemeni ei: Aramas meinisin repwe müttir ngeni rong, mang ngeni kapas pwal mang ngeni song, ²⁰ pun än aramas song esap apwönüetä ewe pwüng Kot a mochen. ²¹ Iei mine oupwe likitätü sokun limelimengau me sokun föfööringau meinisin. Oupwe atekisonakemi mwen mesen Kot o oupwe etiwa ewe kapas a fot lomi, a tongeni amanauakemi.

²² Oupwe chon föri kapasen Kot, nge ousap chon rong chök, pwe ousap püsin atupukemi. ²³ Are eman a rong ewe kapas, nge esap föri, a wewe ngeni eman aramas mi ori lon eu kilas o a küna lapalapen inisin. ²⁴ Mürin an küna püsin inisin, a feila o müttir manlükala lapalapen inisin. ²⁵ Nge eman mi likitü le nenelong lon ewe allük mi unusöch, ewe a angasakich, o sopwela le föri ei, nge esap manlükala rongean, pwe a apwönüetä pwüngün, ei aramas epwe feiöch lon met a föri. ²⁶ Are eman a ekieki pwe i eman souläng, nge esap nemeni chönawan, ewe aramas a püsin atupu i, nge an souläng a lomotongau. ²⁷ Än eman souläng limöch me pwüng mwen mesen Samach Kot a fis are epwe iei usun: epwe tümwünü ekewe

mi mäsen me ekewe fefin mi mä pwülüer lon ar riaföü, epwe pwal püsin tümwünü i, pwe esap limengau ren ngauen ei fanüfan.

2

Kapasen fön usun ach sisap lifilifil aramas

2:1-13

¹ Ämi pwii kana, ämi chon lükü ach Samol Jesus Kraist, ewe Samol mi ling, ousap lifilifil aramas pokiten chök lapalapen inisiir me lükün. ² Are eman aramas mi pisekisek a feito lon ämi mwich fän nöün ring seni kolt, pwal fän üfan mi lingöch, nge eman aramas mi wöüngau a pwal feito fän üfan mi mesingau, ³ nge are oua pwärala ämi meniniti ewe aramas mi üföüf üf mi lingöch o oua üreni, “Kopwe mottiu ikei won ei lenien mot mi mürina”, nge oua üreni ewe aramas mi wöüngau, “Kopwe ütä ikenan”, ika “Kopwe mottiu ikei arun pechei”, ⁴ mürin oua tipis ren ämi lifilifil aramas lefilemi, pwal ren ämi longuni pwüngün ämi apwüng won ekiek mi ngau.

⁵ Ämi pwii kana mi achengicheng, oupwe aüseling! Ifa usun, Kot esap filätä ekewe aramas mi wöüngau won ei fanüfan pwe repwe pisekisek lon ar lükülük o feiöchüni feiöchün ewe Mwün Kot, i a pwon ngeni chokewe mi echeni? ⁶ Nge ämi oua asäwa ekewe mi wöüngau. Ifa usun, esap ekewe chon pisekisek ir ekewe mi ariaföüükemi o atekinikemiila mwen ekewe soukapwüng? ⁷ Ifa usun, esap pwal ir chokewe mi turunufasei ewe it mi mürina a föü womi?

⁸ Oua föri mine a pwüng are oua aleasochis ngeni allükün ewe Mwün Kot mi mak lon ekewe Toropwe mi Pin, “Kopwe echeni chon arum usun püsin om echenuk.” ✧ ⁹ Nge are oua lifilifil aramas ren chök lapalapen inisiir me lükün, oua tipis, pun ewe Allük a atipisikemi pwe oua chon atai allük. ¹⁰ Pun iö a apwönüetä ekewe allük meinisin, nge a atai eu chök kewe allük, ätewe a tipis in atai ekewe allük meinisin. ¹¹ Pun ewe eman mi apasa, “Kosap lisowu”, a pwal apasa, “Kosap niela aramas”. Inamwo ika kosap lisowu, nge ka niela aramas, ka eman chon atai allük. ✧ ¹² Iei mine oupwe kapas o föri sokun föföör usun chök aramas repwe küna kapwüng ren ewe allük mi angasakichela. ¹³ Pun Kot esap eäni tong ngeni eman aramas esap eäni tong, lupwen a apwüngü. Pun tong a win lon kapwüng.

Lükülük me föföör

2:14-26

¹⁴ Ämi pwii kana, met lomoten are eman aramas a apasa pwe a wor an lükülük, are an föföör esap alletätä? Ifa usun, ei sokun lükülük epwe tongeni amanaua i? ¹⁵ Are mi wor pwüch souläng are fefinach souläng esap wor üfer, esap pwal naf aner mongö, ¹⁶ nge eman me leimi epwe üreniir, “Oupwe feila fän kinamwe. Oupwe aüföüfakemi o amongökemi!” nge ousap ngeniir mine ra osupwang ren lon manauen inisiir, met chök lomoten ämi afeiöchüür? ¹⁷ Ina chök usun ren lükülük. Are epwe wor chök ämi lükülük, nge esap fiti föföör, a mäla ämi lükülük.

¹⁸ Nge eli eman epwe üra, “En ka eäni lükülük, nge ngang üa eäni föföör.” Pölüan me rei, “Kopwe pwäri ngeniei om we lükülük ese fiti föföör, nge ngang üpwe pwäri ngonuk ai lükülük mi fiti föföör.” ¹⁹ Ifa usun, ka lükü pwe mi wor eman chök Kot? A öch om lükü. Ekewe anün rochopwak ra pwal lükü, nge ra chechek ren niuokus. ²⁰ Ka umwes! Ifa usun, ka mochen än

eman epwe alletätä ngonuk, pwe lükülük ese fiti föför a mä? ²¹ Ifa usun, ach we lewo Apraham esap küna pwüing me ren Kot ren an föför, lupwen a eäni asor Isaak nöün we won ewe rongen asor? ✧ ²² Ka küna pwe an lükülük me an föför ra angangfengen, nge an lükülük a unusöchüla ren an föför. ²³ Iwe, mine a mak lon ekewe Toropwe mi Pin a pwönüetä, “Apraham a lükü Kot, nge pokiten an lükü a küna pwüing me ren Kot”. Iei mine Apraham a iteni “Chiechien Kot”. ✧ ²⁴ Iei usun oua küna pwe eman aramas a küna pwüing me ren Kot ren an föför, sap ren an lükülük echök.

²⁵ Ina chök usun ren ewe fin lisowu Rahap. Neminei a küna pwüing me ren Kot ren an föför, lupwen a etiwa ekewe chon Israel mi operi ewe fanü o alisiir pwe repwe süla won pwal efoch al. ✧

²⁶ Pun usun eu inis a mäla are ewe ngün esap nom lon, pwal iei usun ewe lükülük a mäla are ese fiti föför.

3

Sipwe tümwünü kapasen awach

3:1-12

¹ Ämi pwii kana, esap chomong me leimi repwe wiseni ewe wisen sense, pun oua silei pwe kich mi wiseni wisen sense sipwe küna kapwüing mi fokun chou lap seni ekewe ekoch. ² Kich meinisin sia mwälila fän chomong. Nge are eman aramas esap fokun mwälila won mine a apasa, i eman mi unusöch, a pwal tongeni püsin nemeni unusen inisin. ³ Lupwen sia uwalong efoch mächä lon awen eman oris pwe epwe aleasochis ngenikich, sia tongeni emwenala ia sia mochen epwe feila ie. ⁴ Sipwe eäni aweve efoch sip. Inamwo ika a fokun watte ewe sip o asepwäl mi pöchökül a afetala, nge eman pölü a kasini ren efoch kasi mi kükün o emwenala ia a mochen epwe feila ie. ⁵ Iei usun pwal ren chönawach. A chök eu kükün kifetin inisich, nge a tongeni sikesik won mettoch mi lapalap.

Oupwe ekieki usun eu kükün ngeten ekkei a tongeni kenala eu wöllap mi watte. ⁶ Iwe, chönawach a pwal usun chök eu ekkei, och mettoch mi ngau lein ekewe kifetin inisich. A alimengaua unusen inisich o küri föförün manauach ren ewe ekkei mi feito seni hell. ⁷ Aramas ra tongeni afesira ekewe sokopaten man meinisin, ekewe manmwacho me ekewe mansüsü, ekewe mantötö me ekewe mönün leset. ⁸ Nge esap wor eman a tongeni afesira chönawen eman aramas. Iei och mettoch mi ngau, esap wor an asösö, a uren poison mi afeiengau. ⁹ Pun ren chönawach sia mwareiti ach Samol, i Samach, nge ren chönawach sia pwal otteki aramas, ir chokewe mi för lon lapalapan Kot. ✧ ¹⁰ Iotek me ottek ra towu seni eu chök aw. Ämi pwii kana, esap öch pwe epwe iei usun! ¹¹ Ifa usun, koluk mi annö me koluk mi maras ra tongeni pupuwu seni eu chök puächen koluk? ¹² Ämi pwii kana, efoch irä fiik esap tongeni uani uän olif, nge efoch irän wain esap tongeni uani uän fiik. Ina usun eu puächen koluk mi maras esap tongeni apupuwu koluk mi annö.

Ewe tipachem seni läng

3.13-18

✧ **2:21:** Ken 22.1-14 ✧ **2:23:** Ken 15.6; 2.Kron 20.7; Ais 41.8 ✧ **2:25:** Jos 2.1-21 ✧ **3:9:** Ken 3.9

¹³ Iö leimi a ekieki pwe a tipachem o mirit? Epwe alletätä ren an manaueni eu manau mi mürina me an föför mürina a föri fän tipetekison me tipachem. ¹⁴ Nge are a wor lon letipemi lolowo me ekieki chök püsin ämi, ousap sikäsini ämi tipachem, ousap pwal amamäsini ewe let. ¹⁵ Ena sokun tipachem esap feitiu seni läng, nge a feito seni fanüfan, seni pekin fituk, pwal seni anün ro chopwak. ¹⁶ Pun ia a wor ie lolowo me ekieki chök en me püsin an, ikenan a pwal wor kotongau me sokun föför mi ngau meinisin. ¹⁷ Nge ewe tipachem seni läng a fokun limelimöch, a pwal akinamwe, tipepwetete me kirikiröch, a uren tong o awora chomong föför mi mürina, esap lifilifil aramas, esap pwal atuputup. ¹⁸ Ekewe chon afisätä kinamwe mi fofot fän kinamwe repwe kini ewe uän pwüing.

4

Chiechi ngeni fanüfan

4.1-10

¹ Ia ra feito me ie fiu me anini lefilemi? Resap feito seni ämi mochenia kana mi fiufengen lon letipemi? ² Oua mochen mettoch, nge esap torikemi. Oua ninni o mochenia, nge ousap tongeni angei met oua mochen. Oua anini o fiu. Ousap eäni mine oua mochen, pun ousap tüngor seni Kot. ³ Nge lupwen oua tüngor, ousap angei och, pun oua tüngor fän ämi ekiek mi ngau, pwe oupwe asolapa lon ämi mocheniangau. ⁴ Ämi aramas mi kirikiringau! Ousap silei pwe chiechi ngeni fanüfan wewen fiu ngeni Kot? Iö a mochen chiechi ngeni fanüfan, i ewe aramas mi fiu ngeni Kot. ⁵ Ousap ekieki pwe a lomotongau mine a mak lon ekewe Toropwe mi Pin, “Ewe ngün Kot a anomu loch a fokun ekimong woch.” ⁶ Nge Kot a awattei ngenikich an ümöümöch. Iei mine a mak lon ekewe Toropwe mi Pin, “Kot a ü ngeni ekewe chon lamalamtekia, nge a ümöümöch ngeni ekewe chon tipetekison.” ✧
⁷ Iei mine oupwe aleasochisi Kot. Oupwe ü ngeni Tefil, iwe, epwe sü senikemi. ⁸ Oupwe arap ngeni Kot, iwe, epwe arap ngenikemi. Oupwe limeti pöümi, ämi chon tipis kana, oupwe limeti lelukemi, ämi chon tipekinikin kana. ⁹ Oupwe letipeta, oupwe kechü o ngüngüres. Oupwe siwili ämi takir ngeni kechü, pwal ämi pwapwa ngeni lolilen! ¹⁰ Oupwe püsin atekisonakemi mwen mesen ach Samol, iwe, i epwe atekiakemiitä.

Kapasen fön pwe sisap apwüngü eman pwiich souläng

4.11-12

¹¹ Ämi pwii kana, ousap aitengauafengenikemi lefilemi. Iö a aitengaua eman pwiin souläng ika apwüngü, a aitengaua o apwüngü ewe Allük. Are ka apwüngü ewe Allük, mürin kosap chüen eman chon aleasochis ngeni, nge ka eman chon apwüngü ewe Allük. ¹² Kot echök ewe mi föri ewe Allük, pwal i ewe souapwüing. I chök a tongeni amanaua o afeiengaua aramas. Nge en iö, pwe kopwe apwüngü chon arum?

Kapasen fön usun sikesisik

4.13-17

¹³ Oupwe aüselingaei, ämi mi apasa, “Ikenai ika lesor sipwe feila lon enan telinimw. Ikenan sipwe nonom eu ier, sipwe föri ach angangen amömö o angei winnach.” ¹⁴ Ämi ousap fen mwo nge silei met epwe fis ngeni manauemi lesor. Pun manauemi a usun chök eu ötütöt mi pwä lon

ekis chök fansoun mochomoch, mürin esap chüen nom. ✧ ¹⁵ Iwe, iei usun mine oupwe apasa, “Are a fän letipen ach Samol, sipwe manau o föri ei ika enan.” ¹⁶ Nge iei oua lamalamtekia o sikesik. Ämi sikesik meinisin a ngau. ¹⁷ Iei mine eman aramas mi silei mine a mürina, nge esap föri, a tipis.

5

Kapasen fön ngeni ekewe chon pisekisek

5.1-6

¹ Iwe, iei oupwe aüselinga, ämi aramas mi pisekisek! Oupwe kechü o ngüngüres usun ekewe riaföü repwe torikemi. ² Pisekimi ra kiroula, nge pwötür ra äni üfemi. ³ Ämi kolt me silifer ra parangela, nge ei parang epwe atipisikemi o änala fitukemi usun chök än ekkei kenala mettoch. Oua achukuchukatä pisekimi lon ekei ränin lesopolan. ✧ ⁴ Ousap ngeni ekewe chon angang mi angang ngeni ämi kewe mälämäl liwinin ar angang. Oupwe aüseling ngeni ar lalangau! Än ekewe chon kini ämi kewe räs siöngau a tori selingen Kot, ewe Samol mi Unusen Manaman. ✧ ⁵ Oua manaueni eu manau mi fokun mecheres won ei fanüfan, oua pwal eäni pwapwan fanüfan. Oua püsin föri met oupwe kitinup ren fän iten ewe ränin ninnila. ⁶ Oua atipisi o niela ekewe aramas esap wor ar tipis, nge ir resap ü ngenikemi.

Usun ach sipwe mosonotam o iotek

5.7-20

⁷ Iei mine ämi pwii kana, oupwe mosonotam tori ach Samol epwe war. Oupwe nenengeni usun än eman chon tanipi mosonotam le witiwiti pwe fanüan epwe awora ua mi fokun aüchea. A mosonotam le witiwit an epwe püngütiu ewe üten leräs me üten lefeng. ⁸ Iei usun pwal ämi, oupwe mosonotam o anüküchara letipemi, pun waren ach Samol a arapoto.

⁹ Ämi pwii kana, ousap lalefengen lefilemi, pwe Kot esap apwüngükemi. Ewe Soukapwünga a ütä arun asam. ¹⁰ Ämi pwii kana, oupwe chechemeni ekewe soufos mi kapas fän iten ach Samol. Oupwe eäniir lenien apirü lon ar mosonotam me likitü fän ekewe riaföü. ¹¹ Sia apasa pwe ir chon feiöch pokiten ar likitü. Oua rongorong usun än Hiop likitü, oua pwal silei met ach Samol a amolätä fän itan lesopolan. Pun ach Samol a uren kirikiröch me tong. ✧

¹² Ämi pwii kana, mwen mettoch meinisin, ousap pwon fän akapel. Ousap ö: pölü läng ika fanüfan ika och mettoch. Are oua apasa “Ewer”, epwe enletin ewer, nge are oua apasa “Apw”, epwe enletin apw, pwe ousap tolong lon än Kot kapwüng. ✧

¹³ Iö me leimi a nom lon weires? Epwe iotek. Iö me leimi a pwapwa? Epwe kölün mwareiti Kot. ¹⁴ Iö me leimi a samau? Epwe titi ekewe souakomwen mwichefel, pwe repwe iotek won o epiti ngeni lö seni föün olif fän iten ach we Samol. ✧ ¹⁵ Iwe, ei iotekin lükülük epwe apöchöküla ewe chon samau. Ach Samol epwe apwäki, nge ekewe tipis a föriir repwe musala. ¹⁶ Iei mine oupwe pwärifengeni ämi tipis kana, eman ngeni eman o iotekifengenikemi, pwe oupwe pöchökületä. Än eman chon pwüng iotek a manaman o a fokun pwönüetä. ¹⁷ Elias eman aramas usun chök

✧ 4:14: SalF 27.1 ✧ 5:3: Mat 6.19 ✧ 5:4: Tut 24.14-15 ✧ 5:11: Hiop 1.21-22; 2.10; Kölf 103.8 ✧ 5:12: Mat 5.34-37 ✧ 5:14: Mark 6.13

kich. A tiliken lon an iotek pwe esap püng üt, iwe, esap püngütiu üt lon ükükün ülüngat esop ier won ewe fanü. ✧ ¹⁸ Mürin a pwal ioteksefäli, iwe, läng a apüngatiu üt o ewe fanü a awora uän irä. ✧

¹⁹ Ämi pwii kana, are eman me leimi epwe tokola seni mine a let, nge eman epwe aliwinisefäli, ²⁰ oupwe chechemeni ei: Iö a aliwinisefäli eman chon tipis seni alan mi mwäl, epwe amanaua ewe chon tipis seni mäla o epwe pwölüela chomong tipis.

Aeuin Toropwe seni Petrus

Kapas akom

I. Chon makkei ei toropwe: Ewe soukünü Petrus.

II. A mak ngeni iö: Ngeni ekewe souläng mi toropasfeil lon Asia Kisikis.

III. Itelapemongen ei toropwe: Än souläng pwora lon riaföü.

IV. Kapas aüchean ei toropwe: Souläng repwe amoleer, pwe repwe eäni ewe sokun ekiek Kraist a eäni lupwen a küna riaföü.

V. Masouen ei toropwe: Iei ewe aeuin toropwe seni Petrus a mak ngeni ekewe souläng, ra pwal iteni “nöün Kot aramas mi fil”, ir chokewe mi toropasfeil efengin ewe kinikinin Asia Kisikis. Aüchean masouen ei toropwe pwe epwe apöchöküla ekewe souläng mi aleani, ra tolong lon ninni me riaföü fänäsengesin ar lükü Jesus. Petrus a achema ngeni ekewe souläng ewe Pworausen Manau usun Jesus Kraist, usun an mäla me manausefäl, pwal usun an pwon pwe epwe liwinsefälito. Iei met repwe apilükülük ngeni. Iei popun repwe likitü lon ar riaföü, pwe epwe pwä enletin ar lükülük, repwe pwal angei liwiniir lon “ewe Rän lupwen Jesus Kraist epwe pwä.”

Me lükün an kei kapasen apöchökül lon fansoun riaföü, Petrus a pwal pese ngeni ekewe souläng, pwe repwe manaueni eu sokun manau mi fich ngeni nöün Kraist aramas.

VI. Tettelin masouen ei toropwe:

Kapas akom 1.1-2

Kapas achem usun än Kot angangen amanaua aramas 1.3-12

Kapasen fön pwe repwe manaueni eu manau mi pin 1.13-2.10

Met souläng repwe föri lon fansoun riaföü 2.11-4.19

Än souläng tipetekison me ar angang 5.1-11

Kapasen lesopolan 5.12-14

Kapong

1.1-2

¹ Ngang Petrus nöün Jesus Kraist we soukünü, üa kapong ngeni nöün Kot kewe aramas mi fil, ir choisä mi toropasfeil lon ekewe fanü Pontus, Kalatia, Kapatosa, Asia me Petinia. ² Ämi oua fil me ren Samach Kot, pun iei usun letipan, Ngünmifel a apinikemi pwe oupwe aleasochisi Jesus Kraist o küna limöch ren chaan. Ümömöch me kinamwe epwe chomongola remi.

Eu apilükülük mi manau

1.3-12

³ Ousipwe mwareiti Kot ewe Semen ach Samol Jesus Kraist! Pun lon an tong mi lapalap a aupusefälikich ren än Jesus Kraist manausefäl seni mäla. Ei a aurakich ren eu apilükülük mi manau, ⁴ pwe sipwe feiöchüni och feiöch esap morola, esap tikipwül, esap pwal aiolol, a iseis lon läng fänäsengesimi. ⁵ Ekei feiöch ra fän itemi. Ren ämi lükülük oua küna tümwün ren än Kot manaman tori oupwe küna ewe manau mi molotä pwe epwe pwäla lon fansoun sopolan.

⁶ Oupwe fokun pwapwa ren ekei feiöch, inamwo ika oua küna letipeta iei lon fansoun mochomoch chök pokiten chomong sokun sosot oua riaföü ren. ⁷ Popun ämi tonglon lon sosot, pwe epwe pwä enletin ämi lükülük. Kolt mi tongeni tala, nge a ketel lon ekkei pwe epwe pwä ewe enletin kolt. Iei usun ämi lükülük mi aüchea seni kolt epwe fokun küna sosot, pwe epwe nükücharala. Mürin oupwe küna iteüöch me ling me itetekia lon ewe Rän lupwen Jesus Kraist epwe pwä. ⁸ Ämi oua echeni Jesus, inamwo ika ousap fen küna i, oua lükü i, inamwo ika ousap küna i iei. Iei mine oua fokun pwapwa, ren sokun pwapwa esap naf lon ach kapas ach sipwe pwärätä, pun pwapwa mi ling, ⁹ pun oupwe küna sopolan ämi lükülük, iei manauen ngünümi.

¹⁰ Ekewe soufos ra achocho le küttaöchü pwe repwe silei usun ei manau. Ra osuni usun ei lifang Kot epwe ngenikemi. ¹¹ Ra küttafichi inet fansoun me lapalapen an epwe feito. Iei ewe fansoun ewe Ngünün Kraist mi nom lor a itini lupwen ra kapas usun ekewe riaföü Kraist epwe tolong lon, pwal usun ewe ling epwe tori me mürin. ¹² Kot a pwäri ngeni ekei soufos, pwe ar angang esap fän iten püsin ar feiöch, nge fän iten ämi feiöch, lupwen ar kapas usun ekewe mettoch oua rongorong iei seni ekewe chon künö mi aronga ngenikemi ewe Pworausen Manau ren manamanen Ngünmifel mi titito seni läng. Ikkei ekewe mettoch ekewe chon läng mwo nge ra mochen weweiti.

Kot a körikich ngeni eu manau mi pin

1.13-25

¹³ Iei mine oupwe amolätä ekiekimi ngeni ei angang. Oupwe püsin tümwünükemi o fokun anomu ämi lükülük won ewe feiöch epwe torikemi lupwen Jesus Kraist epwe pwäto. ¹⁴ Oupwe aleasochis ngeni Kot. Ousap mwüt ngeni manauemi epwe nom fän nemenien ekewe mocheniangau oua eäni me lom lupwen ousap mwo silei Kot. ¹⁵ Nge oupwe pin lon mettoch meinisin mine oua föri, usun chök Kot, ewe mi körikemi, a pin. ¹⁶ Pun a mak lon ekewe Toropwe mi Pin, “Oupwe pin, usun ngang üa pin.” ☆

¹⁷ Lupwen oua iotek ngeni Kot, oua aita ngeni i Samach, i ewe mi apwüngü aramas meinisin won ükükün mine eman me eman a föri, nge esap liflifil. Iei mine lon fansoun ämi manau won ei fanüfan oupwe asamolu o meniniti i. ¹⁸ Pun oua silei pwe ousap mö ren mettoch mi morokai usun silifer ika kolt pwe oupwe ngas seni ewe manau mi lomotongau oua angei me ren ämi kewe lewo, ¹⁹ nge oua mö ren chaan Kraist mi aüchea, i eman lam esap wor terin are lapalapangauan. ²⁰ Kraist a fen fil me ren Kot mwen esamwo fis fanüfan, nge a pwä lon fansoun sopolan fänäsengesimi. ²¹ Pokiten Kraist oua lükü Kot, ewe mi amanauasefäli i seni mäla o ngeni lingan. Iei mine ämi lükülük me ämi apilükülük a nom won Kot.

²² Iwe, pokiten oua alimöchükemi ren ämi aleasochisi mine a let o oua eäni tong enlet ngeni pwiimi kewe souläng, oupwe wesewesen echenifengenikemi ren unusen lelukemi. ²³ Pun oua upsefäl ren Kapasen Kot mi manau o nonom tori feilfeilachök, usun nau nöün eman mi manau tori feilfeilachök, nge sap nöün eman mi mäla. ²⁴ Pun iei usun mine a mak lon ekewe Toropwe mi Pin, “Aramas meinisin ra wewe ngeni fetil,

☆ 1:16: Lif 11.44-45; 19.2

nge linge meinsin ra wewe ngeni pön irä.
 Ewe fetil a pwasala, nge ekewe pön irä ra mworotiu.
²⁵ Nge än ewe Samol kewe kapas repwe nonom tori feilfeilachök.” Ei
 kapas iei ewe Pworausen Manau ra aronga ngenikemi. ✧

2

Ewe Fau mi Manau me ewe Mwü mi Pin 2.1-10

¹ Iei mine oupwe pöütala sokun föför mi ngau meinsin. Ousap chüen
 eäni kapas chofona, ika angangen atuputup, ika lolowo, ika eäni kapasen
 turunufas. ² Oupwe usun chök ekewe mönükol mi upufö, fansoun
 meinsin oupwe fokun moneti ewe chönün oup mi wewe ngeni Kapasen
 Kot, esap nofit ngeni och, pwe ren ämi ün oupwe mämäritä o küna manau.
³ Usun a mak lon ekewe Toropwe mi Pin, “Ämi oua püsin neni pwe ewe
 Samol a kirikiröch.” ✧

⁴ Oupwe feito ren ach we Samol, i ewe fau mi manau, aramas ra
 pöütala, pun resap aücheani, nge a fil o aüchea me ren Kot. ⁵ Pwal ämi oua
 usun chök fau mi manau. Oupwe mwüt ngeni Kot pwe epwe aükemiitä,
 pwe oupwe eu imwen ngün, ia oupwe angang ie lon wisen souasor mi
 pin, pwe oupwe eäni sokun asor Ngünmifel a tipeni, Kot a etiwa ren
 Kraist. ⁶ Pun iei mine a mak lon ekewe Toropwe mi Pin,

“Üa filätä eföü fau mi fokun aüchea,
 üa anomu lon Sion,

pwe epwe eföü föün lepwokuku.

Ió a lükü i esap fokun lichipüng.” ✧

⁷ Ei fau a fokun aüchea fän itemi mi lükü. Nge fän iten chokewe resap
 lükü:

“Ewe fau ekewe chon kaü imw ra pöütala, pun resap aücheani,
 a wiliti ewe fau mi aüchea seni meinsin.” ✧ ⁸ A pwal mak,

“Iei ewe fau aramas repwe chepetek won,

eu achau mi afisätä än aramas repwe turula won.” Repwe chepetek,
 pun resap aleasochisi ewe kapas, pwe iei usun mine Kot a akota
 fän iter. ✧ ⁹ Nge ämi eu ainang mi fil, eu mwichen souasor än
 ewe king, eu mwün aramas mi pin, nöün Kot kewe aramas, oua
 fil pwe oupwe arongafeili än Kot kewe föför mi manaman, i ewe
 mi körikemiiwu seni rochopwak, pwe oupwe tolong lon an saram
 mi amwarar. ✧ ¹⁰ Me lom ousap nöün Kot aramas, nge ikenai oua
 nöün. Me lom ousap angei än Kot ümöümöch, nge ikenai oua angei
 an ümöümöch. ✧

Nöün Kot chon angang

2.11-17

¹¹ Ämi chiechiei mi achengicheng, üa tüngormau ngenikemi usun ämi
 chon ekis me choisä won ei fanüfan, ousap apwönüetä ekewe mochenian
 fituk mi fiu ngeni ngünümi. ¹² Oupwe eäni föföröch lein ekewe chon lükün
 lamalam, pwe lupwen repwe atipisikemi pwe oua föri föför mi ngau,
 repwe küna ämi föför mürina o mwareiti Kot lon ewe Rän epwe wareto
 lon.

✧ 1:25: Ais 40.6-8 ✧ 2:3: Kölf 34.8 ✧ 2:6: Ais 28.16 ✧ 2:7: Kölf 118.22 ✧ 2:8: Ais
 8.14-15 ✧ 2:9: Eks 19.5-6; Ais 43.20-21; Tut 4.20; 7.6; 14.2; Tit 2.14; Ais 9.2 ✧ 2:10: Os 2.23

¹³ Fänäsengesin ach we Samol oupwe aleasochisi nöüwisen ekewe mwü: Oupwe aleasochisi ewe king, pun i ewe samol mi lap, ¹⁴ pwal ngeni ekewe kepina, i a awiser pwe repwe apwüngü chokewe mi föföringau o aitöchü chokewe mi föri mine a mürina. ¹⁵ Pun iei letipen Kot, pwe ren ämi föföroch oupwe aukätü an ekewe chon tiparoch kapasen miritimang. ¹⁶ Oupwe manau usun aramas mi ngas, nge ousap aea ämi ngas le pwöülüela ämi föföri mi ngau, pwe oupwe manau usun nöün Kot chon angang. ¹⁷ Oupwe meniniti aramas meinisin, oupwe echeni chienemi kewe souläng, oupwe niuokusiti Kot o sufölitu ewe king.

Än Kraist riaföü eu lenien apirü fän itach

2.18-25

¹⁸ Ämi chon amanau, oupwe aleasochisi ämi kewe masta o meninitiir, sap ngeni chök chokewe mi eäni kirikiröch me tipepwetete, nge pwal ngeni chokewe mi tipepöchökül. ¹⁹ Kot epwe afeiöchükemi are oupwe anomukemi fän weiresin ekewe riaföü esepwüng, pokiten oua mefi pwe iei letipen Kot. ²⁰ Pun met lomotan ngenikemi are oupwe likitü lupwen ra wichikemi ren ämi föri föföri esepwüng? Nge are oua likitü fän ämi riaföü lupwen oua föri mine a pwüng, Kot epwe afeiöchükemi. ²¹ Pun iei mine Kot a körikemi ren, pun Kraist a pwal riaföü fänäsengesimi o likiti ngenikemi eu lenien apirü, pwe oupwe tapwela mürin lon ipwan. ²² Esap föri och tipis, esap wor eman a rongorong eu kapas chofona seni lon awan. ✧ ²³ Lupwen ra kapasingau usun esap pwal pölüeni lon kapas mi ngau. Lupwen aramas ra ariaföüü esap pwal eniweer, nge a anomu an apilükülüköch won Kot ewe soukapwüng mi eäni pwüng lon kapwüng. ✧ ²⁴ Kraist a püsün uwei ach kewe tipis won inisin o uweiretä won ewe iräpenges, pwe kich sipwe mäla seni tipis o manau ngeni pwüng. Ren an kinas kana sia küna pöchökül. ✧ ²⁵ Pun me lom oua wewe ngeni sip kana mi mwalechela, nge ikenai oua liwinsefäl ngeni ewe Chon Fol me Chon Masa ngünümi. ✧

3

Pwüngün lefilen pwüpwülü

3.1-7

¹ Pwal ina usun ämi fefin kana, oupwe fokun aleasochisi pwülüemi kana, pun ika ekoch me leir resap lükü an Kot kapas, repwe tongeni lükü Jesus ren ämi föföri. Ousap wisen apasatä och kapas, ✧ ² pun repwe chök soulängila ren ar küna ämi föföri mi limöch me ämi sile menin. ³ Ousap eäni fouten lükün, pwe oupwe liöch ren sokun firesin möküemi are mwärimi mwärämwär kolt are sokopaten uf oua üföüf. ✧ ⁴ Nge ämi liöch epwe pwä ren mine a nom lon letipemi, iei eu liöch esap fokun tongeni siwil, a wor ren eman aramas mi tipemecheres o lukpwetete. Ei sokun liöch a fokun aüchea mwen mesen Kot. ⁵ Pun iei usun ekewe fefin mi pin me lom ra anomu ar apilükülük won Kot. Ar liöch a fis ren ar aleasochisi pwülüer kana, ⁶ usun Sara a aleasochisi Apraham o aita ngeni an samol. Ämi oua nöün Sara fefin are oua föri mine a mürina, nge ousap niuokusiti och. ✧

⁷ Ina usun pwal ämi mwän kana, oupwe nonom ngeni pwülüemi kana fän mirit, pun inisiir a apwangapwang mwen inisimi. Oupwe meninitiir,

pun pwal ir repwe angei än Kot we lifangen manau usun chök ämi. Oupwe föri iei usun, pwe esap wor och mine epwe epeti ämi iotek. ✱

Riaföü fän iten föri mine a pwüung

3.8-22

⁸ Iwe, iei sopolan mine üa mochen ürenikemi: Oupwe eänifengeni eu chök tip me eu chök memef. Oupwe echenifengenikemi lefilemi usun chök pwipwi, oupwe eäni kirikiröch o tipetekisonfengen lefilemi. ⁹ Ousap liwini ngau ngeni ngau are ottek ngeni ottek, nge oupwe afeiöchüür, pun Kot a köríkemi ämi oupwe föri iei usun, pwe oupwe angei eu feiöch. ¹⁰ Pun iei usun a mak lon ekewe Toropwe mi Pin,

“Iö a mochen an epwe pwapwaiti manau

o küna feiöch lon manauan,

esap fokun chüen apasa kapas mi ngau,

nge epwe ükütiu le kapas chofona.

¹¹ Epwe fokun kul seni mine a ngau o föri mine a mürina,

epwe fokun kütta kinamwe ren unusen lelukan.

¹² Pun ewe Samol a amanaua ekewe chon pwüung,

a rongorong ngeni ar iotek,

nge a ü ngeni chokewe mi föri mine a ngau.” ✱

¹³ Iö epwe tongeni afeiengauakemi are oua achocho le föri mine a mürina? ¹⁴ Nge are oupwe fen küna riaföü pokiten ämi föri mine a pwüung, oupwe feiöch. Ousap niuokusiti aramas, ousap öürek. ¹⁵ Oupwe meniniti Kraist lon lelukemi, oupwe asamolu i, pun i ämi Samol. Oupwe molotä fansoun meinisin pwe oupwe pölüeni chokewe mi aisinikemi, pwe oupwe awewe ngeniir usun ewe apilükülük oua eäni, ✱ ¹⁶ nge oupwe kapas ngeniir fän pwetete me menin. Oupwe tümwünü pwe esap wor mengiringirin letipemi, pwe chokewe mi kapas ingau usun ämi föför mürina pokiten oua tapwela mürin Kraist, repwe säw ren ar kapasen esitakemi. ¹⁷ Are iei letipen Kot pwe oupwe küna riaföü, a fen öch ämi oupwe riaföü fän iten ämi föför mürina, nge sap fän iten ämi föföringau. ¹⁸ Pun Kraist a mäla fän iten tipis fän eu chök, nge a naf ngeni fansoun meinisin, ewe chon pwüung fän iten ekewe chon tipis, pwe epwe emwenikich ngeni Kot. A mäla lon inisin, nge a manausefäl lon ngünün. ¹⁹ Iwe, lon ngünün a feila o afalafala ekewe ngün mi nom lon fötek. ²⁰ Ikei ir ngünün chokewe mi aleasolap ngeni Kot, lupwen a witiwit lon an mosonotam lon ekewe rän, lupwen Noa a föri ewe waimw. Ekoch chök aramas, fokun waluman chök, ra nonom lon ewe waimw o küna manau seni ewe koluk. ✱ ²¹ Ei koluk eu liosun papatais mi amanauakemi iei. Esap limetala pwülün inis, nge eu pwon ngeni Kot oua eäni seni eu mwelien letipemi mi limöch. Iwe, a amanauakemi ren än Jesus Kraist manausefäl, ²² i ewe mi feitä läng, a nonom lepelifichin Kot o a nemeni ekewe chon läng meinisin, pwal ekewe ngün mi wor ar nemenem me manaman.

4

Manauen souläng mi akasiwil

4.1-6

¹ Iwe, pokiten Kraist a riaföü lon inisin, iei mine oupwe pwal amolakemi pwe oupwe eäni ewe sokun ekiek Kraist a eäni, pun eman mi

✱ 3:7: Ef 5.25; Kol 3.19 ✱ 3:12: Kölf 34.12-16 ✱ 3:15: Mat 5.10; Ais 8.12-13 ✱ 3:20: Ken 6.1-7.24

riaföü lon inisin esap chüen föföri tipis. ² Iei mine seni ikenai tori ekewe lusun räⁿin manauemi oupwe manaueni eu manau mi nom fän nemenien letipen Kot, nge esap nom fän nemenien mochenian fituk. ³ Pun lon ewe fansoun a la a naf fansoun ämi föri mine ekewe chon lükün lamalam ra pwapwa le föri. Oua föri föfö^rün lisowu, mocheisou, ünüpuch, mongö^mong, mwichen ün sakau me angangen fel ngeni anümwäl mi anioput. ⁴ Nge iei ekewe chon lükün lamalam ra weitifengeniir pwe ousap chüen etiir lon ewe sokun föfö^r mi anioput ra manau lon, iei mine ra turunufaseikemi. ⁵ Nge ir repwe püsin peniir me mwen Kot usun meⁿisin mine ra föri. Kot ewe mi molotä an epwe apwü^{ng}ü chon manau me chon mäla kana. ⁶ Iei popun ewe Pworausen Manau a pwal arongfeil ngeni ekewe mi mäla, ngeni chokewe mi fen küna apwü^{ng} lon pekin inisiir usun chök aramas meⁿisin, nge lon pekin ngünür repwe manau usun Kot a manau.

Sipwe souwaöchü än Kot kewe lifang

4.7-11

⁷ Iwe, a arapoto sopolan mettoch meⁿisin. Iei mine oupwe püsin nemeni letipemi o mamasakemi, pwe epwe tongeni fis ämi iotek. ⁸ Nge mwen mettoch meⁿisin oupwe tupwöl le echenifengenikemi lefilemi, pun chen a pwölüela chomong tipis. ✧ ⁹ Oupwe eti^wafengenikemi lefilemi, nge ousap lal ren. ¹⁰ Ämi meⁿisin oua angei en me an lifang, oupwe aea fän iten chienemi usun nöün Kot kewe chon souwani ekewe sokopaten lifang. ¹¹ Are eman a afalafal, epwe fokun afalafala än Kot Kapas. Are eman a alisi aramas, epwe allis lon ükükün an pö^hökül Kot a ngeni lon ewe angang, pwe lon mettoch meⁿisin Kot epwe küna ling ren Jesus Kraist, ewe mi eäni ling me manaman tori feilfeilachök. Amen.

Lapalapen manauen souläng lon ar riaföü

4.12-19

¹² Ämi chienei mi achengicheng, ousap weitifengenikemi ren pwichikaren ewe riaföü a torikemi, pwe oupwe sosot ren. Ousap ekieki pwe iei och mine esap öch ngenikemi. ¹³ Nge oupwe pwapwa pwe oua eti Kraist lon an riaföü, pwe oupwe pwal uren pwapwa lupwen an ling epwe pwä. ¹⁴ Oua feiöch are oua küna turunufas pokiten ämi tapwela mürin Kraist, pun ewe Ngünün ling, Ngünün Kot epwe nonom lomi. ¹⁵ Are eman me leimi a küna riaföü, esap itä pokiten i eman chon niela aramas, ika eman chon solä, ika eman chon föfö^ringau, ika eman chon etilepat. ¹⁶ Nge are eman a küna riaföü pokiten an souläng, esap säw ren, nge epwe kilisou ngeni Kot pwe a uwou iten Kraist. ¹⁷ A tori ewe fansoun pwe Kot epwe popuetä le eäni kapwü^{ng}, nge epwe akomwen popuetä won nöün Kot aramas. Iwe, are epwe popuetä rech, epwe ifa usun sopolan chokewe resap aleasochisi ewe Pworausen Manau seni Kot? ¹⁸ Pun iei usun mine a mak lon ekewe Toropwe mi Pin,

“A men weires fän iten ekewe chon pwü^{ng} ar repwe küna manau,

nge epwe fen ifa usun ren ekewe aramasangau me ekewe chon tipis?” ✧ ¹⁹ Iei mine chokewe mi küna riaföü pokiten iei letipen Kot ngeniir, repwe atolonga manauer lepöün ewe Chon Föriir mi allükülük o sopwela le föri mine a mürina.

5

*Nöün Kot mwichen sip**5.1-11*

¹ Ngang pwal eman souakom üa pesei ekewe souakom me leimi lon ämi kewe mwichefel. Ngang eman chon pwärätä usun än Kraist riaföü, üpwe pwal angei wisei lon ewe ling epwe pwä. Iwe, üpwe pesekemi ² pwe oupwe tümwünü ewe mwichen sip Kot a ngenikemi, pwe oupwe foleniir ren unusen letipemi, pun iei usun met Kot a mochen pwe oupwe föri, nge esap me lükitemi. Oupwe föri ämi angang, sap fänäsengesis ämi chök mochen angei liwin, nge seni wesewesen ämi mochen föri ewe angang. ✧ ³ Ousap nemenemengau ngeni chokewe mi nom fän ämi tümwün, nge oupwe eu lenien apirü ngeni ewe mwich. ⁴ Iwe, lupwen ewe Meilapen Chonmas epwe pwä, oupwe angei ewe mwärämwär mi ling esap fokun aiolol.

⁵ Ina usun pwal ämi alüal kana, oupwe aleasochisi ekewe chinlap. Ämi meinisin oupwe fokun eäni tipetekison lon ämi alilifengen lefilemi. Pun a mak lon ekewe Toropwe mi Pin, “Kot a ü ngeni chon lamalamtekie kana, nge a ümömöch ngeni chon tipetekison kana.” ✧ ⁶ Iei mine oupwe atekisonakemi fän pöün Kot mi manaman, pwe epwe atekiakemi lon an fansoun mi fich. ✧ ⁷ Oupwe likiti ngeni Kot ämi öürek meinisin, pun i a ekieki met oupwe feiöch ren.

⁸ Oupwe amolakemi o mamasa, pun Tefil, ewe chon oputakemi, a fetalfeil usun eman laion mi wörüwör, nge a kütta iö epwe oromala. ⁹ I ewe oupwe ü ngeni, oupwe nüküchar lon ämi lükülük, pun oua silei pwe pwiimi kewe souläng won unusen fanüfan ra nonom lon ewe chök sokun riaföü. ¹⁰ Nge mürin ämi küna riaföü lon fansoun mochomoch, ewe Koten ümömöch meinisin mi körikemi pwe oupwe eti lon an ling esemüch lon Kraist, i epwe püsin aunusöchükemiila, epwe anükücharakemi o apöchöküla letipemi, pwe oupwe nük lon ämi lükü Kraist. ¹¹ Manaman a nonom ren i tori feilfeilachök. Amen.

*Kapongen lesopolan**5.12-14*

¹² Üa makkei ei toropwe mi mochomoch ngenikemi ren än Silas alisie, ätewe üa silei pwe i eman pwiich souläng mi allükülük. Üa mochen apöchöküla letipemi o pwäri ngenikemi, pwe iei enletin än Kot ümömöch. Oupwe nüküchar lon. ✧

¹³ Ewe mwichefel lon Papilon mi usun chök eman pwiimi, a pwal fil me ren Kot, a kapong ngenikemi, pwal nei we Markus. ✧ ¹⁴ Oupwe kapongfengen lefilemi ren ewe kapongen souläng mi wor tong lon. Kinamwe epwe nonom remi meinisin mi nonom lon Kraist.

Aruöchön Toropwe seni Petrus

Kapas akom

I. Chon makkei ei toropwe: Ewe soukünü Petrus.

II. A mak ngeni iö: Eli a mak ngeni ekewe souläng lon Asia Kisikis.

III. Itelapemongen ei toropwe: Kapasen föñ fän iten ekewe chon afalafal chofona me ekewe chon turunufas.

IV. Kapas aüchean ei toropwe: Souläng repwe mämäritä lon ümöömöch, pwal lon ar silei Kraist.

V. Masouen ei toropwe: Ei aruaöchön toropwe seni Petrus a mak ngeni chomong souläng lon ewe fansoun. Popun an makkei ei toropwe pwe epwe ü ngeni angangen ekewe chon afalafal chofona me ekewe sokun föfö: mi ngau ra pop seni ei sokun afalafal. Pöüen ekei osukosuk a pwä ren ach amwöchünükü ewe enletin silei Kot me ach Samol Jesus Kraist. Ekewe aramas mi fen küna Jesus o rongorong an afalafal ra fen apworausä ei sokun silei. Petrus a fokun ekiiki usun än chokewe afalafal pwe Kraist esap liwinsefäl. A apasa pwe än Kraist liwinsefäl a mang pokiten Kot “esap mochen pwe eman epwe pöümwälila, nge a fen mochen pwe meinisin repwe ekiexsefäl.”

VI. Tettelin masouen ei toropwe:

Kapas akom 1.1-2

Mine ekewe souläng ra kö ngeni 1.3-21

Ekewe chon afalafal chofona 2.1-22

Än Kraist liwinsefäl lon ewe fansoun lesopolan 3.1-18

Kapong

1.1-2

¹ Ngang Simon Petrus, eman nöün Jesus Kraist chon angang me soukünü, üa kapong ngeni ämi mi angei eu lükülük mi aüchea usun chök äm ren än ach Kot me Chon Amanau Jesus Kraist pwüñg. ² Ümöömöch me kinamwe epwe chomongola remi ren ämi silei Kot me Jesus ach Samol.

Än Kot kö me an fil

1.3-15

³ Än Kot manaman mi pin a fen fang ngenikich meinisin mine a lomot ngeni ach manaueni eu manauen souläng mi enlet ren ach silei i, ewe mi körikich pwe sipwe angei wisach lon an we ling me kirikiröch. ⁴ Ren ei lapalap a fen fang ngenikich ekewe feiöchün pwon mi fokun watte o aüchea, pwe ren ekei feiöch oupwe tongeni sü seni mochenian ei fanüfan mi afeiengau o oupwe tongeni angei sokun Kot. ⁵ Iwe, iei popun oupwe achocho le apachata manauöch ngeni ämi lükülük, silelap ngeni ämi manauöch, ⁶ ämi tufuchin püsin nemeni inisimi ngeni silelap, soulängöch ngeni ämi tufichin püsin nemeni inisimi, tipeppos ngeni ämi soulängöch, ⁷ ämi tongei pwimi souläng ngeni tipeppos, chen ngeni ämi tongei pwimi souläng. ⁸ Ikkei ekewe mettoch epwe wor remi, nge are a wor chomong remi, epwe fis ämi mwökütöch me lipwäköch lon ämi silei ach Samol Jesus Kraist. ⁹ Nge are ekei mettoch esap wor ren eman, ätewe a nenengau o chun, iwe, a manlükala pwe a fen limöch seni an kewe tipis a föri me lom.

¹⁰ Iei mine ämi pwii kana, oupwe fokun achocho le anüküchara ämi kö me fil, pun are oupwe föri iei usun, ousap fokun tur lon tipis. ¹¹ Ren ei oupwe fokun angei ewe pwüüng pwe oupwe tulong lon ewe Mwü esemüch än ach Samol me Chon Amanau Jesus Kraist.

¹² Iei usun üpwe achema ngenikemi ekei mettoch fansoun meinisin, inamwo ika oua fen silei usur, oua pwal nüküchar lon ewe kapas mi let oua fen rongorong. ¹³ Üa ekieki pwe a chök pwüüng ngeniei ai üpwe achema ngenikemi usun ekei mettoch lon ükükün fansoun üa chüen manau. ¹⁴ Üa silei pwe epwe fisikai ai üpwe mäla usun ach Samol Jesus Kraist a fen asile ngeniei. ¹⁵ Iei mine üpwe achocho ngeni ai üpwe alisikemi, pwe oupwe chechemeni ekei mettoch fansoun meinisin mürin ai mäla.

Pworausen chokewe mi küna än Kraist we ling

1.16-21

¹⁶ Äm aisap longolong won ekewe pworaus aramas ra afisätä, lupwen aia aronga ngenikemi usun manamanen ach Samol Jesus Kraist lon ewe fansoun epwe liwinsefäl. Äm aia küna ren püsin mesem an we ling mi lapalap. ¹⁷ Äm aia nom ren, lupwen Saman Kot a ngeni iteüöch me ling. Lon ena fansoun eu möngüngü a tori i seni ewe mi Unusen Ling a apasa, “Iei i nei mi achengicheng üa fokun pwapwa ren.” ¹⁸ Püsin äm aia rongorong ei möngüngü mi feito seni läng, lupwen aia nom ren won ewe chuk mi pin. ✱

¹⁹ Iei mine aia fokun apilükülükü ekewe kapas ekewe soufos ra aron-gafeili. A men öch ngenikemi pwe oupwe tümwünüöchü, pun a usun chök eu lamp mi tittin lon eu leni mi rochopwak tori an epwe ränila o ewe füün rän epwe tin lon letipemi. ²⁰ Nge mwen mettoch meinisin oupwe chechemeni, pwe esap wor eman epwe püsin tongeni awewei eu kapasen osuni me lon ekewe Toropwe mi Pin. ²¹ Pun esap wor och kapasen osuni a feito seni letipen aramas, nge ekewe aramas ra nom fän nemenien ewe Ngünmifel ra apasätä ewe kapas a feito seni Kot.

2

Ekewe chon afalafal chofona

2.1-22

¹ Nge mi pwal wor soufos chofona me lein ekewe aramas me lom, pwal ina chök usun epwe pwal wor chon afalafal chofona leimi. Repwe atolonga sokun afalafal mi afeiengau o chofona, repwe amamäsini ewe Samol mi angaseur seni tipis. Iwe, repwe püsin atoto wor feiengau mi fisikai. ² Iwe, chomong aramas repwe apirü ar föföri mi fokun ngau. Nge pokiten mine ra föri, ekoch aramas repwe kapasingau usun ewe Al mi Let. ³ Lon ar tipemong ekei chon afalafal chofona ra angei ar win ren ar aronga ngenikemi pworaus ra püsin afisätä. Fansoun langatam tori iei, Kot nöür we soukapwüüng, ewe Chon Afeiengaeer, a fen molotä o a chök nenela pwe epwe apwüüngüür.

⁴ Pun Kot esap achika ekewe chon läng mi tipis, nge a atururelong lon hell, ewe ia ra fötek ie lon rochokichin rochopwak o witiwiti ewe Ränin Kapwüüng. ⁵ Kot esap achika ewe fanüfan me lom, nge a aworato ewe noter won ekewe aramas resap meniniti i. A chök amanaua Noa ewe

✱ 1:18: Mat 17.1-5; Mark 9.2-7; Luk 9.28-35

chon afalafala usun pwüing me pwal füman aramas. ✧ ⁶ Kot a apwüingü ekewe telinimw Sotom me Komora o atarela ren ekkei. A föri pwe ir eu lenien eniweniw ngeni chokewe resap meniniti Kot. ✧ ⁷ A amanaua Lot eman aramas mi pwüing, a fokun riaföü ren ekewe föföör mi fokun ingau än ekewe aramas mi ngau. ✧ ⁸ Ei aramas mi pwüing a nonom leir, iteiten rän a fokun riaföü lon letipan, lupwen a küna o rongorong usun ar föföör mi ngau. ⁹ Ekei pworaus ra aiti ngenikich, pwe ewe Samol a silei usun an epwe amanaua ekewe aramas mi likitü lon ar lükü seni sosot, nge epwe amwöchü ekewe chon föfööringau ngeni ewe Ränin Kapwüing, pwe epwe apwüingüür. ¹⁰ Ei epwe fokun fis ngeni chokewe mi apwönüetä mochenian fituker mi fokun ingau o turunufasei än Kot nemenem.

Ekei chon afalafal mi chofona ra lamalamtekia o üleförea, resap meniniti ekewe meilap lon läng mi wor ar ling, nge ra kapasingau usur. ¹¹ Pwal mwo nge ekewe chon läng mi watte ar pöchökül me manaman seni ekei chon afalafal mi chofona resap apasa och kapas mi ngau usur mwen mesen ewe Samol. ¹² Nge ekei mwän ra sokuni sokun man lon ar föföör, ra usun chök ekewe manmwacho mi uputiü pwe aramas repwe liapeniir o niirela. Ra eäni kapas ingau usun ekewe mettoch resap weweiti. Iwe, repwe ninnila usun ekewe manmwacho, ¹³ repwe angei liwiniir sokun riaföü ra ariaföüü ngeni aramas. Ra chök pwapwaiti ar repwe momongö o ükün lon ar kametip le rän. Ra eu minen asäw me itengau lupwen ra etikemi le mongö, nge ra pwal pwapwaiti ar kewe föföörün likatuputup. ¹⁴ Ra chök mochen nenengeni ekewe fin lisowu, resap fokun ükütiü le föri föföör mi ngau. Ra atupu ekewe aramas mi apwangapwang lon ar lükü pwe repwe tipis. Ra sipeöch lon ar tipemong. Ra nom fän än Kot anümamau! ¹⁵ Ra tokola seni ewe al mi wenechar o mwalechela. Ra apirü föföörün Palam nöün Peor we mi echeni ewe moni epwe angei seni an föri mine a ngau, ¹⁶ iwe, a küna apwüing fän iten an tipis. Nöün we aas a kapas ngeni lon möngüingün eman aramas o aükätiü än ewe soufos föföör mi umwes. ✧

¹⁷ Ekei mwän ra usun chök chönüttu esor koluk lon, ra usun chök kuchu mi ässila ren eu mölümöl. Kot a amolätä fän iter eu leni mi fokun rochokich. ¹⁸ Ra lamalamtekia lon ar apasatä kapas mi pön o aea sokun mochenian fituk mi ngau le atupu chokewe mi kärän sü seni ekewe aramas mi manaueni ei manau mi mwäl. ¹⁹ Ra pwon ngeniir ar repwe ngasala, nge püsin ir ra nom fän nemenien ekewe föföör epwe afeiengauer. Pun eman aramas a nom fän nemenien ewe mettoch a kuf ren. ²⁰ Are aramas ra sü seni limengauen tipisin ei fanüfan ren ar silei ach Samol me Chon Amanau Jesus Kraist, nge mürin ra tupusefäliilong lon o kuf rer, ekei sokun aramas repwe feiengau lesopolan lap seni lepoputän. ²¹ Epwe fen öch ngeniir ar resap silei ewe alen pwüing, lap seni ar repwe silei, nge mürin ra kul seni ewe allük mi pin a toriir. ²² Met a fis ngeniir a pwärätä pwe ekei mwiitun ra let: “Eman kolak a änisefäli mine a musäsınawu”, pwal “Eman pik mi fen limöch a liwinsefäli ewe pokak o asokopöla lon.” ✧

3

Ewe kapasen pwon usun än ewe Samol liwinsefäl 3.1-18

✧ 2:5: Ken 6.1-7.24 ✧ 2:6: Ken 19.24 ✧ 2:7: Ken 19.1-16 ✧ 2:16: Num 22.4-35 ✧ 2:22: SalF 26.11

¹ Iwe, ämi chiechiei mi achengicheng, iei aruachön nei toropwe ngenikemi. Lon ekei ruochö toropwe üa sotuni ai üpwe amwökütü ekewe ekiek mi limöch lon letipemi ren ai achema ngenikemi ekei mettoch. ² Üa mochen pwe oupwe chechemeni ekewe kapas soufos mi pin ra apasatä me lomlom, pwal ekewe allük me ren ach Samol me Chon Amanau nöümi kewe soukünü ra aronga ngenikemi. ³ Me mwen mettoch meinisin oupwe fokun weweöchiti pwe lon ekewe ränin lesopolan ekoch aramas repwe pwä, manauer a nonom fän nemenien püsin ar mocheni-angau. Repwe takirikemi ⁴ o apasa, “A pwon pwe epwe liwinsefälito. Iwe, met, ia a nom ie? Semelapach kewe ra fen mäla, nge ekewe mettoch meinisin ra ususus we chök seni ewe fansoun Kot a föri fanüfan.” ⁵ Ra apasa ei pokiten ra mochen manlükala pwe ren än Kot kapas läng me fanüfan ra fis. Fanüfan a fis seni koluk o pwal ren koluk. ⁶ Iwe, pwal ren koluk, iei kolukun ewe noter, ewe fanüfan me lomlom a tala ren. ⁷ Nge ekewe läng me ei fanüfan mi nom iei ra iseis ren ewe chök kapasen Kot pwe repwe tala ren ekkei. Ra nonom tori ewe rän, lupwen ekewe aramas resap meniniti Kot repwe küna kapwüing me mäla.

⁸ Ämi chiechiei mi achengicheng, ousap manlükala ei mettoch! Esap wor sokofesenin eu rän me engeröü ier me ren ewe Samol, eu rän me engeröü ier ra wewefengen me ren. ⁹ Ewe Samol esap mang le apwönüetä an pwon usun ekoch ra ekieki, pwe a mosonotam ngenikemi, pun esap mochen pwe eman epwe pöütmwälila, nge a fen mochen pwe meinisin repwe ekieksefäl.

¹⁰ Nge ränin ewe Samol epwe war usun eman chon solä. Lon ewe rän läng epwe morola ren püngün chopulap o minen läng repwe karala o tala, nge fanüfan me meinisin mine a nom lon resap chüen nom. ¹¹ Pokiten ekei mettoch meinisin repwe tala lon ei lapalap, met sokun aramas oupwe usuni? Oupwe manaueni eu manau mi pin mi nonom fän nemenien Kot, ¹² lupwen oua witiwiti ewe Ränin Kot o achocho ngeni tori epwe müttirito. Iei ewe Rän lupwen ekewe läng repwe karala o tala o minen läng repwe telila ren pwichikar. ¹³ Nge usun än Kot pwon sia witiwiti eu läng mi fö me eu fanüfan mi fö ia pwüing epwe chöchöla ie. ¹⁴ Iei mine, ämi chiechiei mi achengicheng, pokiten oua witiwiti ei Rän, oupwe fokun achocho ngeni pwe oupwe limöch, pwe esap wor ämi mwäl mwen mesen Kot, nge oupwe pwal nom lon kinamwe. ¹⁵ Oupwe ekieki usun ei, pwe ren mosonotamen ach Samol oua küna manau, usun chök pwiich we mi achengicheng Paulus a mak ngenikemi ren ewe tipachem Kot a fang ngeni. ¹⁶ Iei met a apasa lon makkean kewe toropwe meinisin, lupwen a makkei usun ekei mettoch. A wor ekoch mettoch lon an kewe toropwe ra weires pwe aramas repwe weweiti, pwe aramas mi tiparoch me tipewilikis ra awewemwäli. Iei usun mine ra pwal föri ren ekoch wokisin mi mak lon ekewe Toropwe mi Pin. Ren ei ra püsin atoto wor feingau.

¹⁷ Iwe, ämi chiechiei mi achengicheng, oua fen silei ei. Iei mine oupwe mamasakemi, pwe ousap tokola ren ekewe afalafal mi mwäl än ekewe aramas mi ngau, ousap pwal tur seni leniemi mi nükünü. ¹⁸ Nge oupwe chök mämäritä lon än ach Samol me Chon Amanau Jesus Kraist ümöümöch me silelap. I epwe ling ikenai tori feilfeilachök. Amen.

✧ 3:3: Jut 18 ✧ 3:5: Ken 1.6-9 ✧ 3:6: Ken 7.11 ✧ 3:8: Kölf 90.4 ✧ 3:10: Mat 24.43; Luk 12.39; 1.Tes 5.2; Pwär 16.15 ✧ 3:13: Ais 65.17; 66.22; Pwär 21.1

Aeuin Toropwe seni Johannes

Kapas akom

I. Chon makkei ei toropwe: Ewe soukünü Johannes.

II. A mak ngeni iö: Mine a makkei a malapei ngeni ekewe mwichefel meinisin.

III. Itelapemongen ei toropwe: Chiechifengen, Sile me Chen.

IV. Kapas aü^{chean} ei toropwe: Kot i manau, saram me chen.

V. Masouen ei toropwe: A wor ruu popun pwe Johannes a makkei aeuin nöün ei toropwe: An epwe apö^{chökü}la chokewe mi aleani ei toropwe ar repwe chiechifengen me Kot pwal ngeni Nöün we Jesus Kraist. A pwal fönöör ar repwe ü ngeni ekewe afalafal mi tongeni atai ei chiechifengen. Ei sokun afalafal mi mwäl a longolong won ewe lükü, pwe mine mi ngau a pop seni än aramas pacheri ei fanü^{fan}. Iei mine Jesus ewe Nöün Kot esap tongeni wesewesen eman aramas. Ekei sense ra apasa, pwe än eman kü^{na} manau esemü^{ch}, iei an ngas seni öö^{rekin} ei fanü^{fan}. Ra pwal aiti ngeni aramas, pwe än eman kü^{na} manau esemü^{ch} esap pop seni an föfö^{röch} ika an tongei chon arun.

Johannes a ü ngeni ei afalafal o afata lon mine a makkei pwe Jesus Kraist i wesewesen aramas, a pwal afatafichi pwe meinisin mi lükü Jesus me echeni Kot repwe pwal fokun echenifengeniir lefiler.

VI. Tettelin masouen ei toropwe:

Kapas akom 1.1-4

Saram me ro chopwak 1.5-2.29

Ekewe nöün Kot me nöün Tefil 3.1-24

Let me mwäl 4.1-6

Angangen Chen 4.7-21

Ach pwora lon ach lükü Jesus 5.1-21

Ewe Kapasen Manau

1.1-4

¹ Äm aia mak ngenikemi usun ewe Kapasen Manau mi nonom chök seni me lepoputän. Aia fen rongorong ren selingem me kü^{na} ren mesem, ewer, aia fen kü^{na} o atapa ren pöüm. ✧ ² Lupwen ei manau a pwäla, aia kü^{na}. Iei mine aia kapas usun o asile ngenikemi usun ewe manau esemü^{ch} mi nom ren ewe Sam, nge a pwä ngenikem. ✧ ³ Mine aia fen kü^{na} o rongorong aia pwal asile ngenikemi, pwe ämi oupwe etikem lon äm chiechifengen me ewe Sam me Jesus Kraist Nöün we. ⁴ Aia makkei ei pwe ämi pwapwa epwe unusö^{chü}la.

Kot i Saram

1.5-10

⁵ Iwe, iei ewe kapas aia rongorong seni Nöün we o aronga ngenikemi: Kot i saram, esap fokun wor ro chopwak lon. ⁶ Are sia apasa pwe sia chiechi ngeni Kot, nge sia nom lon ro chopwak, sia chofona lon ach kapas pwal lon ach föfö^r. ⁷ Nge are sia nonom lon ewe saram usun i a nonom

lon saram, iwe, sia chiechifengen lefilach, nge chaan Jesus Nöün we a limetikich seni ach tipis meinsin.

⁸ Iwe, are sia apasa pwe esap wor ach tipis, sia püsin atupukich, nge esap wor let loch. ⁹ Nge are sia pwärätä ach tipis ngeni Kot, i epwe apwönüetä an pwon o föri mine a pwüing: Epwe amusala ach tipis o limetikich seni ach pwüingau meinsin. ¹⁰ Are sia apasa pwe sisap tipis, sia achofonai Kot, nge an kapas esap nom loch.

2

Kraist ach soualilis

2.1-6

¹ Ngang üa makkei ei ngenikemi, nei kana, pwe ousap tipis. Nge are eman a föri tipis, a wor eman mi penikich, Jesus Kraist ewe chon pwüing, a nom ren ewe Sam o a tütüngor fänäsengesich. ² Püsin Kraist i ewe popun pwe ach tipis kana ra musala, nge sap ach tipis chök, pwe pwal tipisin aramas meinsin.

³ Are sia aleasochisi än Kot kewe allük, iwe, sia lükü pwe sia silei i. ⁴ Iwe, are eman a apasa pwe a silei i, nge esap aleasochisi an kewe allük, ei aramas i eman chon chofona, nge ewe let esap nom lon. ⁵ Nge are eman a aleasochisi an kapas, an echeni Kot a wesewesen unusöchüla. Iei met sia tongeni silei ren pwe sia nom lon Kot: ⁶ Iö a apasa pwe a nonom lon Kot epwe fokun föföri usun mine Jesus a föföri.

Ewe Allük mi fö

2.7-17

⁷ Ämi chiechiei mi achengicheng, ei allük üa makkei ngenikemi esap minefö, pwe eu allük minen lom. Iei ewe allük a nom remi seni chök me lepoputän. Ei allük minen lom, iei ewe kapas oua fen rongorong. ⁸ Nge iei üpwe makkei ngenikemi eu allük mi fö, pun a pwä letan lon Kraist pwal lon ämi. Pun rochopwak a wesila, nge ewe saram mi let a fen tin.

⁹ Iö a apasa pwe a nonom lon saram, nge a oput pwiin, a nom lon rochopwak tori ikenai. ¹⁰ Nge iö a echeni pwiin a nonom lon saram, iwe, esap wor och lon manauan mine epwe chepetek ren. ¹¹ Nge iö a oput pwiin a nom lon rochopwak. A fetal lon rochopwak, nge esap silei ia epwe feila ie, pun rochopwak a achuna.

¹² Ngang üa mak ngenikemi, nei kana, pun ämi tipis kana ra musala pokiten Kraist. ¹³ Üa mak ngenikemi samasam kana, pun oua silei ewe mi nonom seni me lepoputän. Üa mak ngenikemi alüal, pun oua akufu ewe Eman mi Ngau. ¹⁴ Üa mak ngenikemi nau kana, pokiten oua silei ewe Sam. Üa mak ngenikemi samasam kana, pokiten oua silei ewe mi nonom seni me lepoputän. Üa mak ngenikemi alüal kana, pokiten oua pöchökül, än Kot kapas a nonom lomi o oua akufu ewe Eman mi Ngau.

¹⁵ Ousap echeni fanüfan are mettochun lon fanüfan. Pun are oua echeni fanüfan, ousap echeni ewe Sam. ¹⁶ Pun mettochun lon fanüfan meinsin, mochenian fituk, mochenian lemas me lamalamtekian man-aun aramas resap pop seni ewe Sam, nge ra pop seni ei fanüfan. ¹⁷ Iwe, fanüfan me mettochun lon aramas ra kon mochenia ngeni repwe morola, nge iö a föri letipen Kot epwe manau tori feilfeilachök.

✧ 2:7: Joh 13.34

Ewe Pölüen Kraist
2.18-29

¹⁸ Ämi nei kana, ewe fansoun sopolan a arapoto! Oua fen rongorong pwe ewe Pölüen Kraist epwe war. Nge iei chomong pölüen Kraist ra fen pwä, iei mine sia silei pwe ewe fansoun sopolan a arapoto. ¹⁹ Ekei aramas resap wesewesen chon ach mwich, ina popun ra likitikich. Pun are repwe chon ach mwich, repwe chök nonom rech. Nge ar likitikich a afatatä pwe ir resap wesewesen chon ach mwich.

²⁰ Iwe, ewe mi Pin a fen tinatiu womi ewe Ngünmifel, iei mine ämi meinisin oua silei ewe let. ²¹ Üsap mak ngenikemi pokiten itä ousap silei ewe let. Nge pokiten oua silei, oua pwal silei pwe esap wor och chofona epwe pop seni ewe let.

²² Iwe, iö ewe chon chofona? Ätewe mi apasa pwe Jesus esap ewe Mesaia! Ei sokun aramas i ewe pölüen Kraist, a oput ewe Sam me ewe Nau. ²³ Pun iö a oput ewe Nau a pwal oput ewe Sam, nge iö a etiwa ewe Nau a pwal etiwa ewe Sam. ²⁴ Oupwe fokun tümwünüfichi ämi oupwe amwöchü lon letipemi ewe Kapasen Kot oua fen rong me lepoputän. Are oua amwöchü mine oua fen rong me lepoputän, oupwe nonom lon ewe Nau pwal ewe Sam fansoun meinisin. ²⁵ Iwe, iei met Kraist a püsin pwon ngenikich: ewe manau esemüch.

²⁶ Ngang üa makkei ei ngenikemi usun chokewe mi sotuni ar repwe atokakemi. ²⁷ Nge ren ämi, Kraist a fen tinatiu womi Ngünün. Fansoun än Ngünün we epwe nonom lomi, ousap osupwangen än eman epwe aiti ngenikemi och. Pun Ngünün a aiti ngenikemi usun mettoch meinisin. Iwe, mine i a aiti ngenikemi a let, nge esap mwäl. Oupwe aleasochisi mine Ngünün we a aiti ngenikemi, iwe, oupwe nonom lon Kraist.

²⁸ Ewer, nei kana, oupwe nonom lon Kraist, pun lupwen i epwe pwä, kich sipwe fokun tipepworä, nge sisap opola seni fän säw lon ewe Rän epwe wareto. ²⁹ Ämi oua silei pwe Kraist a pwüng, mürin oupwe pwal silei pwe aramas meinisin mi föri mine a pwüng, ir ra up seni Kot.

3

Nöün Kot kana
3.1-10

¹ Oupwe nengeni ükükün watten än ewe Sam echenikich! An chen a fokun tekia pwe a aita ngeni kich nöün. Iei mine kich wesewesen nöün Kot. Ina popun pwe fanüfan esap sileikich, pun esap silei Kot. ✧

² Ämi chiechiei kana mi achengicheng, ikenai kich nöün Kot, nge esamwo pwä mine sipwe usuni me mürin. Nge sia silei pwe lupwen Kraist epwe wareto sipwe wewe ngeni i, pun sipwe küna i lon wesewesen lapalapan.

³ Iwe, eman mi eäni ei apilükülüköch lon Kraist a püsin alimelimöchü manauan usun Kraist a limelimöch.

⁴ Eman mi föri tipis a atai än Kot allük, pun tipis wewen atai allük. ⁵ Ämi oua silei pwe Kraist a war an epwe angeala ach tipis kana. Iwe, oua silei pwe esap wor an tipis. ✧ ⁶ Iei mine eman mi nonom lon Kraist esap sopwela le föri tipis, nge eman mi sopwela le föri tipis esap fokun küna i ika silei i.

⁷ Nei kana, ousap mwüt ngeni eman epwe atupukemi! Eman mi föri mine a pwüng, a pwüng usun chök Kraist a pwüng. ⁸ Are eman a sopwela

le föri tipis, i nöün Tefil, pun Tefil a tipis seni lepoputan. Iei popun pwe Nöün Kot a war an epwe atala än Tefil angang. ⁹ Eman mi nöün Kot esap sopwela le föri tipis, pun manauen Kot a nonom lon. Iwe, esap tongeni sopwela le föri tipis, pun a up seni Kot. ¹⁰ Iei fatöchün sokofesenin lefilen nöün Kot me nöün Tefil: Eman esap föri mine a pwüng, ika esap echeni pwiin we, i esap nöün Kot.

Sipwe eäni chen lefilach

3.11-18

¹¹ Iei ewe pworaus oua rongorong seni lepopun: Sipwe echenifengeni-kich lefilach. ✧ ¹² Sisap wewe ngeni Kain, i nöün Ewe mi Ngau, a püsin niela pwiin we Epel. Pwota Kain a niela pwiin we? Pun ekewe föföör a föri ra ngau, nge än pwiin kewe föföör ra pwüng. ✧

¹³ Ämi pwii kana, ousap weitifengenikemi are aramasen fanüfan ra oputakemi. ¹⁴ Kich sia silei, pwe sia towu seni mäla o tolong lon manau, pun sia echeni pwiich kana. Eman esap echeni pwiin a chüen nonom fän nemenien mäla. ✧ ¹⁵ Eman mi oput pwiin, i eman chon niela aramas. Iwe, oua silei pwe eman chon niela aramas esap eäni manau esemüch lon manuan. ¹⁶ Iei usun sia silei met wewen chen: Kraist a fangela manuan fän itach, ina usun pwal kich sipwe fangala manauach fän iten pwiich kana! ¹⁷ Are eman aramas mi pisekisek a küna pwiin lon an osupwang, nge esap tongei o alisi, ifa usun a eäni än Kot we chen lon letipan? ¹⁸ Ämi nei kana, ach chen esap fis lon kapas chök, pwe pwal lon ach föföör mi let.

Ach apilükülükü Kot

3.19-24

¹⁹ Iwe, iei usun sia silei pwe sia pop seni ewe let. Iei usun sipwe pwal eäni apilükülük mwen mesen Kot. ²⁰ Are mwelien letipach a atipisikich, sia silei pwe Kot a tekia seni mwelien letipach, a pwal silei mettoch meinisin. ²¹ Iei mine chiechiei kana mi achengicheng, are mwelien letipach esap atipisikich, sia eäni apilükülük mwen mesen Kot. ²² Sia angei seni Kot meinisin mine sia tüngor, pun sia aleasochisi an kewe allük o föri met epwe pwapwa ren. ²³ Iei an allük: Sipwe lükü Nöün we Jesus Kraist, sipwe pwal echenifengeni-kich lefilach, usun Kraist a fen allük ngenikich. ✧ ²⁴ Eman mi aleasochisi än Kot kewe allük a nom lon Kot, nge Kot a nom lon. Iwe, pokiten ewe Ngünmifel Kot a fang ngenikich sia silei pwe Kot a nom loch.

4

Ewe Ngün mi let me ewe Ngün mi chofona

4.1-6

¹ Ämi chiechiei kana mi achengicheng, ousap lükü chokewe meinisin mi apasa pwe ra eäni Ngünmifel, nge oupwe sotuniir o küttaöchü are ekewe ngün ra feito seni Kot. Pun chomong soufos chofona ra feilfetal won fanüfan. ² Iei usun ämi oupwe tongeni silei ika iei i ewe Ngünün Kot: Iteiten ngün mi pwärätä pwe Jesus Kraist a feito o wiliti aramas a feito seni Kot. ³ Nge iteiten ngün a amamäsini ei pworaus usun Jesus esap feito seni Kot. Iei i ngünün ewe Pölüen Kraist, oua fen rong pwe epwe war, nge iei a fen nom won fanüfan.

⁴ Nge ämi nei kana, oua nöün Kot, oua akufu ekewe soufos chofona, pun ewe Ngün mi nom lomi a manaman seni ewe ngün mi nom lon chokewe ra pop seni fanüfan. ⁵ Ekei sokun soufos chofona ra kapas usun mettochun fanüfan, iwe, chon fanüfan ra aüseling ngeniir, pun ir ra pop seni fanüfan. ⁶ Nge kich sia nöün Kot. Eman mi silei Kot a aüseling ngenikich, nge eman esap nöün Kot esap aüseling ngenikich. Iei usun sia tongeni esilla eman Ngün mi let me eman ngün mi chofona.

Kot Chen

4.7-21

⁷ Ämi chiechiei kana mi achengicheng, ousipwe echenifengenikich lefilach, pun chen a pop seni Kot. Eman mi eäni chen a up seni Kot, a pwal silei Kot. ⁸ Nge eman esap eäni chen, esap silei Kot, pun Kot chen. ⁹ Iwe, Kot a pwäri an echenikich ren an tinato Nöün Aleman lon fanüfan, pwe kich sipwe manau ren. ¹⁰ Iei wewen chen: Esap pwe kich sia echeni Kot, nge i a echenikich o tinato Nöün we pwe i popun pwe ach tipis kana ra musala.

¹¹ Ämi chiechiei kana mi achengicheng, are iei usun än Kot echenikich, kich sipwe pwal echenifengenikich lefilach. ¹² Esap wor mwo eman a fen küna Kot. Nge are sia echenifengenikich lefilach, Kot a nonom loch o an chen a unusöchüla loch. *

¹³ Sia silei pwe sia nonom lon Kot o i a nonom loch, pun a fang ngenikich Ngünün we. ¹⁴ Iwe, sia küna o asile ngeni aramas, pwe ewe Sam a tinato Nöün we an epwe amanaua chon fanüfan. ¹⁵ Are eman a pwärätä pwe Jesus i ewe nöün Kot, Kot a nonom lon, nge i a nonom lon Kot. ¹⁶ Iwe, kich sia silei o lükü ewe chen Kot a eäni ngenikich.

Kot chen. Eman mi nonom lon chen a nonom lon Kot, nge Kot a nonom lon. ¹⁷ Ren ei chen a unusöchüla loch, pwe sia apilükülüköch lon ewe Ränin Kapwüng. Ewer, sipwe eäni apilükülüköch, pun manauach won ei fanüfan a usun chök manauen Kraist. ¹⁸ Esap wor niuokus lon chen. Chen mi unusöch a asüela niuokus meinisin. Iei mine chen esap unusöchüla lon manauen eman mi niuokus, pun niuokus a pop seni än eman ekieki pwe epwe küna liwiningau.

¹⁹ Sia eäni chen, pun Kot a akomwen echenikich. ²⁰ Are eman a apasa, “Üa echeni Kot,” nge a oput pwiin, i eman chon chofona. Pun epwe ifa usun an epwe echeni Kot, ewe esap küna, nge ese fen echeni pwiin we mi küna? ²¹ Iei ewe allük Kraist a ngenikich: Eman mi echeni Kot epwe pwal fokun echeni pwiin.

5

Ach pworaiti fanüfan

5.1-5

¹ Eman mi lükü pwe Jesus ewe Kraist, i eman mi up seni Kot. Eman mi echeni eman sam a pwal echeni nöün. ² Iei usun sia silei pwe sia echeni nöün Kot kana, pun sia echeni Kot o aleasochisi an kewe allük. ³ Pun wewen ach echeni Kot pwe sia aleasochisi an kewe allük. Nge an kewe allük resap weires ngenikich, * ⁴ pun chokana meinisin mi up seni Kot ra tongeni akufu fanüfan. Iwe, kich sia akufu fanüfan ren ach lükülük. ⁵ Iö a tongeni akufu fanüfan? Ewe chök aramas mi lükü pwe Jesus i Nöün Kot.

*Ewe angangen pwärätä usun Jesus Kraist**5.6-13*

⁶ Jesus Kraist i ewe eman mi feito fän ewe kolukun an papatais me chaan an mäla. Esap feito ren koluk chök, nge a pwal feito ren koluk me cha. Nge püsin Ngünmifel a pwärätä pwe ei a let, pun ewe Ngünmifel i let. ⁷ Mi wor ülüngat minen pwärätä: ⁸ ewe Ngünmifel, ewe koluk me ewe cha. Ekei ülüngat minen pwärätä a wewefengen ar kapasen pwärätä. ⁹ Sia lükü än eman aramas kapasen pwärätä, nge än Kot kapasen pwärätä a lap seni, pun iei an kapasen pwärätä usun Nöün we. ¹⁰ Iei mine eman mi lükü Nöün Kot a eäni ei kapasen pwärätä lon letipan. Nge iö esap lükü Kot a achofonai Kot, pun esap lükü met Kot a pwärätä usun Nöün we. ¹¹ Iei ewe kapasen pwärätä: Kot a ngenikich manau esemüch, nge ei manau a nom lon Nöün we. ✱ ¹² Eman mi eäni Nöün Kot a eäni manau esemüch, nge eman esap eäni Nöün Kot esap eäni manau.

*Ewe Manau esemüch**5.13-21*

¹³ Ngang üa makkei ekei kapas ngenikemi, ämi mi lükü Nöün Kot, pwe oupwe silei pwe oua eäni manau esemüch. ¹⁴ A wor ach apilükülüköch lon ach churi Kot, pun sia silei pwe are sia tüngor och mine a fich ngeni letipan, a aüselingakich. ¹⁵ Are sia silei pwe a aüselingakich, ese lifilifil met sia eäni tüngor, sia pwal silei pwe sia angei met sia tüngor ngeni.

¹⁶ Are eman a küna pwiin we pwe a föri och tipis esap emweni i ngeni mäla, epwe iotek ngeni Kot, pwe epwe ngeni i manau. Iei met epwe fis fän iten chokewe ar tipis esap emweniir ngeni mäla. Nge mi wor tipis mi emweni aramas ngeni mäla, üsap apasa pwe epwe iotek ngeni Kot usun ei. ¹⁷ Föför esepwüng meinisin iei tipis, nge mi wor tipis esap emweni aramas ngeni mäla.

¹⁸ Sia silei pwe eman mi up seni Kot esap sopwela le föri tipis, pun ewe Nöün Kot a tümwünüöchü, pwe Ewe mi Ngau esap tongeni afeiangaua.

¹⁹ Sia silei pwe kich sia nöün Kot, inamwo ika unusen fanüfan a nom fän nemenien Ewe mi Ngau.

²⁰ Sia pwal silei pwe Nöün Kot a feito o fang ngenikich ach weweöch, pwe sipwe silei ewe Kot mi let. Sia nonom lon ewe Kot mi let pwal lon Nöün we Jesus Kraist. I ewe Kot mi let me ewe manau esemüch.

²¹ Ämi nei kana, oupwe püsin tümwünüekemi seni ekewe uluulun anümwäl.

Aruachön Toropwe seni Johannes

Kapas akom

I. Chon makkei ei toropwe: Ewe soukünü Johannes.

II. A mak ngeni iö: Ngeni eman Finesamol mi Fil me nöün kana.

III. Itelapemongen ei toropwe: Let me Chen.

IV. Kapas aüchean ei toropwe: Souläng resap chiechi ngeni ekewe chon afalafal chofona.

V. Masouen ei toropwe: Ewe aruachön nöün Johannes toropwe a mak me ren ewe “Souakom” ngeni ewe “Finesamol mi Fil me nöün kana”. Eli ekei kapas ra wewe ngeni eu mwichefel me aramasen lon. Malapen ei pworaus eu tüngror pwe souläng repwe tongfengen lefiler, pwal kapasen fön pwe repwe ü ngeni ekewe chon afalafal chofona me masouen ar afalafal.

VI. Tettelin masouen ei toropwe:

Kapas akom 1-3

Aüchean ach eäni chen 4-6

Kapasen fön usun ach sipwe ü ngeni ekewe chon afalafal chofona 7-11

Kapasen lesopolan 12-13

Kapong

1-3

¹ Ngang ewe Souakom üa kapong ngeni ewe Finesamol mi fil me nöün kana, ir chokewe üa wesewesen echeniir. Nge sap ngang chök üa echeniir, pwe pwal chokewe meinisin mi silei ewe let, ² pun ewe let a nonom loch, epwe pwal etikich tori feilfeilachök.

³ Samach Kot me Jesus Kraist, i Nöün ewe Sam, epwe ngenikich ümömöch, tong me kinamwe, repwe nonom rech lon let me chen.

Let me Chen

4-11

⁴ Üa fokun pwapwa lupwen üa silei pwe ekoch me lein noumw kana ra manaueni ewe manauen let usun chök ewe Sam a allük ngenikich. ⁵ Iei üa tüngror ngonuk achengicheng Finesamol: Ousipwe echenifengenikich lefilach. Ei esap eu allük mi fö üa makkei ngenikemi, pwe iei eu allük sia eäni seni chök lepoputän. * ⁶ Ei chen üa kapas usun, wewen pwe sipwe fokun aleasochisi än Kot kewe allük. Iei ewe allük oua rongorong seni lepoputän, pwe oupwe manaueni ewe manauen chen.

⁷ Chomong chon atuputup ra fetalfeil won unusen fanüfan, ir aramas resap pwärätä pwe Jesus Kraist a feito o wiliti aramas. Ei sokun aramas eman chon atuputup me ewe pölüen Kraist. ⁸ Iei mine oupwe mamasakemi, pwe esap pöüt senikemi mine sia angang fän itan, nge oupwe angei ewe liwin mi unus.

⁹ Eman esap kamwöchünük won än Kraist afalafal, pwe a apacha och ngeni, Kot esap nonom ren. Nge eman mi kamwöchünük won ewe afalafal, ewe Sam me ewe Nau ra nonom ren. ¹⁰ Iei mine are eman a feito remi nge esap uwato ei afalafal, ousap etiwa i lon imwemi, ousap mwo nge apasa lon ämi kapong, “Kinamwe epwe nonom reöm.” ¹¹ Pun eman

* 1:5: Joh 13.34; 15.12,17

mi eäni kapongen kinamwe ngeni, a wiliti eman chiechian lon ekewe sokun föföringau a föriir.

Kapasen lesopolan

12-13

¹² A wor chomong mine ngang üa mochen ürenikemi, nge üsap mochen makkei ngenikemi lon toropwe ren ink. Nge üa apilükülük ngeni ai üpwe tongeni churikemi o püsin kapas ngenikemi, pwe ach pwapwa epwe unusöch. ¹³ Nöün pwiüm we mi fil ra kapong ngonuk.

Aülüchön Toropwe seni Johannes

Kapas akom

I. Chon makkei ei toropwe: Ewe soukünü Johannes.

II. A mak ngeni iö: Ngeni Kaius eman souläng enlet.

III. Itelapemongen ei toropwe: Souläng repwe etiwetiwöchfengen lefiler.

IV. Kapas aüchöan ei toropwe: Souläng repwe angangfengen lon ewe angangen Kot.

V. Masouen ei toropwe: Ewe aülüchön nöün Johannes toropwe a mak me ren ewe “Souakom” ngeni eman souemwenin mwichefel itan Kaius. Johannes a mwareiti Kaius pokiten an alisi ekewe ekoch souläng. A pwal fönöü Kaius pwe epwe afäli ren eman mwän itan Tiotrefes.

VI. Tettelin masouen ei toropwe:

Kapas akom 1-4

Johannes a mwareiti Kaius 5-8

Johannes a apwüngü Tiotrefes 9-11

Johannes a ingeiti Timetrius 11-12

Kapasen lesopolan 13-15

Kapong

1-4

¹ Ngang ewe Souakom üa kapong ngeni en chienei mi achengicheng Kaius, en ewe üa wesewesen echenuk. ✱

² En chienei mi achengicheng, üa iotek pwe kopwe feiöch lon mettoch meinisin, pwe inisum epwe pöchökül, usun üa fen silei pwe ka pöchökül lon pekin ngünüm. ³ Üa fokun pwapwa lupwen ekoch pwiich kewe souläng ra war o ra apworausä ngeniei usun om allükülük lon ewe let, usun chök ka manaueni ewe manauen let fansoun meinisin. ⁴ Esap wor och a apwapwaei me lükün ai rongorong pwe nei kana ra manaueni ewe manauen let.

Johannes a mwareiti Kaius

5-8

⁵ En chiechiei mi achengicheng, ka allükülük lon ewe angang ka föri fän iten pwiich kewe souläng, inamwo ika ir chon ekis. ⁶ Ir ra apworausä ngeni chon ewe mwichefel ikei usun om tongeer. Kose mochen kopwe alisiir, pwe repwe tongeni sopwela ar sai lon met epwe apwapwai Kot. ⁷ Pun ra feila o saifetal fän iten ewe angangen Kraist, nge resap angei och alilis seni ekewe chon lükün lamalam. ⁸ Iei mine oukich souläng sipwe fokun alisi ekei sokun aramas, pwe ina ach alilis lon ar angang fän iten ewe let.

Tiotrefes me Temetrius

9-12

⁹ Ngang üa makkei echö toropwe ngeni mwichefel, nge Tiotrefes, ätewe mi mochen an epwe nemenem, esap aüseling ngeni met üa apasa. ¹⁰ Iei mine lupwen üpwe war, üpwe pwärätä meinisin mine a föri: ekewe

✱ 1:1: Föf 19.29; Rom 16.23; 1.Kor 1.14

mettoch mi fokun ingau a apasa usuch me an kapas chofona. Nge esap ikei chök mine a föri, esap pwal etiwa pwiich kewe souläng lupwen ra war. A fen mwo nge pinei chokewe mi mochen etiwere o atorowu seni lon ewe mwichefel.

¹¹ En chienei mi achengicheng, kosap apirü mine a ngau, nge kopwe apirü mine a öch. Eman mi föri mine a öch i nöün Kot, nge eman mi föri mine a ngau esap silei Kot. ¹² Aramas meinisin ra kapasöch usun Temetrius, pwal ewe let a kapasöch usun i. Iwe, pwal iei usun mine kich sia pwärätä o oua silei pwe met sia apasa a let.

Kapongen lesopolan

13-15

¹³ A wor chomong mine üa mochen ürenuk, nge üsap mochen makkei ngonuk lon toropwe ren ink. ¹⁴ Nge üa apilükülük ai üpwe müttir churuk, pwe sipwe püsin kapasfengen. ¹⁵ Kinamwe epwe nonom reöm. Chiechiom kewe souläng meinisin mi nom ikei ra kapong ngonuk. Kopwe kapong ngeni chiechiach kewe souläng meinisin mi nom ikenan.

Echö Toropwe seni Jutas

Kapas akom

I. Chon makkei ei toropwe: Eli Jutas pwiin James.

II. A mak ngeni iö: Ngeni ekewe souläng mi manau lon ena fansoun.

III. Itelapemongen ei toropwe: Kapasen fön usun ekewe chon afalafal chofona.

IV. Kapas aü^{chean} ei toropwe: Oupwe apöchökülakemi lon ämi maun fänäsengesin ewe lükülük.

V. Masouen ei toropwe: Jutas a makkei ei toropwe an epwe fönöü ekewe souläng pwe resap tup ren ekewe chon afalafal chofona, ir ätekewe mi apasa pwe ir chon lükü Kraist. Lon ei toropwe mi mochomoch masouan mi chök wewe ngeni ewe aruachön toropwe seni Petrus. Ewe chon makkei a apöchöküla letipen ekewe chon aleani ei toropwe, pwe repwe maun fän iten ewe lükülük Kot a ngeni nöün kewe chon pin.

VI. Tettelin masouen ei toropwe:

Kapas akom 1-2

Än ekewe chon afalafal chofona lapalap, masouen ar afalafal me ar feiengau 3-16

Kapasen fön pwe repwe kamwöchünük won ar lükülük 17-23

Kapasen afeiöch 24-25

Kapong

1-2

¹ Ngang Jut, eman chon angang ngeni Jesus Kraist, ngang pwal pwiin James, üa kapong ngeni chokewe mi kö o chen me ren Samach Kot o nom fän tümwüntüen Jesus Kraist. ✧ ² Ümöümöch, kinamwe me chen epwe chomongola remi.

Ekewe chon afalafal chofona

3-16

³ Ämi chiechiei kana mi achengicheng, üa achocho ngeni ai üpwe mak ngenikemi usun ewe manau mi fö sia eänifengeni. Nge iei üa mefi pwe a aüchea ai üpwe müttir mak ngenikemi o apöchökülakemi, pwe oupwe maun fänäsengesin ewe lükülük Kot a ngeni ekewe chon pin. Iei ewe lükülük esap tongeni siwil. ⁴ Pun ekoch aramas resap meniniti Kot ra anifilong leich, ir chokewe mi sorei ewe kapas usun än Kot ümöümöch, pwe epwe wor ar künetipingen won ar kewe föfö^r mi fokun ngau. Ra pwal amamäsini Jesus Kraist, i chök ach Sounemenem me ach Samol. Me lomlom ekewe Toropwe mi Pin ra osuni usun ewe kapwüng ra tolong lon.

⁵ Pun inamwo ika oua silei ekei mettoch meinisin, nge üa chök mochen ai üpwe achema ngenikemi usun än ewe Samol a amanaua ekewe aramasen Israel seni Isip, nge mürin a arosala chokewe resap lükü. ✧

⁶ Oupwe chechemeni ekewe chon läng resap menemenöch ren wiser, nge ra likitala wesewesen lenier. Ra föfö ngeni sein esap tongeni mwü lon ewe rochokich mi nom fan, ia Kot a fötekiniirelong ie tori ewe Rän

mi lap i epwe apwüngüür lon. ⁷ Oupwe chechemeni Sotom me Komora me ekewe telinimw mi nom ünükür, aramasen lor ra föri sokun föföör usun chök ekewe chon läng. Ra föri sokun föföörün lisowu mi ngau o lapalapangau. Ra nom lon riaföörün ewe ekkei esekun pwe ina liwinin ar tipis. Iei eu kapasen fön mi fatöch ngeni aramas meinisin. ✧

⁸ Lon ewe chök sokun lapalap, ekei aramas a wor künaer mi aselipa ngeniir ar repwe tipis ngeni püsin inisiir. Ra turunufasei än Kot nemenem o esita ekewe meilap lon läng mi wor ar ling. ⁹ Sap mwo nge ewe meilapen chon läng Mikael a föri ei sokun. Lupwen a aninifengen me ewe Tefil ika iö leir epwe nemeni somän Moses, Mikael esap mochen apwüngü Tefil ren kapasen aitengau, nge a apasa, “Ewe Samol epwe apwünguk!” ✧ ¹⁰ Iwe, ekei aramas ra eäni kapas ingau usun ekewe mettoch resap weweiti. Nge ekewe mettoch ra weweiti seni chök ar mefi mi usun chök mefien ekewe manmwacho, ikkei ekei mettoch ra feiengau ren. ¹¹ Epwe ifan me watten feiengauer! Ra manaueni manauen Kain. Ra atolungeer lon ewe sokun ruongau Pileam a föri fän iten ar repwe angei moni. Ra ü ngeni Kot usun chök Kora, iwe, repwe rosola usun chök i. ✧ ¹² Ekei aramas ra usun chök och limengau lefilemi lupwen oua chiechifengen lon ämi kametip ren ar säwemang lon ar momongö o ükün. Ra chök püsin tümwünüür. Ra usun chök ekewe kuchu esor koluk lor, äsepwäl a ässirela. Ra usun irä esap wor uar lon fansoun kinikin, irä mi üttütä fiti warer, ra wesewesen mäla. ¹³ Ra usun chök ekewe nongauen lematau mi puropuretä ren ar föföör mi asäw. Ra usun chök füün amwalech, Kot a fen amolätä fän iter eu leni lon rochokichin rochopwak tori feilfeilachök. ¹⁴ Iwe, Enok ewe afümanün täppin aramas seni Atam a osuni usur me lomlom, “Ewe Samol epwe feito fiti ngeröörün chon läng mi pin ✧ ¹⁵ pwe epwe apwüngü aramas meinisin, epwe pwal atipisiir meinisin pokiten ar kewe föföör ra föri ren ar resap meniniti Kot, pwal pokiten ekewe kapas mi fokun ngau ekewe chon tipis resap meniniti Kot ra apasatä lon ar ü ngeni.”

¹⁶ Ekei aramas ra chök lal o atipisi aramas. Ra chei mochenin letiper mi ngau, ra eäni kapasen tunomong usun püsin ir, ra pwal kapas amichimich, pwe repwe angei mine ra mochen.

Kapasen fön me kapasen öüröür

17-23

¹⁷ Nge ämi chiechiei kana mi achengicheng, oupwe chechemeni mine ekewe soukünö nöün ach Samol Jesus Kraist ra osuni me lom. ¹⁸ Ra ürenikemi, “Lon ekewe ränin lesopolan epwe wor aramas repwe takirikemi, aramas mi chei mocheniangauen letiper.” ✧ ¹⁹ Ir ekewe aramas mi afisätä imwüfesen, ra nom fän nemenien mochenin fituker, resap eäni ewe Ngünün Kot. ²⁰ Nge ämi chiechiei kana mi achengicheng, oupwe chök sopwela le apöchöküla ämi lükülük mi unusen pin. Oupwe iotek ren manamanen Ngünmifel. ²¹ Iwe, oupwe püsin tümwünükemi lon än Kot chen lupwen oua witiwiti ach Samol Jesus Kraist pwe epwe ngenikemi manau esemüch lon an ümöümöch. ²² Oupwe eäni tong ngeni chokewe mi tipemwaramwar lon ar lükü, ²³ oupwe amanaua ekewe ekoch aramas ren ämi angeerewu seni ewe ekkei, iwe, ngeni pwal ekewe

✧ **1:7:** Ken 19.1-24 ✧ **1:9:** Tan 10.13,21; 12.1; Tut 34.6; Pwär 12.7; Sek 3.2 ✧ **1:11:** Ken 4.3-8; Num 22.1-35; 16.1-35 ✧ **1:14:** Ken 5.18,21-24 ✧ **1:18:** 2.Pet 3.3

ekoch oupwe eäni tong ngeniir fiti niuokus, nge oupwe fen mwo nge oput ewe üf a limengau ren mocheniangauen fituker.

Eu iotekin mwareiti Kot

24-25

²⁴Iwe, ngeni i, ewe mi tongeni amwöchükemi pwe ousap tur lon tipis, a pwal tongeni aükemiitä, pwe oupwe unusen limöch o uren pwapwa me mwen an we ling, ²⁵ngeni ewe eman chök Kot ach Chon Amanau epwe ling, tekia, manaman me nemenem ren Jesus Kraist ach Samol lon ekewe fansoun ra la, ikenai tori fansoun esemüch. Amen.

Mine Jesus Kraist a Pwärätä ngeni Johannes

Kapas akom

I. Chon makkei ei puk: Ewe soukünü Johannes.

II. A mak ngeni iö: Ngeni ekewe fisu mwichefel lon Asia.

III. Itelapemongen ei puk: Jesus Kraist ach we king mi pwora a nemenem.

IV. Kapas aüchëan ei puk: Mine Johannes a makkei usun met a fen küna, usun met a wor, pwal usun met epwe fis me mürin. (1.19)

V. Masouen ei puk: Ei puken Pwärätä Johannes a makkei lon ewe fansoun lupwen ekewe souläng ra küna ninni pokiten ar lükü Jesus Kraist pwe ar Samol. Aüchëan än Johannes ekiëk lupwen a makkei ei puk, an epwe awora ngeni ekewe chon aleani apilükülüköch me pöchökül lon ar souläng. A pwal pese ngeniir ar repwe likitü lon ar allükülük lupwen fansoun ar riaföü me ninni.

Arapakan unusen masouen ei puk a wor chomong kapasen pwärätä me künaan Johannes, a mak lon kapasen awewe ekewe souläng lon ena fansoun ra wewe ren, nge a monomonola ngeni ekewe aramas resap souläng. Usun ekewe ngingiin lon köl ra aliwin me aliwin, iei usun ekewe kapas aüchëan lon ei puk ra aliwin me aliwin lon sokopaten lapalap ren künaan Johannes. Inamwo ika a wor sokopaten memef usun tichikin kapasen awewen ei puk, nge ewe aüchëan a fat: Ren Kraist ach Samol, Kot epwe fokun unusen akufu ekewe chon oputan meinisin fiti Satan, epwe pwal ngeni nöün kewe aramas mi allükülük liwiniir ren ekewe feiöch lon ewe läng mi fö me ewe fanüfan mi fö, lupwen an win epwe unusöchüla.

VI. Tettelin masouen ei puk:

Kapas akom 1.1-8

Aeuin künaan Johannes me ekewe toropwe ngeni ekewe fisu mwichefel 1.9-3.22

Ewe toropwe mi wor fisu pwaun 4.1-8.1

Ekewe fisu rappwa 8.2-11.19

Ewe trakon me ekewe ruoman manmwacho 12.1-13.18

Sokopaten künaan Johannes 14.1-15.8

Ekewe fisu sepïen än Kot song 16.1-21

Talan Papiilon me än ewe manmwacho, pwal än ewe soufos chofona me än ewe Tefil kuf 17.1-20.10

Ewe kapwüngün lesopolan 20.11-15

Ewe läng mi fö, ewe fanüfan mi fö me ewe Jerusalem mi fö 21.1-22.5

Kapasen lesopolan 22.6-21

Kapas akom

1.1-3

¹Iei ewe kapasen pwärätä seni Jesus Kraist, Kot a ngeni an epwe pwäri ngeni nöün kewe chon angang usun met epwe müttir fis. Kraist a asile ngeni nöün we chon angang Johannes ekei mettoch ren an tinala nöün chon läng ren. ²Iwe, Johannes a pwärätä meinisin mine a küna, iei än Kot kapas me ewe let Jesus Kraist a pwärätä. ³A feiöch eman mi aleani ei

puk, ra pwal feiöch chokewe mi rongorong ngeni ekei kapasen pwärätä o aleasochis ngeni mine a mak lon. Pun ewe fansoun a arap än ekei mettoch meinisin repwe fisitâ.

Kapong ngeni ekewe fisu mwichefel

1.4-8

⁴Kapong seni Johannes ngeni ekewe fisu mwichefel lon ewe fanü Asia: Ümöümöch me kinamwe seni Kot epwe nonom remi, ewe Kot mi nom iei, ewe a fen nonom me ewe epwe feito me mürin, pwal seni ekewe fūman ngün mi nom mwēn an we lenien motun king, ⁵ pwal seni Jesus Kraist ewe chon pwärätä mi allükülük, ewe mwänichi, Kot a amanauasefäli seni mäla, i ewe mi nemeni ekewe king won fanüfan.

I a echenikich o angasakich seni ach tipis ren chaan, ⁶ a pwal föri senikich eu mwün souasor, pwe sipwe angang ngeni Kot Saman. Jesus Kraist epwe küna ling me manaman tori feilfeilachök! Amen. ^{*}

⁷Nengeni, epwe feito won ekewe kuchu! Aramas meinisin repwe küna i, pwal chokewe mi posu. Iwe, aramas meinisin won fanüfan repwe ngüngüres ren met ra föri ngeni. Epwe iei usun met epwe fis. Amen. ^{*}

⁸“Ngang ewe Aemanün me Amüchülan,” iei alon ewe Samol, ewe Kot mi Unusen Manaman, i ewe a nom iei, ewe a fen nonom me ewe epwe feito me mürin. ^{*}

Künaan Johannes usun Kraist

1.9-20

⁹Ngang Johannes, pwiimi we lon Jesus, üa chienenikemi lon ämi likitü fän mosonotam lon ewe riaföü mi tori chokewe ir chon mwün Kraist. Ra anomuei won ewe fanü Patmos pokiten üa arongafeili än Kot kapas me ewe let Jesus a pwärätä. ¹⁰ Lon ewe Ränin ach Samol üa nom lon Ngün, iwe, üa rongorong eu möngüngü mi leüömong a wewe ngeni efoch rappwa, a kapas me lükisöküri. ¹¹ A apasa, “Kopwe makkeetiu lon toropwe mine ka küna o kopwe tinala ngeni ekewe fisu mwichefel: Efisos, Smirna, Perkamon, Tiatira, Sartis, Filatelfia me Laotisea.”

¹² Mürin üa kuluei pwe üpwe nengeni iö we a kapas ngeniei. Iwe, üa küna fisu lenien atittin seni kolt, ¹³ nge lukalapen ekewe fisu lenien atittin a wor eman a usun chök lapalapen eman nöün aramas, a üföüf echö üf mi tametiu tori apachapachan o a riri ngeni fän mwärin efoch riri seni kolt. ^{*} ¹⁴ Meten möküran a pwechepwech usun pwechen ülen sip, ika pwech usun pwechepwechen sno. Föün mesan ra wewe ngeni pulopulen ekkei, ^{*} ¹⁵ pachapachan ra meriwewiw usun chök piras mi limelim me amis, nge möngüngün a usun chök ngüngün noon won woch. ^{*} ¹⁶ A amwöchü fuföü fü lon pöüifichin, nge efoch ketilas mi seisei me ruupekin a itiwu seni lon awan. Won mesan a saramaram usun saramen akkaren leoloas. ¹⁷ Iwe, lupwen üa küna i, üa chapetiu arun pechen, nge üa usun chök eman aramas mi mäla. Mürin a wätä pöüifichin woi o apasa, “Kosap niuokus! Ngang ewe Aemanün me ewe Amüchülan. ^{*} ¹⁸ Ngang ewe mi manau! Üa mäla, nge iei üa manau tori feilfeilachök. A wor ai nemenem won mäla me ewe lenien sotup. ¹⁹ Iei kopwe makkei ekewe mettoch ka küna, ekewe mettoch a wor iei, pwal ekewe mettoch repwe

^{*} **1:4:** Eks 3.14; Pwär 4.5 ^{*} **1:5:** Ais 55.4; Kölf 89.27 ^{*} **1:6:** Eks 19.6; Pwär 5.10 ^{*} **1:7:** Tan 7.3; Mat 24.30; Mark 13.26; Luk 21.27; 1.Tes 4.17; Sek 12.10; Joh 19.34,37 ^{*} **1:8:** Pwär 22.13; Eks 3.14 ^{*} **1:13:** Tan 7.13; 10.5 ^{*} **1:14:** Tan 7.9; 10.6 ^{*} **1:15:** Is 1.24; 43.2 ^{*} **1:17:** Ais 44.6; 48.12; Pwär 2.8; 22.13

fis me mürin. ²⁰Iei wewen ewe monomonen ekewe fűfűű fű ka kűna me lon pűűifichi, pwal wewen ekewe fisu lenien atittin seni kolt: ekewe fűfűű fű, ir ekewe chon kűnűűn ekewe fisu mwichefel, nge ekewe fisu lenien atittin, ir ekewe fisu mwichefel.

2

Ewe pworaus fűn iten ewe mwichefel lon Efisos

2.1-7

¹“Kopwe makkei ngeni ewe chon kűnűűn ewe mwichefel lon Efisos: Iei alon ewe eman mi amwűchű ekewe fűfűű fű lon pűűifichin, ewe mi fetal lein ekewe fisu lenien atittin seni kolt. ²űa silei om kewe fűfűű, om angang weires me om likitű fűn mosonotam. űa silei pwe kosap etiwa ekewe aramasangau. Ka sotuni chokewe mi apasa pwe ir soukűnű, nge sap ir soukűnű, iwe, ka mefi pwe ir chon chofona. ³Ka likitű fűn mosonotam, ka tolong lon riafűű fűn itei, nge kosap fangatű. ⁴Nge iei met űpwe pűűenuk won: Iei kosap chűen echeniei, usun om echeniei me lepoputűn. ⁵Kopwe chechemeni ia ka tur me ie, kopwe aier seni om tipis o fűri ekewe fűfűű ka fűri me lepoputűn. Nge are kosap aier seni om tipis, űpwe feito reűm o angei senuk om we lenien atittin seni lenian. ⁶Nge iei met a wor reűm űa efich: Ka oput mine ekewe chon Nikolaus ra fűri, usun pwal ngang űa oput.

⁷Are a wor selingen eman epwe rongorong mine Ngűnmifel a űreni ekewe mwichefel! İű mi pwora ngeni mine a ngau űpwe mwűtatű pwe epwe mongű seni ewe irűn manau mi nom lon űn Kot we tanipi.” ✧

Ewe pworaus fűn iten ewe mwichefel lon Smirna

2.8-11

⁸“Kopwe makkei ngeni ewe chon kűnűűn ewe mwichefel lon Smirna: Iei alon ewe Aemanű me ewe Aműchűlan, ewe mi műla o manausefűl. ✧ ⁹űa silei om kewe riafűű. űa silei pwe ka wűűngau, nge ka wesewesen pisekisek. űa pwal silei pwe ka kűna turunufas me ren chokewe mi apasa pwe ir chon Juta, nge sap ir chon Juta, pwe ir eu mwich űn Satan. ¹⁰Kosap niukusiti och riafűű epwe toruk. Nengeni, ewe Tefil epwe sotunikemi ren an epwe aturalong lon imwen fűtek ekoch me leimi, nge oupwe kűna riafűű lon űkűkűn engol rűn. Kopwe likitű le lűkű, inamwo ika kopwe tolong lon műla, iwe, űpwe ngonuk ewe mwűrin manau.

¹¹Are a wor selingen eman epwe rongorong mine Ngűnmifel a űreni ekewe mwichefel! İű mi pwora ngeni mine a ngau esap kűna feiengau ren ewe aruen műla.” ✧

Ewe pworaus fűn iten ewe mwichefel lon Perkamon

2.12-17

¹²“Kopwe makkei ngeni ewe chon kűnűűn ewe mwichefel lon Perka- mon: Iei alon ewe mi wor ren ewe ketilas mi seisei me ruupekin. ¹³űa silei ia ka nom ie, lon ewe leni ia űn Satan lenien motun king a pwal nom ie. Ka allűkűlűk ngeniei o kosap likitala om lűkűei, inamwo ika lon ewe fansoun Antipas, nei chon pwűrűtű mi allűkűlűk, a ninnila lon ewe leni ia Satan a nom ie. ¹⁴Nge mi wor ekoch mettoch űpwe pűűenuk won: A wor reűm ekoch ra aleasochis ngeni aitian Palam, űtewe mi aiti ngeni Palak usun an epwe emweni ekewe aramasen Israel ngeni tipis

✧ **2:7:** Ken 2.9; Pwűr 22.2; Is 28.13; 31.8 ✧ **2:8:** Ais 44.6; 48.12; Pwűr 1.17; 22.13 ✧ **2:11:** Pwűr 20.14; 21.8

ren an pese ngeniir, pwe repwe mongö föten uluulun anümwäl o repwe pwal föri föförün lisowu. ✨ ¹⁵ Ina chök usun a pwal wor reöm aramas mi aleasochis ngeni aitiien ekewe chon Nikolaus. ¹⁶ Iei kopwe aier seni om tipis! Are kosap aier üpwe müttir feito reöm o fiu ngeni ekewe aramas ren ewe ketilas mi itiwu seni lon awei.

¹⁷ Are a wor selingen eman epwe rongorong mine Ngünmifel a üreni ekewe mwichefel! Iö mi pwora ngeni mine a ngau üpwe ngeni och seni ewe mana mi monomon, üpwe pwal ngeni eman me eman leir eföü fau mi pwechepwech a mak won eu it mi fö, esap wor eman epwe silei pwe ewe chök eman mi angei.” ✨

Ewe pworaus fän iten ewe mwichefel lon Tiatira

2.18-29

¹⁸ “Kopwe makkei ngeni ewe chon künöön ewe mwichefel lon Tiatira: Iei alon ewe Nöün Kot, mesan ra wewe ngeni pulopulen ekkei, pachapachan ra meriweriw usun piras mi amis. ¹⁹ Üa silei om kewe föför. Üa silei om eäni chen, om allükülük, om angang me om mosonotam. Üa silei pwe mine ka föri iei a lapala seni mine ka föri me lepoputän. ²⁰ Nge iei met üpwe pölüenuk won: Ka mwüt ngeni ewe fefin Isipel mi püsin aita ngeni eman soufos fefin, pwe a asukul o emweningaua nei chon angang ar repwe föri föförün lisowu, repwe pwal mongö föten uluulun anümwäl. ✨ ²¹ Üa ngeni neminei fansoun an epwe aier seni an tipis, nge esap mochen ükütü seni an föförün lisowu. ²² Nengeni, üpwe apwüngü i me chokewe mi föri ar föförün lisowu ngeni ren eu samau, iwe, repwe tolong lon watten riaföü. Iei met üpwe föri, are resap aier seni ar kewe föför mi ngau ra förifengeni. ²³ Üpwe pwal niela nöün kana. Mürin chon ekewe mwichefel meinsin repwe silei pwe ngang ewe eman mi silei ekiiek me letipen aramas meinsin. Iwe, üpwe liwini ngeni eman me eman ükükün liwinin an föför. ✨

²⁴ Nge ekewe ekoch me leimi lon Tiatira ousap aleasochisi ei sokun kait mi ngau, ämi ousap kaiö met ekewe ekoch ra aita ngeni ‘alololun monomonen ekiiek Satan’, üpwe ürenikemi pwe üsap anomu womi och chou. ²⁵ Nge oupwe chök kamwöchünük won mine oua eäni tori üpwe war. ²⁶ Iö mi pwora ngeni mine a ngau o sopwela le föri letipei tori lesopolan, üpwe ngeni nemenem won ekewe mwü, ²⁷ usun chök ngang üa angei ai nemenem seni Semei. Epwe nemeni ir ren efoch wokomächä, epwe atatakisiiretiu usun sepi mi för seni pwül. ✨ ²⁸ Üpwe pwal ngeni ewe fütün rän.

²⁹ Are a wor selingen eman epwe rongorong mine Ngünmifel a üreni ekewe mwichefel!”

3

Ewe pworaus fän iten ewe mwichefel lon Sartis

3.1-6

¹ “Kopwe makkei ngeni ewe chon künöön ewe mwichefel lon Sartis: Iei alon ewe eman mi eäni ekewe füman ngünün Kot me ekewe fütüfü. Üa silei om kewe föför, pwe mi wor itom itä ka manau, nge ka mä.

² Kopwe nela! Kopwe apöchöküla mine a chüen wor reöm me mwen an

✨ **2:14:** Num 22.5,7; 31.16; Tut 23.4; Num 25.1-3 ✨ **2:17:** Eks 16.14-15; 16.33-34; Joh 6.48-50;

Ais 62.2; 65.15 ✨ **2:20:** 1.King 16.31; 2.King 9.22,30 ✨ **2:23:** Kölf 7.9; Jer 17.10; Kölf 62.12

✨ **2:27:** Kölf 2.8-9

epwe wesewesen mäla. Pun üa küna pwe om kewe föföör resap unusöch mwen mesen ai we Kot. ³ Iei mine kopwe chechemeni mine ka kaiö o mine ka rongorong, kopwe aleasochis o aier seni om tipis. Nge are kosap nela, üpwe feito womw usun eman chon solä, nge kosap silei ewe otun üpwe feito reöm. ✧ ⁴ Nge mi wor ekoch me leimi lon Sartis, ir resap alimengaua üfer. Iwe, repwe chiechi ngeniei fän üfer mi pwechepwech, pun ra fich ngeni. ⁵ Iö mi pwora ngeni mine a ngau epwe üföüf ei sokun üf mi pwechepwech, iwe, üsap amola itan seni ewe puken iten chon manau. Nge üpwe pwärätä pwe i nei mwen mesen Semei, pwal mwen mesen nöün kewe chon läng. ✧

⁶ Are a wor selingen eman, epwe rongorong mine Ngünmifel a üreni ekewe mwichefel!”

Ewe pworaus fän iten ewe mwichefel lon Filatelfia

3.7-13

⁷ “Kopwe makkei ngeni ewe chon künöön ewe mwichefel lon Filatelfia: Iei alon ewe eman mi pin o let, ewe mi amwöchü ewe ki än Tafit. Iwe, met a suki ngeni ewe ki esap wor eman a tongeni öpüngala, nge met a öpüngala esap wor eman a tongeni suki. ✧ ⁸ Üa silei om kewe föföör. Ngeni, üa anomu mwomw eu asam mi suk, esap wor eman a tongeni öpüngala. Pun üa silei pwe a kisikis om tufich, nge ka aleasochisi ai kewe kapas, o kosap amamäsini itei. ⁹ Ngeni, chokewe seni ewe mwich än Satan, ir mi apasa pwe ir chon Juta, nge sap ir chon Juta, pwe ra chofona, üpwe föri pwe repwe feito o chapetiu arun pecheöm. Ir meinisin repwe mefi pwe ngang üa echenuk. ✧ ¹⁰ Pokiten ka tümwünü ai kewe kapas, pwe kopwe likitü fän mosonotam, üpwe pwal tümwünuk seni ewe fansoun riaföü epwe feito won unusen fanüfan, pwe epwe sotuni aramas meinisin mi nom won fanüfan. ¹¹ Üpwe warekai. Kopwe kamwöchünük won mine ka eäni, pwe esap wor eman epwe angei senuk mwärum. ¹² Iö mi pwora ngeni mine a ngau üpwe föri pwe epwe efoch ür lon än ai we Kot we imwenfel, nge esap chüen towu seni. Iwe, üpwe makkei won iten ai we Kot, pwal iten än ai we Kot we telinimw, ewe Jerusalem mi fö, epwe feitiu me läng seni ai we Kot, üpwe pwal makkei won itei we mi fö. ✧

¹³ Are a wor selingen eman epwe rongorong mine Ngünmifel a üreni ekewe mwichefel.”

Ewe pworaus fän iten ewe mwichefel lon Laotisea

3.14-22

¹⁴ “Kopwe makkei ngeni ewe chon künöön ewe mwichefel lon Laotisea: Iei alon ewe eman mi iteni Amen, ewe Chon Pwärätä mi allükülük o let, i popun förien Kot meinisin. ✧ ¹⁵ Üa silei om kewe föföör, üa silei pwe kosap pat, kosap pwal pwiich. Amwo kopwe pat ika pwiich. ¹⁶ Nge pokiten ka nom lefilen pat me pwiich, iei mine üpwe kusufukowu seni lon awei. ¹⁷ Pun ka apasa, ‘Ngang üa pisekisek o wöü, esap wor ai osupwang.’ Nge en kosap silei pwe ka mwelele o attong, ka wöüngau me chun o selesa. ¹⁸ Iei mine üpwe ürenuk mine kopwe föri: Kopwe kamö seniei kolt mi limelim ren ekkei, pwe kopwe pisekisekila. Kopwe pwal kamö üf mi pwechepwech, pwe kopwe üföüf o pwöülüela asäwen om selesa. Kopwe pwal kamö säfeen mas, pwe kopwe säfeeni mesom pwe kopwe tongeni

✧ **3:3:** Mat 24.43-44; Luk 12.39-40; Pwär 16.15 ✧ **3:5:** Eks 32.32-33; Kölf 69.28; Pwär 20.12; Mat 10.32; Luk 12.8 ✧ **3:7:** Ais 22.22; Hiop 12.14 ✧ **3:9:** Ais 49.23; 60.14; 43.4 ✧ **3:12:** Pwär 21.2; Ais 62.2; 65.15 ✧ **3:14:** SalF 8.22

küna mwomw. ¹⁹Üa apwüngü o amiriti chokewe meinisin üa tongeer. Iei mine kopwe achocho o aier seni om tipis. ✧ ²⁰Nengeni, üa ü lükün asam o fichifich. Are eman epwe rongorong mweliei o suki ewe asam, üpwe tolong ren o mongö ren, nge i epwe mongö rei. ²¹Iö mi pwora ngeni mine a ngau üpwe mwüt ngeni pwe epwe etiei le mot won ewe lenien motun king, usun pwal ngang üa pwora o mot ren Semei won an lenien motun king.

²²Are a wor selingen eman epwe rongorong mine Ngünmifel a üreni ekewe mwichefel!”

4

Än Kot lenien motun king lon läng

4.1-11

¹Mürin ei a pwal wor künaei, üa küna eu asam mi suk lon läng. Iwe, mwelien eman mi wewe ngeni tikin efoch rappwa, üa fen rongorong me mwan, a üreniei, “Kopwe feito ikei, pwe üpwe aiti ngonuk met epwe fokun fis mürin ei.” ²Lon ewe chök otun üa nom lon Ngün. Ikenan lon läng a wor eu lenien motun king, eman a mot won. ³Won mesen ewe mi mot a saramaram usun ekewe fau aüchea mi arauarau fetil me par iter jasper me karnelian, nge pwelin ünükün ewe lenien motun king a wor eu resim mi wewe ngeni anüen eföü fau aüchea itan emerald. ✧ ⁴Iwe, pwelin ünükün ewe lenien motun king a wor rüwe me rüanü lenien motun king ia rüwe me föman souakom ra mot ie, ra üföüf üf mi pwechepwech o mwärämwär mwärämwär seni kolt. ⁵Seni ewe lenien motun king a towu inefi, ngüngü me chopun chopulap. Me mwen ewe lenien motun king a wor füfoch töl mi tin, ir ekewe füman Ngünün Kot. ✧ ⁶Me mwen ewe lenien motun king a pwal wor och mi usun chök eu matau seni kilas, a kurufat usun ewe fau itan kristal.

Iwe, pwelin ünükün ewe lenien motun king me rüanü pekin a wor föman mönümanau, ra kula ren föün mas me mwer pwal me lükisökürür. ⁷Ewe aemanün mönümanau a wewe ngeni eman laion, ewe aruomanün a wewe ngeni eman ätemwänin kow, ewe aülümanün won mesan a wewe ngeni won mesen eman aramas, nge ewe afömanün a wewe ngeni eman ikel mi äkkäs. ✧ ⁸Eman me eman ekewe föman mönümanau a wor wonofoch pöükässin, nge won me fän pöükässir ra kula ren föün mas. Lerän me lepwin resap ükütiu le kölü ei köl:

“A pin, a pin, a pin ewe Samol Kot mi Unusen Manaman,

i ewe a fen nonom, ewe a nom iei me ewe epwe feito me mürin.” ✧

⁹Iwe, ekewe föman mönümanau ra köl kölün ling me iteüoch me kilisou ngeni ewe eman mi mot won ewe lenien motun king, ewe mi manau tori feilfeilachök. Lupwen ra föri iei usun, ¹⁰ekewe rüwe me föman souakom ra chapetiu me mwen ewe eman mi mot won ewe lenien motun king o fel ngeni ewe mi manau tori feilfeilachök. Ra isetiu mwäriir kewe me mwen ewe lenien motun king o apasa,

¹¹“Ach Samol me ach Kot, en ka fich ngeni

om kopwe angei ling me iteüoch me manaman.

Pun ka föri mettoch meinisin,

nge ren letipom ra fis o manau.”

✧ **3:19:** SalF 3.12; Ipr 12.6 ✧ **4:3:** Is 1.26-28; 10.1 ✧ **4:5:** Eks 19.16; Pwär 8.5; 11.19; 16.18; Is 1.13; Pwär 1.4; Sek 4.2 ✧ **4:7:** Is 1.5-10; 10.14 ✧ **4:8:** Kölf 141.2

5

Ewe toropwe mi numunumula me ewe Lam

5.1-14

¹ Iwe, üa küna echö toropwe mi numunumula lon pöüfichin ewe mi mot won ewe lenien motun king. A kula ren mak lepekin me rüepék, nge a pwau ren fisu pwau. ✧ ² Mürin üa küna eman chon läng mi pöchökül a kökkö ren mwelian mi leüömong, “Tó a fich ngeni an epwe ülei ekewe pwau o suki ewe toropwe?” ³ Nge esap wor eman lon läng ika won fanüfan ika lon lenien sotup a tongeni suki ewe toropwe mi numunumula o nenelong lon. ⁴ Iwe, üa fokun kechü, pun resap küna eman mi fich ngeni an epwe suki ewe toropwe ika nenelong lon. ⁵ Mürin eman me lein ekewe souakom a üreniei, “Kosap kechü! Nengeni, ewe Laion seni ewe ainangen Juta, ewe mwirimwirin Tafit mi iteföüla a pwora o win, i epwe tongeni ülei ekewe fisu pwau o suki ewe toropwe.” ✧

⁶ Mürin üa küna eman Lam a ütá lukalapan mwen ewe lenien motun king, nge ekewe föman mönümanau me ekewe rüwe me föman souakom ra pweü ünükün. Ewe Lam a usun itá nge a ninnila. A wor füföch mächän me füföü föün mesan, ir ekewe füman Ngünün Kot ra titila won unusen fanüfan. ✧ ⁷ Iwe, ewe Lam a feila o a angei ewe toropwe seni pöüfichin ewe mi mot won ewe lenien motun king. ⁸ Lupwen a föri iei usun, ekewe föman mönümanau me ekewe rüwe me föman souakom ra chapetiu mwen ewe Lam. Eman me eman a wor an pisekin ettik me eu sepi mi ur ren apach mi pwokus, iei än ekewe chon pin iotek. ✧ ⁹ Iwe, ra kölü echö köl mi fö:

“En ka fich ngeni om kopwe angei ewe toropwe mi numunumula,
ka pwal fich ngeni om kopwe ülei pwaun kewe.

Pun en ka ninnila,

nge ren chaom ka möni aramas fän iten Kot,

ekewe aramas seni ekewe ainang me kapas me mwü

me sokopaten aramas meinisin. ✧

¹⁰ Ka för seniir eu mwün souasor, pwe repwe angang ngeni ach Kot,
nge repwe nemenem won fanüfan.” ✧

¹¹ Mürin üa nenengeni o rongorong möngüngün chomong ngeröün chon läng. Ra ütá pweülin ünükün ewe lenien motun king, pwal ünükün ekewe föman mönümanau me ekewe souakom, ✧ ¹² ra köl ren ngingi mi leüömong:

“Ewe Lam mi ninnila a fich ngeni

an epwe angei manaman, wöü, tipachem me pöchökül, iteüöch, ling me ingemwar.”

¹³ Iwe, üa rongorong pwe förien Kot meinisin lon läng pwal won fanüfan, lon lenien failol pwal lon matau ra kölü ei köl:

“Ingemwar me iteöch me ling me manaman

ngeni ewe mi mot won ewe lenien motun king me ewe Lam tori feilfeilachök.” ¹⁴ Iwe, ekewe föman mönümanau ra apasa, “Amen!”

Nge ekewe souakom ra chapetiu o fel ngeni Kot me ewe Lam.

✧ 5:1: Is 1.18; 10.12; Ais 29.11 ✧ 5:5: Ken 49.9; Ais 11.1,10 ✧ 5:6: Ais 53.7; Sek 4.10 ✧ 5:8: Kölf 141.2 ✧ 5:9: Kölf 33.3; 98.1; Ais 42.10 ✧ 5:10: Eks 19.6; Pwär 1.6 ✧ 5:11: Tan 7.10

6

*Ekewe fisu pwau**6.1-17*

¹ Mürin üa küna pwe ewe Lam a ülei ewe aeuin pwau seni ekewe fisu. Iwe, üa rongorong pwe eman me lein ekewe föman mönūmanau a apasa ren mwelian mi wewe ngeni chopun chopulap, “Etto!” ² Iwe, üa nenengeni o üa küna eman oris mi pwechepwech, nge ewe mi mot won a amwöchü efoch likapich, a pwal angei epa mwärämwär. Iwe, a feila, a pworä o win. ✧

³ Mürin ewe Lam a ülei ewe aruen pwau. Üa rongorong pwe ewe aruomanün mönūmanau a apasa, “Etto!” ⁴ Iwe, pwal eman oris mi parapar a towu, nge ewe mi mot won a mwümwü ngeni an epwe aworato maun won fanüfan, pwe aramas repwe nifengeniir. A angei efoch ketilas mi langatam. ✧

⁵ Mürin ewe Lam a ülei ewe aülüngatin pwau, iwe, üa rongorong ewe aülūmanün mönūmanau a apasa, “Etto!” Iwe, üa nenengeni o üa küna eman oris mi chochol, nge ewe mi mot won a amwöchü eu kilo lon pöün. ✧ ⁶ Iwe, üa rongorong och mi wewe ngeni eu möngüngü mi feito seni lein ekewe föman mönūmanau a apasa, “Liwinin ruu paun pilawa mi amas seni föün wiich iei ükükün peiofen eman chon angang lon eu rän, pwal liwinin wonu paun pilawa mi amas seni föün parli iei ükükün peiofen eman chon angang lon eu rän. Nge kosap afeiengaua ekewe irä olif me ekewe irän wain!”

⁷ Mürin ewe Lam a ülei ewe arüanün pwau, iwe, üa rongorong ewe afömanün mönūmanau a apasa, “Etto!” ⁸ Iwe, üa nenengeni o üa küna eman oris mi sawepwech, nge ewe mi mot won a iteni mäla o ewe lenien sotup a tapw me mürin. A wor ar nemenem won eu lerüanün chon fanüfan ar repwe niirela ren maun, mailengita, samau me manmwacho. ✧

⁹ Mürin ewe Lam a ülei ewe alimuen pwau. Iwe, üa küna fän ewe rongen asor ngünün chokewe mi ninnila pokiten ar arongafeili än Kot kapas o eäni allükülük lon ar pwärätä itan. ¹⁰ Ra kökkö fän mwelier mi leüömong, “Äm Samol mi Unusen Manaman, ka pin o let. Ifa langatamen fansoun tori om kopwe apwüngü ekewe aramas won fanüfan o kopwe ngeniir chappen ar nikeemila?” ¹¹ Mürin Kot a ngeni eman me eman leir echö üf mi pwechepwech o a üreniir, pwe repwe mwo asösö ekis chök fansoun möchomoch, tori epwe unus iteiten chiechier kewe chon angang me pwiir kewe repwe ninnila usun chök ir.

¹² Iwe, üa nenengeni pwe ewe Lam a ülei ewe awonuen pwau. A fis eu chechekin fanü mi fokun lapalap. Akkar a fokun rochola usun chök mangaku mi chol seni tuk, nge ewe maram a fokun parala usun chök paren cha. ✧ ¹³ Iwe, ekewe fü ra turutiu won fanüfan usun chök föün ewe irä fiik resamwo nup ra turutiu, lupwen eu asepwäl mi pöchökül a amworeretiu. ✧ ¹⁴ Läng a numufengen usun chök echö toropwe a numufengen o morola, nge ekewe chuk meinisin me ekewe fanüen leset ra mwöküt seni lenier. ✧ ¹⁵ Mürin ekewe kingen fanüfan, ekewe sounemenem me meilapen sounfiu, ekewe chon pisekisek me ekewe mi

✧ **6:2:** Sek 1.8; 6.3,6 ✧ **6:4:** Sek 1.8; 6.2 ✧ **6:5:** Sek 6.2,6 ✧ **6:8:** Is 14.21 ✧ **6:12:** Pwär 11.13; 16.18; Ais 13.10; Sow 2.10,31; 3.15; Mat 24.29; Mark 13.24-25; Luk 21.25 ✧ **6:13:** Ais 34.4 ✧ **6:14:** Pwär 16.20

wor maner, pwal ekewe aramas meinisin, ekewe amanau me ekewe mi ngas ra aopeer lon ekewe föüimw pwal fän säpereperen ekewe achau won ekewe chuk. ✧ ¹⁶ Ra kökkö ngeni ekewe chuk me ekewe achau, “Oupwe turutiu wom o aopakem seni mesen ewe eman mi mot won ewe lenien motun king, pwal seni än ewe Lam song. ✧ ¹⁷ Pun ewe rän mi lap a war, ewe ränin ar song, nge iö epwe tongeni ü ngeni?” ✧

7

Ekewe ipükü faik me rüanüngeröü aramasen Israel mi pwau

7.1-8

¹ Mürin ei, üa küna föman chon läng ra ütä le pwokukun fanüfan me rüanü, o ra amwöchü ekewe rüanü asepwäl, pwe esap chüen wor asepwäl a enien won fanüfan, ika won matau, ika won efoch irä. ✧ ² Mürin üa küna pwal eman chon läng, a feitä seni ötiu o a uwei ewe pwau än ewe Kot mi manau. Iwe, a kökköwu ren mwelian mi leüömong ngeni ekewe föman chon läng, chokewe Kot a ngeniir manaman, pwe repwe afeiengaua fanüfan me matau. ³ A apasa, “Ousap afeiengaua fanüfan, ewe matau ika ekewe irä, tori aipwe pwauni won chamwen ekewe chon angang ngeni ach we Kot.” ✧ ⁴ Iwe, üa rongorong pwe iteiten chokewe mi pwau won chamwer ükükün ipükü faik me rüanüngeröü, ir seni ekewe ainangen Israel meinisin. ⁵ Seni ewe ainangen Juta engol me ruungeröü, seni ewe ainangen Rupen engol me ruungeröü, seni ewe ainangen Kat engol me ruungeröü, ⁶ seni ewe ainangen Aser engol me ruungeröü, seni ewe ainangen Naftali engol me ruungeröü, seni ewe ainangen Manasa engol me ruungeröü, ⁷ seni ewe ainangen Simeon engol me ruungeröü, seni ewe ainangen Lefi engol me ruungeröü, seni ewe ainangen Isakar engol me ruungeröü, ⁸ seni ewe ainangen Sepulon engol me ruungeröü, seni ewe ainangen Josef engol me ruungeröü, seni ewe ainangen Peniamin engol me ruungeröü.

Ewe mwich mi fokun chocho

7.9-17

⁹ Mürin ei, üa küna eu mwich mi fokun chocho, esap wor eman aramas a tongeni aleaniir. Ra feito seni sokopaten mwich, ainang, mwü me kapas meinisin. Iwe, ra ütä me mwen ewe lenien motun king me ewe Lam, ra üföüf üf mi pwechepwech o ra amwöchü paan nü lepöür. ¹⁰ Iwe, ra kökkö ren mwelier mi leüömong, “Sia küna manau me ren ach we Kot, ewe mi mot won ewe lenien motun king, pwal me ren ewe Lam.” ¹¹ Ekewe chon läng meinisin ra ütä pwelin ünükün ewe lenien motun king, pwal ünükün ekewe souakom me ekewe föman möntümanau. Mürin ra chapetiu mwen ewe lenien motun king o fel ngeni Kot. ¹² Ra apasa, “Amen! Feiöch, ling, tipachem, kilisou, iteüöch, manaman me pöchökül än ach Kot tori feilfeilachök! Amen!” ¹³ Mürin eman me lein ekewe souakom a aisiniei, “Iö kewe ir mi üföüf üf mi pwechepwech, nge ia ra feito me ie?” ¹⁴ Üa pölüeni, “Ai samol, üsap silei, en mi silei.” Iwe, a üreniei, “Ekei aramas, ir chokewe mi towu seni ewe riaföü mi lapalap. Ra limeti üfer o apwecher lon chaan ewe Lam. ✧ ¹⁵ Iei popun ra ütä mwen än Kot we lenien motun king o ra angang ngeni lerän me lepwin lon imwan imwenfel. Iwe, ewe mi mot won ewe

✧ **6:15:** Ais 2.19,21 ✧ **6:16:** Os 10.8; Luk 23.30 ✧ **6:17:** Sow 2.11; Mal 3.2 ✧ **7:1:** Jer 49.36; Tan 7.2; Sek 6.5 ✧ **7:3:** Is 9.4,6 ✧ **7:14:** Tan 12.1; Mat 24.21; Mark 13.19

lenien motun king epwe nonom rer o tütümwünüür. ¹⁶ Resap chüen echik ika kaka, akkar esap chüen pwichitiir, nge och pwichikar esap toriir. ✧
¹⁷ Pun ewe Lam mi nom lukalapan mwen ewe lenien motun king epwe nöür chon mas o emweniir ngeni ekewe puächen kolukun manau. Iwe, Kot epwe talüpwasei chönün mas seni won meser meinisin.” ✧

8

Ewe afisuen pwau

8.1-5

¹ Iwe, lupwen ewe Lam a ülei ewe afisuen pwau a wor eu lüa lon läng lon ükükün esop awa. ² Mürin üa küna ekewe füman chon läng mi ütä mwen mesen Kot, pwe ra angei füfoch rappwa.

³ Iwe, pwal eman chon läng mi amwöchü eu sepi seni kolt fän iten apach mi pwokus a feito o a ütä ren ewe rongen asor. A angei chomong apach mi pwokus, pwe epwe achu ngeni än ekewe chon pin iotek pwe epwe eäni asor won ewe rongen asor seni kolt mi nom mwen ewe lenien motun king. ✧ ⁴ Iwe, ötütün ewe apach mi pwokus a feitä fiti än ekewe chon pin iotek seni lepöün ewe chon läng mi ütä mwen mesen Kot. ⁵ Mürin ewe chon läng a angei ewe sepi fän iten apach mi pwokus, a amasoua ren ekewe molien ekkei mi nom won ewe rongen asor o a monetiu won fanüfan. Iwe, a fis ngüngü, chopun chopulap, fifi me chechchin fanü. ✧

Ekewe rappwa

8.6-9.21

⁶ Mürin ekewe füman chon läng mi amwöchü ekewe füfoch rappwa ra amolätä ar repwe le ettikiir.

⁷ Iwe, lupwen ewe aemanün a ettiki nöün rappwa, üten fau me ekkei mi nofitfengen me cha ra turutiu won fanüfan. Eu leülüngatin fanüfan a karala, pwal eu leülüngatin irä me ekewe fetil meinisin. ✧

⁸ Mürin ewe aruomanün chon läng a ettiki nöün rappwa. Iwe, och mi wewe ngeni eu chuk mi watte mi ngetenget ren ekkei a turutiu le matau. Iwe, eu leülüngatin ewe matau a wiliti cha, ⁹ o eu leülüngatin mönūmanau mi nom leset ra mäla, pwal eu leülüngatin ekewe sip ra karala.

¹⁰ Mürin ewe aülūmanün chon läng a ettiki nöün rappwa. Iwe, eföü fü mi watte a ngetenget usun efoch töl a turutiu seni läng o turutiu won eu leülüngatin ekewe chanpupu me ekewe puächen koluk. ✧ ¹¹ Iten ewe fü “Maras”. Iwe, eu leülüngatin ekewe koluk ra maras, nge chomong aramas ra mäla ren ar ün ewe koluk, pun a maras. ✧

¹² Mürin ewe afömanün chon läng a ettiki nöün rappwa. Iwe, eu leülüngatin ewe akkar a rochola, pwal eu leülüngatin ewe maram me eu leülüngatin ekewe fü, pwe eu leülüngatir resap chüen saram. Lerän esap wor saram lon ükükün rüanü awa, lepwin esap pwal wor saram lon ükükün rüanü awa. ✧

¹³ Mürin üa nenengeni o rongorong möngüngün eman ikel mi äkkäs tekiatä fän läng o a kökkö fän leüömong, “Feiengau, feiengau, feiengau ngeni chokewe meinisin mi nom won fanüfan lupwen ekewe ülūman chon läng repwe pwal ettiki en me nöün rappwa.”

✧ 7:16: Ais 49.10 ✧ 7:17: Kölf 23.1; Is 34.23; Kölf 23.2; Ais 49.10; 25.8 ✧ 8:3: Am 9.1; Eks 30.1,3 ✧ 8:5: Lif 16.12; Is 10.2; Eks 19.16; Pwär 11.19; 16.18 ✧ 8:7: Eks 9.23-25; Is 38.22 ✧ 8:10: Ais 14.12 ✧ 8:11: Jer 9.15 ✧ 8:12: Ais 13.10; Is 37.7; Sow 2.10,31; 3.15

9

¹ Mürin ewe alimanün chon läng a ettiki nöün rappwa. Iwe, üa küna eföü fü a turutiu won fanüfan o a angei kien ewe pwang mi alolol lon fanüfan. ² Lupwen ewe fü a suki ewe pwang mi alolol, ötüöt a ötüötä seni lon, usun ötüötün eu um mi watte. Akkar me enienin asepwäl ra rochola ren ewe ötüöt seni lon ewe pwang mi alolol. ✧ ³ Mürin lifichimas ra towu seni lon ewe ötüöt o sotiu won fanüfan. Iwe, ra angei ewe chök sokun manaman inenmönükam ra eäni. ✧ ⁴ Iwe, Kot a allük ngeniir pwe resap afeingaua ekewe fetil ika ekewe petewöl ika ekewe irä, nge repwe chök afeingaua ekewe aramas resap eäni än Kot we pwau won chamwer. ✧ ⁵ Esap mwüt ngeni ekei lifichimas pwe repwe niela ekewe aramas, nge repwe chök ariaföüür lon ükükün limu maram. Weiresin ar riaföü a wewe ngeni weiresin riaföün eman ren küüwen eman inenmönükam. ⁶ Lon fansoun ekei limu maram aramas repwe äneänei ar repwe mäla, nge resap tongeni mäla. Repwe mochen mäla, nge mäla epwe sü seniir. ✧

⁷ Iwe, lapalapen ekewe lifichimas ra wewe ngeni oris mi molotä ngeni maun. Won mökürer a wor och mi usun chök mwärämwär seni kolt, nge won meser ra wewe ngeni won mesen aramas. ✧ ⁸ Meten mökürer ra usun chök meten möküren fefin, nge ngiir ra wewe ngeni ngiin laion. ✧ ⁹ Leupwer a pwölüla ren och cheech mi usun chök chechen leupw seni mächä, nge üngüngün pökässiir ra wewe ngeni üngüngün chomong wokenin maun, oris ra nuki lupwen ra sälong lon maun. ✧ ¹⁰ A wor wüküür me fölüür usun chök ekewe inenmönükam, o ren wüküür a wor manaman lon, pwe repwe tongeni afeingaua aramas lon ükükün limu maram. ¹¹ Iwe, a wor eman nöür king mi nemeniir, i ewe chon läng mi nemeni ewe leni mi alolol. Itan lon kapasen Ipru Apaton, nge itan lon kapasen Krik Apolion (wewen “Ewe chon Kata”).

¹² A wes ewe aeuin feingau, nengeni, a chüen wor ruu feingau repwe war.

¹³ Mürin ewe awonomanün chon läng a ettiki nöün rappwa. Iwe, üa rongorong eu möngüngü a feito seni ekewe rüanü pwokukun ewe rongen asor seni kolt mi nom mwen mesen Kot. ✧ ¹⁴ Ewe möngüngü a apasa ngeni ewe awonomanün chon läng mi wor an rappwa, “Kopwe apichala ekewe föman chon läng mi fötek arun ewe chanpupu mi watte Oifrat.” ¹⁵ Iei usun ekewe föman chon läng ra pichila, pun ra fen molotä fän iten ei chök awa, ei chök rän, ei chök maram pwal ei chök ier, pwe repwe niela eu leülüngatin chon fanüfan meinisin. ¹⁶ Üa rongorong pwe iteiten ekewe sounfiu mi wawa oris ükükün ruupükü million. ¹⁷ Iwe, lon künaei we üa küna ekewe oris me ekewe chon wawa, a iei usur: a wor chechen leupwer mi parapar usun ekkei, a arauarau usun ewe fau aüchea itan safaiä, a pwal oleol usun primston, nge mökürer ra wewe ngeni möküren laion. Iwe, seni lon awer a towu ekkei, ötüöt me primston. ¹⁸ Iwe, eu leülüngatin chon fanüfan ra mäla ren ekei ülüngat feingau: ewe ekkei, ewe ötüöt me ewe primston mi towu seni awen ekewe oris. ¹⁹ Iwe, manamanen ekewe oris a nom lon awer pwal lon wüküür kewe, pun wüküür kewe ra wewe ngeni serepenit mi wor mökürer ra aea le afeingaua aramas.

²⁰ Iwe, ekewe lusun aramas resap mäla ren ekei feiengau resap aier seni mine ra föri ren pöür. Resap ükütiu le fel ngeni ekewe anün rochopwak me ekewe uluulun anümwäl mi för seni kolt, silifer, piras, fau me mwüch, ir ekewe uluulun anümwäl resap tongeni küna ika rongorong ika fetal. ✧ ²¹ Resap pwal aier seni ar niela aramas, ar föri angangen rong me föri föförün lisowu ika ar solä.

10

Ewe chon läng mi amwöchü echö kükün toropwe

10.1-11

¹ Mürin üa küna pwal eman chon läng mi pöchökül, a feitiu seni läng. A pwölüpwlüla ren eu kuchu o eu resim a pwäli won möküran. Won mesan a usun chök akkar, nge pechen kana ra usun chök üreekkei. ² A amwöchü lon pöün echö kükün toropwe mi suk. Iwe, a ipwetiu won matau ren pelifichin pechen, nge a ipwetiu won fanü ren pelimöngün pechen. ³ Iwe, a kökkö ren mwelian mi leüömong mi wewe ngeni wörüwörün eman laion. Mürin an kökkö, fisu chopulap ra leüömong le pölüeni. ⁴ Lupwen ekewe fisu chopulap ra kapas, üa mochen makkei met ra apasa. Nge üa rongorong mwelian eman mi kapas seni läng, “Kopwe amonomonala mine ekewe fisu chopulap ra apasa. Kosap makkeetiu!”

⁵ Mürin ewe chon läng, ewe üa küna pwe a ipw won matau ren efoch pechen, nge ren efoch a ipw won fanü a aitetä pöüifichin läng ⁶ o a pwon ren an öpölü iten Kot ewe mi manau tori feilfeilachök, ewe mi föri läng me fanüfan me matau pwal meinisin mine a nom lor. Iwe, ewe chon läng a apasa, “Esap chüen wor fansoun witiwit. ⁷ Nge lon ena rän lupwen ewe afümanün chon läng epwe ettiki nöün rappwa, Kot epwe apwönüetä an we akot mi monomon, usun a fen asile ngeni nöün kewe chon angang ekewe soufos.” ✧

⁸ Mürin ewe möngüngü üa fen rongorong seni läng a kapasfäl ngeniei, “Kopwe feila o angei ewe toropwe mi suk seni lepöün ewe chon läng mi ipw won matau pwal won fanü.” ⁹ Iei mine üa feila ren ewe chon läng o tüngor ngeni, pwe epwe ngeniei ewe kükün toropwe. Iwe, a üreniei, “Kopwe angei o äni. Epwe maras me lon lukom, nge epwe arar me lon awom usun chönün chunen.” ¹⁰ Mürin üa angei ewe kükün toropwe seni lon pöün o äni. Iwe, nennan me lon awei a arar usun chönün chunen. Nge me mürin ai orumala a maras me lon lukei. ✧ ¹¹ Iwe, eman a üreniei, “Kopwe fokun osunisefäli usun chomong mwü, ainang, kapas me king kana.”

11

Ekewe ruoman chon pwärätä

11.1-14

¹ Mürin eman a ngeniei efoch wok mi wewe ngeni efoch wok minen aükük. Iwe, a üreniei, “Kopwe feila o aükü än Kot we imwenfel me ewe rongen asor, kopwe pwal aleani chokewe mi fel lon. ✧ ² Nge kosap aükü ekewe leni lükün ewe imwenfel, pun Kot a ngeni ekewe chon lükün Israel ar repwe puri ewe Telinimw mi Pin lon ükükün faik me ruu maram. ✧

✧ 9:20: Kölf 115.4-7; 135.15-17; Tan 5.23 ✧ 10:7: Eks 20.11; Tut 32.40; Tan 12.7; Am 3.7

✧ 10:10: Is 2.8-3.3 ✧ 11:1: Is 40.3; Sek 2.1-2 ✧ 11:2: Luk 21.24

³ Iwe, üpwe tinala nei kewe ruoman chon pwärätä mi üföüf üf seni tuk, repwe arongafeili än Kot kapas lon ekewe engöröü ruopükü wone rän.”

⁴ Ekei ruoman chon pwärätä, ir ekewe ruofoch irä olif me ekewe ruofoch lenien atittin mi ü mwen ewe Samolun fanüfan. ✱ ⁵ Ika chon oputer ra mochen afeiengauer, ekkei epwe ngetewu seni lon awer o keniirela. Iei usun, ika eman a mochen afeiengauer epwe ninnila. ⁶ A wor ar manaman ar repwe pinei läng pwe esap püngütiu üt lon ükükün ewe fansoun ra arongafeili än Kot kapas. A wor ar manaman won ekewe puächen koluk ar repwe awili ngeni cha. A pwal wor ar manaman ar repwe afeiengaua fanüfan ren sokopaten feiengau fansoun inet chök ra mochen. ✱

⁷ Iwe, lupwen repwe wes le arongafeili ar afalafal, ewe manmwacho mi towu seni lon ewe pwang mi alolol epwe maun ngeniir. Iwe, epwe akufuur o niirela, ✱ ⁸ nge somäär repwe nom won alen ewe telinimw watte, ia ar we Samol a iräpenges ie. Iten ei telinimw lon kapasen awewe Sotom me Isip. ✱ ⁹ Iwe, lon ükükün ülüngat esop rän aramasen ekewe mwü me ainang me kapas me mwich repwe nenengeni ekewe somä, nge resap mwütätä pwe repwe peias. ¹⁰ Iwe, ekewe aramasen fanüfan repwe fokun pwapwa pokiten ekei ruoman soufos ra mäla. Repwe föri apwapwan mine a fis o lifangfengen lefiler, pun ekei ruoman ra atoto watten riaföü won chon fanüfan. ¹¹ Nge mürin ülüngat esop rän eu ngasangasen manau seni Kot a tolong lor, iwe, ra ütä o chokewe meinisin mi küneer ra fokun rükö. ✱ ¹² Mürin ekewe ruoman soufos ra rongorong eu möngüngü mi leüömong a kapas ngeniir seni läng, “Oupwe feitä ikei!” Lupwen ekewe chon oputer ra nenengeniir, ra feita läng lon eu kuchu. ✱ ¹³ Lon ewe chök otun a wor eu chechekin fanü mi pöchökül o eu leengolun ewe telinimw a tala. Iwe, fisungeröü aramas ra mäla ren, nge ekewe lusun aramas mi chüen manau ra fokun rükö o mwareiti manamanen ewe Kot mi nom läng. ✱

¹⁴ Ewe aruen feiengau a wes, nge ewe aülüngatin epwe müttir feito.

Ewe afisuen rappwa

11.15-19

¹⁵ Mürin ewe afümanün chon läng a ettiki nöün rappwa, iwe, a wor chomong möngüngü mi leüömong lon läng, ra apasa, “Ewe manamanen nemeni fanüfan, iei a nom ren ach Samol me nöün we Messaia. Iwe, epwe nemenem tori feilfeilachök.” ✱ ¹⁶ Mürin ekewe rüwe me föman souakom mi mot won ar lenien motun king mwen mesen Kot ra chapetiu o fel ngeni Kot. ¹⁷ Iwe, ra apasa,

“Äm aia kilisou ngonuk äm Kot, Samol mi Unusen Manaman,
ka nom iei o ka fen nonom,
pun ka angei om manaman mi lapalap
o popuetä le nemenem!

¹⁸ Ekewe chon lükün Israel ra fokun song,
pun om lingeringer a war,
ewe fansoun ekewe mi mäla repwe küna kapwüng.

A war ewe fansoun om kopwe liwiniöchü ngeni
noumw kewe chon angang ekewe soufos, me noumw kewe chon pin,

✱ **11:4:** Sek 4.3,11-14 ✱ **11:6:** 1.King 17.1; Eks 7.17-19; 1.Sam 4.8 ✱ **11:7:** Tan 7.7,21; Pwär 13.5-7; 17.8 ✱ **11:8:** Ais 1.9-10 ✱ **11:11:** Is 37.10 ✱ **11:12:** 2.King 2.11 ✱ **11:13:** Pwär 6.12; 16.18 ✱ **11:15:** Eks 15.18; Tan 2.44; 7.14,27

pwal chokewe meinisin mi meninituk,
ekewe aramas tekia me ekewe aramas kis.

A war ewe fansoun om kopwe afeiengaua chokewe mi afeiengaua fanüfan.” ✧

¹⁹ Mürin än Kot we imwenfel lon läng a sukula, o a pwä ewe pworofel mi nom ikenan. Iwe, a fis fifin inefi, ngüngü me chopun chopulap, pwal chehechin fanü me üten fau mi püngüchou.

12

Ewe Fefin me ewe Trakon

12.1-18

¹ Mürin eu watten asisil mi monomon a pwä me lon läng. A wor eman fefin mi üföüf ewe akkar o ewe maram a nom fän pechen, nge won möküran a nom epa mwärämwär mi wor engol me ruoföü fü won.

² Neminei a pwopwo o a arap ngeni an epwe nöünöü. A pupuchör ren an metek pwe epwe nöünöüla.

³ Pwal eu asisil a pwä me lon läng. A wor eman trakon mi watte o parap, a wor fisu möküran me engol mächän, nge a wor epa mwärämwär won eu me eu möküran kewe. ✧ ⁴ Ren wükün we a amwökütü eu leülüngatin ekewe fü seni lon läng o atururetiu won fanüfan. Iwe, ewe trakon a üta me mwen ewe fefin, pwe epwe ochei nöün we lon ewe chök otun a nöünätü. ✧ ⁵ Mürin ewe fefin a nöünätü eman ät, i ätewe epwe nemeni mwü meinisin ren efoch wokomächä. Nge eman a angeatä ewe mönükol ren Kot, ewe mi mot won an we lenien motun king. ✧ ⁶ Iwe, ewe fefin a süla lon ewe fanüapö ia a wor ie eu leni Kot a amolätä fän itan. Ikenan epwe tümwün lon ükükün engeröü rüwopükü wone rän.

⁷ Mürin a fis maun lon läng. Mikael me nöün kewe chon läng ra fiu ngeni ewe trakon, nge ewe trakon me nöün kewe chon läng ra pwal fiu ngeniir. ✧ ⁸ Iwe, ewe trakon a kuf, nge i me nöün kewe chon läng resap chüen mwümwütä ar repwe nonom lon läng. ⁹ Ewe trakon mi watte a koturuwu lükün, ewe serepenitin lom mi iteni Tefil are Satan, a atupu unusen chon fanüfan. A koturutü won fanüfan, i me nöün kewe chon läng. ✧

¹⁰ Mürin üa rongorong eu möngüngü mi leüömong lon läng a apasa, “Iei a fis än Kot amanaua aramas! Iei Kot a pwärätä an tufich le nemenem. Iei nöün we Messaia a pwärätä an nemenem! Pun ewe chon atipisi pwiich kewe lerän me lepwin mwen mesen Kot a koturutü seni läng. ✧ ¹¹ Pwiich kewe ra akufu Satan ren chaan ewe Lam, ren ewe kapasen manau ra pwärätä, pwal ren ar mochen fangatä manauer pwe repwe mäla. ¹² Iei mine, en läng kopwe fokun pwapwa, pwal meinisin mi nonom lon läng. Nge feiengau ngeni fanüfan me matau, pun Satan a feitiu remi o a fokun lingeringer pokiten an silei pwe a mochomoch chök an fansoun.”

¹³ Lupwen ewe trakon a küna pwe a turutü won fanüfan, a tapweri ewe fefin mi nöünätü ewe ät. ¹⁴ Nge ewe fefin a angei ruofoch pöükässin eman ikel mi watte, pwe epwe tongeni aea le ässila ngeni lenian we lon fanüapö ia epwe tümwün ie lon ükükün ülüngat esop ier, iei ewe leni ewe serepenit esap tongeni afeiengaua me ie. ✧ ¹⁵ Mürin ewe trakon a kusufawu me lon awan eu chanpupun koluk mürin ewe fefin, pwe epwe öütela ren. ¹⁶ Nge fanüfan a alisi ewe fefin. A amasala awan o otumwu ewe koluk mi

✧ **11:18:** Kölf 2.5; 110.5; 115.13 ✧ **12:3:** Tan 7.7 ✧ **12:4:** Tan 8.10 ✧ **12:5:** Ais 66.7; Kölf 2.9 ✧ **12:7:** Tan 10.13,21; 12.1; Jut 9 ✧ **12:9:** Ken 3.1; Luk 10.18 ✧ **12:10:** Hiop 1.9-11; Sek 3.1 ✧ **12:14:** Tan 7.25; 12.7

towu seni lon awen ewe trakon. ¹⁷Iwe, ewe trakon a fokun lingeringeriti ewe fefin, a feila seni pwe epwe fiu ngeni lusun mwirimwirin kewe, ir chokewe meinisin mi aleasochisi än Kot kewe allük o ra allükülük lon ewe let Jesus a pwärätä. ¹⁸Nge ewe trakon a ütä arosset.

13

Ekewe ruoman manmwacho

13.1-18

¹Mürin üa kûna eman manmwacho a feitä seni lon ewe matau. A wor engol mächän me fisu mökûran. Iwe, efoch me efoch ekewe mächä a wor epa mwärämwär won, nge won eu me eu kewe mökür a mak eu it mi turunufasei Kot. * ²Ewe manmwacho a usun chök eman lepart, pechen ra usun pechen eman pear, nge awan a usun chök awen eman laion. Ewe trakon a ngeni ewe manmwacho an manaman, an lenien motun king me an we watten nemenem. * ³Eu me lein möküren ewe manmwacho kewe a kinas usun itä nge eu kinas epwe mäla ren. Nge ewe kinas a mola. Unusen chon fanüfan ra mairü ren o ra tapwela mürin ewe manmwacho. ⁴Iwe, aramas meinisin ra fel ngeni ewe trakon pokiten a ngeni ewe manmwacho an nemenem. Ra pwal fel ngeni ewe manmwacho o ra apasa, “Iö a wewe ngeni ewe manmwacho? Iö a tongeni fiu ngeni?”

⁵A mwümwü ngeni ewe manmwacho pwe epwe eäni kapasen lamalamtekie mi turunufasei Kot, a pwal mwümwü ngeni pwe epwe nemenem lon ükükün faik me ruu maram. ⁶A popuetä le turunufasei Kot, itan me ewe leni ia a nom ie, pwal chokewe meinisin mi nom lon läng. * ⁷A mwümwü ngeni an epwe fiu ngeni ekewe chon pin o akufuur, a pwal angei an nemenem won ekewe ainang me mwü me kapas me mwich meinisin. * ⁸Iwe, aramas meinisin mi nom won fanüfan repwe fel ngeni, chilon chök chokewe iter a mak lon ewe puken iten chon manau me mwen än Kot esamwo föri fanüfan,iei ewe puk än ewe Lam mi ninnila. * ⁹Are a wor selingen eman epwe rongorong: ¹⁰Are eman epwe oola, epwe chök oola, are eman epwe ninnila ren ketilas, epwe chök ninnila ren ketilas. Iei lomotan pwe epwe wor än ekewe chon pin likitü me lükülük. *

¹¹Mürin üa kûna pwal eman manmwacho a feitä seni lon fanüfan. A wor ruofoch mächän usun mächän eman apanen sip, nge a kapas usun eman trakon. ¹²A aea än ewe aemanün manmwacho nemenem mi watte me mwen mesan. A pöchökül ngeni chon fanüfan meinisin, pwe repwe fel ngeni ewe aemanün manmwacho, ewe kinasan we a mola. ¹³Ei aruomanün manmwacho a afisätä manaman mi lapalap. A pwal tongeni awora ekkei mi feitiu seni läng won fanüfan mwen mesen aramas meinisin. ¹⁴Ren ekei manaman a mwümwütä ngeni pwe epwe föri mwen mesen ewe aemanün manmwacho, a atupu ekewe aramas meinisin mi nom won fanüfan. Ewe manmwacho a üreni ekewe aramas, pwe repwe aüetä eu uluulun fän iten ewe manmwacho, ewe a fen kinas ren ewe ketilas, nge a chüen manau. ¹⁵A mwümwütä ngeni ewe aruomanün manmwacho pwe epwe ngaseralong manau lon uluulun ewe aemanün manmwacho, pwe ewe uluulun a tongeni kapas, a pwal tongeni niela chokewe meinisin resap mochen fel ngeni. ¹⁶Ewe manmwacho a pöchökül ngeni aramas meinisin, ngeni ekewe aramas lap me ekewe

* **13:1:** Tan 7.3; Pwär 17.3,12 * **13:2:** Tan 7.4-6 * **13:6:** Tan 7.8,25; 11.36 * **13:7:** Tan 7.21 * **13:8:** Kölf 69.28 * **13:10:** Jer 15.2; 43.11

aramas kis, ekewe chon pisekisek me ekewe chon wöüngau, ekewe chon ngas me ekewe amanau pwe repwe eäni eu asisil won pöüifichiir ika won chamwer. ¹⁷ Esap wor eman a tongeni kamö och ika amömö are esap eäni ei asisil. Ei asisil iei iten ewe manmwacho ika ewe nampa fän iten itan we.

¹⁸Iei lomoten tipachem. Iö a wor an mirit a tongeni weweöchiti wewen nampan ewe manmwacho, pun ewe nampa nampan iten eman aramas. Iei iteiten ewe nampa wonopükü wone me wonu.

14

Ewe Lam me nöün kewe aramas

14.1-5

¹Mürin üa nenengeni o üa küna ewe Lam a ütā won ewe Chuk Sion, nge üa pwal küna ipükü faik me rüanüngeröü aramas ra nom ren, ir chokewe a mak itan me iten Saman won chamwer. ✧ ²Iwe, üa rongorong eu möngüngü seni läng a wewe ngeni ngüngün chomong koluk, a pwal wewe ngeni chopun chopulap mi leüömong. Ei möngüngü üa rongorong a usun chök ngingiin kitar lupwen ekewe chon ettik kitar ra ettiki. ³Ekei ipükü faik me rüanüngeröü aramas ra ütā mwen ewe lenien motun king, mwen ekewe föman mönūmanau me ekewe souakom. Ekei aramas ra fen küna manau seni won fanüfan, ra kölü echö köl mi fö, ir chök ra tongeni silei. ⁴Ir chokewe mi püsin tümwünür pwe resap alimengauer ren ar tipis ngeni fefin, ra usun chök föpwül resamwo tori mwän. Ra tapwela mürin ewe Lam ekis meinisin ia a feila ie. Ra fen küna manau me lein ekewe aramasen fanüfan, pwe ir ekewe mweinöü fän iten Kot me ewe Lam. ⁵Resap fokun apasatā kapas chofona, esap wor ar mwäl. ✧

Än ekewe ülūman chon läng pworaus

14.6-13

⁶Mürin üa küna pwal eman chon läng mi äkkäs fän läng, a uwei ewe Pworausen Manau esemüch pwe epwe arongafeili ngeni chon fanüfan, ngeni sokun mwich me ainang, kapas me mwü meinisin. ⁷A apasa ren mwelian mi leüömong, “Oupwe asamolu Kot o mwareiti an tekia! Pun a war ewe fansoun pwe epwe apwüngü chon fanüfan. Oupwe fel ngeni ewe mi föri läng me fanüfan, matau me ekewe lenien puächen koluk!”

⁸Ewe aruomanün chon läng a tapweto me mürin ewe aemanün o a apasa, “A tala, a tala, Papilon mi lapalap! A aünü ngeni chon ekewe mwü meinisin ünūman wain mi pwichikar, ewe wainen an mocheisou!” ✧

⁹Ewe aülūmanün chon läng a tapweto me mürin ewe aemanün me aruomanün o a apasa ren mwelian mi leüömong, “Iö a fel ngeni ewe manmwacho me uluulun we o eäni ewe asisil won chamwan ika won pöün ¹⁰epwe ün seni än Kot we wain, ewe wainen an lingeringer. Iei ewe wain mi pöchökül Kot a ninalong lon an we kapen song! Iwe, chokewe meinisin mi eäni ewe asisil repwe fokun riaföü lon ekkei me primston me mwen ekewe chon läng mi pin me ewe Lam. ✧ ¹¹Iwe, ötüötün ewe ekkei mi ariaföüür a ötütä tori feilfeilachök. Lerän me lepwin esap wor ngas fän iten chokewe mi fel ngeni ewe manmwacho me uluulun we, fän iten chokewe meinisin mi eäni asisilen itan.” ✧

¹²Iei lomoten än ekewe chon pin likitü, ir chokewe mi aleasochisi än Kot kewe allük o ra allükülük ngeni Jesus.

¹³ Mürin üa rongorong eu möngüngü seni läng a apasa, “Kopwe makkei ei: Ra feiöch chokewe mi mäla lon ar lükü ach Samol seni ikenai!” Ewe Ngünmifel a pölüeni, “Ewer, repwe asösö seni ar angang weires, pun ar föföör mürina a ettiir.”

Ewe fansoun kinikinin räs won fanüfan

14.14-20

¹⁴ Mürin üa nenengeni o üa küna pwe a wor eu kuchu mi pwech, nge eman a mot won ewe kuchu usun itä nge eman nöün aramas, a mwärämwär epa mwärämwär seni kolt won möküran, a pwal amwöchü lepöün efoch kama mi ken. ✧ ¹⁵ Iwe, pwal eman chon läng a towu seni ewe imwenfel o a kökköla ren mwelian mi leüömong ren ewe eman mi mot won ewe kuchu, “Kopwe nöünöü noumw we kama o kini ewe räs! Pun ewe räsini fanüfan a fokun nup o ewe fansoun kinikinin räs a war.” ✧ ¹⁶ Iei mine ewe mi mot won ewe kuchu a ätteri ngeni fanüfan nöün we kama o a kini räsini fanüfan.

¹⁷ Mürin üa küna pwal eman chon läng a towu seni ewe imwenfel lon läng o a pwal amwöchü efoch kama mi ken.

¹⁸ Mürin pwal eman chon läng, ewe mi wisen tümwünü ewe ekkei a feito seni ewe rongen asor. A kökköla ren mwelian mi leüömong ren ewe chon läng mi amwöchü ewe kama mi ken, “Kopwe nöünöü noumw we kama o pökü ekewe umwun uän wain seni lon ewe tanipin wain won fanüfan, pun ra nup!” ¹⁹ Iei mine ewe chon läng a ätteri ngeni fanüfan nöün we kama o pökü ekewe umwun uän wain seni ewe irä o atururelong lon ewe lenien üchüch föün wain mi watte, wewen ei än Kot lingeringer. ²⁰ Ekewe umwun uän wain ra üchüch lon ewe lenien üchüch lükün ewe telinimw. Iwe, cha a towu seni ewe lenien üchüch föün wain, o pupuun a pula ina epwe ükükün ruwopükü mail, nge alololun ina epwe ükükün limu fiit. ✧

15

Ekewe chon läng mi amolätä ekewe amüchülan feiengau

15.1-8

¹ Mürin üa küna lon läng eu watten asisil mi monomon o amwarar. A wor füman chon läng mi wor rer fisu amüchülan feiengau, pun än Kot lingeringer epwe müchüla ren ekei feiengau.

² Mürin üa küna och mi usun chök eu matauen kilas mi nofitfengen me ekkei. Üa pwal küna chokewe mi akufu ewe manmwacho me uluulun we, ra pwal akufu ewe eman itan a iteit lon nampa. Ra ütä ünükün ewe matauen kilas o ra amwöchü ekewe kitar Kot a ngeniir. ³ Iwe, ra köl ewe köl än Moses ewe chon angang ngeni Kot, pwal ewe köl än ewe Lam:

“Äm Kot, Samol mi Unusen Manaman,
a tekia o amwarar om angang kana!

En kingen ekewe mwü,
a pwüng o let om kewe föföör! ✧

⁴ Iö esap niuokusituk o alinga itom, en äm Samol?

Pun en chök ka pin. Chon ekewe mwü meinisin repwe feito
o fel ngonuk, pun om kewe föföör mi pwüng
ra pwäpwäla ngeni aramas meinisin.” ✧

⁵ Mürin ei üa küna ewe imwenfel lon läng a sukula, ia ewe imw mangaku mi pin a nom ie. ✧ ⁶ Iwe, ekewe füman chon läng mi wor rer ekewe fisu feingau ra towu seni lon ewe imwenfel, ra üföüf üf mi pwechepwech o molopolup, ra pwal riri ngeni fän mwäriir efoch riri seni kolt. ⁷ Mürin eman me lein ekewe föman mönūmanau a ngeni ekewe füman chon läng fisu sepi seni kolt mi ur ren än Kot lingeringer, i ewe Kot mi manau tori feilfeilachök. ⁸ Iwe, ewe imwenfel a ur ren ötüöt mi feito seni än Kot ling me manaman, nge esap wor eman a tongeni tolong lon ewe imwenfel tori repwe wesila ekewe fisu feingau seni ekewe füman chon läng. ✧

16

Ekewe sepi mi ur ren än Kot lingeringer

16.1-21

¹ Mürin üa rongorong mwelien eman mi leüömong seni lon ewe imwenfel a üreni ekewe füman chon läng, “Oupwe feila o ninätü ekewe fisu sepi mi ur ren än Kot lingeringer won fanüfan!”

² Iei mine ewe aemanün chon läng a feila o ninätü masouen sepian we won fanüfan. Iwe, och sokun ruup mi fokun ngau o metek a pwäwu me won chokewe mi ääni asisilen ewe manmwacho, pwal won chokewe mi fel ngeni uluulun we. ✧

³ Mürin ewe aruomanün chon läng a ninätü masouen sepian we lon matau. Iwe, ewe matau a wiliti cha usun chök chaan eman aramas mi mäla o iteiten mönūmanau meinsin lon matau ra mäla.

⁴ Mürin ewe aülūmanün chon läng a ninätü masouen sepian we lon ekewe chanpupu me ekewe puächen koluk pwe ra wiliti cha. ✧ ⁵ Iwe, üa rongorong pwe ewe chon läng mi wisen tümwünü ekewe koluk a apasa, “Pwüngün om kewe kapwüng ra pwüng. En ewe mi Pin, ka nom iei o ka fen nom!” ⁶ Pun ra ninätü chaan ekewe chon pin me ekewe soufos, iei mine ka ngeniir cha pwe repwe ünümi usun a fich ngeniir!” ⁷ Mürin üa rongorong mwelien eman seni ewe rongen asor a apasa, “Kot, Samol mi Unusen Manaman! Pwüngün om kewe kapwüng ra wesewesen let o pwüng!”

⁸ Mürin ewe afömanün chon läng a ninätü masouen sepian we won ewe akkar. Iwe, a mwümwütä ngeni akkar pwe epwe keni aramas ren watten pwichikaran. ⁹ Ra kar ren watten pwichikaran, iwe, ra otteki iten Kot, ewe mi wor an nemenem won ekei feingau. Nge resap mochen aier seni ar tipis o alinga Kot.

¹⁰ Mürin ewe alimanün chon läng a ninätü masouen sepian we won än ewe manmwacho lenien motun king. Iwe, rochokich a pwölüela mwün ewe manmwacho, nge ekewe aramas ra küüwu chönawer pokiten watten ar metek. ✧ ¹¹ Iwe, ra otteki Kot mi nom läng pokiten metekin rupur kewe, nge resap mochen aier seni ar kewe föföf mi ngau.

¹² Mürin ewe awonomanün chon läng a ninätü masouen sepian we lon ewe chanpupu Oifrat mi fokun watte. Iwe, ewe kolukun lon a pwasetä, pwe epwe fis efoch al fän iten ekewe king repwe feito seni ötiu. ✧ ¹³ Mürin üa küna ülūman ngün mi limengau ra wewe ngeni kairü. Ekei ngün ra towu seni lon awen ewe trakon, seni lon awen ewe manmwacho,

✧ **15:5:** Eks 38.21 ✧ **15:8:** Eks 40.34; 1.King 8.10-11; 2.Kron 5.13-14; Ais 6.4 ✧ **16:2:** Eks 9.10 ✧ **16:4:** Eks 7.17-21; Kölf 78.44 ✧ **16:10:** Eks 10.21 ✧ **16:12:** Ais 11.15

pwal seni lon awen ewe soufos chofona. ¹⁴ Ir anün ro chopwak mi föri manaman. Ekei ülüman ngün ra feila ren ekewe kingen unusen fanüfan ar repwe achufengeniir, pwe repwe maun lon ewe rän mi lap än Kot ewe mi Unusen Manaman.

¹⁵ “Nengeni, üpwe feito usun eman chon solä! A feiöch ätewe mi nenela o tümwünü üfan kewe, pwe esap fetalfeil lon an selela o säw ren aramas.”

✧

¹⁶ Mürin ekewe ngün ra achufengeni ekewe king lon ewe leni mi iteni lon kapasen Ipru Armaketon. ✧

¹⁷ Mürin ewe afümanün chon läng a ninätü masouen sepian we lon asepwäl. Iwe, mwelien eman mi leüömong a towu seni lon ewe lenien motun king me lon ewe imwenfel, a apasa, “A fisila!” ¹⁸ Iwe, a fis fifin inefi, ngüngü me chopun chopulap, pwal eu chechechin fanü mi fokun afeiengau. Esap fokun mwo wor eu sokun chechechin fanü seni lon fansoun popuetän än aramas nom won fanüfan mi afeiengau usun ei.

✧ ¹⁹ Ewe telinimw watte a kinikin lon ülüngat kinikin, nge telinimwen ekewe fanü meinsin ra tala. Iwe, Kot esap manlükala Pabilon, ewe telinimw mi lapalap, a aünü ngeni ewe wain seni an kap, iei ewe wainen an lingeringer mi fokun afeiengau. ✧ ²⁰ Iwe, ekewe fanüen lematau meinsin ra kokotiu, nge ekewe chukutekia meinsin ra morola. ✧ ²¹ Üten fau mi watte, choun eföü ina epwe ükükün ipükü paun, ra turutiu seni läng won ekewe aramas. Iwe, ekewe aramas ra otteki Kot pokiten ewe feiengau ren ewe üten fau, pun ewe feiengau a fokun aniuokus. ✧

17

Ewe fin lisowu mi iteföüla

17.1-18

¹ Mürin eman me lein ekewe füman chon läng mi amwöchü ekewe fisu sepi a feito rei o üreniei, “Kopwe etto, üpwe aiti ngonuk usun än ewe fin lisowu mi iteföüla epwe küna apwüng, wewen, iei ewe telinimw watte mi kaütä arun chomong chanpupu. ✧ ² Ekewe kingen fanüfan ra föri föförün lisowu ngeni o ekewe aramasen fanüfan ra puchula ren ar ün ünümen neminewe we wainen lisowu.” ✧

³ Mürin ewe chon läng a uweieila lon eu fanüapö lupwen ai nom lon Ngün. Ikenan üa küna eman fefin mi mot won eman manmwacho mi par. Ei manmwacho a kula won inisin ren it mi turunufasei Kot. A wor fisu möküran me engol mächän. ✧ ⁴ Ei fefin a üföüf üf mi parachol me parapar, a pwal foute ngeni sokopaten fout seni kolt, fau mi aüchea me föön pwei. A amwöchü lepöün eu kap seni kolt mi ur ren sokopaten mettoch mi anioput me limengauen an föförün lisowu. ✧ ⁵ A mak eu it won chamwan a monomon wewen: Pabilon mi lapalap, inelapen ekewe fin lisowu meinsin me ekewe föför mi anioput won fanüfan. ⁶ Üa küna ewe fefin pwe a puchula ren chaan ekewe chon pin me chaan chokewe mi ninnila pokiten ar allükülük ngeni Jesus.

Lupwen üa küna neminewe, üa fokun mairü. ⁷ Nge ewe chon läng a aisiniei, “Pwota ka mairü? Üpwe pwäri ngonuk wewen ewe monomon

✧ **16:15:** Mat 24.43-44; Luk 12.39-40; Pwär 3.3 ✧ **16:16:** 2.King 23.29; Sek 12.11 ✧ **16:18:** Pwär 8.5; 11.13,19 ✧ **16:19:** Ais 51.17 ✧ **16:20:** Pwär 6.14 ✧ **16:21:** Eks 9.23; Pwär 11.19 ✧ **17:1:** Jer 51.13 ✧ **17:2:** Ais 23.17; Jer 51.7 ✧ **17:3:** Pwär 13.1 ✧ **17:4:** Jer 51.7

usun ewe fefin me ewe manmwacho mi uwei neminewe, ewe manmwacho mi wor fisu möküran me engol mächän. ⁸ Ewe manmwacho ka küna a manau me lom, nge iei esap chüen manau, epwele feitä seni lon ewe pwang mi alolol pwe epwe tolong lon feiengauen pöütmwälila. Ekewe aramas mi nom won fanüfan iter esap mak lon ewe puken iten chon manau me mwen än Kot esamwo föri fanüfan, ir meinisin repwe mairü lupwen repwe nenengeni ewe manmwacho, pun a manau me lom o iei esap chüen manau, nge epwe pwal pwäsefäl. ✧

⁹ “Tei lomoten tipachem me silelap. Ekewe fisu mökür wewen fisu chuk ewe fefin a mot won. ¹⁰ Ra pwal wewe ngeni füman king. Limman leir ra fen mäla, eman a chüen nemenem, nge ewe eman esamwo war. Iwe, lupwen epwe war, epwe chök nemenem lon fansoun mochomoch. ¹¹ Ewe manmwacho mi manau me lom, nge iei esap chüen manau, i ewe awalumanün king, eman me lein ekewe füman. Nge epwe tolong lon feiengauen pöütmwälila.

¹² “Ekewe engol mächä ka küna, ir engol king resamwo popuetä le nemenem, nge epwe toriir ewe pwüüing pwe repwe nemenem lon wisen king fiti ewe manmwacho lon ükükün eu awa chök. ✧ ¹³ Ekei engol king ra tipeeufengen, iwe, ra ngeni ewe manmwacho ar pöchökül me nemenem. ¹⁴ Repwe maun ngeni ewe Lam, nge ewe Lam epwe akufuur, pun i ewe Samol mi lap seni ekewe samol meinisin, pwal i ewe King mi tekia seni ekewe king meinisin. Nge chokewe mi tapwela mürin ir chon kö, chon fil me chon allükülük ngeni.”

¹⁵ Mürin ewe chon läng a pwal üreniei, “Ekewe koluk ka küna, ewe fin lisowu a mot arur, wewen mwü, mwichen aramas, ainang me kapas. ¹⁶ Nge ekewe engol mächä ka küna, pwal ewe manmwacho repwe oput ewe fin lisowu. Repwe angei seni mettochun meinisin o likiti neminewe lon an selesa. Repwe ochei fitukan o kenala ren ekkei. ¹⁷ Pun Kot a atolonga lon letiper pwe repwe apwönüetä an ekiek ren ar repwe tipeeufengen le ngeni ewe manmwacho pöchökülen ar nemenem tori än Kot kapas repwe pwönüetä.

¹⁸ Ewe fefin ka küna, iei ewe telinimw mi lapalap a nemenem won ekewe kingen fanüfan.”

18

Papilon a tala

18.1–19.4

¹ Mürin ei, üa küna pwal eman chon läng a feitiu seni läng, a eäni watten manaman, o ren lingan a asaramala unusen fanüfan. ² A kökkö ren mwelian mi leüömong, “A tala, a tala Papilon mi lapalap. Iei a wiliti eu lenien anün rochopwak me ngün mi limengau. Sokopaten machang mi limengau me anioput ra nonom lon. ✧ ³ Pun chon ekewe mwü meinisin ra puchula ren ar ün ünüman wain, iei ewe wainen an mocheisou. Ekewe kingen fanüfan ra föri föförün lisowu ngeni, nge ekewe chon amömö won fanüfan ra pisekisekila ren chomongun an kewe föföri mi ngau.” ✧

⁴ Mürin üa rongorong möngüngün eman seni läng a apasa, “Oupwe towu, oupwe towu nei aramas seni lon Papilon!

Iwe, ousap eti le föri an kewe tipis,

✧ **17:8:** Tan 7.7; Pwär 11.7; Kölf 69.28 ✧ **17:12:** Tan 7.24 ✧ **18:2:** Ais 13.21; 21.9; Jer 50.39; 51.8; Pwär 14.8 ✧ **18:3:** Ais 23.17; Jer 51.7

pwe ousap angei och seni an kewe feiengau. ✨

⁵ Pun an kewe tipis ra chukuchukutä tori läng,
nge Kot a chechemeni an kewe föför mi ngau. ✨

⁶ Oupwe föri ngeni i usun mine a fen föri ngenikemi.

Oupwe liwini ngeni fän ruu liwinin meinisn mine a föri.

Oupwe alölöü an we kap ngeni minen ün aükükün pöchökulan fän ruu
seni ewe minen ün a amolätä fän itemi. ✨

⁷ Oupwe awora ngeni neminei chomong riaföü me letipeta,
usun chök watten ewe ling a püsin alinga ngeni me ewe pwapwan
fanüfan a awora ngeni.

Pun a püsin ekieki lon letipan,

‘Ngang eman kiwin, üa mot won ai lenien mot!

Ngang üsap eman fin lipichsefäl.

Ngang üsap fokun tolong lon letipeta.’

⁸ Pokiten a eäni ei sokun ekiek, lon eu chök rän neminei epwe fokun
tolong lon ekei feiengau:

samau, letipeta me mailengita.

Iwe, epwe karala ren ekkei,

pun ach Samol Kot, ewe mi apwüngü, a wor an pöchökül.” ✨

⁹ Iwe, ekewe kingen fanüfan mi eti i le föri föförün lisowu me moche-
niangau repwe pupuchör o kechüeiti ewe telinimw, lupwen repwe küna
ötüötün ewe ekkei mi kenala. ¹⁰ Ra ütä me toau, pun ra niuokus ar repwe
eti lon an riaföü. Ra apasa, “A ifan me watten feiengauom! A ifan me
amairün feiengauom! En telinimw Papilon mi watte o pöchökül. Lon eu
chök awa ka küna apwüng!” ✨

¹¹ Ekewe chon amömö pisek won fanüfan ra pwal kechü o letipeta usun
ewe telinimw, pun esap chüen wor eman mi kamö ar kewe pisek. ✨

¹² Esap chüen wor eman a kamö ar kolt, silifer, fau aüchea, föün pwei, ar
mangaku mi pwechepwech, mangaku mi parachol, mangaku mi mitimit
me mangaku mi parapar, sokopaten mwüch mi pwoöch, sokopaten pisek
mi för seni ngiin äläfan me sokun mwüch mi liwinimong, pisek seni piras
me mächä me ekewe fau iter marpel. ¹³ Esap chüen wor eman a kamö ar
sinamon, nofitin mongö mi pwoarar, apach mi pwokus, säfei mi aüchea
me lö mi pwokus. Esap chüen wor eman a kamö ar wain, apüra, pilawa
mi amas me wiich, nöür kow me sip, nöür oris me waar woken, nöür
amanau, pwal mwo nge aramas. ✨

¹⁴ Ekewe chon amömö ra kapas ngeni
ewe telinimw, “Ekewe mettoch meinisn mi mürina ka mochenia ngeni
om kopwe eäni resap chüen nom. Woumw kewe meinisn me lingom
ra feil senuk, nge kosap chüen künasefäliir!” ¹⁵ Ekewe chon amömö mi

pisekisekila ren ar amömö pisekir me lon ewe telinimw repwe ütä me
toau, pun ra niuokus ar repwe eti lon an riaföü. Repwe kechü o letipeta,

✨ ¹⁶ repwe apasa, “A ifan me watten feiengauan! A ifan me amairün
feiengauen ewe telinimw mi watte! A soun üföüf üf mi pechepwech,
parachol me parapar o foutei ngeni sokun fout seni kolt, fau aüchea me
föün pwei! ¹⁷ Lon eu chök awa wöün meinisn a pöüt seni.”

Iwe, käptinin waan kewe sip meinisn me ekewe pasisö, ekewe säla me
chokewe meinisn mi manau seni ar angang le matau ra ütä me toau ¹⁸ o

✨ **18:4:** Ais 48.20; Jer 50.8; 51.6,45 ✨ **18:5:** Ken 18.20-21; Jer 51.9 ✨ **18:6:** Kölf 137.8;
Jer 50.29 ✨ **18:8:** Ais 47.7-9 ✨ **18:10:** Is 26.16-17 ✨ **18:11:** Is 27.31,36 ✨ **18:13:** Is
27.12,13,22 ✨ **18:15:** Is 27.31,36

pupuchör lupwen ra küna ötüötün ewe ekkei mi kenala ewe telinimw. Ra apasa, “Esap fokun wor pwal eu telinimw mi wewe ngeni ei telinimw mi watte!” ¹⁹ Iwe, ra wätä pwül won möküerer, ra kechü lon ar letipeta o apasa, “A ifan me watten feiengauan! A ifan me amairün feiengauen ei telinimw! Iei ewe telinimw ia chokewe mi wor waar sip mi sai le matau ra pisekisekila ren wöün. Lon eu chök awa mettoch meinisin mine a eäni a pöüt seni.” ✧

²⁰ En läng, kopwe fokun pwapwa pokiten ewe telinimw a tala. Oupwe fokun pwapwa ämi kewe chon pin, ämi kewe soukünü me ämi kewe soufos! Pun Kot a apwüngü ewe telinimw ren met a föri ngenikemi. ✧

²¹ Mürin eman chon läng mi pöchökül a ekietä eföü fau mi wewe ngeni eföü föün föir mi watte, a aturätü lon ewe matau o apasa, “Iei usun en Papilon, ewe telinimw mi watte, kopwe fokun koturfochofochotiu fän pöchökül, o kosap chüen pwäsefäl. ✧ ²² Esap chüen wor eman epwe rongorong tikin kitar me ngingiin chon köl, pwal tikin likaangün me tikin rappwa me lon alom kewe. Esap chüen wor sousilelap lon sokun angang meinisin epwe pwäsefäl me lon en, esap pwal chüen wor eman mi rongorong ngüngün ewe lenien kata föün wiich. ✧ ²³ Esap chüen wor eman epwe küna tinen eu lamp lon en, esap pwal chüen wor eman epwe rongorong möngüngün ekewe mwän apwüpwülü söfö me fin apwüpwülü söfö me lon en. Noumw kewe chon amömö a wor ar pöchökül won unusen fanüfan, nge ren om angangen rong ka atupu aramasen fanüfan meinisin!” ✧

²⁴ Papilon a küna kapwüng pokiten chaan ekewe soufos me ekewe chon pin a ninnila lon, ewer, chaan chokewe meinisin mi ninnila won fanüfan. ✧

19

¹ Mürin ei, üa rongorong och möngüngü mi wewe ngeni mwelien eu mwichen aramas mi watte seni lon läng, ra kökkö fän leüömong, “Ousipwe mwareiti Kot! Manau me ling me manaman a wor ren ach Kot! ² An kewe kapwüng ra let o pwüng! A apwüngü ewe fin lisowu mi iteföüla, a angauala chon fanüfan ren an föförün lisowu. Kot a ngeni chappen an föför, pun a niela nöün kewe chon angang.” ✧ ³ Ra kökkösefäl fän leüömong, “Ousipwe mwareiti Kot! Ötüötün ewe ekkei mi kenala ewe telinimw mi watte a ötüätä tori feilfeilachök.” ✧ ⁴ Iwe, ekewe rüwe me föman souakom me ekewe föman mönümanau ra chapetiu o fel ngeni Kot, ewe mi mot won an lenien motun king. Ra apasa, “Amen! Ousipwe mwareiti Kot.”

Usun pwapwan apwüpwülüen ewe Lam

19.5-10

⁵ Mürin mwelien eman a feito seni ewe lenien motun king, a apasa, “Ousipwe mwareiti ach Kot, ämi chon angang meinisin, ämi aramas meinisin, ämi aramas tekia me aramas kis meinisin mi meniniti Kot!” ✧ ⁶ Mürin üa rongorong eu möngüngü mi wewe ngeni möngüngün eu mwichen aramas mi fokun watte, a pwal wewe ngeni ngüngün chomong koluk me chopun chopulap mi leüömong a apasa, “Ousipwe mwareiti Kot! Pun ach Samol, ewe Kot mi Unusen Manaman a nemenem. ✧

✧ **18:19:** Is 27.30-34 ✧ **18:20:** Tut 32.43; Jer 51.48 ✧ **18:21:** Jer 51.63-64; Is 26.21 ✧ **18:22:** Is 26.13; Ais 24.8 ✧ **18:23:** Jer 7.34; 25.10 ✧ **18:24:** Jer 51.49 ✧ **19:2:** Tut 32.43; 2.King 9.7 ✧ **19:3:** Ais 34.10 ✧ **19:5:** Kölf 115.13 ✧ **19:6:** Is 1.24; Kölf 93.1; 97.1; 99.1

⁷ Ousipwe mweireir o fokun pwapwa, ousipwe mwareiti an tekia! Pun a war fansoun apwüpwülüen ewe Lam, nge pwülüan we, ewe fin apwüpwülü söfö, a püsin amol ngeni ewe rän. ⁸ Kot a ngeni echö üf mi limöch, a pwechepwech o molupolup pwe epwe üföuf.” (Ewe üf mi pwechepwech iei än ekewe chon pin föför mi pwüng.)

⁹ Mürin ewe chon läng a üreniei, “Kopwe makkeetiu ekei kapas: Ra feiöch chokewe mi kö ngeni kametipen apwüpwülüen ewe Lam.” Iwe, ewe chon läng a pwal apasa, “Ikkei ekewe kapas mi let seni Kot.” ✱ ¹⁰ Iwe, üa chapetiu arun pechen ewe chon läng pwe üpwe fel ngeni, nge i a üreniei, “Kosap föri iei usun! Ngang eman chiechiom chon angang me chiechien pwiüm kewe, chokewe meinisin mi kamwöchünük won ewe let Jesus a pwärätä. Kopwe fel ngeni Kot!”

Pun ewe let Jesus a pwärätä, iei met a amwelielia ekewe soufos.

Ewe mi wawa ewe oris mi pwechepwech

19.11-21

¹¹ Mürin üa küna pwe läng a suk, iwe, a wor eman oris mi pwechepwech. Ewe chon wawa a iteni Allükülük me Let, a eäni kapüng fän wenechar o maun fän pwüng. ✱ ¹² Mesan kana ra usun chök ngetengeten ekkei, nge a mwärämwär chomong mwärämwär won möküran. A wor eu it a mak won inisin, esap wor eman a silei pwe i chök. ✱ ¹³ Üfan we a üföuf a kula ren cha. Itan “Ewe Kapasen Kot!” ¹⁴ Iwe, ekewe mwichen sounfiu seni läng ra tapwela mürin, ra wawa oris mi pwechepwech, ra pwal üföuf üf mi limöch o pwechepwech. ¹⁵ Seni lon awan a itiwu efoch ketilas mi ken, pwe epwe nöünöü le akufu chon ekewe mwü. Epwe nemeniir ren efoch wokomächä, epwe puri ekewe uän wain lon ewe lenien üchüch, wewen ei, än Kot, ewe mi Unusen Manaman, lingeringer mi fokun afeiengau. ✱ ¹⁶ Won üfan pwal won wilan a mak ewe it, “Ewe King mi tekia seni ekewe king meinisin, me ewe Samol mi lap seni ekewe samol meinisin.”

¹⁷ Mürin üa küna eman chon läng a ütā won akkar. A kökkö fän mwelian mi leüömong ngeni ekewe machang meinisin mi äkkäsfeil fän läng, “Oupwe feito o chufengen fän iten än Kot we kametip mi watte. ¹⁸ Oupwe feito o ochoch fituken ekewe king, fituken ekewe meilapen sounfiu me fituken ekewe sounfiu, fituken ekewe oris me ekewe chon wäniir, fituken ekewe aramas meinisin: fituken ekewe amanau me ekewe chon ngas, fituken ekewe aramas tekia me ekewe aramas kis.” ✱

¹⁹ Mürin üa küna ewe manmwacho me ekewe kingen fanüfan pwal nöür kewe mwichen sounfiu, ra chufengen pwe repwe maun ngeni ewe eman mi wawa ewe oris, pwal ngeni nöün mwichen sounfiu. ²⁰ Iwe, ewe manmwacho a kuf o oola fitifengen me ewe soufos chofona, ewe mi afisätä manaman me mwen mesan. Ren ekei manaman a atupu chokewe mi eäni asisilen ewe manmwacho me chokewe mi fel ngeni ulu-ulun we. Ewe manmwacho me ewe soufos chofona ra koturmanauolong lon ewe nomun ekkei a küü ren primston. ✱ ²¹ Nge nöür kewe sounfiu ra ninnila ren ewe ketilas mi itiwu seni lon awen ewe eman mi wawa ewe oris. Iwe, ekewe machang meinisin ra ocheela fituker tori ra mötüla.

✱ **19:9:** Mat 22.2-3 ✱ **19:11:** Is 11.1; Kölf 96.13; Ais 11.4 ✱ **19:12:** Tan 10.6 ✱ **19:15:** Kölf 2.9; Ais 63.3; Sow 3.13; Pwär 14.20 ✱ **19:18:** Is 39.17-20 ✱ **19:20:** Pwär 13.1-18

20

Ekewe engeröü ier

20.1-6

¹ Mürin üa küna eman chon läng a feitiu seni läng, nge a amwöchü lepöün efoch kien ewe pwang mi alolol, pwal efoch selimächä mi fokun chou. ² Iwe, a turufi ewe trakon, ewe serepenitin lom, iei i ewe Tefil ika Satan, a föti pwe epwe föfö lon ükükün engeröü ier. ✧ ³ Iwe, ewe chon läng a aturalong i lon ewe pwang mi alolol, a lokeela o pwauni, pwe esap chüen tongeni tufichin atupu chon ekewe mwü tori ekewe engeröü ier repwe sopola. Mürin ei, ewe trakon epwe fokun musala lon ekis chök fansoun mochomoch.

⁴ Mürin üa küna ekoch lenien motun king, nge chokewe mi mot wor ra angei ewe pöchökül pwe repwe tongeni eäni kapwüng. Üa pwal küna ngünün chokewe mi ninnila pokiten ar arongafeili ewe let Jesus a pwärätä me än Kot kapas. Ir chokewe resap fel ngeni ewe manmwachö ika uluulun we, resap pwal angei asisilen ewe manmwachö won chamwer ika won pöür. Ra manusefäl o eti Jesus le nemenem lon ükükün engeröü ier. ✧ ⁵ (Nge ekewe lusun mi mäla resap manusefäl tori ekewe engeröü ier repwe sopola.) Iei ewe aeuin manusefäl. ⁶ A feiöch o pin iö a eti ewe aeuin manusefäl. Ewe aruen mäla esap wor an nemenem wor, nge repwe nöün Kot me nöün Kraist souasor, repwe pwal eti Jesus le nemenem lon ükükün engeröü ier.

Satan a kuf

20.7-10

⁷ Iwe, wesin ekewe engeröü ier, Satan epwe musala seni an fötek. ⁸ Epwe feila pwe epwe atupu chon ekewe mwü won unusen fanüfan, ekei mwü Kok me Makok. Satan epwe achufengeniir meinisin pwe repwe maun, iteiter meinisin ra usun iteiten föün pien arosot. ✧ ⁹ Ra chöfetal won fanü o rongeela lenien ewe mwichen chon pin me ewe telinimw Kot a echeni. Nge ekkei a feitiu me läng o keniirela. ¹⁰ Mürin ewe Tefil mi atupur a koturulong lon ewe nomun ekkei me primston ia ewe manmwachö me ewe soufos chofona ra fen koturula ie. Iwe, repwe küna riaföü lerän me lepwin tori feilfeilachök.

Ewe kapwüngün lesopolan

20.11-15

¹¹ Mürin üa küna eu lenien motun king mi watte o pwechepwech me ewe eman mi mot won. Fanüfan me läng ra süla seni mwen mesan, nge esap chüen wor leni fän iter. ¹² Iwe, üa küna ekewe mi mäla, ekewe aramas tekia me aramas kis, ra ütä me mwen ewe lenien motun king. Iwe, ekewe puk ra sukula. Mürin pwal eu puk a sukula, iei ewe puken iten chon manau. Iwe, ekewe mi mäla ra küna kapwüng won mine ra föri usun a makketiu lon ekewe puk. ✧ ¹³ Mürin ewe matau a fangewu ekewe mi mäla ra nom lon, pwal mäla me ewe lenien sotup ra fangewu ekewe mi mäla ra nom lor. Iwe, ir meinisin ra küna kapwüng won meinisin mine ra föri. ¹⁴ Mürin mäla me ewe lenien sotup ra koturulong lon ewe nomun ekkei. Ei nomun ekkei, iei ewe aruen mäla. ¹⁵ Iö esap mak itan lon ewe puken iten chon manau a koturulong lon ewe nomun ekkei.

21

Ewe läng mi fö me ewe fanüfan mi fö

21.1-8

¹ Mürin üa küna eu läng mi fö me eu fanüfan mi fö, pun ewe poputän läng me ewe poputän fanüfan ra morola, nge matau esap chüen wor. ✧

² Iwe, üa küna ewe Telinimw mi Pin, ewe Jerusalem mi fö, a feitiu me läng seni Kot, a molotä usun eman fin apwüpwülü söfö a tolong lon foutan pwe epwe apwüpwülü ngeni pwülüan. ✧ ³ Iwe, üa rong mwelien eman mi leüömong a kapasowu seni ewe lenien motun king, “Nengeni, imwen Kot a nom lein aramas! Iwe, Kot epwe nonom lefiler o ir repwe aramasan, nge püsin Kot epwe etiir pwe epwe ar Kot. ✧ ⁴ Epwe talüpwasei chönün mas seni won meser meinisin. Esap chüen wor mäla ika letipeta ika kechü ika cheuch, pun ekewe mettochun lom ra morola.” ✧

⁵ Mürin ewe mi mot won ewe lenien motun king a apasa, “Nengeni, üpwe asöfösefäli mettoch meinisin.” A pwal üreniei, “Kopwe makkeetiu ekei kapas, pun ra let o allükülük.” ⁶ Iwe, a apasa, “Mettoch meinisin ra fisila iei. Ngang ewe Aemanün me Amüchülan, ewe Popun me ewe Sopolan. Üpwe ngeni chokewe mi kaka pwe repwe ün seni ewe puächen kolukun manau, nge resap möni. ✧ ⁷ Iö mi pwora ngeni mine a ngau epwe feiöchüni ekewe feiöch meinisin. Iwe, ngang üpwe an Kot, nge i epwe nei. ✧ ⁸ Nge ekewe chon niuoken me chon lükümwang, ekewe chon limengau me chon niela aramas, ekewe chon lisowu me chon angangen rong, ekewe chon angang ngeni anümwäl me chon chofona meinisin repwe nom lon ewe noom mi pulopul ren ekkei me primston, iei ewe aruen mäla.”

Ewe Jerusalem mi fö

21.9–22.5

⁹ Mürin eman me lein ekewe füman chon läng mi fen wor rer ekewe fisu sepi mi ur ren ekewe fisu amüchülan feiengau a feito rei o a apasa, “Kopwe etto pwe üpwe aküna ngonuk ewe Fin apwüpwülü söfö, iei i pwülüen ewe Lam.” ¹⁰ Iwe, lupwen ai nom lon ngün, ewe chon läng a uweieila won ungen eu chuk mi fokun tekia o a aküna ngeniei Jerusalem, ewe Telinimw mi Pin, a feitiu me läng seni Kot, ✧ ¹¹ a saramaram ren än Kot we ling. Ewe telinimw a tittin usun eföü fau aüchea itan jasper, a kurufat usun ewe fau itan kristal. ¹² A wor eu tit mi pöchökül o tekia pwelin ünükün ewe telinimw, a pwal wor engol me ruu asalalapan, nge engol me ruoman chon läng ra mamasa ekewe asam. Iwe, won eu me eu ekei asalalap a mak iten eu me eu ekewe engol me ruu ainangen aramasen Israel. ¹³ A wor ülüngat asalalap won eu me eu pekin: ülüngat me peliötiü, ülüngat me peliör, ülüngat me peliefeng pwal ülüngat me pelilotou. ✧ ¹⁴ Tittin ewe telinimw a kaütä won engol me ruoföü föün longolong, nge won ekei fau a mak iten nöün ewe Lam kewe engol me ruoman soukünü. ¹⁵ Iwe, ewe chon läng mi kapas ngeniei a amwöchü efoch wokun aükük mi för seni kolt, pwe epwe aükü ewe telinimw, asalalapan me tittin. ✧ ¹⁶ Ewe telinimw a nönnöpök chölapan me langataman. Iwe, ewe chon läng a aükü ewe telinimw ren ewe wokun aükük, nge a pwä pwe ükükün langataman engol me ruengeröü stadia,

✧ **21:1:** Ais 65.17; 66.22; 2.Pet 3.13 ✧ **21:2:** Ais 52.1; 61.10; Pwär 3.12 ✧ **21:3:** Is 37.27; Lif 26.11-12 ✧ **21:4:** Ais 25.8; 35.10; 65.19 ✧ **21:6:** Ais 55.1 ✧ **21:7:** 2.Sam 7.14; Kölf 89.26-27 ✧ **21:10:** Is 40.2 ✧ **21:13:** Is 48.30-35 ✧ **21:15:** Is 40.3

* nge chölanan me tekian ra usun chök langataman. ¹⁷ Ewe chon läng a pwal aükü ewe tit, iwe, a pwä pwe ükükün ipükü faik me rüanü cubits. † An ei aükük a longolong won ewe aükük aramas ra aea le aükük. ¹⁸ Ewe tit a för seni ewe fau aüchea itan jasper, nge ewe telinimw a för seni kolt mi fokun mürina, a kurufat usun kilas. ¹⁹ Ekewe föün longolongun tittin ewe telinimw ra aling ngeni sokopaten fau aüchea. Ewe eföün longolong ewe fau aüchea itan jasper, ewe aruoföün safaiä, ewe aülüföün akit, ewe aföföün emeralt, ²⁰ ewe alimeföün oniks, ewe awonoföün karnelian, ewe afüföün krisolait, ewe awaluföün peril, ewe atiweföün topas, ewe aengolunföün kalsetoni, ewe engol me eföün jasint, nge ewe engol me ruoföün ametist. ²¹ Ekewe engol me ruu asamalap ra för seni engol me ruoföü föün pwei, eu me eu kewe asamalap a för seni eföü chök föün pwei. Nge alen ewe telinimw a för seni kolt mi fokun mürina, a kurufat usun kilas. ✧

²² Nge üsap küna eu imwenfel me lon ewe telinimw, pun imwenfelin lon iei ewe Samol Kot mi Unusen Manaman me ewe Lam. ²³ Esap lomot ngeni ewe telinimw tinen akkar ika tinen maram, pun än Kot ling a tinetiu won, o ewe Lam iei an atitin. ✧ ²⁴ Iwe, ekewe aramasen fanüfan repwe fetal lon an saram, nge ekewe kingen fanüfan repwe uwato wöür lon. ✧ ²⁵ Ekewe asamalapan ewe telinimw ra suk unusen rän me rän, nge resap kapüngüla, pun esap chüen wor pwin ikenan. ²⁶ Repwe uwalong lon ewe telinimw pisek mi aüchea me wöün ekewe mwü. ✧ ²⁷ Nge esap fokun wor och mi limengau epwe tolong lon ewe telinimw, ika eman mi föri föföer mi asäw, ika eman mi chofona. Pun chokewe chök a mak iter lon än ewe Lam puken iten chon manau repwe tolong lon ewe telinimw. ✧

22

¹ Mürin ewe chon läng a pwal aküna ngeniei ewe chanpupun kolukun manau, a kurufat usun ewe fau itan kristal, a pupu seni fän än Kot me än ewe Lam lenien motun king ✧ ² o a putiu lukalapan alen ewe telinimw. Iwe, lepekin ewe chanpupu me rüepék a wor irän manau ra ua fän engol me ruu lon eu ier, fän eu lon eu me eu maram, chör kewe ra tufichin apöchöküla chon ekewe mwü. ✧ ³ Esap wor och mi nom fän än Kot anümanau epwe nonom lon ewe telinimw.

Än Kot me ewe Lam lenien motun king epwe nom lon ewe telinimw o nöün kewe chon angang repwe angang o fel ngeni. ✧ ⁴ Repwe küna won mesen Kot, nge itan epwe mak won chamwer. ⁵ Esap chüen wor pwin, esap pwal chüen lomot rer lamp ika akkar, pun ewe Samol Kot epwe ar saram, nge repwe nemenem usun king tori feilfeilachök. ✧

Än Jesus liwinsefälito

22.6-17

⁶ Mürin ewe chon läng a üreniei, “Ekei kapas ra let o allükülük. Ewe Samol Kot, ewe Kot mi fang ngeni ekewe soufos Ngünün, a tinala nöün chon läng pwe epwe pwäri ngeni nöün kewe chon angang mine epwe fisikai.”

* **21:16:** wewen lon aükükün ikenai engeröü limepükü mail † **21:17:** wewen lon aükükün ikenai ruopükü engol me wonu fiit tekian ✧ **21:21:** Ais 54.11-12 ✧ **21:23:** Ais 60.19-20 ✧ **21:24:** Ais 60.3 ✧ **21:26:** Ais 60.11 ✧ **21:27:** Ais 52.1; Is 44.9 ✧ **22:1:** Is 47.1; Sek 14.8 ✧ **22:2:** Ken 2.9; Is 47.12 ✧ **22:3:** Sek 14.11 ✧ **22:5:** Ais 60.19; Tan 7.18

7 Iei alon Jesus, “Nengeni, üpwe warekai. Ra feiöch chokewe mi aleasochisi ekewe kapasen osuni mi mak lon ei puk!”

8 Ngang Johannes üa rongorong o küna ekei mettoch meinisin. Iwe, wesin ai rongorong o küna ekei mettoch, üa chapetiu arun pechen ewe chon läng mi aküna ngeniei ekei mettoch, pwe üpwe fel ngeni. 9 Nge i a üreniei, “Kosap föri iei usun! Ngang eman chiechiom chon angang me chiechien pwiüm kewe soufos, pwal chiechien chokewe meinisin mi aleasochisi ekewe kapas mi mak lon ei puk. Kopwe fel ngeni Kot!” 10 Iwe, a üreniei, “Kosap pwauni ekewe kapasen osuni mi mak lon ei puk, pun a arapoto ewe fansoun lupwen ekei mettoch meinisin repwe fisitä. 11 Iö a föri mine esap pwüung epwe chök sowwela le föri mine esap pwüung, nge iö a föri mine a limengau epwe chök sowwela le föri mine a limengau. Iö a föri mine a pwüung epwe chök sowwela le föri mine a pwüung, nge iö a pin epwe chök sowwela lon an pin.” ✧

12 Iei alon Jesus, “Nengeni, üpwe warekai! Iwe, üpwe uwei ai kewe liwin, pwe üpwe ngeni eman me eman liwinin an föfö. ✧ 13 Ngang ewe Alfa me Omeka, ewe Aemanün me Amüchülan, ewe Popun me ewe Sopolan.” ✧

14 Ra feiöch chokewe mi limeti üfer pwe repwe limöch, pwe epwe wor ar pwüung ar repwe mongö seni uän ewe irän manau, repwe pwal tolong lon ekewe asamalap o tolong lon ewe telinimw. ✧ 15 Nge me lükün ewe telinimw a wor chon föri sokun föfö mi ngau usun kolak, chon föri angangen rong, chon lisowu, chon niela aramas, chon angang ngeni anümwäl me chon chofona lon ar kapas pwal lon ar föfö.

16 “Ngang Jesus, üa tinato nei chon läng, pwe epwe asile ngenikemi ekei mettoch lon ekewe mwichefel. Ngang eman mwirimwirin ewe ainangen Tafit, Ngang ewe füün rän mi saramaram.” ✧ 17 Iwe, Ngünmifel me ewe Fin apwüpwülü söfö ra apasa, “Etto!” Ir meinisin mi rongorong ekei kapas repwe apasa, “Etto!” Iwe, iö mi kaka epwe etto, nge iö a mochen epwe ünümi ewe kolukun manau, nge esap möni, epwe etto. ✧

Kapasen lesopolan

22.18-21

18 Ngang Johannes, üa fönöü meinisin mi rongorong ekei kapasen osuni mi mak lon ei puk: Are eman epwe apacha och ngeni ekei kapas, Kot epwe apacha ngeni ekewe feiengau mi mak lon ei puk. 19 Nge are eman epwe angei och seni ekewe kapasen osuni mi mak lon ei puk, Kot epwe angei seni wisan me won ewe irän manau pwal wisan me won ewe Telinimw mi Pin usun a mak lon ei puk. ✧

20 Ewe eman mi pwärätä ekei mettoch a apasa, “Ewer, ngang üpwe warekai.” Amen! Kopwe etto äm Samol Jesus! 21 Ümöümöchün ach Samol Jesus epwe nonom ren nöün Kot kewe aramas meinisin. Amen.

✧ 22:11: Tan 12.10 ✧ 22:12: Ais 40.10; 62.11; Kölf 28.4; Jer 17.10 ✧ 22:13: Pwär 1.8,17; 2.8; Ais 44.6; 48.12 ✧ 22:14: Ken 2.9; 3.22 ✧ 22:16: Ais 11.1,10 ✧ 22:17: Ais 55.1 ✧ 22:19: Tut 4.2; 12.32

Kölfel

Kapas akom

I. Iten ei puk: Kölfel. Ei puk a iteni ei it, pun mine a mak lon, köl mi fel, souläng ra eäni lon ar fel ngeni Kot seni me lom tori ikenai.

II. Chon makei ei puk: Mi wor ekoch chon makei ei puk. Ikkei iter:

Tafit a makei ina epwe ükükün 73

Ekewe mwirimwirin Kora 10

Asaf 12

Salomon 2

Etan 1

Heman 1

pwal Moses 1

Mi pwal wor ekoch Kölfel esap fat iö a makeer.

III. Itelapemongen ei puk: Ngüni, kopwe mwareiti ewe Samol mi Lapalap.

IV. Kapas aüchean ei puk: Än chon lükülük mwareiti Kot me ar iotek.

V. Masouen ei puk Kölfel: Ei puk eu puken köl me iotek me lon Paipel. A lefiletam lefilen fansoun än ekewe chon mak makei ekei Kölfel, pun ekei köl minen fansoun Moses tori fansoun än chon Juta liwinsefäl seni ar oola. Nge ekewe chon Israel ra achufengeni ekei köl me iotek o aea lon fansoun ar fel ngeni Kot. Mürin ra apacha ekei Kölfel ngeni nöür Paipel. Mi wor chomong sokun Kölfel: Kölün mwareiti me fel ngeni Kot, iotekin tüngor alilis, tümwün me küna manau, tüngoren amusamusen tipis, kölün kilisou fän iten än Kot afeiöchüür, pwal tüngor pwe Kot epwe apwüngü chon oputer. Ekei iotek ra eäni fän iten eman chök ika fän iten eu mwü. Ekoch ekei iotek ra pwärätä mefien mwökütükütün leluken eman aramas, nge ekoch ra pwärätä osupwangen me mefien nöün Kot aramas meinisin. Jesus a aea ekei Kölfel, pwal ekewe chon makei Testament mi Fö ra aea ekoch wokisin seniir. Iei mine ekei Kölfel ra aüchea me ren ekewe souläng lon mwichefel seni lepoputan tori ikenai.

VI. Tettelin masouen ei puk: Ekei 150 Kölfel ra kinikinitiu lon limu kinikin:

1. Kölfel 1-41: Usun aramas me än Kot föri läng me fanüfan

2. Kölfel 42-72: Usun chon Israel me ar ngasala

3. Kölfel 73-89: Usun än aramas fel ngeni Kot, pwal usun ewe imwenfel

4. Kölfel 90-106: Usun än aramas siamü won fanüfan

5. Kölfel 107-150: Usun än aramas mwareiti Kot me än Kot kapas

AEUIN PUK

1

Eman aramas mi pwüing me eman aramasangau

1.1-6

¹ Ra feiöch ekewe aramas resap fetal fän öüröüräen aramasangau, resap apirü föförün ekewe chon tipis,

resap pwal nom ren ekewe chon turunufas,

² nge ra pwapwaiti än ewe Samol mi Lapalap allük o ekieki usun lerän me lepwin.

³ Ätekewe ra wewe ngeni irä mi mär ünükün ekewe chanpupu,

ra ua lon fansoun räs,
nge chör resap aiolol.

Meinisin mine ra föri a fisiöch. ✱

⁴ Nge ekewe aramasangau resap iei usun.

Pun ra wewe ngeni pipi asepwäl a ässala.

⁵ Iei mine ekewe aramasangau resap üöch lon ewe ränin kapwüng,
nge ekewe chon tipis resap nom lon mwichen chon pwüng.

⁶ Pun ewe Samol mi Lapalap a emweni o tümwünü ekewe chon pwüng,
nge ekewe aramasangau repwe fetal ngeni ewe lenien feiangau.

2

Än ewe mi kepit me ren Kot nemenem

2.1-12

¹ Pwota chon ekewe mwü ra rawangau,
nge ekewe aramas ra ekingau won mine a lomotongau?

² Ekewe king won fanüfan ra ütä,
ekewe sounemenem ra pwüngüpwüngfengen usun ar repwe ü ngeni ewe
Samol mi Lapalap,

pwäl ngeni nöün we mi kepit.

³ Iwe, ra apasa, “Ousipwe mwütala fööfööch me rer
o pöütala senikich ar kei riri.” ✱

⁴ Nge Kot ewe mi mot won an lenien motun king lon läng a takir,
ewe Samol a ämängaueer.

⁵ Mürin epwe kapas ngeniir fän an song
o fokun eniwokusuur fän an lingeringer.

⁶ Iwe, a apasa, “Üa seikätä ai king lon wisan
me won Sion chuki we mi pin.”

⁷ Ngang üpwe pwärätä mine a pwüngüla me ren ewe Samol mi Lapalap.
Iwe, a üreniei, “En nei mwän, ikenai üa nounuk.” ✱

⁸ Kopwe tüngorei, nge ngang üpwe ngonuk ekewe mwü pwe kopwe
mwüni,

üpwe pwäl ngonuk unusen fanüfan pwe kopwe fanüeni.

⁹ Kopwe atarela ren efoch wokomächä,
kopwe amökkükisiretiu usun eu sepi mi för seni pwül.” ✱

¹⁰ Iei mine ämi kana king, oupwe tipachemela,
ämi sounemenem won fanüfan, oupwe miritila.

¹¹ Oupwe angang ngeni ewe Samol mi Lapalap fän niuokus,
oupwe pwapwa fän chehech.

¹² Oupwe mitiri ewe nau pwe esap song, nge ämi ousap mäfeiangau.
Pun a müttir fis an song.

Ra feiöch ir meinisin mi eäni i lenien op.

3

Iotekin lesosor pwe Kot epwe alilis

3.1-8

Echö än Tafit köl lupwen an sü seni Apsalom nöün we.

¹ Ai Samol mi Lapalap, ekewe mi oputaei ra kon chomong!
Chomong ra ü ngeniei. ✱

✱ 1:3: Jer 17.8 ✱ 2:3: Föf 4.25-26 ✱ 2:7: Föf 13.33; Ipr 1.5; 5.5 ✱ 2:9: Pwär 2.26-27; 12.5; 19.15 ✱ 3:1: 2.Sam 15.13-17.22

² Chomong ra kapas usi,
 “Esap wor an alilis me ren Kot.”

³ Nge en, ai Samol mi Lapalap, ka epeti seniei feiengau,
 en ai ling,
 ka achimwäeitä.

⁴ Üa leüömong le siö ngeni ewe Samol mi Lapalap,
 nge i a pälüeniei seni chukun mi pin.

⁵ Üa konola o möür. Üa pwal nenela,
 pun ewe Samol mi Lapalap a tümwünüei.

⁶ Üsap niuokusiti engol ngeröün aramas
 mi pwelifeilie o ü ngeniei.

⁷ Kopwe feito, ai Samol mi Lapalap. Kopwe angasaei, ai Kot.
 Pun ka apwüngü ekewe chon oputaei meinisin,

ka angei seniir ar pöchökül pwe resap tongeni afeiengauaei.

⁸ Ewe Samol mi Lapalap a angasala aramas mi nom lon weires.
 Om feiöch epwe nom won noum aramas.

4

Iotekin lekuniol pwe Kot epwe alilis

4.1-8

Ngeni ewe mi emweni chon köl: Won pisekin ettik mi wor saitenin. Echö
 än Tafit köl.

¹ Ai Kot, en mi pwüng, kopwe pälüeniei, lupwen üa kökö.
 Ka fen angasaeila, lupwen üa nom lon riaföü.
 Kopwe ümömöch ngeniei o aüselinga ai iotek.

² Ämi aramas, ifa ükükün fansoun ämi oupwe chüen aitengauaei?
 Ifa ükükün fansoun ämi oupwe aücheani mine a lomotongau
 o tipeni mine a mwäl?

³ Nge oupwe silei pwe ewe Samol mi Lapalap a aimwüela chokewe mi
 pwüng fän püsin itan.
 Ewe Samol mi Lapalap a rongorong, lupwen üa kökköri.

⁴ Are oua song, oupwe afälikemi pwe ousap tipis ren.
 Oupwe ekieki ei lon lelukemi,
 lupwen ämi konola lon kiemi fän mosonoson. ✱

⁵ Oupwe eäni sokun asor mi pwüng ngeni ewe Samol mi Lapalap
 o anomu ämi apilükülük won.

⁶ Chomong aramas ra apasa,
 “Iö a tongeni fang ngenikich feiöch?”
 Ai Samol mi Lapalap, kopwe netiu wom o kirikiröch ngenikem.

⁷ Ka fen ngeniei pwapwa mi lap seni än chokewe pwapwa
 ren kinier wiich me ünümer wain mi somwola.

⁸ Üpwe konola o möür fän kinamwe,
 pun en echök, ai Samol mi Lapalap, ka tümwünüöchüei.

✱ 4:4: Ef 4.26

5

Eu iotek pwe Kot epwe tümwünükich

5.1-12

Ngeni ewe mi emweni chon köl: Won ekewe aangün. Echö än Tafit köl.

¹ Ai Samol mi Lapalap, kopwe aüselinga ai kei kapas,
kopwe ekieki ai ngüngü fän weires.

² Kopwe rongorong ai siö,
ai king me ai Kot,
pun üa iotek ngonuk.

³ Ai Samol mi Lapalap, ka rongorong mweliei lesosor,
lesosorusich üa iotek ngonuk o witiwiti om kopwe päüeniei.

⁴ Pun en sap eman Kot mi sani mine a ngau,
eman chon föföringau esap tongeni nonom reöm.

⁵ Ekewe mi siketik resap tongeni ü fän mesom,
ka oput chokewe meinisin mi föföringau.

⁶ Ka arosala chokewe meinisin mi kapas chofana.
Ka oput chon niela aramas me chon atupu aramas.

⁷ Nge ngang üpwe tolong lon imwom pokiten om we tong ellet mi lap o
somwola.

Üpwe fel ngonuk lon imwom we mi pin
o chapetiu mwom fän menin.

⁸ Ai Samol mi Lapalap, kopwe atufichiei pwe üpwe föri letipom,
pun mi wor chon oputaei mi nenengeniei,
kopwe aiti ngeniei mine üpwe föri.

⁹ Chon oputaei ra apasa mine a chofana,
leluker a chök ekiekin kata,
ar kapas a motoutou,
nge ra uren atuputup mi afeiengau. ☆

¹⁰ Ai Kot, kopwe ngeniir liwinin ar tipis.

Repwe feiengau ren püsin ar raw.

Kopwe pöütirela pokiten a chomong ar pupungau,
pun ra ü gonuk.

¹¹ Nge chokewe meinisin mi anomu ar apilükülük womw repwe meseik,
repwe köl fän pwapwa fansoun meinisin.

Kopwe peni chokewe mi echenuk,
pwe repwe ingemwareituk.

¹² Pun en, ai Samol mi Lapalap, ka afeiöchü ekewe chon pwüing,
ka pwölürela ren om ümöümöch usun chök eu tittin maun.

6

Eu iotekin tüngr ümöümöch lon fansoun riaföü

6.1-10

Ngeni ewe mi emweni chon köl: Won pisekin ettik mi wor walufoch
saitenin. Echö än Tafit köl.

¹ Ai Samol mi Lapalap, kosap amiritiei lon om song,
kosap pwal apwüingüei lon om lingeringer. ☆

² Kopwe ümöümöch ngeniei, ai Samol mi Lapalap, pun üa fokun pekus.
Ai Samol mi Lapalap, kopwe apöchökülaei, pun üa fokun apwangapwang.

³ Ngüni a pwal fokun riaföü.

Ai Samol mi Lapalap, ifa ükükün fansoun om kopwe akachopwa ngeniei?

⁴ Ai Samol mi Lapalap, kopwe feito o amanauaei,
kopwe angasaei seni mäla ren om we tong ellet.

⁵ Pun chon mäla resap chechemenuk.

Esap wor eman epwe mwareituk lon lenien sotup.

⁶ Üa malülü ren ai ngüngü,
iteiten pwin kiei a nüküchöchön ren chönün mesei,
ai peet a chöchön ren chönün mesei, lupwen üa kechü.

⁷ Mesei a tton ren ai letipeta,
a toputopula ren ai kechü pokiten chon oputaei ra ariaföüei.

⁸ Oupwe sü seniei, ämi meinisin mi föri föför mi ngau.
Ewe Samol mi Lapalap a rongorong ai leüömong le kechü. ✱

⁹ Ewe Samol mi Lapalap a rongorong ai tüngorün alilis,
ewe Samol mi Lapalap a etiwa ai iotek.

¹⁰ Ekewe chon oputaei meinisin repwe säw o rükö.
Repwe kulsefäl o müttir mefi ar itengau.

7

Eu iotekin tüngor aleleten pwüng

7.1-17

Echö än Tafit Sikaion, a köl ngeni ewe Samol mi Lapalap usun Kus ewe re Peniamin.

¹ Ai Samol mi Lapalap ai Kot, üa feito pwe üpwe op reöm,
kopwe amanauaei seni chokewe meinisin mi tapweriei. Kopwe an-
gasaeila,

² pwe resap etekinieila o atatakisi fitukei
usun chök mine eman laion a föri,
nge esap wor eman a chimanüei.

³ Ai Samol mi Lapalap, ai Kot,
are üa föri eu lein ekei föför,
are üa föri och mi mwäl ngeni eman,

⁴ are üa liwini än chienei kirikiröch ngeni mi ngau,
ika angei och fän pöchökül seni chon oputaei, nge esap wor popun,

⁵ mürin, ekewe chon oputaei repwe tapweriei o liapeniei,
repwe atatakisiei, repwe nieila
o likitieila lepwül.

⁶ Ai Samol mi Lapalap, kopwe ütä lon om song,
kopwe awenokota o ü ngeni än ekewe chon oputaei lingeringeritiei.
Kopwe pwätä o alisie, ai Kot en mi allük pwe epwe fis pwüng.

⁷ Kopwe amwichato chon ekewe mwü ünükum,
nge en kopwe nom aser o nemeniir.

⁸ En ka apwüngü chon ekewe mwü meinisin.

Ai Samol mi Lapalap, lon om kapwüng kopwe pwärätä pwe üa pwüng,

✱ 6:8: Mat 7.23; Luk 13.27

pun ka silei pwe esap wor ai tipis.

⁹ En ewe Kot mi pwüŋg, ka etittina ekiëkin me tipen aramas.

Kopwe aükätü an ekewe aramasangau föföör mi ngau,
nge kopwe anüküchara ekewe chon pwüŋg. ✱

¹⁰ Kot a tümwünüei,
a amanaua chokewe mi aleasochisi i.

¹¹ Kot eman soukapwüŋg mi pwüŋg,
eman Kot mi apwüŋgü ekewe aramasangau fansoun meininis.

¹² Are eman aramas esap mochen ekiëksefäl,
Kot epwe seimi nöün ketilas,

epwe emeia an likapich o äna ngeni.

¹³ A amolätä an pisekin maun mi afeiangau,
pwal wokun föün esefich mi ngetenget.

¹⁴ Nengeni, ekewe aramasangau ra chök ekiëkietä mine a ngau,
ra chök föri föföör esepwüŋg o eäni kapas chofana.

¹⁵ Iwe, ra tuw pwang pwe aramas repwe tup lon,
nge ra püsin turulong lon.

¹⁶ Ar föföör esepwüŋg epwe püsin ukur chök,
nge liwinin ar föföörün mwäneson epwe püsin küür.

¹⁷ Üpwe kilisou ngeni ewe Samol mi Lapalap pokiten an pwüŋg,
üpwe pwal kölün mwareiti ewe Samol mi Lapalap, Ewe mi Unusen Tekia.

8

Lingen Kot me iteüöchün aramas

8.1-9

Ngeni ewe mi emweni chon köl: Won ewe pisekin ettik itan kitit. Echö
än Tafit köl.

¹ Äm Samol mi Lapalap, äm Samol,
a fokun pwäla iteüöchum won unusen fanüfan!
Kölün mwareiti lingom a tori läng.

² Ekewe semirit me ekewe mönükol ra kölün mwareituk.
Ekewe chon oputom resap tongeni afeiangauok.

Ka afanafanaloi chon oputom me chon ü ngonuk. ✱

³ Lupwen üa netä läng förien poum
o nengeni ewe maram me ekewe fü ka anomuur lon lenier,

⁴ met aüchean aramas pwe ka ekiëki usun,
nge met aüchean nöün aramas pwe ka tümwünü? ✱

⁵ Nge ka föri i pwe epwe ekis kis fomw en ai Kot,
ka ämwärämwära ngeni ling me iteüöch.

⁶ Ka awisa ngeni pwe epwe nemeni mettoch meininis ka föri.

Ka anomu fän nemenian föriom kewe meininis, ✱

⁷ ekewe sip me ekewe kow meininis, pwal ekewe manmwachon lemäl,

⁸ ekewe mansüsü me ekewe ikenen leset
me sokopaten mönün leset.

⁹ Äm Samol mi Lapalap, äm Samol,
a fokun pwäla iteüöchum won unusen fanüfan!

9

Kilisou ren än Kot eäni pwüing le kapwüing

9.1-20

Ngeni ewe mi emweni chon köl: Ei köl usun ngingin ewe köl itan 'Mälan ewe Nau'. Echö än Tafit köl.

¹ Üpwe kilisou ngonuk, ai Samol mi Lapalap, ren unusen lelukei, üpwe apworausä usun om kewe föföör meinisin mi amwarar.

² Üpwe pwapwa o ingemwareituk, üpwe kölün mwareituk, En ewe mi Unusen Tekia.

³ Ekewe chon oputaei ra kulsefäl, lupwen ka waroto, ra turula o mäla.

⁴ Ka apwüingala pwe üa pwüing, en ka mot won om lenien mot o eäni kapwüing fän pwüing.

⁵ Ka apwüingü chon ekewe mwü, ka arosala ekewe aramasangau, esap wor eman epwe chüen chechemeniir tori feilfeilachök.

⁶ Ekewe chon oputem ra feiengau o rosola.

Ka ataela ar kewe telinimw pwe esap wor eman epwe chüen chechemeniir.

⁷ Nge ewe Samol mi Lapalap a king tori feilfeilachök, a anüküchara an lenien motun king pwe epwe eäni kapwüing.

⁸ Iwe, a apwüingü chon fanüfan fän pwüing, a apwüingü chon ekewe mwü fän wenechar.

⁹ Ewe Samol mi Lapalap eu lenien op mi pöchökül fän iten ekewe mi riaföü,

eu lenien manau lon fansoun riaföü.

¹⁰ Chokewe mi silei en ra anomu ar apilükülük womw, pun en, ai Samol mi Lapalap, kosap kul seni chokewe mi feito reöm.

¹¹ Oupwe kölün mwareiti ewe Samol mi Lapalap mi imweimw lon Sion, oupwe apworausä an kewe föföör ngeni chon ekewe mwü.

¹² Kot a chechemeni chokewe mi riaföü, esap manlükala ar siö, nge epwe ngeni ekewe chon föfööringau chappen ar föföör.

¹³ Ai Samol mi Lapalap, kopwe ümömöch ngenie! Kopwe nenengeni ai riaföü ren chokewe mi oputaei.

Ai Samol mi Lapalap, kopwe angasaeila seni mäla,

¹⁴ pwe üpwe tufichin pwärätä mwen ekewe aramasen Jerusalem ekewe metoch meinisin üa mwareituk ren.

Üpwe pwal pwapwa pun ka angasaei.

¹⁵ Iwe, chon ekewe mwü ra turulong lon ewe pwang ra püsin tuw, ra tup lon ewe sär ra püsin aopala.

¹⁶ Ewe Samol mi Lapalap a pwäräla püsin i ren an eäni kapwüing fän pwüing.

Ekewe aramasangau ra tup lon püsin ar föföör.

¹⁷ Iwe, ekewe aramasangau repwe fokun feil ngeni mäla,

pwal chon ekewe mwü meininis mi pöütala Kot.

¹⁸ Kot esap manlükala ekewe chon mwelele tori feilfeilachök, pwal än chon wöüngau apilükülüköch esap tala tori feilfeilachök.

¹⁹ Ai Samol mi Lapalap, kopwe feito! Kosap mwütätä pwe aramas repwe ü ngonuk.

Chon ekewe mwü repwe kapwüing fän mesom.

²⁰ Ai Samol mi Lapalap, kopwe eniweer.

Kopwe asile ngeniir pwe ir aramas echök repwe mäla.

10

Eu iotek pwe aramasangau repwe kuf

10.1-18

¹ Ai Samol mi Lapalap, pwota ka chök ütä me toau?

Pwota ka okopola lupwen äm nom lon riaföü?

² Ekewe aramasangau ra ariaföüü ekewe chon wöüngau fän lamalamtekia.

Kopwe föri pwe repwe oo lon ekewe ekiekingau ra püsin ekiokitä.

³ Ewe aramasangau a sikäsini mochenin lelukan,

nge ewe aramas mi mochenian win a otteki o pöütala ewe Samol mi Lapalap.

⁴ Ewe aramasangau esap kütta Kot.

Lon an lamalamtekia a chök ekieki pwe esap wor Kot.

⁵ Än ewe aramasangau kewe föför meininis ra chök fisiöch fansoun meininis.

Esap weweiti om kewe allük,

nge a chök esita chon oputan.

⁶ Iwe, a ekieki lon lelukan, “Üsap tongeni mwökütütüküt.

Üpwe pwapwa fansoun meininis, nge üsap tolong lon osupwang.”

⁷ An kapas a uren ottek, atuputup me eniweniw,

a müttir le apasawu kapasen oput me kapas mi ngau. ✱

⁸ A op lon ekewe sop

o awiti ekewe aramas esap wor ar tipis pwe epwe nirela.

Iwe, a aköürü ekewe chon mwelele,

⁹ a witiwit lon an lenien op usun eman laion.

A öüröürela pwe epwe turufi ekewe chon wöüngau.

A liapaniir me lon an we sär o etekinirela.

¹⁰ Iwe, ewe chon mwelele a kawet,

a mwörürütüu o turula ren pöchökülen ewe aramasangau.

¹¹ Nge ewe aramasangau a ekieki lon lelukan,

“Kot esap ekieki usun, a aopala mesan pwe esap fokun künaei.”

¹² Ai Samol mi Lapalap, kopwe apwüngü ekei aramasangau.

Kosap manlükala chokewe mi nom lon riaföü.

¹³ Pwota ewe aramasangau a turunufasei Kot o ekieki lon lelukan,

“Kot esap apwüngüei.”

✱ 10:7: Rom 3.14

14 Nge en ka küna, ewer, ka silei ewe osupwang me riaföü,
ka pwal amolätä om kopwe alilis.
Ewe chon mwelele a atolonga püsin i lepoum,
en ewe ka alisi ekewe mi mäsen fansoun meinisin.

15 Kopwe kupi pöchökülen ewe aramasangau me ewe chon föföringau.
Kopwe aunusa ngeniir liwinin ar föföringau
tori resap chüen försefäli.

16 Ewe Samol mi Lapalap i king tori feilfeilachök.
Chon ekewe mwü repwe rosola seni fanüan.

17 Ai Samol mi Lapalap, kopwe rong än ekewe mi riaföü tünigor,
kopwe apöchöküla leluker
o aü selingom ngeni ar siö.

18 Kopwe peni ekewe mi mäsen me ekewe mi riaföü,
pwe aramas mi pop seni fanüfan resap chüen eniwokusu eman.

11

Än chon wenechar lenien op
11.1-7

Ngeni ewe mi emweni chon köl: Echö än Tafit köl.

1 Üa anomu ai apilükülük won ewe Samol mi Lapalap pwe epwe
tümwünüei.

Pwota oua üreniei,
“Kopwe sü ngeni ekewe chuk usun eman machang?”

2 Pun ngeni, ekewe aramasangau ra emeia ar likapich
o pachetä wokur föün esefich ngeni selin,
pwe repwe likapichi ekewe mi wenechar leluker seni ewe leni mi kiroch.

3 Are ekewe longolongun pwüng ra tala,
met eman chon pwüng a chüen tongeni föri?”

4 Ewe Samol mi Lapalap a nom lon imwan mi pin,
än ewe Samol mi Lapalap lenien motun king a nom lon läng.
A netiu won fanüfan o ouwasacha aramas meinisin,
a pwal silei mine ra föri.

5 Ewe Samol mi Lapalap a sotuni ekewe aramas mi pwüng me ekewe
aramasangau,
a oput ätewe mi föri föförün mwäneson.

6 A apüngätiu molien ekkei me primston won ekewe aramasangau.
A apwüngtühr ren asepwäl mi pwichikar.

7 Pun ewe Samol mi Lapalap a pwüng,
a pwapwäasini föföri mi pwüng.
Ekewe aramas mi wenechar repwe küna i.

12

Iotekin tünigor alilisin ngas seni ekewe aramasangau
12.1-8

Ngeni ewe mi emweni chon köl: Won pisekin ettik mi wor walufoch
saitenin. Echö än Tafit köl.

1 Äm Samol mi Lapalap, kopwe alisikem,
pun esap chüen wor eman chon pin,

nge ekewe chon allükülük ra rosola seni lein aramas.

² Iteiten eman me eman a chofana ngeni chon arun.

Ra chök eäni kapas atuputup lefiler.

³ Amwo ewe Samol mi Lapalap epwe aukätü ar kapas atuputup o pineela awen ekewe aramas mi tunesikesikemong.

⁴ Ir chokewe mi apasa, “Sa win ren ach kapas, nge kapasen awach a alisikich.

Iö epwe tongeni nemenikich?”

⁵ Nge ewe Samol mi Lapalap a üra, “Iei ngang üpwe feito,

pokiten ekewe chon wöüngau ra osupwang,

pwal ekewe chon mwelele ra ngüngü.

Ngang üpwe alenier lon ewe lenien kinamwe ra älälei.”

⁶ Än ewe Samol mi Lapalap kewe pwon ra allükülük o fatafatöch,

usun silifer a kurufat me lon ewe lenien um lepwül,

lupwen a ketel fän fisu pwe epwe limöch.

⁷ Äm Samol mi Lapalap, kopwe amwöchükem,

kopwe tümwünükem fansoun meinisin seni ei täppin aramas mi ngau.

⁸ Pun ekewe aramasangau ra nom ekis meinisin,

nge aramas meinisin ra pwapwaiti mine a ngau.

13

Iotekin tüngor alilis lon riaföü

13.1-6

Ngeni ewe mi emweni chon köl: Echö än Tafit köl.

¹ Ai Samol mi Lapalap, ifa ükükün fansoun om kopwe manlükieila?

Ifa usun, kopwe manlükieila tori feilfeilachök?

Ifa ükükün fansoun om kopwe aopala mesom seniei?

² Ifa ükükün fansoun ai üpwe engila fän ai weires?

Ifa ükükün fansoun lelukei epwe riaföü lerän me lepwün?

Ifa ükükün fansoun än chon oputaei repwe nemenieila?

³ Ai Samol mi Lapalap, kopwe nenengeniei o pälüeniei.

Kopwe apöchökülaei, kosap mwütätä ai üpwe mäla.

⁴ Kosap mwüt ngeni ekewe chon oputaei pwe repwe apasa, “Aia akufu ätewe.”

Kosap mwüt ngeni ekewe chon pälüeniei repwe takiriei ren ai tumwula.

⁵ Nge üa anomu ai apilükülük won om tong ellet,

üpwe pwapwa ren om amanauaei.

⁶ Ngang üpwe köl ngonuk, ai Samol mi Lapalap,

pun ka fokun eäni kirikiröch ngeniei.

14

Än ekewe aramas umwes me föföringau

14.1-7

(Kölf 53)

Ngeni ewe mi emweni chon köl: Echö än Tafit köl.

¹ Ekewe mi umwes ra ekieki lon leluker, “Esap wor Kot.” Ir ra fokun ngau,

ra föri sokun föföör mi anioput,
esap wor eman a föri mine a pwüing.

² Ewe Samol mi Lapalap a nenetiu seni läng won aramas meinisin,
pwe epwe küna ika a wor eman mi mirit,
ika eman mi kütta Kot.

³ Nge ir meinisin ra tokola, ir ra ingaueppök.
Esap wor eman a föri mine a pwüing,
esap fokun wor eman. ✱

⁴ Ewe Samol mi Lapalap a ais, “Ifa usun, esap wor än ekewe chon
föfööringau mirit?”

Ir chokewe mi manau seni mine ra soläni seni nei aramas,
nge resap iotek ngeniei.”

⁵ Nge mürin repwe nom lon niuokus watte,
pun Kot a nom ren ekewe aramas mi pwüing.

⁶ Ekewe chon föfööringau ra pinei än ewe chon wöüingau akot,
nge ewe Samol mi Lapalap an lenien op.

⁷ Amwo eman epwe feito seni Sion o amanaua chon Israel.
Ekewe chon Israel repwe fokun pwapwa,
lupwen ewe Samol mi Lapalap epwe aliwini ngeniir wöür.

15

Ekewe chon nonom won ewe chukun Kot

15.1-5

Echö än Tafit köl.

¹ Ai Samol mi Lapalap, iö epwe tongeni tolong lon imwom mi pin?
Iö epwe tongeni nonom won chukum mi pin?

² Ätewe mi aleasochisi Kot
o föri mine a pwüing fansoun meinisin,
a eäni kapas wenechar seni lon lelukan.

³ Esap aitengaua eman,
esap föri mine a ngau ngeni chienan,
esap pwal ngününgünüfetalei chon arun.

⁴ A oput eman mi manauangau,
nge a asamolu chokewe mi meniniti ewe Samol mi Lapalap,
a apwönüetä an pwon a eäni fän akapel, inamwo are a weires ren.

⁵ A mwütawu nöün moni, nge esap angei winnan,
esap pwal angei lifangen amichimich pwe epwe aturu eman esap wor
an tipis.

Ätewe mi föri ekei mettoch epwe nomopos won chukum mi pin.

16

Iotekin apilükülük

16.1-11

Echö än Tafit köl.

¹ Ai Kot, kopwe tümwünüei,
pun üa anomu ai apilükülük womw pwe kopwe ti seniei feiengau.

✱ 14:3: Rom 3.10-12

2 Üa kapas ngeni ewe Samol mi Lapalap, “En chök ai Samol. Esap wor ai feiöch lükün en.”

3 Ekewe chon pin mi nom won fanüfan ra iteföüla.
Üa fokun pwapwaäsini ai üpwe nom rer.

4 Ekewe aramas mi filätä pwal ekoch kot ra achomonga ar riaföü.
Üsap fokun etiir, lupwen ra asor,
üsap pwal fel ngeni ar kewe kot.

5 Ai Samol mi Lapalap, en ai, ka fokun aüchea ngeniei.
En ewe mi fang ngeniei meinis mine üpwe eäni.

6 Ineti we a nom lon eu fanü mi fokun öch.
Ewer, ineti we a mürina.

7 Üa mwareiti ewe Samol mi Lapalap, pun a öüröüraei,
nge lepwin lelukei a pwal fönöüei.

8 Iteiten fansoun üa mefi pwe ewe Samol mi Lapalap a nom rei.
Pokiten i a arap ngeniei, üsap tongeni mwökütüküt.

9 Iei mine lelukei a pwapwa o mwänek,
inisi a mefi kinamwe.

10 Pun en ka tümwünüei seni manamanen mäla,
kosap pwal mwüt ngeni noum we mi pin pwe epwe mwöch lon peias. ✱

11 En ka aiti ngeniei ewe alen manau.

Om nom rei a afisätä ai pwapwa mi somwosom
o awarato ai mwänek tori feilfeilachök. ✱

17

Iotekin tünigor pwe Kot epwe tümwünü nöün seni chon ariaföüü

17.1-15

Eu än Tafit iotek.

1 Ai Samol mi Lapalap, kopwe aüselinga ai tünigor mi pwüing
o afäli ai siö.

Kopwe aü selingom ngeni ai iotek mi wenechar.

2 Alelletin ai pwüing epwe feito senuk.

Pun en ka silei mine a pwüing.

3 En ka atittina lelukei,
ka äämwaei lepwin,
ka sotunie, nge kosap küna och ekiek mi ngau rei.

Üsap apasa och mi ngau.

4 Pokiten än ekewe aramas föföör,
üa afäliei seni föföörün ekewe chon mwäneson
reñ ai aleasochisi alom.

5 Üa chök fetal lon om kewe al,
nge üsap rik seni.

6 Ai Kot, üa kökköruk, pun en kopwe pälüeniei,
kopwe aü selingom ngeniei o rongorong ai kapas.

7 Kopwe pwäräla om tong ellet mi amwarar.

Ren om manaman ka amanaua chokewe mi feito reöm pwe kopwe
tümwünüür seni chon ü ngeniir.

⁸ Kopwe tümwünüei usun chök fituken lon mesom,
kopwe aopaei fän nürün poum,

⁹ seni ekewe aramasangau mi fiu ngeniei,
seni ekewe chon oputaei mi pwelifeiliei o mochen nieila.

¹⁰ Ra pineela leluker pwe resap eäni tong,
ra eäni kapasen tunesikesik.

¹¹ Ra eipwa ipwei, iei ra pwelifeiliei,
ra chök änenaei pwe repwe aturueitiu lepwül.

¹² Ra wewe ngeni eman laion mi achocho le kütta liapan,
ika wewe ngeni eman nienifön laion mi öüröürela lon an lenien op.

¹³ Ai Samol mi Lapalap, kopwe feito. Kopwe ü ngeni chon oputaei o
akufuur.

Kopwe angasaei seni ekewe aramasangau ren noum ketilas.

¹⁴ Ai Samol mi Lapalap, kopwe angasaei seni ekewe aramas mi chök
angei ar feiöch me lon ei fanüfan.

Kopwe apwüngüür ren ekewe riaföü ka amolätä fän iter,
amwo epwe naf ngeni nöür me nöün nöür.

¹⁵ Nge me rei, ngang üpwe nenengeni mesom, pun üsap föri och mi mwäl.
Lupwen üpwe nenela, üpwe fokun pwapwa ren ai nenengonuk.

18

Än Tafit kölin kilisou ren an ngasala

18.1-50

(2.Sam 22.1-51)

Ngeni ewe mi emweni chon köl: Echö köl än Tafit nöün ewe Samol mi
Lapalap we chon angang. A apasa kapasen ei köl ngeni ewe Samol mi
Lapalap lon ewe rän, lupwen ewe Samol mi Lapalap a angasa i seni
lepöün ekewe chon oputa meinsin, pwal seni lepöün Saul. Iwe, a apasa:

¹ Ai Samol mi Lapalap,
üa echenuk, en ai pöchökül.

² Ewe Samol mi Lapalap ai achau,
i imwei imwen maun, pwal i chon angasaei,
ai Kot, ai achau ewe ia üa op ie.

A epeti seniei feiengau usun eu tittin maun,
a peniei o tümwünüei.

³ Üa kökköri ewe Samol mi Lapalap,
ewe mi fich ngeni ach sipwe mwareiti.
A amanauaei seni ekewe chon oputaei.

⁴ Ekewe feiengauen mäla ra pwelifeiliei,
ekewe öütöüten feiengau ra puitiei.

⁵ Ekewe feiengauen lenien sotup ra pwelifeiliei,
ekewe likatupun mäla ra mochen säreei.

⁶ Üa kökköri ewe Samol mi Lapalap lon ai riaföü,

üa siö ngeni ai Kot pwe epwe alisie.
A rongorong mweliei seni lon imwan imwenfel,
a aüselinga ai siö ngeni.

⁷ Iwe, fanüfan a chechec o mwöökük,
nge longolongun ekewe chuk ra pwal chechec o chüngüchüng pokiten
än Kot song.

⁸ Ötüöt a ötüwu seni lon pwötün,
nge ekkei lapalap a ngetewu seni lon awan, pwal mooch mi sarara a
küwu seni.

⁹ A tinenifeseni läng o feitiu.
Kuchuchol ra nom fän pechen.

¹⁰ A wawa eman kerop o äs,
a müttir feito won pöükässin asepwäl.

¹¹ A pwölüela ngeni inisin rochopwak,
kuchu mi malul o uren koluk ra pwelifeili.

¹² Seni lon ewe saramaram mi nom mwan
ütten fau me moochen ekkei ra towu o tinenifeseni ewe kuchuchol.

¹³ Ewe Samol mi Lapalap a pwal apüngü chopulap lon läng,
Ewe mi Unusen Tekia a aronga mwelian.

¹⁴ A esefichala wokun kewe föün esefich o atoropasa chon oputan,
a efifi ngeniir inefi o asürela.

¹⁵ Mürin, epin matau a pwä,
longolongun fanüfan a lingetä, lupwen ka apwüngü chon oputom
o leüömong ngeniir fän om song, ai Samol mi Lapalap.

¹⁶ Iwe, ewe Samol mi Lapalap a angetiu seni won ewe leni mi tekia
o amwöchüei,

a efeitä seni lon ekewe koluk mi alolol.

¹⁷ A angasaei seni ekewe chon pälüeniei mi pöchökül,
seni chokewe mi oputaei,
pun ra kon pöchökül ngeniei.

¹⁸ Iwe, ra münitiei lon ränin ai feingau,
nge ewe Samol mi Lapalap a tümwünüei.

¹⁹ A alisie lon ai feingau
o angasaei, pun a pwapwa rei.

²⁰ Ewe Samol mi Lapalap a liwiniöchüei, pun üa föri mine a pwüng,
a afeiöchüei, pun esap wor ai tipis.

²¹ Üa aleasochisi än ewe Samol mi Lapalap kewe allük,
nge üsap rik seni ai Kot ren och föför mi ngau.

²² Üa apwönüetä an kewe allük meinsin,
nge üsap aleasolap ngeni an kewe pwüüng.

²³ A silei pwe esap wor ai mwäl,
pwe üa püsin tümwünüei seni tipis.

²⁴ Iei mine ewe Samol mi Lapalap a liwiniöchüei, pun üa föri mine a
pwüng,
pun a silei pwe esap wor ai tipis.

²⁵ Ai Samol mi Lapalap, ka allükülük ngeniir mi allükülük,

ka pwal pwärätä om unusen pwüng ngeniir mi unusen pwüng.

²⁶ Ka pwärätä om limelimöch ngeni ir mi limelimöch,
nge ekewe mi pwor manauer ka pwärätä om pöchökül ngeniir.

²⁷ Ka angasa aramas mi tipetekison,
nge chokewe mi lamalamtekia ka atekisoneretiu.

²⁸ Ai Samol mi Lapalap, ka asarama manauai,
en ai Kot ka awili ai rochopwak ngeni saram.

²⁹ Ewer, ren om alisiei üa tongeni fiu ngeni ekewe chon oputaei,
ren en ai Kot üa tongeni mwet won eu tit.

³⁰ Än Kot kewe föför ra unusen pwüng,
än ewe Samol mi Lapalap kapasen pwon a let.

I a usun chök tittin maun fän iten chokewe meinisin mi op ren.

³¹ Ewe Samol mi Lapalap i chök Kot.

Kot echök ach achau.

³² I ewe Kot mi apöchökülaei

o anükünüköchü ai al.

³³ A amüttiriei usun müttirin chia,
a pwal aleniöchüei won ekewe leni mi tekia. ☆

³⁴ A asipa pei ngeni maun
pwe üa tongeni pworefengeni efoch esefich seni piras.

³⁵ Ka epeti seniei feiengau o amanauaei,
poum a amwöchüei,
nge om alilis a atekiaeitä.

³⁶ Ka achölapa ewe al üa fetal won,
pwe pechei esap mit.

³⁷ Üa tapweri chon oputaei o liapeniir.

Üsap kulselfäl seniir tori ra rosola.

³⁸ Üa aturrela pwe resap chüen tongeni ütä.
Ra turula arun pechei.

³⁹ Ka ngeniei pöchökül pwe üa tongeni maun,
ka pwal akufu me mwei ekewe chon ü ngeniei.

⁴⁰ Ka föri pwe ekewe chon pälüeniei ra sü seniei,
üa arosala chokewe mi oputaei.

⁴¹ Ra siö pwe eman epwe alisiir, nge esap wor eman a amanaueer.
Ra siö ngeni ewe Samol mi Lapalap, nge esap pälüeniir.

⁴² Üa üsiir pwe ra usun chök pipisüsü
asepwäl a ässala.

Üa puriretiu usun pwakaken lon ekewe al.

⁴³ En ka angasaei seni ekewe aramas mi ü ngeniei,
ka seikieitä pwe üpwe samolun ekewe mwü.

Ekewe aramas üsap sileer me mwan ra nom fän nemeniei.

⁴⁴ Ra aleasochisiei lon ewe otun ra rong mweliei.
Chon ekis ra feito o chapetiu mwei.

⁴⁵ Iwe, ra apilükingau,
ra towu seni ar kewe lenien maun mi pöchökül fän chechech.

⁴⁶ Ewe Samol mi Lapalap a manau. Üa mwareiti ai achau,

üa ingeiti ai Kot mi amanauaei.

⁴⁷ Kot a atufichiei pwe üpwe ngeni chon oputaei chappen ar föföör,
a anomu fai aramasen ekewe mwü.
A amanauaei seni ekewe chon pälüeniei.

⁴⁸ En ai Samol mi Lapalap ka atekiaeitä asen chon ü ngenie
o angasaei seni ekewe aramas mi mwäneson.

⁴⁹ Iei mine üpwe ingemwareituk me lein chon ekewe mwü.
Ai Samol mi Lapalap, üpwe kölün mwareituk. ✱

⁵⁰ Kot a ngeni nöün we king win mi lapalap
o pwäri an tong ellet ngeni nöün we mi kepit,
ngeni Tafit me mwirimwirin kewe tori feilfeilachök.

19

Än Kot föföör me an kewe allük

19.1-14

Ngeni ewe mi emweni chon köl: Echö än Tafit köl.

¹ Ekewe läng ra pwärätä lingen Kot,
nge fän läng a arongafeili usun angangen pöün.

² Rän a kapas ngeni pwal eu rän usun,
nge pwin a asile ngeni pwal eu pwin usun.

³ Esap wor ar fos, esap pwal wor ar kapas,
esap wor eman a tongeni rong mwelier.

⁴ Nge mwelier a chöfetel lemenen unusen fanüfan,
ar kapas a tori lesopun fanüfan.

Kot a föri eu imw fän läng fän iten akkar. ✱

⁵ Akkar a tötä usun eman mwän apwüpwürlülü söfö a towu seni lon
rumwan,

a pwal sä won alan usun eman mwän mi pöchökül
a pwapwa lon an kitir.

⁶ Akkar a tötä seni epek läng
o fetal ngeni ewe epek,

nge esap wor och mettoch a tongeni op seni pwichikaran.

⁷ Än ewe Samol mi Lapalap allük a fokun mürina, a apöchökülasefäli
letipach.

Än ewe Samol mi Lapalap kait a let,
a atipachema ir mi wewemang.

⁸ Än ewe Samol mi Lapalap öüröür ra pwüng,
ra apwapwai lelukach.

Än ewe Samol mi Lapalap kewe allük ra fat,
ra awora mirit.

⁹ Ach niuokusiti ewe Samol mi Lapalap a mürina,
epwe nonom tori feilfeilachök.

Än ewe Samol mi Lapalap pwüüng ra let,
ir meinisin ra pwüüng.

¹⁰ Ra aüchea lap seni kolt, ewer, lap seni chomong kolt mi mürina.
Ra pwal arar seni chönün chunen, pwal seni sürün ewe fasen chunen.

11 Ren ekei allük ngang noum chon angang üa angei ai fön seniir.
Eman mi apwönüetä epwe angei liwinin mi lapalap.

12 Nge iö a tongeni mefi iteiten an föföör mi mwäl?

Kopwe amusa seniei ekewe tipis mi monomon.

13 Kopwe pwal tümwünüei pwe ngang noum chon angang üsap föri tipis
ren mochenin letipei.

Kosap mwüt ngeniir pwe repwe nemeniei.

Mürin üpwe unusöch lon manau ei o ngas seni pupungau mi watte.

14 Amwo kapasen awei me ekiekin lelukei epwe mürina me fän mesom,
ai Samol mi Lapalap, ai achau me ai chon amanau.

20

Eu iotekin tüngor win

20.1-9

Ngeni ewe mi emweni chon köl: Echö än Tafit köl.

¹ Amwo ewe Samol mi Lapalap epwe pälüeni om tüngor lon ränin om
riaföü.

Amwo än Jakob we Kot epwe tümwünüuk.

² Amwo epwe tinato reöm alilisum seni lon ewe leni mi pin
o apöchökülok seni Sion.

³ Amwo epwe etiwa om kewe asor meinisin
o pwapwaäsini om kewe asoren kek.

⁴ Amwo Kot epwe ngonuk mochenin letipom
o apwönüetä om kewe ekiek meinisin.

⁵ Mürin sipwe mweir fän pwapwa ren om win,
sipwe pwal aürätä ach filaik fän iten ach Kot.

Amwo ewe Samol mi Lapalap epwe apwönüetä om kewe tüngor mein-
isin.

⁶ Iei üa silei pwe ewe Samol mi Lapalap a alisi nöün we king mi kepit,
a pälüeni an tüngor seni an we läng mi pin
o awinna ren win mi lapalap ren an manaman.

⁷ Ekoch aramas ra anomu ar apilükülük won war wokenin maun,
ekoch ra anomu won nöür oris,
nge kich sia anomu ach apilükülük won manamanen ewe Samol mi
Lapalap ach we Kot.

⁸ Ir repwe mwaroro o turula,
nge kich sipwe ütä o üwenewenetä.

⁹ Äm Samol mi Lapalap, kopwe awinna ewe king,
kopwe pälüenikem, lupwen aia kökkörük.

21

Kölün mwareiti Kot pokiten ngasala seni ekewe chon oput

21.1-13

Ngeni ewe mi emweni chon köl: Echö än Tafit köl.

¹ Äm Samol mi Lapalap, ewe king a pwapwa ren om manaman,
a fokun ingeiti om alilis ngeni pwe a win.

² Ka fang ngeni mochenin letipan,

nge kosap amwöchü seni mine a tüngor.

³ Pun ka etiwa i ren feiöch mi chomong,

ka pwal isetä won möküran epa mwärämwär seni kolt mi mürina.

⁴ A tüngor manau me reöm, nge en ka fang ngeni,

ka alangatama ränin manauan tori feilfeilachök.

⁵ An ling a lapalap, pun ka alisi pwe a win.

Ka awora ngeni iteuöch me iteföüla.

⁶ Ewer, ka fokun afeiöchü ren feiöch esemüch,

ka apwapwai ren om nonom ren.

⁷ Pun ewe king a anomu an apilükülük won ewe Samol mi Lapalap,

nge ren än Ewe mi Unusen Tekia tong ellet

esap tongeni mwökütüküt.

⁸ Ewe king epwe liapeni chon pälueni meinisin,

epwe liapeni chokewe mi oput i.

⁹ Lupwen epwe wareto,

epwe aroserele usun eu ekkei a kenala mettoch.

Ewe Samol mi Lapalap epwe ärirela lon an lingeringer,

nge ekkei epwe fisirela.

¹⁰ Epwe arosala mwirimwirir seni won fanüfan,

pwe esap wor eman epwe chüen manau.

¹¹ Ra ekiekietä ar repwe föri mi ngau ngeni o rawangauei,

nge esap fokun tongeni pwönüetä.

¹² Epwe emeia an likapich o äнна ngeniir

pwe repwe kul o süla.

¹³ Äm Samol mi Lapalap, aipwe ingemwareiti om pöchökül mi watte.

Äm aipwe kölü o mwareiti om manaman.

22

Siön lon riaföü me kölün mwareiti Kot

22.1-31

Ngeni ewe mi emweni chon köl: Ei köl usun ngingin ewe köl itan 'Ewe chian wünümweerän.' Echö än Tafit köl.

¹ Ai Kot, ai Kot, pwota ka likitieila?

Pwota ka fokun toau seniei fän om alilis,

pwal seni ai siöngau? *

² Ai Kot, üa siö ngonuk lerän, nge kosap pälueniei,

üa siö ngonuk lepwin,

nge üsap tongeni asösö.

³ Nge en ka pin. Ka mot won om lenien motun king,

en ewe chon Israel ra kölün mwareiti.

⁴ Äm kewe lewo ra anomu ar apilükülük womw.

Ra apilükülükuk, nge en ka angaserela.

⁵ Ra siö ngonuk, nge en ka amanaueer,

ra apilükülükuk, nge resap lichipüng.

⁶ Nge ngang eman moso, sap eman aramas,

üa küna esit me koput me ren aramas.

* 22:1: Mat 27.46; Mark 15.34

7 Meínisin mi künaei ra turunufaseei,
ra akopea awer o alifechefechei mökürer ngeniei. ✧

8 Ra apasa, “A anomu an apilükülük won ewe Samol mi Lapalap,
i epwe angasa,
i epwe amanaua, pun a pwapwa ren.” ✧

9 Nge en ewe mi atoeiwu seni lon letipen inei,
ka tümwünüöchüei, lupwen üa eman mönükol.

10 Seni leuputiuei üa apilükülükuk,
seni ewe fansoun inei a nöünieitiu en ai Kot.

11 Kosap toau seniei, pun osukosuk a arap ngeniei,
nge esap wor eman a alisiei.

12 Chomong chon oputaei ra pwelifeilieii usun epwi pwin ätemwänin kow,
ra nom ünüki usun ätemwänin kow
mi pöchökül seni Pasan.

13 Ra amassaw ngeniei usun eman laion mi mwacho a wörüwör
o atatakisi liapan.

14 Üa usun chök koluk mi niitiu,
lekeilen chüi meínisin ra ruwofesen,
lelukei a usun kiris,
a telila me leupwei.

15 Lon awei a pwasapwas usun pwül moromor,
nge chönawei a pacheetä fän fongochi.
Ka likitieila lon pwül moromor
usun eman mi mäla.

16 Eu mwichen aramasangau a pwelifeilieii,
ra rongeeila usun epwi pwiin kolak.
Ra posu pei me pechei.

17 Üa tongeni aleani chüi meínisin.
Chon oputaei ra änefotaei o takiriei.

18 Ra üttüt won üfei kewe
o ineti lefiler. ✧

19 Nge en, ai Samol mi Lapalap, kosap toau seniei!
En ai chon alilis, kopwe müttir feito o alisiei.

20 Kopwe angasaei seni afeiengauen ketilas,
kopwe angasa manauai seni ekei kolak mi pöchökül.

21 Kopwe amanauai seni ekewe laion,
kopwe amanaua inisi seni mächän ekewe ätemwänin kow mi mwacho.

22 Üpwe apworausau ngeni pwii kewe mine ka föri,
üpwe mwareituk lein ewe mwichen aramas. ✧

23 Ämi mi niuokusiti ewe Samol mi Lapalap, oupwe mwareiti i,
ämi mwirinwirin Jakob meínisin oupwe alinga i,
ämi chon Israel meínisin oupwe fokun meniniti i.

24 Pun Kot esap aliwini eman mi mwelele ika oput eman mi nom lon
riaföü.

Esap amona mesan seni,
nge a pälüeni, lupwen a siö ngeni.

✧ 22:7: Mat 27.39; Mark 15.29; Luk 23.35 ✧ 22:8: Mat 27.43 ✧ 22:18: Mat 27.35; Mark 15.24; Luk 23.34; Joh 19.24 ✧ 22:22: Ipr 2.12

25 En popun ai mwareituk me lon ewe mwich mi lap.

Ûpwe eäni ekewe asor me fän mesen chokewe mi niuokusituk,
ekewe asor üa pwon ngonuk.

26 Chokewe mi wöüngau repwe mongö o möt.

Chokewe mi feito ren ewe Samol mi Lapalap repwe mwareiti i.
Amwo repwe feiöch tori feilfeilachök.

27 Chon fanüfan meinsin repwe chechemeni ewe Samol mi Lapalap
o kuliti i.

Chon ekewe ainang seni ekewe mwü meinsin repwe fel ngeni.

28 Pun ewe Samol mi Lapalap i king,
i a nemeni ekewe mwü.

29 Ewer, ekewe chon lamalamtekia meinsin me won fanüfan repwe
chabetiu mwan,

chokewe meinsin mi feil ngeni mäla repwe fotopwäsuk me mwan, pwal
chokewe resap tongeni püsin amwöchü manauer.

30 Mwirimwirich repwe angang ngeni i.

Aramas repwe apworaus a ngeni ewe täppin aramas epwe feito usun ewe
Samol,

31 repwe asilefeili ngeni ekewe aramas resamwo uputiu,
“Ewe Samol mi Lapalap a amanaua nöün aramas.”

23

Kot ai chon mas

23.1-6

Echö än Tafit köl.

¹ Ewe Samol mi Lapalap ai chon mas,
üsap osupwang ren och mettoch.

² A mwüt ngeniei pwe üpwe konola lon eu maasies ia a mär fertil ie.
A emweneila ünükün ekewe koluk mi kurufat. ✱

³ A apöchöküla lelukei,
a emwenei won ekewe al mi pwüing usun a pwon.

⁴ Pwal are üa feila lemolun nürün mäla,
üsap niueiti och feiengau,

pun en ka etiei,
öürom me wokum ra tümwünüei.

⁵ Ka amolätä eu chepelin mongö fän itei
me fän mesen ekewe chon oputaei,

ka epiti ngeni mökürei lö,
ka alölöü ai kap tori a urela.

⁶ Ewer, kirikiröch chök me tong repwe nom rei lon ränin manauai
meinsin,

nge üpwe nonom lon imwen ewe Samol mi Lapalap tori feilfeilachök.

24

Ewe king mi ling

24.1-10

Echö än Tafit köl.

✱ 23:2: Pwär 7.17

¹ Fanüfan me masouan meinisin än ewe Samol mi Lapalap,
pwal meinisin mi nonom won ir nöün. ✧

² Pun i a anomu fanüfan won ekewe matau
o anükücharätü won ekewe koluk.

³ Iö epwe tongeni feitä won chukun ewe Samol mi Lapalap?
Nge iö epwe tongeni nom lon lenian mi pin?

⁴ Chokewe mi limöch ar föfö me ar ekiek,
resap fel ngeni uluulun anümwäl, resap pwal chofana le akapel. ✧

⁵ Ewe Samol mi Lapalap epwe afeiöchüür.
Kot epwe pwärätä pwe ra pwüing o amanau eer.

⁶ Iei usun ekewe aramas mi kütta Kot,
chokewe mi feito fän mesen än Jakop we Kot.

⁷ Oupwe sukala ekewe asam,
oupwe sukchöchöla ekewe asamen lom,
pwe ewe king mi ling epwe tolong lon.

⁸ Iö ewe king mi ling?
Ewe Samol mi Lapalap mi pöchökül o pwora,
ewe Samol mi Lapalap mi win lon maun.

⁹ Oupwe sukala ekewe asam,
oupwe sukchöchöla ekewe asamen lom,
pwe ewe king mi ling epwe tolong lon.

¹⁰ Iö ei king mi ling?
Ewe Samol mi Unusen Manaman, i ewe king mi ling.

25

*Eu iotekin tüngror pwe Kot epwe emweni o tümwünü nöün aramas
25.1-22*

Echö än Tafit köl.

¹ Ai Samol mi Lapalap, üa suki ngonuk lelukei.

² Ai Kot, üa anomu ai apilükülük womw.
Kosap mwüt ngeniei pwe üpwe säw ren chon oputaei,
kosap pwal mwüt ngeniir pwe repwe ätäiwetiei ren ai kuf.

³ Ewer, esap wor eman mi apilükülükuk epwe säw.
Nge chokewe mi ü ngonuk repwe säw.

⁴ Ai Samol mi Lapalap, kopwe aiti ngeniei om kewe al
o aitöchüür ngeniei.

⁵ Kopwe emweniei lon om let o aiöüei,
pun en ewe Kot mi amanauaei,
üa apilükülükuk fansoun meinisin.

⁶ Ai Samol mi Lapalap, kopwe chechemeni om ümöümöch me om tong
ellet,
ka pwärätä seni chök lomlom.

⁷ Kopwe amusala ai kewe tipis me ai kewe pupungau üa föri lesäräföi.
Ai Samol mi Lapalap, kopwe chechemeniei
lon om tong me om kirikiröch.

⁸ Ewe Samol mi Lapalap a pwüing o kirikiröch.

Iei mine a aiti ngeni ekewe chon tipis ewe al repwe fetal won.

⁹ A emweni chon tipetekison lon mine a pwüng
o aiti ngeniir letipan.

¹⁰ Ewe Samol mi Lapalap a eäni tong me allükülük
ngeni chokewe mi apwönüetä an we pwon o aleasochisi an kewe allük.

¹¹ Ai Samol mi Lapalap, kopwe amusala ai tipis usun ka pwon,
pun ai tipis a kon chomong.

¹² Iö ewe aramas a niuokusiti ewe Samol mi Lapalap?
Kot epwe aiti ngeni ewe al epwe fetal won.

¹³ I püsin epwe wöümong,
nge nöün kana repwe fanüeni ewe fanü.

¹⁴ Ewe Samol mi Lapalap a chiechifengen me chokewe mi niuokusiti i.
A asile ngeniir an we pwon.

¹⁵ Üa sachetä ngeni ewe Samol mi Lapalap fansoun meinisin,
pun i epwe angasaei seni feiengau.

¹⁶ Kopwe kul ngeniei o ümöömöch ngeniei,
pun ngang üa metip o osupwang.

¹⁷ Kopwe akisikisala weiresin letipei
o angasaeila seni ai kewe riaföü.

¹⁸ Kopwe ekieki usun ai riaföü me ai weires
o amusala ai kewe tipis meinisin.

¹⁹ Kopwe nenengeni chomongun ekewe chon pälüeniei,
pwal usun ar oputangauaei.

²⁰ Kopwe tümwünü manauai o angasaei.
Kosap mwüt ngeniei pwe üpwe säw,
pun üa feito reöm pwe kopwe tümwünüei.

²¹ Let me wenechar repwe tümwünüei,
pun üa apilükülükuk. ²² Ai Kot, kopwe angasa chon Israel
seni ar kewe weires meinisin.

26

Än eman aramas mi pwüng iotek
26.1-12

Echö än Tafit köl.

¹ Ai Samol mi Lapalap, kopwe aletätä ai pwüng,
pun üa föri mine a pwüng,
üa apilükülükuk, nge üsap mwökütüküt.

² Kopwe atitinaei, ai Samol mi Lapalap, o sotunie, i,
kopwe sotuni mochenin lelukei me ai ekiek.

³ Pun om tong ellet a nom mwei,
om allükülük a emweniei.

⁴ Üsap nom ren aramas mi chofana,
üsap pwal chiechi ngeni chon likatuputup.

⁵ Üa oput ewe mwichen chon föföringau,
nge üsap nom ren ekewe aramasangau.

⁶ Ai Samol mi Lapalap, üa talü pei pwe asisilen ai limelimöch
o pwelifeili om rongen asor,

⁷ Üa eäni echö kölün kilisou fän leüömong

o pporausa om kewe föföör meinisin mi amwarar.

⁸ Ai Samol mi Lapalap, üa echeni imwom ewe ia ka nonom ie, ewe leni ia lingom a nonom ie.

⁹ Kosap nieila fitifengen me ekewe chon tipis, kosap angei manau ei fitifengen me chon nimanau ei aramas,

¹⁰ ätekewe mi föri föföör mi ngau fansoun meinisin, ra pwal pwapwa le angei lifangen amichimich.

¹¹ Nge ngang won inisi üa föri mine a pwüing, kopwe ümömöch ngeniei o amanau ei.

¹² Üa nom won sonomaw.

Üpwe mwareiti ewe Samol mi Lapalap lon ewe mwich mi lap.

27

Kot ai saram me ai manau

27.1-14

Echö än Tafit köl.

¹ Ewe Samol mi Lapalap i ai saram me ai Chon Amanau.

Üsap niueiti eman.

Ewe Samol mi Lapalap a tümwünüei seni feiengau, üsap fokun niuokus.

² Lupwen aramasangau ra rangetiei pwe repwe nieila, lupwen chon ü ngeniei ra fiu ngeniei, repwe chök chepetek o turula.

³ Inamwo are eu mwichen sounfiu repwe pwelifeilei, ngang üsap niuokus.

Inamwo are ra maun ngeniei, nge ai lükü Kot epwe chök nüküchar.

⁴ Eu mettoch üa tüngorei ewe Samol mi Lapalap, eu mettoch chök üa möchen:

Pwe üpwe nonom lon imwen ewe Samol mi Lapalap lon ränin manau ei meinisin,

pwe üpwe ingeiti an kirikiröch

o kütta öüröürei me ren me lon imwan imwenfel.

⁵ Pun lon fansoun weires i epwe aopaei.

I epwe tümwünüei me lon imwan imwenfel, epwe pwal atekiaeitä won eu achau.

⁶ Mürin üpwe chimwetä o nom asen ekewe chon oputaei mi pwelifeilei, üpwe asor lon imwan fän mweireiren pwapwa.

Üpwe köl o ettiki pisekin ettik ngeni ewe Samol mi Lapalap.

⁷ Ai Samol mi Lapalap, kopwe aüselinga ai siö ngonuk.

Kopwe ümömöch ngeniei o pälüeniei.

⁸ En ka apasa, “Oupwe küttaei.”

Nge ngang üa pälüeni, “Üa küttoch, ai Samol mi Lapalap.”

⁹ Kosap aopa mesom seniei.

Kosap aliwini noum ei chon angang lon om song,
pun en ai chon alilis.

Kosap pöütieila, kosap pwal likitieila,
Ai Kot, ai Chon Amanau.

¹⁰ Inamwo ika semei me inei ra likitieila,
nge ewe Samol mi Lapalap epwe tümwünüei.

¹¹ Ai Samol mi Lapalap, kopwe aiti ngeniei mine üpwe föri
o emweniei won efoch al mi wenechar
pokiten chon oputaei.

¹² Kosap asechieilong lepöün chon pälüeniei.
Pun chon pwärätä chofana ra ü ngeniei,
ra tiliken le föri föförün mwäneson ngeniei.

¹³ Nge ngang üa lükü pwe ewe Samol mi Lapalap epwe kirikiröch ngeniei
lon fansoun ai manau won fanüfan.

¹⁴ Kopwe apilükülükü ewe Samol mi Lapalap,
kopwe pöchökül o tipepwora.
Ewer, kopwe apilükülükü ewe Samol mi Lapalap.

28

Eu iotekin tümgor alilis me iotekin kilisou

28.1-9

Echö än Tafit köl.

¹ Ai Samol mi Lapalap, en ai achau, üa kökkörük.

Kopwe aüselinga ai siö ngonuk.

Pun are kosap pälüeniei,

üpwe wewe ngeni chokewe mi tolong lon peias.

² Kopwe rongorong kapasen ai tümgor, lupwen üa siö ngonuk.

Kopwe alisie, lupwen üa aitieta pei ngeni imwom mi unusen pin.

³ Kosap apwüngüei fitifengen me ekewe aramasangau,
pwal fiti chokewe mi föri föför mi ngau,
ir mi eäni kapas pwetete ngeni chon arur,
nge ra ekiekingau lon leluker.

⁴ Kopwe ngeniir chappen ar föför

me ükükün liwinin ar föföringau.

Kopwe ngeniir chappen angangen pöür

o liwini ngeniir mine a fichitiir. ✨

⁵ Pokiten ir resap afäli än ewe Samol mi Lapalap föför

ika angangen pöün, iei mine i epwe apwüngüür

o aroserela.

⁶ Üpwe mwareiti ewe Samol mi Lapalap,

pun a rongorong ai tümgorun alilis.

⁷ Ewe Samol mi Lapalap a tümwünüei o epeti seniei feiengau,
üa apilükülükü i, nge i a alisie.

Iei mine üa fokun pwapwa.

Üpwe kilisou ngeni o kölün mwareiti.

8 Ewe Samol mi Lapalap i än nöün aramas pöchökül.
 I ewe lenien op mi allükülük fän iten nöün we mi kepit ewe king.
 9 Kopwe amanaua noum kewe aramas
 o afeiöchü noum kana.
 Kopwe ar chon mas
 o tümwünüür tori feilfeilachök.

29

Möngüngün Kot me lon mölümöl

29.1-11

Echö än Tafit köl.

1 Ämi chon läng kana, oupwe mwareiti ewe Samol mi Lapalap,
 oupwe mwareiti an ling me manaman.

2 Oupwe mwareiti lingen iten ewe Samol mi Lapalap.

Oupwe fel ngeni i fän üf mi pin. ✱

3 Aramas ra rongorong möngüngün ewe Samol mi Lapalap won ekewe
 matau.

Ewe Kot mi ling a apüngü chopulap.

Möngüngün ewe Samol mi Lapalap a tittiriis me won ekewe matau.

4 Möngüngün ewe Samol mi Lapalap a manaman.

Möngüngün ewe Samol mi Lapalap a fokun amwarar.

5 Möngüngün ewe Samol mi Lapalap a kupi ekewe irä setar,
 a kupi ekewe irä setar mi nom won Lapanon.

6 A föri pwe ewe chuk Lapanon a mwetewet usun eman nienifön kow,
 nge ewe chuk Hermon a mwetewet usun eman nienifön ätemwänin
 kow.

7 Möngüngün ewe Samol mi Lapalap a affi inefi.

8 Möngüngün ewe Samol mi Lapalap a achechecha ewe fanüapö,
 a achechecha ewe fanüapön Kates.

9 Möngüngün ewe Samol mi Lapalap a amäräkulu ekewe irä ook
 o wichikätiu chön irän ewe wöllap.
 Nge lon imwan imwenfel meinsin ra kökkö, "Kot a ling."

10 Ewe Samol mi Lapalap a nemenem won ekewe lölö.

A nemenem, pun i a king tori feilfeilachök.

11 Ewe Samol mi Lapalap a ngeni nöün kewe aramas pöchökül,
 a afeiöchü nöün kewe aramas ren kinamwe.

30

Kölün kilisou fän iten ngasala seni mäla

30.1-12

Echö än Tafit köl. Echö köl fän iten apinipinin ewe imwenfel.

1 Ai Samol mi Lapalap, üpwe ingeituk, pun ka amanauaei,
 nge kosap mwüt ngeni ekewe chon päüeniei pwe repwe ämängauaei.

2 Ai Samol mi Lapalap, ai Kot,
 üa siö ngonuk pwe kopwe alisiei.

Iwe, ka apöchökülaei.

3 Ai Samol mi Lapalap, ka angeeitä seni peias.

✱ 29:2: Kölf 96.7-9

Üa fetal ngeni ewe lenien sotup,
nge en ka amanauaei.

⁴ Oupwe kölün mwareiti ewe Samol mi Lapalap,
ämi nöün kewe chon pin.
Oupwe chechemeni Ewe mi Pin o kilisou ngeni.

⁵ Pun a mochomoch fansoun an song,
nge an kirikiröch a wor lon unusen fansoun manauen eman aramas.
Lepwin a fis kechü,
nge lesosor a fis pwapwa.

⁶ Lupwen üa nom lon nükünüköch, üa apasa,
“Üsap fokun mwökütüküt.”

⁷ Ren om kirikiröch, ai Samol mi Lapalap,
ka anükücharaei usun eu chuk mi pöchökül.
Nge lupwen ka amona mesom seniei,
üa fokun niuokus.

⁸ Ai Samol mi Lapalap, üa siö ngonuk.

Üa tüngor ngonuk pwe kopwe alisiei.

⁹ “Met sokun win kopwe angei, are üpwe mäla
o tolong lon peias?

Ifa usun, chon mäla repwe tongeni mwareituk?

Ifa usun, repwe tongeni apworausä usun om allükülük?

¹⁰ Ai Samol mi Lapalap, kopwe äüselingaei o ümöümöch ngeniei.
Ai Samol mi Lapalap, kopwe alisiei.”

¹¹ Iwe, ka awili ai ngüngüres ngeni pwörük,
ka pwiliti seniei üfei üföüfen letipeta
o aüföüfa ngeniei pwapwa.

¹² Üpwe fokun mwareituk,
nge üsap fanafanala.

Ai Samol mi Lapalap, ai Kot,
üpwe kilisou ngonuk tori feilfeilachök.

31

Kapasen pwärätä lükülük

31.1-24

Ngeni ewe mi emweni chon köl: Echö än Tafit köl.

¹ Ai Samol mi Lapalap, üa feito reöm pwe kopwe tümwünüei,
kosap mwüt ngeniei pwe üpwe kuf.

Kopwe angasaei, en ewe Kot mi pwüng.

² Kopwe aü selingom ngeniei, kopwe müttir amanauaei.

En kopwe ai lenien op usun eu föimw mi pöchökül,
pwe kopwe amanauaei.

³ Ewer, en ai achau, pwal imwei imwen maun.

Kopwe emweniei o aiti ngeniei ewe al usun ka pwon.

⁴ Kopwe tümwünüei seni ewe sär mi molotä fän itei,
kopwe ti seniei feiengau.

⁵ Üa atolonga manaei lepoum,

kopwe amanauaei, ai Samol mi Lapalap,
ewe Kot mi allükülük. ✱

⁶ Ka oput chokewe mi fel ngeni anümwäl mi lomotongau,
nge ngang üa anomu ai apilükülük womw.

⁷ Üpwe mwänek o pwapwa
ren om tong ellet,
pun ka küna ai riaföü
o silei ai kewe weires.

⁸ Kosap atologaei lepöün chon oputaei,
nge ka mwüt ngeniei pwe üpwe feila ia üa mochen feila ie.

⁹ Ai Samol mi Lapalap, kopwe ümöümöch ngeniei,
pun ngang üa nom lon riaföü.
Mesei ra toputopula ren ai kechü,
nge inisi a apwangapwangala.

¹⁰ Manauei a mochomochola ren riaföün letipei,
nge ierin manauei ren ai ngüngü.
Ai pöchökül a kisikisila pokiten ai riaföü,
pwal chüi mwo nge ra apwangapwangala.

¹¹ Üa sachowun me ren ekewe chon oputaei meinisín o koput me ren
chon ari.

Üa och pisekin eniw me ren chon sileei,
nge chokewe mi künaei me lon al ra sü seniei.

¹² Üa manlüküla me ren aramas usun eman mi mäla,
üa usun eu sepi mi mök.

¹³ Ewer, üa rongorong pwe chomong ra möngününgün.
Lupwen ra raweei usun ar repwe angei manauei,
niuokus watte a nom pwelin ünüki.

¹⁴ Nge ngang üa apilükük, ai Samol mi Lapalap,
üa apasa, “En ai Kot.”

¹⁵ Fansoun manauei a nom lepoum.

Kopwe angasaeila seni ekewe chon oputaei
me ekewe chon ariaföüüei.

¹⁶ Kopwe netiu won noum chon angang fän kirikiröch
o amanauaei lon om tong ellet.

¹⁷ Kosap mwütätä pwe üpwe itengau, ai Samol mi Lapalap,
pun üa kökkörük.

Nge kopwe mwütätä pwe ekewe aramasangau repwe itengau,
repwe fanafanala le feitiu lon lenien sotup.

¹⁸ Kopwe afanafanalai ekewe chon chofana
ra fos sikelik usun chon pwüng
lon ar lamalamtekia me oput.

¹⁹ Om kirikiröch a fokun somwola,
ka eäni ngeni chokewe mi niuokusituk.

Ka pwal kirikiröch ngeni chokewe mi eänuk lenien op
me fän mesen aramas meinisín.

²⁰ Ka nonom rer o aopeer seni än ekewe aramas rawangau.

✱ 31:5: Luk 23.46

Ka tümwünüöchüür me lon leniom
seni än ekewe chon oputeer kapasen efitikoko.

21 Üpwe mwareiti ewe Samol mi Lapalap,
pun a eäni tong ellet mi amwarar ngeniei,
lupwen üa osupwang usun chon eu telinimw ra osupwang,
lupwen sounfiu ra pwelifeili fän pisekin maun.

22 Üa ekieki lon ai niuokus
pwe a asüeila seni fän mesan.
Nge i a rongorong ai tüngor,
lupwen üa siö ngeni pwe epwe alisiei.

23 Ämi nöün ewe Samol mi Lapalap chon pin meinisin, oupwe echeni i.
Ewe Samol mi Lapalap a tümwünü chokewe mi allükülük,
nge a liwiningau ngeni ekewe chon lamalamtekia won en me ükükün
liwinin an föfö.

24 Oupwe pöchökül o tipepwora,
ämi meinisin mi apilükülükü ewe Samol mi Lapalap.

32

Feiöchün musalan tipis

32:1-11

Echö än Tafit köl. Echö kölün kait.

¹ Feiöchün ätewe an pupungau a musala,
nge an tipis a möla.

² Feiöchün ewe aramas ewe Samol mi Lapalap esap tip ngeni och
pwüngingau,

ewe aramas ese wor chofana lon lelukan. ✱

³ Lupwen üsap pwärätä ai tipis,
inisi a apwangapwangala ren ai kechü lon unusen rän me rän.

⁴ Pun lerän me lepwün ka apwüngüei.

Pöchökülen inisi a morotä
usun koluk a morotä lupwen fansoun pwichikar.

⁵ Mürin üa pwärätä ai tipis ngonuk,
nge üsap aopala ai pwüngingau.

Üa apasa, “Üpwe pwärätä ngeni ewe Samol mi Lapalap ai pupungau.”
Iwe, ka amusala ai tipis meinisin.

⁶ Iei mine ekewe chon allükülük repwe iotek ngonuk lon fansoun riaföü.
Lupwen feiengauen apwüng a war usun eu noter,
esap toriir.

⁷ En eu lenien op fän itei,
ka tümwünüei seni weires.
Üa leüömong le köl
usun om angasaeila.

⁸ Ewe Samol mi Lapalap a apasa,
“Üpwe aiti ngonuk ewe al kopwe fetal won o emwenuk,
üpwe öüröürok o mamasok.

⁹ Kosap wewe ngeni eman oris ika eman aas esap mirit,

✱ 32:2: Rom 4.7-8

nge eman a chök tongeni nemeniir, are efoch mächä a nom lon awer fiti
efoch sä!,
pwe repwe aleasochis ngeni.”

¹⁰ A wor chomong än ekewe aramasangau riaföü,
nge ewe Samol mi Lapalap a tongei o tümwünü
chokewe mi anomu ar apilükülük won.

¹¹ Ämi chon pwüing, oupwe pwapwa o meseik
ren mine ewe Samol mi Lapalap a föri.
Oupwe mweireir fän pwapwa, ämi meinisin mi wenechar lelukemi.

33

Kölün mwareiti ewe mi föri o tümwünü läng me fanüfan
33.1-22

¹ Ämi chon pwüing,
oupwe köl fän pwapwa ngeni ewe Samol mi Lapalap,
A fich ngeni chon wenechar pwe repwe mwareiti i.
² Oupwe mwareiti ewe Samol mi Lapalap ren ükülele,
oupwe ettik ngeni won kitar mi wor engol saitenin.
³ Oupwe köl ngeni echö köl mi fö,
oupwe ettikiöchü won ekewe pisekin ettik fiti mweireir mi
leüömong.

⁴ Pun än ewe Samol mi Lapalap kapas a wenechar,
an kewe föföör ra fis fän allükülük.
⁵ Ewe Samol mi Lapalap a sani pwüing me let,
fanüfan a ur ren an tong ellet.

⁶ Ewe Samol mi Lapalap a afisi ekewe läng ren an kapas,
nge akkar, maram me fü kana ra fisitä ren mine a apasa.
⁷ A achufengeni ekewe setin lematau lon eu leni usun lon eu rume,
a anomu ekewe matau mi alolol lon lenier usun lon eu imwen iseis.

⁸ Unusen fanüfan epwe niuokusiti ewe Samol mi Lapalap,
nge chon fanüfan meinisin repwe meniniti.
⁹ Pun mine a apasa a fisitä,
nge mine a allük a pwönüetä.

¹⁰ Ewe Samol mi Lapalap a ataela än chon ekewe mwü akot
o pinei än ekewe aramas ekiek.
¹¹ Nge än ewe Samol mi Lapalap akot a nonom tori feilfeilachök,
ekiekin lelukan a nonom seni eu täppin aramas tori eu täppin.
¹² Feiöchün ewe mwü mi eäni Kot ewe Samol mi Lapalap,
feiöchün ekewe aramas i a filiretä pwe epwe nöüniir.

¹³ Ewe Samol mi Lapalap a nenneti seni läng,
a küna chon fanüfan meinisin.
¹⁴ A nennewu seni an we lenien nemenem
o küna aramas meinisin mi nonom won fanüfan.
¹⁵ I ewe mi afisi ekiekin leluker
o silei ar kewe föföör meinisin.
¹⁶ Eman king esap manau ren watten an mwichen sounfiu,

nge eman sounfiu esap ngasala ren an pöchökül mi lapalap.

¹⁷ A solap an eäni apilükülük orisin maun pwe epwe win, pun resap tongeni amanaua eman ren ar pöchökül.

¹⁸ Ewe Samol mi Lapalap a mamasa chokewe mi niuokusiti, pwal chokewe mi apilükülüküni an tong ellet,

¹⁹ pwe epwe angaseer seni mäla o tümwünüür, pwe repwe tongeni manau lupwen fansoun lengita.

²⁰ Sa eäni apilükülük ewe Samol mi Lapalap, pun i ewe chon alisikich a epeti senikich feiengau.

²¹ Ewer, lelukach a pwapwa ren Kot, pun sa lükü itan mi pin.

²² Ai Samol mi Lapalap, om tong ellet epwe nonom wom, usun äm apilükülük a nom womw.

34

Kölin mwareiti Kot ren an angasakichela seni riaföü

34.1-22

(1.Sam 21.13-15)

Echö än Tafit köl, lupwen a pomweni pomwen eman chon umwes me fän mesen Apimelek, pwe ätewe a asüela, nge Tafit a feila seni.

¹ Üpwe ingemwareiti ewe Samol mi Lapalap fansoun meinisin, üpwe chök mwamwareiti i.

² Ngang üpwe aingaing won ewe Samol mi Lapalap.

Chokewe mi nom lon riaföü repwe rongorong o pwapwa ren.

³ Oupwe etiei le asilefeili än ewe Samol mi Lapalap manaman, ousipwe mwareitifengeni itan.

⁴ Üa iotek ngeni ewe Samol mi Lapalap, nge i a pälüeniei o angasaei seni ai kewe niuokus meinisin.

⁵ Oupwe sachtä ngeni i pwe oupwe pwapwa, nge ousap säw.

⁶ Ewe chon mwelele a siö, nge ewe Samol mi Lapalap a aüselinga o amanaua i seni an weires meinisin.

⁷ Nöün ewe Samol mi Lapalap chon läng a nom pwelin ünükün chokewe mi niueiti i o angaseer seni feiengau.

⁸ Oupwe neni o nengeni pwe ewe Samol mi Lapalap a kirikiröch. Ra feiöch ätekewe mi eäni i lenien op. ✧

⁹ Ämi nöün ewe Samol mi Lapalap kewe chon pin, oupwe meniniti i, pun chokewe mi meniniti i resap osupwang.

¹⁰ Ekewe laion ra echik, pun esap wor ener.

Nge chokewe mi aleasochis ngeni ewe Samol mi Lapalap resap osun och mettoch mi mürina.

¹¹ Oupwe feito, ämi nei mwän o aüselingaei, üpwe aiti ngenikemi usun ämi oupwe meniniti ewe Samol mi Lapalap.

¹² Iö me leimi a pwapwaiti manau o mochen manauatam pwe epwe alomota ekewe feiöch meinisin?

✧ 34:8: 1.Pet 2.3

13 Oupwe tümwünükemi pwe ousap eäni kapas mi ngau,
ousap pwal kapas chofana.

14 Oupwe kul seni mine a ngau o föri mine a mürina,
oupwe kütta kinamwe ren unusen lelukemi.

15 Ewe Samol mi Lapalap a mamasa ekewe chon pwüing,
selingan a rongorong ngeni ar siö.

16 Nge a ü ngeni chokewe mi föri mine a ngau,
a föri pwe mürin ar mäla aramas repwe müttir manlükirela. ✱

17 Lupwen ekewe chon pwüing ra siön alilis, ewe Samol mi Lapalap a
rongorong
o angaserela seni ar weires meinisin.

18 Ewe Samol mi Lapalap a kan ngeni chokewe mi luketatakis,
a amanaua chokewe mi apilükingau.

19 Chomong riaföü ra tori ewe chon pwüing,
nge ewe Samol mi Lapalap a angasala i seniir meinisin.

20 A fokun tümwünü ewe chon pwüing,
pwe esap mwo nge kup efoch chün. ✱

21 Föför mi ngau epwe afeiengaua ekewe aramasangau,
nge chokewe mi oput ekewe chon pwüing repwe küna liwiningau.

22 Ewe Samol mi Lapalap a amanaua nöün kewe chon angang.
Esap wor eman lein chokewe mi eäni Kot lenien op epwe küna li-
winingau.

35

Iotekin ngasala seni chon oput

35.1-28

Echö än Tafit köl.

1 Ai Samol mi Lapalap, kopwe ü ngeni chokewe mi ü ngeniei,
kopwe fiu ngeni chokewe mi fiu ngeniei.

2 Kopwe angei om kewe tittin maun,
ewe mi watte me ewe mi kükün,
kopwe feito pwe kopwe alisiei.

3 Kopwe öüröürela fän wokum siles me noum kouken maun
o ü ngeni ekewe chon tapweriei.

Kopwe üreniei, “Ngang om Chon Amanau.”

4 Amwo chokewe mi mochen nieila
repwe kuf o itengau.

Amwo chokewe mi rawangauaei
repwe kulsefäl o rükö.

5 Amwo repwe usun chök pön wiich asepwäl a ässala,
nge nöün ewe Samol mi Lapalap chon läng epwe asürela.

6 Amwo aler epwe rochopwak o amitimit,
nge nöün ewe Samol mi Lapalap chon läng epwe tapweriir.

7 Pun ra aopala ar sär pwe repwe liapeniei,
ra pwal tuw eu pwang pwe üpwe turulong lon,
ngé esap wor pöpun.

8 Amwo feiengau mi lapalap epwe toriir mwen ar silei.
Amwo repwe püsin tup lon ewe sär ra aopala.
Amwo repwe turulong lon ewe pwang o fokun feiengau.

9 Mürin ngang üpwe meseik ren ewe Samol mi Lapalap,
üpwe ingemwareiti i pokiten an angasaei.

10 Ngang üpwe apasa ngeni ewe Samol mi Lapalap ren unusen lelukei,
“Iö a wewe ngonuk?
En ka angasala ewe mi apwangapwang seni ätekewe mi pöchökül seni,
ka angasala ewe mi apwangapwang o mwelele seni ätekewe mi eliapa
pisekin.”

11 Chon pwärätä chofana ra ü ngeniei,
ra atipisieï won föföör üsap silei.

12 Ra liwini ngeniei ingau fän iten ai föföör mürina.
Iwe, üa fokun apilükingau.

13 Nge lupwen ir ra samau, ngang üa üföüf üf seni tuk,
üa ariaföüüei ren ai öchüün,
üa pworetü o iotek,

14 üa pwal letipeta usur usun üa letipeta fän iten chienei ika pwii.
Üa pworetü fän ai lolilen o fetalfeil
usun eman mi kechüeiti inan.

15 Nge lupwen üa nom lon weires, ra mwicheto rei o takiriei,
ra mwichefengen pwe repwe ü ngeniei.
Chon ekis üsap sileer me mwan ra kapasingau usi,
nge resap ükütü.

16 Ra chök alapala ar kapasen turunufas,
ra afochofoch ngeniei ren ar oputaei.

17 Ai Samol, ifa ükükün fansoun om kopwe chök nenengeni ei lapalap?
Kopwe angasaei seni ar afeiengauaei,
kopwe amanauaei seni ekei laion.

18 Mürin üpwe kilisou ngonuk lon ewe mwichelapen noum aramas,
üpwe mwareituk me lein ewe mwicheichen aramas.

19 Kosap mwüt ngeni chon palüeniei, nge esap wor popun,
pwe repwe takirin ämängauaei,
kosap pwal mwüt ngeni chokewe mi oputafatei
pwe repwe takiriei ren ai letipeta. ✱

20 Iwe, resap eäni kapas pwetete,
nge ra eäni kapasen tipitipmwäl ngeni chokewe mi mosonoson lon ewe
fanü.

21 Ra atipisieï fän leüömong o apasa,
“Aha, aha, mesem ra küna mine ka föri.”

22 Nge en, ai Samol mi Lapalap, ka küna ei lapalap,
kosap fanafanala.

Ai Samol, kosap toau seniei.

23 Ai Samol, kopwe amwökütuk o ütä pwe kopwe pwärawu ai pwüng.

✱ 35:19: Kölf 69.4; Joh 15.25

Kopwe peniei, ai Kot.

²⁴ Ai Samol mi Lapalap ai Kot, en ka pwüŋg, kopwe aletätä ai pwüŋg, nge kosap mwüt ngeni ekewe chon oputaei pwe repwe takirin ämängauaei.

²⁵ Kosap mwüt ngeniir pwe repwe apasa lefiler, “Aha, a torikich mochenin letipach. Sa awesi manauan.”

²⁶ Amwo chokewe meinisin mi pwapwaäsini ai feiengau repwe säw o osukosuk. Amwo chokewe meinisin mi lamalamtekia ngeniei repwe küna säw me itengau.

²⁷ Amwo chokewe mi mochen pwe epwe pwä ai pwüŋg repwe meseik o mweireiren pwapwa, repwe pwal apasafochei, “Ewe Samol mi Lapalap a tekia, a pwapwa ren feiöchün nöün chon angang.”

²⁸ Mürin üpwe apworausafeili om pwüŋg o kölün mwareituk fansoun meinisin.

36

Än Kot tong ellet

36.1-12

Ngeni ewe mi emweni chon köl: Echö köl än Tafit nöün ewe Samol mi Lapalap chon angang.

¹ Tipis a nom lon leluken eman aramasangau o kapas ngeni. Esap wor an meniniti Kot. ✧

² A lamalamtekia won inisin o ekieki pwe Kot esap tongeni küna o oput an tipis.

³ An kewe kapas ra mwäl me chofana. Esap chüen föri föföör mi mirit me mürina.

⁴ Lupwen a kon won an peet, a ekiekietä mine a ngau. Esap mwo nge föri mine a mürina, esap pwal oput mine a ngau.

⁵ Ai Samol mi Lapalap, om tong ellet a tori ekewe läng, om allükülük a tori ekewe kuchu.

⁶ Om pwüŋg a tekia usun chök ekewe chuk, nge om kapwüŋg a usun chök matau mi alolol. Ai Samol mi Lapalap, ka tümwünü aramas me man.

⁷ Ai Kot, om tong ellet a fokun aüchea. Aramas meinisin ra op fän nürün poum.

⁸ Ra kametip won somwen mongö lon imwom. Ka aünüür koluk seni ewe chanpupun om pwapwa.

⁹ Pun en ewe lepopun manau meinisin, nge ren om saram äm aia küna saram.

¹⁰ Kose mochen kopwe sopwela om tong ellet ngeni chokewe mi sileek, kopwe pwal sopwela om amanaua chokewe mi wenechar leluker.

11 Kosap mwüt ngeni ekewe chon lamalamtekia pwe repwe afeien-gauaei.

Kosap pwal mwüt ngeni ekewe aramasangau pwe repwe asüeila.

12 Nengeni ia ekewe chon föföringau ra turutiu ie.

Ikenan ra konola, nge resap chüen tongeni pwätäsefäl.

37

Nonomongauen ekewe aramasangau

37:1-40

Echö än Tafit köl.

1 Kosap achouuk pokiten ekewe aramasangau,

nge kosap lolowo ngeni chokewe mi föri mine a ngau.

2 Pun repwe pwasekai usun fetil,

repwe pwal mäla usun pötöwöl mi pwasala.

3 Kopwe apilükülükü ewe Samol mi Lapalap o föri mine a mürina,
pwe kopwe nonom lon ewe fanü fän kinamwe.

4 Ewe Samol mi Lapalap i chök epwe om pwapwa,
nge i epwe ngonuk mochenin lelukom.

5 Kopwe lükü ngeni ewe Samol mi Lapalap manauom
o apilükülük ngeni, nge i epwe alisuk.

6 Epwe pwärawu om pwüngüöch pwe epwe usun saram,
nge om pwüng pwe epwe usun tinen akkaren leoloas.

7 Kopwe fanafanala me fän mesen ewe Samol mi Lapalap o likitü le
witiwiti i.

Kosap achouuk ren ekewe aramas mi pisekisekila,
pwal ren chokewe mi afisätä ar rawangau.

8 Kopwe ükütü seni song o likitala lingeringer.

Kosap achouuk, pun a chök emwenukelong lon mine a ngau.

9 Pun ekewe aramasangau repwe käriwu,

nge chokewe mi apilükülükü ewe Samol mi Lapalap repwe fanüeni ewe
fanü.

10 Lon fansoun mochomoch echök ekewe aramasangau resap chüen
nom.

Inamwo are kopwe küttafichiir lon lenier,
nge resap nom ikenan.

11 Nge ekewe chon tipetekison repwe fanüeni ewe fanü
o pwapwaäsini ar feiöch me kinamwe mi somwola. ✧

12 Ekewe aramasangau ra rawangauei ewe chon pwüng
o afochofoch ngeni.

13 Nge ewe Samol a takiri ekewe aramasangau,
pun a silei pwe a arap ränin ar mäla.

14 Ekewe aramasangau ra üttawu nöür ketilas o emeia nöür likapich,
pwe repwe afeiangaua ekewe mi wöüngau me mwelele,
repwe pwal niela chokewe mi föri mine a pwüng.

15 Nge repwe mäla ren püsin nöür ketilas,

nge ar likapich epwe kup.

16 Än eman chon pwüing pisek mi chokükün

a mürina seni wöün ekewe aramasangau meinisin.

17 Pun pöchökülen ekewe aramasangau epwe wesila,

nge ewe Samol mi Lapalap epwe alisi ekewe chon pwüing.

18 Ewe Samol mi Lapalap a tümwünü ekewe aramas esap wor ar tipis,
repwe chök fafanü fanüer tori feilfeilachök.

19 Lon fansoun feiengau resap küna säw,

nge lon ränin lengita epwe somwola ener mongö.

20 Nge ekewe aramasangau repwe rosola.

Ekewe chon oputa ewe Samol mi Lapalap ra usun chök lingen ekewe pön

ira mi morola lon ekewe mälämäl,

repwe moropöküla usun och ötüöt.

21 Ewe aramasangau a liwinimang, nge esap tongeni amusasefäli.

Nge ewe chon pwüing a kirikiröch o fangafangöch.

22 Pun chokewe mi feiöch me ren ewe Samol mi Lapalap repwe fanüeni

ewe fanü,

nge chokewe mi anümamau me ren Kot repwe kärila.

23 Ewe Samol mi Lapalap a emweni eman aramas won ewe al epwe fetal
won,

a pwal anüküchara i, pun a pwapwa ren.

24 Are epwe tur, esap turuchapala,

pun ewe Samol mi Lapalap a kamwöch pöün.

25 Seni me lom, lupwen ngang üa eman alüal, tori iei üa chinlap,

üsap küna mwo eman chon pwüing epwe sachawun,

ika nöün kana repwe tütüngorfetal ener mongö.

26 Ewe chon pwüing a fangafangöch o mwütätä pisekin ngeni aramas,

nge nöün kana ra wään feiöch ngeni aramas.

27 Kopwe sü seni mine a ngau o föri mine a mürina,

mürin kopwe nonomöch lon ewe fanü fän kinamwe.

28 Pun ewe Samol mi Lapalap a efich mine a pwüing,

esap likitala nöün kewe mi allükülük.

Ewe Samol mi Lapalap a tümwünü ekewe chon pwüing tori feilfeilachök,

nge mwirimwirin ekewe aramasangau repwe kärila.

29 Ekewe chon pwüing repwe fanüeni ewe fanü o nonom won tori feil-
feilachök.

30 Ewe chon pwüing a eäni fos mirit,

a chök apasa mine a pwüing.

31 Än Kot kewe allük ra nom lon lelukan,

nge esap tokola seniir.

32 Eman aramasangau a ooperi ewe chon pwüing

o kütta an epwe niela.

33 Nge ewe Samol mi Lapalap esap asechala ewe chon pwüing fän neme-

nien ewe chon oputa,

esap pwal mwüt ngeni pwe epwe etipisi lon kapwüing.

34 Kopwe anomu om apilükülük won ewe Samol mi Lapalap o aleasochisi an kewe allük.

I epwe atekioketä pwe kopwe fanüeni ewe fanü,
nge en kopwe nenengeni, lupwen ekewe aramasangau repwe kasüla.

35 Üa küna eman aramasangau a nemenem fän pöchökül,
a fokun tekiatä won aramas meinisin usun efoch irä setar won Lapanon.

36 Mürin üa pwal pweresefälila ren, nge esap chüen nom.
Üa kütta i, nge üsap chüen küna.

37 Kopwe afota ewe aramas esap wor an tipis o nenengeni ätewe mi wenechar.

A wor mwirimwirin ätewe mi afisätä kinamwe,

38 nge ekewe chon tipis repwe rosola meinisin,
pwal mwirimwirin ekewe aramasangau repwe kärila.

39 Ewe Samol mi Lapalap a amanaua ekewe chon pwüing,
i ar lenien op lon fansoun riaföü.

40 Ewe Samol mi Lapalap a alisiir o angaseer.

A angaserela seni ekewe aramasangau o amanaueer,
pun ra eäni i lenien op.

38

Än eman chon aier iotek

38.1-22

Echö än Tafit köl fän iten asoren achechem.

¹ Ai Samol mi Lapalap, kosap apwüingüei lon om song,
kosap pwal ninniei lon om lingeringer.

² Pun ka akinasaei ren wokum kewe föün esefich,
ka pwal amiritiei.

³ Esap wor pöchökülen inisi pokiten om song,
esap pwal wor pöchökülen lechüi pokiten ai tipis.

⁴ Üa pwölüla fän ai kewe föför mi ngau,
ra chou usun och mettoch mi kon chou ngeniei.

⁵ Kinasei kewe ra pwongau o not
pokiten ai umwesila lon tipis.

⁶ Üa wesewesen pworetü o chapala,
fansoun meinisin üa lolilen.

⁷ Üa samaun pwichikar,
esap fokun wor pöchökülen inisi.

⁸ Üa aiemalü o fokun apwangapwang,
üa ngüngü pokiten riaföün lelukei.

⁹ Ai Samol, en ka silei mochenin letipei meinisin,
ka rongorong ai ngüngü meinisin.

¹⁰ Lelukey a chehech, ai pöchökül a sü seniei,
pwal mesei esap chüen neneöch.

¹¹ Pwii kewe me chiechiei resap kaneto rei
pokiten ai samau,
pwal mwo nge aramasei ra ütä me toau.

12 Chokewe mi mochen nieila ra amolätä ar kewe sär,
 nge chokewe mi mochen ariaföüei ra kapas usun ar repwe afeien-
 gauaei,
 ra chök ekiëkin rawangauaei fansoun meinisin.

13 Nge ngang üa usun eman aramas mi selingapwas esap tongeni ron-
 gorong.

Üa usun eman aramas mi awemwöch esap tongeni fos.

14 Ewer, ngang üa usun eman aramas esap tongeni rongorong,
 esap pwal wor an kapasen pälüeni.

15 Nge ngang üa apilükülükuk, ai Samol mi Lapalap.

Ai Samol me ai Kot, en ätewe mi pälüeniei.

16 Pun üa iotek, pwe kosap fokun mwüt ngeni ekewe chon oputaei pwe
 repwe takirin ämängauaei
 o esitaei, lupwen üa mit.

17 Pun üa arap ngeni ai üpwe turula,
 üa chök memetek fansoun meinisin.

18 Üa pwärätä ai kewe föföör mi ngau,
 üa pwal lolilen ren ai tipis.

19 Chokewe mi oputaei ra fokun pöchökül,
 nge chokewe mi oputafatei ra chomong.

20 Chokewe mi liwini ngenie i ngau fän iten ai föföör mürina,
 ir chon ü ngenie, pun üa föri mine a pwüing.

21 Ai Samol mi Lapalap, kosap likitieila,
 ai Kot, kosap toau senie.

22 Kopwe kaito pwe kopwe alisie, ai Samol, ai Chon Amanau.

39

Manauen aramas a mochomoch

39.1-13

Ngeni ewe mi emweni chon köl: ngeni Jetutun. Echö än Tafit köl.

1 Üa apasa, “Üpwe püsin tümwünüei ren mine üa föri,
 üsap pwal mwüt ngeni chönawei pwe epwe apasa och mine üa tipis ren.

Üpwe pinei awei

lon ükükün fansoun än ekewe aramasangau nom rei.”

2 Üa mosonoson o fanafanala,
 üsap mwo nge apasa och mi mürina.

Nge ai riaföü a chök wattela.

3 Üa fokun lolilen.

Iwe, lupwen üa ekinlon,

ai riaföü a chök lapala.

Mürin, üa kapas.

4 “Ai Samol mi Lapalap, kopwe asile ngenie sopolan manaei,
 pwal ükükün langatamen ränin manaei.

Kopwe asile ngenie müttirin än manaei sü senie.

5 Nengeni, ka föri pwe tamen ränin manaei ra chök usun tamen
 ekoch chöchön lon pau.

Fansoun manaei a usun chök nge esor me fän mesom.
Ellet, iteiten aramas mi nom won ei fanüfan ra usun chök eu enienin asepwäl.

⁶ Ellet, aramas ra usun chök ngünüen mettoch.

Meinisin mine ra anganga esap wor lomotan.

Aramas ra achukuchukätä wöür, nge resap silei iö epwe angei me mürin.

⁷ Ai Samol, met üpwe tongeni ösüküsükü iei?

Ai apilükülük a nom womw.

⁸ Kopwe amanauaei seni ai tipis meinisin.

Kosap mwüt ngeni ekewe chon umwes pwe repwe turunufaseei.

⁹ Üa fanafanala, üsap tongeni kapas,
pun en ewe mi atolongaei lon ei riaföü.

¹⁰ Kose mochen kosap chüen ninniei.

Üa arap ngeni mäla ren om wichiei.

¹¹ Lupwen ka apwüngü eman aramas ren om fönöü pokiten an tipis,
ka ataela mettochun meinisin mi aüchea ngeni, usun pwötür ra enala mettoch.

Ellet, iteiten aramas ra usun chök eu enienin asepwäl.

¹² Ai Samol mi Lapalap, kopwe aüselinga ai iotek,

kopwe aü selingom ngeni ai siö.

Kosap fanafanala, lupwen üa kechü.

Pun ngang üa chök eman wasöla reöm,

üa eman chon siamü usun ai kewe lewo meinisin.

¹³ Kopwe nenne seniei pwe üpwe tongeni pwapwa
me mwen ai üpwe mäla, nge üsap chüen nom.”

40

Kölün mwareiti Kot fän iten ngasala

40.1-17

Ngeni ewe mi emweni chon köl: Echö än Tafit köl.

¹ Üa likitü le witiwiti än ewe Samol mi Lapalap epwe alisie.

I a aüselingaei o rongorong ai siö.

² A efeitä seni lon ewe pwang mi afeiengau,

seni lon ewe pwakak,

a anomuei won eu achau o anüküchara pechei

pwe üsap mit.

³ A aiti ngeniei echö köl mi fö,

echö kölün mwareiti ach Kot.

Chomong repwe küna ei o niuokus,

repwe anomu ar apilükülük won ewe Samol mi Lapalap.

⁴ A feiöch eman aramas a anomu an apilükülük won ewe Samol mi

Lapalap,

ätewe esap kul ngeni chon lamalamtekia,

ika eti chokewe mi fel ngeni ekewe uluulun anümwäl.

⁵ Ai Samol mi Lapalap ai Kot, ka föri chomong föföör mi amwarar me om akot ngenikem,

esap wor eman a wewe ngonuk.

Are üpwe asilefeiliir o apworausausur,

repwe chomong seni ai üpwe tongeni aleaniir.

⁶ Kosap mochen ekewe asor me lifang,
nge ka ngeniei selingei pwe üpwe rongorong ngonuk.
Kosap allük pwe üpwe eäni asoren kek
me asoren tipis.

⁷ Mürin üa apasa, “Ngang iei, üa feito.
Lon ewe puken allük a mak usi.

⁸ Üa pwapwa le föri letipom, ai Kot,
om allük a nom lon lelukei.” ✧

⁹ Üa apworaus a ewe pworaus mi mürina usun om amanauakem
me lon ewe mwichen noum aramas meinisin.
Üsap fokun ükütiu le apworaus a usun, ka fen silei, ai Samol mi Lapalap.

¹⁰ Üsap aopala ewe pworaus a usun om amanauakem.

Üa kapas usun om allükülük me om alisikem.

Üsap tukumala seni ewe mwichen noum aramas meinisin
om tong ellet me om allükülük.

¹¹ Ai Samol mi Lapalap, kosap amwöchü seniei om ümöümöch.
Om tong ellet me om allükülük repwe tümwünüei.

¹² Chomong osukosuk ra pwelifeiliei,
esap wor eman a tongeni aleaniir.

Ai kewe tipis ra rongeeila pwe üsap chüen künaei,
ra kon chomong lap seni meten mökürei,
nge lelukei a kisikisila.

¹³ Ai Samol mi Lapalap, kose mochen kopwe amanauaei.

Ai Samol mi Lapalap, kopwe kaito pwe kopwe alisiei.

¹⁴ Amwo meinisin mi mochen nieila
repwe säw o tolong lon fitikoko.

Amwo chokewe mi tipeni ai üpwe feiengau
repwe kulsefäl o itengau.

¹⁵ Amwo chokewe mi ämängauaei
repwe fokun rükö ren ar kuf.

¹⁶ Nge meinisin mi feito reöm

repwe meseik o pwapwa.

Chokewe mi aücheani om amanauaeer repwe apasaföhei,
“Ewe Samol mi Lapalap a tekia.”

¹⁷ Nge ngang üa wöüngau o osupwang,
nge en ai Samol, ka ekiokiei.

En ai chon alilis me ai Chon Amanau.

Ai Kot, kosap mang le alisiei.

41

Eu iotekin tüngror chikarsefäl

41.1-13

Ngeni ewe mi emweni chon köl: Echö än Tafit köl.

¹ Ra feiöch chokewe mi ekieki ekewe mi apwangapwang o wöüngau.

Ewe Samol mi Lapalap epwe angaserela

✧ 40:8: Ipr 10.5-7

lon ränin ar riaföü.

² Ewe Samol mi Lapalap epwe tümwünüür o amwöchü manauer, nge ir repwe iteni chokewe mi feiöch me lon ewe fanü.

Iwe, esap atolongeer lepöün ekewe chon oputeer.

³ Ewe Samol mi Lapalap epwe tümwünüür won ar kiekien samau, nge lupwen ra apwangapwang, epwe apöchöküleer seni ar samau meinisin.

⁴ Nge ngang üa apasa, “Ai Samol mi Lapalap, kopwe ümöümöch ngeniei o apöchökülaei,

pun üa tipis ngonuk.”

⁵ Chon oputaei ra kapas usi lon ar ekingau,

“Inet ätei epwe mäla pwe itan epwe mola?”

⁶ Lupwen eman a feito pwe epwe churiei, a chök eäni kapas pön.

Nge lon lelukan a ioi ekiekingau usi.

Mürin a towu lükün o apworausafetalei.

⁷ Meinsin mi oputaei ra mwöngününgüfengen usi,

ra ekiekietä mine a fokun ngau ngeniei.

⁸ Iwe, ra apasa, “A üri och samaungau, esap chüen tongeni pwätä seni an kiekien samau.”

⁹ Pwal chiechiei mi fokun kan ngeniei, üa pwal fokun lükü,

ätewe mi mongö rei,

a ü ngeniei. ✧

¹⁰ Nge en, ai Samol mi Lapalap, kopwe ümöümöch ngeniei o apöchökülaei, pwe üpwe tongeni liwini ngeni ekewe chon oputaei ükükün ar föför.

¹¹ Üa silei pwe en ka pwapwaitiei,

pun ekewe chon oputaei resap tongeni akufuei.

¹² En ka alisie, pun üa föri mine a pwüing,

ka pwal anomuei fän mesom tori feilfeilachök.

¹³ Oupwe mwareiti ewe Samol mi Lapalap ewe Koten Israel

seni lomlom tori feilfeilachök.

Amen, Amen. ✧

ARUEN PUK

42

Positi Kot

42.1-11

Ngeni ewe mi emweni chon köl: Echö än nöün Kora kewe mwän kölün kait.

¹ Usun eman chia a positi lölon chanpupu, iei usun ngang üa posituk, ai Kot.

² Üa fokun posituk, en ai Kot mi manau.

Inet üpwe tongeni feila o nenengeni mesom?

³ Chönün mesei a fisitiu pwe enei mongö lerän me lepwin, pun aramas ra aispat ngeniei, “Ifa i om we Kot?”

⁴ Lelukei a tatakis, lupwen üa chechemeni ekei mettoch:

Usun üa eti ewe mwicheichen aramas
o emweniir lon och tettel le feila ngeni ewe imwen Kot,
eu mwichemongun aramas mi mweireiren pwapwa me kölün kilisou.

⁵ Ngüni, pwota ka letipengau,
pwota ka ngüngü me loi?

Üpwe apilükülükü Kot,
pun üpwe mwareitisefäli i,
ai Chon Amanau me ai Kot.

⁶ Ngüni a letipengau me loi. Iei mine üa chechemenuk
seni ewe fanü pekilan ewe chanpupu Jortan,
seni ewe chuk Hermon me ewe chuk Mişar.

⁷ Eu lenien alolol a kökkörato pwal eu lenien alolol,
lupwen om kewe koluk mi putiu ra püngümong.
Om kewe no meinisin me om kewe nolapalap ra pwölüeila.

⁸ Lerän ewe Samol mi Lapalap a pwärawu an tong ellet,
nge lepwin üa eäni echö an köl,
üa iotek ngeni ewe Kot mi ngeniei manau.

⁹ Üa kapas ngeni Kot ai achau,
“Pwota ka manlükieila?
Pwota üa chök ngüngüres
pokiten ai riaföü ren chon oputaei?”

¹⁰ Usun chök nge chüi ra kup,
lupwen chon ü ngeniei ra ämängauaei ren ar aispat ngeniei,
“Ifa i om we Kot?”

¹¹ Ngüni, pwota ka letipengau,
pwota ka ngüngü me loi?

Üpwe apilükülükü Kot,
pun üpwe mwareitisefäli i
ai Chon Amanau me ai Kot.

43

Iotekin tüngor ngas

43.1-5

¹ Ai Kot, kopwe aletätä ai pwüing
o peniei seni ekewe aramas resap aleasochis ngonuk.
Kopwe angasaei seni ekewe aramas mi atuputup o pwüingngau.

² Pun en ewe Kot üa eänuk lenien op.
Pwota ka pöütieila?
Pwota üa chök ngüngüres
pokiten ai riaföü ren chon oputaei?

³ Kopwe tinato om saram me om let
pwe repwe emweneiei,
repwe emweneila ngeni chukum mi pin,
pwal ngeni imwom ia ka nom ie.

⁴ Mürin üpwe feila ren om rongen asor,
ai Kot en popun ai pwapwa mi fokun lapalap.
üpwe kölün mwareituk won ükülele,
en ai Kot.

⁵ Ngüni, pwota ka letipengau,
pwota ka ngüngü me loi?
Üpwe apilükülükü Kot,
pun üpwe mwareitisefäli
ai Chon Amanau me ai Kot.

44

Eman mi ngasala me lom, nge iei a nom lon riaföü
44.1-26

Ngeni ewe mi emweni chon köl: Echö än nöün Kora kewe mwän kölün kait.

¹ Ai Kot, äm aia rongorong ren püsin selingem,
pun äm kewe lewo ra apworausau ngenikem
usun om kewe föför ka föriir lon ränin manauer,
lon ekewe fansoun lom.

² Ka püsin asüela chon ekewe mwü,
nge ka fotukätü äm kewe lewo lon ewe fanü.
Ka ariaföüü ekewe aramas,
nge ka angasa äm kewe lewo.

³ Pun resap liapeni ewe fanü ren püsin nöür ketilas,
resap pwal win ren püsin ar pöchökül,
ngei ren om pöchökül me manaman,
pwal ren om nonom rer, pun ka tongeer.

⁴ En ai king me ai Kot,
ka akota pwe noum kewe aramas repwe win.

⁵ Ren om manaman aia akufätü ekewe chon oputakem.
Pokiten itom aia purätü ekewe chon fiu ngenikem.

⁶ Pun üsap lükü ai likapich,
nei ketilas esap pwal tongeni amanauaei.

⁷ Nge en ka amanauakem seni ekewe chon ü ngenikem
o akufu chokewe mi oputakem.

⁸ Äm aia chök aingaing womw en äm Kot fansoun meinisin
o kilisou ngonuk tori feilfeilachök.

⁹ Nge iei ka pötikeemila o föri pwe aipwe kuf,
kosap pwal chüen eti äm mwichen sounfiu le feila ngeni maun.

¹⁰ En ka föri pwe äm aipwe timär me mwen ekewe chon ü ngenikem,
nge ekewe chon oputakem ra angei liaper senikem fän pöchökül.

¹¹ Ka asechikeemilong lepöür pwe repwe niikem usun sip mi amol ngeni
ar repwe ninnila,

ka pwal atoropasafeilikem lein chon ekewe mwü.

¹² Ka amömöla noum kewe aramas ren liwin mi kisikis,
nge kosap angei och win ren om amömörela.

¹³ Ka föri pwe äm aia uren takir me ren chon arüm,
ir ra ämängauakem o esitakem.

¹⁴ Ka föri pwe chon ekewe mwü ra leawenikem lon ar kapasen turun-
ufas,

ra elifechefech ren ar ämängauakem.

¹⁵ Fansoun meinisin üa itengau,

üa pwölüla ren ai säw

¹⁶ pokiten än ekewe chon ämängau me chon turunufas kapas,
pwal pokiten än ekewe chon oputaei liwiningau ngeniei.

¹⁷ Ekei mettoch meinisin ra fis ngenikem,
nge äm aisap manlükukala
ika atai om we pwon.

¹⁸ Äm aisap kul senuk,
äm aisap pwal aleasolap ngeni om kewe allük.

¹⁹ Nge en ka atatakisikem me lon lenien ekewe kolak mi mwacho
o pwölükeemila ren rochokichin mäla.

²⁰ Are äm aipwe manlükala iten äm we Kot
ika iotek ngeni pwal eman koten ekis,

²¹ ifa usun, Kot esap küna ei föföör?

Ewer, pun Kot a silei mine a monomon me lon lelukem.

²² Nge fansoun meinisin aia küna ninni pokitom,
äm aia wewe ngeni sip mi amol ngeni ar repwe ninnila. ☆

²³ Ai Samol, kopwe pwök! Pwota ka annut?

Kopwe nennela! Kosap pöütifochekeemila.

²⁴ Pwota ka amona mesom senikem?

Kosap manlükala äm riaföü me weires.

²⁵ Pun äm aia turula lon pwülümoromor,
inisin ra pacheri pwül.

²⁶ Kopwe ütä o feito pwe kopwe alisikem.
Kopwe angasakem pokiten om tong ellet.

45

*Echö köl fän iten apwüpwülüen ewe king
45.1-17*

Ngeni ewe mi emweni chon köl: Ei köl usun ngingin ewe köl itan Kiop.
Echö än nöün Kora kewe mwän kölün kait. Echö kölün tong.

¹ Lelukei a säsewu ren pworaus mi mürina.

Üpwe apasa ekewe wokisin lon ai we köl fän iten ewe king.
Chönawei a usun nöün eman soumak pen mi molotä.

² En ka äteöch seni mwän meinisin,
kapasen awom ra pwetete,
iei mine Kot a afeiöchuk fansoun meinisin.

³ En ewe mi pwora, kopwe rietä noum ketilas won wänükum,
ka ling o manaman.

⁴ Fän om manaman kopwe fetal ngeni win
pwe kopwe peni let, tipefesir me pwüng.
Ren om pöchökül kopwe föri föföör mi amwarar.

⁵ Wokum kewe föün esefich ra ken,
ra fotolong lon luken ekewe chon oputom.
Chon ekewe mwü ra kuf fomw.

⁶ Om lenien motun king a usun chök än Kot lenien mot,

☆ 44:22: Rom 8.36

a nom tori feilfeilachök.

Ka nemeni noum kewe aramas fän pwüing.

⁷ Ka efich pwüing, nge ka oput mi ngau.

Iei mine Kot, om we Kot a filuketä,

a fang ngonuk pwapwa

lap seni an fang ngeni chienom kewe. ✧

⁸ Üfom kewe meinisin ra pwokus ren pwonnen lö seni ekewe irä mör,
aloes me kasia.

Chon ettiki pisekin ettik mi wor saitenir ra apwapwook me lon imwen
king mi fout ngeni ngiin äläfant.

⁹ Nöün ekewe king föpwül ra nom lein ekewe fefin mi nom lon imwom,
nge ewe kiwiin mi ütä lepelifichum

a fout ngeni kolt seni Ofaia.

¹⁰ Nei föpwül, kopwe rongorong ai kapas o ekieki usur.

Kopwe manlükala aramasom me chon leimwen semom,

¹¹ mürin, ewe king epwe fokun sani liöchum.

Kopwe tütiu me mwan, pun i om samol.

¹² Ekewe aramasen Tirus repwe uwato ar lifang ngonuk,
ekewe aramas mi fokun pisekisek repwe kütta chenir me reöm.

¹³ Nöün ewe king föpwül a unusen ling me lon rumwan,
üfan kewe ra tür seni terech kolt.

¹⁴ Ra emwenala i ren ewe king fän üfan mi sokopat önüan,
ra pwal emwenala chienan kewe föpwül
mi tapwela mürin.

¹⁵ Ra feito o tolong lon imwen ewe king
fän pwapwa o mweireir.

¹⁶ Noum kewe mwän repwe akasiwili
om kewe lewo lon wisen king.

Ka awiseer pwe repwe nemenem won unusen fanüfan.

¹⁷ Üpwe pwärala om iteföüla seni eu täppin aramas tori pwal eu täppin.

Iei mine chon ekewe mwü repwe mwareituk tori feilfeilachök.

46

Kot ach lenien op me ach pöchökül

46.1-11

Ngeni ewe mi emweni chon köl: Echö köl än nöün Kora kewe mwän. Ei köl usun ngingin sopran.

¹ Kot ach lenien op me ach pöchökül,

a sip le alilis lon fansoun riaföü.

² Iei mine sisap niuokus are fanüfan epwe wilila,

nge chuk kana repwe kokotiu lealololun matau,

³ are nonon lematau epwe püing o purapur,

nge ekewe chuk repwe chechek ren püingüpüingün.

⁴ Mi wor eu chanpupu mi awarato pwapwa ngeni ewe telinimwen Kot,
ewe leni mi pin än Ewe mi Unusen Tekia.

⁵ Kot a nonom lon ewe telinimw pwe esap fokun tala.

Lesosorusich Kot epwe alisi ewe telinimw.

⁶ Chon ekewe mwü ra fokun niuokus, nge mwün ekewe king ra taro-porop.

Iwe, lupwen Kot a akkapwas, fanüfan a telila.

⁷ Ewe Samol mi Unusen Manaman a etikich, än Jakob we Kot i ach lenien op mi pöchökül.

⁸ Oupwe feito o nenengeni än ewe Samol mi Lapalap föföör, usun an ataela fanüfan.

⁹ A aükätü maun won unusen fanüfan, a kupi ekewe likapich o pwülü ekewe siles, a fisi ngeni ekkei ekewe wokenin maun.

¹⁰ A apasa, “Oupwe emwen le maun, oupwe silei pwe ngang echök Kot. Ngang üa tekia seni chon ekewe mwü, ngang üa tekia won fanüfan.”

¹¹ Ewe Samol mi Unusen Manaman a etikich, än Jakob we Kot i ach lenien op mi pöchökül.

47

Kot i king won unusen fanüfan

47.1-9

Ngeni ewe mi emweni chon köl: Echö köl än nöün Kora kewe mwän.

¹ Oupwe aloplop ämi chon ekewe mwü meinisin.

Oupwe mweireir fän leüömong ren kölün pwapwa.

² Sipwe niuokusiti ewe Samol mi Lapalap, Ewe mi Unusen Tekia, i eman king mi lap a nemeni unusen fanüfan.

³ A asapwilätü chon ekewe mwü fach o atolonga ekewe mwü fän nemeniach.

⁴ A filätä fän itach ewe fanü sa fanüeni, ewe fanü nöün aramas ra aücheani, ir chokewe Kot a tongeer.

⁵ Kot a feitä ren an lenien motun king fän mweireiren pwapwa, ewe Samol mi Lapalap a feitä fän tikin rappwa.

⁶ Oupwe kölün mwareiti Kot, oupwe kölün mwareiti.

Oupwe kölün mwareiti ach king, oupwe kölün mwareiti.

⁷ Pun Kot i kingen unusen fanüfan, oupwe mwareiti i ren echö köl mi pin.

⁸ Kot a nemeni ekewe mwü,

Kot a mot won an lenien motun king mi pin.

⁹ Ekewe samolun ekewe mwü ra mwichefengen, ir ewe mwichen aramas nöün än Apraham we Kot.

Pun ekewe kingen fanüfan nöün Kot, i a fokun tekia mwer meinisin.

48

Öchün me lingen Sion

48.1-14

Echö köl än nöün Kora kewe mwän.

¹ Ewe Samol mi Lapalap a tekia, nge aramas meinisin repwe fokun mwareiti i

me lon ewe telinimwen ach Kot,
me won chukun mi pin.

² Ewe chuk Sion a tekia o fokun lingöch,
chon fanüfan meinisin ra pwapwaiti.

Lepekin ewe chuk kükü ngeni efeng a nom telinimwen ewe king mi lap.

☆

³ Kot a nom lon ekewe imwen king.

A pwärätä pwe i ewe lenien op mi pöchökül.

⁴ Ekewe king ra mwichefengen,

ra mwinepöküto le feito pwe repwe maun ngeni ewe telinimw.

⁵ Nge lon ewe otun, lupwen ra küna ewe telinimw, ra weitifengeniir,
ra niuokus o süla.

⁶ Ikenan niuokus a toriir, cheuch a cheriir

usun eman fefin a tori an cheuchen famw.

⁷ Ka aroserela usun asepwälin ötiu a ataela ekewe sipen Tarsis.

⁸ Usun mine sa rongorong,

iei usun sa pwal küna me lon ewe telinimwen ewe Samol mi Unusen
Manaman,

me lon ewe telinimwen ach Kot.

I a anüküchara ewe telinimw tori feilfeilachök.

⁹ Ai Kot, äm aia ekieki usun om we tong ellet

me lon ewe imwenfel.

¹⁰ Ai Kot, usun aramas won unusen fanüfan ra silei itom,

iei usun ra pwal mwareituk.

Ka nemenem fän pwüing.

¹¹ Ekewe aramasen Sion repwe pwapwa.

Ekewe telinimwen Juta repwe mweireir

pokiten ka eäni kapwüing fän pwüing.

¹² Ämi aramasen Kot, oupwe fetalfeil lon Sion o pwelifeili,
oupwe aleani ekewe imw tekia lon.

¹³ Oupwe nenengenöchü tittin mi pöchökül o katolfeil ekewe imwen king,
pwe oupwe tongeni apworaus a ngeni ekewe pilon aramas repwe feito,

¹⁴ “Tei i Kot, ach Kot tori feilfeilachök.

I epwe emwenikich tori feilfeilachök.”

49

Ach apilükülükü pisekin fanüfan och ekiék umwes

49.1-20

Ngeni ewe mi emweni chon köl: Echö köl än nöün Kora kewe mwän.

¹ Ämi chon ekewe mwü meinisin, oupwe rongorong ekei kapas,
oupwe aü selingemi, ämi meinisin mi nom won fanüfan,

² ämi aramas tekia me aramas tekison,
ämi aramas pisekisek me aramas wöüingau.

³ Üpwe apasätä kapas tipachem,
nge ekiékin lelukei epwe awora weweöch.

⁴ Üpwe aü selingei ngeni eu kapasen amirit,
üpwe awewei ai asisil,

lupwen üa ettiki nei ükülele.

☆ 48:2: Mat 5.35

5 Pwota üpwe niuokus lupwen fansoun riaföü,
lupwen chon ariaföüüei ra pwelifeiliei?

6 Ir ekewe aramas mi apilükülükü wöür
o sikäsini pisekir mi somwola.

7 Ellet esap wor eman a tongeni isetiu penmanauen pwin
ika ngeni Kot liwinin manauan.

8 Pun liwinin manauen eman aramas a men mömong.
Esap fokun naf an epwe möni manauan,

9 pwe epwe tongeni manau tori feilfeilachök,
nge esap tolong lon peias.

10 Ewer, aramas ra küna pwe pwal ekewe chon tipachem ra mäla
usun chök ekewe mi umwes me tiparoch.

Ra likiti wöür ngeni pwal ekoch.

11 Ar lenien peias iei imwer tori feilfeilachök,
iei lenier repwe nom lon fansoun meinisin.

Inamwo ika mi wor püsin fanüer me lom.

12 Aramas resap tongeni nonomotiu won fanüfan lon ar wöümong,
nge repwe mäla usun chök man.

13 Iei usun mine epwe fis ngeni chokewe mi püsin lükü ir,
iei sopolan chokewe mi pwapwaäsini wöür.

14 Ra fil pwe repwe ninnila usun chök ekewe sip.

Mäla epwe nöür chon mas.

Ekewe chon pwüing repwe pwapwa ren ar akufuur lesosor,
nge ir repwe pwomachala

lon ewe lenien sotup toau seni imwer mi ling.

15 Nge Kot epwe angasaeila seni ewe lenien sotup,
pun i epwe etiwaei.

16 Kosap weitifengeniik are eman a pisekisekila,
are wöün a chök lapalapala,

17 pun lupwen epwe mäla, esap uweela och,
nge wöün esap tapwela mürin.

18 Inamwo are a ekieki pwe a feiöch lupwen an manau,
pwal inamwo are aramas ra mwareiti i pokiten an pisekisekila,

19 epwe chök eti an kewe lewo le mäla,
chokewe resap fokun chüen küna saram.

20 Aramas resap tongeni nonomotiu won fanüfan lon ar wöümong,
nge repwe mäla usun chök man.

50

Kot ewe soukapwüing

50.1-23

Echö än Asaf köl.

1 Kot ewe Samol mi Lapalap, Ewe mi Unusen Manaman, a kapas
o körifengeni chon fanüfan seni meserän tori apiläng.

2 Kot a saramawu seni Sion,
ewe telinimw mi unusen ling.

3 Ach Kot a feito, nge esap fanafanala.

Ekkei mi kümau a nom mwan,
nge eu mölümöl mi watte a pwelifeili ünükün.

⁴ A kökkötä ngeni ekewe läng, a pwal kökkö ngeni fanüfan pwe repwe küna,

lupwen epwe apwüngü nöün kewe aramas.

⁵ A apasa, “Oupwe amwichato rei nei kewe mi allükülük, chokewe mi eäni eu pwon ngeniei ren ar eäni eu asor.”

⁶ Ekewe läng ra pwärätä pwe Kot a pwüng, pwe püsin i ewe soukapwüng.

⁷ “Ämi nei aramas, oupwe rongorong, ngang üpwe kapas. Ämi chon Israel, üpwe ü ngenikemi ren ai pwärätä usumi. Ngang Kot, ämi we Kot.

⁸ Üsap fönökemi pokiten ämi asor

me ämi asoren kek oua uwato rei fansoun meinisin.

⁹ Nge üsap osun eman ätemwänin kow seni ämi imwen man, ika eman kuuch seni ämi lenien man.

¹⁰ Pun iteiten man mi nom lein wöllap nei, pwal ekewe kow mi nom won ekewe engeröü chuk nei.

¹¹ Üa silei ekewe machang won ekewe chuk meinisin, nge meinisin mine a mwökütüküt me lon ewe lemäl nei.

¹² Ika üpwe echik, üsap ürenikemi, pun fanüfan me masouan meinisin ai.

¹³ Ifa usun, üa ochei fituken ekewe ätemwänin kow, ika ünümi chan ekewe kuuch?

¹⁴ Ämi kilisou epwe ina ämi asor ngeni Kot.

Oupwe apwönüetä ämi kewe pwon oua eäni ngeni Ewe mi Unusen Manaman.

¹⁵ Oupwe köriei lon ränin ämi riaföü, pun ngang üpwe angasakemi, nge ämi oupwe mwareitiei.”

¹⁶ Nge Kot a apasa ngeni ewe aramasangau, “Pwota ka tongeni leaweni ai kewe allük ika kapasen ai we pwon?

¹⁷ Pun ka oput ai amirituk o pöütala ai kewe kapas.

¹⁸ Are ka küna eman chon solä, ka chiechi ngeni, ka pwal nom ren ekewe chon lisowu.

¹⁹ Ka chök akapasa kapasingau, nge kosap aposa awom seni kapasen atuputup.

²⁰ Ka chök tipitipimwäl ngeni pwiüm o aitengaua püsin nöün inom.

²¹ Ekei mettoch en ka föri, nge ngang üa fanafanala. Ka ekieki pwe ngang usun chök en.

Nge iei üpwe apwünguk o atipisuk.

²² Oupwe ekieki usun ei, ämi mi manlükieila.

Nge are ousap, üpwe arosakemiila,
 nge esap wor eman epwe amanauakemi.
²³ Eman mi kilisou ngeniei ina an asor ngeniei.
 Ren ei a asamoluei,
 nge eman mi aleasochisiei üpwe fokun amanaua.”

51

Eu iotekin tünigor amusamusen tipis

51.1-19

(2.Sam 12.1-15)

Ngeni ewe mi emweni chon köl: Echö än Tafit köl, lupwen ewe soufos
 Natan a feito ren mürin än Tafit kon ren Patsipa.

¹ Ai Kot, kopwe kirikiröch ngeniei lon om tong ellet,
 kopwe amoela ai pupungau
 lon om ümöümöch mi lapalap.

² Kopwe fokun talü seniei ai föföringau
 o limetiei seni ai tipis.

³ Pun üa mefi ai pupungau,
 nge ai tipis a nonom fochofoch fän mesei.

⁴ Üa tipis ngonuk, fokun ngonuk echök,
 o föri mine a ngau me fän mesom.

Iei mine a pwüng om kopwe apwüngüei,
 esap pwal wor om mwäl, lupwen ka eäni kapwüng. ✱

⁵ Ellet ngang eman chon tipis seni ai uputiu.

Ngang üa uren tipis seni ewe fansoun inei a nöünieitü.

⁶ Ellet, ka pwapwaäsini letip wenechar.
 Kopwe aiti ngeniei ewe tipachem mi monomon.

⁷ Kopwe limetiei ren ülün ewe irä isop pwe üpwe limöch,
 kopwe talü seniei ai tipis pwe üpwe pwech seni snow.

⁸ Kopwe mwüt ngeniei pwe üpwe rongorong mweireiren pwapwa me
 meseik.

Kopwe pwal mwüt ngeniei ai üpwe pwapwa,
 inamwo ika ka kupi chüi.

⁹ Kosap nenengenü ai kewe tipis, nge kopwe amoela ai föföringau mein-
 isin.

¹⁰ Ai Kot, kopwe föri loi eu leluk mi limöch
 o fangelong loi eu ngün mi fö o pos.

¹¹ Kosap asüeila seni fän mesom,
 kosap pwal angei seniei Ngünüm mi pin.

¹² Kopwe aliwinisefäli ngeniei ewe pwapwa mi nom rei, lupwen ka
 amanauaei,

kopwe atufichiei pwe üpwe aleasochis ngonuk.

¹³ Mürin üpwe aiti ngeni ekewe chon tipis om kewe allük.
 Iwe, ir repwe kulituk.

¹⁴ Ai Kot, kopwe angasaeila seni mäla,
 en Kot ai Chon Amanau.

Üpwe pwapwa le köl usun om pwüng.

15 Ai Samol, kopwe amwelieliaei
pwe üpwe mwareituk.

16 Pun en kosap efich asor, ika ngang üpwe uwato reöm.
En kosap pwapwa ren asoren kek.

17 Ai Kot, üa asor ngonuk eu letip mi tipetekison,
eu leluk mi tipetekison o liamam, en kosap oput.

18 Ai Kot, kopwe kirikiröch ngeni Sion fän pwapwan letipom.
Kopwe aüsefälietä tittin Jerusalem.

19 Mürin kopwe pwapwa ren ekewe asor mi fis fän pwüing,
pwal ren äm kewe asoren kek.

Mürin, ekewe ätemwänin kow repwe kekila won om rongen asor.

52

Lomotongauen ach sikäsini föföringau

52.1-9

(1.Sam 22.9-10)

Ngeni ewe mi emweni chon köl: Echö än Tafit kölün kait, lupwen Toek
ewe re Etom a feila ren Saul o üreni pwe Tafit a feila lon imwen Ahimelek.

1 En mwän mi pwora, pwota ka sikäsini om föföringau?

Än Kot tong a nom tori feilfeilachök.

2 Ka ekiekietä usun om kopwe afeiengaua aramas.

Chönawom a usun chök echö räisö mi ken,
en eman chon föri angangen atuputup.

3 Ka efich mine a ngau lap seni mine a mürina,
ka pwal efich kapas chofana lap seni kapas mi let.

4 Ka efich om kopwe afeiengaua aramas ren om kapas, en chon atuputup.

5 Nge Kot epwe afeiengauok tori feilfeilachök,
epwe turufuk o urusukowu seni imwom.

Epwe üttukowu seni fanüen chon manau.

6 Ekewe chon pwüing repwe küna mine epwe fis ngonuk o niuokus,
mürin repwe takiriik o üra,

7 “Nengeni, iei i ewe mwän esap mochen eäni Kot apilükülük,
nge a apilükülükü wöün mi somwola
o pöchökülela lon an föföringau.”

8 Nge ngang üa usun efoch irä olif mi märöch me lon imwen Kot.

Üa lükü än Kot tong ellet tori feilfeilachök.

9 Ai Kot, üpwe kilisou ngonuk tori feilfeilachök ren mine ka föri.

Üpwe asilefeili ngeni noum kewe aramas pwe en ka kirikiröch.

Ei üpwe föri me fän meser.

53

Än ekewe aramas umwes me föföringau

53.1-6

(Kölf 14)

Ngeni ewe mi emweni chon köl: Ei köl usun ngingin ewe sokun köl mi
mang. Echö än Tafit kölün kait.

1 Ekewe mi umwes ra ekieki lon leluker, “Esap wor Kot.”

Ir ra fokun ngau,

ra föri sokun föföör mi anioput,
esap wor eman a föri mine a pwüing.

² Kot a nennetiü seni läng won aramas meinisin,
pwe epwe küna ika a wor eman mi mirit,
ika eman mi kütta Kot.

³ Nge ir meinisin ra tokola,
ir meinisin ra ingauepök.
Esap wor eman a föri mine a pwüing,
esap fokun wor eman. ✱

⁴ Ewe Samol mi Lapalap a ais,
“Ifa usun, esap wor än ekewe chon föfööringau mirit?
Ir chokewe mi manau seni mine ra soläni seni nei aramas,
nge resap iotek ngeniei.”

⁵ Mürin a toriir niuokus watte,
eu niuokus watte esamwo toriir me mwan.
Pun Kot epwe atoropasafeili chün chokewe mi oput nöün aramas.
Chon Israel repwe fokun akufuur,
pun Kot a fen pöütirela.

⁶ Amwo eman epwe feito seni Sion
o amanaua chon Israel.
Ekewe chon Israel repwe fokun pwapwa,
lupwen Kot epwe aliwini ngeniir wöür.

54

*Eu iotekin tünigor pwe Kot epwe tümwünü nöün aramas seni ekewe chon
oputer*

54.1-7

(1.Sam 23.19; 26.1)

Ngeni ewe mi emweni chon köl: Won pisekin ettik mi wor saitenin. Echö
än Tafit kölün kait, lupwen ekewe chon Sif ra feila ren Saul o üreni pwe
Tafit a op lefiler.

¹ Ai Kot, kopwe amanauaei ren manamanen itom,
kopwe aletätä ai pwüing ren om pöchökül.

² Ai Kot, kopwe aüselinga ai iotek,
kopwe aü selingom ngeni ai kewe kapas.

³ Pun chon lamalamtekia ra ü ngeniei,
ekewe chon mwäneson ra mochen nieila.
Ir chokewe resap ekieki Kot.

⁴ Nge Kot ai chon alilis,
ewe Samol i chon amwöchü manauai.

⁵ Kot epwe ukun ngeni chon oputaei ar föföör mi ngau.
Epwe aroserela fän an allükülük.

⁶ Ngang üpwe eäni eu asor ngonuk seni mochenin letipei.
Üpwe kilisou ngonuk, ai Samol mi Lapalap,
pun en ka kirikiröch.

⁷ En ka angasaei seni ai riaföü meinisin,
nge üa pwapwa, lupwen üa küna pwe chon oputaei ra kuf.

55

*Eu iotekin tünigor feiengauen chon atuputup
55.1-23*

Ngeni ewe mi emweni chon köl: Won pisekin ettik mi wor saitenin. Echö
än Tafit kölün kait.

¹ Ai Kot, kopwe aüselinga ai iotek,
kosap asorongorongola seni ai tünigor.

² Kopwe rongorong ngeniei o palüeniei.
Ai osukosuk a fokun aweiresiei.

³ Üa fokun niukus ren än chon oputaei eniwaei,
pwal ren än ekewe aramasangau ariaföüüei.
Ra aweiresiei,
nge lon ar song ra fokun oputaei.

⁴ Lelukei a fokun riaföü, niukusun mäla a toriei.

⁵ Niuokus me chech ra feitiu woi,
nge niukus watte a pwölüeila.

⁶ Iwe, üa apasa, “Amwo epwe wor pöükässi usun pöükässin eman lisom.
Üpwe ässila o kütta ai lenien asösö.

⁷ Ewer, üpwe ässila toau o nonom lon ewe fanüapö.

⁸ Üpwe müttir le kütta ana ie üpwe op ie
seni ewe asepwäl watte me ewe mölümöl.”

⁹ Ai Samol, kopwe afitikokoi än ekewe aramasangau kapas.

Pun üa küna ar föförün mwäneson me ar aninifengen lon ewe telinimw.

¹⁰ Lerän me lepwin ra pwelifetalei me won tittin ewe telinimw.

Pwüngingau me weires ra nonom lon,

¹¹ feiengau a nom ekis meinisin,

nge angangen ariaföü me atuputup ra chök fifis lon ekewe al.

¹² Are eman chon oputaei epwe ämängauaei,
üpwe tongeni engila fan.

Are eman chon ü ngeniei epwe turunufaseei,
üpwe tongeni op seni.

¹³ Nge en, chienei, pwal pwii mi achengicheng,
en ätewe mi föri iei usun ngeniei.

¹⁴ Kich sa pwapwa le akapworausfengen,
sa pwal fetalepök ngeni imwen Kot pwe sipwe fel ngeni.

¹⁵ Amwo mäla epwe müttir tori ekewe chon oputaei,
amwo repwe feilmanauetiu lon lenien sotup.
Pun ngau a nom lon lenier pwal lon leluker.

¹⁶ Nge ngang üa siö ngeni Kot.

Iwe, ewe Samol mi Lapalap epwe amanauaei.

¹⁷ Lekuniol me lesosor pwal leoloas
üa apasätä ai kewe weires o ngüngü.

Iwe, Kot epwe rongorong mweliei.

¹⁸ Epwe angasa manauai,

pwe üpwe tongeni liwiniti fän kinamwe seni ewe maun üa eäni,
inamwo ika chomong aramas ra ü ngeniei.

¹⁹ Kot ewe mi mot won an lenien motun king seni me lomlom
epwe aüselingaei o akufuur,
pun resap mochen siwili ar föför,
resap pwal niuokusiti Kot.

²⁰ Chienei we me lom a fiu ngeni chiechian
o ataela an we pwon.

²¹ An fos a mwotoutou seni pwötö,
nge ekiengin maun a nom lon lelukan.
An kewe kapas ra pwetete seni lö,
nge ra ken usun chök kenin ekewe ketilas.

²² Kopwe monätä won ewe Samol mi Lapalap om weires,
pwe i epwe tümwünuk.
Esap fokun mwütätä pwe ewe chon pwüing epwe kuf.

²³ Nge en, ai Kot, kopwe aturätü lon ewe lenien sotup ekewe chon
nimanauei aramas me ekewe chon atuputup
mwen esamwo tori esopun manauer.
Nge ngang üpwe anomu ai apilükülük womw.

56

Eu iotek fän apilükülük

56.1-13

(1.Sam 21.13-15)

Ngeni ewe mi emweni chon köl: Ei köl usun ngingin ewe köl itan “Ewe
lisom won ekewe irä terepin mi toau”. Echö än Tafit köl, lupwen ekewe
chon Filistia ra turufi me lon Kat.

¹ Ai Kot, kopwe ümöümöch ngeniei,
pun aramas ra chök tatapweriei.

Ekewe chon oputaei ra ariaföüüei fansoun meininisn.

² Chon ü ngeniei ra tapweriei iteiten rän.

Chomong ra fiu ngeniei fän ar lamalamtekia.

³ Lupwen üa niuokus,
üa chök isetä ai apilükülük womw.

⁴ Üa mwareiti än Kot kapas,
üa apilükülükü Kot, nge üsap niuokus.
Met aramas repwe tongeni föri ngeniei?

⁵ Chon oputaei ra sorei mine üa apasa fansoun meininisn,
ra chök ekienkietä met repwe afeiengauaei ren.

⁶ Ra amwichafengeniir,
ra operiei

o mamasafetaleei
pwe repwe nieila.

⁷ Iei mine kopwe liwini ngeniir ar föföringau.
Ai Kot, kopwe akufu ekei aramas fän om lingeringer.

⁸ En ka küna ai süsüfeil.
Kopwe osupwalong chönün mesei lon om rume.

Ifa usun, kosap aleaniir?

⁹ Lon ewe rän, lupwen üpwe köruk pwe kopwe alisie,
ekewe chon oputaei repwe kul seniei.
Ren ei üa silei pwe Kot a peniei.

¹⁰ Üa mwareiti än Kot kapas,
üa mwareiti än ewe Samol mi Lapalap kapas.

¹¹ Üa apilükülükü Kot, nge üsap niuokus.
Met aramas repwe tongeni föri ngeniei?

¹² Ai Kot, üpwe apwönüetä ai kewe pwon ngonuk.

Üpwe eäni asoren kilisou ngonuk,

¹³ pun ka angasa manauei seni mäla.

Ewer, ka amwöchü pechei pwe üsap mit,
pwe üpwe fetal fän mesen Kot lon ewe saram mi atoto manau.

57

Eu iotekin tūngor alilis

57.1-11

(1.Sam 22.1; 24.3)

Ngeni ewe mi emweni chon köl: Ei köl usun ngingin ewe köl itan “Kosap ataela”. Echö än Tafit köl, lupwen a sü seni Saul o sülong lon ewe föimw.

¹ Kopwe ümöümöch ngeniei, ai Kot, kopwe ümöümöch ngeniei,
pun üa eänuk lenien op.

Üa op fän nürün poum,
tori ewe mölümölün feiengau a feil seniei.

² Üa siö ngeni Kot, Ewe mi Unusen Tekia,
ewe Kot mi alisie lon mettoch meinisin.

³ I epwe tinato an alilis seni läng o amanauaei,
i epwe akufu chokewe mi chök tatapweriei.

Kot epwe tinato an we tong ellet me an allükülük ngeniei.

⁴ Chon oputaei mi wewe ngeni laion mi mwäräräiti le ochei aramas ra
pwelifeiliei,

ngir ra usun chök siles me föün esefich,
nge chönawer ra usun chök ketilas mi ken.

⁵ Ai Kot, kopwe pwäri om tekia asen ekewe läng.
Om ling epwe pwä won unusen fanüfan.

⁶ Chon oputaei ra anomu eu sär fän itei.

Ai osukosuk a choutiei.
Ra tuw eu pwang lon alei,
nge ra püsin turulong lon.

⁷ Üa apilükülükuk, ai Kot, üa apilükülükuk,
üpwe köl o mwareituk.

⁸ Ngüni, kopwe pwök,
ekewe kitar me ükülele repwe pwök.

Üpwe apwökü mallen rän.

⁹ Ai Samol, üpwe kilisou ngonuk me lein ekewe mwichen aramas,
üpwe kölün mwareituk me lein chon ekewe mwü.

¹⁰ Pun om tong ellet a tekia seni ekewe läng,
om allükülük a tori ekewe kuchu.

¹¹ Ai Kot, kopwe pwäri om tekia asen ekewe läng.
Om ling epwe pwäla won unusen fanüfan.

58

Eu iotek pwe Kot epwe apwüngü ekewe aramasangau
58.1-11

Ngeni ewe mi emweni chon köl: Ei köl usun ngingin ewe köl itan “Kosap ataela”. Echö än Tafit köl.

¹ Ämi sounemenem, ifa usun, oua wesewesen apwüngala mine a pwüng?
Ifa usun, oua apwüngü ekewe aramas fän wenechar?

² Apwi, oua chök ekiiekietä mine a ngau lon lelukemi,
nge pöümi ra föri föförün mwäneson won fanüfan.

³ Ekewe aramasangau ra tokola lon unusen manauer,
ra chök kapas chofana seni ewe fansoun ra uputiu.

⁴ Ra urela ren poison usun chök ekewe serepenit mi poison.

Ra pineela selinger usun eman serepenit a pineela selingan,

⁵ pwe esap tongeni rongorong ngingin ätewe mi afesira serepenit,
ika än eman sourong förüör.

⁶ Ai Kot, kopwe kupi ngir, kopwe tülü ngin ekewe laion mi langatam.

⁷ Amwo repwe morola usun koluk mi pula,
repwe pachachala usun fetil aramas ra purätü.

⁸ Amwo repwe wewe ngeni eföü pweechar, a telila o wiliti mongomong,
repwe wewe ngeni eman mönükol esap küna saram, pun a uputiu, nge
esap manau.

⁹ Mwen ämi kewe nape ra mefi pwichikaren ewe ekkei seni iräfölüföf,
ese lifilifil ika ir irä mi manau ika mi pwas.

Kot epwe ässala ekewe aramasangau ren eu ewiniär.

¹⁰ Ekewe chon pwüng repwe pwapwa, lupwen repwe küna pwe Kot a
apwüngü ekewe chon tipis,

repwe talü pecher lon chan ekewe aramasangau.

¹¹ İwe, aramas repwe apasa, “Ellet, ekewe chon pwüng ra angei liwinir.
Ellet, mi wor eman Kot mi eäni kapwüng won fanüfan.”

59

Eu iotekin tüngor ngasala seni chon oput
59.1-17
(1.Sam 19.11)

Ngeni ewe mi emweni chon köl: Ei köl usun ngingin ewe köl itan “Kosap ataela”. Echö än Tafit köl, lupwen Saul a tinala ekoch mwän pwe repwe operi imwan, pwe repwe niela.

¹ Ai Kot, kopwe angasaeila seni ekewe chon oputaei,
kopwe tümwünüei seni chokewe mi ü ngeniei,

² kopwe angasaeila seni ekewe chon föföringau
o amanauaei seni ekewe aramas mi chök mochen nimanauei aramas.

³ Ngeni, ra operiei pwe repwe nieila,
aramas mi fokun ngau ra mwichfengen o ü ngeniei.

Ei a fis ngeniei sap pokiten ai pupungau ika tipis, ai Samol mi Lapalap.

⁴ Üsap föri och mi mwäl,

nge ra chök amoleretä pwe repwe fiu ngeniei.

Kopwe ütä o alisie, kopwe nenengeni ai osukosuk.

⁵ En Samol mi Unusen Manaman, en Koten Israel,

kopwe pwätä pwe kopwe apwüngü chon ekewe mwü meinsin.

Kosap eäni ümömöch ngeni chokewe mi rawangauei aramas.

⁶ Iteiten lekuniol ra liwinito,

ra wörüwör usun ekewe kolak, lupwen ra aniffetal lon ewe telinimw.

⁷ Kapasen turunufas me kapasen eniweniw ra towu seni awer,

chönawer ra usun chök ketilas,

nge ra ekieki pwe esap wor eman a rongorong ar kapas.

⁸ Nge en, ai Samol mi Lapalap, ka takiriir,

ka ämängaua chon ekewe mwü meinsin.

⁹ En ai pöchökül, üa osukusukuk,

pun en ai Kot imwei imwen maun.

¹⁰ Ai Kot epwe feito rei fän an tong ellet,

ai Kot epwe föri pwe üpwe nenengeni än chon oputaei kuf.

¹¹ Kosap nirela, pwe nei aramas resap manlükala mine ka föri ngeniir.

Kopwe atoropaseer ren om manaman o akufuur.

Ai Samol, en ka epeti senikem feiengau.

¹² Pokiten kapasen awer ra chök tipis, repwe tup lon ar lamalamtekia.

Pokiten ar ottek me chofana,

¹³ kopwe aroserela lon om lingeringer,

kopwe aroserela tori resap chüen nom.

Mürin, aramas meinsin repwe silei pwe Kot a nemenem lon Israel,

pwal tori unusen fanüfan.

¹⁴ Iteiten lekuniol chon oputaei ra liwinto,

ra wörüwör usun ekewe kolak, lupwen ra aniffetal lon ewe telinimw.

¹⁵ Ra küttafetal ener mongö

o ngüngü, lupwen resap möt.

¹⁶ Nge ngang üpwe köl usun om manaman.

Iteiten lesosor üpwe köl fän leüömong usun om tong ellet.

Pun en ka wewe ngeni eu imwen maun me rei,

pwal eu lenien op lon ränin ai riaföü.

¹⁷ En ai pöchökül, üpwe kölün mwareituk,

pun en ai Kot imwei imwen maun.

En ewe Kot mi tongeei.

60

Eu iotekin tüngr alilis pokiten chon oput

60.1-12

(2.Sam 8.13; 1.Kron 18.12)

Ngeni ewe mi emweni chon köl: Ei köl usun ngingin ewe köl itan “Kiopun pwärätä”. Echö än Tafit köl fän iten kait ngeni aramas, lupwen a maun

ngeni chon Aram seni Naharaim me Sopa, pwal lupwen Joap a liwinsefäl o niela engol me ruungeröü chon Etom me lon ewe Lemolun Salt.

¹ Ai Kot, ka pöütikeemila o akufukem, ka pwal song ngenikem.

Kose mochen kopwe apöchökülasefälikem.

² Ka achecha ewe fanü, ka pwal asangafeseni.

Kopwe aöchüsefäli mine a ta, pun ewe fanü a mökküfesen.

³ Ka ariaföü noum aramas ren riaföü mi chou, ka aünü ngenikem wain pwe äm aia taroporopfetal ren.

⁴ Ka aürätä efoch fläik fän iten chokewe mi meninituk, pwe repwe chufengen fan o sü seni ekewe föün esefich.

⁵ Kopwe awinakem ren om manaman o pälüeni äm iotek, pwe noum kewe ka echeniir repwe ngasala.

⁶ Kot a kapas seni lon imwan mi pin,

“Lon ai meseik üpwe ineti Sikem o aineti ewe lemolun Sukot ngeni nei aramas.

⁷ Kiliat fanüei, Manasa pwal fanüei, Efraim imwei akkaw, Juta woki wokun king.

⁸ Moap sepiei seprien tötöl, üpwe moneela ipwei sus won Etom, asisilan pwe fanüei, nge won ewe fanü Filistia üpwe arükak fän ai win.”

⁹ Iö epwe emweneilong lon ewe telinimw mi pöchökül tittin?

Iö epwe emwenei ngeni Etom?

¹⁰ Ai Kot, ifa usun, ka wesewesen pöütikeemila?

Ifa usun, kosap chüen eti äm mwichen sounfiu le feila maun?

¹¹ Kopwe alisikem pwe aipwe tongeni maun ngeni ekewe chon op-utakem,

pun än aramas alilis a lomotongau.

¹² Are Kot a etikich, kich sipwe win, i epwe akufu chon oputakich.

61

Apilükülük ren än Kot tümwün

61.1-8

Ngeni ewe mi emwenei chon köl: Won pisekin ettik mi wor saitenin. Echö än Tafit köl.

¹ Ai Kot, kopwe rongorong ai siö, kopwe aüselinga ai iotek.

² Üa kökkörük seni lesopun fanüfan, lupwen üa apilükingau.

Kopwe emwenei ngeni ewe achau mi tekia seniei.

³ Pun en ai lenien op, ka tümwünüöchüei seni ekewe chon oputaei.

⁴ Kopwe mwüt ngeniei pwe üpwe nom lon inwom mi pin lon unusen manaei, pwe üpwe kinamwe le op fän poum.

⁵ Pun en ai Kot, ka rongorong ai kewe pwon,
ka ngeniei wisen chokewe mi meninituk.

⁶ Kopwe alangatamala ränin manauen ewe king.
Amwo ierin manauan repwe tori ekewe täppin aramas meinisin.

⁷ Amwo epwe nemenem fän mesom tori feilfeilachök.
Ai Kot, kopwe tümwünü ewe king ren om tong ellet me om allükülük.

⁸ Mürin üpwe kölün mwareiti itom fansoun meinisin,
lupwen üa apwönüetä ai kewe pwon iteiten rän.

62

Kot echök ach lenien op *62.1-12*

Ngeni ewe mi emweni chon köl: Ei köl usun ngingin förien Jetutun köl.
Echö än Tafit köl.

¹ Üa likitü le witiwiti Kot pwe epwe amanauaei,
üa anomu ai apilükülük won i chök.

² I chök a tümwünüei o amanauaei,
i a peniei pwe üsap fokun kuf.

³ Ifa ükükün fansoun ämi meinisin oupwe fiu ngeni eman chök aramas,
pwe oupwe aturala usun eu oror mi söön ika eu tit mi päpäifetal.

⁴ Oua chök ekiekin asapwilätü i seni wisan mi tekia,
oua pwapwaäsini kapas chofana.
Oua eäni kapasen afeiöch,
nge oua otteki me lon lelukemi.

⁵ Üa likitü le witiwiti Kot echök,
pun üa anomu ai apilükülük won.

⁶ I chök a tümwünüei o amanauaei,
i a peniei pwe üsap fokun kuf.

⁷ Ai küna manau me ai ling ra longolong won Kot.
Kot ai achau mi pöchökül
me ai lenien op.

⁸ Ämi aramas, oupwe lükü Kot fansoun meinisin.
Oupwe pwäri ngeni ämi weires meinisin,
pun i ach lenien op.

⁹ Aramas tekison ra usun chök enienin asepwäl,
nge aramas tekia ra usun chök och minen chofana.
Are ra kilo, esap wor chour,
ra pän seni enienin asepwäl.

¹⁰ Ousap anomu ämi apilükülük won pisek oua angemwäli fän pöchökül,
ousap pwal eäni apilükülük pisek oua soläni.
Inamwo ika oua pisekisekila, ousap apilükülükü.

¹¹ Eu mettoch Kot a kapas usun. Ruu mettoch üa rongorong usun,
pwe en Kot echök ka manaman.

¹² Pwal en chök, ai Samol, ka eäni tong ellet.

Ellet ka liwini ngeni aramas ükükün ar föför. ✨

63

Kot a amenemenöchü manauen aramas

63.1-11

(1.Sam 23.14)

Echö än Tafit köl, lupwen a nom lon ewe fanüapön Juta.

¹ Ai Kot, en ai Kot üa tiliken le küttok.

Inisi a apwangapwangala ren ai posituk,
nge ngüni a kakaituk usun eu fanü mi pwasapwas o pön,
esap wor koluk lon.

² Üa mochen künok lon imwom mi pin
pwe üpwe ngeni om manaman me om ling.

³ Pun om tong ellet a mürina seni manau,
ngang üpwe mwareituk.

⁴ Iwe, üpwe kilisou ngonuk lon ränin manaei meinisin.

Üpwe aitetä pei lon ai iotek ngonuk.

⁵ Ngüni a mötüla usun üa mötüla ren mongö mi annö.

Üpwe mwareituk fän pwapwa,

⁶ üa chechemenuk, lupwen üa kon won ai peet
o ekieki usum lepwin.

⁷ Pun en ai soualilis,
üa köl fän pwapwa me fän nürün poum.

⁸ Üa fitipacheituk,
pöüifichum a amwöchüeitä.

⁹ Nge chokewe mi mochen nieila

repwe feitiu epin fanüfan,

¹⁰ repwe mäla lon maun,
nge kolak mi mwacho repwe ochei fituker.

¹¹ Nge ewe king epwe meseik ren Kot.

Meinisin mi eäni iten Kot le pwon fän akapel repwe mwänek,
nge awen ekewe chon chofana repwe pinela.

64

Eu iotekin tüngor pwe Kot epwe angasala seni ekewe chon oputa

64.1-10

Ngeni ewe mi emweni chon köl: Echö än Tafit köl.

¹ Ai Kot, kopwe aüselingaei, lupwen üa pwäri ngonuk ai osukosuk.

Kopwe tümwünü manaei, pun üa niuokus ren chon oputaei,

² kopwe aopaeila seni än ekewe aramasangau rawangauaei,
seni ewe mwichen chon föföringau mi akürang.

³ Ra seimi chönawer pwe ra ken usun chök ketilas,
ra awena ar kapas mi ngau usun chök föün esefich,

⁴ pwe repwe pekki ätewe esap wor an tipis seni ar lenien op,
ra müttir pekki i, nge resap niuokus.

⁵ Ra apöchökülafengeniir lon ar ekiiek mi ngau,
ra kapas usun ar repwe föri ekewe sär lemonomon o apasa,

✨ **62:12:** Hiop 34.11; Jer 17.10; Mat 16.27; Rom 2.6; Pwär 2.23

“Esap wor eman a tongeni künakich?”

⁶ Ra rawangau won mine a pwüngingau o apasa,
 “Sa ekiékietä eu akot mi unusöch.”
 Ellet ekiék me leluken aramas ra men atuputup.

⁷ Nge Kot epwe esefichi ngeniir wokun föün esefich
 pwe repwe müttir kinas.

⁸ Epwe atoto wor feiengau pokiten kapasen awer,
 nge meinsin mi küneer repwe nünüti möküer.

⁹ Mürin, aramas meinsin repwe niuokus.
 Repwe ekiéki mine Kot a föri
 o apworausä usun.

¹⁰ Ekewe chon pwüng repwe pwapwa
 ren mine ewe Samol mi Lapalap a föri,
 repwe pwal op ren.
 Nge ekewe mi wenechar leluker repwe mwareiti.

65

*Kölin mwareiti Kot ren eu räs mi watte
 65.1-13*

Ngeni ewe mi emweni chon köl: Echö än Tafit köl.

¹ Ai Kot, a fich ngonuk pwe aramas repwe mwareituk lon Sion,
 repwe pwal apwönüetä ar pwon ngonuk,

² pun en ka aüselinga iotek.
 Aramas meinsin repwe feito reöm

³ pokiten ar tipis.
 Lupwen äm pupungau ra chouitikem,
 en ka amuseer senikem.

⁴ Feiöchün chokewe ka filiretä
 o emwenireto pwe repwe nom lon leniom mi pin.
 Äm aipwe üren feiöch ren ekewe mettoch mi mürina
 me lon imwom we mi pin.

⁵ Ai Kot äm Chon Amanau, ka pälüenikem fän pwüng
 ren föför mi amwarar.

En ewe chon fanüfan meinsin
 pwal chon ekewe fanü toau mi nom lematau
 ra eänuk apilükülük.

⁶ Ren om pöchökül ka anüküchara ekewe chuk,
 pun ka pwäräla om manaman.

⁷ Ka aükätü ötötün ekewe matau,
 pwal püngüpüngün ekewe no
 me akürangen chon ekewe mwü,

⁸ pwe chokewe mi nonom lesopun fanüfan repwe niuokus
 ren om kewe manaman.

Ka föri pwe chon ekewe fanüen ötiu tori chon ekewe fanüen lotou
 ra mweireir fän pwapwa ren om kewe föför.

⁹ Ka tümwünü fanüfan o achöchönü,
 ka föri pwe a pwülüöch o fanüeräs.
 Ka aurala ekewe chanpupu ren koluk.

Ka ngeni chon fanüfan ener mongö.

Iei usun mine ka föri ngeni fanüfan:

¹⁰ Ka fokun achöchönü ekewe warawar lon ekewe tanipi,
ka asosonöchü o apwetetei ewe pwül ren üt
o afeiöchü mine a märitä.

¹¹ Ka awora iteiten ier räs mi fokun somwola.

Ekis meinisin ia ka fetal ie a wor räsimong.

¹² Ekewe mälämäl lon fanüapö a märitä chomong fetal wor,
nge ekewe chuk ra pwölüla ren pwapwa.

¹³ Ekewe maasies ra ur ren pwiin sip,
nge ekewe lemöl ra ur ren wiich.

Aramas meinisin ra mweireir o kölfengen fän pwapwa.

66

Kölün mwareiti Kot ren an kewe föföör mi manaman

66.1-20

Ngeni ewe mi emweni chon köl: Echö köl.

¹ Oupwe mweireir fän pwapwa ngeni Kot,
ämi chon fanüfan meinisin,

² oupwe kölü lingen itan
o fokun mwareiti i.

³ Oupwe apasa ngeni Kot, “Om kewe föföör ra fokun amwarar.

Om kewe manaman ra kon lapalap,
pwe chon oputok ra chapetiu me mwom fän niuokus.

⁴ Chon fanüfan meinisin ra fel ngonuk,
ra kölün mwareituk,
ra kölün mwareiti itom.”

⁵ Oupwe feito o nenengeni mine Kot a föri.

An kewe föföör me lein aramas ra fokun amwarar.

⁶ A awili matau ngeni fanüpwäs.

Äm kewe lewo ra fetal lon ewe chanpupu won pecher.

Ikenan äm aia pwapwa ren mine Kot a föri. ✧

⁷ A nemenem ren an manaman tori feilfeilachök,
mesan ra mamasa ekewe mwü.

Ekewe aramas mi ü ngeni Kot resap tongeni atekiaretä.

⁸ Ämi chon ekewe mwü, oupwe mwareiti ach we Kot.

Aramas repwe rong ngingin ämi mwareiti i.

⁹ I a amwöchü manauach,
nge esap mwüt ngenikich pwe sipwe turula.

¹⁰ Pun en äm Kot, ka sotunikem,
ka limetikem

usun aramas ra limeti silifer.

¹¹ Ka atolongakem lon fötek.

Ka anomu won sökürüm och wosochou,

¹² ka mwüt ngeni aramas pwe repwe purikem.

Äm aia pwerelong lon ekkei me koluk,

nge en ka emwenikeemiwu o atolongakem lon eu leni mi mürina.

✧ 66:6: Eks 14.21; Jos 3.14-17

13 Üpwe feila lon imwom fän asoren kek
o apwönüetä ai kewe pwon ngonuk.

14 Üpwe uwato reöm mine üa pwon ngonuk,
lupwen üa nom lon weires.

15 Üpwe eäni asoren kek ngonuk seni man mi öümanau.

Üpwe eäni asor ätemwänin sip,
pwal ätemwänin kow me kuuch,
pwe ötüötün ekewe asor epwe ötütä.

16 Oupwe feito o rongorong, ämi meinisin mi asamolu Kot,
üpwe apworausä ngenikemi mine Kot a föri fän itei.

17 Üa siö ngeni fän leüömong,
üa kölün mwareiti i.

18 Are üa ekiekietä och föför mi ngau lon lelukei,
ewe Samol esap aüselingaei.

19 Nge Kot a fokun aüselingaei,
a aü selingan ngeni ai iotek.

20 Üpwe mwareiti Kot,
pun i esap oput ai iotek,
esap pwal amwöchü seniei an we tong ellet.

67

Echö kölün mwareiti Kot
67.1-7

Ngeni ewe mi emweni chon köl: Ren pisekin ettik mi wor saitenin. Echö köl.

¹ Ai Kot, kopwe ümöömöch ngenikem o afeiöchükem,
kopwe netiu wom fän om kirikiröch,

² pwe aramas won fanüfan repwe silei letipom,
nge chon ekewe mwü meinisin repwe silei om we angangen amanaua
aramas.

³ Chon ekewe mwü repwe mwareituk, ai Kot,
chon ekewe mwü meinisin repwe mwareituk.

⁴ Chon ekewe mwü repwe pwapwa o köl fän ar pwapwa,
pun en ka apwüngü chon fanüfan fän pwüng,
ka pwal emweni chon ekewe mwü won fanüfan.

⁵ Chon ekewe mwü repwe mwareituk, ai Kot,
chon ekewe mwü repwe mwareituk.

⁶ Fanüfan a awora räs,
Kot ach Kot a afeiöchükich.

⁷ Kot a afeiöchükich.
Chon fanüfan meinisin repwe asamolu i.

68

Ewe Kote Sinai me an we mwichefel
68.1-35

Ngeni ewe mi emweni chon köl: Echö än Tafit köl.

¹ Kot epwe ütä o atoropasafeili chon oputan,
chokewe mi oputa i repwe sü me mwan.

² Usun asepwäl a ässala ötüötün ekkei, iei usun epwe ässirela.

Usun kiris a telila ren ekkei,
iei usun ekewe aramasangau repwe rosola me fän mesen Kot.

³ Nge ekewe chon pwüing repwe uren pwapwa, repwe mwänek me fän mesen Kot,
repwe mweireir fän pwapwa.

⁴ Oupwe köl ngeni Kot, oupwe kölün mwareiti itan.

Oupwe chietä echö köl ngeni ewe mi wawa ekewe kuchu,
itan ewe Samol mi Lapalap. Oupwe mwänek me fän mesan.

⁵ Kot ewe mi nom lon imwan mi pin,
i semen ekewe mi mäsen me chon tümwünün ekewe fefin mi mä pwülüer.

⁶ Kot a ngeni ekewe mi akaleman ar famili,
a emwenawu ekewe chon fötek pwe repwe ngasala fän pwapwa,
nge ekewe chon ü ngeni Kot repwe nom lon eu fanü mi pwasapwas o
pwichikar.

⁷ Ai Kot, lupwen ka akom mwen noum aramas,
lupwen ka pwerela lon ewe fanüapö,

⁸ fanüfan a chechek, ekewe läng ra apüngätü üt me fän mesen Kot.
Ewe chuk Sinai a chechek me fän mesen Kot,
ewe Koten Israel. ✧

⁹ Ai Kot, ka apüngätü ütomong ekis meinisin.
Ka amürinala fanüom, lupwen a pwasala.

¹⁰ Noum kewe aramas ra künä lenier me lon.
Lon om kirikiröch, ai Kot, ka tümwünü ekewe chon wöüngau.

¹¹ Ewe Samol a atowu ewe kapas.

A fokun lapalap ewe mwichen fefin mi arongafeili ewe pworausen win,

¹² "Ekewe king me nöür kewe mwichen sounfiu ra süla."

Ekewe fefin mi nom leimw ra inetifengeni mine ekewe sounfiu ra liapeni
lon maun.

¹³ Uluulun lisom, pöökässir ra pwölüpwöl ngeni silifer,
nge ülöüler ra molupolup ren kolt mi mürina.

Pwota ekoch me leimi ra chök nonom lefilen ekewe lenien sip?

¹⁴ Lupwen Ewe mi Unusen Manaman a atoropasafeili ekewe king won
ewe fanü,
snow a püngütü won ewe chuk Salmon.

¹⁵ Ewe chuk Pasan eu chuk mi tekia.

Eu chuk mi wor chomong chukun.

¹⁶ En chuk mi chukuchukutä, pwota ka nennetiü fän lolowo
won ewe chuk Kot a filätä pwe epwe nonom won.

Ewer, iei ewe leni ewe Samol mi Lapalap epwe nonom ie tori feil-
feilachök.

¹⁷ Ewe Samol a feito seni ewe chuk Sinai ngeni ewe leni mi pin
fiti ngeröün wan woken mi pöchökül.

¹⁸ A feitä won ewe chuk mi tekia
o emwenätä chon oola lon an mwich mi tapwela mürin,

a pwal angei lifang seni aramas, fokun seni chokewe mi ü ngeni,
Kot ewe Samol mi Lapalap epwe nonom ikenan. ✨

19 Sipwe mwareiti ewe Samol

mi mwärei ach wosochou iteiten rän.

Kot ach Chon Amanau.

20 Ach Kot eman Kot mi amanauakich,

Kot ewe Samol

a angasakich seni mäla.

21 Nge Kot epwe amökkü möküren chon oputan,
epwe amökkü mongosaponen ätewe mi chök föföri tipis.

22 Iwe, ewe Samol a apasa, “Üpwe aliwinato chon oputom seni Pasan.

Üpwe aliwinireto seni epin matau,

23 pwe pecheöm epwe fetal lon char,

nge noum kewe kolak repwe asomwa inetir seniir.”

24 Ai Kot, aramas ra küna om fetal fän win,
ra küna än ai Kot me ai king fetalelong lon imwan mi pin.

25 Ekewe chon köl ra akom, ekewe chon ettik pisekin ettik ra nom mürin,
nge ekewe föpwül mi ettik pisekin kaktai ra nom lukalaper,

26 “Oupwe mwareiti Kot lon ewe mwich mi lap.

Oupwe mwareiti ewe Samol mi Lapalap, ämi mwirimwirin Jakop.”

27 Peniamin ewe ainang mi kükün me leir a akom mwer,

ekewe samolun Juta lon mwicheicher ra tapw müriir,

nge ekewe samolun Sepulon me Naftali ra kükümwir.

28 Ai Kot, kopwe aworato om manaman.

Ai Kot, kopwe pwärawu ngenikem om pöchökül usun ka fen föri me
mwän.

29 Pokiten om we imwenfel lon Jerusalem

ekewe king repwe uwato lifang ngonuk.

30 Kopwe apwüngü Isip, ewe manmwacho mi nom lein ekewe wowo.

Kopwe apwüngü ekewe mwü, ewe pwiin ätemwänin kow me nöür kewe
nienifön kow,

tori repwe chapetiu me mwom o fang ngonuk ar silifer.

Kopwe atoropasafeili chon ekewe mwü mi pwapwaiti maun.

31 Chon künö repwe feito seni Isip.

Chon Itiopia repwe aitieta pöür lon ar iotek ngeni Kot.

32 Oupwe köl ngeni Kot, ämi chon ekewe mwü won fanüfan,

oupwe kölün mwareiti ewe Samol,

33 ewe mi saifeil lon ekewe läng,

ekewe längin lomlom.

I ewe mi fos fän mwelian mi leüömong.

34 Oupwe asilefeili än Kot manaman,

lingan a nom won Israel,

nge an manaman a nom lon ekewe läng.

35 Kot a men eniwokus, lupwen a towu seni imwan mi pin.

I ewe Koteñ Israel

mi ngeni nöün kewe aramas manaman me pöchökül.

Sipwe mwareiti Kot!

69

*Siö fän riaföü**69.1-36*

Ngeni ewe mi emweni chon köl: Ei köl usun ngingin ewe köl itan Kiop.

Echö än Tafit köl.

¹ Ai Kot, kopwe amanauaei!

Pun ekewe koluk ra feitä tori fän üei.

² Üa kokotiu lon pwakak mi alolol,
esap wor ana ie üpwe ipwetiu ie.

Üa nonom lon koluk mi alolol,
nge ekewe no ra pwölüeila.

³ Üa fokun malülü ren ai siö,
chiorei a pinela,
mesei ra toputupula
ren ai witiwiti om kopwe alisiei.

⁴ Chokewe mi oputaei, nge esap wor popun,
ra chomong seni iteiten meten mökürei.
Chokewe mi mochen nieila ra pöchökül,
ra kapas chofana usi.

Ra pöchökül ngeniei
pwe üpwe aliwinala mettoch üsap soläni. ✱

⁵ Ai Kot, en ka silei ai kewe föföör mi mwäl,
nge ai kewe tipis üa föriir resap mon senuk.

⁶ Ai Kot, en ewe Samol mi Unusen Manaman,
kosap mwütätä pwe chokewe mi eänuk apilükülük repwe säw pokitei.
En ewe Koten Israel,
kosap mwütätä pwe chokewe mi fel ngonuk repwe itengau pokitei.

⁷ Pun üa itengau fän itom,
nge säw a pwölüeila.

⁸ Üa usun chök eman wasöla ngeni pwii kewe,
üa usun chök eman chon ekis ngeni nöün inei kewe.

⁹ Pun ai ekipwichi imwom mi pin a küküri leüti usun ekkei,
nge ekewe kapasen esit mi toruk ra pwal toriei. ✱

¹⁰ Iwe, lupwen üa atekisonaeitiu ren ai echikefel,
aramas ra asitaei.

¹¹ Lupwen üa üföüf üf seni tuk,
ra chök takiriei.

¹² Ir mi mot lon asalapen ewe telinimw ra kapasen ämängau usi,
nge ekewe chon puch ra kölüei.

¹³ Nge ngang üa chök iotek ngonuk, ai Samol mi Lapalap.
Kopwe pälüeniei, ai Kot, lon fansoun mi fich me reöm.
Kopwe pälüeniei lon om tong ellet,
pun ka apwönüetä om we pwon pwe kopwe amanauaei.

¹⁴ Kopwe amanauaei seni ai kokotiu lon ewe pwakak.
Kopwe angasaei seni ekewe chon oputaei,
pwal seni ekewe koluk mi alolol.

15 Kosap mwütätä pwe ekewe no repwe pwölüeila,
kosap pwal mwüt ngeniei pwe üpwe kokotiu lon ewe lenien alolol,
ika mwocholong lon peias.

16 Ai Samol mi Lapalap, kopwe pälueniei lon om tong ellet mi mürina.
Kopwe kul ngeniei lon om ümöümöch mi somwola.

17 Kosap amona mesom seni noum chon angang.
Kopwe müttir pälueniei, pun ngang üa nom lon riaföü.

18 Kopwe kaneto rei o amanauaei,
kopwe angasaeila seni ekewe chon oputaei.

19 En ka silei usun ai küna turunufas,
usun ai säw me ai itengau,
ka pwal silei ekewe chon oputaei meinsin.

20 Ekewe kapasen turunufas ra atatakisi lelukei
pwe üa nom lon apilükingau.

Üa kütta ika eman epwe tongeei, nge esap wor eman,
üa pwal kütta ika eman epwe achipaei, nge esap wor eman.

21 Ra uwalong poison lon enei mongö,
nge lupwen üa kaka, ra aünüei finikar. ✧

22 Amwo ar kewe kametip repwe wiliti eu likatup ngeniir,
nge ar kewe chulapen mongö mi pin repwe wiliti eu sär mi awarato
feiangau wor.

23 Amwo meser repwe toputop pwe resap tongeni küna mwer,
kopwe pwal föri pwe sökürür epwe pwor fansoun meinsin. ✧

24 Kopwe awarato om song wor,
om längeringer epwe toriir.

25 Amwo lenier epwe pönüla,
amwo esap chüen wor eman epwe nonom lon imwer imw mangaku. ✧

26 Pun ir ra ariaföüü ätewe en ka wichi,
ra pwal alapala ar ariaföüü ätewe en ka akinasa.

27 Kopwe achuetä liwiningau won ar liwiningau,
nge kosap mwüt ngeniir pwe repwe küna manau.

28 Kopwe amoela iter seni ewe puken manau,
nge kosap makelong iter lein chon pwüng. ✧

29 Nge ngang üa metek o nom lon apilükingau.
Ai Kot, kopwe atekiaeitä o amanauaei.

30 Üpwe mwareiti Kot ren echö köl,
üpwe ingeiti i ren ai kilisou.

31 Ei epwe apwapwai ewe Samol mi Lapalap lap seni ai üpwe eäni asor
eman kow

ika eman ätemwänin kow fiti mächän me pachapachan.

32 Ekewe mi nom lon riaföü repwe küna ei o pwapwa.

Ämi mi fel ngeni Kot oupwe apilüköch.

33 Pun ewe Samol mi Lapalap a aüseling ngeni ekewe chon osupwang,
nge esap manlükala nöün aramas mi nom lon fötek.

✧ 69:21: Mat 27.48; Mark 15.36; Luk 23.36; Joh 19.28-29 ✧ 69:23: Rom 11.9-10 ✧ 69:25:
Föf 1.20 ✧ 69:28: Eks 32.32; Pwär 3.5; 13.8; 17.8

³⁴ Läng me fanüfan repwe mwareiti i,
pwal ekewe matau me meinisin mine a manau lon.

³⁵ Pun Kot epwe amanau Sion
o aüsefälietä ekewe telinimwen Juta.

Mürin, nöün chon angang repwe nonom ikenan o fanüeni ewe fanü.

³⁶ Mwirimwirin nöün kewe chon angang repwe fanüeni ewe fanü,
nge chokewe mi echeni i repwe nonom won.

70

Eu iotek pwe Kot epwe angasakich

70.1-5

(Kölf40.13-17)

Ngeni ewe mi emweni chon köl: Echö än Tafit köl fän iten ewe asoren
achechem.

¹ Ai Kot, kose mochen kopwe angasaeila.

Ai Samol mi Lapalap, kopwe kaito pwe kopwe alisiei.

² Amwo meinisin mi mochen nieila
repwe säw o tolong lon fitikoko.

Amwo chokewe meinisin mi tipeni ai üpwe feiengau
repwe kulsefäl o itengau.

³ Amwo chokewe mi ämängauaei
repwe fokun rükö ren ar kuf.

⁴ Nge meinisin mi feito reöm repwe meseik o pwapwa.

Chokewe mi aücheani om amanau eer
repwe apasafochel, "Kot a tekia."

⁵ Nge ngang üa wöüngau o osupwang.

Ai Kot, kopwe kaito rei.

En ai chon alilis me Chon Amanau.

Ai Samol mi Lapalap, kosap mang le alisiei.

71

Än eman chinlap iotek

71.1-24

¹ Ai Samol mi Lapalap, en ai lenien op,
kosap fokun mwüt ngeniei pwe üpwe kuf.

² Pokiten ka pwüing, kopwe angasaei o alisiei.

Kopwe aü selingom ngeniei o amanauaei.

³ En kopwe ai lenien op usun eu föimw,

ia üa tongeni op ie fansoun meinisin.

En ewe mi pwon ngeniei pwe kopwe amanauaei,

pun en ai achau me ai imwen maun.

⁴ Ai Kot, kopwe angasaei seni ekewe aramasangau,

pwal seni ekewe mwän mi ngau o mwäneson.

⁵ Ai Samol mi Lapalap, en ai apilükülük,

üa lükülük seni lesäräföi.

⁶ Lon unusen manauaei üa unnenuk,

en ewe mi tümwünüei seni ai uputiu.

Üpwe chök mwareituk fansoun meinisin.

⁷ Üa usun chök eu asisil mi eniwokus ngeni chomong aramas,

nge en ai lenien op mi pöchökül.

⁸ Üa mwareituk iteiten rän
o pwärätä om ling.

⁹ Kosap pöütieila iei lon ai chinlap,
nge kosap likitieila iei, lupwen üa apwangapwang.

¹⁰ Pun chon oputaei ra kapas usi,
ra rawangauaei o mochen nieila.

¹¹ Ra apasa, “Kot a likitala ätei.
Ousipwe tapweri o turufi,
pun esap wor eman epwe angasa i.”

¹² Ai Kot, kosap toau seniei.

Ai Kot, kopwe kaito pwe kopwe alisiei.

¹³ Amwo ekewe chon atipisiei repwe säw o rosola.

Nge chokewe mi kütta ar repwe afeiengauaei repwe küna turunufas me
itengau.

¹⁴ Nge ngang üpwe apilükülük fansoun meinisin
o alapala ai mwareituk.

¹⁵ Iteiten rän üpwe apworausä usun om föföör mi pwüing,
pwal usun om amanauaei,
inamwo ika üsap tongeni weweiti meinisin.

¹⁶ Ai Kot, Samol mi Lapalap, üpwe feito o apworausafeili om kewe föföör
mi manaman,
üpwe mwareiti om pwüing echök.

¹⁷ Ai Kot, ka aiöüei seni lesäräföi,
nge ngang üa chüen asilefeili om föföör mi amwarar.

¹⁸ Ai Kot, kosap likitieila iei,
lupwen üa chinlap o pwech mökürei.
Kopwe etiei, lupwen üpwe asilefeili om manaman me om tufich
ngeni ekewe täppin aramas repwe up me mürin.

¹⁹ Ai Kot, om pwüing a tori ekewe läng mi tekia.

En ka föri mettoch mi amwarar.

Ai Kot, iö a wewe ngonuk?

²⁰ En ewe mi öküna ngeniei chomong weires me riaföü,
kopwe pwal apöchökülasefäliei,
kopwe uweesefälieitä seni epin fanüfan.

²¹ En kopwe alapala ai iteüöch
o achipasefäliei.

²² Ai Kot, ngang üpwe fokun mwareituk ren kitar,

pokiten om allükülük,

üpwe kölün mwareituk ren ükülele,

en Ewe mi Pin me lon Israel.

²³ Üpwe mweir fän pwapwa, lupwen üpwe kölün mwareituk.

Üpwe mwareituk,
pun ka amanauaei.

²⁴ Iteiten rän üpwe kapas usun om pwüing,
pun chokewe mi kütta ar repwe afeiengauaei
ra säw o itengau.

72

Än ewe king mi pwüing nemenem

72.1-20

Echö köl fän iten Salomon.

¹ Ai Kot, kopwe fang ngeni ewe king om pwüingüöch, kopwe ngeni nöün ewe king we mwän om pwüing,

² pwe epwe eäni kapwüing won noum kewe aramas fän pwüing, pwal won noum kewe mi riaföü fän pwüingüöch.

³ Amwo ewe fanü epwe awora feiöch me kinamwe ngeni ekewe aramas, amwo epwe fis pwüing lon.

⁴ Amwo ewe king epwe peni ekewe mi riaföü me lein ekewe aramas, amwo epwe alisi ekewe mi osupwang o akufu ekewe mi ariaföüür.

⁵ Amwo ewe king epwe manau ükükün fansoun akkar me maram ra nonom läng,

seni eu täppin aramas tori pwal eu täppin.

⁶ Amwo epwe usun chök üt mi püngütü won fetil mi pwüküfö, pwal usun chök üt mi achöchönü fanüfan.

⁷ Amwo pwüing epwe fefeitä lon ränin manauan, nge feiöch me kinamwe epwe lapala, tori ewe maram esap chüen nom.

⁸ Iwe, ewe king epwe nemenem seni eu matau tori pwal eu, pwal seni ewe chanpupu Oifrat tori lesopun fanüfan. ✧

⁹ Ekewe aramas mi nonom lon ewe fanüapö repwe pworotiu me mwan, nge chon oputan repwe chapetiu lepwül fän mesan.

¹⁰ Ekewe kingen Tarsis pwal ekewe king seni ekewe fanü mi nom lematau repwe takises ngeni,

nge ekewe kingen Shepa * me Sepa † repwe uwato ar lifang ngeni.

¹¹ Ekewe king meinisin repwe chapetiu me mwan, nge chon ekewe mwü meinisin repwe angang ngeni.

¹² Pun a angasa ekewe chon osupwang, lupwen ra kökköri, pwal ekewe mi mwelele me chokewe esap wor ar chon alilis.

¹³ Iwe, a tongei chokewe mi apwangapwang me wöüngau, a pwal amanaua ekewe mi osupwang.

¹⁴ A angaseer seni ar riaföü me ewe angangen mwäneson mi fis ngeniir, pun manauer a aüchea me ren.

¹⁵ Amwo ewe king epwe manauatam!

Amwo aramas repwe uwato kolt ren seni Shepa.

Amwo aramas repwe iotek fän itan fansoun meinisin, repwe tüngor an feiöch rän meinisin.

¹⁶ Amwo epwe wor chomong wiich lon ewe fanü.

Amwo epwe wor uän irä won ekewe chuk.

Resin ewe fanü epwe usun chök resin Lapanon.

Nge ekewe telinimw repwe ur ren aramas

usun chök ewe lemäl a ur ren fetil.

¹⁷ Amwo iten ewe king epwe nonom tori feilfeilachök,

✧ 72:8: Sek 9.10 * 72:10: Shepa eu fanü lon Arapia † 72:10: Sepa eu fanü lon Itiopia

nge iteüöchün epwe nonom ükükün fansoun akkar a nonom.
Chon ekewe mwü meinsin repwe angei ar feiöch me ren,
nge ir repwe apasa pwe i a feiöch.

¹⁸ Sipwe mwareiti ewe Samol mi Lapalap, ewe Kote Israel,
i chök a föri mettoch mi amwarar.

¹⁹ Sipwe mwareiti itan mi ling tori feilfeilachök.
An ling epwe aurala unusen fanüfan.
Amen, amen.

²⁰ Iei müchulan ekewe iotek än Tafit nöün Jesi we mwän.

AÜLÜNGATIN PUK

73

Sopolan ekewe aramasangau
73.1-28

Echö än Asaf köl.

¹ Ellet, Kot a kirikiröch ngeni chon Israel,
ngeni chokewe mi limöch leluker.

² Nge ngang a arapakan ngeni an epwe tur seniei ai apilükülük,
a arapakan chök esap chüen wor ai lükülük.

³ Pun üa lolowo ngeni ekewe chon lamalamtekie,
lupwen üa küna än ekewe aramasangau wöümong.

⁴ Esap wor ar metek,
inisir a pöchökül o öümanau.

⁵ Ir resap weires usun pwal ekoch aramas, resap riaföü usun pwal ekoch.

⁶ Iei mine ra mwärini lamalamtekie fän üer usun chök epa mwärämwär,
angangen mwäneson a pwölürela usun echö üf.

⁷ Seni lon leluker mi pöchökül a towu ekiek mi ngau,
rawangau esap wor aükükün a chök nom lon ar ekiek.

⁸ Ra takirin ämängaua aramas o eäni kapasingau,
ra eniwa aramas fän ar lamalamtekie pwe repwe ariaföüür.

⁹ Ra eäni kapasingau usun Kot lon läng
o eäni fos sikesis ngeni chon fanüfan.

¹⁰ Iei mine nöür kewe aramas ra kul ngeniir
o müttir lükü ar kewe kapas meinsin.

¹¹ Iwe, ra apasa, "Kot esap sile.

Ewe mi Unusen Tekia esap wor an silelap."

¹² Iei usun lapalapan ekewe aramasangau.

¹³ Ellet a solap pwe üa tümwünü lelukei pwe epwe limöch,
a solap ai üsap tipis.

¹⁴ Iteiten rän üa küna riaföü,
nge iteiten lesosor ka apwüngüei.

¹⁵ Iwe, are üa pwal apasätä usun mine ir ra apasa,
wewen nge üpwe afangamäi noum kewe aramas.

¹⁶ Üa sotuni le ekieki usun ai üpwe weweiti ei,
nge a kon weires ngeniei,

- 17 tori üa tolong lon imwom imwenfel.
 Ikenan a fateitiei usun sopolan ekewe aramasangau.
 18 Ellet, ka anomuur won leni mi mitimit.
 Ka föri mine repwe turutiu ren lon feiangau.
 19 Ra rosola lon eu chök otun,
 ra moropöküla ren niuokus.
 20 Ra usun chök eu tan mi morokaila, lupwen eman a pwök.
 Ai Samol, lupwen ka ütä, ra morokaila.
- 21 Lupwen üa chou,
 lupwen lelukei a kinas,
 22 üsap weweiti och, üa umwes o usun chök eman man me mwom.
 23 Nge ngang üa chök nonom reöm fansoun meinisin,
 pun en ka amwöchü pöüifichi.
 24 Ka emweniei fän om öüröür,
 nge mürin kopwe etiwaei lon ling.
 25 Üsap eäni och me läng nge en chök.
 Üsap pwal pwapwaiti och mettoch me won fanüfan lükün en.
 26 Inisi me lelukei ra tongeni apwangapwangala,
 nge Kot ai pöchökül pwal wisei tori feilfeilachök.
- 27 Nge chokewe mi likitukela repwe feiangau.
 Ka arosala chokewe resap allükülük ngonuk.
 28 Nge me rei, a mürina pwe üpwe kan ngeni Kot.
 Üa filätä Kot ewe Samol mi Lapalap pwe epwe ai lenien op,
 pwe üpwe apworausä an kewe föföör meinisin.

74

*Eu tünigor ngeni Kot pwe epwe ü ngeni chon oput nöün kana
 74.1-23*

- Echö än Asaf kölün kait.
 1 Ai Samol mi Lapalap, pwota ka pöütikeemila tori feilfeilachök?
 Pwota ka chök sosong ngeni noum kewe aramas?
 2 Kopwe chechemeni noum we mwichen aramas, ka filiir me lomlom,
 chokewe ka angaseer pwe repwe chon om ainang.
 Kopwe pwal chechemeni ewe chuk Sion, ia ka nonom ie me lom.
 3 Kopwe fetal ngeni ekewe lemöl imw mi tala seni me lomlom.
 Ekewe chon oputom ra ataela meinisin mine a nom lon ewe imwenfel.
- 4 Chon palüenuk ra akürang lon leniom mi pin.
 Ra aürätä ar filäik pwe asisilen ar win.
 5 Ra wewe ngeni chon pöküpök irä
 mi pökü irä lein wöllap ren ar kouk.
 6 Ra äsätätü ellingen won ekewe ettü mi rup meinisin
 ren kouk mi watte me kükün.
 7 Ra ataela imwom imwenfel o kenala,
 ra apiningaua ewe leni ia aramas ra fel ngonuk ie.
 8 Ra kapasfengen lefler, “Sipwe aroserela meinisin.”
 Iwe, ra kenala ekewe leni meinisin ia aramas ra fel ngeni Kot ie
 me lon ewe fanü.

- 9 Ach kewe asisil mi pin meinisin rese chüen nom,
ese chüen wor eman soufos,
nge esap wor eman me leich a silei inet epwe ükütiu ei lapalap.
10 Ai Kot, ifa ükükün fansoun än ekewe chon oputakem repwe esitok?
Ifa usun, repwe turunufasei itom tori feilfeilachök?
11 Pwota kosap mochen alisikem?
Pwota ka uwala poum lükisökürum?
- 12 Nge ai Kot, en ai king seni me lomlom,
ka amanaua aramas won unusen fanüfan.
13 En ka kinifesei ewe matau ren om manaman,
ka amökkü möküren ekewe trakon mi nom lematau. ✱
14 Ka atatakisi ekewe möküren ewe man itan Lefiatan *;
ka pwal aochocha fitukan ngeni ekewe mönün lon fanüapö. ✱
15 Ka amichätä puächen koluk me öüwö.
Nge ka apwasatä ekewe chanpupu mi pufochofoch.
16 En ka föri rän me pwin.
Ka anomu lon lenier maram me akkar.
17 Ka föri kiännin fanüfan,
ka pwal föri fansoun pwichikar me fansoun patapat.

- 18 Ai Samol mi Lapalap, kopwe chechemeni usun ekewe chon oputom ra
esitok,
usun ekewe aramas mi umwes ra turunufasei itom.
19 Kosap likitala noum kewe aramas mi apwangapwang ngeni ekewe
chon oputer mi fokun ingau,
kosap pwal manlükala noum aramas mi nom lon riaföü tori feilfeilachök.
- 20 Kopwe chechemeni om we pwon ka eäni ngenikem.
Pun föförün mwäneson a chök fifis lon ekewe leni mi kiroch me lon ewe
fanü.
21 Kosap mwütätä pwe ekewe mi riaföü repwe säw.
Nge ekewe mi wöüngau me osupwang repwe mwareituk.
- 22 Ai Kot, kopwe ütä, kopwe püsin kapas fän itom,
kopwe chechemeni än ekewe aramas mi umwes esitok iteiten rän.
23 Kosap manlükala pupuchörün ekewe chon oputom
me akürangen ekewe chon ü ngonuk mi chök fifis ngonuk.

75

*Kot a atekisona ekewe aramasangau o atekiatä ekewe chon pwüing
75.1-10*

- Ngeni ewe mi emweni chon köl: Ei köl usun ngingin ewe köl itan 'Kosap
ataela'. Echö än Asaf köl.
1 Äm aia kilisou ngonuk, äm Kot, äm aia kilisou ngonuk,
lupwen aia köri itom.
Aramas ra apworausä om kewe föför mi amwarar.

- 2 Iwe, Kot a apasa, "Üa filätä eu fansoun
pwe üpwe eäni kapwüing fän wenechar.

✱ 74:13: Eks 14.21 * 74:14: Lefiatan eman man mi fokun mwacho, a aliosunätä mine a ngau
✱ 74:14: Hiop 41.1; Kölf 104.26; Ais 27.1

- 3 Lupwen fanüfan a mwaroro fiti chon meinisin,
ngang ewe mi anüküchara longolongun we.
- 4 Üa üreni chokewe mi aingaing, ‘Ousap aingaing.’
Nge üa üreni ekewe aramasangau, ‘Ousap üranang.’
- 5 Ousap üranang ika fos fän lamalamtekoa.”
- 6 Pun esap wor eman seni ötiu ika lotou,
ika seni ewe fanüapö a tongeni atekiatai eman aramas.
- 7 Nge i Kot ewe mi eäni kapwüing,
a asapwilätü eman, nge a pwal seikätä eman.
- 8 Ewe Samol mi Lapalap a amwöchü eu kap lepöün,
a ur ren wain mi pwichikar, iei än Kot song.
A ninätü, nge ekewe aramasangau meinisin won fanüfan ra ünümi.
Ra ünümala meinisin tori amüchülan sosoon.
- 9 Nge ngang üpwe asilefeili usun Kot tori feilfeilachök.
Üpwe kölä mwareiti än Jakop we Kot.
- 10 I epwe ataela pöchökülen ekewe aramasangau,
nge epwe awateela pöchökülen ekewe chon pwüing.

76

Kot a win o eäni kapwüing
76.1-12

- Ngeni ewe mi emweni chon köl: Won pisekin ettik mi wor saitenin. Echö
än Asaf köl.
- 1 Ekewe aramas ra silei Kot me lon Juta,
itan a föüla me lon Israel.
- 2 A förätä lenian me lon Jerusalem,
a nonom won ewe chuk Sion.
- 3 Ikenan a kupi än chon oputan kewe föün esefich mi meriweriw,
ekewe tittin maun, ekewe ketilas me ekewe pisekin maun.
- 4 En ka fokun ling o tekoa,
lupwen ka liwinto seni ekewe chuk,
ia ka akufu chon oputom me ie.
- 5 Ekewe sounfiu mi pwora a oo seniir liaper,
ra turula o möürüfoch.
Ekewe chon maun meinisin esap wor ar pöchökül.
- 6 Ai Kot än Jakop we Kot,
ren om apwüingü ekewe chon wawa oris me ekewe oris ra turula o mäla.
- 7 Nge en echök, ai Samol mi Lapalap, aramas repwe niuokusituk.
Iö a tongeni ü me mwom, lupwen ka song?
- 8 Ka eäni kapwüing seni won läng.
Iwe, fanüfan a niuokus o fanafanala,
- 9 lupwen ka üt a pwe kopwe atowu pwüingün kapwüing
o amanaua ekewe mi nom lon riaföü meinisin won fanüfan.
- 10 Ellet, än ekewe aramas lingeringer iei fen om ling.
Nge lusun ewe lingeringer kopwe chök efiti ngonuk.
- 11 Kopwe eäni om kewe pwon ngeni ewe Samol mi Lapalap om we Kot o
apwönüretä.

Chon ekewe fanü mi nom ünükün repwe uwato lifang ngeni Kot, ewe Kot aramas ra niuokusiti.

¹² I a atekisona ekewe samol mi lamalamtekia, ekewe kingen fanüfan ra niuokusiti.

77

*Ach chip a fis ren ach chechemeni än Kot kewe manaman
77.1-20*

Ngeni ewe mi emweni chon köl: Ei köl usun ngingin förten Jetutun köl. Echö än Asaf köl.

¹ Üa siö ngeni Kot fän leüömong, üa siö ngeni Kot fän leüömong pwe epwe aüselingaei.

² Lon ränin ai riaföü üa kütta ewe Samol. Lepwin üa aitieta pei lupwen ai iotek, nge üsap chipwang.

Nge letipei esap tongeni chip.

³ Lupwen üa ekieki usun Kot, üa ngüngü, nge lupwen üa ekinlon, üa tipemösök.

⁴ A föri pwe üsap tongeni möür lepwin, üa nom lon weires pwe üsap tongeni kapas.

⁵ Üa ekieki usun ekewe fansoun lom o chechemeni ekewe ier ra la.

⁶ Üa ekiék lon lelukei lepwin, üa ekinlon o akais ngeniei,

⁷ “Ifa usun, ewe Samol epwe pöütikichela tori feilfeilachök, nge esap ümömöchsefäl ngenikich?

⁸ Ifa usun, an we tong ellet a wesewesen müchüla? Ifa usun, an kewe pwon ra ükütiu fansoun meinisin?

⁹ Ifa usun, Kot a manlükala an epwe kirikiröch? Ifa usun, an song a aukätü an tong?”

¹⁰ Mürin üa üra, “Iei ai weires, pwe manamanen Ewe mi Unusen Tekia esap chüen usun me lom.”

¹¹ Ai Samol mi Lapalap, üpwe achemato om kewe föföör. Ewer, üpwe chechemeni om kewe manaman ka föri me lom.

¹² Üpwe ekieki usun om kewe föföör meinisin o ekiék won om kewe föföör mi amwarar.

¹³ Ai Kot, meinisin mine ka föri a pin. Esap wor eman kot a tekia seni en.

¹⁴ En ewe Kot mi föri föföör mi amwarar. Ka pwäri om manaman lein chon ekewe mwü.

¹⁵ Ren om manaman ka angasa noum aramas, ir ekewe mwirimwirin Jakop me Josef.

¹⁶ Ai Kot, lupwen ekewe koluk ra künok, ra niuokus, nge epin ewe matau a chech.

¹⁷ Ekewe kuchu ra ninätü koluk, ekewe chopulap ra püng me läng. Om kewe inefi ra fila ekis meinisin.

¹⁸ Püngün om chopulap a nom lon ewe ewiniär. Om kewe inefi ra asarama fanüfan.

Fanüfan a chechek o mwöökük.

¹⁹ En ka pwerela won matau,
ka fetal won ekewe koluk mi watte,
nge esap wor eman a küna rasen ipwom.

²⁰ Ka emweni noum aramas ren Moses me Aaron
usun eman chon mas a emweni eu pwiin sip.

78

Usun än Kot allükülük ngeni nöün aramas resap allükülük

78.1-72

Echö än Asaf kölün kait.

¹ Ämi nei aramas, oupwe äüselinga mine üpwe aiti ngenikemi.

Oupwe äüeto selingemi ngeni mine üpwe apasa.

² Üpwe apasatä eu kapasen awewe.

Üpwe apasawu kapas monomon mi fis me lom, ✱

³ usun ekewe mettoch sa rongorong o silei,
semalapach kewe ra apworausä ngenikich.

⁴ Sisap aopa ekewe kapas seni nöüch,
nge sipwe apworausä ngeni ewe täppin aramas epwe feito me mürich
usun än ewe Samol mi Lapalap föföör mi amwarar,
usun an kewe manaman me an kewe asisil a föriir.

⁵ A awora ekewe pwüüng fän iten ekewe mwirimwirin Jakop
o föri ekewe allük fän iten chon Israel.

A allük ngeni ach kewe lewo

pwe repwe aiti ngeni nöür kewe an kewe allük,

⁶ pwe ekewe täppin aramas me mürir repwe silei ekewe allük,

pwal ekewe mönükol resamwo uputiu,
mürin, pwal ir repwe apworausä ngeni nöür.

⁷ Ren ei repwe anomu ar apilükülük won Kot,

nge resap manlükala än Kot kewe föföör.

Repwe pwal aleasochisi an kewe allük,

⁸ pwe resap wewe ngeni ar kewe lewo,
ewe täppin aramas mi ülöförea me lükümach,

ewe täppin aramas leluker esap pos,
resap pwal allükülük ngeni Kot.

⁹ Ekewe mwän seni ewe ainangen Efraim mi uwei nöür likapich
ra kulselfäl o sü lon ewe rän a fis maun.

¹⁰ Resap tümwünü än Kot pwon,

resap pwal mochen aleasochisi an kewe allük.

¹¹ Ra manlükala mine a föri,

ekewe manaman a pwäri ngeniir.

¹² Kot a föri föföör mi amwarar fän mesen ar kewe lewo
lon ewe fanü Isip me lon ewe maasiesin Soan. ✱

¹³ A kinifeseni ewe matau o emwenirela tori epek,
a föri pwe ekewe koluk ra ütä usun chök eu tit. ✱

¹⁴ Lerän a emweniir ren eu kuchu,
nge lepwin a emweniir ren ekki mi saramaram. ✱

¹⁵ A asangafeseni achau lon ewe fanüapö

o aünü ngeniir chomong koluk seni ekewe leni mi alolol.

16 A föri pwe öüwö a towu seni ewe achau,
nge koluk a puputiu usun chanpupu. ✧

17 Nge ra chök sopwela le tipis ngeni Kot,
ra ü ngeni Ewe mi Unusen Tekia me lon ewe fanüapö.

18 Ra sotuni Kot seni mochenin letiper
ren ar tüngormau ener mongö ra mwäräräiti. ✧

19 Ra ü ngeni Kot ren ar kapas o apasa,
“Ifa usun, Kot a tongeni ngenikich mongö lon ewe fanüapö?”

20 A wichi ewe achau pwe koluk a towu,
nge ekewe öüwö ra urourela.

Nge ifa usun, a pwal tongeni fangeto pilawa
ika amolätä fituk fän iten nöün aramas?”

21 Iei mine, lupwen ewe Samol mi Lapalap a rongorong ar kewe kapas, a
fokun song.

A tinala ekkei pwe a keni chon Israel,
nge an song a wattela ngeniir,

22 pun esap wor ar lükülük won Kot,
resap pwal lükü an manaman pwe a tongeni amanaueer.

23 Nge Kot a chök allük ngeni ekewe läng
o sukala ekewe asamen läng.

24 A apüngätü wor mana, ekewe föün wiichen läng,
pwe repwe tongeni mongö, ✧

25 Aramas ra mongö enen ekewe chon läng.
A tinala rer chomong mongö.

26 A pwal föri pwe asepwälin ötiu a enien fän läng,
nge ren an manaman a emwenawu ewe asepwälin ör.

27 A apüngätü wor fituk usun chök pwül moromor,
ekewe machang ra chomong usun chök chomongun föün pien arosot.

28 A apüngüretü lukalapen lenier
pwelín ünükün imwer.

29 Iwe, ekewe aramas ra mongö o fokun mötüla,
pun Kot a ngeniir mine ra fokun mwäräräiti.

30 Nge mwen an esamwo wesöchüla ar mwärä,
lupwen ra chüen mongö ewe mongö,

31 Kot a song ngeniir, pwe a niela ekewe mi fokun pöchökül me leir
me ekewe alüal me lon Israel.

32 Iwe, ekei mettoch meinisin ra fis, nge ekewe aramas ra chök sopwela
le tipis.

Kot a föri an kewe manaman, nge resap fokun lükü.

33 Iei mine Kot a föri pwe ränin manauer a wesila usun chök enienin
asepwäl,

nge ierin manauer a chök sopolong lon niuokus watte.

34 Nge lupwen Kot a niela ekoch me leir,
ekewe mi chüen manau ra kütta i.

Ra ekiexsefäl o tiliken le iotek ngeni.

35 Ra chechemeni pwe Kot ar achau,

pwe ewe Kot mi Unusen Tekia ar Chon Amanau.

³⁶ Nge ar kewe kapas resap pwüing,
meininis mine ra apasa a chök mwakel.

³⁷ Leluker esap wenechar ngeni,
resap pwal allükülük won an we pwon. ✧

³⁸ Nge Kot a tongeer,
a amusala ar tipis,
esap pwal aroserela,
Fän chomong a amwöchü an song,
nge esap amüchawu an lingeringer ngeniir.

³⁹ A chechemeni pwe ir aramas echök,
ra usun chök asepwäl mi enila, nge esap chüen enito.

⁴⁰ Fän chomong ra ü ngeni i me lon ewe fanüapö
o achouu me lon ewe fanüpwäs.

⁴¹ Ra sotuni Kot fän chomong
o asonga Ewe mi Pin me lon Israel.

⁴² Resap chechemeni an manaman ika ewe rän,
lupwen a amanaueer seni chon oputeer,

⁴³ resap pwal chechemeni an kewe föföör mi amwarar
me an kewe manaman a föri lon Isip me lon ewe maasiesin Soan.

⁴⁴ Iwe, Kot a awili lölon ekewe chanpupu ngeni cha,
pwe ekewe chon Isip resap tongeni ün seniir. ✧

⁴⁵ Kot a tinato pwiin nikken leir pwe repwe küür,
pwal kairü mi ataela irän fanüer. ✧

⁴⁶ A amongöü ngeni ekewe müün fotar irä,
nge ekewe lifichimas ra eni uän ar tanipi. ✧

⁴⁷ A ataela ar tanipin wain ren ütten fau
me ar irä sikamor ren patapat.

⁴⁸ A niela nöür pwiin kow ren ütten fau,
pwal nöür pwiin sip ren inefi. ✧

⁴⁹ Ren an song mi fokun watte ngeniir,
ren an lingeringer me an koput a esen ngeniir
pwe repwe tolong lon riaföü.

Ei a usun chök eu mwichen chon läng mi feito o afeiengaeer.

⁵⁰ Esap chüen engila lon an song,
esap pwal achika manauer seni mäla,
nge a asechirela pwe repwe mäla ren mätter.

⁵¹ A niela ekewe mwänichi meininis lon Isip,
ir mwen pöchökülen mwirimwirin Ham me lon ewe fanü. ✧

⁵² Mürin, Kot a emwenawu nöün aramas usun eman chon mas a emweni
nöün pwiin sip,
o emweniir lon ewe fanüapö. ✧

⁵³ A emwenirela fän kinamwe pwe resap niuokus,
nge ewe matau a pwölüela ekewe chon oputeer. ✧

⁵⁴ Iwe, a emwenirela ngeni fanüan we mi pin,
ngeni ewe chuk püsin i a liapeni. ✧

✧ 78:37: Föf 8.21 ✧ 78:44: Eks 7.17-21 ✧ 78:45: Eks 8.20-24; Eks 8.1-6 ✧ 78:46: Eks 10.12-15 ✧ 78:48: Eks 9.22-25 ✧ 78:51: Eks 12.29 ✧ 78:52: Eks 13.17-22 ✧ 78:53: Eks 14.26-28 ✧ 78:54: Eks 15.17; Jos 3.14-17

55 A asüela chon ekewe mwü me mwer.
A aineti ngeni ekewe ainangen Israel fanüer pwe repwe fanüeni
o ngeniir imwer. ✱

56 Nge ir ra sotuni ewe Kot mi Unusen Tekia
o ü ngeni.

Resap aleasochisi an kewe allük, ✱

57 nge ra tokola seni Kot o kirikiringau usun chök semelaper kewe,
ra lomotongau usun chök efoch esefich mi pwor.

58 Pun ra asonga Kot ren ar lenien fel won ekewe leni tekia,
ra pwal föri pwe a lingeringeritiir ren ar kewe uluulun anü mi fal.

59 Iwe, lupwen Kot a küna ei, a fokun song
o wesewesen pöütala chon Israel.

60 A likitala lenian me lon Silo,
ewe imw mangaku ia Kot a nom ie me lein ekewe aramas. ✱

61 A föri pwe ewe pworofel, asisilen an manaman me ling,
epwe oolong lepöün chon oputeer. ✱

62 A lingeringeriti nöün aramas
o mwüt ngeni chon oputeer pwe repwe nirela ren ketilas.

63 Nöür alüal ra mäla lon maun.
Esap chüen wor alüal repwe pwüpwülü ngeni nöür föpwül.

64 Nöür souasor ra mäla ren ketilas,
nge nöür fefin mi mä pwülüer resap tongeni ngüngüres.

65 Mürin, ewe Samol a pwök usun eman a pwök me annut.
A usun eman mwän mi pöchökül a akkapwas pokiten an ün wain.

66 Iwe, a akufu chon oputan pwe ra sü
o asäweer ren säw esemüch.

67 Mürin, Kot a pöütala ekewe mwirimwirin Josef,
esap filätä ewe ainangen Efraim.

68 Nge a filätä ewe ainangen Juta,
pwal ewe chuk Sion a efich.

69 Ikenan a aüetä imwan mi pin o tekia usun tekian ekewe läng,
a pwal anüküchara usun fanüfan
pwe epwe nom tori feilfeilachök.

70 Kot a filätä nöün chon angang Tafit
o angei i seni ekewe lenien sip.

71 A emwenato Tafit seni an tümwünü ekewe pwiin sip
pwe epwe chon masen nöün aramas,
ekewe chon Israel. ✱

72 Iwe, Tafit a tümwünüür ren wenecharen lelukan,
a fokun angangöch lon an emweniir.

79

Eu iotekin tüngor alilis, lupwen Jerusalem a tala

79.1-13

Echö än Asaf köl.

¹ Ai Kot, chon ekewe mwü ra tolong lon fanüom.

✱ 78:55: Jos 11.16-23 ✱ 78:56: Souk 2.11-15 ✱ 78:60: Jos 18.1; Jer 7.12-14; 26.6 ✱ 78:61:
1.Sam 4.4-22 ✱ 78:71: 1.Sam 16.11-12; 2.Sam 7.8; 1.Kron 17.7

Ra apiningaua pinin imwom we mi pin
o atatakisi Jerusalem. ✧

² Ra ngeni ekewe machang mi mwacho somän noum kewe chon angang
pwe ochar;

ra ngeni ekewe manmwacho fituken noum kewe chon pin.

³ Ra ninätü char usun koluk pwelin ünükün Jerusalem,
nge esap wor eman a peiaseni ekewe somä.

⁴ Äm aia uren takir me ren chon ekewe mwü mi nom ünüküm,
ra turunufasekem o esitakem.

⁵ Ai Samol mi Lapalap, ifa ükükün fansoun om kopwe song ngenikem?
Epwe tori feilfeilachök?

Ifa usun, om lingersingitkem epwe chök ngetenget usun ekkei?

⁶ Kopwe song ngeni chon ekewe mwü resap sileek,
pwal ngeni chokewe resap iotek ngonuk.

⁷ Pun ra niela noum aramas
o ataela fanüer.

⁸ Kosap ukun ngenikem tipisin äm kewe lewo.
Kopwe amüttirato om ümöömöch ngenikem,
pun äm aia apilükingau.

⁹ Kopwe alisikem, ai Kot äm Chon Amanau,
pwe itom epwe ling.

Kopwe angasakem o amusala äm tipis pokiten itom.

¹⁰ Pwota chon ekewe mwü repwe ais, “Ifa i chök ar we Kot?”

Kopwe öküna ngenikem usun om kopwe ngeni chon ekewe mwü
chappan ar nimanauei noum kewe chon angang.

¹¹ Kopwe aüselinga ngüngün ekewe chon fötek.

Fän om manaman mi lapalap kopwe angasala ir mi feil ngeni mäla.

¹² Ai Samol, kopwe liwini ngeni chon ekewe mwü fän fisu
ar kewe kapasen turunufas ra turunufaseek ren.

¹³ Mürin, äm noum aramas, ewe mwichen sipen om mälämäl,
äm aipwe kilisou ngonuk tori feilfeilachök.

Seni eu täppin aramas tori eu täppin äm aipwe mwareituk.

80

Eu iotek pwe chon Israel repwe liwinsefäl

80.1-19

Ngeni ewe mi emweni chon köl: Ei köl usun ngingin ewe köl itan ‘Kiop’.
Eu än Asaf kapasen pwärätä. Echö köl.

¹ Kopwe aüselingakem, en än Israel chon mas,
en mi emweni ekewe mwirimwirin Josef usun eu pwiin sip.

En mi mot won om lenien motun king asen ekewe kerop, ✧

² Kopwe pwärükela ngeni chon ekewe ainangen Efraim me Peniamin me
Manasa.

Kopwe pwäri ngenikem om manaman, kopwe feito o amanauakem.

³ Ai Kot, kopwe aliwinisefälükem,
kopwe netiu wom fän om kirikiröch pwe aipwe küna manau.

4 Ai Samol mi Lapalap, en ewe Kot mi unusen manaman,
ifa ükükün fansoun om kopwe song ren än noum kewe aramas iotek?

5 Ka amongöü ngenikem riaföü pwe enem mongö,
ka pwal aünü ngenikem chönün mesem fän aükük watte.

6 Ka föri pwe chon ekewe mwü mi nom aruum ra aninifengen won
fanüem,
nge chon oputakem ra takirin ämängauakem.

7 Ai Kot mi Unusen Manaman, kopwe aliwinisefälikem,
kopwe netiu wom fän om kirikiröch pwe aipwe küna manau.

8 En ka uwato efoch irän wain seni Isip,
ka asüela chon ekewe mwü o fotukätü ewe irä lon fanüer.

9 Ka limeti eu leni fän iten ewe irä pwe epwe tongeni märitä.
A tötiu waran fän pwül lealolol, a pwal amasoua ewe fanü.

10 Ekewe chuk ra pwölüla ren nürün,
nge palan kewe ra usun chök palen ekewe irä setar mi fokun watte.

11 Palen ewe irän wain ra meresiwu tori ewe matau watte,
nge fasaran kewe ra tori ewe chanpupu Oifrat.

12 Pwota ka ataetiu tittin kewe,
pwe meinisin mi pwerela won ewe al ra kini uan?

13 Pik mi mwacho seni ewe wöllap ra tipwei ewe irä,
nge ekewe manmwacho ra mongö seni.

14 Ai Kot mi Unusen Manaman, kopwe kul ngenikem,
kopwe netiu seni läng o nenengenikem.
Kopwe ekieki ei irän wain.

15 Kopwe tümwünü, pun en ewe ka püsin fotukätü.
Kopwe tümwünü palan we ka ämärätä o apöchöküla fän itom.

16 Ra pöküetiu om we irän wain o kenala.

Kopwe netiu wor fän om song o aroserela.

17 Nge kopwe fokun tümwünü noum aramas ka filätä,
ewe mwü ka fokun apöchöküla fän itom.

18 Mürin, äm aisap fokun chüen kul senuk.

Kopwe fang ngenikem manau, nge äm aipwe mwareituk.

19 Ai Samol mi Lapalap, en ewe Kot mi Unusen Manaman, kopwe
aliwinisefälikem,
kopwe netiu wom fän om kirikiröch pwe aipwe küna manau.

81

Än Kot kirikiröch me än chon Israel tokola
81.1-16

Ngeni ewe mi emweni chon köl: Won pisekin ettik itan Kitit. Echö än Asaf köl.

1 Oupwe leüömong le köl ngeni Kot i ach pöchökül.

Oupwe mweireir fän pwapwa ngeni än Jakob we Kot.

2 Oupwe chietä echö köl, oupwe ettiki pisekin kaktai,
oupwe ettiki ükülele me kitar.

3 Oupwe ettiki rappwa lelingen maram me leunusen maram,
pwal lupwen ach ränin chulap. ✧

4 Pun iei eu allük lon Israel,
eu pwüüng seni än Jakob we Kot.

5 Kot a anükücharala ei allük ngeni chon Israel,
lupwen a feila pwe epwe maun ngeni Isip.

Üa rongorong eu möngüngü üsamwo rong me mwan:

6 “Üa angei seni afaremi ewe mettoch mi chou,
üa atowu me lepöümi ewe chüük mi chou ren pilak.

7 Oua köriei lon ämi riaföü, nge ngang üa angasakemi.

Üa pälüenikemi seni ewe kuchuen chopulap, nge ousap künaei,
üa sotunikemi arun ekewe kolukun Meripa. ✱

8 Ämi nei aramas, oupwe rongorong ngeni ai kapasen fön.

Ämi chon Israel, amwo oupwe aüselingaei.

9 Esap tufich pwe oupwe eäni eman kot än chon ekewe mwü,
ousap fel ngeni eman koten ekis. ✱

10 Ngang ewe Samol mi Lapalap ämi we Kot,
üa emwenikemiwu seni ewe fanü Isip.

Oupwe fokun amassaw, nge ngang üpwe amongökemi.

11 Nge nei aramas resap mochen aüselinga aloi,
chon Israel resap mochen aleasochisiei.

12 Iei mine üa asechirela lon ar tipeförea
pwe repwe chök föri mine ra mochen.

13 Amwo nei aramas repwe aüselinga aloi,
amwo chon Israel repwe aleasochisiei.

14 Are epwe iei usun, üpwe müttir akufu chon oputeer
o fiu ngeni chokewe mi ü ngeniir.

15 Iwe, chokewe mi oputaei repwe chapetiu me mwei fän niuokus,
nge ar feiangau esap müchüla tori feilfeilachök.

16 Nge üpwe amongöü ngenikemi wiich mi fokun mürina
o aünü ngenikemi chönün chunen seni ewe achau, pwe oupwe mötüla.”

82

Kot a apwüngü ekewe soukapwüng mi pwüngingau

82.1-8

Echö än Asaf köl.

1 Kot ewe meilapen ewe mwichen lon läng,
a eäni kapwüng me lein ekewe kot:

2 “Ifa ükükün fansoun ämi oupwe eäni kapwüng fän pwüngingau
o peni ekewe aramasangau?

3 Oupwe eäni kapwüng fän pwüng ngeni ekewe mi mwelele me ekewe mi
mäsen.

Oupwe eäni pwüng ngeni ekewe mi riaföü me wöüngau.

4 Oupwe amanaua ekewe mi mwelele me ekewe mi osupwang o an-
gaserela seni lepöün ekewe aramasangau.”

5 Iwe, esap wor ar sile ika mirit,
ra chök fetal lon rochopwak.

Ra ataela ekewe pwüüng ekewe mwün fanüfan ra longolong won.

6 Üa apasa, “Ämi oua kot,
ämi meinisin nöün Ewe mi Unusen Tekia. ✱
7 Nge ämi oupwe chök mäla usun aramas,
oupwe mäfeiangau usun chök ekewe samol.”

8 Ai Kot, kopwe feito o apwüngü fanüfan,
pun noum chök chon ekewe mwü meinisin.

83

Eu iotek pwe Kot epwe afeiangaua chokewe mi oputa Israel
83.1-18

Echö än Asaf köl.

1 Ai Kot, kosap fanafanala,

ai Kot, kosap mosonoson ika asösö.

2 Pun nengeni, chon ü ngonuk ra akürang,
nge chokewe mi oputok ra achimwätä mökürer.

3 Ra rawangau ei noum aramas fän atuputup.

Ra ekiekietä mine a ngau ngeni noum kewe ka tümwünüür.

4 Ra apasa, “Ou etto, ousipwe aroserela pwe resap chüen eu mwü,
esap pwal wor eman epwe chüen chechemeni Israel.”

5 Ewer, ra tipeeufengen le rawangau.

Ra föri eu pwonon atipeeufengen pwe repwe ü ngonuk.

6 Ekewe chon Etom me ekewe mwirimwirin Ismael,
ekewe chon Moap me ekewe mwirimwirin Hakar,

7 ekewe chon Kepal, chon Amon me chon Amalek,

ekewe chon Filistia me chokewe mi imweimw lon ewe telinimw Tirus,

8 pwal ekewe chon Asiria ra choniir.

Ir meinisin ra alisi ekewe mwirimwirin Lot.

9 Kopwe föri ngeniir usun mine ka föri ngeni chon Mitian,

usun mine ka föri ngeni Sisera me Japin arun ewe chanpupu Kison. ✱

10 Ir ra ninnila me Entor,

inisir a usun chök kiten mongö won pwül.

11 Kopwe föri ngeni ar kewe aramas tekia pwe repwe usun chök Orep me
Seep,

nge ar kewe samol meinisin repwe usun chök Sepa me Salmuna, ✱

12 Ir chokewe mi apasa, “Ousipwe angei fän itach

ekewe fanüen Kot pwe sipwe fanüeni.”

13 Ai Kot, kopwe föri pwe repwe usun chök pipisüsü,

pwal usun chök fetilipwas asepwäl a ässala.

14 Usun ekkei a kenala ewe wöllap,

usun ngetengeten ekkei a akkara ekewe chuk,

15 iei usun kopwe tapweriir ren om asepwäl mi pöchökül

o eniwokusuur ren om mölümöl.

16 Kopwe atoto wor säw,

pwe repwe küttok, ai Samol mi Lapalap.

17 Amwo repwe säw o nom lon niuokus watte tori feilfeilachök.

Amwo repwe mäla lon itengau.

18 Iwe, repwe silei pwe en ewe mi iteni Samol mi Lapalap,
en chök Ewe mi Unusen Tekia won unusen fanüfan.

84

Positi imwen Kot 84.1-12

Ngeni ewe mi emweni chon köl: Won pisekin ettik itan Kitit. Echö köl än
nöün Kora kewe mwän.

¹ Ai Samol mi Unusen Manaman, üa fokun efich imwom.

² Üa fokun positi ai üpwe nom lon imwen ewe Samol mi Lapalap,
ewer, üa aiengau ren.

Lelukei me inisi ra kölün pwapwa
ngeni ewe Kot mi manau.

³ Iwe, ewe nichok a küna lenian,
nge ewe ekiek a wor fasan
ia a tongeni anomu ie apanan,
ina usun üa küna leniei ünükün om kewe rongen asor,
ai Samol mi Unusen Manaman, ai king me ai Kot.

⁴ Ra feiöch ir mi nonom lon imwom,
ir mi kölün mwareituk fansoun meininis.

⁵ Ra feiöch ekewe aramas mi angei ar pöchökül senuk.
Ra chök ekieki lon leluker ar repwe fetal won ekewe al ngeni Sion.

⁶ Lupwen ra pwerela lon ewe lemolon kechü mi pwasapwas,
ra awili ngeni eu lenien puächen koluk.

Pwal ewe ütten leefen a pwölüela ewe lemol ren feiöch.

⁷ Ra fetal o pöpöchöküela
tori repwe küna ewe Kot mi lap seni ekewe kot meininis me lon Sion.

⁸ Ai Samol mi Lapalap, en ewe Kot mi Unusen Manaman,
kopwe aüselinga ai iotek, kopwe aü selingom, Maing än Jakob we Kot.

⁹ Ai Kot, kopwe afeiöchü äm king,
kopwe netiu won noum we mi kepit.

¹⁰ Pun ai nonom lon imwom lon ükükün eu chök rän
a mürina seni ai nonom ekis lon ükükün engeröü rän.

Üa efich ai üpwe nom lon asalapen imwen ai Kot,
lap seni ai üpwe nonom lon imwen ekewe aramasangau.

¹¹ Pun Kot ewe Samol mi Lapalap i ai saram, a apetiei seni ei feiengau.
A fangela ngenikich ümöümöch me iteüöch.

Ewe Samol mi Lapalap esap amwöchü och mi mürina
seni chokewe mi föri mine a pwüng.

¹² Ai Samol mi Unusen Manaman, a feiöch ewe aramas mi lükü en.

85

Eu iotek pwe Kot epwe ümöümöch ngeni chon Israel 85.1-13

Ngeni ewe mi emweni chon köl: Echö köl än nöün Kora kewe mwän.

¹ Ai Samol mi Lapalap, ka fen efich fanüom me lom,
ka aliwinisefäli ekewe chon Israel seni ar oola o awöüür.

² Ka amusala pwüngingauen noum aramas,

ka amusala ar tipis meinisin.

³ Ka aükätü om lingeringer ngeniir
o wes seni om song mi fokun lapalap.

⁴ Ai Kot, äm Chon Amanau, kopwe aliwinisefälükem
o aükätü om song ngenikem.

⁵ Ifa usun, kopwe song ngenikem tori feilfeilachök?
Ifa usun, kopwe chök sopwela le song ngeni ekewe täppin aramas mein-
isin?

⁶ Kose mochen kopwe amanauasefälükem,
pwe äm noum kewe aramas aipwe mwareituk.

⁷ Ai Samol mi Lapalap, kopwe pwäri ngenikem om we tong ellet
o fang ngenikem om manau.

⁸ Üpwe rongorong ngeni mine Kot a apasa.
A pwon pwe epwe awora kinamwe ngeni nöün kewe aramas, ngeni nöün
kewe mi pin,

are resap chüen liwinsefäl ngeni ar kewe föföör mi mwäl.

⁹ Ellet, a kaneto pwe epwe amanaua chokewe mi niuokusiti i,
pwe an ling epwe nonom lon fanüach.

¹⁰ Tong ellet me allükülük repwe chufengen,
pwüing me kinamwe repwe mitirifengeniir.

¹¹ Än aramas allükülük epwe feitä seni fanüfan,
nge än Kot pwüing epwe netiu seni läng.

¹² Ewer, ewe Samol mi Lapalap epwe fangeto mettoch mi mürina,
nge fanüach epwe awora räsimong.

¹³ Pwüing epwe akomwola mwen ewe Samol mi Lapalap,
pwe epwe föri efoch al fän itan.

86

Eu iotek pwe Kot epwe sopwela an ümöümöch

86.1-17

Eu än Tافیت iotek.

¹ Ai Samol mi Lapalap, kopwe aüselingaei o pälüeniei,
pun ngang eman aramas mi wöüingau o osupwang.

² Kopwe amwöchü manauai, pun ngang üa föri letipom.

Kopwe amanauaei, ngang noum chon ngang mi apilükülükuk, pun en
ai Kot.

³ Ai Samol, kopwe ümöümöch ngeniei,
pun ngang üa siö ngonuk iteiten rän.

⁴ Kopwe apwapwai leluken noum ei chon ngang,
ai Samol, pun üa suki ngonuk lelukei.

⁵ Pun en, ai Samol, ka kirikiröch o amusala tipis,
om tong ellet a somwosom ngeni meinisin mi iotek ngonuk.

⁶ Ai Samol mi Lapalap kopwe aü selingom ngeni ai iotek,
kopwe aüseling ngeni ai tünigor.

⁷ Lon ränin ai riaföü üpwe kökkörük,

pun en kopwe pälüeniei.

⁸ Esap fokun wor eman me lein ekewe kot usun en, ai Samol, esap pwal wor och föför mi wewe ngeni om kewe föför.

⁹ Chon ekewe mwü meinisin ka föriir repwe feito o fel ngonuk,

ai Samol mi Lapalap, repwe pwal alinga itom. ✱

¹⁰ Pun en ka tekia, ka föri mettoch mi amwarar, en echök Kot.

¹¹ Ai Samol mi Lapalap, kopwe aiti ngeniei mine ka mochen pwe üpwe föri.

Iwe, üpwe aleasochis ngonuk fän allükülük.

Kopwe fang ngeniei eu leluk esap tipekinikin, pwe üpwe niuokusiti itom.

¹² Ai Samol me ai Kot, üpwe kilisou ngonuk ren unusen lelukei, üpwe alinga itom tori feilfeilachök.

¹³ Pun om we tong ellet a fokun lapalap ngeniei, ka amanauaei seni epin lenien sotup.

¹⁴ Ai Kot, aramas mi lamalamtekia ra ü ngeniei, eu mwichen mwänewüs ra mochen nieila, ir chokewe resap ekieki en.

¹⁵ Nge en, ai Samol, eman Kot mi ümöümöch o kirikiröch, ka songomang o wöün tong ellet me allükülük.

¹⁶ Kopwe sap ngeniei o tongeei,

kopwe ngeni noum ei chon angang pöchökül o amanaua nöün noum we chon angang fefn mwän.

¹⁷ Kopwe pwäri ngeniei eu asisil pwe ka kirikiröch ngeniei, pwe chokewe mi oputaei repwe säw,

lupwen repwe küna pwe en ai Samol mi Lapalap ka alisiei o achipaei.

87

Feiöchün chokewe mi nonom lon Sion

87.1-7

Echö köl än nöün Kora kewe mwän.

¹ Kot a aüetä an we telinimw won ewe chuk mi pin.

² Ewe Samol mi Lapalap a aücheani Sion lap seni ekewe leni meinisin lon Israel.

³ A eäni pworaus mi amwarar usum, en telinimwen Kot.

⁴ Üpwe makei iten Isip me Papilon

lon tettelin ekewe mwü mi aleasochisiei,

pwal ekewe chon Filistia me Tirus me Itiopia

üpwe alearelong lein chokewe mi imweimw lon Jerusalem.

⁵ Nge usun Sion aramas repwe apasa

pwe chon ekewe mwü meinisin repwe nonom lon.

Iwe, Ewe mi Unusen Tekia epwe püsin anüküchara ewe telinimw.

⁶ Ewe Samol mi Lapalap epwe angei iteiten ekewe aramas,

epwe alearelong meinisin lon iteiten chon ewe telinimw Jerusalem.

7 Iwe, ekewe chon köl me chon pworuk ra apasa,
 “Äm kewe puächen kolukun manau ra nonom lomw.”

88

Eu iotekin tüngor ngasala seni mäla

88.1-18

Echö köl än nöün Kora kewe mwän. Ngeni ewe mi emweni chon köl Ei köl usun ngingin ewe sokun köl mi mang. Echö kölün kait än Heman eman mwirimwirin Esra.

¹ Ai Samol mi Lapalap, ai Kot mi amanauaei lerän me lepwin,
 üa siö ngonuk pwe kopwe alisiei.

² Amwo kopwe etiwa ai iotek,
 kopwe äüselinga ngeni ai siö.

³ Pun chomong riaföü ra toriei,
 pwe üa arap ngeni ai üpwe mäla.

⁴ Üa alealong lein chokewe mi tolong lon peias.
 Ngang eman mwän esap wor ai pöchökül.

⁵ Üa usun eman mi pöütüla me lein ekewe somä,
 usun ekewe mi ninnila ra kon lon peias,
 pwal usun chokewe en kosap chüen chechemeniir,
 pun ka ärirewu seni om tütümwün.

⁶ Ka aturueilong epin ewe peias,
 lon ewe leni mi rochopwak o alolol.

⁷ Om lingeringer a chouitiei,
 üa pwölüla fan usun chök ai pwölüla fän no.

⁸ Ka föri pwe chiechiei kewe ra likitieila.
 Ka föri pwe ngang och mettoch mi anioput me rer,
 üa mwöchülong lon fötek pwe üsap tongeni süla.

⁹ Mesei ra toputupula ren ai riaföü.
 Iteiten rän üa kökkörük, ai Samol mi Lapalap,
 üa aitetä pei ngonuk lon ai iotek.

¹⁰ Ifa usun, en ka föri manaman fän iten sotup?

Ifa usun, ir repwe tongeni ütä o mwareituk?

¹¹ Ifa usun, repwe apworausä om we tong ellet me lon peias,
 ika om allükülük me lon ewe leni mi ta?

¹² Ifa usun, ra silei usun om kewe manaman me lon lenien rochopwak,
 ika usun om kewe föförün pwüing me lon fanüen chokewe mi manlüküla?

¹³ Nge ngang, ai Samol mi Lapalap, üa siö ngonuk,
 iteiten lesosor üa iotek ngonuk.

¹⁴ Ai Samol mi Lapalap, pwota ka pöütieila,
 pwota ka aopa mesom seniei?

¹⁵ Üa apwangapwang o kan ngeni mäla seni lesäräföi,
 üa riaföü ren om kewe eniweniw o apilükingau.

¹⁶ Om lingeringer a pwölüeila,
 om kewe eniweniw ra afeiengauwaei.

¹⁷ Ra pwelifeilieie usun no iteiten rän,
 ra pwelieie o rongeila.

18 Ka föri pwe atongeei me chienei ra likitieila,
nge rochopwak chiechiei we mi fokun kan ngeniei.

89

Än Kot pwon ngeni Tafit

89.1-52

Echö kölün kait än Etan eman mwirimwirin Esra.

1 Ai Samol mi Lapalap, üpwe kölü om tong ellet tori feilfeilachök.

Üpwe arongafeili om allükülük ngeni ekewe täppin aramas meinisin.

2 Üpwe pwärätä pwe om tong ellet a nomopos tori feilfeilachök,
pwe om allükülük a nüküchar usun ekewe läng.

3 En ka apasa, “Üa eäni eu pwon ngeni ätewe üa filätä,
üa pwon fän akapel ngeni Tafit nei we chon angang:

4 Üpwe föri pwe mwirimwirum kana repwe king tori feilfeilachök
o anüküchara mwum tori ekewe täppin aramas meinisin.” ✱

5 Ai Samol mi Lapalap, ekewe läng repwe mwareiti om kewe manaman,
nge ewe mwichen chon pin kana repwe ingeiti om allükülük.

6 Pun esap wor eman lon läng mi wewe ngonuk en Samol mi Lapalap.
Esap wor eman me lein ekewe chon läng a usun chök en.

7 En ewe Kot ewe mwichen chon pin a niwelapeituk.

Ka kon eniwokus lap seni meinisin mi nom ünükumw.

8 Ai Samol mi Lapalap, en ewe Kot mi Unusen Manaman, iö a manaman
usun en?

Ai Samol mi Lapalap, ka allükülük lon mettoch meinisin.

9 En ka nemeni ewe matau mi nono.

Lupwen ekewe no ra pwotä, en ka alüaar.

10 Ka atatakisi Rahap * pwe a usun chök eman mi ninnila,
ka atoropasa ekewe chon oputom ren poum mi manaman.

11 Ekewe läng om, ewe fanüfan pwal om.

En ka föri fanüfan me masouan meinisin.

12 En ka förätä efeng me ör.

Ekewe chuk Tapor me Hermon ra mwareituk fän pwapwa.

13 En ka fokun manaman.

Poum a pöchökül, pöüfichum a ititä.

14 Pwüing me apwüing longolongun mumw,

tong ellet me allükülük a pwä lon meinisin mine ka föri.

15 Ra feiöch ekewe aramas mi silei ewe kölün mwareituk,
ir mi fetal lon saramen won mesom, ai Samol mi Lapalap.

16 Repwe mwareituk iteiten rän
o ingeiti om pwüing.

17 En ar ling me ar pöchökül.

Ren om kirikiröch mökürem a chimwetä.

18 Pun ewe mi tümwünükich nöün ewe Samol mi Lapalap,
ach king nöün Ewe mi Pin lon Israel.

19 Me lom en ka kapas ngeni noum we chon angang mi allükülük lon
künan o apasa,

✱ 89:4: 2.Sam 7.12-16; 1.Kron 17.11-14; Kölf 132.11; Föf 2.30 * 89:10: Rahap a aliosunätä Isip

“Üa alisi eman sounfiu mi pwora.

Üa seikätä eman alüal seni lein ekewe aramas.

²⁰ Üa awisa nei we chon angang Tafit pwe epwe king.

Üa epiti ren ai lö mi pin. ✧

²¹ Üpwe alisi i fansoun meinisin,
ai manaman epwe apöchöküla.

²² Ekewe chon oputan resap tongeni pwora ngeni,
nge ekewe aramasangau resap tongeni akufu.

²³ Üpwe atatakisi chokewe mi ü ngeni,
üpwe pwal niela chokewe mi oputa.

²⁴ Ai allükülük me tong ellet epwe nom ren,
nge i epwe chimwätä möküran pokiten itei.

²⁵ Ngang üpwe awisa pwe epwe nemeni ewe matau watte,
epwe pwal fokun nemeni ekewe chanpupu.

²⁶ Iwe, epwe apasa ngeniei, ‘En semei me ai Kot,
en ewe chon tümwünüei me ai Chon Amanau.’

²⁷ Üpwe filätä i pwe epwe nei mwänichi,
epwe tekia me lein ekewe kingen fanüfan. ✧

²⁸ Üpwe chök eäni ai tong ellet ngeni tori feilfeilachök,
nge ai pwon ngeni epwe nükünük.

²⁹ Üpwe föri pwe mwirimwirin kana repwe king tori feilfeilachök,
nge mwün epwe nonom ükükün fansoun än ekewe läng nonom.

³⁰ Nge are nöün kana resap aleasochis ngeni ai kewe allük,
resap pwal apwönüetä ai kewe pwüüng,

³¹ are repwe puri ai kewe allük
pwe resap tümwünüür,

³² mürin üpwe apwüngüür pokiten ar pupungau,
üpwe pwal ariaföüür pokiten ar tipis.

³³ Nge üsap ükütiu le tongei Tafit,
üsap pwal föri pwe ai allükülük ngeni epwe mwäl.

³⁴ Üsap atai ai pwon ngeni
ika siwili eu ai kewe kapas üa apasa ngeni.

³⁵ Fän eu chök üa pwon fän akapel ren ai pin, nge üsap pwal apinisefäli.
Üsap chofana ngeni Tafit.

³⁶ Epwe wor mwirimwirin Tafit tori feilfeilachök,
nge mwün epwe nonom mwei usun chök akkar a nom mwei.

³⁷ Epwe chök nonom tori feilfeilachök usun ewe maram a nonom,
iei ewe pisekin pwärätä mi allükülük fän läng.”

³⁸ Nge iei ka fokun song ngeni noum we mi kepit,
ka likitala o pöütala.

³⁹ Ka atai om we pwon ngeni noum we chon angang,
ka asapwilätü seni wisan wisen king.

⁴⁰ Ka ataetü tittin an telinimw meinisin
o atatakisi an kewe leni mi pöchökül.

⁴¹ Meinisin mi pwerela lükün ra soläni pisekin.

A küna turunufas me ren chon arun.

⁴² Ka fokun awinna chon ü ngeni,

ka föri pwe ekewe chon oputan meinsin ra pwapwa ren ar akufu.

⁴³ Ewer, ka föri pwe nöün ketilas esap wor nian, kosap pwal alisi lon maun.

⁴⁴ Ka angei seni lepöün wokun wokun king,

ka pwal aturätü lepüwül an lenien motun king.

⁴⁵ Ka föri pwe a chinlapala, lupwen a chüen alüal,

o pwölüla ren säw.

⁴⁶ Ai Samol mi Lapalap, ifa usun, kopwe aopok tori feilfeilachök?

Ifa ükükün fansoun om lingeringer epwe kü usun ekkei?

⁴⁷ Ai Samol mi Lapalap, kopwe chechemeni pwe ränin manaei a mochomoch,

pun ka föri aramas meinsin pwe repwe chök mäla.

⁴⁸ Ifa usun, meni aramas a tongeni manau, nge esap fokun mäla?

Iö a tongeni angasa manauan seni manamanen ewe lenien sotup?

⁴⁹ Ai Samol, ia a nom ie om tong ellet ka eäni me lom,

ewe tong ka pwon fän akapel ngeni Tafit ren om allükülük?

⁵⁰ Ai Samol, kopwe chechemeni usun ngang noum ei chon angang üa küna turunufas,

usun üa weires lon lelukei ren än chon ekewe mwü kapasen esit.

⁵¹ Ai Samol mi Lapalap, ekewe chon oputok ra turunufasei noum we king mi kepit,

ra turunufasei i ekis meinsin ia a fetal ie.

⁵² Ousipwe mwareiti ewe Samol mi Lapalap tori feilfeilachök!

Amen, Amen.

ARÜANÜN PUK

90

Kot a nom tori feilfeilachök, nge manauen aramas a chök mochomoch 90.1-17

Eu iotek än Moses ewe aramasen Kot.

¹ Ai Samol en äm lenien op seni eu täppin aramas tori eu täppin.

² Mwen ekewe chuk resamwo fis, pwal mwen kosamwo föri unusen fanüfan en chök Kot seni fansoun esepop tori fansoun esemüch.

³ Ka awili aramas ngeni pwül o üra,

“Ämi nöün aramas, oupwe liwinsefäliiti pwül.”

⁴ Pun engeröü ier ra usun chök eu rän me reöm,

ra usun chök ewe rän näneu a fen la, ika usun chök eu leülüngatin eu pwin. ✧

⁵ En ka angekaiela manauen aramas usun müttirin puun eu chanpupu.

Ra usun chök eu tan mi müttir manlüküla, ra pwal usun chök fetal mi märifötä lesosor.

⁶ Lesosor ewe fetal a aümanau o märifötä, nge lekuniol a aümämä o pwasala.

⁷ Pun äm aia rosola ren om song,
äm aia fokun niuokus ren om lingeringer.

⁸ Ka anomu äm pwüngingau me mwom,
äm tipis mi monola ka sârifâtâ pwe ka tongeni küneer.

⁹ Pun ränin manauem meinisin ra la senikem ren om lingeringer,
nge ierin manauem kewe ra müchüla usun eu ngasangas.

¹⁰ Iwe, ierin manauem ra tori fik,
nge are eman a pôchökül, a tori walik ier.
Nge lon ekewe ier a chök masou ren angang me weires.
Ra müttir wesila usun chök aia ässila.

¹¹ Nge iö a mefi manamanen om song,
nge iö a silei an epwe niuokusiti om lingeringer?

¹² Kopwe aiti ngenikem pwe aipwe eiteita ränin manauem mi mo-
chomoch,
pwe aipwe tipachemela.

¹³ Ai Samol mi Lapalap, kopwe kul ngenikem. Ifa ükükün fansoun kopwe
song ngenikem?

Kopwe tongei noum kewe chon angang.

¹⁴ Kopwe aurakem ren om tong ellet iteiten lesosor,
pwe aipwe köl o pwapwa lon ränin manauem meinisin.

¹⁵ Kopwe apwapwakem lon aükükün ekewe rän ka ariaföüükem lon,
pwal lon aükükün ekewe ier aia küna weires lon.

¹⁶ Kopwe pwäri ngeni noum kewe chon angang om kewe föföör,
pwal om manaman mi ling ngeni nöür kewe.

¹⁷ Äm Kot Samol mi Lapalap, om ümöümöch epwe nom wom.
Kopwe afisätâ angangen pöüm.

91

Nonom fän nürün Ewe mi Unusen Tufich

91.1-16

¹ Eman mi nom ren Ewe mi Unusen Tekia pwe epwe op ren
o nonom fän än Ewe mi Unusen Manaman tümwün,

² epwe kapas ngeni ewe Samol mi Lapalap,
“En ai lenien op me imwei imwen maun,
en ai Kot üa apilükülükük.”

³ Pun i epwe tümwünük seni ekewe feiengau meinisin mi monola senuk
o amanauok seni ewe mätter mi afeiengau,

⁴ epwe pwölü ngonuk pöün kewe pwe kopwe op fan.
An allükülük epwe tümwünük o epeti senuk feiengau.

⁵ Kosap niueiti eniweniwen lepwin
ika ekewe föün esefich mi äkkäs lerän lupwen maun,

⁶ ika ewe mätter mi akanif lerochopwak,
ika ewe samau mi akafeiengau leoloas.

⁷ Engeröü repwe turula lepekum,
nge engol ngeröü lepelifichum,
nge en kosap feiengau.

⁸ Kopwe chök nengeni ren mesom

o küna usun än ekewe aramasangau angei liwiningau.

⁹ Pokiten ka eäni ewe Samol mi Lapalap lenien op,
ka pwal fili Ewe mi Unusen Tekia pwe om chon tümwün,

¹⁰ iei mine esap wor och feiengau epwe toruk,
esap pwal wor och riaföü epwe arap ngeni imwom.

¹¹ Pun i epwe akünöü nöün chon läng kana pwe repwe tümwünuk,
repwe emwenuk won ekewe al meinisin ia kopwe feila ie. ✧

¹² Repwe pwisuk lepöür kana
pwe pecheöm esap chepeti fau. ✧

¹³ Kopwe ipwetiu won laion me serepenit,
kopwe purätü fän pecheöm ekewe nienifön laion me ekewe serepenit mi
poison. ✧

¹⁴ Ewe Samol mi Lapalap a apasa, “Pokiten a echeniei, ngang üpwe
amanaua,

üpwe tümwünü i, pun a silei itei.

¹⁵ Are epwe köriei, üpwe pälüeni.

Üpwe nom ren lon an riaföü,

üpwe angasa o aitöchü.

¹⁶ Üpwe alangatama ränin manauan pwe epwe menemen ren,
üpwe fokun amanaua.”

92

Sipwe mwareiti än Kot kirikiröch

92.1-15

Echö köl fän iten ewe ränin sapat.

¹ A mürina äm aipwe kilisou ngonuk, äm Samol mi Lapalap,
aipwe kölün mwareiti itom,
en Ewe mi Unusen Tekia.

² Iteiten lesosor aipwe arongafeili om tong ellet,
nge iteiten lepwin om allükülük,

³ fiti tikin pisekin ettik mi wor engol saitenin,
pwal fiti ngingin kitar.

⁴ Pun en, ai Samol mi Lapalap, ka apwapwaei ren om föföör.

Üa köl fän pwapwa ren mine en ka föri.

⁵ Ai Samol mi Lapalap, om kewe föföör ra fokun tekia,
om kewe ekiek ra fokun alolol.

⁶ Aramas mi tipate resap tongeni silei,
nge ir mi tiparoch resap tongeni wewe ren:

⁷ Inamwo are ekewe aramasangau ra mämäritä usun fetil,
nge ekewe chon föfööringau meinisin ra aümanau,
repwe chök fetal ngeni feiengau esemüch.

⁸ Nge en ai Samol mi Lapalap, ka tekia tori feilfeilachök.

⁹ Ai Samol mi Lapalap, ellet ekewe chon oputom repwe rosola,
nge ekewe chon föfööringau meinisin repwe toropasfeil.

¹⁰ En ka ngeniei pöchökül usun pöchökülen eman kow mi mwacho,

ka epiti ngeniei lö mi fö.

¹¹ Mesei ra küna usun än chon oputaei kuf,
selingei ra rongorong usun feiengauen ekewe aramasangau mi ü nge-
niei.

¹² Ekewe chon pwüing repwe aümanau usun ewe irä palm,
repwe mämäritä usun efoch irä setar won Lapanon.

¹³ Ra usun chök irä mi fotetiu lon imwen ewe Samol mi Lapalap,
repwe aümanauatä me lon än ach we Kot we imwenfel.

¹⁴ Ra chüen ua lon ar chinlap,

ra uren pöchökül o wowoöch fansoun meinisín,

¹⁵ pwe repwe arongafeili pwe ewe Samol mi Lapalap a wenechar.

I ai achau, esap wor och pwüingau a nom ren.

93

Kot a ling o manaman

93.1-5

¹ Ewe Samol mi Lapalap a nemenem,
a üföüf ngeni ling me manaman.

Ewer, fanüfan a nükünük,
esap fokun tongeni mwöküt seni lenian.

² Om lenien motun king a nüküchar seni me lomlom,
en ka nom seni fansoun esepop.

³ Ai Samol mi Lapalap, ekewe noon lematau ra tekiatä,
ekewe no ra atekiatä ngüngür, ekewe no ra atekiatä püngüpüngür.

⁴ Ewe Samol mi Lapalap mi nom pekitä a fokun manaman,
a pöchökül seni püngümongun chomong koluk,
a pöchökül seni nonon lematau.

⁵ Ai Samol mi Lapalap, om kewe allük ra fokun let,
imwom a fokun pin tori feilfeilachök.

94

*Eu iotek pwe Kot epwe liwini ngeni ekewe aramasangau chappen ar
föföringau*

94.1-23

¹ Ai Samol mi Lapalap, en ewe Kot mi ngeni aramas chappen ar
föföringau,

en ewe Kot mi ngeni aramas chappen ar föföringau, kopwe pwärukela.

² En soukapwüingün fanüfan,
kopwe ütä o liwini ngeni ekewe chon lamalamtekia ükükün ar föfö.

³ Ai Samol mi Lapalap, ifa ükükün fansoun än ekewe aramasangau repwe
tunosikesik?

⁴ Ekewe chon föföringau meinisín ra atowu kapasen lamalamtekia,
ra aingaing won ar föfö mi ngau.

⁵ Ai Samol mi Lapalap, ra atatakisi noum kewe aramas
o ariaföüü noum kana.

⁶ Ra niela ekewe fefin mi mä pwülüer me ekewe chon ekis
o nimanauei ekewe mi mäsen.

⁷ Iwe, ra apasa, "Ewe Samol mi Lapalap esap küna,
ewe Koten Israel esap silei."

- 8 Ämi mi fokun tipate me lein ekewe aramas, oupwe weweöch.
 Ämi mi tiparoch, inet oupwe tipachemela?
 9 Ifa usun, ewe mi förätä seling, esap püsin rongorong?
 Ifa usun, ewe mi föri mas, esap püsin küna?
 10 Ifa usun, ewe mi apwüngü chon ekewe mwü esap pwal apwüngüür?
 Ifa usun, ewe chon kait ngeni aramas esap silelap?
 11 Ewe Samol mi Lapalap a silei ekiekin aramas,
 a silei pwe ra pön chök. ✧
 12 Ai Samol mi Lapalap, a feiöch ewe mwän en ka amiriti,
 ätewe ka aiti ngeni om allük.
 13 Kopwe angasa seni an kewe riaföü,
 tori eu pwang a tu fän iten ekewe aramasangau.
 14 Iwe, ewe Samol mi Lapalap esap likitala nöün aramas,
 esap pwal pöütala chokewe a nöüniir.
 15 Angangen kapwüng epwe longolongsefäl won pwüng,
 nge meinisin mi wenechar lon leluker repwe tipeeu ngeni.
 16 Iö epwe ütä fän itei o ü ngeni ekewe aramasangau?
 Iö epwe nom won peki o ü ngeni ekewe chon föföringau?
 17 Are ewe Samol mi Lapalap esap alisieü,
 ngang üpwe müttir feila lon lenien sotup.
 18 Lupwen üa apasa, “Üpwe turula,”
 om tong ellet a amwöchüei, ai Samol mi Lapalap.
 19 Lupwen a wor chomong ai öürek,
 en ka achipaei o apwapwai lelukei.
 20 En kosap fokun tipeeu ngeni ekewe soukapwüng mi ngau,
 chokewe mi föri mine a pwüngingau, nge ra aita ngeni pwe iei pwüngün
 allük.
 21 Ra chufengen pwe repwe rawangauei ekewe chon pwüng
 o atipisi chokewe esap wor ar tipis, pwe repwe mäla.
 22 Nge ewe Samol mi Lapalap i imwei imwen maun,
 i ai Kot, ewe achau üa op fan.
 23 I epwe liwini ngeniir liwinin ar tipis
 o aroserela pokiten ar föföringau.
 Ewe Samol mi Lapalap ach Kot epwe aroserela.

95

Echö kölün mwareiti Kot o fel ngeni

95.1-11

- 1 Ou etto, ousipwe köl ngeni ewe Samol mi Lapalap.
 Ousipwe mweireir fän pwapwa ngeni Kot ewe mi tümwünükich.
 2 Ousipwe feito fän mesan fän kilisou,
 ousipwe mweireir fän pwapwa ngeni Kot ren kölün mwareiti i.
 3 Pun ewe Samol mi Lapalap eman Kot mi tekia,
 eman king mi tekia seni ekewe kot meinisin.
 4 Ekewe leni mi alolol won fanüfan ra nom lepöün,
 pwal ungen ekewe chuk an.
 5 An ewe matau, pun förian,
 pwal an ewe fanüpwias, pun afisian.

⁶ Ou etto, ousipwe chapetiu o fel ngeni,
ousipwe fotopwäsuk fän mesen ewe Samol mi Lapalap ewe chon förkich.

⁷ Pun i ach Kot,
nge kich nöün aramas i a tümwünü,
kich nöün mwichen sip i a foleni. ✱

Ikenai, are oupwe aüselinga alon,
⁸ ousap apöchöküla lelukemi usun a fis me lon Meripa,
usun a fis lon ewe rän me lon ewe fanüapö lon Masa, ✱

⁹ lupwen ämi kewe lewo ra sotunie, ra aleletaei,
nge ra fen küna ai kewe föföör üa föri fän iter. ✱

¹⁰ Lon ükükün faik ier üa song ngeni ei täppin aramas o üra,
“Ir eu mwichen aramas mi tokola leluker.
Resap fokun mochen aleasochisi ai kewe allük.”

¹¹ Iei mine üa pwon fän akapel lon ai song
pwe resap tongeni tolong lon ewe fanü
ia üpwe asösöör ie. ✱

96

Echö kölün mwareiti Kot
96.1-13
(1.Kron 16.23-33)

¹ Oupwe eäni echö köl mi fö ngeni ewe Samol mi Lapalap, oupwe köl
ngeni ewe Samol mi Lapalap, ämi chon fanüfan meinisin.

² Oupwe köl ngeni ewe Samol mi Lapalap, oupwe mwareiti i.
Oupwe arongafeili iteiten rän usun an amanau aramas.

³ Oupwe asilefeili an ling me lein chon ekewe mwü,
pwal an föföör mi amwarar me lein ekewe aramas meinisin.

⁴ Pun ewe Samol mi Lapalap a tekia. Sipwe alapala ach mwareiti i,
sipwe pwal niuokusiti i lap seni ekewe kot meinisin.

⁵ Pun än chon ekewe mwü kewe kot ra chök uluulun anümwäl.
Nge ewe Samol mi Lapalap a föri ekewe läng.

⁶ Iteüöch me manaman ra nonom mwan,
pöchökül me ling ra nonom lon imwan mi pin.

⁷ Oupwe mwareiti ewe Samol mi Lapalap, ämi chon ekewe mwü mein-
isin,

oupwe mwareiti än ewe Samol mi Lapalap ling me manaman.

⁸ Oupwe mwareiti lingen iten ewe Samol mi Lapalap.

Oupwe uwato eu asor o feito lon imwan.

⁹ Oupwe fel ngeni ewe Samol mi Lapalap fän üf mi pin.

Ämi chon fanüfan meinisin, oupwe chech me mwan. ✱

¹⁰ Oupwe apasa me lein chon ekewe mwü, “Ewe Samol mi Lapalap a
nemënem.

Ewer, fanüfan a fokun nükünük, esap tongeni mwöküt seni lenian.

Kot epwe apwüngü chon ekewe mwü fän wenechar.”

¹¹ Ekewe läng repwe pwapwa, nge fanüfan epwe meseik.

Matau epwe ngüngü, pwal meinisin mine a nonom lon.

¹² Ekewe mälamäl repwe mweireir, pwal meinisin mine a nom lor.

✱ 95:7: Ipr 3.7-11 ✱ 95:8: Ipr 3.15; 4.7 ✱ 95:9: Eks 17.1-7; Num 20.2-13 ✱ 95:11: Num
14.20-23; Tut 1.34-36; Ipr 4.3,5; Tut 12.9-10 ✱ 96:9: Kölf 29.1-2

Mürin, ekewe irän lein wöllap meinisin repwe köl fän pwapwa
 13 fän mesen ewe Samol mi Lapalap, pun i epwe feito,
 epwe feito pwe epwe apwüngü chon fanüfan.
 Epwe apwüngü fanüfan fän pwüng, pwal ekewe aramas fän let.

97

Än Kot nemenem me manaman
 97.1-12

- 1 Ewe Samol mi Lapalap a nemenem, fanüfan epwe meseik,
 ekewe fanüen lematau meinisin repwe pwapwa.
- 2 Kuchu me rochokich ra pveli ünükün Kot,
 pwüng me apwüng longolongun an nemenem.
- 3 Ekkei a akomwola mwan
 o kenala chon oputan mi nom ünükün.
- 4 An kewe fifi ra asarama fanüfan,
 chon fanüfan ra küna o chechek.
- 5 Ekewe chuk ra telila usun kiris me fän mesen ewe Samol mi Lapalap,
 me fän mesen ewe Samol mi nemeni unusen fanüfan.
- 6 Ekewe läng ra asilefeili an pwüng,
 nge chon ekewe mwü meinisin ra küna an ling.
- 7 Aramas meinisin mi fel ngeni ekewe uluulun anümwäl repwe küna säw,
 pwal chokewe mi aingaing won ekewe anümwäl esap wor aüchear.
 Ekewe kot meinisin ra chapetiu me mwen ewe Samol mi Lapalap.
- 8 Sion a rongorong ei o pwapwa.
 Ekewe telinimwen Juta ra meseik
 pokiten om kewe apwüng, ai Kot.
- 9 Pun en, ai Samol mi Lapalap, ka fokun tekia won unusen fanüfan,
 ka fokun tekia lap seni ekewe kot meinisin.
- 10 Ewe Samol mi Lapalap a echeni chokewe mi oput mine a ngau.
 A tümwünü manauen nöün kewe chon pin
 o angaseer seni ekewe aramasangau.
- 11 Saram a tinetiu won ekewe chon pwüng,
 nge pwapwa a tori chokewe mi wenechar leluker.
- 12 Oupwe kilisou ngeni o mwareiti itan mi pin.

98

Mwareiti än Kot pwüng
 98.1-9

- Echö köl.
- 1 Oupwe eäni echö köl mi fö ngeni ewe Samol mi Lapalap,
 pun a föri mettoch mi amwarar.
 An manaman me an pöchökül mi pin ra afisätä an win.
 - 2 Ewe Samol mi Lapalap a asile ngeni aramas an win,
 a pwärätä an pwüng me fän mesen chon ekewe mwü.
 - 3 A chechemeni an tong ellet me an allükülük ngeni chon Israel.
 Aramasen fanüfan meinisin ra küna usun än Kot amanaua aramas.
 - 4 Oupwe eäni eu mweireiren pwapwa ngeni ewe Samol mi Lapalap, ämi
 chon fanüfan meinisin.
 Oupwe chietä echö kölün pwapwa me kölün mwareiti Kot.

5 Oupwe kölün mwareiti ewe Samol mi Lapalap
fän ükülele, pwal fän sokopaten pisekin ettik.

6 Oupwe eäni eu mweireiren pwapwa fän rappwa me puun sewi
me fän mesen ewe King, ewe Samol mi Lapalap.

7 Ewe matau epwe ngüngü, pwal mönūmanau meinisin mi nom lon.
Fanüfan epwe köl, pwal aramas meinisin mi nom won.

8 Ekewe koluk repwe alopolog,
ekewe chuk repwe kölfengen fän pwapwa.

9 Repwe köl me fän mesen ewe Samol mi Lapalap,
pun epwe feito o apwüngü chon fanüfan.

Epwe apwüngü chon ekewe mwü fän pwüng me wenechar.

99

Än Kot allükülük ngeni chon Israel

99.1-9

1 Ewe Samol mi Lapalap a nemenem. Chon ekewe mwü ra chechech.
A mot won an lenien motun king asen ekewe kerop.

Fanüfan a chechech. ✧

2 Ewe Samol mi Lapalap a tekia me lon Sion,
a fokun tekia seni chon ekewe mwü meinisin.

3 Aramas meinisin repwe mwareiti itan mi tekia o eniwokus.
Kot a pin.

4 En king mi manaman, ka efich pwüng.

Ka anüküchara mine a wenechar,
ka föri mine a pwüng me wenechar lon Israel.

5 Oupwe ingeiti ewe Samol mi Lapalap ach Kot,
oupwe fel ngeni me mwen alongolongun pechen.

I a pin.

6 Iwe, Moses me Aaron ra nom lein nöün kewe souasor,
pwal Samuel a nom lein chokewe mi köri itan.

Ra iotek ngeni ewe Samol mi Lapalap, nge i a pälüeniir.

7 A kapas ngeniir seni lon ewe ürekuchu.

Ra aleasochisi an kewe kapasen pwärätä me ekewe allük i a ngeniir. ✧

8 Ai Samol mi Lapalap äm we Kot, en ka pälüeni än noum aramas iotek.

En eman Kot mi amusala ar tipis,
inamwo ika ka apwüngüür ren ar föföri mi mwäl.

9 Oupwe ingeiti ewe Samol mi Lapalap ach we Kot
o fel ngeni me arun chukun we mi pin,

pun ewe Samol mi Lapalap ach Kot a pin.

100

Sipwe kilisou ngeni Kot

100.1-5

Echö köl fän iten asoren kilisou.

1 Oupwe eäni eu mweireiren pwapwa ngeni ewe Samol mi Lapalap, ämi
chon fanüfan meinisin.

2 Oupwe angang ngeni ewe Samol mi Lapalap fän pwapwa,

oupwe feito fän mesan ren kölün pwapwa.

³ Oupwe silei pwe ewe Samol mi Lapalap i Kot.
I ewe a förökich, nge kich sa nöün.
Sa nöün aramas me nöün sip lon an we mälämäl.

⁴ Oupwe tolong lon asamen imwan fän kilisou,
oupwe tolong lon runwen imwan kewe fän kölün mwareiti i.
Oupwe kilisou ngeni o mwareiti itan.

⁵ Pun ewe Samol mi Lapalap a kirikiröch,
an tong ellet a nonom tori feilfeilachök,
nge an allükülük a tori ekewe täppin aramas meinsin. ✧

101

Eu pwon usun manau fän pwüing

101.1-8

Echö än Tafit Köl.

¹ Üpwe köl usun allükülük me pwüing.

Üpwe köl ngonuk, ai Samol mi Lapalap.

² Üpwe afäliei pwe üsap föri tipis.

Inet kopwe feito rei?

Üpwe manaueni eu manau mi limöch me lein chon leimwei.

³ Üsap anomu ai ekiek won mettoch mi ngau.

Üa oput föförün ekewe chon tipis.

Ar föför esap fokun fitipacheitiei.

⁴ Eman mi ulöförea lelukan epwe toau seniei.

Üsap fokun efich föför mi ngau.

⁵ Eman mi aitengaua chon arun lemonomon

üpwe niela.

Eman aramas mi wolamalamtekia o sikesik
üsap etiwa.

⁶ Üpwe flätä chokewe mi allükülük lon ewe fanü
pwe repwe nom rei.

Chokewe mi fokun wenechar
repwe angang ngeniei.

⁷ Esap wor eman mi föri föförün atuputup epwe nom lon imwei,
nge eman mi kapas chofana esap tongeni nonom fän mesei.

⁸ Iteiten lesosor üpwe niela

ekewe aramasangau lon ewe fanü,

üpwe ärala meinsin mi föri mine a ngau
me lon telinimwen ewe Samol mi Lapalap.

102

Eu siön riaföü

102.1-28

Eu iotek seni eman mi nom lon riaföü, lupwen a apwangapwang o
apasätä an kewe riaföü me fän mesen ewe Samol mi Lapalap.

✧ 100:5: 1.Kron 16.34; 2.Kron 5.13; 7.3; Esr 3.11; Kölf 106.1; 107.1; 118.1; 136.1; Jer 33.11

1 Kopwe aüselinga ai iotek, ai Samol mi Lapalap,
ai siö epwe toruk.

2 Kosap aopala mesom seniei,
lupwen üa nom lon riaföü.
Kopwe aü selingom ngeniei
o müttir pälueniei, lupwen üa köruk.

3 Pun ränin manau ei ra feil seniei usun och ötüöt,
inisi a kar usun efoch wes mi kü.

4 Lelukei a tatakis usun fetil mi pöküpök o pwasapwas.

Üsap chüen mwon mongö.

5 Pokiten ai leüömong le ngüngü
üa kichüchüla pwe chüi ra pwäwu.

6 Üa usun eman fukuron fanüapö,
pwal usun eman fukuro mi nom lon ekewe leni mi tatakis.

7 Üa kon nge nennela,
üa usun eman machang mi akaleman won ungen eu imw.

8 Iteiten fansoun chon oputaei ra takirin ämängauaei,
chokewe mi kapasingau usi ra eäni itei le ottek.

9 Üa mongö falang usun üa mongö pilawa,
ünümei koluk a nofit ngeni chönün mesei

10 pokiten watten om lingeringer.

Pun en ka angeei o pöütiela.

11 Ränin manau ei ra usun chök nürün och mettoch lekuniol,
üa aiolol usun fetil.

12 Nge en, ai Samol mi Lapalap, ka nemenem tori feilfeilachök.
Kopwe chem me ren ekewe täppin aramas meinisin.

13 En kopwe ütä o eäni tong ngeni Sion.
A tori fansoun om kopwe ümöümöch ngeni,
ewe fansoun ka pwoneela a war.

14 Pun noum kewe chon angang ra aücheani föün Sion
o tongei pwülün mi moromor.

15 Chon ekewe mwü repwe meniniti ewe Samol mi Lapalap,
nge ekewe kingen fanüfan meinisin repwe niuokusiti an ling.

16 Pun ewe Samol mi Lapalap epwe aüsefälietä Sion,
i epwe pwä lon lingan.

17 Epwe aüselinga än ekewe chon riaföü iotek,
nge esap turunufasei ar tüngor.

18 Ei pworaus epwe mak fän iten ewe täppin aramas epwe uputiü,
pwe ekewe aramas resamwo uputiü repwe mwareiti ewe Samol mi
Lapalap:

19 Ewe Samol mi Lapalap a nennetiü seni lenian mi pin o tekia,
seni läng a nennetiü fanüfan,

20 pwe epwe rongorong ngüngün ekewe chon fötek
o apichi ririn chokewe mi fen pwüngüla pwe repwe ninnila.

21 Iwe, aramas repwe pwärätä iten ewe Samol mi Lapalap me lon Sion,
nge me lon Jerusalem repwe mwareiti i,

22 lupwen chon ekewe mwü repwe chufengen

pwe repwe fel ngeni ewe Samol mi Lapalap.

²³ Iwe, Kot a akisikisätiau ai pöchökül lupwen ai chüen alüal,
a amochomochala ränin manauai.

²⁴ Üa apasa, “Ai Kot, kosap angeeila me lukalapen ränin manauai,
en ewe mi manau tori feilfeilachök.”

²⁵ Me lomlom en ka föri longolongun fanüfan,
nge ekewe läng förien poum kana.

²⁶ Ir repwe tala, nge en kopwe nonom fochofoch.

Ir repwe mesila usun echö üf.

Ka siwiliir usun eman a siwili üfan,
iwe, repwe morola.

²⁷ Nge en ka ususum we chök,

manauom esap müchüla. ✧

²⁸ Nöün noum kewe chon angang repwe nonom fän kinamwe,
nge mwirimwirir repwe nonomöch me mwom.

103

Mwareiti Kot ren an afeiöchü aramas

103.1-22

Echö än Tafit köl.

¹ Ngüni, kopwe mwareiti ewe Samol mi Lapalap,
leuti meinisin, kopwe mwareiti itan mi pin.

² Ngüni, kopwe mwareiti ewe Samol mi Lapalap,
kosap manlükala an kirikiröch ngonuk.

³ A amusala ai tipis meinisin

o amoela ai apwangapwang meinisin,

⁴ a angasaei seni peias

o ämwärämwära ngeniei tong ellet me ümöümöch,

⁵ a amasoua manauai ren mettoch mi mürina,

pwe üpwe liwiniti pöchökülen le säräfoi usun eman ikel.

⁶ Ewe Samol mi Lapalap a pwüing lon an föföör,

a eäni kapwüing fän pwüing ngeni chokewe meinisin mi küna riaföü.

⁷ A pwäri ngeni Moses an kewe akot

o aküna ngeni ekewe aramasen Israel an kewe föföör.

⁸ Ewe Samol mi Lapalap a lukpwetete o kirikiröch,

a songomang o wöün tong ellet. ✧

⁹ Esap apwüingü aramas fansoun meinisin,

esap pwal amwöchü an song tori feilfeilachök.

¹⁰ Esap föri ngenikich ükükün ach tipis,

esap pwal liwini ngenikich ükükün ach föföoringau.

¹¹ Pun usun ekewe läng ra tekia seni fanüfan,

iei usun an we tong ellet a tekia ngeni chokewe mi niuokusiti i.

¹² Pun usun meserän a toau seni epilen,

iei usun a atoauala ach pupungau senikich.

¹³ Usun eman sam a tongei nöün kana,

iei usun ewe Samol mi Lapalap a tongei chokewe mi niuokusiti i.

¹⁴ Pun a silei sokosokuch,

a chemeni pwe kich pwül echök.

¹⁵ Iwe, ränin manauen aramas a wewe ngeni fetil,
a sol usun epö pöön irän lemäl.

¹⁶ Are asepwäl a eniti, a ässala,
nge esap chüen wor eman epwe künasefäli.

¹⁷ Nge än ewe Samol mi Lapalap tong ellet a nom seni me lomlom tori
feilfeilachök won chokewe mi niuokusiti i,
nge an pwüing a tori nöür me nöün nöür,

¹⁸ ir chokewe mi apwönüetä an we pwon
o chechemeni ar repwe aleasochisi an kewe allük.

¹⁹ Iwe, ewe Samol mi Lapalap a anüküchara an lenien motun king me lon
ekewe läng,

mwün a nemeni unusen fanüfan.

²⁰ Oupwe mwareiti ewe Samol mi Lapalap, ämi nöün chon läng kana,
ämi mi pwora o aleasochisi an kapas,
ämi mi äüselinga alon.

²¹ Oupwe mwareiti ewe Samol mi Lapalap, ämi chon an kewe mwich
meinsin lon läng,

ämi nöün kewe chon angang mi föri letipan.

²² Oupwe mwareiti ewe Samol mi Lapalap, ämi förian kana meinsin
lon ekewe leni meinsin mi nom fän nemenian.
Ngüni, kopwe mwareiti ewe Samol mi Lapalap.

104

Kot a tümwünü förian kana

104.1-35

¹ Ngüni, kopwe mwareiti ewe Samol mi Lapalap.

Ai Samol mi Lapalap ai Kot, en ka fokun tekia.

Ka üföüf ngeni iteüöch me manaman

² o pwölü ngonuk saram usun echö üf.

Ka ameresala ekewe läng usun eu imw mangaku

³ o aüetä imwom won ekewe koluk.

Ka föri ekewe kuchu pwe woom woken,

o sai won pöükässin asepwäl.

⁴ Ka akünöü ekewe asepwäl pwe noum chon künö,

o nöüni chon angang ngetengeten ekkei. ✱

⁵ Ka anükätü fanüfan won longolongun kewe,
pwe esap fokun mwökütüküt tori feilfeilachök.

⁶ Ka pwölüela fanüfan ren matau mi alolol usun ren echö üf,
ekewe koluk ra nom asen ekewe chuk,

⁷ lupwen ka apwüingü ekewe koluk, ra süla.

Ra müttir sü ren püngün om chopulap.

⁸ Ra pula won ekewe chuk o putiu lon ekewe lemol
ngeni ewe leni en ka amolätä fän iter.

⁹ Ka föri eu kiä pwe ekewe koluk resap tongeni kusula,
resap pwal chüen pwölüela fanüfan.

¹⁰ Ka ammichätä puächen koluk me lon ekewe lemol.

✱ 104:4: Ipr 1.7

Chanpupu ra pula lefilen ekewe chuk,

11 pwe ekewe manmwacho meinisin lon ekewe lemäl ra ün seni,
ekewe aas mi mwacho ra ün seni pwe a mola ar kaka.

12 Ekewe machang ra fas won ekewe irä mi mär ünükün ekewe koluk,
ra tik me lein palen ekewe irä.

13 Seni won leniom mi tekia ka achöchönü ekewe chuk.

Fanüfan a urela ren om kewe feiöch.

14 En ka amärätä fetil fän iten ekewe kow,
pwal irä fän iten aramas pwe repwe fotukätü,
pwe epwe wor ener seni ewe fanü.

15 Iwe, epwe wor wain pwe aramas repwe ün o pwapwa,
epwe wor lö pwe repwe emmisi ngeni won meser,
pwal pilawa pwe repwe mongö o pöchökül ren.

16 Än ewe Samol mi Lapalap irä ra chöchön ren chomong üt,
ekewe setar won Lapanon i a fotukätü.

17 Ekewe machang ra senätä faser wor,
ewe öröpwech a lenieni ewe irä itan pain.

18 Ekewe kuuch mi mwacho ra lenieni ekewe chuk tekia,
ekewe man iter pächer ra op fän ekewe achau.

19 Ka föri ewe maram pwe epwe asisillätä ekewe fansoun,
akkar a silei fansoun an epwe tuputü.

20 Ka föri pwin pwe lon kirochan
ekewe manmwacho lein wöllap meinisin ra towu seni lenier.

21 Ekewe nienifön laion ra wörüwör, lupwen ra kütta liaper,
ra kütta ener me ren Kot.

22 Lupwen akkar a tötä, ra liwiniti lenier
o konola lon pwanger.

23 Mürin, aramas ra feila ngeni ar angang,
ra angang tori lekuniol.

24 Ai Samol mi Lapalap, ra fokun chomong
ekewe mettoch ka föri. Ka föriir meinisin lon om tipachem.

Fanüfan a ur ren föriom mönümanau meinisin.

25 Ikenan a wor ewe matau mi lapalap o chölap,
a masou ren chomong mönümanau
mi watte me kükün rese lea.

26 Ekewe sip ra saifetal won, pwal ewe man itan Lefiatan,
en ka föri, a kukulou lon. ✧

27 Ekei mönümanau meinisin ra lükülükuk
pwe kopwe ngeniir ener mongö lon fansoun fich.

28 Lupwen ka ngeniir ener mongö, ra ionifengeni,
lupwen ka suki poum, ra mongö o möt ren.

29 Nge lupwen ka aopa mesom seniir, ra niuokus,
lupwen ka angei seniir ngasangaseer,
ra mäla o liwiniti pwül moromor.

30 Lupwen ka tinato Ngünnum, ra fisitä.

En ka försefäli fanüfan.

✧ 104:26: Hiop 41.1; Kölf 74.14; Ais 27.1

³¹ Amwo lingen ewe Samol mi Lapalap epwe nom tori feilfeilachök, amwo ewe Samol mi Lapalap epwe meseikeiti an föför.

³² Lupwen a netiu won fanüfan, fanüfan a chehech.
Lupwen a atapa ekewe chuk, ra ötüt.

³³ Üpwe köl ngeni ewe Samol mi Lapalap lon ränin manau ei meinsin.
Üpwe kölün mwareiti ai Kot lupwen ai manau.

³⁴ Amwo ai ekinlon epwe apwapwai letipen ewe Samol mi Lapalap, pun üa meseikeiti i.

³⁵ Ekewe chon tipis repwe rosola seni won fanüfan, nge ekewe aramasangau repwe mochola.
Ngüni, kopwe mwareiti ewe Samol mi Lapalap.
Ousipwe mwareiti ewe Samol mi Lapalap.

105

An Kot kewe manaman a föri fän iten chon Israel

105.1-45

(1.Kron 16.8-22)

¹ Oupwe kilisou ngeni ewe Samol mi Lapalap, oupwe köri itan.
Oupwe asilefeili an kewe föför lein chon ekewe mwü.

² Oupwe köl ngeni, oupwe kölün mwareiti i,
oupwe apworaus a an kewe föför meinsin mi amwarar.

³ Oupwe fokun ingemwareiti itan mi pin.
Chokewe mi kütta ewe Samol mi Lapalap repwe meseik.

⁴ Oupwe kütta ämi alilis me ren ewe Samol mi Lapalap,
oupwe kütta i fansoun meinsin.

⁵ Oupwe chechemeni ekewe föför mi amwarar a föriir.

Oupwe chechemeni an kewe manaman me an kewe kapwüing a eäni,

⁶ ämi mwirimwirin Apraham nöün Kot we chon angang,
ämi mwirimwirin Jakop kewe, ätewe mi fil me ren.

⁷ Ewe Samol mi Lapalap i ach we Kot,

an kewe allük ra fän iten unusen fanüfan.

⁸ I a chechemeni an we pwon tori feilfeilachök,
an we kapas a anüküchara ngeni engeröü täppin aramas.

⁹ A chechemeni ewe pwon a eäni ngeni Apraham,
ewe pwon a eäni fän akapel ngeni Isaak. ✱

¹⁰ A anüküchara ewe pwon ngeni Jakop pwe eu allük,
pwal eu pwon esemüch.

¹¹ Iwe, a apasa, “Üpwe ngonuk ewe fanü Kanaan
pwe fanüom.” ✱

¹² Lupwen nöün Kot kewe aramas ra fokun chokükün,
lupwen ra chon siamü lon ewe fanü Kanaan

¹³ o saifetal seni eu fanü tori pwal eu fanü,
seni eu mwü tori pwal eu mwü,

¹⁴ Kot esap mwüt ngeni eman pwe epwe ariaföüür.
A apwüingü ekewe king pokiter

¹⁵ o apasa, “Ousap atapa nei kewe mi fil,
ousap afeiengaua nei kewe soufos.” ✱

16 Lupwen ewe Samol mi Lapalap a awarato eu lengita won ewe fanü
o angei seniir ener mongö meinisin, ✨
17 a tinala eman mwän itan Josef epwe akom mwer,
ätewe ra amömöla pwe epwe eman amanau. ✨
18 Pechen ra föfö ren selimächä,
nge üan a katolong lon efoch ring seni mächä,
19 tori a fis mine a fen apasa,
nge än ewe Samol mi Lapalap we kapas a alletätä pwe a pwüing. ✨
20 Mürin, ewe kingen Isip a tinala eman pwe epwe amusa Josef,
ewe mi nemeni ekewe mwü a angasala i. ✨
21 A seikätä i pwe epwe samol lon imwan
o nemeni mettochun meinisin. ✨
22 Epwe nemenem won nöün kewe samol
o aiti ngeni nöün kewe souakom tipachem.

23 Mürin, Jakop a feila Isip
o siamü lon ewe fanü. ✨
24 Nge ewe Samol mi Lapalap a fokun achomonga nöün kewe aramas
o apöchöküleer lap seni chon oputeer.
25 A akulu leluken chon Isip, pwe ra oput nöün kewe aramas
o eäni rawangau ngeni nöün kewe chon angang. ✨
26 Mürin, Kot a tinala Moses nöün we chon angang
me Aaron ätewe i a filätä. ✨
27 Ir ra föri an kewe asisil me manaman
me lein ekewe aramas me lon ewe fanü Isip.
28 Kot a tinala rochopwak o arochokichi ewe fanü,
nge ekewe chon Isip ra chök ü ngeni an kewe kapas. ✨
29 Iwe, a awili ngeni cha ar kewe koluk,
pwe ekewe ikenen lor ra mäla. ✨
30 Fanüer a ur ren kairü,
ra mwo nge tolong lon imwen ar we king. ✨
31 Kot a kapas, nge ra war chomong pwiin loong,
pwal nikken ra nom lemenen fanüer. ✨
32 A apüngätü wor ütten fau akasiwilin üt,
pwal fifi a fi ekis meinisin won fanüer,
33 Kot a atai ar irän wain me ar irä fik
o atatakisi irän fanüer meinisin. ✨
34 Iwe, a kapas, nge ekewe lifichimas ra war,
pwal ekewe kükün lifichimas resap lea.
35 Ra eni meinisin mine a mär me won fanüer
o eni uän fotar irä. ✨
36 Iwe, a niela ekewe mwänichi meinisin me lon fanüer,
chokewe ra nöüniir lupwen ar pöchökül. ✨
37 Mürin, Kot a emwenawu chon Israel
fän silifer me kolt.
Esap wor eman me lein chon ar kewe ainang a apwangapwang.
38 Iwe, chon Isip ra pwapwa, lupwen chon Israel ra towu,

✨ **105:16:** Ken 41.53-57 ✨ **105:17:** Ken 37.28; 45.5 ✨ **105:19:** Ken 39.20-40.23 ✨ **105:20:** Ken 41.14 ✨ **105:21:** Ken 41.39-41 ✨ **105:23:** Ken 46.6; Ken 47.11 ✨ **105:25:** Eks 1.7-14 ✨ **105:26:** Eks 3.1-4.17 ✨ **105:28:** Eks 10.21-23 ✨ **105:29:** Eks 7.17-21 ✨ **105:30:** Eks 8.1-6 ✨ **105:31:** Eks 8.20-24; Eks 8.16-17 ✨ **105:33:** Eks 9.22-25 ✨ **105:35:** Eks 10.12-15 ✨ **105:36:** Eks 12.29

pun ra fokun niuokusitiir. ✧

³⁹ Kot a anomu eu kuchu wor pwe pwölüpwölür,
pwal eu ekkei, pwe epwe asarameer lepwin. ✧

⁴⁰ Ra tünigor, nge i a awarato ekewe machang iter kweil,
a ngeniir mongö mi chomong seni läng. ✧

⁴¹ A asangafeseni ewe achau pwe koluk a puwu seni,
a pulong lon ewe fanüapö usun eu chapupu. ✧

⁴² Pun Kot a chechemeni an we pwon mi pin
a eäni ngeni nöün we chon angang Apraham.

⁴³ Iei mine a emwenawu nöün kewe aramas mi fil
fän pwapwa me mweireiren köl.

⁴⁴ Iwe, a ngeniir fanüen chon ekewe mwü,
nge ir ra fanüeni ewe fanü o feiöchüni än ekewe aramas angang. ✧

⁴⁵ Ei a fis pwe nöün kewe aramas repwe aleasochisi an kewe pwüüng
o apwönüetä an kewe allük.

Ousipwe mwareiti ewe Samol mi Lapalap.

106

*Än Kot kirikiröch ngeni nöün aramas me ar ü ngeni
106.1-48*

¹ Ousipwe mwareiti ewe Samol mi Lapalap.

Oupwe kilisou ngeni ewe Samol mi Lapalap, pun i a kirikiröch,
an tong ellet a nonom tori feilfeilachök. ✧

² Iö a tongeni apworausä än ewe Samol mi Lapalap föföör mi manaman?
Iö a tongeni anafa an mwareiti i?

³ Ra feiöch chokewe mi aleasochisi an kewe allük
o föri mine a pwüng fansoun meinisin.

⁴ Ai Samol mi Lapalap, kopwe chechemeniei, lupwen ka pwäri om
kirikiröch ngeni noum aramas.

Kopwe pwal ochueilong, lupwen ka amanaueer,

⁵ pwe üpwe tongeni küna feiöchün noum kewe mi fil

o eti chon mwum lon ar pwapwa,

üpwe pwal eti noum aramas kana le mwareituk.

⁶ Äm aia tipis usun chök äm kewe lewo.

Äm aia föri föföör mi ngau o apwönüetä föföör esepwüng.

⁷ Lupwen äm kewe lewo ra nom lon Isip, resap ekieki än Kot kewe föföör
mi amwarar,

resap pwal chechemeni an tong ellet mi lapalap,

nge ra ü ngeni Ewe mi Unusen Tekia me arun ewe Setipar. ✧

⁸ Nge Kot a amanaueer fän püsin itan

pwe epwe pwärätä an manaman mi pöchökül.

⁹ A allük ngeni ewe Setipar pwe a pwasatä,

a emwenirelong epin ewe matau usun lon eu fanüpwas.

¹⁰ A amanaueer seni chon pälieniir

o angaseer seni chon oputeer.

✧ **105:38:** Eks 12.33-36 ✧ **105:39:** Eks 13.21-22 ✧ **105:40:** Eks 16.2-15 ✧ **105:41:** Eks 17.1-7; Num 20.2-13 ✧ **105:44:** Jos 11.16-23 ✧ **106:1:** 1.Kron 16.34; 2.Kron 5.13; 7.3; Esr 3.11; Kölf 100.5; 107.1; 118.1; 136.1; Jer 33.11 ✧ **106:7:** Eks 14.10-12

11 Ewe sät a pwölüela ekewe chon ü ngeniir,
pwe esap wor eman mi chüen manau.

12 Mürin, ra lükü an kewe kapasen pwon
o kölün mwareiti i. ✱

13 Nge chon Israel ra müttir manlükala an kewe föföör,
resap awiti an öüröür.

14 Ra fokun mwäräkich me lon ewe fanüapö
o sotuni Kot lon ewe fanüpwäs.

15 Iei mine a ngeniir mine ra tünigor,
nge a pwal tinato eu mätter mi afeiangau leir. ✱

16 Ikenan lon ewe fanüapö ekoch me leir ra lolowo ngeni Moses
me Aaron, ätewe ewe Samol mi Lapalap a apini.

17 Mürin, ewe pwül a sangfesen o oromala Tatan,
a pwal pwölüela Apiram me an we mwich.

18 Ekkei a pwal ngetewu me lein chokewe mi etiir
o kenala ekewe aramasangau. ✱

19 Iwe, ra föri eu uluulun nienifön kow me lon Horep
o fel ngeni ewe uluulun anümwäl seni mächä.

20 Ra akasiwili ewe lingen Kot
ngeni uluulun eman kow mi mongö fetil.

21 Ra manlükala Kot ar Chon Amanau
mi föri föföör mi manaman me lon Isip.

22 A föri föföör mi amwarar me ikenan,
pwal mettoch mi eniwokus me arun ewe Setipar.

23 Iei mine Kot a apasa pwe epwe aroserela.
Nge Moses nöün we chon angang mi fil a ütä lefler me Kot,
pwe epwe asepa an lingeringer, pwe esap aroserela. ✱

24 Mürin, ra oput ewe fanü mi mürina,
resap lükü an we pwon.

25 Ra ngününgün me lon imwer imw mangaku,
nge resap aleasochis ngeni alon ewe Samol mi Lapalap.

26 Iei mine Kot a aitieta pöün o pwon fän akapel ngeniir
pwe epwe nirela me lon ewe fanüapö, ✱

27 epwe atoropasafeili mwirimwirir lein chon ekewe mwü
pwe repwe mäla lon ewe fanüen chon ekis. ✱

28 Mürin, ra fiti ekewe aramas mi fel ngeni Paal me lon Peor
o mongö ekewe föten anü ra eäni asor ngeni ekewe kot ese wor manau
lor.

29 Ra asonga ewe Samol mi Lapalap ren ar kewe föföör,
pwe eu mätter a terifetal leir.

30 Mürin, Pinehas a ütä o apwüngü ekewe mi tipis,
pwe ewe mätter a ükütiu.

31 Iwe, ren ei föföör Pinehas a küna pwüng me ren Kot
seni eu täppin aramas tori eu täppin tori feilfeilachök. ✱

32 Iwe, chon Israel ra asonga Kot me arun ekewe kolukun Meripa.
Moses a küna riaföü watte pokiter,

33 pun ra achouu lelukan
pwe a ssela an fos.

✱ 106:12: Eks 14.31; Eks 15.1-21 ✱ 106:15: Num 11.4-34 ✱ 106:18: Num 16.1-35

✱ 106:23: Eks 32.1-14 ✱ 106:26: Num 14.1-35 ✱ 106:27: Lif 26.33 ✱ 106:31: Num

25.1-13

34 Iwe, chon Israel resap pwal arosala chon ekewe mwü usun ewe Samol mi Lapalap a allük ngeniir.

35 Nge ra pwüpwülufengen me chon ekewe mwü o föri sokun föför usun mine ir ra föri.

36 Ra fel ngeni ar kewe uluulun anümwäl, nge ekewe uluulun anümwäl ra wiliti eu likatup ngeniir.

37 Ra eäni asor nöür kewe ät me nengin ngeni ekewe anün rochopwak.

38 Ra niela nöür kewe ät me nengin esap wor ar tipis, o eäniir asor ngeni ekewe uluulun anümwäl än chon Kanaan. Iwe, ewe fanü a limengau ren ei sokun föför.

39 Iei usun ra limengau ren ar föför o kirikiringau ngeni Kot ren ar lapalap usun lapalapan eman fin lisowu.

40 Iei mine ewe Samol mi Lapalap a fokun song ngeni nöün aramas, pwe a fokun anioputäsiniir.

41 A asechirela fän nemenien chon ekewe mwü, pwe chokewe mi oputeer ra nemeniir.

42 Iwe, chon oputeer ra ariaföüür o atolongeer fän ar nemenem.

43 Fän chomong Kot a angaserela, nge ra chök sopwela le ü ngeni.

Iwe, ra sapwilitiu pokiten ar tipis.

44 Iei mwo nge Kot a chök ekieki ar riaföü, lupwen a rongorong ar siö.

45 A chechemeni an pwon fän äsengesiiir, lon an tong ellet mi lapalap a liamamala ren mine a föri ngeniir.

46 A föri pwe chokewe meinisin mi liapeniir o uweerela lon ekewe fanü mi toau repwe tongeer. ✧

47 Ai Samol mi Lapalap äm Kot, kopwe amanauakem o achufengenikem seni me lein chon ekewe mwü, pwe aipwe kilisou ngonuk o mwareiti itom mi pin.

48 Oupwe mwareiti ewe Samol mi Lapalap, ewe Koten Israel seni fansoun esepop tori fansoun esemüch.

Iwe, ekewe aramas meinisin repwe apasa, "Amen."

Ousipwe mwareiti ewe Samol mi Lapalap. ✧

ALIMUEN PUK

107

Kot a angasala chon riaföü

107.1-43

1 Oupwe kilisou ngeni ewe Samol mi Lapalap, pun i a kirikiröch,

an tong ellet a nomom tori feilfeilachök. ✧

2 Ekewe mi ngasala ren ewe Samol mi Lapalap repwe apasa iei usun, chokewe i a angaserela seni ekewe chon oputeer

3 o achufengenikem seni ekewe fanü,

✧ **106:46:** Souk 2.14-18 ✧ **106:48:** 1.Kron 16.35-36 ✧ **107:1:** 1.Kron 16.34; 2.Kron 5.13; 7.3; Esr 3.11; Kölf 100.5; 106.1; 118.1; 136.1; Jer 33.11

seni ötiu me lotou,
seni ör me efeng.

⁴ Ekoch aramas ra fetalfeil lon fanüapö,
nge resap küna efoch al ngeni eu telinimw pwe repwe imweimw lon.

⁵ Ra echik me kaka
o apilükingau lon leluiker.

⁶ Mürin, ra siö ngeni ewe Samol mi Lapalap lon ar weires,
nge i a angaseer seni ar riaföü.

⁷ A emwenirela won efoch al mi wenechar
tori ra tori eu telinimw pwe repwe imweimw lon.

⁸ Ir repwe kilisou ngeni ewe Samol mi Lapalap pokiten an tong ellet,
pwal pokiten an kewe föför mi amwarar ngeni chon fanüfan.

⁹ Pun a amötü chokewe mi kaka
o amongöü chokewe mi echik ngeni mongö mi annö.

¹⁰ Ekoch aramas ra nom lon rochopwak me nürün mäla,
ra fötek ren selimächä o riaföü,

¹¹ pun ra ü ngeni alon Kot
o oput än Ewe mi Unusen Tekia öüröür.

¹² A atolongeer fän angang weires,
ra turula, nge esap wor eman mi alisiir.

¹³ Mürin ra siö ngeni ewe Samol mi Lapalap lon ar weires,
nge i a angaseer seni ar riaföü.

¹⁴ Iwe, a emwenirewu seni lon rochopwak me nürün mäla
o mwütifeseni föföör kewe selimächä.

¹⁵ Ir repwe kilisou ngeni ewe Samol mi Lapalap pokiten an tong ellet,
pwal pokiten an kewe föför mi amwarar ngeni chon fanüfan.

¹⁶ Pun a atatakisi ekewe asam seni piras
o pöküsopwei ekewe ömwöch seni mächä.

¹⁷ Ekoch aramas ra samau ren ar föförün tipis,
ra pwal riaföü pokiten ar föför mi ngau.

¹⁸ Ra nou sokopaten mongö meinisin
o kan ngeni mäla.

¹⁹ Mürin ra siö ngeni ewe Samol mi Lapalap lon ar weires,
nge i a angaseer seni ar riaföü.

²⁰ A tinala an kapas o apöchöküleer,
a amanaueer seni mäla.

²¹ Ir repwe kilisou ngeni ewe Samol mi Lapalap pokiten an tong ellet,
pwal pokiten an kewe föför mi amwarar ngeni chon fanüfan.

²² Repwe pwal eäni asoren kilisou ngeni
o apworausä an kewe föför lon kölün pwapwa.

²³ Ekoch aramas ra sai lematau won sip
pwe repwe föri ar angangen amömö won ekewe mataulap.

²⁴ Ra küna än ewe Samol mi Lapalap föför,
an angang mi amwarar lon ekewe leni mi alolol.

²⁵ Iwe, Kot a kapas o awarato eu mölümöl
mi apwota noon ewe matau.

²⁶ Ekewe sip ra kekitä fän läng,
ra pwal feitiu tori lealololun matau,

pwe chokewe mi nom won ra apilükingau pokiten ar feiengau.

²⁷ Ra mwaroro o rikirikfetal usun ir mi pulas,
resap chüen silei mine repwe föri.

²⁸ Mürin ra siö ngeni ewe Samol mi Lapalap lon ar weires,
nge i a angaseer seni ar riaföü.

²⁹ A aukätiu ewe mölümöl,
pwe nonon ewe matau a lüala.

³⁰ Mürin ra pwapwa pwe a lüa,
nge i a emweniir ngeni ewe leni ia ra mochen ilelong ie.

³¹ Iwe, ir repwe kilisou ngeni ewe Samol mi Lapalap pokiten an tong
ellet,

pwal pokiten an kewe föföör mi amwarar ngeni chon fanüfan.

³² Repwe ingeiti Kot lon ewe mwichen aramas
o mwareiti i lon ewe mwichen souakom.

³³ Kot a awili ekewe chanpupu ngeni fanüpwas,
a pwal awili ekewe fanüen puächen koluk ngeni pwül mi pwasapwas.

³⁴ A awili eu fanü mi pwülüöch ngeni eu fanüapö mi uren salt,
pun chon ewe fanü ra föföringau.

³⁵ Kot a pwal awili eu fanüpwas ngeni eu fanüen koluk,
a pwal awili eu fanü mi pwasapwas ngeni eu fanüen puächen koluk.

³⁶ Iwe, a mwüt ngeni ekewe chon echik pwe repwe nonom ikenan,
repwe aüetä eu telinimw pwe repwe nonom lon.

³⁷ Iwe, ra amora pwükil lon ar kewe tanipi,
ra fotuki irän wain o kini eu räs mi watte.

³⁸ Kot a afeiöchü nöün aramas pwe ra chomongola.

Esap pwal mwütätä pwe nöür pwiin kow repwe chokükünüla.

³⁹ Mürin ra chokisikisila, ra küna tekison ren riaföü,
weires me letipeta.

⁴⁰ Iwe, Kot a anomu itengau won ekewe aramas tekia
o föri pwe ra fetalfeil lon fanüapö, ia esap wor efoch al ie.

⁴¹ Nge a angasala ekewe chon osupwang seni ar riaföü
o achomongala ar kewe famili pwe ra usun chomongun pwiin sip.

⁴² Ekewe chon pwüing ra küna ei o pwapwa,
nge ekewe aramasangau meinisin ra fanafanala.

⁴³ Iön mi tipachem epwe iseis ekei mettoch lon lelukan
o ekieki usun än ewe Samol mi Lapalap tong ellet.

108

Eu iotekin tüngror alilis pokiten chon oput

108.1-13

(Kölf 57.7-11; 60.5-12)

Echö än Tafit köl.

¹ Üa apilüköch, ai Kot,
üa apilüköch.

Üpwe köl o mwareituk.

Ngüni, kopwe pwök.

² Ekewe kitar me ükülele repwe pwök.

Üpwe apwökü mallen rän.

³ Ai Samol mi Lapalap, üpwe kilisou ngonuk me lein ekewe mwichen aramas,

üpwe kölün mwareituk me lein chon ekewe mwü.

⁴ Pun om tong ellet a tekia seni ekewe läng, om allükülük a tori ekewe kuchu.

⁵ Ai Kot, kopwe pwäri om tekia asen ekewe läng. Om ling epwe pwäla won unusen fanüfan.

⁶ Kopwe amanauakem ren om manaman o pälüeni ai iotek. pwe chokewe ka tongeer repwe ngasala.

⁷ Kot a kapas me lon imwan mi pin, “Lon ai meseik üpwe ineti Sikem o aineti ewe lemolun Sukot ngeni nei aramas.

⁸ Kiliat fanüei, Manasa pwal fanüei, Efraim imwei akkau, Juta woki wokun king.

⁹ Moap sepiei seprien töttöl, üpwe moneela ipwei sus won Etom asisilan pwe fanüei, nge won ewe fanü Filistia üpwe arükak fän ai win.”

¹⁰ Iö epwe emwenieilong lon ewe telinimw mi pöchökül tittin? Iö epwe emweniei ngeni Etom?

¹¹ Ai Kot, ifa usun, ka wesewesen pöütikeemila?

Ifa usun, kosap chüen eti äm mwichen sounfiu le feila maun?

¹² Kopwe alisikem, pwe aipwe tongeni maun ngeni ekewe chon op-utakem, pun än aramas alilis a lomotongau.

¹³ Are Kot a etikich, kich sipwe win, i echök epwe akufu chon oputakich.

109

Eu tüngr pwe Kot epwe ngeni ekewe aramasangau liwinin ar föföör 109.1-31

Ngeni ewe mi emweni chon köl: Echö än Tafit köl.

¹ Ai Kot, en ewe üa mwareiti, kosap fanafanala.

² Pun ekewe aramas mi ngau o atuputup ra apasawu kapasen ü ngeniei, ra aitengauaei ren ar kapas chofana.

³ Ra kapasingau usi o fiu ngeniei, nge esap wor popun.

⁴ Liwinin ai tongeer, ra atipisiei, nge ngang üa fen iotek fän iter.

⁵ Iei usun ra liwini ngeniei ngau fän iten ai föföör mürina ngeniir, nge oput fän iten ai tongeer.

⁶ Kopwe filätä eman aramasangau epwe ü ngeni ewe chon oputaei, eman chon atipisi epwe atolonga i lon kapwüing.

⁷ Are a wes le kapwüing, epwe pwä pwe a tipis.

Pwal an iotek epwe wiliti tipis.

⁸ Amwo ränin manauan epwe chökükün, nge eman epwe siwili lon wisan. ✧

⁹ Amwo nöün kana repwe mäsen,
nge pwülüan we epwe lipichsefäl.

¹⁰ Amwo nöün kana repwe nomofetal o tütüngor,
eman epwe asürela seni imwer mi tala.

¹¹ Amwo ewe chon angei liwinimang epwe angei meinisin mine an,
nge chon ekis repwe angei fän pöchökül uän an angang.

¹² Amwo esap wor eman epwe eäni kirikiröch ngeni,
esap pwal wor eman epwe tongei nöün kewe mi mäsen.

¹³ Amwo mwirimwirin kana repwe mäla,
nge iter epwe töttölüwu me lon aruuen täppin aramas.

¹⁴ Amwo än an kewe lewo föföringau repwe chem me ren ewe Samol mi
Lapalap,

nge än inan tipis esap musala.

¹⁵ Amwo ewe Samol mi Lapalap epwe chechemeni ar tipis fansoun
meinisin,
nge aramas repwe fokun manlükirela.

¹⁶ Pun ewe mwän esap ekiekin eäni kirikiröch,
nge a tapweri ekewe mi wöüngau o mwelele,
pwal ekewe mi tatakis leluker, pwe epwe nirela.

¹⁷ A sani anümamaua aramas. Amwo ekewe anümamau repwe feitiu won.
Esap sani an epwe afeiöchü aramas. Amwo esap wor eman epwe
afeiöchü.

¹⁸ A örüni kapasen anümamau usun an örüni üföüf üf.

Amwo an kewe kapasen anümamau repwe tolong lon inisin usun chök
koluk,
repwe pwal tolong lon chün usun chök kiris.

¹⁹ Amwo repwe usun chök echö üf a pwölü ngeni,
pwal usun efoch pelita a ri ngeni lukalapan fansoun meinisin.

²⁰ Amwo epwe iei liwinin ekewe chon atipisieie me ren ewe Samol mi
Lapalap,

liwinin chokewe mi kapasingau usi.

²¹ Nge en, ai Kot, ai Samol mi Lapalap, kopwe peniei usun ka pwon
ngeniei,

kopwe angasaei pokiten om tong ellet mi mürina.

²² Pun ngang eman mi wöüngau o mwelele,
lelukei a fokun tatakis.

²³ Üpwe le morola usun nürün och mettoch a morola lekuniol.
Aramas ra pönieila usun ra pöni eman lifichimas.

²⁴ Pwäsuki ra apwangapwang ren ai öchüün,
inisi a kichüchüla.

²⁵ Ngang eman mi küna turunufas me ren chon atipisieie,
lupwen ra künaei, ra elifechifechi mökürer. ✧

²⁶ Ai Samol mi Lapalap ai Kot, kopwe alisieie,
kopwe amanauaei lon om tong ellet.

²⁷ Kopwe amefi ngeniir

pwe en, ai Samol mi Lapalap, ka amanauaei.

²⁸ Ir ra tongeni eäni kapasen anümamau ngenieie,
nge en kopwe afeiöchüei.

✧ 109:25: Mat 27.39; Mark 15.29

Chokewe mi ü ngeniei repwe küna säw.

Nge ngang noum chon ngang üpwe pwapwa.

²⁹ Amwo ekewe chon atipisieie repwe pwölüla ren itengau,
repwe pwölüla ren püsin ar säw usun ra pwölüla fän echö üf.

³⁰ Üpwe kilisou chapur ngeni ewe Samol mi Lapalap.

Üpwe mwareiti i me lein ewe mwicheichen aramas.

³¹ Pun i a peni ewe chon mwelele,
pwe epwe amanaua seni chokewe mi atipisi pwe epwe mäla.

110

Kot a ngeni ewe king an nemenem

110.1-7

Echö än Tafit köl.

¹ Ewe Samol mi Lapalap a kapas ngeni ai samol ewe king,

“Kopwe mot lepelifichi

tori üpwe anomu chon oputom pwe repwe lenien puun pecheöm.” ✱

² Ewe Samol mi Lapalap epwe alapala manen om nemenem lon wisom
wisen king seni Sion.

A apasa, “Kopwe nemenem won chon oputom.”

³ Lon ränin om kopwe maun ngeni chon oputom

noum aramas repwe etuk fän püsin letiper

o üföüf ekewe üf mi pin.

Usun amurenipwin mi nom lesosorusich,

iei usun noum kewe alüal repwe feito reöm.

⁴ Ewe Samol mi Lapalap a pwon fän akapel, nge esap siwili an ekiiek,

“En eman souasor tori feilfeilachök
lon kotun Melkisetek.” ✱

⁵ Ewe Samol a nom lepelifichum.

I epwe akufu ekewe king lon ewe rän a lingeringer.

⁶ Epwe eäni kapwüing won chon ekewe mwü.

Epwe aura ewe lenien maun ren somä

o akufu ekewe king won unusen fanüfan.

⁷ Ewe king epwe ün seni ewe öwö mi nom ünükün ewe al,

epwe pöchökülela ren o sopwela le win.

111

Aramas repwe mwareiti Kot

111.1-10

¹ Ousipwe mwareiti ewe Samol mi Lapalap.

Üpwe kilisou ngeni ewe Samol mi Lapalap ren unusen lelukei

lon ewe mwichen chon wenechar, pwal lein ewe mwichen aramas.

² Än ewe Samol mi Lapalap föföör ra fokun amwarar,

chokewe meinisin mi pwapwaitiir ra ekinloneer.

³ An kewe föföör ra fokun ling me manaman,

an pwüing a nonom tori feilfeilachök.

⁴ Ewe Samol mi Lapalap a föri pwe aramas repwe chechemeni an kewe
föföör mi amwarar.

✱ **110:1:** Mat 22.44; Mark 12.36; Luk 20.42-43; Föf 2.34-35; 1.Kor 15.25; Ef 1.20-22; Kol 3.1; Ipr 1.13; 8.1; 10.12-13 ✱ **110:4:** Ipr 5.6; 6.20; 7.17,21

A eäni kirikiröch o ümöömöch.

⁵ A ngeni chokewe mi niuokusiti i ener mongö.

A chechemeni an we pwon fansoun meinisin.

⁶ A pwäri ngeni nöün kewe aramas manamanen an kewe föför, lupwen a ngeniir fanüen chon ekewe mwü.

⁷ A allükülük o pwüing lon mettoch meinisin a föri.

An kewe allük meinisin ra nükünük.

⁸ Ra nonomopos tori feilfeilachök,

Kot a föriir fän allükülük me wenechar.

⁹ A angasala nöün aramas

o föri eu pwon esemüch.

Itan a pin o eniweniu.

¹⁰ Niuokusiti ewe Samol mi Lapalap, iei poputän tipachem.

Chokewe meinisin mi föri iei usun ra fefeitä lon ar silelap.

Sipwe mwareiti Kot tori feilfeilachök. ✧

112

A feiöch eman mi niuokusiti Kot
112.1-10

¹ Ousipwe mwareiti ewe Samol mi Lapalap.

A feiöch ewe aramas mi niuokusiti ewe Samol mi Lapalap, mi pwapwaiti an epwe aleasochisi an kewe allük.

² Nöün kana repwe nemenem lon ewe fanü.

Mwirimwirin kana mi wenechar repwe feiöch.

³ Wöü me chomong pisek ra nom lon imwan, nge an pwüing a nonom tori feilfeilachök.

⁴ Saram a tin lon rochopwak fän iten ewe mi wenechar.

Pun ewe Samol mi Lapalap a kirikiröch, a pwal ümöömöch o pwüing.

⁵ A feiöch eman mwän mi kichiöch o mwütätä mettoch, eman mi föri an angang fän pwüing.

⁶ Pun ewe chon pwüing epwe fokun tipepos.

Aramas repwe chechemeni i tori feilfeilachök.

⁷ Esap niuokusiti pworaus mi ngau,

lelukan a pos, a apilükülükü ewe Samol mi Lapalap.

⁸ Lelukan a kinamwe, esap niuokus.

Lesopolan epwe pwapwa le küna än chon oputan kuf.

⁹ A fangafangöch ngeni ekewe chon wöüingau,

an pwüing epwe nonom tori feilfeilachök.

Epwe wor manan me meninin me ren aramas. ✧

¹⁰ Ekewe aramasangau ra küna ei o song ren, ra attina meser, nge mürin resap chüen nom.

Än ekewe aramasangau mochen esap pwönüetä.

113

Kölün mwareiti Kot pokiten an atekiatä ewe chon tipetekison
113.1-9

¹ Ousipwe mwareiti ewe Samol mi Lapalap.

Ämi chon angang ngeni ewe Samol mi Lapalap oupwe mwareiti itan.

² Oupwe mwareiti iten ewe Samol mi Lapalap
seni ei fansoun tori feilfeilachök.

³ Seni tötän akkar tori a tuputiu
aramas repwe mwareiti iten ewe Samol mi Lapalap.

⁴ Ewe Samol mi Lapalap a tekia seni chon ekewe mwü,
an ling a nom asen ekewe läng.

⁵ Ese wor eman a wewe ngeni ewe Samol mi Lapalap ach we Kot.
A mot won an lenien mot mi tekia,

⁶ nge a nennetiu
won ekewe läng, pwal won fanüfan.

⁷ A apwätai ekewe chon wöüngau seni lepwül
o atekiatäi ekewe chon mwelele seni ioien falang,

⁸ a amoteer ren ekewe samol,
ren ekewe samolun nöün aramas.

⁹ A aleniöchü ewe fefin mi rit lon imwan
o föri pwe epwe eman inelap mi pwapwa ren nöün kewe.
Ousipwe mwareiti ewe Samol mi Lapalap.

114

Ekewe manaman mi fis, lupwen chon Israel ra towu seni Isip

114.1-8

¹ Lupwen ekewe chon Israel ra towu seni Isip,
ir ekewe mwirimwirin Jakob mi towu seni eu mwichen aramas mi
sokola ar fos, ✧

² Juta a wiliti an leni mi pin,
Israel a wiliti an lenien nemenem.

³ Ewe matau a küna mine a fis o süla,
ewe chanpupu Jortan a üla. ✧

⁴ Ekewe chukutekia ra mwetewet usun ekewe ätemwänin sip,
ekewe chukutekison ra mwetewet usun ekewe nienifön sip.

⁵ Met o sät, pwota ka sü?
Met o chanpupu Jortan, pwota ka üla?

⁶ Met o ämi kewe chukutekia, pwota oua mwetewet usun ekewe
ätemwänin sip?

Nge ämi chukutekison, pwota oua mwetewet usun ekewe nienifön sip?

⁷ En fanüfan, kopwe chech me fän mesen ewe Samol,
me fän mesen än Jakob we Kot,

⁸ i ewe mi awili ewe achau ngeni eu nomun koluk,
nge ewe achau mi fokun pöchökül ngeni eu puächen koluk. ✧

115

Kot me ekewe uluulun anümwäl

115.1-18

¹ Ai Samol mi Lapalap, kopwe alingala itom,
nge sap item,

pokiten om tong ellet me om allükülük.

² Pwota chon ekewe mwü repwe aisinikem,

“Ifa i ämi Kot?”

³ Ach Kot a nom lon läng,

i a chök föri mine a mochen.

⁴ Nge ar kewe uluulun anümwäl seni silifer me kolt aramas chök ra föri.

⁵ A wor awer, nge resap tongeni kapas, a wor meser, nge resap tongeni küneer.

⁶ A wor selinger, nge resap tongeni rongorong, a wor pwötür, nge resap tongeni titin.

⁷ A wor pöür, nge resap tongeni attap, a wor pecher, nge resap tongeni fetal, resap pwal tongeni möngüngü me lon chiorer.

⁸ Chokewe mi föri ekewe uluulun anümwäl o lüküür repwe pwal wewe ngeni ekewe uluulun anümwäl. ✱

⁹ Ämi chon Israel, oupwe apilükülükü ewe Samol mi Lapalap. I epwe alisikemi o epeti senikemi feiengau.

¹⁰ Ämi mwirimwirin Aaron, oupwe apilükülükü ewe Samol mi Lapalap. I epwe alisikemi o epeti senikemi feiengau.

¹¹ Ämi mi niuokusiti ewe Samol mi Lapalap, oupwe apilükülükü i. I epwe alisikemi o epeti senikemi feiengau.

¹² Ewe Samol mi Lapalap a chechemenikich, i epwe afeiöchükich.

I epwe afeiöchü ekewe chon Israel me ekewe mwirimwirin Aaron.

¹³ Ewe Samol mi Lapalap epwe afeiöchü chokewe mi niuokusiti i, ekewe aramas kis me ekewe aramas tekia. ✱

¹⁴ Amwo ewe Samol mi Lapalap epwe achomongakemiila me mwirimwiri kana.

¹⁵ Amwo oupwe feiöch me ren ewe Samol mi Lapalap, ewe mi föri läng me fanüfan.

¹⁶ Ekewe läng än ewe Samol mi Lapalap echök, nge fanüfan a ngeni aramas.

¹⁷ Ekewe somä resap mwareiti ewe Samol mi Lapalap, usun chök chokewe mi feitiu lon lenien sotup.

¹⁸ Nge kich mi manau sipwe mwareiti ewe Samol mi Lapalap seni ei fansoun tori feilfeilachök. Ousipwe mwareiti ewe Samol mi Lapalap.

116

Kilisou ren ngasala seni feiengauen mäla

116.1-19

¹ Üa echeni ewe Samol mi Lapalap, pun a rongorong mweliei o aüselinga ai kewe tünigor pwe epwe ümömöch ngeniei.

² I a aü selingan ngeniei, iei mine üpwe kökköri i lon unusen ränin manau ei.

³ Ekewe likatupun mäla ra pwelieila,
ekewe feiengauen lenien sotup ra toriei,
üa uren riaföü me niuokus.

⁴ Mürin üa köri iten ewe Samol mi Lapalap o apasa,
“Ai Samol mi Lapalap, üa tüngor ngonuk, kopwe amanauaei.”

⁵ Ewe Samol mi Lapalap a kirikiröch o pwüing,
ach Kot a fokun eäni tong.

⁶ Ewe Samol mi Lapalap a tümwünü ekewe chon lipwäkingau.
Lupwen üa nom lon feiengau, a amanauaei.

⁷ Ngüni, kopwe apilükülüköch,
pun ewe Samol mi Lapalap a kirikiröch ngeniei.

⁸ Ewe Samol mi Lapalap a amanauaei seni mäla.

A aukätü chönün mesei,
a tümwünü pechei pwe üsap chepetek,

⁹ pwe üpwe fetal fän mesan
lon fanüen chon manau.

¹⁰ Üa amwöchü ai lükülük pwal lupwen fansoun ai üra,
“Üa nom lon riaföü lapalap.” ✧

¹¹ Üa apasa lon ai niuokus,
“Aramas meinisin ra chofana.”

¹² Met üpwe liwini ngeni ewe Samol mi Lapalap
ren ekewe feiöch meinisin a ngeniei?

¹³ Üpwe uwato ewe kapen wain pwe ai asoren ün
o kilisou ngeni ewe Samol mi Lapalap.

¹⁴ Üpwe apwönüetä ai kewe pwon ngeni ewe Samol mi Lapalap
me fän mesen nöün kewe aramas meinisin.

¹⁵ A aüchea me fän mesen ewe Samol mi Lapalap
mälan nöün kewe chon pin.

¹⁶ Ai Samol mi Lapalap, ngang noum chon angang.
Ngang noum chon angang, nöün noum chon angang fefin.
En ka apichala föföi kewe.

¹⁷ Üpwe eäni ngonuk ewe asoren kilisou
o iotek ngonuk.

¹⁸ Üpwe apwönüetä ai kewe pwon ngeni en, ewe Samol mi Lapalap,
me fän mesen noum kewe aramas meinisin

¹⁹ me lon inwom we imwenfel me lukalapen Jerusalem.
Ousipwe mwareiti ewe Samol mi Lapalap.

117

Kapasen mwareiti Kot fän iten an tong ellet

117.1-2

¹ Oupwe mwareiti ewe Samol mi Lapalap, ämi chon ekewe mwü meinisin.

Oupwe ingeiti i, ämi aramas meinisin. ✧

² Pun an tong ellet ngenikich a fokun lapalap,
än ewe Samol mi Lapalap allükülük a nonom tori feilfeilachök.

Ousipwe mwareiti ewe Samol mi Lapalap.

118

Kilisou ren än Kot amanauakich

118.1-29

¹ Oupwe kilisou ngeni ewe Samol mi Lapalap,
pun i a kirikiröch,

an tong ellet a nonom tori feilfeilachök. ✱

² Chon Israel repwe apasa,

“An tong ellet a nonom tori feilfeilachök.”

³ Ekewe mwirimwirin Aaron repwe apasa,

“An tong ellet a nonom tori feilfeilachök.”

⁴ Chokewe mi niuokusiti ewe Samol mi Lapalap repwe apasa,

“An tong ellet a nonom tori feilfeilachök.”

⁵ Üa kökköri ewe Samol mi Lapalap seni lon ai riaföü,
nge i a pälueniei o angasaeila.

⁶ Üsap niuokus, pun ewe Samol mi Lapalap a nom rei.

Met aramas repwe tongeni föri ngeniei? ✱

⁷ Ewe Samol mi Lapalap peniei me chon alisiei.

Üpwe küna pwe ekewe chon oputaei ra kuf.

⁸ A mürina ach sipwe anomu ach apilükülük won ewe Samol mi Lapalap,
lap seni ach sipwe anomu ach apilükülük won aramas.

⁹ A mürina ach sipwe anomu ach apilükülük won ewe Samol mi Lapalap,
lap seni ach sipwe anomu ach apilükülük won ekewe samol.

¹⁰ Chon ekewe mwü meinsin ra pwelieila,
nge ngang üa ärirela fän iten ewe Samol mi Lapalap.

¹¹ Ra pweliela lepeki meinsin,

nge ngang üa ärirela fän iten ewe Samol mi Lapalap.

¹² Ra rangeitiei usun achi,

nge ra karakai usun ekkei a kenala iräföföföf.

Ngang üa ärirela fän iten ewe Samol mi Lapalap.

¹³ Ra tiinie fän pöchökül pwe üpwe turula,

nge ewe Samol mi Lapalap a alisiei.

¹⁴ Ewe Samol mi Lapalap ai pöchökül me ai köl.

I ai Chon Amanau. ✱

¹⁵ Oupwe aüseling ngeni ekewe kölün pwapwan win lon imwen ekewe
chon pwüng,

“Pöüifichin ewe Samol mi Lapalap a föri föföörün pwora me win.

¹⁶ Pöüifichin ewe Samol mi Lapalap a aköüpöü,

pöüifichin ewe Samol mi Lapalap a föri föföörün pwora me win.”

¹⁷ Üsap mäla, nge üpwe manau

o asilefeili än ewe Samol mi Lapalap kewe föföör.

¹⁸ Ewe Samol mi Lapalap a fokun apwüngüei,

nge esap atolongaei lon mäla.

¹⁹ Oupwe suki ngeniei ekewe asamen imwenfel

✱ **118:1:** 1.Kron 16.34; 2.Kron 5.13; 7.3; Esr 3.11; Kölf 100.5; 106.1; 107.1; 136.1; Jer 33.11

✱ **118:6:** Ipr 13.6 ✱ **118:14:** Eks 15.2; Ais 12.2

pwe üpwe tolong lon o kilisou ngeni ewe Samol mi Lapalap.

²⁰ Iei asamen ewe Samol mi Lapalap,
ekewe chon pwüing echök repwe tolong lon.

²¹ Üa kilisou ngonuk, pun ka pälüeni ai iotek,
ka pwal amanauaei.

²² Ewe fau ekewe chon kaü imw ra pöütala
a wiliti ewe föün lepwokuku mi fokun aüchea. ✱

²³ Iei än ewe Samol mi Lapalap we föför,
a fokun amwarar me fän mesach. ✱

²⁴ Iei ewe rän ewe Samol mi Lapalap a föri,
ousipwe meseik o pwapwa lon.

²⁵ Ai Samol mi Lapalap, äm aia tünigor ngonuk pwe kopwe amanauakem.
Ai Samol mi Lapalap, äm aia tünigor ngonuk pwe kopwe atufichikem. ✱

²⁶ A feiöch ätewe mi feito fän iten ewe Samol mi Lapalap.

Äm aia afeiöchükemi seni lon imwen ewe Samol mi Lapalap. ✱

²⁷ Ewe Samol mi Lapalap i Kot, a ngenikich saram.
Oupwe fötätä ewe mönün asoren chulap ren säl
ngeni ewe rongen asor tori mächän kewe.

²⁸ En ai Kot, üpwe kilisou ngonuk.

En ai Kot, üpwe ingemwareituk.

²⁹ Oupwe kilisou ngeni ewe Samol mi Lapalap, pun i a kirikiröch,
an tong ellet a nonom tori feilfeilachök.

119

An Kot kewe allük ra mürina
119.1-176

¹ Ra feiöch chokewe resap tipis lon manauer,
chokewe mi aleasochisi än ewe Samol mi Lapalap kewe allük.

² Ra feiöch chokewe mi tümwünü an kewe allük.
chokewe mi kütta i ren unusen leluker,

³ chokewe resap föri mine a ngau,
nge ra chök föri letipen Kot.

⁴ Ai Kot, en ka asile ngenikem om öüröür,
pwe aipwe tümwünüöchüür le apwönüetä.

⁵ Amwo üpwe likitü le apwönüetä om kewe allük.

⁶ Mürin üsap säw,
lupwen üa ekiëkifichi om kewe allük meinisin.

⁷ Üpwe mwareituk fän wenecharen lelukei,
lupwen üa kaiö pwüingün om kewe pwüing.

⁸ Üpwe aleasochisi om kewe allük.
Kosap fokun likitieila.

⁹ Epwe ifa usun än eman alüal tümwünü manuan pwe epwe limöch?
Ei a chök tongeni fis ren an aleasochisi om kapas.

✱ **118:22:** Luk 20.17; Föf 4.11; 1.Pet 2.7 ✱ **118:23:** Mat 21.42; Mark 12.10-11 ✱ **118:25:** Mat 21.9; Mark 11.9; Joh 12.13 ✱ **118:26:** Mat 21.9; 23.39; Mark 11.9; Luk 13.35; 19.38; Joh 12.13

10 Üa küttook ren unusen lelukei.

Kosap mwüt ngeniei pwe üpwe aleasolap ngeni om kewe allük.

11 Üa iseis om kapas lon lelukei

pwe üsap tipis ngonuk.

12 Ai Samol mi Lapalap, üpwe mwareituk.

Kopwe aiti ngeniei om kewe allük.

13 Üpwe apasasefäli om kewe pwüüng meinisin
ka ngenikem.

14 Üa pwapwaäsini le apwönüetä om kewe allük
lap seni ai pwapwaäsini ekewe wöü meinisin.

15 Üpwe ekinlonei om kewe öüröür
o ekiekifichi mine ka aiti ngeniei.

16 Üpwe pwapwaäsini om kewe allük,
nge üsap manlükala om kewe kapas.

17 Kopwe kirikiröch ngeniei ngang noum chon angang,
pwe üpwe manau o aleasochisi om kapas.

18 Kopwe suki mesei pwe üpwe küna
ekewe mettoch mi amwarar seni lon om kewe allük.

19 Ngang eman chon siamü won fanüfan,
kosap aopala om kewe allük seniei.

20 Lelukey a tatakis
ren ai positi om kewe pwüüng fansoun meinisin.

21 Ka apwüngü ekewe mi lamalamtekia,
ra anümamau, chokewe mi aleasolap ngeni om kewe allük.

22 Kopwe angei seniei säw me itengau,
pun ngang üa tümwünü om kewe allük.

23 Inamwo are samol kana ra mwichfengen o rawangauaei,
nge ngang noum ei chon angang üpwe chök ekinlonei om kewe allük.

24 Üa pwapwaäsini om kewe allük,
ir chon öüröüraei.

25 Üa konola won pwül moromor,
kopwe apöchökülaei usun ka pwon lon om kapas.

26 Üa pwärätä meinisin mine üa föri, nge en ka päüeniei.
Kopwe aiti ngeniei om kewe allük.

27 Kopwe awewe ngeniei usun ai üpwe fetal fän om kewe öüröür,
nge ngang üpwe ekinlonei om kewe föföör mi amwarar.

28 Üa fokun kechü ren ai letipeta.

Kopwe apöchökülaei usun ka pwon lon om kapas.

29 Kopwe amwöchüei pwe üsap fetal won ekewe al rese pwüüng.
Lon om ümömöch kopwe aiti ngeniei om we allük.

30 Üa filätä ai üpwe fetal won ewe al mi let,
üa anomu mwei om kewe pwüüng.

31 Ai Samol mi Lapalap, üa kamwöchünük won om kewe allük,
kosap mwüt ngeniei pwe üpwe säw.

32 Üpwe fokun aleasochisi om kewe allük,
pun ka alapala ai sile.

- 33 Ai Samol mi Lapalap, kopwe aiti ngeniei wewen om kewe allük, nge ngang üpwe aleasochisiir fansoun meinisin.
- 34 Kopwe fang ngeniei silelap, pwe ngang üpwe aleasochisi om kewe allük o apwönüretä ren unusen lelukei.
- 35 Kopwe emweniei pwe üpwe tongeni aleasochisi om kewe allük, pun ngang üa pwapwaäsiinir.
- 36 Kopwe akulu lelukei ngeni om kewe allük, nge sap ngeni mochenian win.
- 37 Kopwe akulu mesei seni mettoch mi lomotongau, nge kopwe amanauaei ren om kapas.
- 38 Kopwe apwönüetä om pwon ngeniei ngang noum chon angang, ewe pwon ka eäni ngeni chokewe mi niuokusituk.
- 39 Kopwe angei seniei ewe itengau üa niuokusiti, pun om kewe pwüüng ra mürina.
- 40 Üa fokun positi om kewe kapasen öüröür.
Kopwe amanauaei, pun en ka pwüüng.

- 41 Ai Samol mi Lapalap, kopwe pwäri ngeniei om tong ellet, kopwe amanauaei usun ka fen pwon.
- 42 Mürin üpwe tongeni pälüeni chokewe mi ämängauaei, pun üa lükü om kapas.
- 43 Kopwe atufichiei pwe üpwe apasawu kapas mi let fansoun meinisin, pun ai apilükülük a nom won om kewe pwüüng.
- 44 Üpwe aleasochisi om kewe allük iteiten fansoun tori feilfeilachök.
- 45 Iwe, üpwe fetalchöchö fän ngasala, pun üa kütta om öüröür.
- 46 Üpwe pwal pwärätä om kewe allük me fän mesen ekewe king, nge üsap säw.
- 47 Üa fokun pwapwa le aleasochisi om kewe allük, pun üa aücheaniir.
- 48 Üa etiwa o aücheani om kewe allük, üpwe pwal ekinlonei om kewe pwüüng.

- 49 Kopwe chechemeni om kapas ngeniei ngang noum we chon angang, ewe kapas mi ngeniei apilükülüköch.
- 50 Iei ai chip lon ai riaföü, pwe om pwon a ngeniei manau.
- 51 Ekewe chon lamalamtekia ra fokun turunufaseei, nge ngang üsap kul seni om allük.
- 52 Ai Samol mi Lapalap, lupwen üa ekieki usun om kewe pwüüng, ra nonom seni me lomlom, üa chip.
- 53 Lingeringer watte a toriei, lupwen üa küna ekewe aramasangau mi purätiau om kewe allük.
- 54 Üa kökkölü om kewe allük ekis meinisin ja üa siamü ie.
- 55 Ai Samol mi Lapalap, üa chechemenuk lepwin o ekieki usun om kewe allük.
- 56 Iei usun mine üa chök föföri:
Üa aleasochisi om kewe öüröür.

57 Ai Samol mi Lapalap, en chök ineti.

Üpwe pwon pwe üpwe aleasochisi om kewe kapas.

58 Üa tüngor seni unusen lelukei om kopwe kirikiröch ngeniei.

Kopwe ümömöch ngeniei usun ka pwon.

59 Üa ekieki usun ai kewe föföör,
mürin üa kul ngeni om kewe allük.

60 Üa amüttiriei pwe üpwe aleasochisi om kewe allük,
nge üsap mang.

61 Inamwo ika ekewe aramasangau ra anomu eu sär me mwei,
nge üsap manlükala om kewe allük.

62 Üa pwätä lukenipwin
pwe üpwe mwareituk pokiten om kewe allük mi pwüng.

63 Ngang eman chienen chokewe meinisin mi niuokusituk,
chokewe mi aleasochisi om kewe öüröür.

64 Ai Samol mi Lapalap, fanüfan a ur ren om tong ellet.
Kopwe aiti ngeniei om kewe allük.

65 Ai Samol mi Lapalap, ka eäni kirikiröch ngeniei
ngang noum chon angang usun ka pwon.

66 Kopwe aiti ngeniei mirit me silelap,
pun üa lükü om kewe allük.

67 Mwen om atolongaei lon riaföü üa mwälechfeil,
nge iei üa aleasochisi om kapas.

68 En ka kirikiröch o föri mine a mürina.
Kopwe aiti ngeniei om kewe allük.

69 Ekewe mi lamalamtekia ra aitengauaei ren ar chofana,
nge üa aleasochisi om kewe öüröür ren unusen lelukei.

70 Leluker esap wor memmef lon,
nge ngang üa pwapwaäsini om allük.

71 A mürina ngeniei pwe üa riaföü,
pun ren ei üa tongeni kaiö om kewe allük.

72 Ewe allük ka ngenikem a mürina ngeniei
lap seni ngeröün föün kolt me silifer.

73 En ka föriei o tümwünüei.

Kopwe fang ngeniei mirit pwe üpwe tongeni kaiö om kewe allük.

74 Chokewe mi niuokusituk repwe pwapwa, lupwen repwe künaei,
pun üa apilükülükü om kewe kapas.

75 Ai Samol mi Lapalap, üa silei pwe om kewe apwüng ra pwüng,
fan om allükülük ka ariaföüüei.

76 Om tong ellet epwe achipaei,
usun ka pwon ngeniei ngang noum we chon angang.

77 Om ümömöch epwe toriei pwe üpwe tongeni manau,
pun üa pwapwaäsini om allük.

78 Amwo ekewe chon lamalamtekia repwe säw,
pun ra atipisie, nge ese wor popun.

Nge me rei, üpwe ekinlonei om kewe öüröür.

79 Amwo chokewe mi niuokusituk repwe feito rei,
ir chokewe mi silei om kewe allük.

80 Amwo üpwe fokun aleasochisi om kewe allük,
pwe üsap säw.

81 Üa fokun apwangapwangala ren ai positi om kopwe amanauaei,
nge üa apilükülükü om kapas.

82 Mesei ra toputupula ren ai akköürü mine ka pwon.

Üa ais, “Inet kopwe achipaei?”

83 Inamwo ika üa lomotongau usun chök eu rumen wain seni silin man
mi nürüfengen ren ötütöt,
nge üsap manlükala om kewe allük.

84 Ifa ükükün fansoun ngang noum ei chon angang üpwe engila?
Inet kopwe apwüngü chokewe mi ariaföüüei?

85 Ekewe chon lamalamtekiea ra tuw pwang pwe üpwe turulong lon,
ir chokewe resap aleasochisi om allük.

86 Om kewe allük meinisin ra let.

Nge aramas ra chök ariaföüüei ren ar kapas chofana. Kose mochen
kopwe alisie.

87 Arapakan ar repwe ärieila me won fanüfan.

Nge ngang üsap likitala om kewe öüröür.

88 Lon om tong ellet kopwe amwöchü manauaei,
pwe üpwe tongeni aleasochisi om kewe allük.

89 Ai Samol mi Lapalap, om kapas a nüküchar me lon läng,
a nom tori feilfeilachök.

90 Om allükülük a nonom tori ekewe täppin aramas meinisin.

En ka anomu fanüfan lon lenian, nge a nonomopos.

91 Om kewe allük ra nonom tori ikenai,
pun mettoch meinisin ra angang ngonuk.

92 Are üsap pwapwaiti om allük,
üpwe mäla lon ai riaföü.

93 Üsap fokun manlükala om kewe öüröür,
pun ka amanauaei pokiter.

94 Ngang noum, kopwe amanauaei,
pun ngang üa kütta om öüröür.

95 Ekewe aramasangau ra okoperiei pwe repwe nieila,
nge ngang üpwe ekinlonei om kewe allük.

96 Üa küna pwe mi wor öükükün mettoch meinisin,
nge om allük esap wor öükükün.

97 Üa fokun aücheani om allük,

üa ekinlonei fansoun meinisin.

98 Om allük a atipachemaei pwe üa tipachem lap seni chon oputaei,
pun a nonom rei fansoun meinisin.

99 A wor ai sile lap seni än nei kewe sense sile,
pun üa ekinlonei om kewe allük.

100 Üa mirit lap seni ekewe reikewe,
pun üa aleasochisi om kewe öüröür.

101 Üsap föri sokun föför mi ngau,
pun üa aleasochisi om kewe kapas.

102 Üsap tok seni om kewe pwüüng,
pun püsin en ai chon kait.

103 Om kewe kapasen pwon ra fokun arar me rei,
ra arar seni chönün chunen me lon awei.

104 Üa angei ai mirit seni om kewe öüröür,
iei mine üa oput ekewe föföör mi ngau meinisin.

105 Om kapas eu lamp a aiti ngeniei ia üpwe ipwela ie,
a pwal asarama alei.

106 Üa pwon fän akapel o anükünükü
pwe üpwe aleasochisi om kewe öüröür mi pwüng.

107 Üa fokun riaföü. Ai Samol mi Lapalap,
kopwe amanauaei, usun ka pwon lon om kapas.

108 Ai Samol mi Lapalap, kopwe aüselinga ai iotekin kilisou
o aiti ngeniei om kewe pwüüng.

109 Üa fangala manauai pwe üpwe tolong lon feiengauen mäla fansoun
meinisin,

nge üsap manlükala om kewe allük.

110 Ekewe aramasangau ra anomu eu sär fän itei,
nge ngang üsap aleasolap ngeni om kewe öüröür.

111 Om kewe allük wöüi tori feilfeilachök.
Ewer, ra apwapwai lelukei.

112 Üa filätä pwe üpwe apwönüetä om kewe allük fansoun meinisin
tori pololan manauai.

113 Üa oput ekewe aramas mi tiperuu,
nge üa aücheani om allük.

114 En ai lenien op me ai chon tümwün.

Üa anomu ai apilükülük won om kewe kapas.

115 Oupwe sü seniei, ämi chon föri mine a ngau,
pwe üpwe aleasochisi än ai Kot kewe allük.

116 Kopwe alisie pwe üpwe tongeni manau, usun ka fen pwon,
nge kosap mwütätä pwe üpwe lichipüng lon ai apilükülük.

117 Kopwe amwöchüeitä pwe üpwe manau,
üpwe meniniti om kewe allük fansoun meinisin.

118 Ka oput chokewe meinisin mi aleasolap ngeni om kewe allük.
Ewer, ar tipachemsolä esap wor lomotan.

119 Ekewe aramasangau meinisin won fanüfan ra usun chök mettoch mi
limengau me fän mesom,

iei mine üa aücheani om kewe öüröür.

120 Inisi a chech ren ai niueituk.

Üa niuokus ren om kewe kapwüng.

121 Üa fen föri mine a wenechar o pwüng,
kosap likitiei ngeni chon ariaföüüei.

122 Kopwe pwon pwe kopwe alisie ngang noum chon angang,
nge kosap mwüt ngeni ekewe chon lamalamtekia pwe repwe ariaföüüei.

123 Mesei ra toputopula ren ai aköürü om kopwe amanauaei,
pwal ren ai aköürü om kopwe apwönüetä om kewe pwon mi pwüng.

124 Lon om föföör ngeniei ngang noum chon angang kopwe pwäri om tong
ellet

o aiti ngeniei om kewe allük.

125 Ngang noum chon angang, kopwe ngeniei mirit
pwe üpwe tongeni silei om kewe allük.

126 Ai Samol mi Lapalap, a tori fansoun pwe kopwe föri om angang,

pun aramas ra puri om allük.

¹²⁷ Ellet, üa aücheani om kewe allük lap seni kolt
me kolt mi mürina.

¹²⁸ Iei mine üa apwönüetä om kewe öüröür meinisín,
nge üa oput ekewe föför mi mwäl.

¹²⁹ Om kewe allük ra fokun amwarar,
iei mine üa aleasochisiir ren unusen lelukei.

¹³⁰ Lupwen a suk ngenikem masouen om kewe kapas, a wor saram,
a ngeni ekewe chon wewemang tipachem.

¹³¹ Lon ai positi om kewe allük
üa amassaw o ngasepwich.

¹³² Kopwe kuluto o ümöümöch ngeniei,
usun ka föri ngeni chokewe mi echenuk.

¹³³ Kopwe anükücharaei pwe üsap tur, usun ka pwon,
nge kosap mwüt ngeni tipis epwe nemenieila.

¹³⁴ Kopwe angasaei seni ekewe aramas mi ariaföüüei,
pwe üpwe tongeni aleasochisi om kewe öüröür.

¹³⁵ Kopwe netiu woi ngang noum chon ngang fän om kirikiröch
o aiti ngeniei om kewe allük.

¹³⁶ Chönün mesei ra pupu usun chanpupu,
pun aramas resap aleasochisi om kewe allük.

¹³⁷ Ai Samol mi Lapalap, en ka pwüng,
nge om kewe kapwüng ra pwüng.

¹³⁸ Om kewe allük ka ngenikem ra pwüng,
ra pwal unusen allükülük.

¹³⁹ Ai tiliken a apwangapwangaeila,
pun chon oputaei ra tümwününgaei om kewe kapas.

¹⁴⁰ Om kewe pwon ra asosotöch,
ngang noum chon ngang üa aücheaniir.

¹⁴¹ Üa itengau o küna koput,
nge üsap manlükala om kewe öüröür.

¹⁴² Om we pwüng a nom tori feilfeilachök,
nge om allük a let.

¹⁴³ Weires me eniweniw ra toriei,
nge om kewe allük ra apwapwaei.

¹⁴⁴ Om kewe allük ra pwüng tori feilfeilachök.
Kopwe ngeniei mirit pwe üpwe manau.

¹⁴⁵ Üa siö ngonuk ren unusen lelukei.
Ai Samol mi Lapalap, kopwe pälüeniei.
Ngang üpwe aleasochisi om kewe allük.

¹⁴⁶ Üa siö ngonuk.

Kopwe amanauaei pwe üpwe apwönüetä om kewe allük.

¹⁴⁷ Üa pwätä wünümweerän o siö pwe kopwe alisiei.

Üa apilükülükü om kewe kapas.

¹⁴⁸ Üa nenela lon unusen pwin
pwe üpwe ekinlonei om we pwon.

¹⁴⁹ Kopwe aüselinga mweliei lon om tong ellet.

Ai Samol mi Lapalap, kopwe amanauaei fän om pwüing.

150 Chokewe mi ariaföüüei ra kaneto fän ar ekingau,
nge resap fokun apwönüetä om kewe allük.

151 Nge en ka arap ngeniei, ai Samol mi Lapalap,
om kewe allük meinisin ra let.

152 Seni me lomlom üa silei seni om kewe allük,
pwe ka anüküchareer tori feilfeilachök.

153 Kopwe nengeni ai riaföü o angasaei,
pun üsap manlükala om allük.

154 Kopwe peniei o angasaei,
kopwe amanauaei, usun ka pwon.

155 En kosap amanaua ekewe aramasangau,
pun resap aleasochisi om kewe allük.

156 Ai Samol mi Lapalap, om ümöümöch a lapalap,
kopwe amanauaei fän om pwüing.

157 Ra men chomong chon ariaföüüei me chon ü ngeniei,
nge ngang üsap tok seni om kewe allük.

158 Fän koput üa nenengeni ekewe aramas resap allükülük,
pun ir resap aleasochisi om kewe allük.

159 Kopwe ekieki usun ai aücheani om kewe öüröür.
Kopwe tümwünü manauaei fän om tong ellet.

160 Masouen om kewe kapas meinisin a let.

Om kewe allük mi pwüing meinisin ra nonom tori feilfeilachök.

161 Ekewe samol ra ariaföüüei nge esor popun,
nge ngang üa meniniti om kewe kapas.

162 Üa pwapwa ren om kewe pwon
usun eman mi angei chomong liapan.

163 Üa oput o anioputa chofana,
nge üa aücheani om allük.

164 Üa mwareituk fän fisu lon eu rän
fän iten om kewe allük mi pwüing.

165 Chokewe mi aücheani om allük ra fokun kinamwe.
Esap wor och ra tongeni chepetek ren.

166 Ai Samol mi Lapalap, üa apilükülükü om kopwe amanauaei,
üa pwal apwönüetä om kewe allük.

167 Üa aleasochisi om kewe allük,
üa wesewesen aücheaniir.

168 Üa aleasochisi om kewe öüröür me om kewe allük,
pun en ka küna meinisin mine üa föri.

169 Ai Samol mi Lapalap, amwo ai siö epwe toruk.
Kopwe ngeniei mirit usun ka apasa.

170 Ai iotekin tüngor epwe toruk.
Kopwe angasaei usun ka pwon.

171 Üpwe fokun mwareituk
pwe ka aiti ngeniei om kewe allük.

172 Üpwe kölü om kapas,
pun om kewe allük meinisin ra pwüing.

173 Amwo kopwe molotä pwe kopwe alisie,

pun üa filätä om kewe öüröür pwe üpwe apwönüretä.

¹⁷⁴ Ai Samol mi Lapalap, üa positi om kopwe amanauaei, üa fokun pwapwaiti om allük.

¹⁷⁵ Kopwe mwüt ngeniei pwe üpwe manau, pwe üpwe tongeni mware-ituk,

nge om kewe pwüüng repwe alisiei.

¹⁷⁶ Üa mwälechfeil usun eman sip mi mwälechela, kopwe küttaei ngang noum chon angang, pun üsap manlükala om kewe allük.

120

Eu iotekin tüngor ngasala seni chon atuputup

120.1-7

Echö kölün feitä *.

¹ Üa siö ngeni ewe Samol mi Lapalap lon ai riaföü, nge i a pälüeniei,

² “Ai Samol mi Lapalap, kopwe angasaei seni ekewe chon chofana me chon atuputup.”

³ Ämi chon atuputup, met Kot epwe liwini ngenikemi? Met epwe pwal föri ngenikemi?

⁴ Epwe apwüngükemi ren än eman sounfiu föün esefich mi ken, ren moochen chia mi sarara.

⁵ Feingaei pwe üa siamüfetal lon Mesek o nonom lon imwen ekewe chon Ketar.

⁶ A fansoun langatam ai imweimw lein chokewe mi oput kinamwe.

⁷ Üa tipeni kinamwe. Nge lupwen üa kapas usun, ir ra tipeni maun.

121

Kot om chon tümwün

121.1-8

Echö kölün feitä.

¹ Üa anetai mesei ngeni ekewe chuk.

Ia alilisi epwe feito me ie?

² Alilisi epwe war me ren ewe Samol mi Lapalap mi förätä läng me fanüfan.

³ I epwe amwöchuk pwe kosap mit, ewe mi tümwünuk esap aiesum.

⁴ Nengeni, ewe mi tümwünü Israel esap aiesum, esap pwal möür.

⁵ Ewe Samol mi Lapalap epwe tümwünuk, i epwe annüruk o nom pelifichum.

⁶ Akkar esap afeiengauok lerän, nge maram esap afeiengauok lepwin.

* **120::** Ekei kölfel seni sopun 120 tori sopun 134 chon Israel ra sou eäniir lupwen ar feitä Jerusalem fansoun ar kewe chulap.

⁷ Ewe Samol mi Lapalap epwe tümwünuk seni feiengau meinisin, i epwe tümwünü manauom.

⁸ Ewe Samol mi Lapalap epwe tümwünü om towu me om tolong seni ikenai tori feilfeilachök.

122

Eu iotekin kinamwe fän iten chon Jerusalem

122.1-9

Echö kölün feitä än Tafit.

¹ Üa pwapwa, lupwen ra üreniei,
“Ousipwe feila ren imwen ewe Samol mi Lapalap.”

² Iei äm aia tolong lon asamalapom kewe o ütä lon, en Jerusalem.

³ Jerusalem a käüsefälitä
usun eu telinimw mi nükünüköch.

⁴ Chon ekewe ainang ra feitä ie,
ekewe ainangen Israel,
pwe repwe kilisou ngeni ewe Samol mi Lapalap,
usun a fen allük ngeniir.

⁵ Ikenan mi wor lenien mot fän iten chokewe mi eäni kapwüng,
ekewe lenien motun king fän iten chon leimwen Tafit.

⁶ Oupwe tüngor pwe epwe wor kinamwe lon Jerusalem,
“Amwo chokewe mi echenuk repwe feiöch.

⁷ Epwe wor kinamwe lon tittum, Jerusalem,
o imwom kewe imwen king repwe nükünük.”

⁸ Pokiten pwi me chienei kewe üpwe apasa ngeni Jerusalem,
“Kinamwe epwe nonom lomw.”

⁹ Pokiten imwen ewe Samol mi Lapalap ach we Kot
üpwe kütta om feiöch.

123

Eu iotekin tüngor ümöümöch

123.1-4

Echö kölün feitä.

¹ Üa netä reöm, ai Samol mi Lapalap,
en ewe mi mot won ewe lenien motun king lon läng.

² Usun mesen ekewe chon angang mwän ra netä ren ar samol,
pwal usun mesen eman chon angang fefin a netä ren an samol fefin,
iei usun mesach ra netä ren ewe Samol mi Lapalap ach we Kot,
tori epwe ümöümöch ngenikich.

³ Kopwe ümöümöch ngenikem, äm Samol mi Lapalap, kopwe ümöümöch
ngenikem.

Pun a kon watte än aramas aitengauakem.

⁴ A kon langatam fansoun äm riaföü ren än ekewe mi wöümong esitakem,
pwal ren än ekewe mi lamalamtekia aitengauakem.

124

Kilisou ren ngasala seni chon oput

124.1-8

Echö kölün feitä än Tafit.

¹ Chon Israel repwe apasa, “Are ewe Samol mi Lapalap esap nom rech,

² are ewe Samol mi Lapalap esap nom rech,

lupwen aramas ra maun ngenikich,

³ repwe oromanauekichela

lon ar song mi watte ngenikich.

⁴ Iwe, ewe lölö epwe pwölükichela,

ewe öütöüt epwe purikichela,

⁵ nge nonoon ekewe koluk repwe pwölükichela.

⁶ Sipwe mwareiti ewe Samol mi Lapalap,

pun esap mwüt ngeni chon oputakich pwe repwe arosakichela.

⁷ Sa tiwela usun eman machang a tiwela seni ewe sär, ewe chon sär a soni.

Ewe sär a mwü, nge kich sa tiwela.

⁸ Alilich a feito seni ewe Samol mi Lapalap,

ewe mi föri läng me fanüfan.

125

Kot a nom pwelin ünükün nöün aramas

125.1-5

Echö kölün feitä.

¹ Chokewe mi apilükülükü ewe Samol mi Lapalap ra usun chök ewe chuk
Sion,

esap tongeni mwökütüküt,

nge epwe chök nonom tori feilfeilachök.

² Usun ekewe chuk ra nom pwelin ünükün Jerusalem,

iei usun ewe Samol mi Lapalap a nom pwelin ünükün nöün aramas

seni ei fansoun tori feilfeilachök.

³ Än ekewe aramasangau nemenem esap nonomopos won ewe fanü mi
inet ngeni ekewe chon pwüing,

pun mürin, ekewe chon pwüing repwe pwal föri mine a ngau.

⁴ Ai Samol mi Lapalap, kopwe föri mine a mürina ngeni chokewe mi föri
mine a mürina,

pwal ngeni chokewe mi wenechar lon leluker.

⁵ Nge chokewe mi rikila ngeni ekewe al mi pwor

kopwe asechirela fiti ekewe chon föföringau.

Kinamwe epwe nom lon Israel.

126

Kilisou fän iten än ekewe aramas liwinsefäl seni ar oola

126.1-6

Echö kölün feitä.

¹ Lupwen ewe Samol mi Lapalap a aliwinisefälilikich ngeni Sion seni ach
oola,

sa usun chök chon tan.

² Lon ena fansoun kich sa takirikir. Sa mweireir fän pwapwa.

Mürin, chon ekewe mwü ra apasa lefiler,

“Ewe Samol mi Lapalap a föri föföri mi amwarar fän iter.”

³ Ellet, ewe Samol mi Lapalap a föri föföör mi amwarar fän itach, iei popun sa pwapwa.

⁴ Ai Samol mi Lapalap, kopwe aliwinisefälieto ekewe chon oola meinisin, usun chök ekewe chanpupu lon Nekep ra lölösefäl ren üt.

⁵ Chokewe mi fofot fän kechü repwe kinikin fän mweireiren pwapwa.

⁶ Eman mi feila fän kechü o uwei föün irä pwe epwe fotuki, epwe liwinto fän mweireiren pwapwa o uwato kinian ua.

127

Feiöch a feito seni Kot

127.1-5

Echö kölün feitä än Salomon.

¹ Are ewe Samol mi Lapalap esap aüetä ewe imw, a solap än ekewe chon aüetä angang.

Are ewe Samol mi Lapalap esap mamasa ewe telinimw, a solap än ekewe chon mas nenela le mamas.

² A solap ämi pwätäkai pwal ämi annutumang, pwe oupwe angang weires fän iten enemi mongö.

Pun Kot a fang ngeni nöün kewe a echeniir mettoch meinisin mine ra osupwang ren, lupwen ra annut.

³ Nau eu lifang seni ewe Samol mi Lapalap, ir eu liwin mi öch.

⁴ Ekewe ät eman a nöüni lupwen an alüal ra usun chök ekewe föün esefich lepöün eman sounfiu.

⁵ A feiöch ewe mwän mi ur an lenien föün esefich ren ei sokun föün. Ätewe esap säw, lupwen epwe kapas ngeni chon oputan lon lenien kapwüng.

128

A feiöch eman mi niuokusiti Kot

128.1-6

Echö kölün feitä.

¹ Ra feiöch ir meinisin mi niuokusiti ewe Samol mi Lapalap, chokewe mi aleasochisi an kewe allük.

² Kopwe mongö uän angangen poum, kopwe pwapwa o feiöch.

³ Pwülüom epwe wewe ngeni efoch irän wain mi fokun ua me lon imwom.

Noum kana repwe wewe ngeni fasaren ewe irä olif ünükün om chepel.

⁴ Iei usun feiöchün ewe mwän mi niuokusiti ewe Samol mi Lapalap.

⁵ Ewe Samol mi Lapalap epwe afeiöchuk seni Sion.

Amwo kopwe küna feiöchün Jerusalem lon ränin manauom meinisin.

⁶ Amwo kopwe küna nöün noum kana. Kinamwe epwe nom won Israel.

129

Eu iotek pwe chon oputen Sion repwe kuf

129.1-8

Echö kölün feitä.

¹ Israel epwe apasa, “Chon oputaei ra fokun ariaföüüei seni leküküni.

² Ewer, ra fokun ariaföüüei seni leküküni, nge resap tongeni akufuei.

³ Ra akinasa söküri pwe a fokun watte kinasan, usun chök eman chon tuw pwül a tuw warawar mi langatam.

⁴ Nge ewe Samol mi Lapalap a pwüing.

I a angasaei seni än ekewe aramasangau fötekiniei.

⁵ Amwo meinisin mi oput Sion repwe timär fän säw.

⁶ Amwo repwe wewe ngeni fetil won osun ekewe imw mi pwasala me mwen an märitä,

⁷ ewe chon kinikin esap tongeni amasoua pöün ren, nge ewe chon föri pilük esap tongeni pilükü o efiti.

⁸ Nge chokewe mi pwerela resap apasa ngeniir,

“Än ewe Samol mi Lapalap feiöch epwe nom womi.

Äm aia afeiöchükemi fän iten ewe Samol mi Lapalap.”

130

Ach apilükülüküni än Kot amanauakich

130.1-8

Echö kölün feitä.

¹ Ai Samol mi Lapalap, üa siö ngonuk seni lon ekewe leni mi alolol.

² Ai Samol, kopwe rongorong mweliei.

Kopwe aü selingom ngeni ai kewe tüngor pwe kopwe ümöümöch ngeniei.

³ Are en, äm Samol mi Lapalap, kopwe maketiu äm kewe tipis, iö epwe tongeni manau?

⁴ Nge en ka amusala äm tipis, pwe aipwe niuokusituk.

⁵ Üa fokun witiwiti ewe Samol mi Lapalap, üa apilükülükü an kapas.

⁶ Üa witiwiti ewe Samol, lap seni än ekewe chon mas witiwiti an epwe ränila, lap seni än ekewe chon mas witiwiti an epwe ränila.

⁷ Ämi chon Israel, oupwe apilükülükü ewe Samol mi Lapalap.

Pun tong ellet a nom ren ewe Samol mi Lapalap, a pwal watte an angangen amanaua aramas.

⁸ I epwe amanaua chon Israel seni ar tipis meinisin. ✧

131

Ach kinamwe lon Kot

131.1-3

Echö kölün feitä än Tafit.

¹ Ai Samol mi Lapalap, üsap tipetekia lon lelukei, mesei esap wolamalamtekia.

✧ 130:8: Mat 1.21; Tit 2.14

Üsap aosukosukaei ren mettoch mi kon tekia me amwarar ngeniei.

² Nge üa amosonosonaei o akinamweeila, usun eman semirit a mosonosonola lepöün inan, lupwen a wes seni oupun.

Lelukei a mosonosonola usun eman semirit mi wes seni oupun inan.

³ Ämi chon Israel, oupwe apilükülükü ewe Samol mi Lapalap seni ei fansoun tori feilfeilachök.

132

*Eu iotekin tünigor feiöch won ewe imwenfel
132.1-18*

*Eu iotekin tünigor feiöch won ewe imwenfel
132.1-18*

Echö kölün feitä.

¹ Ai Samol mi Lapalap, kopwe chechemeni Tafit me an kewe riaföü meinisin a eäni.

² Kopwe chechemeni usun an pwon fän akapel ngonuk me an pwon ngonuk, en Ewe mi Unusen Tekia, än Jakop we Kot.

³ “Üsap tolong lon imwei ika konola lon kiei.

⁴ Üsap mochen aiesum ika annut

⁵ tori ai üpwe küna eu leni fän iten ewe Samol mi Lapalap, eu imw fän iten Ewe mi Unusen Tekia, än Jakop we Kot.”

⁶ Sa rongorong usun ewe pworofel me lon Petleem, sa küna me lon ekewe mälämälen Jearim.

⁷ Sa apasa, “Ousipwe feila ren imwen ewe Samol mi Lapalap o fel ngeni me arun lenien puun pechen.”

⁸ Ai Samol mi Lapalap, kopwe feito o tolong lon ewe imwenfel, en me ewe pworofel asisilen om manaman.

⁹ Noum kewe souasor repwe föri mine a pwüing fansoun meinisin, nge noum kewe chon pin repwe mweireir fän pwapwa.

¹⁰ Pokiten Tafit noum we chon angang kosap aliwini noum we mi kepit. ✧

¹¹ Ewe Samol mi Lapalap a akapel ngeni Tafit eu pwon mi let, nge esap atai,

“Üpwe awisa eman me lein noum kewe mwän epwe siwiliik lon wisom wisen king. ✧

¹² Are noum kewe mwän repwe tümwünü ai we pwon me ai kewe allük üa aiti ngeniir, nöür kewe mwän repwe pwal siwiliik lon wisom wisen king tori feilfeilachök.”

¹³ Pun ewe Samol mi Lapalap a fen filätä Sion.

I a mochen pwe epwe lenien imwan,

¹⁴ “Iei ewe leni üpwe nonom lon tori feilfeilachök, iei ai we lenien nemenem, pun iei ai mochen.

¹⁵ Üpwe afeiöchü Sion ren chomong wöü,

Ûpwe awora enen ekewe chon wöüngau.

¹⁶ Ûpwe ngeni ekewe souasor seni Sion manau,
nge nöün chon pin kana repwe mweireir fän pwapwa.

¹⁷ Ikenan Ûpwe awora eman mwirimwirin Tafit mi pöchökül epwe king,
Ûpwe föri pwe nei we mi kepit epwe chök nemenem. ✱

¹⁸ Iwe, Ûpwe awora säw ngeni chon oputan,
nge won möküren ewe mi kepit epwe wor epa mwärämwär mi ling.”

133

Feiöchün än pwipwi tipeufengen

133.1-3

Echö kölün feitä.

¹ Nengeni usun mürinan me apwapwan,
lupwen pwipwi ra nonomfengen fän tipeeu.

² Ei sokun a usun chök löön kepit mi aüchea a nitiu won möküren Aaron
o sputiu won alüsan,
a pwal sputiu won kalan üfan.

³ A pwal usun chök amurenipwinin ewe chuk Hermon,
a püngütü won ekewe chukun Sion.
Pun ikenan ewe Samol mi Lapalap a anomu an feiöch,
ewe manau esemüch.

134

Kapasen fön ngeni ekewe chon mas lepwin

134.1-3

Echö kölün feitä.

¹ Oupwe feito, oupwe mwareiti ewe Samol mi Lapalap, ämi nöün chon
angang meinisin,

ämi mi angang ngeni lon imwan lepwin.

² Oupwe aitietä pöümi lon ämi iotek ngeni ewe leni mi pin
o mwareiti ewe Samol mi Lapalap.

³ Ewe Samol mi Lapalap, ewe mi föri läng me fanüfan
epwe afeiöchükemi seni Sion.

135

Kot a tekia, nge ekewe uluulun anümwäl ra lomotongau

135.1-21

¹ Ousipwe mwareiti ewe Samol mi Lapalap.

Oupwe mwareiti iten ewe Samol mi Lapalap, ämi nöün kewe chon
angang.

Oupwe mwareiti i,

² ämi mi angang lon imwen ewe Samol mi Lapalap,
ämi mi nom lon ekewe leni ünükün imwen ach we Kot.

³ Oupwe mwareiti ewe Samol mi Lapalap, pun a kirikiröch.
Oupwe kölün mwareiti itan, pun i a ümöümöch.

⁴ Ewe Samol mi Lapalap a filätä Jakop fän püsin itan,
a filätä ekewe chon Israel pwe epwe nöüniir.

⁵ Üa silei pwe ewe Samol mi Lapalap a tekia,

a nom asen ekewe kot meinisin.

⁶ Ewe Samol mi Lapalap a föri meinisin
mine a efich lon läng pwal won fanüfan,
lon ekewe matau pwal lon ekewe leni mi alolol meinisin.

⁷ I ewe mi atötäi ekewe kuchu me lesopun fanüfan,
a förätä inefi fiti püngün üt,
a pwal atowu asepwäl seni an lenien iseis.

⁸ I ewe mi niela ekewe mwänichi lon Isip,
ekewe mwänichien aramas me ekewe mweinöün man,
⁹ a föri ekewe asisil me manaman lefilen ekewe chon Isip,
pwe epwe apwüngü Farao me nöün kewe nöüwis meinisin.

¹⁰ I ewe mi ataela chomong mwü
o niela ekewe king mi pwora.

¹¹ A niela Sihon ewe kingen chon Amor,
pwal Ok ewe kingen Pasan
me ekewe kingen Kanaan meinisin,

¹² nge fanüer a ngeni nöün kewe aramasen Israel pwe repwe fanüeni.

¹³ Ai Samol mi Lapalap, itom a nonom tori feilfeilachök.

Ai Samol mi Lapalap, iteüöchum a nonom fansoun meinisin.

¹⁴ Pun ewe Samol mi Lapalap epwe alletätä pwüngün nöün kewe aramas
o eäni tong ngeni nöün kewe chon angang.

¹⁵ Än chon ekewe mwü uluulun anümwäl seni silifer me kolt
aramas chök ra föri.

¹⁶ A wor awer, nge resap tongeni kapas,
a wor meser, nge resap tongeni küneer.

¹⁷ A wor selinger, nge resap tongeni rongorong,
resap pwal tongeni ngasangas.

¹⁸ Ewer, chokewe mi föri ekewe uluulun anümwäl o lüküür
repwe pwal wewe ngeni ekewe uluulun anümwäl. ✧

¹⁹ Ämi chon Israel, oupwe mwareiti ewe Samol mi Lapalap.

Ämi mwirimwirin Aaron, oupwe mwareiti ewe Samol mi Lapalap.

²⁰ Ämi mwirimwirin Lefi, oupwe mwareiti ewe Samol mi Lapalap.

Ämi meinisin mi niuokusiti ewe Samol mi Lapalap, oupwe mwareiti i.

²¹ Oupwe mwareiti ewe Samol mi Lapalap seni lon Sion,
i ewe mi imweimw lon Jerusalem.

Ousipwe mwareiti ewe Samol mi Lapalap.

136

Mwareiti än Kot tong ellet

136.1-26

¹ Oupwe kilisou ngeni ewe Samol mi Lapalap, pun i a kirikiröch,
an tong ellet a nonom tori feilfeilachök. ✧

² Oupwe kilisou ngeni ewe Kot mi tekia seni ekewe kot meinisin,
an tong ellet a nonom tori feilfeilachök.

³ Oupwe kilisou ngeni ewe Samol mi tekia seni ekewe samol meinisin,
an tong ellet a nonom tori feilfeilachök.

✧ **135:18:** Kölf 115.4-8; Pwär 9.20 ✧ **136:1:** 1.Kron 16.34; 2.Kron 5.13; Esr 3.11; Kölf 100.5; 106.1; 107.1; 118.1; Jer 33.11

4 Ewe Samol mi Lapalap i chök ewe mi föri ekewe manaman mi amwarar,
an tong ellet a nonom tori feilfeilachök.

5 I ewe mi föri ekewe läng ren an silelap,
an tong ellet a nonom tori feilfeilachök. ✧

6 A anomu fanüfan won ekewe koluk,
an tong ellet a nonom tori feilfeilachök. ✧

7 A föri ekewe saram mi watte,
an tong ellet a nonom tori feilfeilachök:

8 ewe akkar pwe epwe tin lerän,
an tong ellet a nonom tori feilfeilachök,

9 ewe maram me ekewe fü pwe repwe tin lepwin,
an tong ellet a nonom tori feilfeilachök. ✧

10 Iwe, i a niela ekewe mwänichien Isip,
an tong ellet a nonom tori feilfeilachök. ✧

11 A emwenawu chon Israel seni Isip,
an tong ellet a nonom tori feilfeilachök, ✧

12 ren pöün mi manaman o aköpöü,
an tong ellet a nonom tori feilfeilachök.

13 A aimwüfeseni ewe Setipar lon ruu kinikin,
an tong ellet a nonom tori feilfeilachök,

14 pwe chon Israel repwe pwerela lukalapan,
an tong ellet a nonom tori feilfeilachök.

15 Nge a aturalong Farao me nöün mwichen sounfiu lon ewe Setipar,
an tong ellet a nonom tori feilfeilachök. ✧

16 A emweni nöün kewe aramas lon ewe fanüapö,
an tong ellet a nonom tori feilfeilachök.

17 A niela ekewe king mi lap,
an tong ellet a nonom tori feilfeilachök.

18 A pwal niela ekewe king mi iteföüla,
an tong ellet a nonom tori feilfeilachök:

19 Sihon ewe kingen chon Amor,
an tong ellet a nonom tori feilfeilachök, ✧

20 me Ok ewe kingen Pasan,
an tong ellet a nonom tori feilfeilachök. ✧

21 A ngeni chon Israel fanüer pwe repwe fanüeni,
an tong ellet a nonom tori feilfeilachök,

22 a ngeni Israel nöün we chon angang ekewe fanü pwe epwe fanüeni,
an tong ellet a nonom tori feilfeilachök.

23 I ewe mi chechemenikich lon ach tekison,
an tong ellet a nonom tori feilfeilachök,

24 o chimanükich seni chon oputach,
an tong ellet a nonom tori feilfeilachök.

25 A amongöni mönümanau meinisin,
an tong ellet a nonom tori feilfeilachök.

26 Oupwe kilisou ngeni ewe Koten läng,
an tong ellet a nonom tori feilfeilachök.

137

Än ekewe chon oola Pabilon kechü

137.1-9

¹ Iwe, ünükün ekewe chanpupun Pabilon aia mottiu o kechü, lupwen aia chechemeni Sion.

² Ikenan aia asapätä nöüm kewe ükülele won ekewe silifö.

³ Ikenan ekewe chon liapenikem ra ürenikem pwe aipwe köl, ekewe chon ariaföüükem ra ariänikem pwe aipwe pwapwa, ra apasa, “Oupwe eäni ngenikem echö ekewe kölün Sion.”

⁴ Epwe ifa usun, äm aipwe tongeni eäni kölün ewe Samol mi Lapalap lon fanüen ekis?

⁵ Are üpwe manlükala en, Jerusalem, pöüifichi epwe pwasala.

⁶ Chönawei epwe pachätä fän fongochi, are üsap chechemenük, are üsap ekieki pwe en, Jerusalem, kopwe ai pwapwa lap seni mettoch meinisin.

⁷ Ai Samol mi Lapalap, kopwe chechemeni mine ekewe chon Etom ra föri lon ewe ränin Jerusalem a tala.

Kopwe chechemeni usun ar apasa, “Ataela, ataela, aturätü tori longo-longun fan.”

⁸ En Pabilon kopwe tala.

Epwe pwapwa ätewe mi ngonuk chappen om föföör ngenikem. ✱

⁹ Epwe pwapwa ätewe mi angei noum kewe semirit o monerela ngeni eu achau.

138

Kilisou ren än Kot feiöch

138.1-8

Echö än Tafit köl.

¹ Ai Samol mi Lapalap, üa kilisou ngonuk ren unusen lelukei.

Üa kölün mwareituk me fän mesen ekewe kot.

² Üa chapetiu ngeni imwom mi pin o kilisou ngeni itom,

pokiten om tong ellet me om allükülük.

Pun en ka atekiatä itom me om kapas asen ekewe mettoch meinisin.

³ Lupwen üa kökkö, ka pälüeniei, ka apworaiei o apöchöküla lelukei.

⁴ Ai Samol mi Lapalap, ekewe king won fanüfan meinisin repwe mware-ituk,

pun ra rongorong om kapas.

⁵ Iwe, repwe kölü om kewe föföör, pun a tekia lingom.

⁶ Inamwo ika ka fokun tekia,

✱ 137:8: Pwär 18.6

ka afäli ekewe chon tekison.
Nge ka silleni ekewe chon lamalamtekia me toau.

⁷ Nge are üa nom lon riaföü,
en ka tümwünü manaei.
Ka ü ngeni ekewe chon oputaei mi song ngeniei
o amanauaei ren om manaman.
⁸ Ai Samol mi Lapalap, kopwe apwönüetä ekiekin letipom ngeniei.
Ai Samol mi Lapalap, om tong ellet a nonom tori feilfeilachök.
Kosap likitala ewe angang ka popuetä.

139

Kot a silei o tufich ngeni mettoch meinisin
139.1-24

Ngeni ewe mi emweni chon köl: Echö än Tafit köl.
¹ Ai Samol mi Lapalap, en ka atittinaei, ka pwal sileei.
² Ka silei fansoun ai mottiu me ai ütä,
ka silei ai ekiek kana me toau.
³ Ka nenengeniei, lupwen üa angang, pwal lupwen üa asösö,
ka silei ai kewe föför meinisin.
⁴ Nengeni, mwen ai üsamwo kapas,
en, ai Samol mi Lapalap, ka fen unusen silei mine üpwe apasa.
⁵ Ka pweliei me lükisöküri pwal fän mesei,
ka pwal iseis poum woi.
⁶ Ei sokun silelap a fokun amwarar ngeniei,
a pwal tekia ngeniei pwe üsap tongeni to won.
⁷ Ia üpwe feila ie seni Ngünüm?
Nge ia üpwe süla ie seni fän mesom?
⁸ Are üpwe feitä läng, en ka nom ikenan.
Nge are üpwe kon lon lenien sotup, en ka pwal nom ikenan.
⁹ Are üpwe ässila ngeni ötiu ewe ia akkar a tötä me ie,
ika nonom lesopolan matau me lotou,
¹⁰ en kopwe emweniei me ikenan,
nge pöüfichum epwe amwöchüei.
¹¹ Are üpwe apasa pwe ro chopwak epwe pwölüeila,
nge ewe saram ünüki epwe wiliti pwin,
¹² inamwo nge ewe ro chopwak esap roch me reöm,
nge pwin a saram usun lerän,
pun ro chopwak a usun chök saram me reöm.
¹³ En ewe mi förätä masouen loi,
en ka achufengeniei me lon letipen inei.
¹⁴ Üa mwareituk, pokiten a amairü o amwarar om föri ei.
Om kewe föför ra amwarar.
Üa fokun sileöchü ei.
¹⁵ Chün inisi resap mon senuk,
lupwen üa för lemonomon o kachufengen
lon ekewe leni mi alolol lon fanüfan.
¹⁶ En ka fen künaei, lupwen esamwo wor uluuli.
Iteiten ränin manaei meinisin, ka awora fän itei, ra fen mak lon noum
puk

mwen ar resamwo fis.

¹⁷ Ai Samol mi Lapalap, om kewe ekiek ra fokun aüchea ngeniei.
Ra kon fokun chomong.

¹⁸ Ika ngang üpwe aleaniir, repwe chomong seni föün pi.
Lupwen üa pwök, üa chüen nom reöm.

¹⁹ Ai Kot, amwo kopwe niela ekewe aramasangau.
Amwo ekewe mwän mi nimanau ei aramas repwe sü seniei.

²⁰ Ir ekewe mi kapasingau usum,
ekewe chon oputom ra föünimwäli itom.

²¹ Ai Samol mi Lapalap, üa fokun oput chokewe mi oputok.
Üa fokun nou chokewe mi ü ngonuk.

²² Üa fokun oput ir
o aleanirelong lein chon oputaei.

²³ Ai Kot, kopwe atittinaei o silei letipei.
Kopwe sotuniei o silei ai ekiek.

²⁴ Kopwe pi ika mi wor och mi ingau lon manau ei,
nge kopwe emweniei won ewe al esemüch.

140

*Än Tafit iotekin tüngor pwe Kot epwe tümwünü seni chon ariaföüü
140.1-13*

Ngeni ewe mi emweni chon köl: Echö än Tafit köl.

¹ Ai Samol mi Lapalap, kopwe angasaei seni aramas mi ngau,
kopwe tümwünüei seni aramas mi mwäneson,

² chokewe mi ekiekietä föför mi ngau lon leluker
o popuetä maun iteiten fansoun.

³ Ra akkeni chönawer pwe a ken usun chönawen eman serepenit,
nge ar kapas a usun chök poisonun serepenit. ✨

⁴ Ai Samol mi Lapalap, kopwe epeti seniei ekewe aramasangau.
Kopwe tümwünüei seni aramas mi mwäneson,
chokewe mi rawangauaei pwe üpwe chepetek.

⁵ Aramas mi lamalamtekia ra aopala eu sär fän itei,
ra ameresala ar kewe chew
o soni ar kewe likatup aropen ewe al pwe repwe liapeniei.

⁶ Üa kapas ngeni ewe Samol mi Lapalap, “En ai Kot.”

Ai Samol mi Lapalap, kopwe aüselinga ai kewe tüngor pwe kopwe
ümöümöch ngeniei.

⁷ Ai Samol mi Lapalap ai Kot, en chon angasaeila mi pöchökül,
ka epeti seniei feiengau lon maun.

⁸ Ai Samol mi Lapalap, kosap mwütätä mochenin ekewe aramasangau,
kopwe atai ar kewe rawangau.

⁹ Chokewe mi pwelifeiliei ra chimwetä möküerer.
Amwo ar kapasen eniweniw ngeniei epwe püsin küür.

¹⁰ Amwo molien ekkei mi sarara epwe turutiu wor.
Repwe katurulong lon ekewe pwang, nge resap chüen tosefäliwu.

11 Amwo ekewe chon etipisimwäli chon arur resap nonomotiu lon ewe fanü.
Amwo feiengau epwe chekaiiti ewe aramas mi mwäneson.

12 Üa silei pwe en ai Samol mi Lapalap ka peni ekewe mi wöüngau o eäni pwüing ngeni ekewe chon mwelele.

13 Ellet, ekewe chon pwüing repwe mwareiti itom, ekewe mi wenechar repwe nonom fän mesom.

141

Iotekin tüngor tümwün seni ngau

141.1-10

Echö än Tafit köl.

¹ Ai Samol mi Lapalap, üa kökkörük, kopwe kaito rei.

Kopwe aü selingom ngeni mweliei, lupwen üa kökkörük.

² Ai iotek epwe wewe ngeni eu asoren apach mi pwokus me mwom, ai aitieta pei epwe wewe ngeni eu asoren lekuniol. ✱

³ Ai Samol mi Lapalap, kopwe awora eman chon masen awei, kopwe tümwünü asamen tinawei.

⁴ Kopwe tümwünüei pwe üsap föri mine a ngau, pwe üsap eti ekewe aramasangau lon ar föföringau, üsap pwal etiir le mongö ener mi annö.

⁵ Eman aramasöch epwe wichiei are apwüingüei fän kirikiröch, nge üsap mwüt ngeni ekewe aramasangau pwe repwe asamoluei. Pun lon ai iotek üa pälüeni ar kewe föföri mi ngau fansoun meinisin.

⁶ Lupwen ekewe samol repwe koturutiu seni ekewe achau, ekewe aramas repwe mefi pwe ai kewe kapas ra let.

⁷ Usun eman a tuw pwül o atatakisi, iei usun chür repwe toropas mesen ewe lenien sotup.

⁸ Nge ngang üa chök anomu ai apilükülük womw, en ai Samol mi Lapalap ai Kot.

En ai lenien op.

Kosap asechieilong lon mäla.

⁹ Kopwe tümwünüei seni ewe sär ra anomu fän itei,

pwal seni än ekewe chon föföringau likatuputup.

¹⁰ Ekewe aramasangau meinisin repwe turulong lon püsin ar kewe sär, nge ngang üpwe feila seniir, pun üsap tup lon.

142

Eu iotekin tüngor alilis lon riaföü

142.1-7

(1.Sam 22.1; 24.3)

Echö än Tafit kölün kait, lupwen a nom lon ewe föimw. Eu iotek.

¹ Üa siö ngeni ewe Samol mi Lapalap fän leüömong, üa alapätä mweliei o tüngor ngeni pwe epwe ümöümöch ngeniei.

² Üa uwato ren ai letipengau meinisin o asile ngeni ai kewe riaföü.

³ Lupwen üa apilükingau,

✱ 141:2: Pwär 5.8

i a fen silei mine üpwe föri.

Ekewe chon oputaei ra aopala eu sär fän itei

lon ewe al ia üa fetal ie.

⁴Lupwen üa nennela lepelifichi,
üa küna pwe esap wor eman a alisie,
esap wor ai lenien op,
esap wor eman a tümwünüei.

⁵Ai Samol mi Lapalap, üa siö ngonuk.

Üa üra: En ai lenien op

me ineti me lon fanüen chon manau. ⁶Kopwe afäli ai siö,
pun üa fokun apilükingau.

Kopwe angasaei seni ekewe chon ariaföüei,
pun ra kon pöchökül ngeniei.

⁷Kopwe angasaeila seni lon ewe lenien fötek,
pwe üpwe tongeni mwareiti itom.

Mürin, ekewe chon pwüing repwe mwicheto rei, pokiten ka afeiöchüei.

143

Eu iotekin tünigor ngasala me emwen

143.1-12

Echö än Tafit köl.

¹Kopwe aüselinga ai iotek, ai Samol mi Lapalap,

kopwe aü selingom ngeni ai kewe tünigor
o pälueniei lon om allükülük me pwüing.

²Kosap atolongaei lon om kapwüing, ngang noum chon angang,
pun esap wor eman aramas mi manau a pwüing fän mesom. ✱

³Iwe, ewe chon oputaei a tapweriei
o purieitiu lepwül.

A anomuei lon rochopwak
usun chokewe mi mäla me lom.

⁴Iei mine üa apilükingau,
nge lelukei a fokun niuokus.

⁵Üa chechemeni ewe fansoun lom
o ekieki usun mine ka fen föri.

Üa ekieki usun om kewe föfö.

⁶Üa aitieta pei lon ai iotek ngonuk,
ngüni a kakaituk usun eu fanü mi pwasapwas a kakaiti üt.

⁷Ai Samol mi Lapalap, kopwe müttir le pälueniei,
pun üa fokun apilükingau.

Kosap aopa mesom seniei,
pwe üsap wewe ngeni chokewe mi tolong lon ewe lenien sotup.

⁸Iteiten lesosor kopwe pwäri ngeniei om tong ellet,
pun üa anomu ai apilükülük womw.

Kopwe aiti ngeniei ewe al üpwe fetal won,
pun üa suki ngonuk lelukei.

⁹Ai Samol mi Lapalap, kopwe angasaei seni ekewe chon oputaei.

✱ **143:2:** Rom 3.20; Kal 2.16

Ûa sü ngonuk pwe ùpwe op reöm.

¹⁰ Kopwe aiti ngeniei usun ai ùpwe föri letipom,
pun en ai Kot.

Ngünüm mi mürina epwe emweniei won efoch al mi sosenöch.

¹¹ Ai Samol mi Lapalap, kopwe tümwünü manaei pokiten itom.

Lon om pwüng kopwe emwenieiwu seni ai riaföü.

¹² Kopwe ärala ekewe chon oputaei pokiten ka tongeei
o arosala meinisin mi ariaföüüei,
pun ngang noum chon angang.

144

Eu iotek pwe Kot epwe amanaua o afeiöchükich

144.1-15

Echö än Tafit köl.

¹ Ûpwe mwareiti ewe Samol mi Lapalap ai achau
mi asipa pei ngeni maun,
pwal kumuchi ngeni fiu.

² I ai Kot mi tongeei me imwei imwen maun, ai lenien op mi pöchökül
me ai Chon Amanau,
i a epeti seniei feiengau.

Ûa anomu ai apilükülük won
ewe mi akufätü chon ekewe mwü fai.

³ Ai Samol mi Lapalap, met äüchean aramas pwe ka chüngüw,
nge met äüchean nöün aramas pwe ka ekieki usun? ✧

⁴ Pun eman aramas a wewe ngeni enienin ngasangas,
nge ränin manauan a usun chök och nür mi morokai.

⁵ Ai Samol mi Lapalap, kopwe asanga om we läng o feitiu.
Kopwe atapa ekewe chuk pwe repwe ötüt.

⁶ Kopwe efifi ekewe inefi o atoropasa chon oputom,
kopwe esefichala om kewe föün esefich o tinifeiliir.

⁷ Kopwe aitiätü poum seni pekitä,
kopwe amanauaei seni ekewe koluk mi alolol
o angasaei seni fän nemenien ekewe chon ekis,

⁸ seni chokewe mi chök kapas chofana,
ra mwo nge aitiätä pöüifichir lon ar akapelmwäl.

⁹ Ai Kot, ùpwe eäni ngonuk echö köl mi fö,
ùpwe ettiki ngonuk kitar mi wor engol saitenin.

¹⁰ En ka awinna ekewe king,
ka amanaua Tafit noum we chon angang.

¹¹ Kopwe amanauaei seni ekewe chon oputaei mi mochen afeiengauaei,
kopwe angasaei seni fän nemenien ekewe chon ekis,
seni chokewe mi chök kapas chofana,
ra mwo nge aitiätä pöüifichir lon ar akapelmwäl.

¹² Amwo nöüch kewe ät
repwe wewe ngeni irä mi mär pöchökül lon ar alüal,

✧ **144:3:** Hiop 7.17-18; Kölf 8.4

nge nöüch kewe nengin repwe wewe ngeni üren lepwokuku mi rup pwe
alingen lon imwen king.

¹³ Amwo ach kewe lenien iseis
repwe ur ren sokopaten föün irä,
nge nöüch kewe sip

repwe oupwätü ngeröü me engol ngeröü sip lon ach kewe mälämäl.

¹⁴ Amwo nöüch kewe pwiin kow repwe nöünöü chomong,
nge esap mwet seniir nöür ika mä nöür.
Amwo esap fis puchörün riaföü lon ach kewe al.

¹⁵ Feiöchün chon ekewe mwü a toriir ekei sokun feiöch.
Feiöchün chon ekewe mwü mi eäni Kot ewe Samol mi Lapalap.

145

*Kölün mwareiti än Kot kirikiröch me manaman
145.1-21*

Echö än Tafit kölün mwareiti Kot.

¹ Üpwe ingemwareiti ai Kot me ai king,
üpwe mwareiti itom tori feilfeilachök.

² Iteiten rän üpwe mwareituk

o alinga itom tori feilfeilachök. ³ Ewe Samol mi Lapalap a tekia, aramas
meininis repwe fokun mwareiti i.

Esap wor eman a tongeni aükü an tekia.

⁴ Eu täppin aramas epwe ainga om kewe angang ngeni pwal eu,
repwe arongafeili om kewe föför mi manaman.

⁵ Repwe kapas usun lingen om tekia,

nge ngang üpwe ekinlonei usun amwararen om kewe föför.

⁶ Aramas repwe asilefeili manamanen om kewe föför mi eniwokus,
nge ngang üpwe arongafeili om tekia.

⁷ Repwe apworausä usun om kirikiröch mi lapalap
o osomong le kölü om pwüng.

⁸ Ewe Samol mi Lapalap a kirikiröch o lukpwetete,
a songomang o wöün tong ellet.

⁹ Ewe Samol mi Lapalap a kirikiröch ngeni aramas meinisin,
an tong a nom won förian meinisin.

¹⁰ Ai Samol mi Lapalap, meinisin mine ka föri repwe kilisou ngonuk,
noum chon pin meinisin repwe mwareituk.

¹¹ Repwe kapas usun lingen mwum
o apworausä usun om manaman,

¹² pwe aramas meinisin repwe silei om föför mi manaman
me amwararen lingen mwum.

¹³ Mwum eu mwü mi nom tori feilfeilachök,
nge om nemenem a nonom won ekewe täppin aramas meinisin.

Ewe Samol mi Lapalap a allükülük lon an pwon meinisin,
a eäni ümöümöch ngeni förian meinisin.

¹⁴ Ewe Samol mi Lapalap a aütai ir meinisin mi turula,
a awenätä sokürün ir mi pworotiu.

¹⁵ Mönümanau meinisin ra nennetä ngonuk fän ar apilükülük,
pun en ka ngeniir ener mongö, lupwen a tori otun.

16 Ka suki poum

o ngeni ekewe mönūmanau meinisin mine repwe menemenöch ren.

17 Ewe Samol mi Lapalap a pwüing lon meinisin mine a föri
o kirikiröch lon an kewe föföör meinisin.

18 Ewe Samol mi Lapalap a arap ngeni ir meinisin mi köri,
a arap ngeniir meinisin mi köri fän wenechar.

19 A föri mochenin ir meinisin mi niuokusiti i,
a rong ar siö o amanaueer.

20 Ewe Samol mi Lapalap a tümwünü meinisin mi echeni i,
nge a arosala ekewe aramasangau meinisin.

21 Üpwe mwareiti ewe Samol mi Lapalap,
mönūmanau meinisin repwe mwareiti itan mi pin tori feilfeilachök.

146

Kölün mwareiti Kot fän iten an föföör mi pwüing

146.1-10

1 Ousipwe mwareiti ewe Samol mi Lapalap.
Ngüni, kopwe mwareiti ewe Samol mi Lapalap.

2 Üpwe mwareiti ewe Samol mi Lapalap lon unusen manaei.
Üpwe kölün mwareiti ai Kot lupwen fansoun ai manau.

3 Ousap anomu ämi apilükülük won ekewe samol ika won eman aramas,
pun resap tongeni amanaua eman.

4 Lupwen ra mäla, ra liwiniti pwül.

Lon ewe chök rän ar kewe akot meinisin ra tala.

5 A feiöch ewe aramas a eäni än Jakop we Kot soualilis,
a anomu an apilükülük won ewe Samol mi Lapalap an we Kot,

6 ewe mi föri läng me fanüfan, pwal ewe matau
me meinisin mine a nom lor.

Ewe Samol mi Lapalap a allükülük tori feilfeilachök, ☆

7 a eäni pwüing ngeni ekewe mi riaföü ren aramas
o amongöni ekewe mi echik.

Ewe Samol mi Lapalap a angasala ekewe chon fötek,

8 a aneloi mesen ekewe mi chun.

Ewe Samol mi Lapalap a awenätä sökürün chokewe mi pworotiu
o echeni ekewe chon pwüing.

9 Ewe Samol mi Lapalap a tümwünü ekewe chon ekis,
a alisi ekewe fefin mi mä pwülüer me ekewe mi mäsen,
nge a atai mine ekewe aramasangau ra akota.

10 Ewe Samol mi Lapalap epwe nemenem tori feilfeilachök.
Chon Sion, ämi we Kot epwe nemenem won ekewe täppin aramas mein-
isin.

Ousipwe mwareiti ewe Samol mi Lapalap.

147

Kölün mwareiti Kot fän iten an äücheani Jerusalem

147.1-20

1 Ousipwe mwareiti ewe Samol mi Lapalap.

☆ 146:6: Föf 4.24; 14.15

A fokun mürina ach sipwe kölün mwareiti ach we Kot.

A fich ngeni ach sipwe kölün mwareiti i.

² Ewe Samol mi Lapalap a aüsefälietä Jerusalem,
a aliwinisefäli ekewe chon Israel mi oola.

³ A apöchöküla ir mi tatakis leluker
o filiti kinaser.

⁴ A apwüngala iteiten ekewe fü
o aita eföü me eföü ngeni itan.

⁵ Ach Samol a tekia o fokun manaman,
an mirit esap wor aükükün.

⁶ Ewe Samol mi Lapalap a atekiatä chokewe mi tekison,
nge a aturätü ekewe aramasangau lepwül.

⁷ Oupwe köl ngeni ewe Samol mi Lapalap fän kilisou.
Oupwe köl ngeni ach we Kot fiti ükülele.

⁸ I a pwölüela ekewe läng ren kuchu
o apüngätü üt won fanüfan,
a ämätä fetil won ekewe chukuchukutä.

⁹ A ngeni ekewe man ener mongö
o amongöü ekewe apansüsün ängä mi tik.

¹⁰ Ewe Samol mi Lapalap esap sani pöchökülen oris,
esap pwal pwapwa ren pöchökülen aramas,

¹¹ nge a pwapwa ren chokewe mi niuokusiti i,
ren chokewe mi eäni apilükülük an tong ellet.

¹² Ämi chon Jerusalem, oupwe mwareiti ewe Samol mi Lapalap,
en Sion, kopwe mwareiti om Kot.

¹³ Pun i a apöchöküla lokkun asalapom kewe
o afeiöchü noum kewe aramas mi nom reöm.

¹⁴ A awora kinamwe lon fanüom
o amongöü ngeni noum aramas chomong wiich mi mürina.

¹⁵ A tinato an allük won fanüfan,
an kapas a müttir säfetal.

¹⁶ A tinato sno mi pwech usun chök ülen sip
o amorafeili sno usun falang.

¹⁷ A amorätü föün ais usun chari.
Iö a tongeni pwäk ngeni patapatan?

¹⁸ Kot a kapas, ewe ais a telila.

A föri pwe an asepwäl a enien, iwe, ekewe koluk ra pupula.

¹⁹ A aronga ngeni nöün aramas an kapas,
a ngeni chon Israel an kewe allük me pwüüng.

²⁰ Ei sokun lapalap esap föri ngeni pwal eu mwü.
Ir resap silei an kewe allük.

Ousipwe mwareiti ewe Samol mi Lapalap.

148

Förien Kot meinsin ra angei föneer pwe repwe mwareiti i
148.1-14

¹ Ousipwe mwareiti ewe Samol mi Lapalap.

Oupwe mwareiti ewe Samol mi Lapalap seni won läng,
oupwe mwareiti i me won ekewe leni tekia.

² Oupwe mwareiti i, ämi nöün chon läng meininis.

Oupwe mwareiti i, ämi nöün mwichen sounfiun läng meininis.

³ Oupwe mwareiti i, ämi akkar me maram,

oupwe mwareiti i, ämi fü meininis mi tin.

⁴ Oupwe mwareiti i, ämi kewe läng mi fokun tekia,
pwal ämi kewe koluk asen ekewe läng.

⁵ Ir meininis repwe mwareiti iten ewe Samol mi Lapalap.

Pun i a allük, nge ir ra fisitä.

⁶ Kot a anüküchareer lon lenier pwe repwe nom tori feilfeilachök
ren eu allük esap tongeni tala.

⁷ Oupwe mwareiti ewe Samol mi Lapalap seni won fanüfan,

ämi kewe mönün lematau mi fokun watte me ämi kewe leni mi alolol,

⁸ ämi inefi me ütten fau, sno me kuchu,
pwal mölümöl mi apwönüetä an allük.

⁹ Oupwe mwareiti i, ämi kewe chukutekia me chukutekison meininis,

ämi kewe irä mi ua me ämi irä setar meininis,

¹⁰ ämi manmwacho me manfesir,
ämi mantötö me mansüsü meininis.

¹¹ Oupwe mwareiti i, ämi kewe kingen fanüfan me chon ekewe mwü
meininis,

ämi samol me chon nemenem meininis won fanüfan,

¹² ämi alüal me föpwül,
pwal chinlap me semirit.

¹³ Ir meininis repwe mwareiti iten ewe Samol mi Lapalap,

pun itan a tekia seni it meininis,
an ling a nom asen fanüfan me läng.

¹⁴ A apöchöküla mwün nöün aramas.

Iei mine nöün kewe chon pin meininis ra mwareiti,
ir ekewe aramasen Israel a echeniir.

Ousipwe mwareiti ewe Samol mi Lapalap.

149

Chon Israel ra angei föneer pwe repwe mwareiti Kot

149.1-9

¹ Ousipwe mwareiti ewe Samol mi Lapalap.

Oupwe eäni ngeni ewe Samol mi Lapalap echö köl mi fö,
oupwe kölün mwareiti i me lon ewe mwichen chon allükülük.

² Chon Israel repwe pwapwa ren ewe chon föriir.
Ekewe aramasen Sion repwe mwänek ren ar king.

³ Repwe mwareiti itan fän pworuk
o köl ngeni fän pisekin kaktai me ükülele.

⁴ Pun ewe Samol mi Lapalap a pwapwaäsini nöün aramas,
a alinga ekewe chon tipetekison ren win.

⁵ Ekewe chon pin repwe meseik lon ling,

repwe köl fän pwapwa lon kier kewe.

⁶ Kapasen mwareiti Kot fän leüömong epwe nom lon awer,
nge ekewe ketilas mi seisei me rüepék repwe nom lon pöür,

⁷ pwe repwe ngeni chon ekewe mwü chappen ar föför
o apwüngü ekewe aramas.

⁸ Repwe föti ar kewe king ren sein,
nge ar kewe aramas tekia ren selimächä,

⁹ pun repwe eäni apwüng wor usun Kot a fen allük.

Ren ei nöün kewe mi pin meinsin ra ling ren.

Ousipwe mwareiti ewe Samol mi Lapalap.

150

Sipwe mwareiti Kot

150.1-6

¹ Ousipwe mwareiti ewe Samol mi Lapalap.

Oupwe mwareiti Kot me lon lenian mi pin,
oupwe mwareiti an manaman lon läng.

² Oupwe mwareiti i ren an kewe föför mi manaman,
oupwe mwareiti an tekia esap wor aükükün.

³ Oupwe mwareiti i ren tikin rappwa,
oupwe mwareiti i ren ükülele me kitar.

⁴ Oupwe mwareiti i ren pisekin kaktai me pworuk,
oupwe mwareiti i ren pisekin ettik mi wor saitenin, pwal ren aangün.

⁵ Oupwe mwareiti i ren sokopaten pisekin kaktai mi tikiken,
oupwe mwareiti i ren sokopaten pisekin kaktai mi osomong.

⁶ Mönümanau meinsin repwe mwareiti ewe Samol mi Lapalap.
Ousipwe mwareiti ewe Samol mi Lapalap.